


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

# **Nuevo Testamento en mixteco** **New Testament in Mixtec, Atatláhuca (MX:mib:Mixtec, Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

## **Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
 9665e546-39d0-5bd5-8b10-38916a94951f

## Contents

SAN MATEO . . . . .	1
SAN MARCOS . . . . .	56
SAN LUCAS . . . . .	90
SAN JUAN . . . . .	147
HECHOS . . . . .	189
ROMANOS . . . . .	243
1 CORINTIOS . . . . .	266
2 CORINTIOS . . . . .	287
GÁLATAS . . . . .	302
EFESIOS . . . . .	310
FILIPENSES . . . . .	318
COLOSENSES . . . . .	323
1 TESALONICENSES . . . . .	328
2 TESALONICENSES . . . . .	333
1 TIMOTEO . . . . .	336
2 TIMOTEO . . . . .	342
TITO . . . . .	346
FILEMÓN . . . . .	349
HEBREOS . . . . .	351
SANTIAGO . . . . .	368
1 PEDRO . . . . .	374
2 PEDRO . . . . .	381
1 JUAN . . . . .	385
2 JUAN . . . . .	391
3 JUAN . . . . .	392
JÚDAS . . . . .	393
APOCALIPSIS . . . . .	395

## JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo*

*(Lc. 3.23-38)*

<sup>1</sup> Yáha cúu lista ñayuu yucūn jeē ní quiji Jesucristo. Te máá yá ní quiji nuū yucūn rey David, te David ní quiji nuū yucūn Abraham.

<sup>2</sup> Abraham ní cuu de tátá Isaac, te Isaac ní cuu de tátá Jacob, te Jacob ní cuu de tátá Judá jíin táca ñani i. <sup>3</sup> Te Judá ní cuu de tátá Fares jíin Zara, te náná ndindúú i ní cuu Tamar. Te Fares ní cuu de tátá Esrom, te Esrom ní cuu de tátá Aram. <sup>4</sup> Te Aram ní cuu de tátá Aminadab, te Aminadab ní cuu de tátá Naasón, te Naasón ní cuu de tátá Salmón. <sup>5</sup> Te Salmón ní cuu de tátá Booz, te náná i ní cuu Rahab. Te Booz ní cuu de tátá Obed, te náná i ní cuu Rut. Te Obed ní cuu de tátá Isai. <sup>6</sup> Te Isai ní cuu de tátá David, tēe ní cuu rey. Te rey David ní cuu de tátá Salomón, te náná i, xīhna gā ní cuu ña ñasihí Urías.

<sup>7</sup> Te Salomón ní cuu de tátá Roboam, te Roboam ní cuu de tátá Abías, te Abías ní cuu de tátá Asa. <sup>8</sup> Te Asa ní cuu de tátá Josafat, te Josafat ní cuu de tátá Joram, te Joram ní cuu de tátá Uzías. <sup>9</sup> Te Uzías ní cuu de tátá Jotam, te Jotam ní cuu de tátá Acáz, te Acáz ní cuu de tátá Ezequías. <sup>10</sup> Te Ezequías ní cuu de tátá Manasés, te Manasés ní cuu de tátá Amón, te Amón ní cuu de tátá Josías. <sup>11</sup> Te Josías ní cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyucú i yūcuán, te Jeconías ní cuu de tátá Salatiel. Te Salatiel ní cuu de tátá Zorobabel. <sup>13</sup> Te Zorobabel ní cuu de tátá Abiud, te Abiud ní cuu de tátá Eliaquim, te Eliaquim ní cuu de tátá Azor. <sup>14</sup> Te Azor ní cuu de tátá Sadoc, te Sadoc ní cuu de tátá

Aquim, te Aquim ní cuu de tátá Eliud. <sup>15</sup> Te Eliud ní cuu de tátá Eleazar, te Eleazar ní cuu de tátá Matán, te Matán ní cuu de tátá Jacob. <sup>16</sup> Te Jacob ní cuu de tátá José, tēe ní cuu yíi María. Te María ní cuu ña náná Jesús, Yaā naní Cristo.

<sup>17</sup> Te nde Abraham te nde David ní iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ní iyo inga uxī cuūn yucūn. Te nde ná ní jengoo i preso te nde ní cacu Cristo, suni ní iyo inga uxī cuūn yucūn.

*Jeē ní cacu Jesucristo*

*(Lc. 2.1-7)*

<sup>18</sup> Te jeē ní cacu Jesucristo, súcuan ní cuu: Náná yā María, je ní cundaā jeē quijnáhan ña jíin José. Te nde ná tu quijnáhan ña jíin de, te ní jecūhun séhe ña ní sáha Espiritu Santo. <sup>19</sup> Te José, tēe quijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sāhi jéé ma quijnáhan de jíin ña. <sup>20</sup> Te ní ní súcuan nácani ní de, te jíin jéni ní quee-ni ñn ndajéhé máá Jítoho yō Yaā Dios nuū de, te ní cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū máá Espiritu Santo. <sup>21</sup> Te scácu ña ñn séhe yíí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

<sup>22</sup> Súcuan ní cuu tǎcá jniñu yáha, návāha squícu jnūhun Jítoho yō Yaā Dios jeē ní cahān tēe ní nacani jnūhun ya nde jenahán. Te suhva ní cahān de:

<sup>23</sup> Coó ñn sūchi síhí, te nihīn séhe i, te scácu i ñn séhe yíí, te conani sūchí un Emanuel. Achí tutu. Te síhví yáha cúní cahān: Yaā Dios ndeé yá jíin yó.

<sup>24</sup> Te ní natahū ní José, te ní sáha de nájnūhun ní cahān ndajéhé Jítoho yō jíin de. Te ní jeca de María ní cuu ña ñasihí de. <sup>25</sup> Te tu ní quíxí

de jíin ña, chi nde ni scácu ña sēhe yíí nuú ña. Te ni snaní de i Jesús.

*Jeē ní quijicoo tēe mago nuū yā*

## 2

<sup>1</sup> Te ná ni cacu Jesús ini ñuu Belén ndañúú Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. <sup>2</sup> Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñuhún ná i, áchí de.

<sup>3</sup> Te rey Herodes, ná ni jini de jñuhun yáha, te ni cunéé ni de, nde jíin táca ñayuu ñuu Jerusalén. <sup>4</sup> Te ni nastútú de táca sūtū cácujuhnu jíin tēe cástéén tutu ley Yaā Dios nuū ñayuu. Te ni cajñuhún de tēe un ndé nuū cacu Cristo achí tutu. <sup>5</sup> Te ni cacachí nuū de:

Ini ñuu Belén ndañúú Judea. Chi suhva cáhán nuū tútu ni tee tēe ni nacani jñuhun ya nde jenahán:

<sup>6</sup> Te róhó ñayuu ñuu Belén ndañúú Judá,

cújuhnu ga ñuu rō vēsú táca gá jeē cújuhnu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios.

Achí tutu.

<sup>7</sup> Yūcuán na te Herodes ni cana sáhi de táca tēe ndíchí un jēe naní mago. Te ni cajñuhun yúcún de ndé quívi ní cane quími ún. <sup>8</sup> Te ni tají de tēe un quíngoo de ñuu Belén. Te ni cahán de:

Cuángoo ní te cajñuhun yúcún ní ndé nuū íne sūchi lúli un. Te núu ni nanihín ní i, te quijicoo ní castuhun ní nuū ná, návaha suni maá ná quichiñuhún ná i, áchí rey.

<sup>9</sup> Te jeē ní cajini de jñuhun ni cahán rey, te cuángoo de. Te maá quími cáhnu jeē ní cajito de ichi núú

cáne niāndii, yósnúu nuū de cuahán nde ni jinū nuū íne sūchi lúli un, te yūcuan ní jecuiñí. <sup>10</sup> Te ná ni cajito de jeē ní jecuiñí quími ún, te yōhoyo ni cacusiñí ni de. <sup>11</sup> Te ni jinūcoo de ni quívicoo de ini vehe, te ni cajito de nuū sūchi lúli un jíin náná i María. Te ni cajecuiñí yití de nuū i, te ni cachiñuhún de i. Te ni canune de yejnū de, te ni casocō de oro jíin sūje cútú jíin sūje uvuā nuū i. <sup>12</sup> Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanhun de ñuu de.

*Jeē ní jinu José cuángoo de nación Egipto*

<sup>13</sup> Te náa cuánhun táca tēe mago, te ni scóto jēni José jeē ñn ndajéhe maá Jítoho yō Yaā Dios ni cahán yā jíin de:

Ndocuiñí te cunu ró quíngoo ró jíin sūchi lúli jíin náná i nde nación Egipto. Te yūcuán coyūcu ró nde castuhun rí nuū rō. Chi Herodes je yajni nanducú de sūchi lúli jíin jee cáhni de i. Achí yá.

<sup>14</sup> Te ni natahū ni José. Te cuángoo de jíin sūchi lúli jíin náná i, te ñuú ní cajica de cuángoo de nación Egipto. <sup>15</sup> Te ni coyūcú de yūcuan ndé ni jihí Herodes. Te sūcuan ni cuu návaha squícu jñuhun Jítoho yō Yaā Dios jeē ní cahán tēe ni nacani jñuhun ya nde jenahán: Nde nación Egipto ni cana rí Sēhe rí vēji i, áchí Yaā Dios, achí tutu.

*Jeē ní ndacu Herodes jniñu jeē na cúu táca sūchi yíí lúli*

<sup>16</sup> Yūcuán na te Herodes ni jini de jeē sūcuan ni castáhú tēe mago un de, te yōhoyo ní quití ni de. Te ni tají de soldado cuángoo, te ni cajehni táca sūchi yíí lúli jēe uú cuiyā jíin jēe yiquín gá jeē cáyūcú ini ñuu Belén jíin táca ñuu yajni. Chi je ni cajñuhun yúcún de táca tēe mago un nasaa tiempo ni cuu jeē ní cacu Jesús. <sup>17</sup> Te sūcuan ni squícu jñuhun ni cahán Jeremías, tēe ni nacani

jnūhun Yaā Dios nde jenahán, chi ni cahán de:

<sup>18</sup> Iní región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña, te tu cácuu ña ndusñ ni ña, chi ni cajihī i.

Achí tutu.

<sup>19</sup> Yūcuán na te ni jihī Herodes. Te ni scóto jēni José jeē ñn ndajéhé Jítoho yō Yaā Dios ni cahán yā jíin de nuū ndeé de nación Egipto. <sup>20</sup> Te ni cahán yā jíin de:

Ndocuññi te nuhun rō ñuu rō Israel jíin sūchi lúli jíin náná i. Chi je ni cajihī tēe cánducú cahni sūchi lúli jíin nuú. Achí ndajéhé.

<sup>21</sup> Yūcuán na te ni ndocuññi de, te cuanuhun de nación Israel jíin sūchi lúli jíin náná i. <sup>22</sup> Te ni nihīn de jnūhun jeē Arquelao ni nucuññi de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuango de. <sup>23</sup> Te ni jinū de yūcuán, te ni coyūcú de ñuu naní Nazaret. Súcuu ni cuu návāha squícu jnūhun ni cacahán tēe ni canacani jnūhun Yaā Dios nde jenahán. Chi ni cacachi de jeē cahán ñayuu jeē tēe ñuu Nazaret cúu Jesús.

*Jnūhun Juan tēe scuándute*  
(Mr. 1.1-8; Lc. 3.1-9, 15-17;  
Jn. 1.19-28)

### 3

<sup>1</sup> Te ni yāha tiempo, te ni jinū Juan tēe scuándute nde nuū ñūhun téhé ndañūū Judea, nácani de jnūhun suhva:

<sup>2</sup> Nacani ni rō jijnáhan ró jēe stóo ró cuéchi ró, chí je ni cuyajni Yaā ndeé andiví jēe ndacu ya jniñu nuū rō. Achí de.

<sup>3</sup> Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñn tēe cana jee nde nuū ñūhun téhé:

Sátūhva ró máa rō jijnáhan ró, chí quee maá Jítoho yō.

Te sáha ró jniñu ndaa, chí vēji ya, achi de.

Achí Isaías.

<sup>4</sup> Te sahna ñūhun Juan cúu ixi quití nání camello, te núhni ñn cín-turón ññ chīji de. Te jeē técu de cúu táca ndicuéhyí jíin ndúxi yocō. <sup>5</sup> Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ni quijicoo i nuū de.

<sup>6</sup> Te ni canacani ndaa i cuéchi i nuū Yaā Dios, te ni scuándute de i ini yūte Jordán.

<sup>7</sup> Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahán de jíin:

Va séhe coō cácuu ró, chí xeēn rō nájñūhun coō. ¿A cájeni ni rō jeē cuu cunu ró cácu ró núū castigo xeēn jeē quíji? <sup>8</sup> Núu súcuu te sáha ró jniñu váha, te súcuu stéen rō jeē ní canacani ndije ni rō jeē stóo ró cuéchi ró. <sup>9</sup> Te ma cáni ni rō cahán rō jeē cuu cácu ró síquī jeē cácuu ró yúcuu Abraham. Chí cáhan rī jíin ró jeē cuu sáha Yaā Dios jeē táca yūū yáha nduu séhe Abraham jeē candíje váha, te núu cúní yā. <sup>10</sup> Te cácuu ró nájñūhun nundéhé jeē tu jéhe ndehē váha. Te vijna je iyó túhva Yaā Dios jeē cuáha ya castigo xeēn, nájñūhun je iyó túhva ñn cāa jeē cahnde nde yoho yujnu. Núu súcuu te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñūhún.

<sup>11</sup> Te ruhū chí jíin ndute scuándute ri rohó, te yūcuu cúu jeē stéen rō jeē ní canacani ni rō jeē stóo ró cuéchi ró. Te Yaā jeē quíji, chí nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñūhún. Te Yá quíji chí cújéhnu ndasí yá. Chí tú na vé jéhnu cuítí cúu ri nuū yā, ni jeē cuajniñu ri nuū

yā vēsú ìn jniñu lúli gá nájñuhun jeē quénehen ri ndijēn yā. <sup>12</sup> Te sáha ya nájñuhun sáha tēe scánda trigo, chí sásñin ya ñayuu vāha jíin ñayuu cunéé, nájñuhun cúndoo trigo jeē quénda sñin paja. Te nastútú yá trigo yā ndiví ini yacā yā. Te paja chí jnaa yā nuū ñuhún jeē ma ndahvá cuiti. Achí Juan.

*Jeē ní jendute Jesús  
(Mr. 1.9-11; Lc. 3.21-22)*

<sup>13</sup> Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. <sup>14</sup> Te tu ní cúni Juan scuándute de ya, chí ni cahān de jíin yá:

Sa suhva cánuú jeē scuándute máá ní sāñá, ¿te ndese cúu jeē sa nuū ná vēji ní? áchí de.

<sup>15</sup> Te ni cahān Jesús jíin de:

Tuú chí sáha ró, chí súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. <sup>16</sup> Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñuhun ìn paloma, te ni quee xiní yā. <sup>17</sup> Te ichi ándiví ni cahān ìn jñuhun:

Yāha cúu Sēhe ri jeē maní ndasí rí jíin, te yōhoyo cúsiñ ní rí jíin, áchí.

*Jeē ní jito ndee jexeén Jesús  
(Mr. 1.12-13; Lc. 4.1-13)*

## 4

<sup>1</sup> Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chí cúni jeē sáha ya cuēchi.

<sup>2</sup> Te ni iyo ndite ni yā uū xico nduú uū xico ñuú, sáa te jíi yā sōco.

<sup>3</sup> Te ni quee maá jéxeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yāha na ndúu staā caji rō, achí.

<sup>4</sup> Te ni cahān yā jíin:

Tuú chí yósó núu tútu ì: Nasúu máni máá jíin stáa cátecu ñayuu, chí suni jíin táca jñuhun cáhán Yaā Dios, achí yá.

<sup>5</sup> Yūcuán na te cuahān jexeén un jíin yá nde ñuu ì Jerusalén. Te ni jeni ya xiní torre templo. <sup>6</sup> Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñuhun, chí jnama ya rohó. Chí yósó núu tútu:

Tejníñu ya ndajéhé yā quijicoo coto rohó.

Te cunundee yā rohó jíinahan ya, návāha ma cáchihí ró jéhé rō nuū yuú.

Achí tutu. Achí jexeén.

<sup>7</sup> Te ni cahān Jesús:

Tuú chí suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

<sup>8</sup> Te jexeén un ní jeca tucu ya cuahān jíin yá nde xiní ìn yucu súcún ndasí. Te ni steén táca nación ní cáhnu ñayiví núu yā, te yōhoyo luu cáa ndihi. <sup>9</sup> Te ni cahān jíin yá:

Táca ñuu yāha cuāha ri nuū rō, te núu cuiñi yítí ró chíñuhún ró ruhú, achí.

<sup>10</sup> Yūcuán na te ni cahān Jesús nuū jexeén:

Satanás, cujiyo quihñ rō, chí yósó núu tútu jeē chíñuhún ñayuu maá Jitoho i Yaā Dios, te nuū maá-ni ya cuajníñu i. Achí yá.

<sup>11</sup> Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

*Jeē ní quejéé Jesús nácani ya jñuhun región Galilea*

*(Mr. 1.14-15; Lc. 4.14-15)*

<sup>12</sup> Te ná ni nihñ Jesús jñuhun jeē íne Juan vecāa, te cuanuhun yā región Galilea. <sup>13</sup> Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un íne yumar; máá región Zabulón jíin Neftalí. <sup>14</sup> Te súcuan ni squícu

jnūhun ni tee Isaías, tēe ni nacani jnūhun Yaā Dios nde jenahán:

<sup>15</sup> Región Zabolón jíin Neftalí, ichi jeē yíhi yumar, lado yūte Jordán nuū cáne niāndii, jíin región Galilea nuū cáyūcú ñayuu tācá nación tu jíin jnūhun ya.

<sup>16</sup> Ñayuu ún chi nájnūhun cáyūcú i nuū néē, te coto i nájnūhun ñin luz cáhnu. Te ñayuu je yajni naa, nihīn i jnūhun váha ndasí, suu jnūhun jeē jnama ya anuá i. Achí Isaías.

<sup>17</sup> Te nde quivī yúcuan ní quejéé Jesús nácani ya jnūhun, te ni cahān yā suhva:

Nacani ni rō jijnáhan ró jéē stóo ró cuéchi ró, chí je ni cuyajni Yaā ndeé andiví jéē ndacu ya jniñu nuū rō, achí yá.

*Jeē ní cana ya cuñ tēe jnā chācá*  
(Mr. 1.16-20; Lc. 5.1-11)

<sup>18</sup> Te jica Jesús yumar Galilea cuahān yā. Te ni jito ya nuū uú jnáhan ñani. Te ñin de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar. <sup>19</sup> Te ni cahān yā jíin de:

Condiquīn ruhū na quíhín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

<sup>20</sup> Yūcuán na te ni castóo-ni de ñunu de, te ni candiquīn de ya.

<sup>21</sup> Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñi de ñunu de. Te suni ní cana ya de jeē cóndiquīn de ya. <sup>22</sup> Te ni castóo-ni de tátá de jíin barco, te ní candiquīn de ya cuangoo de.

*Jeē ní stéén yā nuū cuehē ñayuu*  
(Lc. 6.17-19)

<sup>23</sup> Te ni jica cuu Jesús ní región Galilea, ni stéén yā jnūhun ini tācá

vehe iī jeē cúu sinagoga. Te ni nacani ya jnūhun váha ndese ndácu Yaā Dios jniñu. Te ni nasávaha ya ñayuu cácuñ tācá-ni cuehyí. <sup>24</sup> Te ni jite núu jnūhun ya cuahān ní región Siria. Te nuū yā ni caquin-deca i tāca ñayuu cácuñ, ñayuu cándoho tijni nuū cuehyí, jíin jéē jetú, jíin jéē ñūhun tachí ini, jíin jéē jíhí yíhí, jíin jéē ní íjin. Te ni nasávaha ya i jíin náhan i. <sup>25</sup> Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin táca ñuu ichi núu cáne niāndii yūte Jordán, ni cacondiquīn i ya.

*Jeē ní nacani ya jnūhun nde nuū yúcu*

## 5

<sup>1</sup> Te ni jito Jesús nuū ñayuu cuehē. Te ni caa ya yucu cuahān yā, te ni cucóo ya. Te tēe cáscuáha jíin yá, ni jinūcoo de nuū yā yūcuán. <sup>2</sup> Te ni quejéé yá ni stéén yā tāca jnūhun yáha nuū de:

*Jnūhun yōhyo ndetū*  
(Lc. 6.20-23)

<sup>3</sup> Yōhyo ndetū ñayuu jeē cánacuni i jeē tu íyó váha ánuá i siquī cuéchi i, chí je ni quivícoo i ndaha Yaā andiví jéē ndácu ya jniñu nuū i.

<sup>4</sup> Yōhyo ndetū ñayuu cácuñhyá ni, chí ndusī ni i sáha Yaā Dios.

<sup>5</sup> Yōhyo ndetū ñayuu cáhīyo vītá suchí ini, chí ni jejnūhun ya jeē cūtahū i ñayiví.

<sup>6</sup> Yōhyo ndetū ñayuu jeē nájnūhun jeē cájii i sōco cájichí i, súcuan jnāā i sáha i jniñu ndaā, chí máá yá chindéé ñáhán yá i jeē cuu sáha i.

<sup>7</sup> Yōhyo ndetū ñayuu cákundáhú ni jnáhan, chí suni cundáhú ni Yaā Dios i.

<sup>8</sup> Yōhyo ndetū ñayuu cáhīyo ndoo ini anuá, chí coto i nuū Yaā Dios.

<sup>9</sup> Yōhyo ndetū ñayuu cánasamaní jnáhan, chí cahān Yaā Dios jeē sēhe ya cácuu i.



10 'Yōhōyō ndetū ñayuu jeē cájito xeēn inga ñayuu i siquī jeē casáha i jniñu ndaā, chí je ni quivícoo i ndaha Yaā andiví jéē ndácu ya jniñu nuū i.

11 'Yōhōyō ndetū maá ró jijnáhan ró núu cácahān neé i nuū rō jeē siquī ruhū, te coto xeēn i rōhó, te stáú yáhu i rōhó, vēsú tú cuēchi ró. 12 Na cúsi ni rō jijnáhan ró núu súcuan, te sa víhyá gā cusī ni rō, chí cáhnu ndasí coo tahū rō nde andiví. Chí suni súcuan ni cajito xeēn i táca téē ni canacani jnūhun Yaā Dios jeē ní quijicoo xīhna gā vēsú rohó.

*Jnūhun yátá síquī ñī jín síquī luz  
(Mr. 9.50; Lc. 14.34-35)*

13 'Maá ró jijnáhan ró cácejniñu ró ini ñayiví nájñūhun jéjníñu ñī nuū cúñu návāha tú tehyū. Te núu ñī ún na náa jeē uhvuá, ¿te ndese nduu uhvuá tucu? Tuá cuajniñu cuiti gā, chí sa cate ñayuu te cueñu i siquī.

14 'Maá ró cácuu nájñūhun luz jeē steén ini anuá ñayuu ñayiví. Te cácuu ró nájñūhun ñī ñuu íne xīnī yúcu, jeē ma cúu quisáhi. 15 Te ni tu nástīn ñayuu ñī lámpara te chune i chíji cajón, chí sa suhva jéni i nuū sucún, návāha cundijin nuū táca jéē cáyūcú ini vehe. 16 Te suni súcuan na steén rō luz maá ró nuū táca ñayuu, te suu cúu jeē cúni i jniñu váha casáha ró, te cahān i jeē yōhōyō váha Yaā cúu Tátá rō jeē ndeé yá andiví.

*Jeē ni steén yá síquī ley Yaā Dios*

17 'Ma cáni ni rō jijnáhan ró jéē véji ri snāá rī ley jeē ni jéhe Yaā Dios nuū Moisés, jín jéē snāá rī táca jnūhun ni cacahān téē ni canacani jnūhun ya jenahán. Tú véji ri jeē snāá rī, chí sa suhva jeē steén cají rí jnūhun ndíso. 18 Chí jendaá cahán rī jín ró jeē núu níni íyó andiví jín ñayiví, te ma náa cuiti ni ñī punto ni ñī letra nuū tútu ley yā, chí nde na squícu táca ndiñi jnūhun jeē cahán. 19 Núu súcuan te núu ñī ñayuu tu squícu i ñī jnūhun yáha jéē

ndácu ley yā, vēsú ñī jnūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñī ñayuu squícu i te steén i jeē squícu ñayuu, yūcuán na te cujéñu i ichi andiví nuū ndácu Yaā Dios jniñu. 20 Chí cáhán rī jín ró jeē núu tú coo ndaā gā jniñu casáha ró vēsú jniñu casáha téē cásteén tutu ley yā jín téē grupo fariseo, te ma quivícoo cuiti rō ndaha Yaā andiví jéē ndacu ya jniñu nuū rō.

*Jeē ni steén yá jeē ma quití ni yō  
(Lc. 12.57-59)*

21 'Je ni cajini ró jnūhun ni cacahān jín ñayuu jenahán, jeē ma cáhni i ndīyí, te na-ni ñayuu núu cahni i ndīyí, te cundaā cuēchi i nuū táca tōhō, achí. 22 Te ruhū chí cáhán rī jín ró, vēsú núu máá jéē quití ni ñī ñayuu jito i jnáhan i, suni cundaā siquī cuéchi i ún. Te núu ñī ñayuu cahān neé i nuū jnáhan i, núu súcuan te cundaā cuéchi i un núu justicia cujéñu ga. Te núu ñī ñayuu cahān i nuū jnáhan i: Róhó jéē canéé íi, achi i, núu súcuan te quiví i nuū ñūhún infierno te núu ma nácani ni i.

23 'Jeē yúcuu te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró, 24 núu súcuan te squéndō ró jéē socó rō ún xiin altar, te xīhna gā quihīn rō ndumanī rō jín jnáhan ró. Yūcuán na te nandicó ró socó rō.

25 'Te núu ñī ñayuu quihīn i jín ró nuū tohó jeē cacān i cuéchi siquī rō, núu súcuan te níni cuáhān rō jín i ichi te sándaā maá ró jín i, návāha ma squíví i róhó núu juez. Chí juez siáha de róhó núu policía, te chune de róhó vecāa. 26 Te jendaá cahán rī jín ró jeē ma quanda cuiti rō yūcuán, chí nde chunaa rō ndiñi cuiti xūhun jéē cájicān de.

*Jeē ni stéén yā jeē ma cósiquí ndéē jnāhan*

<sup>27</sup> Ni cajini ró jnúhun ni cacahān jenahán jeē ma cósiquí ndéē jnāhan ñayuu. <sup>28</sup> Te ruhū chi cáhán rī jín ró jeē núu ñn tēe ndéhe de nuū ñn ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

<sup>29</sup> Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návaha tuá sáha ró cuéchi. Chi váha gā jeē náā ñn tinūu ró vésú jeē cóo ndíhi yíqui cúñu ró te quihīn ró infierno. <sup>30</sup> Te núu ndaha váha ró sáha jeē quívi ró cuéchi, váha ga cahnde ró te scáne ró, návaha tuá sáha ró cuéchi. Chi váha ga jeē náā ñn ndaha ró vésú jeē cóo ndíhi yíqui cúñu ró te quihīn ró infierno.

*Jeē ni stéén yā jeē ma ndusñn jnāhan*

(Mt. 19.9; Mr. 10.11-12; Lc. 16.18)

<sup>31</sup> Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñn jín ña. <sup>32</sup> Te ruhū chi sa cáhán rī jín ró jeē núu ñn tēe stóo de ñasihí de, te núu nasūu jéē tājni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu ñn tēe condeca de ñahan ní ndusñn, suni casíquí ndéē de ña.

*Jeē ni stéén yā siquí jnúhun jéjnūhun téyí*

<sup>33</sup> Te suni ni cajini ró jnúhun jeē ni cáhán jín ñayuu nde jenahán: Núu ni jejnūhun téyí ró jeē squícu ró, jító jínūu Yāā Dios, núu súcuan te cánuú squícu ró jéē ni cáhán teyí ró un, áchí. <sup>34</sup> Te ruhū chi cáhán rī jín ró jijnáhan ró jeē ní ñn siquí jníñu ma cahán teyí ró nde jín síhví Yāā Dios, ni ma cahán teyí ró jeē jító jínūu yā. Te núu jéjnūhun téyí ró te tú váha jeē ndácunehen ró andívi ni ñayívi. Chi andívi cúu nuū ín mesa nuū ndácú Yāā Dios jniñu. <sup>35</sup> Te ñayívi cúu nájñūhun teyū nuū ín

jehe yā. Te ni ma ndácunehen ró ñuu Jerusalén, chi suu cúu ñuu maá Yāā cúu Rey cujéñu. <sup>36</sup> Ni ma cahán ró jeē na cóndee cuéchi siquí ró núu tu squícu ró. Ma cahán ró súcuan, chi ma cúu cuítí sáha ró jéē ni ñn ixi xíní ró nducujín chí ndujnúu. <sup>37</sup> Chi suhva-ni cahán ró: Cuu, achi ró. Tuú, achi ró. Chi núu chisóó gá ró jnúhun cahán ró, te nuū jexeén vēji.

*Jeē ni stéén yā jeē ma cuáha yó jéē ndútahū ñayuu*

(Lc. 6.29-30)

<sup>38</sup> Ni cajini ró jnúhun jeē ni cáhán jín ñayuu jenahán: Núu ñn tēe ndahva de tinūu jnāhan de, suni súcuan na ndáhva tinūu de. Te núu ñn tēe stáva de jnúhun jnāhan de, suni súcuan na stáva jnúhun de, áchí. <sup>39</sup> Te ruhū chi sa cáhán rī jín ró: Ma nácuáha ró jéē ndútahū tēe sáha ndeváha jín ró. Chi sa núu ndé tēe cani de yíqui núu lado váha ró, te váha ga suni cuáha ró inga lado cani de, vésú jeē nácuáha ró jéē ndútahū de. <sup>40</sup> Te núu ndé tēe stáu yáhu de róhó te quénde de camisa ró, suni cuáha ró jnúhun jeē na quíhín de jín ndé ticāchi ró. <sup>41</sup> Te núu ndé tēe scáca de róhó jéē condiso ró ndajníñu de ñn kilómetro, te caca ró úu kilómetro jín de. <sup>42</sup> Te na-ni ñayuu núu jícán i ndajníñu ró, te cuáha ró núu i. Te ñayuu jícán núu ndajníñu nuū ró, ma sasáhán ró cuáha ró núu i.

*Jnúhun jeē cundáhú ni yō ñayuu cájito uhū yohó*

(Lc. 6.27-28, 32-36)

<sup>43</sup> Te suni ni cajini ró jnúhun jeē ni cáhán nde jenahán: Cundáhú ni ró ñayuu cáhíyo maní jín ró, te coto uhū ró ñayuu cájito uhū rohó, áchí. <sup>44</sup> Te ruhū chi sa cáhán rī jín ró: Cundáhú ni ró ñayuu cájito uhū rohó. Te cacān ró jeē váha coo ñayuu cácahān ndeváha siquí ró. Te sáha váha ró jín ñayuu cáquiñí ni nuū ró. Te cacān tahú ró jehe

ñayuu cácahān neé nuū rō te cájito xeēn i rōhó. <sup>45</sup> Te súcuan stéén rō jeē cácuu rō séhe máá Tátá rō, Yaā ndeé andiví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin nuū ñayuu casáha jniñu neé. <sup>46</sup> Chi núu iyó mání rō jíin máá-ni ñayuu jeē maní jíin rō, te tú na tahū nihín rō nuū yā. Chi nde tēe cástútú xúhun renta jeē castáhú, suni súcuan casáha de. <sup>47</sup> Te núu máni jnāhan rō cáhān yíñuhún rō jíin, ¿te na vé jeē váha ga sáha rō núu súcuan? Chi nde ñayuu tu cácañdíje Yaā Dios, suni súcuan casáha i. <sup>48</sup> Núu súcuan te ndaā na cóo ndihi jeē sáha rō, nájnūhun iyó ndaā ndihi jeē sáha Tátá rō, Yaā ndeé andiví.

*Jeē ni stéén yā ndese sáha yó jniñu váha*

## 6

<sup>1</sup> Te jeē sáha rō táca jniñu váha nuū Yaā Dios, coto rō jéē ma sáha rō máá síquī jeē cuni ñayuu te cuajnúhún i rōhó. Chi núu súcuan sáha rō, te tú na tahū rō cuāha máá Tátá rō, Yaā ndeé andiví. <sup>2</sup> Jeē yúcuan te jeē sáha rō caridad, te ma sáha rō jéē cuni táca ñayuu, nájnūhun casáha tēe stáhú-ni, cáhiin de nuū cúchitú ñayuu ini táca vehe i sinagoga jíin nuū yáhu. Chi súcuan casáha de návāha cuajnúhún ñayuu de jeē váha casáha de. Jendaá cahán rī jíin rō jeē tahū de cúu jeē jenuhún ñayuu de. <sup>3</sup> Te rōhó jíjnāhan rō, núu casáha rō caridad, te sáha yuhu rō, návāha nde amigo váha rō tú cuni jeē sáha rō. <sup>4</sup> Súcuan na sáha yuhu rō caridad. Te máá Tátá rō jeē jito ya jeē sáha yuhu rō, #n quiví te cuāha ya tahū cuu rō.

*Jeē ni stéén yā ndese cacān tahú yō*

*(Lc. 11.2-4)*

<sup>5</sup> Te jeē cájicān tahú rō, te ma sáha rō nájnūhun casáha tēe stáhú-ni. Chi cánujnahan ni de cuiñi

de cacān tahú de nuū iyó chitú ñayuu ini táca vehe i sinagoga jíin táca yíqui yáhu, návāha cuni ñayuu te cuajnúhún i de. Jendaá cahán rī jíin rō jeē máá yúcuan-ni cúu tahū jeē nihín de, suu jeē jejnúhún ñayuu de. <sup>6</sup> Te rōhó jíjnāhan rō, núu cájicān tahú rō, te ndiví rō ini vehe rō te casi rō yehyí. Te cacān tahú rō nuū máá Tátá rō, Yaā ndeé yuhu jíin rō. Yūcuán na te máá Tátá rō jeē jito ya jeē súcuan sáha yuhu rō, sáha ya jeē jíicān rō.

<sup>7</sup> Te jeē cájicān tahú rō, te ma cahán saā-ni rō jnúhun jeē tu cájecūhun ni rō, nájnūhun casáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahán i, te sáa te cuni sōho ya, te tuú. <sup>8</sup> Núu súcuan te ma sáha rō nájnūhun casáha máá i. Chi máá Tátá rō, je jíin yā na vé cájini ñúhún rō nde ná tu cacān rō nuū yā. <sup>9</sup> Núu súcuan te suhva cacān tahú rō:

Tátá máá ná jíjnāhan ná jéē ndeé ní andiví,

níní na cóo yíñuhún ná nuū ní, chi Yaā ií cúu ní.

<sup>10</sup> Te ñúhún ni na jéē yachí quiiji quiví ndacu ní jniñu ní ñáyiví yáha.

Te na cóo táca jniñu nújnahan ni ní, nájnūhun iyó ini andiví, súcuan na cóo ini ñayiví.

<sup>11</sup> Staā jeē cátecu na táca quiví, cuāha ní nuū ná vijna.

<sup>12</sup> Te cone cahnu ni ni núu táca cuēchi casáha ná núu ní,

nájnūhun cáhine cáhnu ni na nuū ñayuu casáha cuēchi nuū ná.

<sup>13</sup> Te ma cuáha ni jnúhun jeē coto ndee jexeén saña,

chi sa suhva jnama ní saña núu táca jéē neé.

Chi máá ní cúu Yaā ndácu jniñu, te jnā ní poder,

te yōhyo luu cújéhnu ní ní cáni. Súcuan na cóo. Amén.

Achi rō jíjnāhan rō.

<sup>14</sup> Chi núu cone cahnu ni rō nuū ñayuu casáha cuēchi nuū rō, te suni

súcuan cone cáhnu ni maá Tátá rō andiví nuū cuēchi rō. <sup>15</sup> Te núu ma cóne cáhnu ni rō nuū ñáyuu casáha cuēchi nuū rō, te suni súcuan ma cóne cáhnu ni maá Tátá rō nuū cuēchi rō jijnáhan rō.

*Jeē ni stéén yā siquī jnúhun condite ni*

<sup>16</sup> Te núu condite ni rō jeē chiñúhún rō Yaā Dios, te ma sáha rō nájnūhun casáha tēe stáhú-ni. Chi casáha de jeē coto xií de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jín rō jeē maá yúcuan-ni cúu tahū jeē nihín de, suu jeē jejnúhún ñayuu de. <sup>17</sup> Te máá rō jijnáhan rō, núu iyó ndite ni rō, te sa chuhun váha rō xíní rō te nandahá núu rō, <sup>18</sup> návāha ma cūni ñayuu jeē iyó ndite ni rō. Chi máá-ni Tátá rō jeē ndeé yuhu yā jín rō, cuni yā, te ñin quiví te cuáha ya tahū cuu rō.

*Ndese coo cúcá yó nde andiví*  
(Lc. 12.33-34)

<sup>19</sup> Ma cóndihvī ni rō caya rō ndajniñu cúcá ini ñayiví yáha, chi quiví tiquíxin, te cáne xehyu, te tívi. Te suni quívicoo ñacuíhná te sácúíhná. <sup>20</sup> Chi sa suhva sáha rō táca jniñu váha návāha cayā tahū rō nde andiví. Chi yúcuan má quíví tiquíxin ni ma cáne xehyu jeē tívi. Ni ma cúu quíví ñacuíhna sácúíhná. <sup>21</sup> Chi nde nuū nihín rō tahū váha rō, yúcuan cúu nuū cóndihvī ni rō siquī.

*Tinūu cúu lámpara yiqui cúñu*  
(Lc. 11.34-36)

<sup>22</sup> Tinūu rō cúu nájnūhun lámpara nuū yiqui cúñu rō. Núu súcuan te núu tinūu rō iyó ndijin, te ní-ni yiqui cúñu rō cúndijin. <sup>23</sup> Te núu tinūu rō tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu súcuan.

*Jeē ma cóndihvī ni yō siquī xúhun*  
(Lc. 16.13)

<sup>24</sup> Ni ñin mozo ma cúu cuajniñu de nuū uū patrón. Chi quiví ni de nuū ñin te coo maní de jín inga, chí squicu váha de nuū ñin te sájéé ni de nuū inga. Te suni súcuan ma cúu cuajniñu rō núu Yaā Dios te núu máni siquī xúhun ndihvī ni rō.

*Yaā Dios ndíto ya yohó*  
(Lc. 12.22-31)

<sup>25</sup> Núu súcuan te cáhán rī jín rō jijnáhan rō: Ma nácani ndasí ni rō siquī jeē cótecu rō, núu ndese caji rō coho rō, ni siquī sahma, núu ndese cuhun rō. Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jéé cúhun rō. <sup>26</sup> Condéhe rō ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vésú súcuan te máá Tátá rō andiví scáji yā tí. Te cánuú ndasí gá rō jijnáhan rō vésú táca saa ún. <sup>27</sup> ¿Te ndé ñin rō, á cuu scuéhnu rō máá rō sava metro gā, vésú na nácani ndasí ni rō?

<sup>28</sup> ¿Te najehé cánacani ndasí ni rō jeē ma nihín rō sahma? Condéhe jijnáhan rō ndese jéé ita táca yúcū. Chi tu sájniñu, ni tu táu. <sup>29</sup> Te cáhán rī jín rō jeē ni rey Salomón, quiví ní ñúhun de sahma váha ndasí, tu ní ñúhun de sahma lúu súcuan nájnūhun ita ún. <sup>30</sup> Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu rōhó jijnáhan rō jéé ma sáha ya jeē nihín rō sahma. ¿Te naun tu cácanidje ñihin rō jéé ndíto ya rohó? <sup>31</sup> Núu súcuan te ma nácani ndasí ni rō siquī jeē caji rō, jeé coho rō, jeé cuhun rō. <sup>32</sup> Chi táca ñáyuu ñayiví jéé tu cácanidje cúu jeē máni siquī jeé yáha cándihvī ni i. Te máá rō jijnáhan rō, chí iyó Tátá rō andiví, te jíní yā jeé cájini ñúhún rō táca jéé yáha. <sup>33</sup> Te sa suhva cánuú gá jeé cóndihvī ni rō siquī jniñu jeē ndácu Yaā Dios nuū rō, jín siquī jeé sáha rō jniñu ndaā jeé núnahan ni yā. Yúcuán na te sáha ya jeé nihín rō

tāca jēē yáha. <sup>34</sup> Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeē iyó ná ñn ná ñn-ni quivī.

*Jeē ma cahán yō siquī cuéchi jnáhan yó*  
(Lc. 6.37-38, 41-42)

## 7

<sup>1</sup> Ma cahán rō siquī ñayuu ndese sáha i, náváha suni ma cahán Yaā Dios cuéchi siquī maá rō jeē casáha rō súcuan. <sup>2</sup> Chi nájnūhun cácahān rō siquī cuéchi ñayuu, suni súcuan cahān yā siquī cuéchi rō. Te cūhva jeē cándihvī ni rō siquī i, suni cūhva yúcuan sáha ya jíin rō. <sup>3</sup> Chi cuéchi jnáhan rō cúu nájnūhun jeē íne ñn yāca lúli tinūú i. ¿Te naun casáha rō cuenta jeē súcuan, te tu casáha rō cuenta cuéchi maá rō jeē cúu nájnūhun jeē íne ñn nduhu tinūu maá rō? <sup>4</sup> ¿Te naun cácahān rō jíin jnáhan rō: Na táva rī yāca íne tinūu rō, te tu cánacani ni rō jeē íne ñn nduhu tinūu maá rō? <sup>5</sup> Tēe stáhú-ni cácuu rō núu súcuan. Xihna gā tinūu maá rō tava rō nduhu, te yūcuán na te cuu condēhe váha rō jeē táva rō yāca tinūu jnáhan rō.

<sup>6</sup> Ma sáha fuerza rō ñayuu cunéé quívicoo i nuū jnúhun ñi yā núu tu cúní i. Chi ndonda i siquī rō nájnūhun ina jeē cáyihī tí rohó. Te ma nácani rō jnúhun ya nuū ñáyuu jeē tu cúní cuiti cuajnúhún. Chi cándāa i nájnūhun quini jeē jeñú tí siquī perla jeē ndeé yahu ga.

*Cacān yō nuū yā te nihīn yō*  
(Lc. 11.9-13; 6.31)

<sup>7</sup> Cacān rō nuū Yaā Dios, te cuāha ya nuū rō. Te nducú rō táca jēē váha íyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahán yehyí ndé nune quivī i. <sup>8</sup> Chi táca ñáyuu jíicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

<sup>9</sup> ¿Te ndé ñn rōhó núu sēhe rō jíicán i staā nuū rō, te á cuáha rō ñn yuū nuū i? <sup>10</sup> ¿Te núu jíicán i ñn chācá, te á cuáha rō ñn coō nuū i? Tú cuiti súcuan. <sup>11</sup> Núu súcuan te maá rō jijnáhan rō, vēsú ñayuu iyó cuéchi cácuu rō, te cájini rō cuāha rō jēē váha nuū sēhe rō. Te nagā ni cuu maá Tátá rō andiví jēē ma cuáha ya jeē váha nuū ñáyuu jíicán nuū yā.

<sup>12</sup> Te nájnūhun cúní rō jeē sáha váha ñayuu jíin rō, suni súcuan na sáha váha rō jíin i. Chi tutu ley Moisés súcuan ndácu jniñu, jíin táca tutu tēe ni canacani jnūhun Yaā Dios.

*Siquī jeē quiví yó yéhyí túū*  
(Lc. 13.24)

<sup>13</sup> Condihvī ni rō quívicoo rō ndaha Yaā Dios. Chi cúu nájnūhun ñn yéhyí túū. Chi yéhyí jíin ichi jeē cuahán nuū jahnú ndetū ñayuu, jité te cáhnu, te cuehē i quívicoo yūcuán. <sup>14</sup> Te yéhyí jíin ichi jeē cuahán nuū nihín tahú i cotecu i, chi tuū yehyí te cuñi ichi, te jecu-ni i cánihīn i.

*Jíin jniñu casáha ñayuu te nácuni yō ndese ñayuu cácuu i*  
(Lc. 6.43-44)

<sup>15</sup> Te ma cándije cuiti rō tēe stáhú jēē cácahān de jeē jnúhun Yaā Dios cánacani de. Chi nájnūhun lanchi, quititi tú xeēn, súcuan casáha de vējicoo de nuū rō. Te ini anuá de chi cácuu de nájnūhun yihī, quititi xéén. <sup>16</sup> Jíin jniñu casáha de te nacuni rō de ndese tēe cácuu de. Chi cúu nájnūhun jeē tu scóyo rō ndehē uva xinī íñu, ni tu scóyo rō higo xinī íñu yóquin. <sup>17</sup> Te táca yujnu váha chi jēhe ndehē váha, te yujnu néé chi cúun ndehē neé. <sup>18</sup> ñn yujnu váha ma cúun ndehē neé, te ni ñn yujnu néé ma cuáha ndehē váha. <sup>19</sup> Te táca yujnu jeē tu jēhe ndehē váha, chi tahndé te cayū nuū ñuhún. <sup>20</sup> Te suni súcuan cácuu tēe ún, chi jíin jniñu casáha de te nácuni rō ndese tēe cácuu de.

*Nasūú ndihi ñayuu quīvicoo andiví*

(Lc. 13.25-27)

<sup>21</sup> Nasūú ndihi ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tátá rī andiví. <sup>22</sup> Te quiví jeē sándaā rī jniñu ñayuu, te cuehē i cahān jíin rí: Jitoho na jíjnáhan ná, ni canacani ná jnúhun jíin síhví ní, te ni caquenehen ná táchí jíin síhví ní, te ni casáha ná cuehē jniñu jéhnú jíin síhví ní jeē náa ni ñayuu sáha. Achi i. <sup>23</sup> Yūcuán na te cahān rī jíin ñayuu ún: Tu jíiní cuítí rī rohó. Cuijyo quingoo ró, chi ñayuu casáha jniñu neé cácuu ró, achi rī.

*Siquí uú vehe*

(Lc. 6.47-49; Mr. 1.22)

<sup>24</sup> Núu súcuan te tāca ñayuu jeē cájini sōho jnúhun cáhán rī te squícu i, cácuu i nájnūhun iin tēe ni nacani vāha ni, te ni jeni de vehe de siquí cáva. <sup>25</sup> Te ni cuun saū, te ni ndaa yūte, te ni quee tachí xeén, te ni cachundahá vehe ún. Te tu ní cótúú, chi siquí cáva ndéé. <sup>26</sup> Te tāca ñayuu jeē cájini sōho jnúhun cáhán rī te tu squícu i, cácuu i nájnūhun iin tēe cánéé jeē ní jeni de vehe de nuū ñíti. <sup>27</sup> Te ni cuun saū, te ni quiji ndute ñúhún cuehē, te ni quee tachí xeén, te ni cachundahá vehe ún. Te ni cotúú-ni, te ni naa i-ni. Achí yá jíin i jíjnáhan i.

<sup>28</sup> Te ná ni jínu ni cahān Jesús tāca jnúhun yáha, te ñayuu cuehē un ní canaa ni i ni cajini i jnúhun ni steén yā. <sup>29</sup> Chi ni steén vāha ya nuū i, chi máá yá cúu jeē ndíso jniñu siquí ndihi. Te tēe cástéén tutu ley Yāā Dios, tu súcuan cástéén de.

*Jeē ní nasávāha ya iin tēe ndóho cuehyí stehyú*

(Mr. 1.40-45; Lc. 5.12-16)

## 8

<sup>1</sup> Te ni nanuu Jesús yucu ún, te cuehē ñayuu cándiquín i ya. <sup>2</sup> Te iin tēe ndóho cuehyí stehyú, ni quee de

nuū yā. Te ni jecuiñí yití de nuū yā, te ni cahān de jíin yá:

Jíiní na jēe cuu sáha ní jēe nduvāha ná, te núu cúní ni, achí de.

<sup>3</sup> Te Jesús ni soó yá ndaha ya siquí de, te ni cahān yā:

Cúní rī. Te na ndúvāha ró, achí yá.

Te ná ni cahān yā súcuan, te ni nduvāha-ni tēe ndóho cuehyí stehyú un. <sup>4</sup> Yūcuán na te ni cahān Jesús jíin de:

Ma cáchi cuítí rō nuū ní iin. Chi quisteén rō máá ró nuū sutú, te condahá ró jeē socó rō nuū Yāā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán*

(Lc. 7.1-10)

<sup>5</sup> Te ni quiví Jesús ñuu Capernaum. Te iin tēe nación Roma jeē cúu capitán, ni quee de nuū yā, te ni cahān ndahú de jíin yá:

<sup>6</sup> Mozo na cátu i vehe ná, chi ni ijin i te ndóho xeén i, achí de.

<sup>7</sup> Te ni cahān Jesús:

Quihín rī nasávāha ri i núu súcuan, achí yá.

<sup>8</sup> Te ni cahān capitán jíin yá:

Tu cújéhnú ná jēe quihín ni quiví ní vehe ná. Chi máá jēe cahān-ni ní, te na ndúvāha-ni mozo na. <sup>9</sup> Chi máá ná suni ndíso jniñu ná ní casáha tēe cácujehnú ga. Te cújéhnú ná núu tācá soldado na. Te núu cáhán na jíin iin de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná iin jniñu nuū mozo na, te sáha i. Achí de.

<sup>10</sup> Te jeē ní jíni Jesús jnúhun yáha, te ni naa ni yā. Te ni cahān yā jíin ñayuu cándiquín yā ún:

Jendaá cahán rī jíin ró jeē ni nación yō Israel tu ní níhín rī ni iin ñayuu cándíje níhin súcuan, nájnūhun cándíje tēe yáha, vésú tēe nación tu jíin jnúhun Yāā Dios cúu de. <sup>11</sup> Te cáhán rī jíin ró jeē quíjicoo cuehē ñayuu ichi núu cáne niándii

jíin ichi núū quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. <sup>12</sup> Te sava ñayuu naciōn Israel jeē maá i quivicoo núū, te sa quenehen ya i quihín i nuū nēé, chi tu ní cácanđije i. Te yūcuan ndáhyū i te nacayihí yuhu i jeē ndoho xeēn i. Achí yá.

<sup>13</sup> Yūcuán na te ni cahān yā jíin tée cúu capitán:

Cuánuhun vehe ró, chi sáha ri nájnūhun cándije ró jēē sáha ri.

Te mozo de un ní nduvāha-ni i máa hora un.

*Jeē ní nasāvāha ya naná chíso Pedro*

(Mr. 1.29-31; Lc. 4.38-39)

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yihí quíji ña. <sup>15</sup> Te ni jñi ya ndaha ña, te ni quenda-ni quíji ún ña. Te ni ndocuiñí ña, te ni sáha ña jeē ní cayeji de jíin yá.

*Jeē ní nasāvāha ya cuehē ñayuu*

(Mr. 1.32-34; Lc. 4.40-41)

<sup>16</sup> Te jeē ní cuaa ni quecoo ñayuu jíin cuehē ñayuu jeē ñūhun tachí ini i. Te ni quenehen ya tachí un cuángoo jíin jñūhun cáhān-ni ya. Te suni ní nasāvāha ya tāca ñayuu cácuñū. <sup>17</sup> Te súcuan ni cuu návāha cundaā jñūhun ni cahān Isaías, tēe ni nacani jñūhun Yaā Dios jenahán: Máa yá ni tejiyo ndinuū cuehyí cándoho yó, áchí Isaías.

*Siquí ñayuu jeē cácuñi i condiquín i ya*

(Lc. 9.57-62)

<sup>18</sup> Te ni jito Jesús jeē ní ndicó ndūū cuehē ñayuu yā. Te ni cahān yā jíin tée cácuáha jíin yá jeē na yáha de jíin yá inga lado mar. <sup>19</sup> Te ñn tēe stéén tutu ley Yaā Dios, ni quee de nuū yā, te ni cahān de:

Maestro, condiquín na níhín quihín yō ndé-ni cúu-ni nuū quihín ní, áchí de.

<sup>20</sup> Te ni cahān Jesús jíin de:

Tāca ñúcuui, iyó yāū cava cáñuhun tí. Te suni saa, iyó táca tí. Te ruhū, Yaā ní nduu tēe, tuú nuū cusú rí, achí yá.

<sup>21</sup> Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xihna gā. Yūcuán na te condiquín na níhín, áchí de.

<sup>22</sup> Te ni cahān Jesús jíin de:

Condiquín ruhū na quihín yō. Te stóo tāca ndíyi na chindūji jñáhan ndíyi, chi ndíyi cácuu ñayuu tu cácanđije. Achí yá.

*Jeē ní jecuiñí tachí níhin jíin mar ni sáha ya*

(Mr. 4.35-41; Lc. 8.22-25)

<sup>23</sup> Yūcuán na te ni quívi Jesús ini barco, te tēe cácuáha jíin yá ni quivicoo de cuahān de jíin yá. <sup>24</sup> Te nuū mar ni jequihí ñn tachí níhin, te ni stóna ndute mar, ni quívi ini barco un. Te Jesús chi quixí yā. <sup>25</sup> Te tēe cácuáha jíin yá ni castóna de ya, te ni cacahān de:

Jnama ní yóhó, chi je quée yó chíji ndute, áchí de.

<sup>26</sup> Te ni cahān yā jíin de:

¿Naun cáyūhú ndasí ró? Te tu cácanđije níhin ró jēē cácu ró sáha rí, achí yá.

Yūcuán na te ni ndocuiñí yā, te ni cahān yā nuū tachí níhin un jíin núū mar. Te ni cuu nayúú í-ni. <sup>27</sup> Te ni canaa ni de jíjñáhan de, te ni cacahān de:

¿Ndé ñn ga cúu tēe yáha, jēē ndé tachí níhin jíin mar cájetáhú jēē cahán de? áchí de.

*Tēe Gadara jeē cándoho tachí*

(Mr. 5.1-20; Lc. 8.26-39)

<sup>28</sup> Te ni jinū yā inga lado mar, máa región ñayuu Gadara. Te uū tēe ni quendacoo de nde nuū yíndūji ndíyi, ni quijnahan de ya. Te cáñuhun tachí ini de, te siquí jeē yóhoyo xeēn tachí ún, te ni ñn ñayuu tu cúu yáha i ichi yúcuu. <sup>29</sup> Te ni cacana cóhó de ni casáha tachí:

¿Naun vēji ní núu ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívi? áhí.

<sup>30</sup> Te nde jicá jecu cáhīn cuehē quīnī cájitu ti. <sup>31</sup> Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jñuhun na quívicoo ná ini quīnī cáhīn yūcuán, áhí.

<sup>32</sup> Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívicoo ini quīnī. Te quīnī un ní cajinu ti ni caningava ti ĩn yucáva, te ni ndaquīhī ti ndute mar, ni cajihī ti.

<sup>33</sup> Te tēe cándito ti ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de táca jniñu yúcuan, jíin ndese ni cuu jeē ní quendacoo tachī ini ndíndúú tēe ún. <sup>34</sup> Yūcuán na te ndíviñi ñayuu ñuu un, ní quendacoo i cuacondéhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuan quíhīn yā.

*Jeē ní nasávaha ya ĩn tēe ndóho cuehyī ni ĩjin*

(Mr. 2.1-12; Lc. 5.17-26)

## 9

<sup>1</sup> Yūcuán na te ni ndívi Jesús ini barco. Te ni nayáha ya cuahān yā inga lado mar, te ni najinū yā ñuu maá yá. <sup>2</sup> Te ni caquindecá ñayuu ĩn tēe ndóho cuehyī ni ĩjin, cátu de nuū ĩn camilla. Te ni jini Jesús jeē cácandíje i jeē cúu nasávaha ya tēe ni ĩjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū táca cuéchi ró, áhí yá.

<sup>3</sup> Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuan, chí cáhán de jñuhun ndevāha jeē quití ni Yaā Dios. <sup>4</sup> Te ni jini Jesús

jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rí? <sup>5</sup> Jeē uú jñuhun yáha, ¿ndé ĩn yí gá cáa? ¿A jeē cahán rī jíin tēe cúhú: Je íne cáhnu ni rī nuū táca cuéchi ró? ¿Chí yí gá jeē cahān rī: Ndocuīñī te caca ró, chi je ni nduvāha ró, achi rī? <sup>6</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jeē cóne cáhnu ni rī nuū cuéchi.

Yūcuán na te ni cahān yā jíin tēe ni ĩjin ún:

Ndocuīñī te naquihin ró camilla rō te quinhun rō vehe ró, áhí yá jíin de.

<sup>7</sup> Yūcuán na te ni ndocuīñī-ni tēe ún, te cuanhun de vehe de. <sup>8</sup> Te ná ni cajito ñayuu un jeē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ĩn tēe jeē cúu nasávaha de ñayuu, achí i cájito i Jesús.

*Jeē ní cana ya Mateo*

(Mr. 2.13-17; Lc. 5.27-32)

<sup>9</sup> Te ni quenda Jesús yūcuan cuahān yā. Te ni jito ya nuū ĩn tēe nání Mateo, néne de nuū cutútú xuhun renta. Te ni cahān yā jíin de:

Condiquīn ruhū na quíhīn yō.

Te ni ndocuīñī de, te cuahān de jíin yá.

<sup>10</sup> Yūcuán na te ni jehēn yā ni yeji yā staā vehe de. Te cuehē tēe cástútú xuhun renta jíin inga tēe cása ha cuéchi, suni cáyúcú de cáyeji de staā jíin Jesús jíin tēe cáscuáha jíin yá. <sup>11</sup> Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xuhun renta jíin inga tēe cása ha cuéchi? áhí de.

<sup>12</sup> Te ni jini Jesús, te ni cahān yatá yá jíin de:

Ñayuu cáhīyo vāha, tu jini ñuhún i tēe tájná, chí ñayuu cácu hū cúu jeē jini ñuhún. <sup>13</sup> Cuahán jíin áhan ró



núu súcuan, te nacani ni rō na vé cúu jeē cahán jnūhun yáha jéē yosó núu tútu i: Cúni rī jeē na cundáhú ni rō jnāhan ró, nasūu jéē socó rō quiti nuū rī, achí Yaā Dios nde jenahán. Te ruhū nasūu jéē véji ri cana ri ñayuu tú cuēchi, jeē cúu i nájñūhun ñayuu cáhīyo vāha, chí sa suhva véji ri cana ri ñayuu iyó cuēchi, jeē na nácani ni i te stóo i cuēchi i. Achí yá.

*Jeē ní cacajñūhún de ya siquī jeē cóndite ní*  
(Mr. 2.18-22; Lc. 5.33-39)

<sup>14</sup> Yūcuán na te tēe cáscuáha jín Juan tēe scuándute, ni quecoo de nuū Jesús. Te ni cacahán de jín yá:

Sāña jín tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jín máá ní, ¿naun tu cásaá de súcuan?

<sup>15</sup> Te ni cahán Jesús jín de:

¿A cuu condite ni de níni jéē iyó rí jín de? ¿A cuu cucuíhyá ni ñayuu cáhīin vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chí condite ni i.

<sup>16</sup> Te ni cahán yā uū jnūhun yátá siquī jeē tu quíjnāhan jnūhun jeē jéē steén yá jín táca jnūhun jenahán. Achí yá:

Ni in tu náchuhun in pedazo sahma jéé núu in sahma túhú. Chí núu súcuan te ndiyi pedazo jeé un, te tahndē gā jeē tuhú un, te nducáhnuga nuū catáhdé un. <sup>17</sup> Te suni tu cáchuhun vino jeé ini ñii túhú. Chí núu súcuan te ndatā ñii ún, te naa vino jín ñii. Chí cánuú jéé chúhun i vino jeé ini ñii jéé, te súcuan te quéndōo vāha ndindúú. Achí yá.

*Jnūhun sēhe síhí Jairo jín ñahan ní quehé yusáhma ya*

(Mr. 5.21-43; Lc. 8.40-56)

<sup>18</sup> Te níni cáhán Jesús táca jnūhun yáha, te in tēe cújéhnua nuū ñayuu hebreo, ni quee de nuū yā. Te ni jecuíñi yití de nuū yā, te ni cahán de:

Sēhe síhí ná sá ní jihī i. Te núu na quíhín yō soó ní ndaha ní siquī i, te natecu i. Achí de.

<sup>19</sup> Te ni ndocuíñi Jesús, te cuahán yā jín de, te suni cuangoo tēe cáscuáha jín yá. <sup>20</sup> Te mēhñu ñáyuu cuangoo jín yá ni quee in ñahan, te je ni cuu uxī uū cuiyā ndóho ña cuehyī niñi. Te ni quee ña ichi yátá yā, te ni quehé ña yusáhma ya.

<sup>21</sup> Chí ni jeni ni ña: Vesú maá sahma ya na níhín rī quehé rí, te nduvāha ri, jeni ni ña. <sup>22</sup> Te ni ndió cóto Jesús, te ni jito ya nuū ña, te ni cahán yā:

Na ndúndeyí ni rō, séhē. Ni candije ró jéé cuu nasávāha ri rohó, te jeē yúcuán ní nduvāha ró, achí yá.

Te ni nduvāha ña máá hora un.

<sup>23</sup> Te ná ní jinū Jesús vehe tēe cújéhnua ún, te ni jito ya nuū tēe cácuu músico jeē quíchindūji de i, jín núu ñáyuu cuehē, cásaá i.

<sup>24</sup> Te ni cahán yā jín i:

Cujiyo jínāhan ró, chí sūchi síhí yáha, tu ní jíhí i chí quíxí-ni i, achí yá.

Te ni cajecū catá i jeē ni cáhán yā. <sup>25</sup> Te ni quenehen ya ñayuu cuehē ún, te ni quivī ya ini vehe. Te ni jni ya ndaha sūchi síhí ní jihī ún, te ni ndocuíñi-ni i. <sup>26</sup> Te ní región yúcuán ní jitē núu jnūhun jniñu jéhnua ní sáha ya ún.

*Jeē ní nasávāha ya uū tēe cuáá*

<sup>27</sup> Te ni quenda Jesús yúcuán cuahán yā. Te uū tēe cuáá cuángoo de yatá yā, cácana jee de:

Máá ní jeē cúu ní Sēhe yucūn David, cundáhú ni ni sáña víi, achí de.

<sup>28</sup> Te ná ní jinū yā vehe, te ni jinūcoo tēe cuáá un núu yā. Te ni cahán yā jín de:

¿A cácandije ró jéé cúu nanune ri tinūu ró? achí yá.

Te ni cacahán de:

Cácandije ná, achí de.

<sup>29</sup> Yūcuán na te ni tee ya ndaha ya tinūú de, te ni cahán yā:

Na sáha ri nájnūhun cácandíje ró, áchí yá.

<sup>30</sup> Te ni cananune-ni tinūū de. Te Jesús ni cahān nīhin ya jíin de:

Ma cáchi cuiti rō nuū ni ĩn, áchí yá.

<sup>31</sup> Te máá de chi ni quendacoo de, te ni cajete-ni de jnūhun nī región yūcuan jēé súcuan ni sáha ya jíin de.

*Jeē ní nasávāha ya ĩn tēe nīhín*

<sup>32</sup> Te nuū ní quendacoo tēe un cuángoo de, te ni quecoo ñayuu jíin ĩn tēe nīhín, jeē nūhun tachī ini de. <sup>33</sup> Te ni quenehen ya tachī un cuáhān. Te tēe nīhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni ĩn jniñu súcuan ini ñuu Israel, achí i.

<sup>34</sup> Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéhu nuū tachī, achí de.

*Jeē cundáhu ni yā ñayuu cuehē*

<sup>35</sup> Te ni jica cuu Jesús táca ñuu jíin rancho, te ni steén yā jnūhun ini táca vehe ĩ sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácu hū na-ni cuehyī cándoho i. <sup>36</sup> Te cundáhu ni yā jito ya nuū ñayuu cuehē ún. Chi cándoho i te cáccu hū yá ni i, chi cácu i nájnūhun lanchi jeē tú jito ho tī, chi tu ndíquin i Yaā cúu Jito ho i. <sup>37</sup> Yūcuán na te ni cahān yā jíin tēe cácuáha jíin yá:

Ñayuu yáha cácu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. <sup>38</sup> Núu súcuan te cacān tahu rō nuū maá Jito ho rō Yaā Dios jeē na táji yá cuehē tēe na quíngoo de cahnde de trigo, cúu jeē nácani de jnūhun ya nuū ñayuu. Achí yá.

*Jeē ní nacāji ya uxī uū tēe apóstol*  
(Mr 3.13-19; Lc. 6.12-16)

## 10

<sup>1</sup> Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēé nasávāha de ñayuu cácu hū táca ndinuū cuehyī.

<sup>2</sup> Te yáha cúu síhvī ndihúxí uū tēe apóstol un: Tēe ĩn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. <sup>3</sup> Yūcuán na te Felipe, Bartolomé, Tomás, Mateo tēe ni stútú xūhun renta, Jacobo sēhe Alfeo, jíin Lebeo jeē suni nání Tadeo, <sup>4</sup> jíin Simón tēe grupo cananista, jíin Judas Iscariote, tēe jeē ní nastúu de ya.

*Jeē ní tají yá ndihúxí uū de*  
*quinacani de jnūhun*

(Mr. 6.7-13; Lc. 9.1-6)

<sup>5</sup> Te ni tají Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo rō núu ñayuu jeē násūu ñayuu hebreo cácu i, ni ma quívicoo rō táca ñuu ñayuu Samaria. <sup>6</sup> Chi nuū maá-ni ñayuu nación yō Israel quíngoo ró, chi cácu i nájnūhun lanchi jeē ní sana. <sup>7</sup> Te jeē quíngoo ró te suhva nacani ró jnūhun: Je ni cuyajni Yaā ndeé andiví jeē ndacu ya jniñu nuū rō, achí rō. <sup>8</sup> Te nasávāha ró ñayuu cándoho cuehyī stehyú jíin ñayuu cándoho táca gá cuehyī, te nastécu rō ndīyī te quenehen ró táchī ini ñayuu. Te súcuan-ni ni jēhe ri poder nuū rō jeé sáha ró, te suni súcuan-ni sáha ró jíin i.

<sup>9</sup> Te ma cóndiso ró xūhun oro, ni xūhun plata, ni centavo cuechí. <sup>10</sup> Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jnūhun nuū ñayuu, te cánuú coto i róhó.

<sup>11</sup> Te na-ni ñuu chí rancho núu ni jinūcoo ró, te yūcuán nducú ró ĩn ñayuu vāha, te coyūcu ró vehe i nde quíngoo tucu ró. <sup>12</sup> Te jeē quíví ró

vehe ñayuu ún, te cahān rō jeē na quíji jñūhun ndeyí jñūhun sī ni nuū i. <sup>13</sup> Te núu ñayuu vāha cácuu i, te jñūhun ndeyí ní cahān rō quendōo siquī i. Te núu nasūu ñayuu vāha cácuu i, te jñūhun ndeyí ní cahān rō ma quéndōo siquī i. <sup>14</sup> Te núu íyó ñayuu jeē tu cájetáhú i rōhó, ni tu cúní i cuni nahín i jñūhun cahān rō, yūcuán na te quendacoo rō vehe un chí ñuu ún, te scóyo rō tīcachā jehē rō, te súcuan stéén rō jeē iyó cuéchi i jeē tu ní cájetáhú i. <sup>15</sup> Jendaá cahán rī jíin rō jeē quiví juicio te xeēn gā coo castigo siquī ñuu casáha súcuan vésú siquī ñuu Sodoma jíin ñuu Gomorra nuū ní casáha ndasí ñayuu cuēchi.

*Jeē coto xeēn ñayuu de jíjnáhan de*

<sup>16</sup> Cuni sōho rō, chí tájí rí rohó quíngoo rō nájnūhun lanchi mēhñu yíhī. Núu súcuan te coo listo rō nájnūhun coō, te coo vítá ni rō nájnūhun paloma. <sup>17</sup> Te condito rō máá rō nuū ñayuu, chí quee quiví jeē quíndeca i rōhó núu tohó, te caní i rōhó ini tǎcá vehe íi sinagoga. <sup>18</sup> Te suni nde nuū tǎcá gobernador jíin rey quíndeca i rōhó jéē siquí ruhū. Te súcuan te nune ichi jeē nacani ndaā rō jñūhun ri nuū de jíin núu ñayuu tǎcá nación jeē tu jíin jñūhun Yaā Dios. <sup>19</sup> Te núu ni jendeca i rōhó núu tǎca tée ún, ma nácani ndasí ni rō ndese cahān rō. Chí máá hora un te máá yá steén nuū rō ndese cahān rō. <sup>20</sup> Chí nasūu máá rō cúu jeē cahán, chí Espiritu maá Tátá rō cúu jeē cahán jíin yuhu rō.

<sup>21</sup> Te sava ñayuu tu cácandíje, nastúu i ñani i jeē na cúu. Te tátá nastúu sēhe. Te sēhe ndonda siquí tatá jíin náná jeē na cúu. <sup>22</sup> Te ndihí ñayuu quití ni i nuū rō jeē siquí ruhū. Te ñayuu jeē cuiñi nihin nde jeē jínu jñūndóho, ñayuu ún chí cácu ánuá i. <sup>23</sup> Te núu cájito xeēn i rōhó ñin ñuu, te cunu rō quíhñ rō inga ñuu. Chí jendaá cahán rī jíin rō jeē ma

ndécāva rō caca cuu rō ndihí nación yō Israel te ndiji-ni máá rí, Yaā ní nduu tēe.

<sup>24</sup> ñin tēe scuáha, tu cújéhnú de nuū maestro de. Ni tēe cúu mozo, tu cújéhnú de nuū patrón de. <sup>25</sup> Tēe scuáha chí nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rí, te nagā ni cuu jeē ma cahán i jeē rohó cácuu Satanás.

*Jeē ní cachiyā ndé ñin cúu jeē yūhu yó*

*(Lc. 12.2-9)*

<sup>26</sup> Núu súcuan te ma yūhu rō coto rō ñayuu. Chí tǎca jñūhun cácahān sǎhí i ma quéndōo sǎhí cuítí, chí ndihí natūu ndijin, te cuni ñayuu. <sup>27</sup> Jñūhun ní cahān rī jíin rō jeē tu ní jíin ñayuu, na nácastūhun cájí rō nuū i. Te jñūhun ní nacani sǎhí rí nuū rō, na nácani jee rō yátá tǎcá vehe. <sup>28</sup> Te ma yūhu rō coto rō ñayuu cahni yiquí cúñu rō, chí ma cúu cahni i ánuá rō. Chí sa suhva yūhu rō jéē ma stívi rō núu Yaā Dios, chí cuu snáhnú ndetū yá rohó jéē quiví ánuá rō jíin yiquí cúñu rō infierno.

<sup>29</sup> Te tǎcá saa chí tú yahu ndéé tí, chí nde uū tí jeē ñin centavo lulí. Te ní ñin tí tu nínga nuū ñūhun te núu tu jéhe Tátá rō jñūhun, chí ndíto ya tí. <sup>30</sup> Te nagā ni cuu rōhó jíjnáhan rō, chí nde ndihí ixi xíní rō je ni cahu ya. <sup>31</sup> Núu súcuan te ma yūhu rō jíjnáhan rō, chí cánuú ndasí gá rō nuū yá vésú cuehē tǎcá saa.

*Ñayuu jejnúhún Jesucristo nuū inga ñayuu*

*(Lc. 12.8-9)*

<sup>32</sup> Te tǎca ñayuu jeē cuajnúhún ruhū nuū inga ñayuu, suni súcuan cuajnúhún rí i nuū Tatá rí, Yaā ndeé andiví. <sup>33</sup> Te tǎca ñayuu jeē ma cuajnúhún ruhū nuū inga ñayuu, suni súcuan ma cuajnúhún rí i nuū Tatá rí, Yaā ndeé andiví.

*Jeē siquí Jesús te cusín ini ñayuu  
(Lc. 12.51-53; 14.26-27)*

<sup>34</sup>Ma cáni ni rō jijnáhan ró jeē véji ri jeē cóyūcu máni ñayuu ñayiví. Tú véji ri jeē cóyūcu máni ñayuu, chí sa suhva cuajnáhan i jeē siquí ruhū. <sup>35</sup>Chí jeē siquí ruhū te cusín ini sēhe yí jín tátá, te sēhe síhí jín náná, te sēhe jēnu jín náná chíso. <sup>36</sup>Chí táca ñáyuu candíje ruhū, chí jnáhan vehe i cúu jeē quiñi ni nuū i.

<sup>37</sup>Te núu ndé ñin ñayuu maní gā i jín tátá i chí jín náná i vēsú jín rúhū, nasū ñáyuu vāha cúu i jeē cóndiquín i ruhū. Te núu ndé ñin ñayuu maní gā i jín sēhe yí i chí jín sēhe síhí i vēsú jín rúhū, te suni nasū ñáyuu vāha cúu i jeē cóndiquín i ruhū. <sup>38</sup>Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquín i ruhū, nasū ñáyuu vāha cúu i jeē cóndiquín i ruhū. <sup>39</sup>Te núu ndé ñáyuu cúní i cācu i nuū jnūndóho quiñi nuū i jeē siquí ruhū, núu súcuan te jnahnū ndetū i ní cáni. Te núu ndé ñin ñayuu vēsú na cúu i jeē siquí ruhū, te cotecu i ní cáni.

*Jeē iyó táhū yō nuū Yaā Dios  
(Mr. 9.41)*

<sup>40</sup>Te ñayuu cuatáhú róhó jijnáhan ró, núu súcuan te ruhū cājetáhú i. Te ñayuu cājetáhú rúhū, cājetáhú i Yaā ní tají rúhū véji ri. <sup>41</sup>Núu na-ni ñayuu cuatáhú i ñin tēe nácani jnūhun Yaā Dios, siquí jeē jíca de jniñu Yaā Dios, núu súcuan te ñnuú-ni coo tahū de nuū Yaā Dios jín tēe nácani jnūhun Yaā Dios. Te núu na-ni ñayuu cuatáhú i ñin tēe ndaā, siquí jeē tēe ndaā cúu de, núu súcuan te ñnuú-ni coo tahū de nuū Yaā Dios jín tēe ndaā. <sup>42</sup>Te núu ndé ñáyuu cuāha i vēsú ñin ñajin ndute míjin coho ñin sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

*Jeē ní tají Juan uū tēe nuū yā  
(Lc. 7.18-35)*

## 11

<sup>1</sup>Te ná ni jīnu ni ndacu Jesús jniñu nuū ndihúxí uū tēe cáscuáha jín yá, te ni quenda ya yūcuan cuáhān yá jeē steén yā te nacani ya jnūhun táca ñuu región yūcuán.

<sup>2</sup>Te íne Juan vecā. Te ni nihín de jnūhun táca jniñu sáha Cristo. Te ni tají de uū tēe cáscuáha jín de, <sup>3</sup>cuacajñuhún de ya:

¿A máá ní cúu Cristo jeē achí tutu jeē quiñi, chí condetu yó inga tēe quiñi? achí de.

<sup>4</sup>Te ni cahān yā jín de:

Cuángoo te castūhun ró nuū Juan táca jniñu cájito ró jín jnūhun cájini ró. <sup>5</sup>Te cachi ró nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jé jnama Yaā Dios i. <sup>6</sup>Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi ró nuū Juan. Achí yá jín de.

<sup>7</sup>Te ná cuanuhun ndindúú tēe ún, te ni quejéé Jesús cahān yā jnūhun Juan jín ñáyuu:

¿Na vé ni jécondēhe ró jijnáhan ró nde nuū ñūhun tēhé? ¿A ñin tēe jéni ñin jéni uū ni, nájnūhun ite jeē cánda sáha tachí? <sup>8</sup>Te núu tuú, ¿te na vé ni jécondēhe ró núu súcuan? ¿A ñin tēe cúní cujéñu jeē ñūhun sahma lúu? Tuú chí cájini ró jeē tēe cáñuhun sahma lúu, máni ini vehe rey cáyúcú de. <sup>9</sup>¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cáhān rí jín ró jeē suu ni jécondēhe ró, te cujéñu ga Juan yáha vēsú táca gá tēe ni canacani jnūhun Yaā Dios.

<sup>10</sup>Chí jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núu Cristo, návāha coo tūhva ñayuu jeé jinú yá. Achí Yaā Dios, achí tutu. <sup>11</sup>Te jendaá cahān rí jín ró jeē ini ñayiví

yáha cújéhu ga Juan tēe scuándute vēsú tāca gá tēe jeē ni íyo ini ñayiví. Te vēsú sūcuan te tāca tēe núu ga ini ñuu nuū ndácu Yaā andiví jniñu, cújéhu ga de vēsú Juan.

<sup>12</sup> Te nde quiví ní quee Juan tēe scuándute, te nde vijna, chí cánducú ndéyí ñáyuu quívicoo i ndaha Yaā andiví jēē ndácu ya jniñu nuū i. Te nde ñayuu xeēn cánducú ndéyí i siquī. <sup>13</sup> Chí nde ná tu quiji Juan, te ni íyo máá ley Moisés, te suni ni íyo tāca tēe ni canacani jñūhun Yaā Dios. Te ni cacastūhún de ndese coo jeē ndacu Yaā Dios jniñu. <sup>14</sup> Te ni cacahān de jeē ndíji Elías. Te núu cácu ni rō cuatáhú ró jñūhun, te jini rō jeē máá Juan cúu tēe jeē ní cachi tutu jeē quíji, chí cúu de nájñūhun Elías. <sup>15</sup> Tāca rōhó jēē jini sōho, na chúsóhó ró.

<sup>16</sup> Yāhá cachi rī ñin jñūhun yátá návāha na cúni rō ndese cúu ñayuu tiempo vijna. Cúu i nájñūhun sūchi lúli cáhiin nuū yáhu cácasiquí i. Te cácana ndee i xinī jñāhan i: <sup>17</sup> Ni cativí rī scuili, te tu ní cájita jéhe ró. Te ni cajita ri yaa jeē cuihyá jita, te tu ní cándahyū rō, achí i. Te nájñūhun cándāa sūchi lúli un jēē tu ní nujñahan ni i ni ñin, sūcuan cándāa ró. <sup>18</sup> Chí ni quiji Juan te cuehē jinu ni íyo ndite ni de, tu ní yéji de ni tu ní jihi de. Te tu ní cánujñahan ni rō, chí ni cacahān rō jeē ñūhun tachí ini de. <sup>19</sup> Yūcuán na te ni quee máá rí, Yaā ní nduu tēe, te yéji rī jihi ri, te tu cánujñahan ni rō, te chísoó jñūhun ró cacahān rō jeē máni máá jēē yéji rī jihi ri vino. Te quíjñahan rī jín tēe cástútú xúhun renta jín tāca gá tēe cáśáha cuēchi, achí ró. Te núu cúndichí ñin tēe jín jñūhun Yaā Dios, te jín jniñu sáha de te nátūu jeē tēe ndichí cúu de. Achí yá.

*Jeē ní cuxeēn yā nuū sava ñuu nñmi ni*

*(Lc. 10.13-15)*

<sup>20</sup> Yūcuán na te ni quejéé yá cúxeēn yā nuū tācá ñuu nuū ni

sáha ya cuehē jniñu jéhu, chí tu ní cánacani ni i jeē stóo i cuēchi i. Te ni cahān yā:

<sup>21</sup> Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jín ñuu Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jēē stóo i cuēchi i núú. Te sáha i seña jeē steén jeē nácani ni i siquī cuēchi i, chí cuhun i sahma jnúú te chuhun i yaā xinī i núú. <sup>22</sup> Núu sūcuan te cáhán rī jín ró jeē quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. <sup>23</sup> Te rōhó ñáyuu ñuu Capernaum, zá cájeni ni rō jeē cújéhu ró nájñūhun ñin jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndiyi. Chí núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuán ndé vijna núú. <sup>24</sup> Núu sūcuan te cáhán rī jín ró jeē quiví coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

*Nehen nuū rī ndetātu ró, achí yá*  
*(Lc. 10.21-22)*

<sup>25</sup> Te suni quiví un ní cahān Jesús: Na cútahū na núu ni Tátá, Jitoho andiví jín ñayiví. Chí ni jesi ní tāca jñūhun ndichí ní, jeē ma cúni ñayuu ndichí jín ñáyuu tūhva cuenta ñayiví yáha. Te ni steén ni núu ñáyuu cácu nájñūhun sūchi lúli. <sup>26</sup> Chí sūcuan ni nujñahan ni ni Tátá, achí yá.

<sup>27</sup> Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñin cúu ruhū, Sēhe Yaā Dios, chí máa-ni Tátá rī cúu jeē jini yā ruhū. Ni tu cájini ñayuu ndese Yaā cúu máá Tátá, chí máa-ni Sēhe cúu jeē jini. Te íyo ñáyuu jeē cuní máá Sēhe steén yā nuū i ndese Yaā cúu Tátá yā, te máá i suni cuni i. <sup>28</sup> Tāca ró jēē ni cúita

ró jíin táca jniñu jíin ley jeē yí sáha jíin ró, nehen quivícoo ró ndaha ri, te ndetātu ró sáha ri. <sup>29</sup> Quiví ró núu jniñu ndácu máá rí, te scuáha ró coo ró nájnūhun íyó máá rí. Chi vītá ni rī te suchí ni rī. Te súcuan te ndetātu ró jíin ánuá rō sáha ri. <sup>30</sup> Chi tú yí jeē cuandetū rō nuū rī, ni tú yí jeē squícu ró jniñu ndácu ri. Achí yá.

*Jeē ní cataxín de yoco trigo quiví ndetátú*  
(Mr. 2.23-28; Lc. 6.1-5)

## 12

<sup>1</sup> Te ñn quiví ndetātu ní yáha Jesús cuahān yā nuū cáa trigo. Te tēe cáscuáha jíin yá, cájī de sōco. Te ni quejé de cátaxín de yoco trigo cáyeji de. <sup>2</sup> Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quiví ndetátú, achí ley Moisés.

<sup>3</sup> Te ni cahān maá yá jíin de:

¿A tu ní cácahu ró tutu ndese ni sáha David, ñn quiví jeē ni jíi de sōco jíin tēe cáhīn jíin de? <sup>4</sup> Te ni quiví de ini vehe Yaā Dios. Te ni yeji de pan ñi jeē yosó ndijin nuū Yaā Dios. Te tú na ley jeē cáji de, ni tēe cáhīn jíin de, chi máá-ni sutū cuu caji. Te vēsú súcuan te tú na cuēchi ní íyó siquī de. <sup>5</sup> ¿Te á tu ní cácahu ró tutu ley Moisés, ndese cásjniñu sutū ini templo, vēsú quiví ndetātu cúu? Te tú na cuēchi íyó siquī de, vēsú quiví ndetātu cásjniñu de jniñu jeē cácuu de sutū. <sup>6</sup> Te cáhān rī jíin ró jeē máá rí jeē iyó yáha, cújēhnu ga rī vēsú templo. <sup>7</sup> Te tu cájecūhun ni rō jijnáhan ró jnūhun yáha jeē yosó núu tútu ñi jeē ni cáhān Yaā Dios: Jeē cuní gā rī cúu jeē cundáhú ni rō jnāhan ró, vēsú jeē socó rō quiti nuū rī, achí yá. Te núu jeē ní cajecūhun ni rō jnūhun yáha, te ma cahān rō súcuan siquī tēe jeē tú na cuēchi núu. <sup>8</sup> Chi ruhū, Yaā ní nduu tēe, máá rí cúu jeē ndácu

jniñu siquī ndese sáha ñayuu quiví ndetátú, achí yá.

*Jeē ní nduvāha tēe ni ichī ndaha*  
(Mr. 3.1-6; Lc. 6.6-11)

<sup>9</sup> Yūcuán na te cuahān Jesús, te ni quiví ya ini vehe ñi sinagoga. <sup>10</sup> Te yūcuan ñne ñn tēe ni ichī ñn ndaha de. Te cácu ni tēe grupo fariseo jeē ñihñ de cuēchi siquī yā, te ni cacajñūhún de ya:

¿A íyó ley jeē cuu nasávāha yó ñayuu cuhú quiví ndetátú? achí de.

<sup>11</sup> Te ni cahān yā jíin de:

¿Ndé ñn rōhó, núu névāha ró ñn lanchi, te núu nínga ti ini ñn yaū quiví ndetátú, te á tu jéhén rō natava rō tī, chí naún? <sup>12</sup> ¿Te á tu cánuú ndasí gá ñn tēe vēsú ñn lanchi? Núu súcuan te vetū-ni sáha yó jniñu váha quiví ndetátú, achí yá.

<sup>13</sup> Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájnūhun íyó inga. <sup>14</sup> Yūcuán na te ni quendacoo tēe grupo fariseo, te ni candajnūhún de siquī Jesús, ndese cahni de ya.

*Jnūhun Jesús jeē ni cáhān Isaías ndejenahán*

<sup>15</sup> Te ni jini Jesús jeē súcuan cájeni ni de, te ni quenda ya yūcuan cuahān yā. Te cuehē ñayuu cándiquin i ya. Te ni nasávāha ya ndihi ñayuu cuhú. <sup>16</sup> Te ni ndacu ya jniñu nuū i jeē ma stéén i ya. <sup>17</sup> Te súcuan ni cuu návāha squícu jnūhun ni cahān Yaā Dios siquī Jesús, te ni nacani Isaías jnūhun ya un ndé jenahán:

<sup>18</sup> Yáha cúu mozo rī jeē ní nacāji rī, te manī rī jíin yá, te cúsh ni rī jíin yá. Te cuāha rī Espíritu rī coo jíin yá.

Te máá yá sándaā jniñu ñayuu táca nación.

<sup>19</sup> Ma tejnāhan ya, ni ma cána jee ya, te ni ma cahān jee ya ichi jeē cúni ñayuu.

<sup>20</sup> Ma sáha xeēn yā jíin ñáyuu ni cunihin jnūndóho siquī,

ni ma snáa yā ñayuu jeē maá lulí-ni cáandíje.

Chi kujénu ya siquī ndihi, te ndaā ndacu ya jniñu.

<sup>21</sup> Te ñayuu táca nación cocuhun ni i jeē jnáma ya i.

Achí Yaā Dios, achí Isaías nde jehahán.

*Jeē ní cacahān de jeē jejniñu ya fuerza Satanás*

(Mr. 3.19-30; Lc. 11.14-23; 12.10)

<sup>22</sup> Yūcuán na te ni caquindeca i nuū yā ñn tēe cuáá ñhín, chí ñúhun tachī ini de. Te ni nasávāha ya de. Te ni ndundijin tinūú de te ni nacaahān de. <sup>23</sup> Te ndihi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

<sup>24</sup> Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē kujénu nuū tachí, áchí de.

<sup>25</sup> Te Jesús ni jini yā jeē súcuan cájeni ni de, te ni cahān yā jíin de:

Táca nación jeē casásñn máa te cájejnáhan máa, núu súcuan te snáa jeē iyó váha máa. Te núu ñn ñuu chí ñn vehe casásñn máa te cájejnáhan máa, te ma cúu ga coyūcu cáhnu. <sup>26</sup> Te suni súcuan Satanás núu quénehen jnáhan tachī, núu súcuan te sásñn máa. ¿Te ndese cuiñi ñhin Satanás jeē ndácu jniñu núu súcuan? <sup>27</sup> Chi cácahān rō jeē jíin fuerza Satanás quénehen ri tachī. Te núu súcuan cúu núu, te ñayuu cascuáha jíin máa ró jijnáhan ró, ¿na jíin fuerza cáquenehen máa i tachí, cájeni ni rō? Núu súcuan te máa i jíjnáhan i cachi jeē ní castívi ndasí suhva ró ni cacahān rō jeē cáquenehen ri tachí jíin fuerza Satanás. <sup>28</sup> Te tuú chí sa jíin Espíritu Yaā Dios cúu jeē quénehen ri tachí. Núu súcuan te je ndéé Yaā Dios mēhñu ró jeē ndácu ya jniñu.

<sup>29</sup> ¿Chi ndese cuu quívi ñn tēe ini vehe tēe ndacuī jeē quenehen de ndajniñu de? Chi cánuú jeē xíhna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachí.

<sup>30</sup> Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

<sup>31</sup> Jeē yúcuan cáhān rī jíin ró: Iyó modo coo jnūhun cáhnu ni nuū táca cuéchi casáha ñayuu, jíin núu táca jnūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. <sup>32</sup> Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

*Jnūhun yujnu váha jíin yujnu néé*  
(Lc. 6.43-45)

<sup>33</sup> Núu yujnu váha, te váha ndehē, te núu yujnu néé, te cáné ndehē. Chi jíin ndehē te jíni yō ndese yujnu cúu. Te suni súcuan ñayuu. <sup>34</sup> Va sēhe coō cácuu ró, chí xeēn rō nájñuhun coō. ¿Ndesse cuu cahān rō jnūhun váha, chí ñayuu casáha néé cácuu ró? Chi jniñu jeē jéni ni anuá ñayuu, máni yúcuan cáhān i. <sup>35</sup> Tēe váha cáhān de jnūhun váha, chí iyó ndáa anuá de. Te tēe sáha néé cáhān de jnūhun néé, chí cánéé ánuá de. <sup>36</sup> Te cáhān rī jíin ró jeē táca na-ni jnūhun cácahān ñayuu, nacuāha i cuenta jnūhun un quívi coo juicio. <sup>37</sup> Chi jíin jnūhun ni cahān rō sándaā yā siquī rō, núu jeē quéndōo ndaā rō chí jéé cóndee cuéchi siquī rō. Achí yá.

*Jeē ní cajicān ñayuu tu cáandíje ñn jniñu jéhnu*  
(Mr. 8.12; Lc. 11.29-32)

<sup>38</sup> Yūcuán na te jecu tē grupo fariseo jíin tēe cástéen tutu ley Yaā Dios, ni cacahān de jíin yá:

Maestro, cácu ni ná jé sáha ní ñin jniñu jéhu jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahān yā jíin de:

Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i ñin jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu stéén rī nuū i, chí máá-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios. <sup>40</sup> Chí nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáa te natecu rī. <sup>41</sup> Te táca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi síquī ñáyuu yáha. Chí máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chí cújéhu ga ruhū Yaā íne yáhá vésú Jonás, te tu cácandíje ró rúhū. <sup>42</sup> Te reina jeē ní cújéhu nación ichi sur, natecu ña jíin ñáyuu tiempo yáha, quivī juicio jeē sándaā yā cuēchi, te cahān ña cuēchi síquī i. Chí nde jíca téyí ní quiji ña ni jíni nahín ña jnūhun ndíchí ní cahān rey Salomón. Te vijna chí cújéhu ga ruhū, Yaā íne yáhá vésú Salomón, te tu cácandíje ró rúhū.

*Tachí jeē nastútú jnáhan ndívi ini ñayuu*

*(Lc. 11.24-26)*

<sup>43</sup> Núu ni quenda ñin tachí ini ñin tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ní maá: <sup>44</sup> Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándíje ún, cúu de nájnūhun ñin vehe íyú te ni ndundoo. <sup>45</sup> Yūcuán na te jéquihin uxá gā tachí neé gá vésú maá. Te quívicoo

ini tēe un jéé cóyūcu yúcuan. Núu súcuan te xeēn gā ndoho tēe un jéé sándíhí vésú jeē xíhna ñúhún. Te suni súcuan ndoho ñayuu tiempo yáha jeē casáha néé. Achí yá.

*Náná yā jíin ñani yā*

*(Mr. 3.31-35; Lc. 8.19-21)*

<sup>46</sup> Te níni súcuan cáhán yā jíin ñáyuu ún, te ni quee naná yā jíin táca ñani yā, ñin ña nuū quéhe, te cúni ña cahān ña jíin yá. <sup>47</sup> Te ni cachi ñin tēe nuū yā:

Náná ni jíin táca ñani ni cáhīn nuū quéhe, te cácu ni cahān jíin ní, achí de.

<sup>48</sup> Te ni cahān yā jíin tēe ni cahān súcuan jíin yá:

¿Ndé ñin cúu náná rī, te ndé ñin cácu ñani rī? Achí yá.

<sup>49</sup> Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácu táca jéé yáha. <sup>50</sup> Chí táca ñáyuu casquícú jniñu cúni maá Tátá rī, Yaā ndeé andívi, suu cácu ñani rī, cuáha ri, náná rī. Achí yá.

*Jnūhun yátá síquī tēe jéte trigo*

*(Mr. 4.1-9; Lc. 8.4-8)*

## 13

<sup>1</sup> Te quivī un ní quenda Jesús vehe cuahān yā, te ni jinū yā ni cucōo ya yumar. <sup>2</sup> Te ni cutútú cuéhé ndasí ñayuu nuū yā. Te ni quivī ya ini ñin barco, ni cucōo ya. Te táca ñáyuu un cáyūcú i yumar. <sup>3</sup> Te jíin jnūhun yátá ni cahān yā cuéhé jnūhun nuū i, te súcuan ni cahān yā:

Ñin tēe cate trigo, ni quenda de jeē cáte de. <sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tí. <sup>5</sup> Te jecu gā trigo ni jité nuū ñúhún yuū, nuū tú cuéhé ñuhun. Te yachí-ni ni cane, chí tu cóquin ñuhun. <sup>6</sup> Te nuū ní cane niāndii, te ni ichí-ni, te ni casun, chí tu ní níhín nuū quihín yoho. <sup>7</sup> Te jecu gā trigo ni jité nuū



náne iñu. Te ni jehnu iñu ún, te ni jesi nuū. <sup>8</sup> Te jecu ni jitē nuū ññhun váha, te ni jēhe cuehē nunī. Sava ni jēhe ciento jeē ññ in, te sava ni jēhe unī xico, te sava ga ni jēhe ocō uxī. <sup>9</sup> Tāca róhó jéē jíni sōho, na chúsóhó ró. Achí yá.

*Najehē cahán yā máni jñūhun yátá*

(Mr. 4.10-12; Lc. 8.9-10)

<sup>10</sup> Yūcuán na te tēe cáscuáha jíin yá un ní quecoo de nde nuū yā, te ni cacajñūhún de ya:

¿Najehē cúu jeē máni jñūhun yátá cahán ni jíin ññayuu? achí de.

<sup>11</sup> Te ni cahán yā jíin de:

Róhó jíináhan ró chi sáha ya jeē cájecūhun ni rō jñūhun ni yisáhi yáha, ndese quívicoo ññayuu ndaha Yaā andiví jeē ndacu ya jñiñu nuū i. Te ññayuu yáha jéē tu cácan díje, chi ma jécūhun ni i. <sup>12</sup> Chi ññayuu je jécūhun ni, chi stéén gā yā nuū i, te víhyá gā cuni i. Te ññayuu tu cándíje, sa suhva naa jecu jeē je jíni i ún. <sup>13</sup> Jeē yúcuán cáhán rī jñūhun yátá jíin i. Chi vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te quendōo i nájnūhun jeē tú na vé ni cájini i. <sup>14</sup> Ññayuu yáhá chi squícu squí i jñūhun ni cahán Yaā Dios jeē ní nacani Isaías, tēe ni nacani jñūhun nde jenahán:

Vēsú cuni nahín ró, te ma jécūhun ni rō,

te vēsú coto ró, te ma nácuni rō.

<sup>15</sup> Chi ññayuu yáha yōhyo ni ndunihni ni i,

te yōhyo uhū chusóhó i,

te nájnūhun cájesi i tinūū i,

návaha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī jeē nasávaha ri anuá i nuū cuéchi i. Achí Yaā Dios, achí tutu.

<sup>16</sup> Te máá ró jíináhan ró, yōhyo ndetū rō, chi cájito ró jíin tinūū ró, te cájini nahín ró jíin sōho ró. <sup>17</sup> Chi

jendaá cahán rī jíin ró jeē cuehē tēe ni canacani jñūhun Yaā Dios jíin cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cájítá jñūhun yátá tēe jéte trigo*

(Mr. 4.13-20; Lc. 8.11-15)

<sup>18</sup> Nūu súcuán te cuni nahín jíináhan ró na vé cuni cahán jñūhun yátá tēe jéte trigo: Trigo un cúu jñūhun Yaā Dios. <sup>19</sup> Te ññayuu cájini sōho jñūhun ndese ndácu Yaā andiví jñiñu, núu tu cájecūhun ni i te cácuu i nájnūhun trigo jeē ni jitē yuhíchi. Yūcuán na te quíji jexeén te quénde-ni jñūhun ini anuá i. <sup>20</sup> Te trigo jeē ni jitē nuū ññhun yūú cúu nájnūhun ññayuu cájini sōho jñūhun, te yachí-ni cájetáhú i te cácusí ni i jíin. <sup>21</sup> Te tu cúcutú jñūhun ún ini anuá i, te jecu-ni quíví cájetáhú i. Te núu ni quejéé jñúndóho, chí jito xeēn ññayuu i squí jñūhun ún, te quejéé nácuni yátá ni i. <sup>22</sup> Te jeē ni jitē nuū náne iñu cúu ññayuu cájini nahín jñūhun, te cándihví ni i squí jeē iyó ini ññayví yáha, te cúní i cucúca i, te stáhú un i cujnéñu i jíin. Te ndihí jeē yáha jési nuū jñūhun ya, te tu íje i jíin jñūhun ya. <sup>23</sup> Te trigo jeē ni jitē nuū ññhun váha cúu nájnūhun ññayuu cájini nahín jñūhun, te cájecūhun ni i, te cáhije i jíin jñūhun ya. Te sava i cúu nájnūhun nuní jeē jéhe ciento jeē ññ in, te sava ga i jéhe unī xico, te sava ga i jéhe ocō uxī. Achí yá.

*Jñūhun yátá squí ite lasú*

<sup>24</sup> Te ni cahán yā inga jñūhun yátá jíin de:

Jeē ndácu Yaā andiví jñiñu cúu nájnūhun ññ tēe jeē ní jete de trigo váha nuū ññhun de. <sup>25</sup> Te iyó ññ tēe jito uhū de tēe chí trigo. Te náa cáquixí tēe chí trigo jíin táca náhan de, te ni jehén ni jete ndiquin lású nuū trigo de, te cuahán. <sup>26</sup> Te nuū

ní cane trigo ún, te ni cane yoco i, te suni súcuan ni jehnu ite lasú un. <sup>27</sup> Yūcuán na te ni jengoo mozo ni cacahān i jín patrón i: ¿A násūu trigo váha ní jéte ní núū ñuhun ní? ¿Te ndese cúu jeē ní canecoo ite lasú nuū? <sup>28</sup> Te ni cahān de jín i: ñin tēe jito uhū ruhū ni sáha jeē yáha. Te ni cacahān mozo un jín de: ¿Núu súcuan te á cúní ní jéē na quingoo ná te jnuhun ná? áchí i. <sup>29</sup> Te ni cahān de: Tuú, chi núu jnuhun ró lású un te sanaa te jnuhun ró ndé jín trigo. <sup>30</sup> Vāha ga na cuéhnu máá ndé quiví tahndé. Te quiví un cáhān rī jín tēe cahnde jeē xihna gā ite lasú cahnde de, te chucú tūtú de návāha cahmu yó. Yūcuán na te trigo chi cahnde de ndiví ini yacā rī, áchí de. Áchí yá.

*Jnūhun yátá síquī ndiquin mostaza*

(Mr. 4.30-32; Lc. 13.18-19)

<sup>31</sup> Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnuhun jéhu ñin ndiquin mostaza jeē ní jequin ñin tēe nuū ñuhun de. <sup>32</sup> Te jendaá jeē ñin ndiquin lúlí gá cúu vésú tāca gá ndiquin. Te núu ni jehnu, te cúu cáhnu ga vésú tāca gá yucū, chi ndúu nájnuhun ñin yujnu. Te quíjicoo saa, te cásáha ti tacā tī chíji ndaha ún. Achí yá.

*Jnūhun yátá síquī levadura*

(Lc. 13.20-21)

<sup>33</sup> Te inga jnūhun yátá ní cahān yā jín de:

Jeē ndácu Yaā andiví jniñu nuū ñáyuu cúu nájnuhun levadura jeē ní quihin ñin ñahan. Te ni saca ña jín úní kilo harina, nde ni ndaa ndihí ñujen ni sáha. Achí yá.

*Jeē máni jnūhun yátá cáhān yā jín i*

(Mr. 4.33-34)

<sup>34</sup> Tāca jnūhun yáha ní cahān Jesús jín ñáyuu cuehē ún. Te tāca jéē ní stéén yā, máni jnūhun yátá ní cahān yā jín i. <sup>35</sup> Súcuan ni sáha

ya návāha squícu jnūhun ni cahān tēe ni nacani jnūhun Yaā Dios nde jenahān:

Cahān rī tāca jnūhun yátá jín ñáyuu, te cachi rī tāca jnūhun yísahí ndé quiví ní jecōo ñayiví.

Achí tutu, áchí yá.

*Jeē ní castūhun cájí yá jnūhun ite lasú*

<sup>36</sup> Yūcuán na te ni nacuatáhu Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jín yá:

Nacani cájí ní jnūhun yátá ite lasú nuū ná, áchí de.

<sup>37</sup> Te ni cahān yā jín de:

Jeē jéte trigo vāha un cúu máá rí, Yaā ní nduu tēe. <sup>38</sup> Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. <sup>39</sup> Te tēe jito uhū jeē ní jete lasú un cúu máá jexeén. Te quiví tahndé cúu quiví jinu ñayiví. Te tēe cahnde un cácuu ndajéhé Yaā Dios. <sup>40</sup> Te nájnuhun tahndé ite lasú te cayū nuū ñuhún, súcuan coo quiví jinu ñayiví. <sup>41</sup> Chi máá rí, Yaā ní nduu tēe, tají rí ndajéhé rī quingoo. Te nastútú yá tāca ñáyuu casquíví jnáhan nuū cuéchi, jín ñáyuu casáha jniñu néé, quenehen ya i mēhñu ñáyuu ndácu rí jniñu nuū. <sup>42</sup> Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeén i. <sup>43</sup> Yūcuán na te ñayuu squícu nuū yā chi ndindéé i nájnuhun niándii, te coyucú i nuū ndácu máá Tátá i jniñu. Tāca róhó jéé jini sōho, na chúsóhó ró.

*Jnūhun yátá síquī yejnū xūhún jeē yísahí*

<sup>44</sup> Te jeē ndácu Yaā andiví jniñu nuū ñáyuu, suni cúu nájnuhun ñin yejnū xūhún jeē yísahí chíji ñin ñuhun. Te ni nanihín ñin tēe, te ni nacasi tucu de síquí. Te jeē cúsí ni de jín, te ni jehén de ni xícó ndihí

de jeē névāha de, te ni jeen de ñuhun ún.

*Jnūhun yátá síquī perla jeē ndeé yahu*

<sup>45</sup> Te jeē ndácu Yaā andiví jniñu nuū ñayuu, suni cúu nájñuhun ñin tēe jéen xíco, te ndúcú de perla váha. <sup>46</sup> Te ni jini de ñin perla jeē yáhu ndasí, te ni jehēn de ni xícó ndihi de jeē névāha de, te ni jeen de perla un.

*Jnūhun yátá síquī ñunu jñi chācá*

<sup>47</sup> Te jeē ndácu Yaā andiví jniñu nuū ñayuu, suni cúu nájñuhun ñin ñunu jeē cásingava de ini mar, te quívicoo ndinuū chācá. <sup>48</sup> Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jica, te chācá tú váha cáscáne de. <sup>49</sup> Te suni súcuan coo quiví jñu ñayiví. Chi quijicoo ndajéhé yā, te sásin ya ñayuu casáha jniñu néé méhñu ñayuu casáha jniñu váha. <sup>50</sup> Te ñayuu cunéé chi jnaa ya i cayū i nuū ñuhún. Te yúcuan ndáhyū i te nacayihí yuhu i jeē ndoho xeēn i. Achí yá.

*Jnūhun yátá síquī ndajniñu ndeé yahu*

<sup>51</sup> Te ni cajñuhun yá de jíjnáhan de:

¿A ní cajecūhun ni rō tāca jñuhun yáha, chí tuú? áchí yá.

Te ni cacahān de jíjn yá:

Ni cajecūhun ni ná, áchí de.

<sup>52</sup> Te ni cahān yā jíjn de:

Iyó váha núu súcuan. Te ñin tēe stéen tutu ley Yaā Dios, núu je ni cutūhva de ndese ndácu Yaā andiví jniñu, te cuu stéen de tāca jñuhun síquī ún. Chi cúu de nájñuhun ñin tēe chíí vehe. Te ini yejnū de táva de ndajniñu ndeé yahu, sava jeē jeē jíjn sava jeē je ni cunahán iyó. Achí yá.

*Jeē cuánuhun yā ñuu Nazaret*

(Mr. 6.1-6; Lc. 4.16-30)

<sup>53</sup> Te ná ni ndihi ni cahān Jesús tāca jñuhun yátá yáha, te ni quenda

ya yúcuan cuáhān yā. <sup>54</sup> Te ni najinū yā ñuu yā Nazaret. Te ni steén yā jñuhun ini vehe ñi sinagoga yúcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndichí? ¿Te ndese cúu sáha de tāca jniñu jéhu yāhá? <sup>55</sup> Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíjn Judas. <sup>56</sup> Te suni cáyūcu cuáha de jíjn yó yāhá. ¿Te ndese jíni de tāca jñuhun yáha núu súcuan? Achí ñayuu.

<sup>57</sup> Te súcuan ni cacujéē ni i nuū Jesús. Te ni cahān yā jíjn i:

Tāca tēe nácani jñuhun Yaā Dios, iyó yíñúhún ñayuu jíjn de, te máni ñayuu ñuu maá de jíjn ñayuu vehe maá de cúu jeē tu iyó yíñúhún jíjn de. Achí yá.

<sup>58</sup> Te tu ní sáha ya cuehē jniñu jéhu yúcuán, chí tu cácuandíje i ya.

*Jeē ni jíhī Juan tēe scuándute*  
(Mr. 6.14-29; Lc. 9.7-9)

## 14

<sup>1</sup> Te tiempo yúcuan te Herodes, tēe ndácu jniñu región Galilea, ni jini jñuhun de jñuhun Jesús. <sup>2</sup> Te ni cahān de jíjn ñayuu cáhīn jíjn de:

Tēe yúcuan cúu Juan tēe ni scuándute, te ni natecu de. Jeē yúcuan iyó poder de sáha de jniñu jéhu. Achí de.

<sup>3</sup> Chi Herodes, je ni ndacu de jniñu jeē na quiví Juan vecāa, jíjn jéē na cónuhni de jíjn cadena. Súcuan ni sáha de jeē síquī Herodías, ñasihí ñani de Felipe. <sup>4</sup> Chi Juan ni cahān de nuū Herodes:

Tu iyó ley condeca ró ña, áchí de.

<sup>5</sup> Te jeē yúcuan ní cuni Herodes cahni de Juan. Te yúhú de jeē quití ni ñayuu, chí ndihi i jéni ndije ni i jeē ñin tēe nácani jñuhun Yaā Dios cúu Juan. <sup>6</sup> Te ñin quiví ni sáha Herodes ñin vico quiví ní cacu de. Te sēhe síhí Herodías ni quiví i ni jita jéhé i nuū ñayuu ní cana de ún. Te ni cusí ni

Herodes ni sáha i. <sup>7</sup> Te ni jejnūhun téyí de jeē cuáha de núu na vé cacān i nuū de. <sup>8</sup> Te ni jehēn i ni cajnūhún i náná i na vé cacān i. Te ni ndīvi i nuū Herodes, te ni cahān i:

Cuāha ní xíní Juan tēe scuándute, cone nuū ñn cohō, achí i.

<sup>9</sup> Yūcuán na te rey Herodes ni cucūhyá ni de. Te siquī jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yūcuan ní ndacu de jniñu jeē na cuáha nuū i. <sup>10</sup> Te ni tají de soldado jeē na quícahnde xini Juan ini vecāa. <sup>11</sup> Te ni quee soldado un jíin xíní Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

<sup>12</sup> Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

*Jeē ni scáji yā uhūn mil tēe*

(Mr. 6.30-44; Lc. 9.10-17; Jn. 6.1-14)

<sup>13</sup> Te ná ni jini Jesús jnūhun, te ni cujiyo ya yūcuan cuáhān yā jíin barco, jeē cóne sūn ya ñn lugar nuū tú ñayuu. Te ni cajini ñayuu jeē cuahán yā. Te táca ñuu ni quenda-coo i cájica jéhé i, cuajnahān i ya. <sup>14</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya táca ñayuu cácuñu jeē véjicoo i jíin. <sup>15</sup> Te nuū ní ini, te tēe cáscuáha jíin yā, ni quecoo de nuū yā, te ni cacahān de:

Je ni ini, te yāhá chi tú na ñayuu yūcu. Núu súcuan te tají ní ñayuu na quíngoo i táca ñuu, te cuaan i jeē cáji i.

<sup>16</sup> Te ni cahān Jesús jíin de:

Tu jíini ñūhún quíngoo i, chi cuāha máá ró jeē cáji i, achí yá.

<sup>17</sup> Te ni cacahān de jíin yá:

Tú na vé cánevāha ná yáha, chi uhūn-ni staā jíin úu-ni chácá, achí de.

<sup>18</sup> Te ni cahān yā jíin de:

Cuāha na quíji, achí yá.

<sup>19</sup> Te ni cahān yā jíin ñáyuu un jéē na cúcoo i nuū íte. Te ni quihin ya ndihúhún staā jíin úu chácá un. Te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. <sup>20</sup> Te ndīvii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxí uū jica. <sup>21</sup> Te tēe ni cayeji un cúu nájñūhun uhūn mil, te sūn ga cúu ñahan jíin súchi lúlí.

*Jeē ní jica jéhé yá nuū mar*

(Mr. 6.45-52; Jn. 6.16-21)

<sup>22</sup> Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quíngoo de nde inga lado mar, níni jéē nátaji yá ñayuu un quínungoo i. <sup>23</sup> Te nuū ní cuu ni nacuatáhú yá nuū i, te máñūhún-ni ya ni caa ya yucu, cuacacān tahu yā. Te ni cuaa, te íne máñūhún yá yūcuán. <sup>24</sup> Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachí ichi núú de. <sup>25</sup> Te jeē yínee gā ni quee Jesús nuū de, jica jéhé yá nuū mar. <sup>26</sup> Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóhó de jeē cáyūhú de.

Jílná cúu, achí de.

<sup>27</sup> Te ni cahān-ni Jesús jíin de:

Ndeyí coo ni rō, te ma yūhu ró, chí máá rí cúu, achí yá.

<sup>28</sup> Yūcuán na te ni cahān Pedro jíin yá:

Núu máá ní cúu, te cahān ni jíin ná jéē na cáca jéhé ná nuū mar te jeē na núú ní, achí de.

<sup>29</sup> Te ni cahān yā:

Nehen núu súcuan, achí yá.

Te ni quenda Pedro ini barco, te ni jica de nuū ndúte cuahān de nuū Jesús. <sup>30</sup> Te nuū ní jini de jeē níhin

yíhi tachī, te ni yūhú de. Te ni quejé de quee de chíji ndute. Te ni cana cóhó de:

Jnama ní sáña, áchí de.

<sup>31</sup> Te Jesús ni jñi-ni ya ndaha de. Te ni cahān yā jíin de:

Tēe tu cándíje nīhin cúu ró. ¿Naun ni nayūhu ró? Achí yá.

<sup>32</sup> Te ni quívi ya ini barco un jíin de, te ni jecuíñi-ni tachī. <sup>33</sup> Yūcuán na te tēe cáhiin ini barco un, ni cajúcuíñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

*Jeē ní nasávāha ya ñayuu cácuñi región Genesaret*

(Mr. 6.53-56)

<sup>34</sup> Te ni quenda jíyo ya jíin de nuū mar un, ní jinū yā región Genesaret. <sup>35</sup> Te ñayuu yūcuán ní canacuni i ya. Te ni cascáca i jñūhun tācá ndañū yūcuán jéē ní jíin yā. Te ñayuu ni caquindeca i ñayuu cácuñi nuū yā. <sup>36</sup> Te ni cacahān ndahú i jíin yá jeē na quéhé i vésú yusáhma ya. Te tāca ñáyuu jeē ní caquehé sahma ya, ni canduvāha i.

*Siquí ndese cújnehén ñáyuu*

(Mr. 7.1-23)

## 15

<sup>1</sup> Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoco de nuū yā. Te ni cacahān de jíin yá:

<sup>2</sup> Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

<sup>3</sup> Te Jesús ni cajñūhun yá de:

Te máá ró jíināhan ró, ¿suni naun cástívi ró jñiñu ní ndacu Yaā Dios nuū ró? Chi sa costumbre máá ró cúu jeē casquicu ró. <sup>4</sup> Chi ni cahān Yaā Dios: Coo yíñúhún ró jíin tátá ró jíin náná ró. Te núu ndé ñin cahān siquí tátá chí siquí naná, na cúu

nahín, áchí Yaā Dios. <sup>5</sup> Te máá ró chí cacahān ró jeē cuu cahān ñin tēe jíin tátá de jíin náná de: Ma cúu chindéé ñahán ná níhín cuáha na jéē cáji ní jéē cúhun ní, chí ndíhi jeē névāha ná, je ni socō na núu Yaā Dios. <sup>6</sup> Te tēe cahān súcuán, tuá cánuú chindéé ñahán de tátá de náná de, áchí ró jíināhan ró. Te súcuán cástívi ró jñiñu ní ndacu Yaā Dios, jeē siquí costumbre ni cajequin máá ró. <sup>7</sup> Tēe stáhú-ni cácuu ró. Ndaā ni nacani Isaías jñūhun siquí ró nde jenahán, yósó núu tútu ñi jeē ní cahān Yaā Dios:

<sup>8</sup> Ñayuu yáha chí máá yuhu-ni i cájetáhú i ruhú,

te nasūu ndé jíin ini jíin ánuá i.

<sup>9</sup> Te cáchiñúhún sáa-ni i ruhú, chí jñūhun cástéén i cúu jñiñu ní candacu tēe,

te nasūu jéē ní ndacu máá rí cúu.

Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jíin i:

Cuni sōho vāha jíināhan ró, te chuhun ni ró: <sup>11</sup> Nasūu jéē quívi ini yuhu ñayuu cújnehén i sáha. Chí jñūhun jeē quenda yuhu i, yūcuán cúu jeē cújnehén i sáha, áchí yá.

<sup>12</sup> Yūcuán na te tēe cáscuáha jíin yá, ni quecoco de nuū yā, te ni cacahān de:

¿A jíin ní jéē ní caquítí ni tēe fariseo jeē ní cajini sōho de jñūhun ni cahān ní? áchí de.

<sup>13</sup> Te ni cahān máá yá:

Cácuu de nájnūhun yujnu jeē tu ní náchuhun Tátá rí, Yaā ndeé andívi, te ñin quívi te jñūhun ya quíhín.

<sup>14</sup> Na quíngoo máá de. Chí cácuu de nájnūhun tēe cuáá cástéén ichi nuū inga tēe cuáá. Chí núu ñin tēe cuáá stéén de ichi nuū inga tēe cuáá, te ndíndúú de ñinga de xehvá. Achí yá.

<sup>15</sup> Te ni cahān Pedro jíin yá:

Castūhun cáji ní jñūhun yátá yáha nuū na jíināhan ná, áchí de.

<sup>16</sup> Te ni cahān Jesús:

¿Te á suni máá ró ná tu jecūhun ni rō chí naún? <sup>17</sup> ¿A tu cájecūhun ni rō jeē tāca jēē yéji ñayuu, chi quívi chíji i, te quénda-ni cuahān? <sup>18</sup> Te jnūhun jeē quénda yuhu ñayuu, chi nde ini anuá i vēji, te yūcuan cúu jeē cujnéhén i sáha. <sup>19</sup> Chi nde ini anuá ñayuu quénda jeē jéni néé ni, jeē jéhni ndīyi, jeē casíquí ndéē jnāhan, jeē jīca jnéní, jeē sacuíhná, jeē cahán jnūhun stáhú, jeē cahán yāa síquī jnāhan. <sup>20</sup> Tāca jēē yāha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

*Ñahan inga nación jeē ní candíje nñhin*

(Mr. 7.24-30)

<sup>21</sup> Te ni quenda Jesús yūcuan cuahān yā región Tiro jíin Sidón. <sup>22</sup> Te iin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñūhun tachī ini i, te yōhyo xeēn ndóho i, achí ña jíin yá.

<sup>23</sup> Te tu ní cáhán cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

<sup>24</sup> Te ni cahān yā jíin ña:

Nuū maá-ni ñayuu nación Israel ni tají Yāa Dios sáña véji ná, chi cácuu i nájnūhun lanchí, quiti ní sana.

<sup>25</sup> Te ñahan ún chi ni quee ña, te ni jecuññi yiti ña nuū yā, te ni cahān ña:

Tátā, chindéé ñáhán ní sáña víi, achí ña.

<sup>26</sup> Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núu ina, achí yá.

<sup>27</sup> Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájnūhun ina. Chi suni máá tí cánihín nahín tí pedazo staā cuechí jēē cóyo chíji

mesa jitoho tī cáyeji tī, achí ña jíin yá.

<sup>28</sup> Yūcuán na te ni cahān Jesús:

Yōhyo váha jeē cándíje nñhin ní súcuan, nánā. Te na sáha ná jēē cuní ni, achí yá.

Te máá hora un ní nduvāha-ni sēhe síhí ña.

*Jeē ní nasávāha ya cuehē ñayuu cácuñhū*

<sup>29</sup> Te ni quenda Jesús cuahān yā yūcuán, te ni yāha ya yumar Galilea. Te ni caa ya iin yucu, te yūcuan ní cucōo ya. <sup>30</sup> Te cuehē ñayuu ni quecoo i nuū yā, te cándeca i tāca jēē cájica chácuá, jeē cuaá, jeē ñihín, jeē cacúhndú, jíin cuehē gā ñayuu cácuñhū. Te ni cajequin i nuū jehé Jesús. Te ni nasávāha ya i jíināhan i. <sup>31</sup> Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca váha ñayuu chacuá, nánune tinūu ñayuu cuaá. Te ni cacahān i jeē yōhyo váha Yāa cúu Yāa Dios ñuu i Israel.

*Jeē ní scáji yā cuñ mil tēe*

(Mr. 8.1-10)

<sup>32</sup> Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chi je ni cuu unī quívi cáyúcú i jíin rí, te tuá na vé caji i. Te tu cuní rī natají rí i nuhun ndite i, chi núu súcuan te sava ichi te cuíta í i. Achí yá.

<sup>33</sup> Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup> Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúlí, achí de.

<sup>35</sup> Yūcuán na te ni cahān yā jíin ñayuu cuehē un jēē na cucōo i. <sup>36</sup> Te ni quihín ya ndihúxá staā jíin cháca ún, te ni nacuatáhú yá nuū Yāa

Dios. Te ni tahu cuéchi yá, te ni jêhe ya nuū tée cáscuáha jíin yá, te máa de ni casaja nuū ñáyu. <sup>37</sup> Te ndihi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. <sup>38</sup> Te tēe ni cayejí ún, nde cuūn mil de cúu, te sūn ga cúu ñahan jíin súchi lúli. <sup>39</sup> Yūcuán na te ni nacuatáhú yá nuū ñáyu ún, te cuanungoo i. Te ni ndiví ya ini barco, te cuahān yā región Magdala.

*Jeē cájicān de ñn jniñu jéhu nuū yā*  
(Mr. 8.11-13; Lc. 12.54-56)

## 16

<sup>1</sup> Te ni quecoo tēe grupo fariseo jíin tēe grupo saduceo nuū yā. Chi cáconi de coto ndee de ya, te ni cajicān de jeē na sáha ya ñn jniñu jéhu jeē coo ñn seña ichi ándiví. <sup>2</sup> Te máa yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí rō. <sup>3</sup> Te jenéhen chi cácahān rō: Vigna te cuun saū, chi ni nasácuéhé i andiví, áchí rō. Tēe stáhú-ni cácuu rō. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhu sáha ri tiempo yáha. <sup>4</sup> Ñáyu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhu jeē coo ñn seña andiví. Te tuá na inga jniñu jéhu stéén rī nuū i, chi máa-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíináhan de, te cuahān yā.

*Jnūhun levadura tēe fariseo*  
(Mr. 8.14-21)

<sup>5</sup> Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. <sup>6</sup> Te ni cahān Jesús jíin de:

Coto má candíje rō levadura tēe grupo fariseo jíin tēe grupo saduceo, achí yá.

<sup>7</sup> Te tēe cáscuáha un ní cacahān maá de:

Va siquī jeē tú na staā ndiso yó, jeē yúcuān cáhān yā súcuān, áchí de.

<sup>8</sup> Te ni jini Jesús, te ni cahān yā:

¿Najehē cácahān rō jeē ni cáhān rī súcuān siquī jeē tú na staā cándiso rō? Tēe tu cándíje ñihin cácuu rō.

<sup>9</sup> ¿A ná tu jecūhun ni rō jeē tu ní cáhān rī súcuān siquī jeē tu ndiso rō stáa? ¿A tu cáncūhun ni rō jeē ní tahu cuéchi rí uhūn staā ni cayejí uhūn mil tēe, te nasaa jīca ni canastútú rō jeē ni quendōo? <sup>10</sup> ¿Te á tu cáncūhun ni rō jeē ní tahu cuéchi rí uxā staā ni cayejí cuūn mil tēe, te nasaa jīca ni canastútú tucu rō? <sup>11</sup> ¿Te najehē tu cájecūhun ni rō jeē násūu siquī staā ni cahān rī jíin rō jeē ni cáhān rī jeē coto má candíje rō levadura tēe fariseo jíin tēe saduceo? Achí yá jíin de.

<sup>12</sup> Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yáhi levadura, chi sa suhva ni cahān yatá yá jeē ma cándíje de jnūhun stáhú cástéén tēe fariseo jíin tēe saduceo.

*Jeē ni cáhān Pedro jeē Jesús cúu Cristo*  
(Mr. 8.27-30; Lc. 9.18-21)

<sup>13</sup> Te nuū ni jínū Jesús región Cesarea Filipino jíin tēe cáscuáha jíin yá, te ni cajnūhun yá de:

Ruhū, Yaā ní nduu tēe, ¿ndé ñn cúu ri cácahān ñáyu?

<sup>14</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

<sup>15</sup> Te ni cahān yā jíin de:

Te máa rō, ¿ndé ñn cúu ri cácahān rō? achí yá.

<sup>16</sup> Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

17 Te ni cahān Jesús:

Yōhoyo ndetū rō, Simón sēhe Jonás, chí nasūú ñin ñayuu ni steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. 18 Te ruhū suni cáhán rī jíin ró jeē maá ró cúu Pedro, jeē cuní cahān: yuū. Te jnūhun ndaā jeē ní cáhán rō jeē maá rí cúu Cristo, suu cúu nájnūhun ñin yuū cáhnu. Te siquí yuū cáhnu yáha sáha ri jeē quítuu vehe, te vehe un cúu ñayuu cácanđije ruhū. Te tu ndé vé cundeyí cuiti siquí i, ní jnūhun xeēn jeē cájihí i, tuá na vé cúu sáha jíin ánuá i. 19 Te máá ró condiso jniñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te táca jéé cási rō jeē ma sáha ñayuu ini ñayiví yáha, suni casi jeē cáyúcú nde andiví. Te táca jéé cuáha ró jnūhun sáha i ini ñayiví yáha, suni jeē cáyúcú nde andiví cuáha jnūhun. Achí yá.

20 Yūcuán na te ni ndacu ya jniñu nuū téé cáscuáha jíin yá, jeē ma cáchi de nuū ní ñin ñayuu jeē cúu ya Cristo.

*Jeē ní castūhún Jesús jeē cúu yā  
(Mr. 8.31-9.1; Lc. 9.22-27)*

21 Te nde saá ní quejéé Jesús cástūhun cájí yá nuū téé cáscuáha jíin yá jeē jíni ñúhún quihīn yā ñuu Jerusalén. Te táca téé jéhu jíin sūtū cácuajéhu jíin téé cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá. 22 Yūcuán na te Pedro, ní cana máñúhún de ya, te ni quejéé de cáhán de nuū yá:

¿Naun cáhán ní súcuan? Chí tu cuní Yaā Dios jeē cuu súcuan. Tu jíni ñúhún cuiti ndoho ní jnūndóho yáha, áchí de.

23 Te ni ndió cóto ya nuū Pedro, te ni cahān yā jíin de:

Cujiyo quihīn rō, chí cáhán rō ná cáhán Satanás. Chí tēe ndúcú stíví ruhū cúu rō. Te tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájeni ní ñayuu. Achí yá.

24 Yūcuán na te ni cahān yā jíin téé cáscuáha jíin yá:

Na-ni ñayuu núu cuní i condiquin i ruhū, na cási i jeē cuní maá i, te na cóndiquin i ruhū te cuáha i jnūhun ndoho i jnūndóho jeē siquí rī, vésú na cúu i. 25 Chí núu ndé ñayuu cuní i cácu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vésú na cúu i jeē siquí ruhū, te cotecu i ní cáni. 26 ¿Chí ndé cuajniñu vésú na cundeyí ñayuu nihīn i ní ñayiví, te núu quiví i nuū jnahnū ndetū i? Chí tú na jíin cuiti chunaa ñayuu jeē cácu ánuá i. 27 Chí ruhū, Yaā ní nduu tēe, ndiji ri jíin táca ndajéhé rī, te yōhoyo luu cujéhu ri nájnūhun cújéhu Tátá rī. Yūcuán na te cuáha ri tahū nuū ñin ñin ñayuu núu ndese jniñu ní casáha i. 28 Te jendaá cahān rī jíin ró jeē sava tēe cáhīn yáhá, ma cúu de chí nde cuni de jeē maá rí, Yaā ní nduu tēe, ndacu ri jniñu jíin poder rī.

*Jeē tucu ni nduu ya  
(Mr. 9.2-13; Lc. 9.28-36)*

## 17

1 Yūcuán na te nuū iñú quiví te Jesús ní jeca ya Pedro jíin Jacobo jíin Juan ñani Jacobo, cuahān sūn ya jíin de ñin yucu súcun. 2 Te yūcuán, tucu ní nduu ya nuū de. Chí ní ndindēe núu yā nájnūhun niāndii. Te sahma ya ní nducujín quiyí ndasí, nájnūhun nduva luz. 3 Te ní cajito-ni de jeē Moisés jíin Elías, tēe ní cahīyo jenahán, cándajniñún de jíin yá. 4 Te ní cahān Pedro jíin yá:

Nacā jeē váha jeē cáhīn ná yáha. Te núu cuní ní te na sáha ná uní vehe ramada, ñin cuu máá ní, inga cuu Moisés, te inga cuu Elías, achí de.



<sup>5</sup> Te níni cáhán gā de, te ni quiji vicō nūhun jēē yaa ndasí, ni jesi-ni nuū de. Te nuū vicó un ní cahán in jnūhun:

Yāha cúu Sēhe ri jeē maní ndasí rí jín, te cúsi ní rí jín. Na cúni nahín ró jnūhun cáhán yā. Achí.

<sup>6</sup> Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. <sup>7</sup>Yūcuán na te ni quee Jesús, te ni soó yá ndaha ya siquī de. Te ni cahán yā:

Ndocuñi, te ma yūhu ró jijnáhan ró, achí yá.

<sup>8</sup> Te ni candacoto de, te tuá tēe un ní cájito de, chí máá in na Jesús.

<sup>9</sup> Te ni cananuu de jín yá yucu ún. Te ni ndacu ya jniñu nuū de:

Ma cáchi rō nuū ní in jeē súcuan ni cajito ró, chí nde na nátecu maá rí, Yāā ní nduu tēe, achí yá.

<sup>10</sup> Yūcuán na te tēe cáscuáha jín yá, ni cacajnūhún de ya:

Núu súcuan te tēe cástéén tutu ley Yāā Dios, ¿najehe cácahán de jeē canuu ndiji Elías xihna gā, te sáa te quiji Yāā cúu Cristo? achí de.

<sup>11</sup> Te ni cahán Jesús jín de:

Jendaá cúu jeē xihna gā quiji in tēe cuu nájnūhun Elías, te sátūhva de ndihi, achí tutu. <sup>12</sup> Te cáhán rí jín ró jeē jé ni quiji tēe ni cuu nájnūhun Elías, te tu ní jini ñayuu jeē suu de cúu. Te ni casáha ndevāha ñayuu jín de ndihi jeē ní cacuu ni maá i. Te suni súcuan stóho i ruhū, Yāā ní nduu tēe. Achí yá.

<sup>13</sup> Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

*Jeē ní nasávāha ya in sūchi jíhí yihí*

(Mr. 9.14-29; Lc. 9.37-43)

<sup>14</sup> Te ni najinū yā jín de nuū ñayuu cuehē ún. Te ni quee in tēe, ni jecuñi yití de nuū yā, te ni cahán de:

<sup>15</sup> Cundáhú ni ní séhe yí ná, chí yōhyo xeēn ndóho i cuehyí jíhí yihí.

Te je ni cuu cuehē jínu cótúú i nuū ñuhún jín nuū ndúte. <sup>16</sup> Te ni quindeca ná i nuū tēe cáscuáha jín ní, te tu ní cúu sávāha de i, achí de.

<sup>17</sup> Te ni cahán Jesús:

Ñayuu yōhyo nīhni ní cacuu ró chi tu cácandíje ró jēē cuu nduvāha i. ¿Nasaa ga quiví condee rí jín ró? ¿Te nasaa ga quiví cuandeyí ní rí jín ró? Cuáquihin sūchí un na quíji i, achí yá.

<sup>18</sup> Te ni cahán yā nuū tachí, te ni quenda-ni ini sūchí un. Te ni nduvāha-ni i maá hora un.

<sup>19</sup> Yūcuán na te tēe cáscuáha un, ní cacajnūhun sín de ya:

¿Najehe tu ní cúu quenehen ná tachí un jijnáhan ná? achí de.

<sup>20</sup> Te ni cahán yā:

Siquī jeē tu cácandíje nīhin ró jēē cuu sáha ró. Chi jendaá cahán rí jín ró, jeē núu candíje ró vēsú in tíhli-ni, cūhva nájnūhun in ndiquin mostaza, te cuu sáha ró táca-ni jniñu yí. Chi cuu cahán rō jeē na cújiyo yucu yáha quihín inga lado, te cujiyo-ni. Te táca-ni jniñu chí cuu sáha ró, te núu candíje nīhin ró jēē cúu. <sup>21</sup> Te in tachí súcuan chí ma quenda cuiti quihín, te núu tu cacān tahú rō te coo ndite ni rō. Achí yá.

*Jeē ni cahán tucu ya jeē cúu yā*

(Mr. 9.30-32; Lc. 9.43-45)

<sup>22</sup> Te jica cuu Jesús jín de jijnáhan de región Galilea, te ni cahán yā jín de:

Maá rí, Yāā ní nduu tēe, nastúu i ruhū nuū táca tēe xeēn. <sup>23</sup> Te cahni de ruhū, te nuū uní quiví te natecu rí, achí yá.

Te ni canducuíhyá ndasí ni de jeē ní cahán yā jnūhun yáha.

*Siquī xūhun cuajniñu ini templo*

<sup>24</sup> Te ni jinū yā ñuu Capernaum jín tēe cáscuáha jín yá. Te tēe cástútú xūhun templo ni quecoo de, te ni cacajnūhún de Pedro:

Te maestro maá ró jijnáhan ró, ¿á tú cuāha de xūhun cuajniñu ini templo, chí naún? achí de.

25 Te ni cahān Pedro:  
Cuu, áchí de.

Te ná ni quívi de ini vehe, te xīhna  
gā Jesús ni cahān yā jíin de:

¿Ndese jéni ni rō, Simón? Tāca tée  
cácuu rey ini ñayívi yáha, ¿ndé núu  
cájicān de xūhun renta jíin xūhun  
cuajníñu ñuu? ¿A núu séhe de chí  
núu ñáyuu sín vehe? áchí yá.

26 Te ni cahān Pedro:  
Nuū ñáyuu sín vehe, áchí de.  
Te ni cahān Jesús:

Núu súcuan te tú na inga cujéhnu  
nuū séhe rey jeē cacán xūhún un  
núu i.

Súcuan ni cahān yā jeē cujéhnu ya  
cúu ya Sēhe Yaā Dios. Te ni cahān  
yā:

27 Te na chúnaa yō, návāha tu  
squítí ni yō de. Núu súcuan te  
cuáhán ndé yumar, te scāne ró gan-  
cho jeē jnī chācá, te tava rō chācá  
jéē jnī xīhna gā. Te ndica rō yuhu  
ti, te yūcuan níhīn rō ñin xūhun jéē  
cānda chunaa rō jeē cájicān de. Te  
quindēca ró núu de jeē cúu ruhū jíin  
róhó. Achí yá.

*Ndé ñáyuu cúu jeē cujéhnu ga  
(Mr. 9.33-37; Lc. 9.46-48)*

## 18

1 Te suni quívi un ní quecoo tēe  
cáscuáha un núu yā, te ni caca-  
jnūhún de ya:

¿Ndé ñin cújéhnu ga nuū ñáyuu jeē  
ndácu Yaā andívi jniñu nuū? achí  
de.

2 Te ni cana ya ñin sūchi lúli, te ni  
jeni ya i mēhñú de. 3 Te ni cahān yā:

Jendaá cahán rī jíin ró, núu tú  
nandió cóo ni rō te cani ni rō  
nájñūhun ñin sūchi lúli, ma quívi  
cuiti rō ndaha Yaā andívi jéē ndacu  
ya jniñu nuū rō. 4 Núu súcuan te  
ñayuu jeē jéni ni i jeē tu cújéhnu i,  
nájñūhun jéni ni sūchi lúli yáha, suu  
i cújéhnu ga nuū ñáyuu jeē ndácu  
Yaā andívi jniñu nuū. 5 Te na-ni  
ñayuu núu jeē siquí ruhū jetáhú i  
ñin sūchi lúli nájñūhun sūchi yáha, te  
ruhū jetáhú i. Achí yá.

*Xeēn coo siquí ñáyuu quívi nuū  
cuéchi*

*(Mr. 9.42-48; Lc. 17.1-2)*

6 Te núu ñin sūchi lúli yáha cándije  
i ruhū, te núu quívi i cuéchi sáha  
na-ni ñayuu, te vāha ga núu ni  
conuhnī ñin yōso cáhnu sucūn ñayuu  
ún, te quēe i chíji ndute mar nuú.

7 Nacā xeēn cúu jíin ñáyuu ñayívi,  
chí máni íyó jéē nducú squívi ñayuu  
nuū cuéchi. Te máni súcuan coo ini  
ñayívi. Te nacā xeēn ndoho ñayuu  
jeē squívi jnāhan nuū cuéchi.

8 Núu súcuan te núu ndaha ró chí  
jéhē rō sáha jeē quívi ró cuéchi, vāha  
ga cahnde rō te scāne ró na quíhín,  
návāha tuá sáha ró cuéchi. Chí  
vāha ga jeē coo chācuá ró chí coo  
tícuñdu ró te quívi ró núu cotecu  
rō ní cáni, vēsú jeē cóndee ndíndúu  
ndaha ró jéhē rō te quívi ró núu  
ñuhún jeē cayú ní cáni. 9 Te núu  
tinūu ró sáha jeē quívi ró cuéchi,  
vāha ga tava rō te scāne ró na  
quíhín, návāha tuá sáha ró cuéchi.  
Chí vāha ga jeē coo ñin-ni tinūu ró te  
quívi ró núu cotecu rō ní cáni, vēsú  
jeē cóndee ndíndúu tinūu ró te quívi  
ró núu ñuhún infierno.

*Jñūhun yátá siquí lanchi jeē ní  
sana*

*(Lc. 15.3-7)*

10 Coto ma sájéē ni rō nuū ní ñin  
sūchi lúli yáha. Chí cahán rī jíin ró  
jeē taca ndajéhé andívi jéē ndito ya  
i, níni cáhīn ya nuū maá Tátá rī  
andívi. 11 Chí ruhū, Yaā ní nduu tēe,  
vēji ri jeē jnáma ri ñayuu jeē ní sana  
i nuū Yaā Dios.

12 ¿Te ndese cájeni ni rō? Núu  
ñin tēe ndéca de ñin ciento lanchi, te  
núu sana ñin ti, ¿á tu stóo de cuñ  
xico xahūn cuñ gā tí yucu, te ndicó  
de quinanducú de quiti ní sana ún?

13 Te núu ni nanihīn de ti, te ndaā  
jeē yóhyo ga cúsiñ ni de jíin quiti ún  
vēsú jíin cúñ xico xahūn cuñ gā  
quiti jeē tu ní sána. 14 Te suni súcuan  
máá Tátá rō, Yaā ndeé andívi, tu  
cúni yá jeē jnahnú ndetū ni ñin sūchi  
lúli yáha.

*Siquī jeē cōne cáhnu ni yō nuū jnāhan yó*

*(Lc. 17.3)*

<sup>15</sup> Te núu jnāhan ró ní sáha de cuēchi siquī rō, núu súcuan te castūhun ró nuū mañúhún-ni de jeē ni sáha de cuēchi siquī rō. Te núu ni jetáhú de jnūhun ni cahān rō jín de, núu súcuan te je ni ndumanī de jín ró ní sáha ró. <sup>16</sup> Te núu tu ní jétáhú de jnūhun cáhán rō, te quicāna ró ñn chí úu gā ñayuu quihín rō jín núu de, cuu i testigo jín ró, te cundaā cuēchi de te ndumanī de jín ró. <sup>17</sup> Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácañdije. Te núu tu ní jétáhú tucu de jnūhun cahān ñayuu cácañdije ún, te siáá rō de na cóo de nájnūhun ñn tēe tu cácañdije nuū Yaā Díos chí tēe stútú xūhun renta.

<sup>18</sup> Jendaā cahán rī jín ró jēe tāca jēe cāsī rō jeē ma sáha ñayuu ini ñayiví yáha, suni casī jeē cáyūcú nde andiví. Te tāca jēe cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun.

<sup>19</sup> Te suni cáhán rī jín ró, núu uū jnāhan ró ini ñayiví yáha, inuú canī ni rō siquī ñn jeē cacán tahú rō, núu súcuan te máá Tátá rī andiví cuáha ya jeē cájicān rō. <sup>20</sup> Chi núu ndé mí ndútútú úu chí únī ñayuu jeē cáchiñúhún i ruhū, te yūcuán íne rī jín i, áchí yá.

<sup>21</sup> Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núu jnāhan ná jēe sáha de cuēchi siquī ná? ¿A ndé uxā jínu chí naún? áchí de.

<sup>22</sup> Te ni cahān Jesús:

Tu cáhán rī jín ró jeē máá úxā jínu, chí nde uxā jínu jeē uní xico uxī.

*Jnūhun yátá siquī mozo jeē tu ní íne cáhnu ni*

<sup>23</sup> Núu súcuan te Yaā ndeé andiví, suhva cúu jeē íne cáhnu ni yā nuū ñayuu ndácu ya jniñu nuū: Cúu

nájnūhun ñn rey jeē cuní de sándaā de jín mozo de jeē cátaū nuū de.

<sup>24</sup> Te ni quejé de sándaā de jín i. Te ni caquindeca i ñn mozo jeē

taú tijni millón peso nuū de. <sup>25</sup> Te tú na vé névāha mozo un chunaa nuū de. Te ni ndacu de jniñu jeē

na cúyāhu mozo un jín ñasihí jín séhe jín táca ndajniñu, te nucūnaa

xūhun táu. <sup>26</sup> Yūcuán na te ni jecuiñí yití mozo un, te ni cahān ndahú de

jín patrón de ún: Condetu ní, te na chúnaa ndihí ná xūhun ní, áchí de.

<sup>27</sup> Te máá patrón ni cundáhú ni de mozo de. Te ni ine cáhnu ni de jeē

taú mozo de ún, te ni siaá de jeē ma chúnaa gā. <sup>28</sup> Te ni quenda mozo

un cuáhān de, te ni najnáhan-ni de jín ñn jnāhan mozo de jeē taú jecu

peso nuū de. Te ni jni de tēe ún, te ni quitu de sucūn, te ni cahān de:

Chunaa jeē taú rō nuū rī, áchí de. <sup>29</sup> Te jnāhan mozo de un ní jecuiñí

yití núu de, te ni cahān ndahú jín de: Condetu te na chúnaa ndihí rī

xūhun ró, áchí. <sup>30</sup> Te máá de tu ní cuní de, chí ni chune de tēe un

vécāa nde quiví nachunaa jeē taú nuū de. <sup>31</sup> Te tāca jnāhan mozo de

ni cajito jeē súcuan ni sáha de, te ni cajnahuhū ndasí ni de. Te cuango

de nuū patrón de, te ni cacachí de ndihí ndese ni cuu. <sup>32</sup> Yūcuán na te

patrón un ní nacana de mozo un, te ni cahān de jín: Mozo ndevāha cúu

ró. Chi ni ine cáhnu ni rī ndihí jeē taú rō nuū rī, chí ni cahān ndahú

ró jín rī. <sup>33</sup> Te nájnūhun ni cundáhú ni rī rohó, suni súcuan ni jini ñúhún

cundáhú ni rō jnāhan mozo rō nuú, áchí de. <sup>34</sup> Te ni quití ndasí ni

patrón, te ni ndacu de jniñu jeē na

quiví vecāa nde nachunaa ndihí jeē taú nuū de.

<sup>35</sup> Te ni jínu ni cahān yā, te áchí yá:

Nájnūhun ni sáha rey un jín mozo de, suni súcuan sáha máá Tátá rī

andiví jín táca rohó núu tu cone cáhnu ni rō nuū jnāhan ró nde jín

ini jín ánuá rō, núu na-ni cuēchi sáha i nuū rō. Achí yá jín de

jínáhan de.

*Siquí jeē ma stóo jnáhan tēe jín  
ñahan*  
(Mr. 10.1-12; Lc. 16.18)

## 19

<sup>1</sup> Te nuū ní ndíhi ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núū cáne niāndii. <sup>2</sup> Te cuehē ñayuu ni candiquín i ya, te yūcuan ní nasávaha ya ñayuu cácuū.

<sup>3</sup> Yūcuán na te ni quecoo jecu tēe grupo fariseo nuū yā, chi cácu ni de coto ndee de ya núu ndese cahān yā. Te ni cacajnúhún de ya:

¿A íyó ley jeē cuu ndusín in tēe jín ñasihí de núu na-ni siquí cúu, chí naún? áchí de.

<sup>4</sup> Te ni cahān yā:

¿A tu ní cácahu ró tutu i ndese ní sáha Yaā Dios ñayuu nde xíhna ñúhún? Chí tēe jín ñahan ní sáha ya, achí. <sup>5</sup> Te suni ní cahān Yaā Dios: Jeē yūcuan cúu jeē stóo tēe tátá de náná de, te quijnáhan de jín ñasihí de, te in na cuu ndindúú de, áchí Yaā Dios, achí tutu. <sup>6</sup> Núu súcuan te tuá cúu uū jnáhan de, chí in na cúu. Jeē yūcuan tu íyó váha jeē stóo jnáhan, chí jeē ní squíjnáhan Yaā Dios cúu, áchí yá.

<sup>7</sup> Te ni cacajnúhún de ya:

Núu súcuan ¿te naun ni ndacu Moisés jniñu jenahán jeē núu stóo in tēe ñasihí de, te na cúvaha acta jeē ndusín de jín ña? áchí de.

<sup>8</sup> Te ni cahān yā jín de:

Siquí jeē níhni ní rō jijnáhan ró, jeē yūcuan ní jēhe Moisés jnúhun jeē stóo ró ñasihí ró. Te nde xíhna ñúhún chí nasūu súcuan ní cuu. <sup>9</sup> Te ruhú chí cáhán rí jín ró, núu in tēe stóo de ñasihí de, te núu nasūu jéē tíjni ní ña, te quijnáhan de jín inga ñahan, núu súcuan te cásiquí ndéē de ña. Te núu in tēe condeca de ñahan ní ndusín, suni cásiquí ndéē de ña, áchí yá.

<sup>10</sup> Yūcuán na te ni cacahān tēe cáscuáha jín yá:

Te núu ma cúu stóo tēe ñasihí de, núu súcuan te váha ga ma condeca de ñahan, áchí de.

<sup>11</sup> Te ni cahān yā jín de:

Jnúhun ní cahān rō yāhá, tu níhín jniñu nuū ndíhi tēe, chí máá nene tēe jeē ní sáha Yaā Dios jeē níhín jniñu nuū. <sup>12</sup> Chí íyó tíjni siquí jeē jési jeē ma condeca tēe ñahan. Chí sava tēe ní cacacu de jeē ma cúu condeca de ñahan. Te sava ga tēe ní sáha ñayuu jeē ma cúu condeca de ñahan. Te sava ga tēe ní cajeni ní maá de jeē ma condeca de ñahan siquí jeē ndíhví ní de jín jniñu jeē ndácu Yaā andíví nuū de. Tēe jeē cúu cuatáhú jnúhun jeē ma condeca de ñahan, na cuatáhú de núu súcuan. Achí yá.

*Jeē ní jicān tahu Jesús jehē sūchi lúli*

(Mr. 10.13-16; Lc. 18.15-17)

<sup>13</sup> Yūcuán na te ni quecoo ñayuu jín sūchi lúli, jéē na sóo yá ndaha ya xiní i te cacān tahu yā jehē i. Te tēe cáscuáha jín yá, ní cacahān de nuū ñayuu vējicoo jín i. <sup>14</sup> Te ni cahān Jesús:

Cuāha jnúhun na quíjicoo sūchi lúli jíñā nuū rí, te ma cási rō jeē quíjicoo i. Chí ñayuu jeē ndió cóo ní i cani ní i nájnúhun sūchi yáha, suu i quíví ndaha Yaā andíví jéē ndacu ya jniñu nuū i, áchí yá.

<sup>15</sup> Te ní soó yá ndaha ya xiní i jínáhan i. Te ní quenda ya yūcuan cuahān yā.

*Jnúhun tēe cúca*

(Mr. 10.17-31; Lc. 18.18-30)

<sup>16</sup> Te in tēe suchí ní quee de nuū Jesús, te ní cajnúhún de ya:

Tēe váha cúu ní Maestro. Te cachi ní, ¿na jniñu váha sáha ná te níhín tahu na cotecu na ní cáni andíví? áchí de.

<sup>17</sup> Te ni cahān yā jín de:

¿Naun cáhán rō jeē tēe váha cúu rí? Tú ní in tēe váha íyó, chí máá in-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

18 Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndēē jnāhan rō. Ma sacuíhná rō. Ma sajnúhún rō. <sup>19</sup> Cuatáhú rō nuū tatá rō nuū naná rō. Te cundáhú ni rō jnāhan rō nájnūhun cundáhú ni rō maá rō, achí yá.

<sup>20</sup> Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmaní gā sāha ná núu súcuan?

<sup>21</sup> Te ni cahān Jesús:

Núu cúní rō squícu ndihí rō, cuáhán te xīco rō ndihí jeē névāha rō, te cuāha rō núū ñáyuu ndahú. Te nde andiví cuāha ya jeē ndetu ndasí coo rō. Yūcuán na te quiji rō condiquín rō ruhū quihín yō, achí yá.

<sup>22</sup> Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chi cúcá ndasí de.

<sup>23</sup> Yūcuán na te ni cahān Jesús jíin tēe cáscuáha jíin yá:

Jendaá cahán rī jíin rō, tēe cúcá chí yōhoyo yíi quívicoo de ndaha Yaā andiví jeē ndacu ya jniñu nuū de. <sup>24</sup> Te cahán tucu ri jíin rō jeē yachí gā yáha ñin camello yaū yutícuí, vésú jeē quíví ñin ñáyuu cucá ndaha Yaā Dios jeē ndacu ya jniñu nuū i, achí yá.

<sup>25</sup> Te tēe cáscuáha jíin yá, yōhoyo ni canaa ni de jeē ní cajini de jnūhun yáha, te ni cacajñūhun jnāhan de:

¿Ndé ñáyuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yā:

Ñáyuu chí ma cúu squíví i máá i ndaha Yaā Dios, te máá yá chí ndihí-ni cuu sāha ya, achí yá.

<sup>27</sup> Yūcuán na te ni cahān Pedro:

Sāña jíināhan ná ní castóo ná ndihí jeē cánevāha ná, te cándiquín na nihín. ¿Te na vé nihín na núu súcuan? achí de.

<sup>28</sup> Te ni cahān Jesús jíin de:

Ruhū, Yaā ní nduu tēe, jendaá cahán rī jíin rō jíināhan rō jeē ñin quíví conene rī mesa ndacu ri jniñu, te yōhoyo luu cujēhnu ri ini ñayíví jeé. Te quíví ún te máá rō jeē ní cacondiquín rō ruhū, suni coyūcu rō nuū uxí uū mesa ndacu rō jniñu. Te sándaā rō jniñu ndihúxí uū yucūn ñáyuu Israel. <sup>29</sup> Te tāca ñáyuu jeē ní stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquí jeē cóndiquín i ruhū, te nanihín i ñin ciento gā jeē súcuan. Te suni nihín tahú i cotecu i ní cáni. <sup>30</sup> Te cuehē ñáyuu jeē vijna cácuu i nuū, nduu i sandihí. Te ñáyuu jeē vijna cácuu i sandihí, nduu i nuū. Achí yá.

*Jnūhun yátá síquí tēe cásajniñu*

## 20

<sup>1</sup> Te suhva cúu jeē ndácu Yaā andiví jniñu nuū ñáyuu: Cúu nájnūhun ñin tēe chíí ñuhun. Te ñin nehen ni quenda de, ndúcú de tijni mozo jeē taxín ndéhē uva de. <sup>2</sup> Te ni sándaā de jíin mozo un jeē chúnaa de ñin denario jeē quíví. Te ni tají de tēe un cuángoo jeē taxín uva de. <sup>3</sup> Yūcuán na te ni quenda tucu de nájnūhun cahñin. Tē ni jito de nuū sava ga tēe cáyūcu sáa-ni de nuū yáhu. <sup>4</sup> Te ni cahān de jíin: Róhó jíināhan rō, cuángoo taxín rō uva rī, te chunaa vāha ri yāhu rō, achí de. Te tēe un cuángoo de. <sup>5</sup> Te ni quenda tucu de jeē cuácuu cahuxí uū jíin jeē cuácuu cahuní, te suni súcuan ni nihín tucu de mozo. <sup>6</sup> Te jeē cuácuu cahuhūn ni quenda tucu de. Te ni nihín tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhñin sáa-ni rō yáha ní ndiáca? achí de. <sup>7</sup> Te ni cacahān tēe ún: Siquí jeē tú ni ñin ní cána sāña jeē sájniñu ná. Te ni cahān de jíin tēe ún: Núu súcuan te suni máá rō quingoo rō taxín rō ndehē uva rī, chí chunaa vāha ri yáhu rō, achí de. <sup>8</sup> Te nuū ní ini,

te tēe chíí ñuhun ni cahān de jíin tēe cújéhnū nuū mozo de: Cana xinī tēe casájniñu te chunaa rō yāhu de, te xīhna gā tēe ni quívicoo sandihí, te sáa te tēe ni quívicoo xīhna ñúhún, áchí de. <sup>9</sup> Te ni quecoo tēe jeē ni quívicoo cahuhún. Te ñn denario ni caquihin ñn ñn de. <sup>10</sup> Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyāhu de. Te ñn-ni denario ni caquihin ñn ñn de. <sup>11</sup> Te nuū ní caquihin de, te ni caquejéé de cácahān sōó de siquī tēe chíí ñuhun, áchí de: <sup>12</sup> Máá ná jijnáhan ná, ndiáca ni casájniñu ná, te ni candoho ná jéé jihní. Te tēe yáha jéé ni quívicoo sandihí, chí máá ñn hora-ni ni casájniñu de. Te ñnuú-ni ni chiyāhu ní sáña jíin de, áchí de. <sup>13</sup> Te tēe chíí ñuhun ni cahān jíin ñn de: Amigo, nasūu jéé tú vāha sáha ri jíin ró. ¿A tu ní sándaā yō jeē ñn denario quiyāhu ró, chí naún? <sup>14</sup> Núu súcuan te quihin yāhu ró te quinhun rō. Chí cúní rī jeē tēe ni quívicoo sandihí yáha, ñnuú quiyāhu de jíin máá ró. <sup>15</sup> ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rí? áchí de. <sup>16</sup> Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nacāji ya maá i jeē ndúu i sēhe ya. Achí yá.

*Jeē ni cáhān tucu Jesús jeē cúu yā  
(Mr. 10.32-34; Lc. 18.31-34)*

<sup>17</sup> Yūcuán na te ná ni quihin Jesús ichi cuahān yā ñnuu Jerusalén, te ni cana sín ya ndihúxí uū tēe cáscuáha jíin yá. Te ni cahān yā jíin de:

<sup>18</sup> Cuni sōho ró, chí je cuángoo yó ñnuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujehnū jíin núu tēe cástéén tutu ley. Te ndonda de siquī

rī jeē cúu rī. <sup>19</sup> Te squívi de ruhū nuū tēe nación Roma jeē cáyucú Jerusalén cándacu jniñu. Te tāca tēe un sácatá de nuū rī. Te cani de ruhū, te sáa te cahni de ruhū jicā cruz. Te nuū uní quívi te natecu rī. Achí yá.

*Jeē ni jícān naná Jacobo jíin Juan  
ñn favor nuū yā*

*(Mr. 10.35-45)*

<sup>20</sup> Yūcuán na te ni quee ñasihí Zebedeo nuū yā jíin sēhe ña Jacobo jíin Juan. Te ni jecuiñi yití ña nuū yā, jícān ña ñn favor nuū yā. <sup>21</sup> Te ni cajnūhun yá ña:

¿Na vé cuní rō?

Te ni cahān ña:

Cuāha ní jnūhun jeē quívi ndácu ní jniñu te conēne ndindúú sēhe ná yáha xiin ní, ñn i lado vāha ní, te inga i lado jecó ní, achí ña.

<sup>22</sup> Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rí? ¿Te á canda ró ndoho xeēn rō nájnūhun ndoho rí? Achí yá.

Te ni cacahān de:

Cuu sáha ná.

<sup>23</sup> Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rí, te ndoho xeēn rō nájnūhun ndoho rí. Te jeē cónēne ró lado vāha ri jíin lado jecó rí, nasūu rúhū cúu jeē cuáha jnūhun. Chí je íyó túhva cuu tāca tēe jeē ní nacāji Tátá rī, te tēe un níhīn. Achí yá.

<sup>24</sup> Te uxí gā tēe cáscuáha jíin yá ní cajini de jnūhun yáha. Te ni caquiti ni de nuū uú ñani ún. <sup>25</sup> Te Jesús ni cana ya de, te ni cahān yā jíin de:

Cájini rō ndese cásaaha tēe cácujehnū nuū ñayuu tāca nación. Chí cándacu ñihin de jniñu nuū i, te máá de cáchí ndese coo. <sup>26</sup> Te máá ró jijnáhan ró, chí ma sáha ró súcuan. Chí núu ndé ñn ró cúní cujehnū, sa suhva cuajniñu ró núu jnáhan ró. <sup>27</sup> Te núu ndé ñn ró cúní

cuu nuū, sa suhva sáha ró máá ró mozo nuū jnáhan ró. <sup>28</sup> Chi suni súcuan sáha ruhū, Yaā ní nduu tēe, chi nasūu jēē véji ri jeē cuajníñu ñayuu nuū rī, chi sa suhva vēji ri jeē cuajníñu ri nuū ñáyuu. Te cuāha ri máá rí cuu rī návāha jnama ri cuehē ñayuu, achí yá.

*Jeē ní nasávāha ya uū tēe cuáá*  
(Mr. 10.46-52; Lc. 18.35-43)

<sup>29</sup> Yūcuán na te ni quenda ya jín de ñuu Jericó. Te cuehē ndasí ñáyuu ni candiquín i ya. <sup>30</sup> Te yuhíchi un cáyūcu uū tēe cuáá. Te ni cajini de jñūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, achí de.

<sup>31</sup> Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>32</sup> Te ni jecuiñi Jesús, te ni cana ya ndíndúú tēe cuáá un, te ni cajñūhun yá de:

¿Na vé sáha ri jín ró cáculi rō?

<sup>33</sup> Te ni cacahān de jín yá:

Jeē na ndúndijin tinūu ná cáculi ná, achí de.

<sup>34</sup> Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquín de ya cuango de jín yá.

*Jeē ni quívi Jesús ñuu Jerusalén*  
(Mr. 11.1-11; Lc. 19.28-40;  
Jn. 12.12-19)

## 21

<sup>1</sup> Te nuū cuácuyajni ya ñuu Jerusalén, te ni jinū yā jín tēe cáscuáha jín yá ñuu Betfagé, jeē íne jehē yucu Olivos. Te ni tají yá uū tēe cáscuáha jín yá jeē quíngoo de.

<sup>2</sup> Te achí yá jín de:

Cuáhān ñuu lulí íne ichi núú. Te yūcuan níhīn rō ñ burra, núhni tī jín ñ burro lulí. Te ndají ró tī, quíjicoo ró jín tī nuū rī. <sup>3</sup> Te núu ndé ñ cahān jín ró, te cachi rō

nuū: Máá Jítoho yō jini ñúhún yá tī, achí rō. Yūcuán na te siáá-ni i tī, quíji ró jín tī, achí yá.

<sup>4</sup> Te súcuan ni cuu táca jniñu yáha návāha squícu jñūhun ni cahān tēe ni nacani jñūhun Yaā Dios nde jenhān, yósó núú tútu:

<sup>5</sup> Cachi rō nuū ñáyuu ñuu Jerusalén jeē naní ñuu Sión:

Yāhá condēhe ró jeē véji Rey rō.

Tu sájéhnū ya máá yá, chi máá burra-ni yósó yá,

jín burrito, sēhe quiti ndíso.

Achí tutu.

<sup>6</sup> Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de. <sup>7</sup> Te ndéca de burra jín sēhe tī, ni ndecoo de nuū yā. Te ni casoó de sahma de siquī tī, te ni jecosō yā tī. <sup>8</sup> Te cáhiin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. <sup>9</sup> Te ñayuu cuango ichi núú jín ñáyuu cuango ichi yátá, cácana jee i:

Yōhō cújéhnū Yaā cúu Séhe yucūn rey David. Yōhō váha Yaā cúu Yaā jeē véji jín jniñu máá Jítoho yō Yaā Dios. Te yōhō cújéhnū máá Yaā Dios. Achí i.

<sup>10</sup> Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnáhan:

¿Ndé tēe cúu tēe yáha? achí i.

<sup>11</sup> Te ni cacahān ñayuu vējicoo jín yá:

Yāha cúu Jesús jeē nácani jñūhun Yaā Dios, jeē véji nde ñuu Nazaret ndañú Galilea. Achí i.

*Jeē ní quenehen ya ñayuu ini templo*

(Mr. 11.15-19; Lc. 19.45-48;  
Jn. 2.13-22)

<sup>12</sup> Yūcuán na te ni quívi Jesús ini templo cáhnu Yaā Dios. Te ni quenehen ya táca ñáyuu cájeen quiti te cánaxico núú ñáyuu jeē socō i. Te ni scotúú ndeyi ya táca mesa tēe

cástáyí xūhún, jíin silla tēe cáxīcō paloma. <sup>13</sup> Te áchí yá jíin i:

Yósó nuū tútu íi jeē cahán Yaā Dios: Vehe ri chi vehe nuū cájicān tahú cúu, áchí Yaā Dios. Te máá ró jijnáhan ró, chí nájñūhun yaū cava ñacuīhná ni canasáha ró. Achí yá.

<sup>14</sup> Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávāha ya i. <sup>15</sup> Te sutū cácujeñnu jíin tēe cástéén tutu ley Yaā Dios, ni cajito de táca jniñu jéñnu sáha ya, te ni cajini de jeē cácana jee sūchi lúlí ini templo: Yōhyo cújéñnu Yaā cúu Sēhe yucūn rey David, achí i. Te ni caquīti ni de. <sup>16</sup> Te ni cacahān de jíin yá:

¿A tu jíini ró jéē súcuan cácahān sūchi yáha? áchí de.

Te ni cahān Jesús jíin de:

Jíini ri. ¿Te á ná tu cahu ró jéē yosó nuū tútu íi jeē suhva cáhán ñin tēe jíin Yaā Dios?

Sáha ní jéē táca sūchi lúlí jíin sūchi cájexin,  
vāha ndasí cáhán i jeē Yaā cujéñnu cúu Cristo.

Achí.

<sup>17</sup> Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáa ún.

*Jeē ni cáhān yā nuū yújnu higo*

(Mr. 11.12-14, 20-26)

<sup>18</sup> Te jenéhen inga quiví cuanuhun yā ñuu Jerusalén, te jíi yā sōco. <sup>19</sup> Te ni jito ya ñin nundēhe higo, íin yuhíchi. Te ni jehēn yā jehē. Te tú na ndehē ni níhín yā, chí máá ndaha-ni íin. Te ni cahān yā jíin:

Vijna te ma cúun cuítí gā ndehē xiní rō, achí yá.

Te ni ichí-ni yujnu higo ún. <sup>20</sup> Te tēe cáscuáha jíin yá, ni canaa ni de cájito de. Te ni cacajñūhún de ya:

¿Ndese ni sáha ní jéē yachí-ni ni ichí yujnu higo? achí de.

<sup>21</sup> Te ni cahān yā jíin de:

Jendaá cahán rí jíin ró, núu candíje ró te tú cani síquí ni rō, te cuu sáha ró jniñu jéñnu nájñūhun ni sáha ri jíin yujnu higo. Te nde jniñu jéñnu ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájñūhun cahān rō. <sup>22</sup> Te táca jéē cacán tahú rō jijnáhan ró, te núu candíje ró jéē nihín rō, te nihín rō. Achí yá.

*Síquí jeē ndíso jniñu Jesús*

(Mr. 11.27-33; Lc. 20.1-8)

<sup>23</sup> Te ni quiví tucu ya ini templo cáhnu. Te níni stéén yā jñūhun, te sutū cácujeñnu jíin táca tēe jéñnu jeē cándacu jniñu nuū ñáyuu hebreo, ni quecoo de nuū yā. Te ni cacajñūhún de ya:

¿Ndé ní nihín jniñu ró jéē sáha ró jniñu yáha? ¿Te ndé ñin ni tee jniñu síquí rō jeē sáha ró súcuan? Achí de.

<sup>24</sup> Te ni cahān Jesús:

Suni ruhū, cajñūhun rí rohó ñin jñūhun jijnáhan ró, te núu cuu stíó cuíñí rō, yūcuán na te cachi rí nuū rō ndé ní nihín jniñu ri jeē sáha ri jniñu yáha. <sup>25</sup> ¿Ndé ñin ni tee jniñu síquí Juan jeē ni scuándute de? ¿A Yaā Dios chí táca tēe? áchí yá jíin de.

Yūcuán na te ni candajñūhun máá de:

Núu cahān yō jeē Yaā Dios ni tee ya jniñu un síquí Juan, te cahān de jíin yó: Núu súcuan ¿te najehē tu ní cáccandíje ró de? <sup>26</sup> Te núu cahān yō jeē ñáyuu ni cateo jniñu un síquí de, te cáyūhu yó ñayuu, chí ndivíi i cáccandíje i jeē tēe ni nacani jñūhun Yaā Dios ni cuu ndije Juan. Achí de cácahān maá de.

<sup>27</sup> Te ni cacahān de jíin Jesús:

Tu cájini rí, achí de.

Yūcuán na te ni cahān yā jíin de:

Ni ruhū, suni ma cáchi rí nuū rō ndé ñin ni tee jniñu síquí rí sáha ri jniñu yáha, áchí yá.

*Jñūhun yátá síquí uú sēhe yíi*

<sup>28</sup> Te ni cahān gā yā jíin de:

Cuni nahín ró jñūhun yátá yáha: ñin tēe ni iyo uú sēhe yíi de. Te ni



cahān de jíin ñn i: Séhē, quihīn rō taxīn ró ndehē uva rī vijna, áchí de. <sup>29</sup> Te ni cahān i: Ma quihīn na, áchí i. Te ni cunúu, te ni nacani ni i, te cuahān i nuū jniñu ún. <sup>30</sup> Te tēe un ní jehēn de nuū inga séhe de, te suni súcuan ni cahān de jíin i. Te ni cahān i: Cuu núu súcuan, te quihīn na, áchí i. Te tu ní jehén i. <sup>31</sup> ¿Te ndese cájeni ni rō? Jeē ndindúú i, ¿ndé ñn i ni squícu jniñu cúní tatá i? áchí yá.

Te ni cacahān de:  
Sūchi jēē ni cáhān de jíin xīhna gā, áchí de.

Te ni cahān Jesús jíin de:  
Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachī cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quívi ró. <sup>32</sup> Chí ni quiji Juan, ni steén de ndese condiquin rō jnūhun ndaā, te tu ní cá candíje ró jnūhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jnūhun ni cahān de. Te máá ró, vésú ni cajito ró jēē ní cacandíje i, te tu ní cánacani cuiti ni rō jeē candíje ró. Achí yá.

*Jnūhun yátá siquī tēe néé cá sájniñu nuū uva*  
(Mr. 12.1-12; Lc. 20.9-19)

<sup>33</sup> 'Cuni sōho inga jnūhun yátá jijnáhan ró: Ni Iyo ñn tēe chíi ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxin. Te ni jeni de ñn vehe súcún návāha cuu coto de ní cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. <sup>34</sup> Te máá tiempo ndutútú uva, te ni tají de jecu mozo cuanuquihin sava uva nuū tēe cá sájniñu ún. <sup>35</sup> Te tēe un ní cajni de mozo un. Te ñn i ni cacani de, te inga i ni cajehni de, te inga i ni cajēhe de yuū xiní. <sup>36</sup> Te tēe chíi uva ni tají tucu de jecu gā mozo cuango, cuehē gā vésú jeē xīhna

ñúhún. Te suni súcuan ni casáha tēe un jíin ndihi mozo un.

<sup>37</sup> 'Te jeē sándihí na te ni tají de séhe de cuahān. Te jéni ni de: Tēe ún chi cuatáhu de jijnáhan de nuū séhe ri. <sup>38</sup> Te tēe cá sájniñu ún, núu ní cajito de nuū séhe tēe chíi uva, te ni cacahān maá: Tēe chíi táhū cúu jeē yáha. Na cáhni yō de, te ndōo tahū de cuu yó, áchí. <sup>39</sup> Te ni cajni de i, te ni caquenehen de i inga lado, te ni cajehni de i. Achí yá.

<sup>40</sup> Yūcuán na te ni cajnūhun yá de:  
Núu súcuan te núu na quiji tēe chíi uva un, ¿te ndese sáha de jíin tēe cá sájniñu ún? áchí yá.

<sup>41</sup> Te ni cacahān de jíin yá:  
Ma cundáhu cuiti ni de táca tēe cá sáha jniñu néé un, chí cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quívī ndutútú ndehē, te tēe ún nacūāha de sava ndehē nuū tēe chíi uva. Achí de.

<sup>42</sup> Te ni cahān Jesús jíin de:  
¿Te á ná tu cahu ró jnūhun yáha jeē yosó núu tútu iī, jeē ruhū cúu nájnūhun ñn yuū? Chí áchí tutu:  
Yuū jeē ní casquéhichī tēe cájeni vehe,  
yuū yáha nduu jeē quítuu vehe.  
Máá Jítoho yō Yaā Dios ni sáha ya súcuan,

te cánaa ni yō jíto yó jniñu yáha. Achí tutu. <sup>43</sup> Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū ró jijnáhan ró, te nacūāha ya jniñu un núu inga ñayuu jeē squícu váha i jniñu ndácu ya nájnūhun cúní yā. <sup>44</sup> Te ñayuu tu cá candíje, ndoho i nájnūhun ndóho ñayuu jeē cotúú siquī yuū te jnánhú i. Te quívī sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē nínga yuū siquī i te cundihī i sáha. Achí yá.

<sup>45</sup> Te sutū cácu jéhnu jíin tēe grupo fariseo ni cajini sōho de táca jnūhun yátá ní cahān yā. Te ni cajecūhun ni de jeē siquī maá de cúu jnūhun

yátá ní cahān yā siquī tée cásájniñu nuū uva jiin tée cájeni vehe. <sup>46</sup> Te ni canducú de modo jñi de ya. Te cáyuhú de jeē quitī ni ñayuu, chí cájeni ni i jeē tée nácani jñuhun Yaā Dios cúu ya.

*Jñuhun yátá siquī vico nándāha*

## 22

<sup>1</sup> Yūcuán na te ni cahān tucu Jesús inga jñuhun yátá jiin de jijnáhan de:

<sup>2</sup> Súcuán cúu jeē ndácu Yaā andiví jniñu nuū ñayuu: Cúu nájñuhun ñiñ rey jeē sáha de ñiñ vico jeē nándāha sēhe yí de. <sup>3</sup> Te ni tají de tāca mozo de cuacana ñayuu jeē ni cahān de jiin jēe quíjicoo. Te ñayuu ún tu ní cáculi i quíjicoo i. <sup>4</sup> Te ni tají tucu de jecu gā mozo quingoo, te áchí de jiin: Cahān jiin ñayuu ní cana ri un jēe iyó túhva ndeyu. Chí je ni jehni rī stiquī rī jiin tāca gá quitī ní nduu, te ndihí je iyó túhva. Nehen jijnáhan ró vico nándāha. Achí rō jiin i. Achí de. <sup>5</sup> Te ñayuu ní cana de ún tu ní cásáha i cuenta. Chí ñiñ i cuahān nuū itu i, te inga i cuahān nuū jñiñu sáha i. <sup>6</sup> Te sava ga i ni cajñi i tāca mozo rey, te ni casácatā i nuū, te ni cajehni i. <sup>7</sup> Yūcuán na te yōhoyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndiyí ún, te ni cajehmu de ñuu i. <sup>8</sup> Yūcuán na te ni cahān de jiin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chí nasūu ñayuu váha cácuu i. <sup>9</sup> Núu súcuán te cuahán jijnáhan ró tāca núu náquijnáhan calle. Te cana ró núu nasaa ñayuu nihñ rō, na quíjicoo i vico nándāha. Achí de. <sup>10</sup> Te ni quendacoo mozo un cuángoo tācā ichi. Te ni castútú de ndihí ñayuu ní canihñ de, cúu ñayuu cunéé, cúu ñayuu váha. Te súcuán te ni chitú ñayuu ini vehe nuū iyó vico nándāha.

<sup>11</sup> Te ni quívi rey ini vehe jeē cahán de jiin ñayuu ni cutútú. Te

ni jito de nuū ñiñ tēe jeē tu ñuhun sahma jeē ni jēhe de cuhun ñayuu quíjicoo vico nándāha. <sup>12</sup> Te ni cahān de jiin tēe ún: Amigo, ¿ndese ni quívi ró yáha jēe tu ñuhun ró sahma vico nándāha? áchí de. Te máá tēe ún tu ní cahán cuiti de. <sup>13</sup> Yūcuán na te ni cahān rey jiin tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quēhe nuū nēe. Te yūcuán ndáhyū de te nacayihí yuhu de jeē ndóho xeēn de. Achí rey. <sup>14</sup> Chí cána Yaā Dios cuehē ñayuu jeē na cándije i. Te jecu-ni i cándije, te máá i nácāji ya jeē ndúu i sēhe ya. Achí Jesús.

*Siquí xuhun renta*

(Mr. 12.13-17; Lc. 20.20-26)

<sup>15</sup> Yūcuán na te cuangoo tēe grupo fariseo. Te ni candajnühún de núu ndese sáha de návāha cahān yā ñiñ jñuhun jeē nihñ de cuēchi siquí yā. <sup>16</sup> Te ni catají de jecu tēe cáscuáha jiin máá de jiin tēe grupo Herodes cuangoo de. Te ni cacahān de jiin yá:

Maestro, cájini na jēe tēe cahán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñiñ ñayuu siquí ní, chí tu sáha ní cuenta ndese cúu ñiñ i, chí inuú-ni sáha ní jiin i. <sup>17</sup> Núu súcuán te cahán ní ndese jéni ni ní: ¿A iyó váha jeē chúnaa yō renta nuū rey nación Roma jeē jñiñ nación yō, chí tuú? áchí de.

<sup>18</sup> Te ni jini Jesús jeē cájito ndee de ya. Te ni cahán yā jiin de:

Tēe stáhu-ni cácuu ró. ¿Najehē cájito ndee rō ruhū? <sup>19</sup> Stéén xuhun jēe jéconaa renta na cóto ri, achí yá.

Te ni castéén de ñiñ denario nuū yā. <sup>20</sup> Te ni jito ya, te ni cajñuhun yá de:

¿Ndé ñiñ nuū cúu jeē ndeé nuū xuhun yáha, te ndé síhví cúu jeē ndeé yáhá?

<sup>21</sup> Te ni cacahān de jiin yá:

Nuū jiin síhví rey un cúu, áchí de. Yūcuán na te ni cahān yā jiin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

<sup>22</sup> Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuango de.

*Jeē ní cacajñuhún de siquī jeē nátecu ndīyi*

(Mr. 12.18-27; Lc. 20.27-40)

<sup>23</sup> Te suni quiṽi un ní quecoo jecu tēe grupo saduceo nuū yā. Te tēe un cacahān jeē tu nátecu cuiṽi ndīyi. Te ni cacahān de jíin yá siquī iin jnūhun, achí de:

<sup>24</sup> Maestro, Moisés ni cahān de jeē núu iin tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndīyi ñani de. Achí Moisés. <sup>25</sup> Te ñuu na ní íyo uxā ñani. Te tēe núu ní quiñáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. <sup>26</sup> Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. <sup>27</sup> Te nuū ní ndihi de ni cajihí, te suni ni jihí ñahan ún.

<sup>28</sup> Núu súcuan te quiṽi nátecu ndīyi, ¿ndé iin de cuu ña ñasihí de? Chi ndihúxá de ni condeca de ña. Achí de jíin yá.

<sup>29</sup> Yūcuán na te ni cahān yā jíin de:

Yōhyo cástivi ró jnūhun siquī jeē tu cájecūhun ni rō jeē cahán tutu iī, ni tu cajini rō jeē iyó poder Yaā Dios jeē nastécu yā ndīyi. <sup>30</sup> Chi quiṽi nátecu ndīyi, te tuá na jnūhun quiñáhan tēe jíin ñahan coo. Chi coo i nájñuhun ndajéhé Yaā Dios andiví.

<sup>31</sup> Te siquī jeē nátecu ndīyi, ¿á tu ní cácahu ró tutu jnūhun jeē cahán Yaā Dios jíin ró? <sup>32</sup> Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

<sup>33</sup> Te ñayuu un ní canaa ni i cajini nahín i jnūhun stéén yā.

*Jniñu cánuú ndasí gá jeē ní ndacu Yaā Dios*

(Mr. 12.28-34)

<sup>34</sup> Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. <sup>35</sup> Te iin de jeē cúu tēe stéén tutu ley Yaā Dios, ní cajñuhún de ya, chí coto ndee de ya cuní de:

<sup>36</sup> Maestro, ¿ndé iin cúu jnūhun ndácu jniñu cánuú ndasí gá nuū tútu ley? achí de.

<sup>37</sup> Te ni cahān Jesús jíin de:

Coo manī ndasí ró jíin máá Jítoho rō Yaā Dios, nde jnāa ndasí ró sáha ró ndihi jeē cúsi ní yā, nde jíin ini jíin ánuá rō, jíin ní jéē níjnūní rō, achí tutu. <sup>38</sup> Yāha cúu jniñu ndácu ya jeē cujéhu ga te cánuú ndasí gá. <sup>39</sup> Te jniñu uū jeē ní ndacu ya, suni súcuan cáhan: Cundáhú ni rō jnāhan ró nájñuhun cundáhú ni rō maá ró. <sup>40</sup> Te chíi ndindúú jnūhun yáha ní quenda ndihi ley jeē ní tee Moisés, jíin ndihi jeē ní castéén tēe ni canacani jnūhun Yaā Dios, achí yá.

*Siquī jeē cúu Cristo sēhe yucūn David*

(Mr. 12.35-37; Lc. 20.41-44)

<sup>41</sup> Te níni cáyūcu tútu gá tēe fariseo un, te Jesús ni cajñuhun yá de:

<sup>42</sup> ¿Nde se cájeni ni rō siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

<sup>43</sup> Te ni cahān yā jíin de:

Núu súcuan ¿te ndese cúu jeē David ni cahān de Jítoho de ya, ni sáha Espíritu Santo nde jenahán? Chi ni cahān de:

<sup>44</sup> Máá Jítoho yō Yaā Dios ni cahān yā jíin Jítoho rī, Yaā quiji:

Cucōo ró lado váha ri nuū cujéhu ró,

te na sáha ri jeē quende rō poder tāca jéé cájito uhū rohó.

Achí Yaā Dios. Achí David. <sup>45</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

<sup>46</sup> Te ni ĩn de tu ní cúu stió cuñí cuiti de jnúhun nuū yā. Te nde quiví ún tuá ni ĩn de ní chúndeyí ni de cajnúhún de ya.

*Jeē ni cáhān yā jeē iyó cuēchi de jijnáhan de*

*(Mr. 12.38-40; Lc. 11.37-54; 20.45-47)*

## 23

<sup>1</sup> Yūcuán na te ni cáhān Jesús jín ĩnyuu jín tēe cáscuáha jín yá:

<sup>2</sup> Tēe cástéén tutu ley Yaā Dios jín tēe grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. <sup>3</sup> Núu súcuán te cuatáhú ró te squícu ró táca jēe cándacu de nuū rō. Te ma sáha ró nájnūhun cásaáha máá de. Chi cácahān-ni de, te tu cáscuácu de. <sup>4</sup> Chi suni cástéén de táca ley ni catava máá de jeē yí sáha, te cátee de siquí ĩnyuu, te tu cácundeyí i squícu i. Te máá de jijnáhan de, chi ni ĩn xinī ndáha de tu cáscánda de jeē squícu de. <sup>5</sup> Te máni siquí jeē na cuájnúhún ĩnyuu de cúu ndíhi jeē casáha de. Chi cánujnahan ni de cuhni de cuehē jnúhun tutu ĩ jneē de jín ndaha de. Te suni cáscáni ga de yuhvā yusáhma de jeē steén jeē cácujeñhu ga de vesú inga ĩnyuu. <sup>6</sup> Te cánujnahan ni de cucōo de nuū silla yíñúhún gá nuū cáyeji ĩnyuu vico, jín silla yíñúhún gá ini vehe ĩ sinagoga. <sup>7</sup> Te suni cánujnahan ni de jeē cahán yíñúhún ĩnyuu jín de nuū calle, jín jēe cahán i maestro jín de.

<sup>8</sup> Te máá ró jijnáhan ró, ma cuáha ró jnúhun jeē cahán ĩnyuu maestro jín ró. Chi ĩnuú cácuu ndíhi ró jēe cácuu ró hermano, te iyó ĩn-ni Maestro ró jeē cúu ruhū, Cristo. <sup>9</sup> Te ma chiñúhún ró ni ĩn tēe ĩyaví yáha jeē cahán ró padre jín de. Chi iyó ĩn-ni Tátá ró jijnáhan ró, Yaā ndeé andiví. <sup>10</sup> Te suni ma cuáha ró

jnúhun jeē cahán i jítóho jín ró. Chi iyó ĩn-ni Jítóho rō, te suu cúu ruhū, Cristo. <sup>11</sup> Te tēe mēñhu ró jijnáhan ró jeē jejniñu nuū jnáhan, suu de cúu jeē cujeñhu ga. <sup>12</sup> Chi tēe jeē sajeñhu de máá de, sa ndululí de. Te tēe jeē sálulí de máá de, sa ndujéñhu de.

<sup>13</sup> Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi cájesi rō jeē quiví ĩnyuu ndaha Yaā andiví jēe ndacu ya jniñu nuū i. Chi tu quívicoo máá ró, ni tu cájehe ro jnúhun quívicoo ĩnyuu nducú quiví.

<sup>14</sup> Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi cáquende rō vehe ĩahan ní caque-ndōo ndáhú. Yūcuán na te cájicān tahu nahán ró návāha cani ni ĩnyuu jeē tú na cuēchi ró. Jeē yūcuán xeēn gā ndoho ró castigo.

<sup>15</sup> Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi ní ĩnhun íchi jín ní mar cájica cuu ró cánducú ró ĩn ĩnyuu scandíje ró sáhān máá ró. Te núu ni candíje i, te cásaáha ró jēe vihyá gā cúu cuēchi i jeē quihín i infierno vesú máá ró.

<sup>16</sup> Nacā xeēn ndoho ró, chi cácuu ró nájnūhun tēe cuáá jēe steén íchi nuū ĩnyuu. Chi cácahān rō: Núu ndé tēe jéjnūhun téyí de, te núu cahán de jeē Yaā Dios jeē ndeé ini templo na cuáha ya castigo núu ma squícu de, yūcuán na te cánuú squícu de. Te núu cahán de jeē Yaā Dios jeē chíi oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>17</sup> Tēe cánéé tēe cuáá cácuu ró jēe castíví ró jnúhun cácahān rō. ¿Ndé ĩn cúu jeē cujeñhu ga, á oro un chí Yaā Dios jeē ndeé ini templo jeē sáhíi oro un? <sup>18</sup> Te suni cácahān rō: Núu ndé tēe jéjnūhun téyí de, te núu cahán de jeē Yaā Dios jeē chíi altar na cuáha ya castigo núu ma

squícu de, yūcuán na te tu cánuú squícu de. Te núu cahān de jeē Yaā Dios jeē chíi ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>19</sup> Tēe cánéé tēe cuáá cácuu ró jēē castívi ró jnūhun cácahān rō. ¿Ndé ñn cúu jeē cujéhu ga, á ndajniñu yūcu nuū altar, chí Yaā Dios jeē sáhiī yā ndajniñu ún? <sup>20</sup> Núu súcuan te tēe jéjñūhun téyí, te núu ndácunehen de Yaā Dios jeē chíi altar, núu súcuan te nde jíin ndajniñu yūcu nuū altar ndácunehen de. <sup>21</sup> Te tēe jeē jéjñūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. <sup>22</sup> Te tēe jéjñūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jíin máa Yaā Dios jeē ndeé nuū mesa un.

<sup>23</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí cásáha ró úxí úxí nuññi tamínú jíin yucū anís jíin yucū comino, te cásocō rō ñn ñn siquī tāca úxí un núu Yaā Dios. Te cástóo ró jnūhun cánuú ndasí gá nuū ley, suu jeē cáca ndaā rō, jíin jēē cundáhú ni rō jnāhan ró, jíin jēē candíje ró. Tāca jēē yáha cánuú sáha ró núú, te suni ma stóo ró jēē socó rō tāca yúcū ún. <sup>24</sup> Cácuu ró nájnūhun tēe cuáá jēē steén ichi nuū ñayuu. Chí cásquicu ró ñn jeē lulí gá un, te cástóo ró jēē cánuú gá. Te suu cúu nájnūhun jeē cátava rō chūcún ndíhi jeē ñúhun nuū ndúxi, te cácocó ró ñn quití cáhnu jeē naní camello.

<sup>25</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí nájnūhun jeē cánacate ró yátā vaso jíin yátā cohó. Te ichi ini rō chí ñúhun máni máa jnūhun cuíhná jíin jnūhun ndíyo ni. <sup>26</sup> Tēe cuáá cácuu ró, fariseo. Xíhna gā sáha ró jēē coo ndoo ini anuá ró, te yūcuán na te

suní coo ndoo tāca jēē casáha ró jēē cájito ñayuu nuū.

<sup>27</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí cándāa ró nájnūhun vehe ndíyí nuū pan-teón jeē cáyaa. Chí ichi yátā jíto luu, te ichi ini ñúhun chítú yiquí ndíyí jíin tāca jēē tehyú. <sup>28</sup> Te súcuan cácuu máa ró, chí ichi yátā rō casáha ró jeē tēe ndaā cácuu ró núu ñayuu. Te ichi ini rō ñúhun chítú jnūhun stáhú-ni jíin jnūhun néé.

<sup>29</sup> 'Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí cásáha ró vehe siquī nuū yíndūji ndíyí jíi rō, tēe ni canacani jnūhun Yaā Dios nde jenahán. Te cásáha luu ró vehe siquī nuū yíndūji tāca tēe ni iyo ndaā. <sup>30</sup> Te cácahān rō: Núu jeē suni yūcu yó tiempo jeē ní cotecu ndíyí jíi yō, te ma squívi nduu yō jíin de jeē cáhni yō tēe ni canacani jnūhun Yaā Dios, achí ró. <sup>31</sup> Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jnūhun ya. <sup>32</sup> Núu súcuan te tāca cuéchi jeē ní casquéjéé ndíyí jíi rō, máni un cásáha ga maá ró.

<sup>33</sup> 'Va sēhe coō cácuu ró, chí xeēn rō nájnūhun coō. ¿Ndese cācu ró jēē ma jnahnú ndetū rō quingoo ró infierno? <sup>34</sup> Núu súcuan te tají rí tāca tēe nacani jnūhun Yaā Dios nuū rō, jíin tāca tēe ndíchi jēē castéén jnūhun ya. Te sava de cahni rō, te sava de cata caa ró jicā cruz. Te sava ga de caní ró de ini tācá vehe íi sinagoga, te scúnu ró de quingoo de tācá ñuu. <sup>35</sup> Te súcuan te condee cuéchi siquī maá ró jeē ní cajehni jíi rō tāca tēe ndaā, xíhna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto íi jíin altar. <sup>36</sup> Jendaá cahán rí jíin ró jeē tāca cuéchi yáha condee siquī ñayuu iyó vijna.

*Jeē cucuíhyá ni yā jíto ya ñuu*

*Jerusalén**(Lc. 13.34-35)*

<sup>37</sup> Róhó ñuu Jerusalén, jéhni rō tēe cānacani jñūhun Yaā Dios, te jéhe ro yūu xinī téé tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jéē nastútú tí sēhe ti chíji ndijēn tī, te tu ní cúní rō. <sup>38</sup> Núu súcuan te vijna te stóo uun na ri rohó jíin sēhe ró. <sup>39</sup> Chi cáhán rī jíin ró jéē ndé vijna te ma cóto cuiti gā rō nuū rī, chi nde quiji quivī jeē cáhán sēhe ró: Yōhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

*Jeē ní cachi yá jeē náā templo  
(Mr. 13.1-2; Lc. 21.5-6)*

**24**

<sup>1</sup> Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá síquī tācá vehe jeē ndejnáhan jeē cúu máá templo un. <sup>2</sup> Te ni cahān yá jíin de:

Tāca jéē cájito ró yáha, jendaá cáhán rī jíin ró jeē quiji quivī jeē ma cóso jnáhan ga ni ñn yuū, chí ndihi jnanū. Achí yá.

*Na seña coo nuū cuácuyajni ndihi ñayiví*

*(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yá jíin téé cáscuáha jíin yá nde yucu Olivos, te ni cucōo ya yūcuán. Te ni quecoo de nuū yá, te ni cacajñūhun sñn de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndíji ní jíin jéē jínu ñayiví? áchí de.

<sup>4</sup> Te ni cahān Jesús:

Coto ró jéē ma stahú ni ñn de rōhó. <sup>5</sup> Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu. <sup>6</sup> Te nihñ rō jñūhun jeē tāca lado iyó guerra, chí je yajni coo guerra. Te ma yūhu ró, chí cánuú

coo súcuan. Te ni ná tu jinū quivī ndihi ñayiví. <sup>7</sup> Chi ndonda nación síquī inga nación, te ndonda ñuu síquī inga ñuu jeē cuajnáhan. Te coo jnamā jíin cuéhvī xeēn. Te cháha chúcuan jñāa. <sup>8</sup> Te tāca jéē yáha cácuu jñūndóho quejéé xíhna ññhún gá.

<sup>9</sup> Yūcuán na te nastúu i rōhó jíjnáhan ró jéē stóho i rōhó te cahni i rōhó. Te ndihi ñayuu quitī ni i nuū rō jeē síquī ruhū. <sup>10</sup> Te quivī ún chí cuehē ñayuu candíje caca yátá i, te quitī ni i nuū jnáhan i, te nastúu jnáhan i. <sup>11</sup> Te canecoo cuehē tēe stáhú, te cahān de jeē jñūhun Yaā Dios cānacani de, te stáhú de cuehē ñayuu. <sup>12</sup> Te nducuehē jniñu néé, te jeē yúcuu cuehē i ma cóo maní gā i. <sup>13</sup> Te ñayuu cuiñi nihñ jíin jñūhun ri nde quivī jínu, ñayuu ún chí cācu. <sup>14</sup> Te jñūhun yáha síquī ndese ndácu Yaā Dios jniñu, cuitē núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

<sup>15</sup> Te Daniel, tēe ni nacani jñūhun Yaā Dios, ni tee de jñūhun ñn tēe néé jéē quíji. Te rōhó jéē cácahu tutu ún, na jécūhun ni rō. Chi ñn quivī te cuni rō jeē sáha ndevāha de jeē stívi de tācá ndajniñu ñi ini templo, te cuiñi de ini lugar ñi. <sup>16</sup> Te núu cuni rō jeē súcuan cúu, te ñayuu cáyūcú región Judea, na cúnú i caa i yucu quingoo i. <sup>17</sup> Te ñayuu cáyūcu núu quéhe, ma ndívi i ini vehe jeē quénehen i ndajniñu i, chí cánuú cunu yachí i návāha cācu i. <sup>18</sup> Te ñayuu cáhñn nuū ítu, ma ndíji i vehe jeē quíhin i sahna i. <sup>19</sup> Te quivī ún nacā jeē ndahú ñahan cáññhun sēhe jíin ñahan cándeca yiquín, chí ma cúnihñ ña cunu yachí ña. <sup>20</sup> Te cacān tahú rō jeē ma quíji jñūndóho un jéē cunu ró máá tiempo cúnun yuhvā ni quivī ndétátú. <sup>21</sup> Chi jeē quejéé un te coo cuehē jñūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē

ndíhi jnündóho ún te ni ma cóo ga jeē súcuan. <sup>22</sup> Te núu tú nastíyi Yaā Dios tiempo jnündóho ún, te ni ìn ñayuu ma cácu cuiti i. Te jeē siquí ñayuu cá candíje jeē ní nacāji ya, jeē yúcuan nastíyi ya tiempo un.

<sup>23</sup> 'Núu súcuan te núu ìn ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēē cahān i. <sup>24</sup> Chí canecoo tēe cástáhú jēē achi de jeē Cristo cúu de, chí achi de jeē tēe nácani jnūhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. <sup>25</sup> Je ni castūhun rí nuū rō vijnā nde ná tu coo. <sup>26</sup> Núu súcuan te núu cahān ñayuu jín ró: Cuácondēhe ró, chi nde nuū ñūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jijnāhan rō. <sup>27</sup> Chí nájñūhun jeē ndíndēe sáha taja te cúndijin nde ichi núu cáne niāndii jín ndé ichi núu quée niāndii, suni súcuan coo quiví ndiji ruhū, Yaā ní nduu tēe, chí ndíhi ñayuu coto. <sup>28</sup> Te nájñūhun jeē cutútú téji ndé-ni cúu nuū catú quiti ní jíhi, suni súcuan coo tāca jēē ní cahān rī ndé-ni cúu-ni nuū cáhiyo ñayuu.

*Ndese coo quiví ndiji Yaā ní nduu tēe*  
(Mr. 13.24-37; Lc. 21.25-33; 17.26-30, 34-36)

<sup>29</sup> 'Yūcuán na te núu ni ndíhi tāca jnündóho quiví ún, te cojnúú níāndii, te yoō ma ndíi gā. Te ñingoo quimi andiví. Te tāca jēē íin andiví chí quisí i. <sup>30</sup> Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jín vícō andiví, te condiso ri cuehē poder, te yōhyo luu kujéhu ri. <sup>31</sup> Te tají rí ndajéhé rí quingoo, te tiví ñihin ya trompeta. Te quinastútú

yá ñayuu ní nacāji ri ndicúún lado ñayiví, nde ìn lado ñayiví jín ndé inga lado.

<sup>32</sup> 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihni. <sup>33</sup> Te suni súcuan núu ni cajini rō jeē ní quejéé cúu tācá jniñu jeē ní cahān rī, yūcuán na te na jécūhun ni rō jeē ní cuyajni quiví ndiji ri, te yachí coo. <sup>34</sup> Jendaá cahān rī jín ró jeē ma cúu ndíhi ñayuu jeē cóto jnündóho ún, chí nde squícu ndíhi jniñu ún. <sup>35</sup> Andiví jín ñayiví chí naa, te tāca jnūhun cahān rī chí ma náa, chí ndíhi squícu.

<sup>36</sup> 'Te quiví jín hora jeē ndíji ri, tú ni ìn ñayuu jiní, ní máá ndajéhé cáhiyo andiví, ní máá rí, Sēhe Yaā Dios. Chí máá ìn ní Tátá rī Yaā Dios cúu jeē jiní.

<sup>37</sup> 'Chí nájñūhun ni cuu quiví ní íyo Noé, suni súcuan coo quiví ndiji ruhū, Yaā ní nduu tēe. <sup>38</sup> Chí quiví ún, nde ná tu cuun saū xeén, te cáyeji i cájili i, cánandāha i, te cájēhe i sēhe síhí i jeē nándāha, nde ni jinū quiví jeē ní quiví Noé ini barco cáhnu jeē naní arca. <sup>39</sup> Te tu ní cá candíje ñayuu jeē cuun saū xeén, te ni cuun, te ni ndaa ndute ni cajihí ndíhi i. Te suni súcuan coo núu na ndíji ruhū, Yaā ní nduu tēe. <sup>40</sup> Te quiví ún cone uū tēe sájñiñu nuū ítu. Te ìn de naquihin ri, te inga de ndōo. <sup>41</sup> Te coo uū ñahan jeē ndíco cáhnu, te ìn ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chí tu ní cá candíje i.

<sup>42</sup> 'Núu súcuan te ndito na cóo ni rō, chí tu cájini rō na quiví ndiji Jitoho rō. <sup>43</sup> Te na chūhun ni rō jeē cahān jnūhun yátá yáha: Tēe chíi vehe, núu jeē jiní de na hora quiji ñacuíhná, te condito de, te ma cuáha de jnūhun sácuihná ndajniñu vehe de núu. <sup>44</sup> Te rōhó jijnāhan rō, suni súcuan coo tūhva ró, chí máá hora

jeē tú na vé cájeni ni rō, te ndiji ruhū, Yaā ní nduu tēe.

*Jñuhun yátá síquī mozo*  
(Lc. 12.41-48)

<sup>45</sup> Núu súcuan te coo ró nájñuhun ñn mozo jeē ndító xinī te squícu vāha. Te máá patrón ni jeni de mozo un jeē cóto i ñayuu vehe de, návāha scáji i máá hora. <sup>46</sup> Te yōhyo ndetū mozo un jeē núu ni ndee patrón, te cuni de jeē súcuan squícu vāha i. <sup>47</sup> Jendaá cahán rī jín ró jeē cani de mozo un jeē cóto i ndihi ndajniñu de. <sup>48</sup> Te núu mozo sáha néé cúu i, te jéni ni i jeē ma ndiji yachī patrón i, <sup>49</sup> te quejéé i cani i jnáhan mozo i, te caji i coho i jín tée cánajni, <sup>50</sup> núu súcuan te ndee-ni patrón quivī jeē tu ndétu i jín hora jeē tú na vé jéni ni i. <sup>51</sup> Te stóho xeēn de i, te squívī de i nuū cáhīn tée stáhú-ni. Te yūcuan ndáhyū i te nacayihí yuhu i jeē ndoho xeēn i. Achí yá.

*Jñuhun yátá síquī uxī sūchi síhí*

## 25

<sup>1</sup> Te suhva cúu jeē ndácu Yaā andiví jniñu nuū ñáyuu: Cúu nájñuhun ñn vico nándāha. Te ni Iyo uxī sūchi síhí jeē ní caquihin i linterna cándaha i, te ni quendacoo i cuajnahan i ñn tēe nandāha. <sup>2</sup> Te uhūn i chi tú ndito xinī i, te uhūn i chi ndito xinī i. <sup>3</sup> Te sūchi tú ndito xinī, cándaha i linterna i, te tu cándaha i petróleo jeē náchuhun i. <sup>4</sup> Te sūchí ndito xinī, chí cándaha i botella petróleo jín linterna i. <sup>5</sup> Te níni cúcuéé quiji tēe nandāha ún, te ni quee máhná, te ni caquixī ndihi i. <sup>6</sup> Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jijnáhan ró, áchí. <sup>7</sup> Yūcuán na te tāca sūchi síhí un ní candonda i, te ni casátūhva i linterna i. <sup>8</sup> Te sūchi tú ndito xinī, ni cacahān i jín sūchi ndito xinī: Cuāha jecu petróleo nuū rī jijnáhan ró, chí cuandahvā

linterna rī, achí i. <sup>9</sup> Te ni cacahān sūchí ndito xinī: Ma cúu, chí ma cánda jeē cúu máá rí jín máá ró. Vāha ga quingoo ró núu cúyāhu, te cuaan ró jeē cúu máá ró. Achí i. <sup>10</sup> Te níni cuángoo i cuaan i, te ni quee-ni tēe nandāha. Te sūchi cáhiyo tūhva un, ní quivīcoo i jín de vico nándāha de. Te ni ndihyū yehyí. <sup>11</sup> Te ni cunúu, te ni quecoo uhūn gā sūchi síhí un. Te ni cacahān i jín tée nándāha: Nune ní yehyí na quivīcoo ná, áchí i. <sup>12</sup> Te ni cahān maá de: ¿Ndé nuū véjicoo ró? Chi tu jíní rī rohó, áchí de. Achí yá.

<sup>13</sup> Yūcuán na te ni cahān yā:

Núu súcuan te ndito coo ni rō, chí tu cájini rō na quivī na hora ndiji ruhū, Yaā ní nduu tēe. Achí yá.

*Jñuhun yátá síquī tēe ní jēhe núu xūhun núu tāca mozo*

<sup>14</sup> Te suhva cúu jeē ndácu Yaā andiví jniñu nuū ñáyuu: Cúu nájñuhun ñn tēe jeē quihin jicá de inga ñuu. Te nde ná tu quihin de te ni cana de mozo de jijnáhan, te ni jēhe núu de xūhún de nuū i, jeē na sájniñu i jín návāha nducuehē.

<sup>15</sup> Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chí jíní de nasaa canda ñn ñn i sájniñu i jín. Yūcuán na te ni quihin de ichi cuahān jicá de. <sup>16</sup> Te mozo jeē ní quihin uhūn mil xūhún, ni sájniñu de jín. Te ni nihīn de uhūn gā mil síquī. <sup>17</sup> Te mozo jeē ní quihin uū mil síquī, suni ní nihīn de uū gā mil síquī. <sup>18</sup> Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

<sup>19</sup> Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. <sup>20</sup> Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jín uhūn gā mil jeē ni nihīn de síquī. Te ni cahān de:



Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de. <sup>21</sup> Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhnū ndacu ró. Te quivī ró núu cusī ni rō jíin rí. Achí de. <sup>22</sup> Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní úū mil nuū ná, te yāha íyó úū gā mil jeē ni níhīn na síquī. Achí de. <sup>23</sup> Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhnū ndacu ró. Te quivī ró núu cusī ni rō jíin rí. Achí de. <sup>24</sup> Te ni quee mozo jeē ní quihin ñn mil xūhún un, te ni cahān de jíin patrón: Je jíni na níhīn jēē téē xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jēhe ní. <sup>25</sup> Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. <sup>26</sup> Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jēē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jēhe rí. <sup>27</sup> Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núu. Achí de jíin i. <sup>28</sup> Te ni cahān de jíin táca gá mozo de: Núu súcuan te quende rō mil xūhun jíñā nuū i, te cuāha ro núu mozo névāha uxī mil. <sup>29</sup> Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. <sup>30</sup> Te mozo yāha jēē tu sájniñu váha, quenehen ró i na quíhīn i nuū quéhe nuū néē. Te yūcuan ndáhyū i te nacayíhī yuhu i jeē ndoho xeēn i. Achí patrón un.

*Siquí jeē cóo juicio táca nación*

<sup>31</sup> Te ni cahān gā yā:

Ñn quivī te ndiji maá Yaā ní nduu tēe, te cuu ya Rey nuū ñáyuu. Te táca ndajéhe yā cuiñi ní xiin ya. Te cucōo ya mesa nuū ndácu ya jniñu, te yōhyo luu cujéhnū ya. <sup>32</sup> Te ndutútú ñayuu táca nación nuū yā. Te sásín ya i jíjnáhan i, nájnūhun cúsin lanchi jíin ndixúhú sáha tēe ndító ti. <sup>33</sup> Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá. <sup>34</sup> Yūcuán na te cahān Rey jíin ñáyuu cáhīin lado váha ya: Nacā ndetū rō jeē ni sáha Tátá rī jíin ró. Nehen quivīcoo ró núu ndácu ró jniñu. Chi nde quivī ní jecōo ñayiví te je ni sátúhva ya nuū ndacu ró jniñu. <sup>35</sup> Chi ni jíi rī sóco, te ni cajēhe ro jēē ní yeji rī. Ni jichī rī ndute, te ni cajēhe ró jēē ní jihī rī. Ni quiji rī nde ñuu jicá, te ni cajēhe núu ró vehe ni ndōo rī. <sup>36</sup> Ni cumanī sahma rī, te ni cajēhe ró. Ni cocuhū rī, te ni jecondēhe ró ruhū. Ni ine rī vecāa, te suni ni jecondēhe ró ruhū. Súcuan cahān yā jíin ñáyuu cáhīin lado váha ya. <sup>37</sup> Yūcuán na te cahān ñayuu váha un jíin yá: ¿Na quivī ní cajito ná níhīn jēē jíi ni sóco, te ni cajēhe na jēē ní yeji ní, chí jēē jichī ni ndute, te ni cajēhe ná ní jihī ní? <sup>38</sup> ¿Te na quivī ní cajito ná jēē ní quiji ní ndé ñuu jicá, te ni cajēhe núu ná vehe ni ndōo ní, chí jēē cumanī sahma ní, te ni cajēhe ná? <sup>39</sup> ¿Te na quivī ní cajito ná jēē cuhú ni, chí jēē íne ní vecāa, te ni jecondēhe ná níhīn? achi i. <sup>40</sup> Yūcuán na te cahān Rey jíin i: Jendaá cahán rī jíin ró jēē ná ni casáha ró súcuan jíin ñn táca hermano rī jeē cácandíje, vēsú ñayuu núu ga cúu i, te nuū maá rí ni casáha ró.

<sup>41</sup> Yūcuán na te suni cahān Rey jíin ñáyuu cáhīin lado jecó yá: Ñayuu jnahnū ndetū cácuu ró. Cuijiyo quingoo ró núu ñuhūn jeē cayú ní cáni, nuū iyó túhva cone jexeēn jíin

táca táchī jeē cájejnīñu nuū. <sup>42</sup> Chi ni jīi rī sōco, te tu ní cájehe ro jée cáji rī. Ni jichī rī ndute, te tu ní cájehe ro jée coho rī. <sup>43</sup> Ni quiji ri nde ñuu jicá, te tu ní cájehe núu ró vehe ndōo rī. Ni cumānī sahma ri, te tu ní cájehe ró. Ni cocuhū rī, ni ine ri vecāa, te tu ní jécondēhe ró ruhū. Súcuān cahān yā jīn ñáyuu cáhīin lado jecó yā. <sup>44</sup> Yūcuān na te cahān ñayuu un jīn yá: ¿Na quiṽī ní cajito na níhīn jée jíi ni sōco, chí jée jichī ni ndute, chí jée ní quiji ní nde ñuu jicá, chí jée cúmanī sahma ní, chí jée cuhú ní, chí jée ine ní vecāa, te tu ní cájehe na jée cúmanī nuū ní? Achi i. <sup>45</sup> Yūcuān na te cahān yā jīn i: Jendaá cahān rī jīn ró, jeē tu ní cásáha ró súcuān jīn ni ñin táca hermano rī jeē cácanḍije, vēsú ñayuu núu ga cúu i. Núu súcuān te suni nuū maá rí cúu jeē tu ní cásáha ró, achi yā. <sup>46</sup> Yūcuān na te quingoo ñayuu un núu ndóho i ní cáni. Te ñayuu váha un quiṽicoo i nuū cótecu i ní cáni. Achí Jesús.

*Jeē ní casquijnáhan de jñuhun jeē jñi de Jesús*  
(Mr. 14.1-2; Lc. 22.1-2; Jn. 11.45-53)

## 26

<sup>1</sup> Te nuū ní ndihi ni cahān Jesús táca jñuhun yáha, te ni cahān yā jīn tée cáscuáha jīn yá:

<sup>2</sup> Je cájini rō jeē uū na quiṽī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

<sup>3</sup> Yūcuān na te sutū cácujeñhu, jīn tée cástéén tutu ley, jīn táca tée jéñhu jeē cándacu jñiñu nuū ñáyuu hebreo, ni candutútú de ini patio vehe palacio maá sūtū cujeñhu ga jeē naní Caifás. <sup>4</sup> Te ni candajñuhún de ndese jñi de Jesús jīn jñuhun stáhū, te cahni de ya. <sup>5</sup> Te ni cacahān de:

Ma jñá yó de máa quiṽī vico, chí ndonda ñayuu siquī yō, achí de.

*Jñuhun ñahan jeē ní chuhun perfume xini yā*

(Mr. 14.3-9; Jn. 12.1-8)

<sup>6</sup> Te ine Jesús ñuu Betania vehe Simón, tēe ni ndoho cuehyī stehyú. <sup>7</sup> Te ni quee ñin ñahan nuū yā, ndáhá ña ñin frasco yuū luu jeē ñuhun aceite perfume jeē yóhyo yahu ndéé. Te ni chuhun ña xini yā níni jée yéji yā staā. <sup>8</sup> Te ni cajito tēe cáscuáha jīn yá, te ni caquití ni de, te ni cacahān de:

¿Najehē cúu jeē náa saá-ni perfume jñiñá? <sup>9</sup> Chi cuu xicó yahu yó núu, te cuāha yo xuhun núu ñáyuu ndahú. Achí de.

<sup>10</sup> Te ni jini Jesús jñuhun cácahān de. Te ni cahān yā jīn de:

¿Naun cásáha ró jée nácani uhū ni ñahan yáha? Chi ñin jniñu váha cúu jeē ni sáha ña jīn rí. <sup>11</sup> Chi níni coyūcu ñáyuu ndahú jīn ró, te ruhū chí tuá condee rī jīn ró. <sup>12</sup> Chi jeē ní chuhun ña perfume yáha ruhū, suu cúu jeē ni sátuhva ña ruhū nde quiṽī quínduji rí. <sup>13</sup> Jendaá cahān rī jīn ró jeē ní cáhnu ñayīvi ndé-ni cúu nuū cuité jñuhun yáha jée jñama rí ñayuu, suni nacani i jñuhun jeē ni sáha ñahan yáha, náváha cocuhun ni ñayuu ña, achí yá.

*Jeē ní nastúu Judas yā*

(Mr. 14.10-11; Lc. 22.3-6)

<sup>14</sup> Yūcuān na te ñin jeē ndihúxi uū tēe cáscuáha ún, nání de Judas Iscariote, ni jehēn de nuū sutú cácujeñhu. <sup>15</sup> Te ni cahān de jīn:

¿Nasaa cuāha ní núu ná, te na nastúu ná de nuū ní? áchí de.

Te ni cajēhe ocó uxí xuhun plata nuū de. <sup>16</sup> Yūcuān na te nde quiṽī un ní quejéé de ndúcú de modo ndese nastúu de ya nuū sutú jijnáhan.

*Jeē ní jequin yā Cena yā*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Te máa quiṽī jeē quejéé vico jeē cáyeji ñayuu pan jeē tú na levadura

yíhi, te ni quijicoo tēe cáscuáha un núu Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? áchí de.

<sup>18</sup> Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máa Maestro jeē ní cuyajni quiví cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

<sup>19</sup> Te tēe cáscuáha jíin yá, ni casáha de nájnūhun ni ndacu Jesús jniñu nuū de, te ni casátūhva de jeē cuxíni ya vico pascua.

<sup>20</sup> Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. <sup>21</sup> Te níni yéji yā jíin de te ni cahān yā:

Jendaá cahān rī jíin ró jeē ñn róhó nastúu ruhū vijna, áchí yá.

<sup>22</sup> Te ni cacucuíhyá ndasí ni de. Te ná ñn ná ñn de ni cacajñūhún de ya:

¿A sáña cúu? áchí de.

<sup>23</sup> Te ni cahān yā:

Ñn róhó jéé cáyeji cáhnu jíin rí ñn cohō, suu ró nastúu ruhū. <sup>24</sup> Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnúhun ri nuū tútu ñ. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

<sup>25</sup> Yūcuán na te ni cahān Judas, tēe nastúu ya:

¿A sáña cúu, Maestro? áchí de.

Te ni cahān yā jíin de:

Suu ró cúu, áchí yá.

<sup>26</sup> Te níni jéé cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiquí cúñu rī, áchí yá.

<sup>27</sup> Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jíjnáhan ró. <sup>28</sup> Chi yāha cúu niñ rī jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnúhun cáhnu ni nuū cuéchi i. <sup>29</sup> Te cáhán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quiví ndacu Tátá rī jniñu ní ñayiví, te sáa te coho tucu ri jíin ró jijnáhan ró. Achí yá.

*Jeē ní cachi yā jeē yūhu Pedro cahān de jeē jini de ya*

(Mr. 14.26-31; Lc. 22.31-34; Jn. 13.36-38)

<sup>30</sup> Te ni jita ya ñn yaa ñ jíin de jíjnáhan de. Te ni quenda ya cuahān yā jíin de nde yucu Olivos. <sup>31</sup> Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jnúhun ri nuū tútu ñ, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, áchí. <sup>32</sup> Te jeē nátecu rī, te xīhna ruhū cosnūu rī quihín rī región Galilea, te sáa te najinūcoo ró, áchí yá.

<sup>33</sup> Yūcuán na te ni cahān Pedro:

Vēsú ndihi de na náyūhú de, te máa ná chi ma náyūhú cuítē ná, áchí de jíin yá.

<sup>34</sup> Te ni cahān yā jíin de:

Jendaá cahān rī jíin ró jeē jecuáa vijna, nde ná tu cana líhli, te yūhu ró jeē jñi ñayuu rohó, te uní jínu cahān rō jeē tu jíin rō ruhū, áchí yá.

<sup>35</sup> Te ni cahān Pedro jíin yá:

Vēsú núu cuu na jíin ní, te ma cahān cuítē na jéé tu jíin na níhín, áchí de.

Te suni súcuan ni cacahān ndihi tēe cáscuáha jíin yá.

*Jeē ní jicān tahú yā nuū huerto Getsemaní*

(Mr. 14.32-42; Lc. 22.39-46)

<sup>36</sup> Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yáhá-ni cucōo ró, te na quíhín rī yūcuan cacān tahú rī, achí yá.

<sup>37</sup> Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxíí ni yā jeē quíji jnūndóho siquī yā. <sup>38</sup> Yūcuán na te ni cahān yā jín de:

Yōhoyo cucuíhyá ni rī, te ndúcú sáha jeē cúu rī. Yáhá condetu ró te condito ró jín rí.

<sup>39</sup> Te ni jica ya jecu gā, te ni jecuíñī yití yá ni jequin ya nuū yā nuū ñúhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jnūndóho yáha jéé ma quíji siquī ná. Te nasūu jéé cuní maá ná, chí jeē cuní maá ní na cóo, áchí yá.

<sup>40</sup> Yūcuán na te ni ndee yā nuū ndinúní téé cáscuáha jín yá, te ni jito ya jeē cáquixī de. Te ni cahān yā jín Pedro:

¿A tu ní cánda ró condito ró jín rí vésú ñin hora? <sup>41</sup> Coó ndito ni rō te cacān tahú rō jeē chindéé ñáhán yá rohó jéé ma sáha ró cuéchi jeē coto ndee jeneé rōhó. Chí cuní ndije ánuá rō squícu vāha ró, te yíqui cúñu rō chí tu fuerza, achí yá.

<sup>42</sup> Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, áchí yá.

<sup>43</sup> Te ni ndee tucu ya nuū de, te ni jito ya jeē cáquixī tucu de, chí yōhoyo cájií de māhná. <sup>44</sup> Te ni stóo ya de, te cuahān tucu ya cuacacān tahú yā vuelta unī. Te suni jnūhun yūcuan ní cahān yā. <sup>45</sup> Yūcuán na te ni ndee tucu ya nuū de jínáhan de, te ni cahān yā jín de:

Vijna te cusū rō te ndetātu ró. Te je ni quee hora, te ruhū, Yaā ní nduu téē, natūu ri te jñī téē cáhīyo cuéchi ruhū. <sup>46</sup> Ndocuíñī jijnáhan ró, chí je vēji téē nastúu ruhū, te quihín yō jín de, áchí yá.

*Jeē ní cajñī de Jesús*

(Mr. 14.43-50; Lc. 22.47-53;

Jn. 18.2-11)

<sup>47</sup> Te sá cáhán gā yā súcuan, te ni quee-ni Judas, ñin jnáhan jeē uxí uū téē cáscuáha jín yá. Te vējicoo cuehē téē jín de, cándaha de espada jín yujnu. Chí sutū cácujeñnu jín táca téē jéñnu cándacu jñīñu nuū ñáyuu hebreo, ni catají téē ún. <sup>48</sup> Te Judas, téē nastúu ya ún, je ni jēhe de ñin seña nuū téē un jijnáhan, chí ni achí de:

Tēe jeē téchūhu rí un cúu. Te jñī ró jijnáhan ró, áchí de.

<sup>49</sup> Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. <sup>50</sup> Te ni cahān Jesús jín de:

Amigo, ¿na jñīñu vēji ró? áchí yá.

Yūcuán na te ni jinūcoo tāca gá téē ún, te ni cajñī de Jesús.

<sup>51</sup> Te ñin téē jeē cáhīin jín Jesús, ni tava de espada de, te ni jehnde de sōho ñin mozo maá sūtū cujéñnu ga. <sup>52</sup> Yūcuán na te ni cahān Jesús jín de:

Nachuvāha espada rō, chí tāca jéé cájejnáhan jín espada, suni jín espada cuu. <sup>53</sup> ¿Te á tu cájini rō jeē cuu cacān tahú rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū? <sup>54</sup> Te núu súcuan, ¿te ndese cuu squícu jnūhun cáhán tutu ñi jeē cánuu ndoho rí súcuan? áchí yá.

<sup>55</sup> Yūcuán na te ni cahān yā jín ñáyuu cuehē ún:

¿Te va téē cuíhná cúu rí jeē vējicoo ró jín espada jín yujnu jeē jñī ró rúhū jeē súcuan. Tāca quívī ni cucōo rí jín ró jijnáhan ró ñin templo cáhnu, ni steén rí jnūhun, te tu ní cájñī ró rúhū. <sup>56</sup> Te súcuan cáśáha ró návāha na squícu jeē cáhán tutu ñi jeē ní catee téē ni canacani jnūhun Yaā Dios, achí yá.

Yūcuán na te ndihí téē cáscuáha jín yá, ni castóo de ya, ni cajñinu de cuangoo de.

*Jeē ní indichi Jesús nuū junta tēe cácujeḥnu ga*

(*Mr. 14.53-65; Lc. 22.54-55, 63-71; Jn. 18.12-14, 19-24*)

<sup>57</sup> Te tēe ni cajni Jesús, cuan-goo de jín yá nuū Caifás, tēe cúu sutū cujeḥnu ga. Te yūcuan cáhīn tūtú tēe cástéén tutu ley jín táca tēe jéḥnu cándacu jniñu. <sup>58</sup> Te Pedro chi jicá-ni ndíquín de ya, te ni jinū de patio sutū cujeḥnu ga. Te ni quívi de ini patio, te ni cucōo de jín táca policia, návāha coto de ndese coo siquī yā.

<sup>59</sup> Te sutū cácujeḥnu jín táca tēe jéḥnu jín ndihi tēe casáha junta cujeḥnu ga, ni canducú de tēe cahān jnūhun yáa síquī Jesús, chi cahni de ya cácuni de. <sup>60</sup> Te vésu ni quecoo cuehē ñayuu cácahān yaá, te tu ní cánihīn de cuēchi siquī yā jeē cáhni de ya. Te jeē sándihí te ni quecoo uū testigo jeē cahán yaá síquī yā. <sup>61</sup> Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áchí.

<sup>62</sup> Yūcuán na te ni ndocuiñī maá sutū cujeḥnu ga, te ni cahān de jín yá:

¿Naun tu cáhán cuiti rō? ¿A iyó ndáa jeē cácahān tēe yáha síquī rō? Achí de.

<sup>63</sup> Te Jesús tu ní cáhán cuiti yā. Te ni cahān maá sutū cujeḥnu ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jín yá.

<sup>64</sup> Te ni cahān yā:

Suu ri cúu, nájnūhun cáhán rō. Te na cástūhun rí nuū rō jijnáhan ró jéē táca quívi jeē quíji te coto ró rúhū, Yaā ní nduu tēe, condee rí lado váha Yaā iyó poder. Te coto ró jéē ndíji ri ichi ándiví jín vícō. Achí yá.

<sup>65</sup> Yūcuán na te sutū cujeḥnu ga ni jehnde de sahna de jeē quití ndasí ni de, te ni cahān de:

Tēe yáha chi cáhán de jnūhun ndevāha jeē quití ní Yaā Dios, chi sáha de máa de Sēhe Yaā Dios. ¿Ndé jini ñūhún gá yō testigo núu súcuan? Chi je ni cajini ró jnūhun ndevāha cáhán de. <sup>66</sup> ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahán de súcuan, te jini ñūhún cuu de, áchí.

<sup>67</sup> Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. <sup>68</sup> Te ni cacahān de:

Te núu Cristo cúu ró, te cachi rō ndé iin cúu jeē ní cani rōhó, áchí de.

*Jeē ní cachi Pedro jeē tu jíní de ya*  
(*Mr. 14.66-72; Lc. 22.56-62; Jn. 18.15-18, 25-27*)

<sup>69</sup> Te níni jéē súcuan cúu, te Pedro néne de nuū quéhe ini patio. Te ni quee iin ñahan jéjnīñu vehe ún, te ni cahān ña jín de:

Róhó chi suni ni jica ró jín Jesús tēe Galilea, achí ña.

<sup>70</sup> Te máa de tu ní cáchi de, chi ni cahān de ni cajini ndihi ñayuu:

Tu jíní rí na jnūhun cáhán rō, achí de.

<sup>71</sup> Te ni quenda de yéhyí núu quéhe, te ni jito inga ñahan nuū de. Te ni cahān ña jín ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

<sup>72</sup> Te inga jínu tu ní cáchi tucu de, chi sa ni cahān teyí de:

Tu jíní rí tēe ún, áchí de.

<sup>73</sup> Te ni cunúu jecu gā, te ñayuu cáhīn yūcuan ní quecoo i nuū Pedro, te ni cacahān i:

Jendaá ndije jeē suni jnāhan tēe un cúu ró, chi ndijin cahán rō jeē tēe Galilea cúu ró, áchí i.

<sup>74</sup> Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní cuiti rí tēe ún, áchí de.

Te ni cana-ni líhli. <sup>75</sup> Te ni nucūhun ní de jnūhun ni cahān Jesús jín de: Nde ná tu cana líhli,

te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

*Jeē cuángoo de jín yá nuū Pilato  
(Mr. 15.1; Lc. 23.1-2; Jn. 18.28-32)*

## 27

<sup>1</sup> Yūcuán na te ni cundijin. Te tāca sūtū cácujeñnu jín táca tēe jéñnu jeē cándacu jniñu nuū ñáyuu hebreo, ni casquínáhan de jñuhun ndese sáha de jeē cuu Jesús. <sup>2</sup> Te ni cajihni de ya, te cuangoo de jín yá nuū Poncio Pilato, tēe cúu gobernador.

*Jeē ní jñi Judas*

<sup>3</sup> Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ní de, te ni nacuaña de ocō uxī xūhun plata jeē ní níñin de nuū sūtū cácujeñnu jín núu tāca tēe jéñnu. <sup>4</sup> Te ni cahān de jín:

Cuēchi ni sáha ná jēe ní nastúu ná ñin tēe cuu de, te tú na cuēchi de.

Te máa sūtū un ní cacahān de:  
¿Vé jítú ní ruhū? Cuēchi máa ró cúu. Achí de.

<sup>5</sup> Te ni scáne Judas xūhún un ini templo. Te ni quenda de cuahān de, te ni scuéhne de máa de.

<sup>6</sup> Te sūtū cácujeñnu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jēe ní jéconaā jeē cúu ñin tēe cúu, áchí de.

<sup>7</sup> Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá.

<sup>8</sup> Jeē yúcuán cúu jeē ndé vijna nání ñuhun ún Lugar Ñuhun Niñi. <sup>9</sup> Te súcuán ni squícu jñuhun ni cahān Jeremías, tēe ni nacani jñuhun Yaā Dios nde jenahán: Ní caquihin de ndihócó uxī xūhun plata, te súcuán-ní cúu ñin yāhu jeē ní casáha ñayuu Israel cuenta jeē ndeé yá nuū i. <sup>10</sup> Te jín xūhun un ní cajeen

de ñuhun quíxin, nájñuhun ni ndacu máa Jítóho yō Yaā Dios jniñu nuū rī. Achí Jeremías.

*Jeē ní indichi Jesús nuū Pilato*

*(Mr. 15.2-5; Lc. 23.3-5; Jn. 18.33-38)*

<sup>11</sup> Te nuū ní jinūcoo de jín Jesús nuū gobernador, tēe cúu Pilato, te ni cajñuhún de ya:

¿A máa ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhán rō.

<sup>12</sup> Te sūtū cácujeñnu jín tēe jéñnu cándacu jniñu, ní cacahān de cuēchi siquī yā. Te tú na vé ní cáhán cuiti yā. <sup>13</sup> Yūcuán na te ni cahān Pilato jín yá:

¿A tu jíní ró jēe cácahān de cuēhē cuēchi siquī rō? achí de.

<sup>14</sup> Te tu ní cáhán cuiti yā ní ñin jñuhun jín de. Te nahán ní naa ní gobernador jeē tú na vé ní cáhán yā jín de.

*Jeē ní cundaā jeē cúu yā*

*(Mr. 15.6-20; Lc. 23.13-25; Jn. 18.38-19.16)*

<sup>15</sup> Te íyó costumbre gobernador jeē quivī víco un siáá de ñin tēe íne vecāa, núu na-ni tēe cácuñi ñayuu.

<sup>16</sup> Te suu quivī un íyó ñin tēe íne vecāa, nání de Barrabás, te je ni jité núu jñuhun jeē ní sáha de cuēchi xeēn. <sup>17</sup> Te nuū ní candutútú ñayuu, te ni cahān Pilato jín i:

¿Ndé tēe cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

<sup>18</sup> Súcuán ni cahān de chí cúní de siaá de Jesús. Chí je ni jecūhun ní de jeē ní cacucuésún ni tāca sūtū un cájito de ya, te jeē yúcuán ní quijicoo jín yá nuū de.

<sup>19</sup> Te níni jēe néne Pilato silla nuū sándaā de jniñu, te ñasihí de ní tají ña jñuhun nuū de: Ma quivī nduu rō jín ñáyuu siquī tēe ndaā jiñā, chí yōhyo ní siūhu jéni ruhū cuni jeē siquí de, áchí ña.

<sup>20</sup> Te sūtū cácujeñnu jín táca tēe jéñnu, ní cascáhán de ñayuu jeē na

cácán i jeē siaá de Barrabás, te na cúu Jesús. <sup>21</sup> Yūcuán na te ni cajñuhún tucu gobernador:

Jeē uú de, ¿nde ñin de cáconi rō jeē siaá rí? achí de.

Te ni cacahān i:

Siaá ni Barrabás, achí i.

<sup>22</sup> Te ni cajñuhún Pilato:

Núu súcuan te ¿ndese cáconi rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, achí i.

<sup>23</sup> Yūcuán na te ni cahān Pilato:

¿Na cuēchi ni sáha de núu súcuan? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

<sup>24</sup> Te ni jini Pilato jeē tu cúndeyí de jíin ñayuu, chi sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rí jeē cúu tēe váha yāhā. Chi siquī maá ró jíin náhan ró na cóndee. Achí de.

<sup>25</sup> Te ni cacahān ndihi ñayuu:

Suu siquī maá ná jíin siquī séhe ná na cóndee cuēchi jeē cúu de, achí i.

<sup>26</sup> Yūcuán na te ni siaá de Barrabás. Te ni ndacu de jniñu jeē na cáni táca soldado un Jesús, jíin jéé cáta caa de ya jicā cruz.

<sup>27</sup> Yūcuán na te soldado un cuango de jíin Jesús ini palacio. Te ni cacana de ndihi jnáhan de ni candutútú núu yā. <sup>28</sup> Te ni caquenehen de sahma ya, te ni cachuhun de ya ñin sahma cuehé jeē cúu sahma rey. <sup>29</sup> Te ni casáha de ñin corona ñu, ni cachuhun de xinī yā. Te ni cachihi de ndaha váha ya ñin yujnu jeē nájnūhun bastón. Te ni casácatā de nuū yā, chi ni cajecuiñi yití de, casáha de jeē chiñuhún de ya.

Nacā jeē váha rey cúu Rey ñayuu hebreo, achí de.

<sup>30</sup> Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xinī yā.

<sup>31</sup> Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máa yá. Te cuango de jíin yá jeē cata caa de ya jicā cruz.

*Jeē ní cacata caa de ya jicā cruz*  
(Mr. 15.21-32; Lc. 23.26-43;  
Jn. 19.17-27)

<sup>32</sup> Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejniñu de tēe un jéé cóndiso de cruz yā.

<sup>33</sup> Te ni jinūcoo de ñin lugar nuū naní Gólgota, jeē cuní cahān Lugar Yiquí Xíní. <sup>34</sup> Te ni cajēhe de vino jeē ní sácā núu jíin ñin jeē uvuá jeē cóho ya. Te nuū ní jito ndee ya, te tu ní cuní yā coho ya.

<sup>35</sup> Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñin ñin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñin ñin de sahma rí, achí yā, achí tutu. <sup>36</sup> Yūcuán na te ni cacucōo de yūcuan jéé cóto de nde cuu yā. <sup>37</sup> Te ni catee de ñin jnūhun xinī cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

<sup>38</sup> Te suni ní cacata caa de uū tēe cuihná núu uū gā cruz, ñin de lado váha ya, te inga de lado jecó yá. <sup>39</sup> Te ñayuu cáyāha yūcuan cáscuicó i xinī i, te cácahān neé i:

<sup>40</sup> Róhó chi cáhán rō jeē cánu rō templo cáhnu, te nuū uní quiví te nacani ró. Núu súcuan te jnama ró máa ró vijna. Te núu Sēhe Yaā Dios cúu ró, te nuu ró jicā cruz vií, achí i.

<sup>41</sup> Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhu jíin náhan de, suni súcuan ni cacahān catá de, te achí de cácahān maá de:

42 Núu inga ñayuu ni jnama de, ¿te naun tu cúu jnama de máa de vijna? Núu Rey ñayuu Israel cúu de, te na núu de jicá cruz, návâha candíje yó de. 43 Ni candíje de Yaā Dios, te na jnáma ya de vijna te núu cundáhú ni yā de, chi ni cahān de jeē cúu de Sēhe ya. Achí de jíjnāhan de.

44 Te tēe cuíhná jeē cándita caa xiin ya, suni súcuan ni cacahān neé de.

*Jeē ni jíhī Jesús*

(Mr. 15.33-41; Lc. 23.44-49; Jn. 19.28-30)

45 Te nuū ní cuu cahuxī uū, te ni cunee ñí cáhnu nde cahunī. 46 Te nájnuhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

47 Te sava ñayuu cáhīin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

48 Te ni jinu-ni ñin tēe, ni jequihin de ñin cachī, te ni chundaji de nuū vinagre iyá. Te ni tee de xinī ñin yujnu, te ni tee de yuhu ya jeē coho ya. 49 Te sava ga de ni cacahān:

Condetu ró, na cóndēhe yó núu quiji Elías jnama de chí tuú, achí de.

50 Te Jesús ni cana jee ya inga jínu, te ni jíhī-ni ya. 51 Te sahma ndíta caa jeē ndihyú cuarto ñi ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catakū sáva toto. 52 Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i. 53 Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu ñi Jerusalén, te cuehē ñayuu ni cajito nuū i.

54 Te ná ni jíhī Jesús, te tēe cúu capitán jíin tēe cáhīin jíin de jeē cándito de nde cuu yā, ni cajini de

jeē ni jnáa, jíin táca gá jniñu ní cuu. Te yōhu ni cayūhú de, te ni cacahān de:

Jendaá ndije jeē Sēhe Yaā Dios cúu tēe yáha, achí de.

55 Te yūcuan cáhīin cuehē ñahan, cándēhe jíca ña. Te suu ñahan un ní candiquín ña Jesús nde Galilea, vējicoo ña cájejniñu ña nuū yā. 56 Te unī ñahan un cácuu María ñuu Magdala, jíin María naná Jacobo jíin José, jíin naná ndindúú sēhe Zebedeo.

*Jeē ní quindūji Jesús*

(Mr. 15.42-47; Lc. 23.50-56; Jn. 19.38-42)

57 Te nuū ní ini quivī ún, te ni quee ñin tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. 58 Tēe un ní jehēn de nuū Pilato, te ni jícān de yiqui cúñu Jesús. Te ni ndacu Pilato jniñu jeē na cuáha nuū de. 59 Te José ni quihin de yiqui cúñu yā, te ni chusúcún de ñin sahma cuitá iyó ndoo. 60 Te névāha de ñin yaū jeē ní caan jeé jíca ñin cava, nuū ná tu quindūji ndīyi. Te yūcuan ní chindūji de ya. Te ni jesi de ñin yuū cáhnu yuhu yáú un, te cuahān de. 61 Te María ñuu Magdala, jíin inga María, cáyūcú ña ichi núu nuū yíndūji ya.

*Jeē ní cacondito soldado nuū yíndūji ya*

62 Te ni cuu tēcá jniñu yáha máa quivī jeē casátūhva ñayuu jeē quiji quivī ndétátú. Yūcuán na te ni cundijin maá quivī ndétátú. Te sutū cácujeñnu jíin tēe grupo fariseo ni jengoo de nuū Pilato. 63 Te ni cacahān de:

Cáncūhun ni na jéē nde na tēcu tēe stáhú neé un te ni cahān de jeē nátecu de nuū unī quivī. 64 Núu súcuan te ndacu ní jniñu na cóto vāha tēcá soldado yuhu yáú un nde núu ni yáha unī quivī. Chi núu tuú te sanaa te quijicoo tēe ni cascuáha jíin de, te tava cuíhná de ndīyi ún



jecuáa, quingoo de jíin. Yūcuán na te cachi de nuū ñáyuu jeē ní natecu tēe ún. Te cáhú gá cuu jñūhun stáhú yúcuán vesú jeē xihna ñūhún. Achí de.

<sup>65</sup> Te ni cahān Pilato:

Yāha cáhīyo soldado. Cuángoo jíin de, te sácútu váha ró yuhu yáú un, te coto vāha ró, núu ndese vāha ga cuu sáha ró. Achí de.

<sup>66</sup> Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castān ñihin de. Te ni castóo de tǎcá soldado un cándito.

*Jeē ní natecu Jesús*

(Mr. 16.1-8; Lc. 24.1-12; Jn. 20.1-10)

## 28

<sup>1</sup> Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondēhé ña nuū ní yíndūji Jesús. <sup>2</sup> Yūcuán na te ñin sanaa-ni te ni jñāa ñihin ndasí. Chī ñin ndajéhé maá Jítóho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stāa ya yuū ndihyú yuhu yáú un, te ni cucōo ya siquī. <sup>3</sup> Te ndíndēe núu yā nájñūhun taja, te sahma ñūhun ya yaa quiyi nájñūhun yuhvā volcán. <sup>4</sup> Te soldado cándito yūcuán ní quisi i de jeē cáyūhú de cájito de ya. Te ni cacuu ndíyí de. <sup>5</sup> Te ni cahān ndajéhé jíin ndíndúú ñahan ún:

Ma yūhu ró, chī jíiní rī jeē vécondēhe ró Jesús, Yaā ni jíhī jíicā cruz. <sup>6</sup> Tuá yā yāhá, chī je ni natecu yā, nájñūhun ni cahān yā. Nehen condēhe ró nuū ní cachíndūji de ya. <sup>7</sup> Te yachī quingoo ró, te cachi rō nuū tēe cáscuáha jíin yá jeē ní natecu yā. Te xihna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

<sup>8</sup> Te ni quendacoo ña nuū ní yíndūji ya, te yachī cuangoo ña. Te cáyūhú ña, te suni yōhyo cácusñ ni

ña. Te ni cajinu ña cuacastūhún ña nuū tēe cáscuáha jíin yá. <sup>9</sup> Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñūhún ña ya.

<sup>10</sup> Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tǎcá hermano rī, tēe ni cascuáha jíin rí, jeē na nūngoo de nde Galilea, te yūcuán coto de nuū rī. Achí yá.

*Jñūhun ní cacahān soldado*

<sup>11</sup> Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tǎcá jniñu jeē ní cuu. <sup>12</sup> Te sutú cácujuhnu ni candutútú de nuū tǎca tēe jéhu cándacu jniñu, te ni casquijnáhan de jñūhun. Yūcuán na te ni cajēhe de cuehē xūhun núu soldado jijnáhan.

<sup>13</sup> Te ni cacahān de jíin:

Cahān rō jijnáhan ró jéē tēe cáscuáha jíin de ni quijicoo jecuáa, te ni catava cuñhna ndíyí un níni cáquixí rō, achí rō. <sup>14</sup> Te núu na cúni gobernador jñūhun yāha, te máa rí quiscahán rī de, návāha tú ñihñ rō castigo jijnáhan ró. Achí de.

<sup>15</sup> Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chī súcuán cácahān ñayuu hebreo nájñūhun ni cacahān soldado un.

*Jeē ní tejniñu ya de nacani de jñūhun*

(Mr. 16.14-18; Lc. 24.36-49; Jn. 20.19-23)

<sup>16</sup> Te ndihúxí ñin tēe ni cascuáha un cuánungoo de nde Galilea, nde yucu nuū ní cachi Jesús jeē quingoo de. <sup>17</sup> Te nuū ní cajito de nuū yā, te ni cachiñūhún de ya. Te sava de tu cácandíje vāha de jeē maá yá cúu. <sup>18</sup> Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rí jniñu ándiví jíin ñáyiví. <sup>19</sup> Núu súcuán te cuángoo

nuū ñáyuu tǎcá naci6n, te stéén rō  
jnūhun ri nuū i návāha na cándíje  
i. Te scuándute ró i jeē ní cacandíje  
i máá Tátá jíin Séhe jíin Espíritu  
Santo. <sup>20</sup> Te stéén rō nuū i jeē na  
cuátáhú i tǎcá jniñu ní ndacu ri nuū  
rō. Te cocuhun ni rō jeē maá rí  
íne ri jíin ró ní cáni nde quiiví jínu  
ñayiví. Achí yá. Te ni cuu. Amén.

## JNUHUN VAHA NI TEE SAN MARCOS

*Jnūhun Juan tēe scuándute*

*(Mt. 3.1-12; Lc. 3.1-9, 15-17;*

*Jn. 1.19-28)*

<sup>1</sup> Yāha quėjéé jnūhun vāha máá Jesucristo Sēhe Yaā Dios, jeē ní quiiji ya jeē jnama ya yohó.

<sup>2</sup> Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō,

návāha coo tūhva ñayuu jeē jinū rō,

achí Yaā Dios jíin Cristo.

<sup>3</sup> Te tēe ún cana jee de nde nuū ñūhun téhé:

Sátūhva ró máá ró jíjnáhan ró, chi quee máá Jítoho yō.

Te sáha ró jniñu ndaā, chi vēji ya, achi de.

Achí Isaías. <sup>4</sup> Te Juan ni jinū de nde nuū ñūhun téhé, scuándute de ñayuu. Te cáhan de jíin i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. <sup>5</sup> Te tāca ñayuu región Judea jíin ñayuu ñuu Jerusalén, ni quiijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

<sup>6</sup> Te sahma ñūhun Juan cúu ixí camello, te núhni ñin cinturón ñii chíji de. Te jeē técu de cúu tíca ndicuéhyí jíin ndúxi yocō. <sup>7</sup> Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuíti cúu ri nuū yā, ni jeē cuajniñu ri nuū yā vēsú ñin jniñu lúli gá nájñuhun jeē cuíta ndeyi ri ndají rí correa ndijēn yā. <sup>8</sup> Te ruhū chí jíin ndute scuándute ri rohó jíjnáhan ró, te Yaā ún chí nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

*Jeē ní jendute Jesús*

*(Mt. 3.13-17; Lc. 3.21-22)*

<sup>9</sup> Te ni cuu jecu quiví, te Jesús ni quenda ya ñuu Nazaret ndañúú Galilea, te Juan ni scuándute de ya ini yūte Jordán. <sup>10</sup> Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xinī yā, te cáa nájñuhun ñin paloma. <sup>11</sup> Te ichi ándiví ní cahān ñin jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ní rí jíin ró, achí.

*Jeē ní jito ndee jexeén Jesús*

*(Mt. 4.1-11; Lc. 4.1-13)*

<sup>12</sup> Yūcuán na te ni jinū Jesús nde nuū ñūhun téhé ní sáha Espíritu Santo. <sup>13</sup> Te uū xico quiví ni condee yā nuū ñūhun téhé un núú ñin quiiti yúcú. Te ni jito ndee Satanás yā, chí cúni jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

*Jeē ní quejéé Jesús nácani ya jnūhun*

*(Mt. 4.12-17; Lc. 4.14-15)*

<sup>14</sup> Yūcuán na te ná ni cachuñe de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu. <sup>15</sup> Te ni cahān yā:

Je ni jinū quiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuēchi ró jíjnáhan ró, te candíje ró jnūhun jeē jnáma ya rohó. Achí yá.

*Jeē ní cana ya cuñ tēe jni chācá*

*(Mt. 4.18-22; Lc. 5.1-11)*

<sup>16</sup> Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájni chācá cácuu de, te cásinga de ñunu de ini mar. <sup>17</sup> Te ni cahān yā jíin de:

Condiquñ ruhū na quihín yō, te nasáha ri rohó tēe nihñ cuēhē ñayuu candíje ruhū, nájñuhun cániñ rō chācá, achí yá.

<sup>18</sup> Yūcuán na te ni castóo-ni de ñunu de, te ni candiquñ de ya.

19 Te ni jica ya jecu gā, te ni jito ya nuū Jacobo jiín ñani de Juan, sēhe Zebedeo, suni cáyucú de ini barco de, cánachijnñi de ñunu de. 20 Te suni ni cana ya de jeē cóndiquin de ya. Te ni castóo-ni de tátá de Zebedeo ini barco un jiín mozo de, te ni candiquin de ya cuango de.

*Jeē ní quenehen ya tachī ini ñn tēe*  
(Lc. 4.31-37)

21 Te ni jinū yā jiín de ñuu Capernaum. Te quivī ndétātu ní quivī ya ini vehe iī sinagoga, te ni steén yā jñuhun. 22 Te ni canaa ni ñayuu ni cajini i jñuhun steén yā. Chí ni steén vāha ya nuū i, chí máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de. 23 Te ini vehe iī sinagoga ñuu un íne ñn tēe jeē ñuhun tachī ini. Te ni cana cóhó de:

24 ¿Naun vēji ní núu na jijnáhan ná, Jesús ñuu Nazaret? ¿A vēji ní jée snāa ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jiín tachī ún:

Casi yuhu ró te quenda ró ini de, áchí yá.

26 Te tachī ún xeēn ni jehni yihí tēe ún. Te ni cana cóhó, te ni quenda ini de cuahān. 27 Te ndihi ñayuu ni cayuhú i, te cácajnñuhun jñahan i:

¿Na vé cúu jeē yáha? ¿A ñn jñuhun jée cúu jeē yáha? Chí tēe yáha cújéhnú de jeē ndácu de jniñu nde nuū tachī te quéndacoo, áchí i.

28 Te yachī ni jitē núu jñuhun Jesús cuahān ní cáhnu región Galilea.

*Jeē ní nasávāha ya naná chīsó Simón Pedro*  
(Mt. 8.14-15; Lc. 4.38-39)

29 Te ni quenda ya jiín de jijnáhan de ini vehe iī sinagoga. Te Jesús ni jehēn yā jiín Jacobo jiín Juan nde vehe Simón jiín Andrés. 30 Te náná chīsó Simón, cātú ña yihí quiji ña. Te ni cacastühun de nuū yā jeē cúhú

ñā. 31 Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quiji ún ña, te ni sáha ña jeē ní cayejí de jiín yā.

*Jeē ní nasávāha ya cuehē ñayuu*  
(Mt. 8.16-17; Lc. 4.40-41)

32 Te ni quēe niāndii te ni cuaa. Te ni quecoo ñayuu jiín táca ñáyuu cácuñu jiín jée ñuhun tachī ini. 33 Te táca ñáyuu ñuu un ní cacutútú i yéhyí un. 34 Te ni nasávāha ya cuehē ñayuu cácuñu tijni nuū cuehyí, te ni quenehen ya cuehē tachī un cuango. Te tachī chí je cájini un yá, te tu ní jēhe ya jñuhun jeē cástuhun ndé ñn cúu ya.

*Jeē ní nacani ya jñuhun región Galilea*  
(Lc. 4.42-44)

35 Te nehen ndasí ní ndonda ya, nde yínee gā. Te ni quenda ya cuahān sín ya yatā ñúu nuū tú ñayuu, te yūcuan ní jicān tahú yā. 36 Te Simón jiín tēe cáhñin jíni de, ni jenanducú de ya. 37 Te ni cananihñ de ya, te ni cacahān de jíni yá:

Tāca ñáyuu cánanducú i níhñin, áchí de.

38 Te máá yá ni cahān yā:

Sa suhva na quihñ yō tāca gá ñuu íne yajni, návāha suni nacani ri jñuhun nuū i, chí jeē yūcuan ní quee rī. Achí yá.

39 Te súcuan te ni jica cuu ya ní región Galilea, ni nacani ya jñuhun ini vehe iī sinagoga táca ñuu, te ni quenehen ya tachī ini ñayuu.

*Jeē ní nasávāha ya ñn tēe ndóho cuehyí stehyú*  
(Mt. 8.1-4; Lc. 5.12-16)

40 Te ñn tēe ndóho cuehyí stehyú, ni quee de ni jecuiññi yití de nuū yā, te ni cahān de jíni yá:

Jíni na jeē cuu sáha ní jée nduvāha ná, te núu cúni ni, áchí de.

41 Te Jesús ni cundáhú ni yā de, te ni soó yā ndaha ya siquī de, te ni cahān yā:

Cúni rī. Te na ndúvāha ró, áchí yá.

42 Te ná ni cahān yā súcuan, te ni nduvāha-ni tēe ndóho cuehyī stehyū un. 43 Yūcuán na te nátají yá de quínuhun de, te ni cahān nihin ya jíin de:

44 Ma cáchi cuiti rō nuū ní ĩn. Chi quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró nuū yā, nájnūhun ni ndacu Moisés jniñu jehahán. Te súcuan te cuni ñayuu jeē ní nduvāha ró. Achí yá.

45 Te ni quenda de cuahān de, te ni quejéé de nácani de jnūhun nuū ndihi ñayuu ndese ni nduvāha de. Te siquī yúcuuan tuá ni cúu quīvi Jesús táca ñuu, chi cúchitú ndasí ñayuu nuū yā. Te ni jica ya yatā táca ñuu nuū tu cúchitú ñayuu. Te táca lado ni quijicoo ñayuu nuū yā.

*Jeē ní nasávāha ya ĩn tēe ndóho cuehyī ní ĩjin*  
(Mt. 9.1-8; Lc. 5.17-26)

## 2

1 Te ni cuu jecu quīvi, te ni quīvi tucu Jesús ñuu Capernaum. Te ni cajini ñayuu jeē néne ya vehe. 2 Te ní cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. 3 Yūcuán na te ni quecoo cuūn tēe nuū yā, cándiso de ĩn tēe ndóho cuehyī ní ĩjin. 4 Te tu ní cúu quīvicoo de nuū yā siquī jeē chitú ñayuu. Te ni cacoo de siquī véhe, te ni canune de ndaa nuū ĩn ya, te yaū un ní cascúun de tēe cúhú, cátu de nuū ĩn camilla. 5 Te ni jini Jesús jeē cácañje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū táca cuéchi ró, áchí yá.

6 Te yūcuán cáyúcú jecu tēe cástéén tutu ley Yaā Dios, te tēe un ní cajeni ni de siquī yā: 7 ¿Naun cáhán tēe yáha súcuan? Cáhán de jnūhun ndevāha jeē quití ní Yaā Dios, chi nasūu Yáa Dios cúu de jee

cóne cáhnu ni de nuū cuéchi. 8 Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rí? 9 Jeē uú jnūhun yáha, ¿ndé ĩn yí gá cáa? ¿A jéē cahán rī jíin tēe cúhú: Je íne cáhnu ni rī nuū táca cuéchi ró? ¿Chí yí gá jeē cahán rī: Ndocuñi te naquihin ró camilla rō, te caca ró, achi rí? 10 Te vijna te na stéén rī jeē maá rí, Yaā ní nduu tēe, ndíso jniñu rī ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni ĩjin un:

11 Cáhán rī jíin ró, ndocuñi te naquihin ró camilla rō, te quínuhun rō vehe ró, áchí yá jíin de.

12 Yūcuán na te ni ndocuñi-ni tēe un, te ni naquihin de camilla de, te ni quenda de cuahān de, jíto jínúu ndihi ñayuu. Te ndivii i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ní ĩn jniñu súcuan, áchí i.

*Jeē ní cana ya Leví*  
(Mt. 9.9-13; Lc. 5.27-32)

13 Te ni quenda tucu ya cuahān yā nde yumar. Te táca ñayuu ni jinūcoo i nuū yā, te ni stéén yā jnūhun nuū i. 14 Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xūhun renta. Te ni cahān yā jíin de:

Condiquñ ruhū na quihín yō.

Te ni ndocuñi de, te cuahān de jíin yá.

15 Yūcuán na te ni jehēn yā ni yeji yā staā vehe de. Te cuehē tēe cástútú xūhun renta jíin inga tēe cásaá cuéchi, suni cáyúcú de cáyeji de staā jíin Jesús jíin tēe cáscuáha jíin yá, chi íyó cuehē de jeē cándiquñ de ya. 16 Te tēe cástéén tutu ley Yaā Dios jíin tēe grupo fariseo, ni cajito de jeē yeji yā staā jíin ndihi táca tēe un. Te ni cacahān de jíin tēe cáscuáha jíin yá:

¿Naun yéji maestro rō jíin tée cástútú xúhun renta jíin inga tée cásaáha cuēchi? áchí de.

17 Te ni jíini Jesús, te ni cahān yā jíin de:

Ñayuu cáhīyo váha, tu jíini ñúhún i tée tájné, chí ñayuu cácuáha cūu jeē jíini ñúhún. Te ruhū nasūu jéē véji ri cana ri ñayuu tú cuēchi, jeē cūu i nájnūhun ñayuu cáhīyo váha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

*Jeē ní cacajñūhún de ya siquī jeē condite ni*

(Mt. 9.14-17; Lc. 5.33-39)

18 Te ni cuu ñin quivī jeē cáhīyo ndite ni tée cáscuáha jíin Juan, jíin tée cáscuáha jíin grupo fariseo. Te ni quecoo jecu tée, ni cacahān de jíin Jesús:

Tée cáscuáha jíin Juan jíin jéē cascuáha jíin grupo fariseo, tijni jíinu cáhīyo ndite ni de. Te tée cáscuáha jíin máá ní, ¿naun tu cásaáha de súcuan?

19 Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu condite ni ñayuu cáhīin vico nándāha, te núu níni néne tée nándāha? Chí núu néne tée nándāha, te ma cūu condite ni i. 20 Te quee quivī jeē cújiyo tée nándāha, te quivī ún chí condite ni i.

21 Te ni cahān yā uū jñūhun yátá síquī jeē tu quíjnáhan jñūhun jeé jéé steén yā jíin táca jñūhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chí núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhné un. 22 Te suni tu cáchuhun vino jeé ini ñii túhú. Chí núu súcuan te vino jeé un ndatá ñii ún, te naa vino jíin ñii. Jeé yúcuan cánuú jéé chūhun i vino jeé ini ñii jéé.

*Jeē ní cataxín de yoco trigo quivī ndétátú*

(Mt. 12.1-8; Lc. 6.1-5)

23 Te ñin quivī ndétātu ní yāha Jesús cuahān yā mēhñú nuū cáa trigo. Te tée cáscuáha jíin yá, cájica de cuahān de, te ni quejéé de cátaxín de yoco trigo cáyeji de. 24 Yūcuán na te tée grupo fariseo ni cacahān de jíin yá:

Condéhé. ¿Najehē casáha tée cáscuáha jíin ró súcuan? Chí áchí ley Moisés jeē ma cūu sáha yó ni ñin jniñu quivī ndétátú. Achí de.

25 Te ni cahān máá yá jíin de:

¿A tu ní cácahu cuiti rō tutu ndese ni sáha David, ñin quivī ní cumanī jeé cáji de, te ni jíi de sōco jíin tée cáhīin jíin de? 26 Te ni quivī de ini vehe Yaā Dios. Te Abiatar ni cuu sutū cujéhnu ga. Te ni yeji de pan ñi jeé yosó ndijin nuū Yaā Dios. Te tú na ley jeé cáji ni ñin tée, chí máá-ni sutū cuu cají. Te suni ni jēhe de ni cayeji tée cáhīin jíin de. Te tú na cuēchi ní iyo síquī de. Achí yá.

27 Te suni ni cahān yā jíin de jíjnáhan de:

Tu ní jéconaā ñayuu jeē ndóho i nuū quivī ndétátú, chí ni jeconaā quivī un jéé ndétátú i. 28 Núu súcuan te ruhū, Yaā ní nduu tée, máá rí cūu jeé ndácu jniñu síquī ndese sáha ñayuu quivī ndétátú, áchí yá.

*Jeē ní nduvāha tēe ni ichī ndaha*

(Mt. 12.9-14; Lc. 6.6-11)

### 3

1 Te ni quivī tucu Jesús ini vehe ñi sinagoga. Te yúcuan íne ñin tēe ni ichī ñin ndaha de. 2 Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi síquī yā. 3 Yūcuán na te ni cahān yā jíin tēe ni ichī ndaha ún:

Ndocuññi te condichi rō mēhñu yāha, áchí yá.

4 Te ni cajñūhun yá de jíjnáhan de: ¿Ndese cáhān ley síquī quivī ndétátú? ¿A jéé sáha váha yó, chí

sáha néé yó? ¿A jéē nasávāha yó ñāyuu je yajni cuu, chí sáha yó jéē cúu i? áchí yá.

Te máá de tú na vé ni cacahān de. <sup>5</sup> Te ni quitī ni yā ni jito ya nuū de jijnáhan de, te ni cucuíhyá ni yā jeē níhni ni de. Te ni cahān yā jín téē ni ichī ndaha:

Scáá ndaha ró.

Te ni scaá de, te ni nduvāha-ni ndaha de. <sup>6</sup> Yūcuán na te ni quendacoo tēe grupo fariseo, te ni casquijnáhan de jnūhun jín téē grupo Herodes siquī yā, ndese cahni de ya.

*Jeē ní quecoo cuehē ñāyuu nuū yā yumar*

<sup>7</sup> Te Jesús cuahān yā nde yumar jín téē cáscuáha jín yá. Te cuehē ñāyuu región Galilea ni candiquēn i ya. <sup>8</sup> Te suni ñāyuu región Judea, jín ñāyuu ñuu Jerusalén, jín ñāyuu Idumea, jín ñāyuu ichi núu cáne niāndii yūte Jordán, jín ñāyuu región Tiro jín Sidón, cuehē ndasí ñāyuu ni cajini jnūhun i jniñu jéhnu ni sáha ya, te ni quecoo i nuū yā. <sup>9</sup> Te ni cahān yā jín téē cáscuáha jín yá jeē na cóo túhva ñin barco quívi ya, návāha ma chítú níhin ñāyuu cuehē ún xiin ya. <sup>10</sup> Chi cuehē ñāyuu je ni nasávāha ya, te jeē yúcuan vējicoo cuehē gā ñāyuu cándoho tāca núu cuehyī, te chítú níhin i xiin ya jeē quehé i ya cácuni i. <sup>11</sup> Te ñāyuu cáñuhun tachī ini, núu ni cajito nuū yā, te cájecuíñi yitī núu yā, te cácana cóho:

Máá ní cúu Sēhe Yaā Dios, achí.

<sup>12</sup> Te ni ndacu níhin ya nuū tachí un jéē ma cáhán gā jeē cúu ya Sēhe Yaā Dios.

*Jeē ní nacāji ya uxī uū tēē apóstol*  
(Mt. 10.1-4; Lc. 6.12-16)

<sup>13</sup> Yūcuán na te ni caa ya cuahān yā ñin yucu. Te ni cana ya tāca téē jeē cuní maá yá caca jín yá, te ni quecoo de nuū yā. <sup>14</sup> Te ni jeni ya uxī uū de jeē cuñi de jín yá, te tají yá de quingoo de nacani de jnūhun. <sup>15</sup> Te ni sáha

ya jeē cóndiso jniñu de nasávāha de ñāyuu cuhú te quenehen de tachī ini ñāyuu. <sup>16</sup> Te yāha cúu ndihúxi uū tēē jeē ní nacāji ya: Simón jeē ní nasnání yá de Pedro. <sup>17</sup> Te Jacobo jín ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēē yíhi fuerza nacani jnūhun, návjñūhun yíhi fuerza taja. <sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēē grupo cananista, <sup>19</sup> jín Judas Iscariote, tēē jeē ní nastúu de ya.

*Jeē ní cacahān ñāyuu jeē jejníñu ya fuerza Satanás*

(Mt. 12.22-32; Lc. 11.14-23; 12.10)

Yūcuán na te ni quívi ya ñin vehe jín téē cáscuáha jín yá un. <sup>20</sup> Te ni ndutútú tucu cuehē ñāyuu, te ni tuá ni cúu caji yā staā jín de. <sup>21</sup> Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cácahān de jeē ní sana xiní yā.

<sup>22</sup> Te suni tēē cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēē yáha ñúhun Satanás ini de, jeē kujéhnu nuū tachí. Te jín fuerza un quenehen de tachí, achí de.

<sup>23</sup> Te ni cana ya de jijnáhan de, te ni cahān yā ñin jnūhun yátá jín de:

¿Ndese cuu quenehen Satanás maá? <sup>24</sup> Chi núu ñin nación sásín maá te cuajnáhan maá, nación un má cúu ga coyūcu cáhnu. <sup>25</sup> Te núu ñāyuu ñin vehe sásín maá te cuajnáhan maá, ñāyuu un má cúu ga coyūcu cáhnu. <sup>26</sup> Te suni súcuan Satanás jín jnáhan tachí, chí núu sásín maá te cuajnáhan maá, núu súcuan te ma cóo ga, chí sa suhva naa.

<sup>27</sup> Te ni ñin tēē ma cúu quívi de ini vehe tēē ndacuī jeē quenehen de ndajniñu de. Chi cánuú jeē xíhna gā cuhni de tēē ndacuī ún. Te suni

súcuan cúu jeē jíhni rī Satanás te quénehen rí tachī.

<sup>28</sup> Te jendaá cahán rī jíin ró jeē iyó modo coo jnúhun cáhnu ni nuū tāca cuéchi cásáha ñayuu, te suni nuū tāca jnúhun néé cácahán i. <sup>29</sup> Te núu cahán ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, áchí yá.

<sup>30</sup> Súcuan ni cahán yā, chi ni cacahán i jeē quénehen ya tachī jíin fuerza Satanás.

*Náná yā jíin ñani yā*

*(Mt. 12.46-50; Lc. 8.19-21)*

<sup>31</sup> Yūcuán na te ni quee naná yā jíin tāca ñani yā. Te íin ña nuū quéhe, te ni tají ña jnúhun cuahán nuū yā jeē cána ña ya. <sup>32</sup> Te ñayuu cáyūcu ní xiin ya, ni cacahán i jíin yá:

Náná ni jíin tāca ñani ni cáhīn nuū quéhe, te cácuni cahán jíin ní, áchí i.

<sup>33</sup> Te ni cahán maá yá:

¿Ndé ñin cúu náná rī jíin ñani rī? achí yá.

<sup>34</sup> Yūcuán na te ni ndacoto ya nuū ñayuu cáyūcú xiin ya ún, te ni cahán yā:

Suni náná rī jíin ñani rī cácuu tāca ñayuu yáha. <sup>35</sup> Chi tāca ñayuu casquícú jniñu cúní Yaā Dios, suu cácuu ñani rī, cuāha rī, náná rī, achí yá.

*Jnúhun yátá siquī tēe jéte trigo*

*(Mt. 13.1-9; Lc. 8.4-8)*

#### 4

<sup>1</sup> Te yumar ni quejéé tucu Jesús steén yā jnúhun. Te ni cutútú cuéhē ndasí ñayuu nuū yā, te jeē yúcuan ní quívi ya ni cucōo ya ini ñin barco nuū mar. Te tāca ñayuu un cáyūcú i yumar. <sup>2</sup> Te jíin jnúhun yátá ni steén yā cuéhē jnúhun nuū i, te súcuan ni cahán yā:

<sup>3</sup> Cuni nahín jíjnáhan ró: ñin tēe cate trigo, ni quenda de jeē cáte de.

<sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo

saa, ni cayeji tī. <sup>5</sup> Te jecu gā trigo ni jité nuū ñúhun yuū, nuū tú cuéhē ñuhun. Te yachī-ni ni cane, chi tu cóquin ñuhun. <sup>6</sup> Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup> Te jecu gā trigo ni jité nuū náne íñu. Te ni jehnu íñu ún, te ni jesi nuū, te tu ní jéhe nunī. <sup>8</sup> Te jecu ni jité nuū ñúhun váha. Te ni cane, te ni jehnu, te ni jéhe cuéhē nunī. Sava ni jéhe ocō uxī jeē ñin ñin nunī, te sava ga ni jéhe unī xico, te sava ga ni jéhe ciento. Achí yá.

<sup>9</sup> Yūcuán na te ni cahán yā jíin de:

Tāca róhó jéé jíni sōho, na chúsóhó ró. Achí yá.

*Najehē cahán yā máni jnúhun yátá*

*(Mt. 13.10-17; Lc. 8.9-10)*

<sup>10</sup> Yūcuán na te ni quendōo máá na yā, jíin ndihúxí uū tēe cáscuáha jíin yá, jíin jecu gā ñayuu cáhīn jíin de. Te ni cacajnúhún de ya na vé cuní cahán jnúhun yátá un. <sup>11</sup> Te ni cahán yā jíin de:

Róhó, chi sáha Yaā Dios jeē cájecūhun ni rō jnúhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīn sīn siquī, chi máni jíin jnúhun yátá cáhán rī tāca jnúhun jíin i. <sup>12</sup> Súcuan cáhán rī návāha vésú cájito i, te quendōo i nájnúhun jeē tú na vé ni cájito i. Te vésú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnúhun cáhnu ni nuū cuéchi i, áchí yá.

*Jeē ní castūhun cájí yá jnúhun yátá tēe jéte trigo*

*(Mt. 13.18-23; Lc. 8.11-15)*

<sup>13</sup> Te ni cahán gā yā jíin de jíjnáhan de:

Núu tu cájecūhun ni rō jnúhun yátá yáha, ¿te ndese jecūhun ni rō tāca gá jnúhun yátá núu súcuan? <sup>14</sup> Tēe jéte trigo cúu tēe scuité núu jnúhun Yaā Dios. <sup>15</sup> Te trigo jeē ni jité yuhíchi cúu nájnúhun ánuá sava



ñayuu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. <sup>16</sup> Te trigo jeē ni jítē nuū ñúhun yuū, chi cúu nájñūhun ánuá sava ñayuu cájini nahín jnūhun, te yachī-ni cájetáhú i te cácusī ni i jíin. <sup>17</sup> Te tu cúcutú jnūhun ún ini anuá i, te jecu-ni quivī cájetáhú i. Te núu ni quejéé jnūndóho, chí jító xeēn ñayuu i síquī jnūhun ún, te quejéé nácani yátá ni i. <sup>18</sup> Te jeē ni jítē nuū náne iñu cúu nájñūhun jecu gā ñayuu. Chi vēsú ni cajini sōho i, <sup>19</sup> te cándihvī ni i síquī jeē iyó ini ñayīvi yáha. Te cácuni i cucucá i, te stáhú un i jeē cutóo ni i síquī tāca ndajníñu. Te ndihi jeē yáha cácuñéñu i jíin, te jési nuū jnūhun ya, te tu íje i jíin jnūhun ya. <sup>20</sup> Te trigo jeē ni jítē nuū ñúhun váha cúu nájñūhun ñayuu cájini nahín jnūhun, te cájetáhú i, te cáhije i jíin jnūhun ya. Te sava i cúu nájñūhun nunī jeē jéhe ocō uxī jeē ñin ñin, te sava i jéhe unī xico, te sava ga i jéhe ciento. Achí yá.

*Jnūhun yátá síquī lámpara  
(Lc. 8.16-18)*

<sup>21</sup> Suni ni cahān yā jíin de:

Núu nástññ ñayuu ñin lámpara, ¿a chúne i chíji ñin cajón chí chíji jító? Tuú, chí jéni i nuū sucún návāha cundijin. <sup>22</sup> Te suni súcuan, tu iyó ni ñin jnūhun sāhi jéē ma cúni ñayuu, chí ndihi tāca jnūhun natūu ndijin te cuni ñayuu. <sup>23</sup> Tāca róhó jéē jíni sōho, na chúsóhó ró, achí yá.

<sup>24</sup> Te suni ni cahān yā jíin i:

Cuni sōho váha ró. Chi cūhva jeē chusóhó ró jnūhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró. <sup>25</sup> Chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jiní i ún, sa suhva naa. Achí yá.

*Jnūhun yátá síquī trigo jeē jéhnú*

<sup>26</sup> Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeē ní jete ñin tēe. <sup>27</sup> Yūcuán na te quixí de te ndóna de, te súcuan jíca quivī cuahñ. Te trigo un cáne te jéhnú. Te máá de tu jiní de ndese cúu jeē jéhnú. <sup>28</sup> Chi máá ñuhun sáha jeē jéhnú trigo, xīhna gā yucū, sáa te cáne yoco, yūcuán na te íje máá núnī. <sup>29</sup> Te núu ni cuaan trigo un, te quejéé ñayuu cájehnde i, chí je ni jinū quivī tahndé. Achí yá.

*Jnūhun yátá síquī ndiquin  
mostaza  
(Mt. 13.31-32; Lc. 13.18-19)*

<sup>30</sup> Te suni ni cahān yā:

Na cáhan rī ñin jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. <sup>31</sup> Ndúcuehē i nájñūhun jéhnú ñin ndiquin mostaza jeē jéquin i nuū ñúhun. Te yūcuán cúu ñin ndiquin lúli gā vēsú tāca ndiquin jeē iyó. <sup>32</sup> Te ná ni jequin i, te cáne te jéhnú ga vēsú tāca gā yucū, te cúnáhnú ndaha. Te tāca saa chí sáha ti tacá ti nuū cuándahū xiní ún. Achí yá.

*Jeē máni jnūhun yátá cáhán yā jíin  
i*

*(Mt. 13.34-35)*

<sup>33</sup> Te cuehē jnūhun yátá súcuan ni cahān yā jíin ñayuu, núu nasaa cánda i jecūhun ni i. <sup>34</sup> Te tāca jéē ni stéén yā, máni máá jnūhun yátá ní cahān yā jíin i. Te nuū tēe cáscuáha jíin yá chí ni nacastūhun cáji yá jnūhun ún.

*Jeē ní jecuiñī tachī ñihin jíin mar  
ni sáha ya*

*(Mt. 8.23-27; Lc. 8.22-25)*

<sup>35</sup> Te jeē cuácuaa quivī ún, te ni cahān yā jíin tēe cáscuáha jíin yá:

Na yáha yó quíñin yō ñinga lado mar, achí yá.

<sup>36</sup> Te ni casquéndōo de ñayuu cuehē ún, te ni quivīcoo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíinánah de. <sup>37</sup> Te ni jequihī ñin tachī ñihin, te ni stóna

ndute mar, te ni qūvi ini barco. Te je yajni chitú ndute ini barco. <sup>38</sup>Te Jesús catú yá yatā de ini barco, quixí yā te ȳhi in sahma cástíhi xiní yā. Te ni castóna de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yō? achí de.

<sup>39</sup>Te ni ndocuiñi yā, te ni cahān yā nuū tachí níhin un jín nuū mar: Jecuiñi te nayúu-ni coo ró, áchí yā.

Te ni jecuiñi tachí, te ni cuu nayúu í-ni. <sup>40</sup>Te ni cahān yā jín de jínáhan de:

¿Naun cáyuhú ndasí ró? ¿Naun tu cácandíje ró jéē cācu ró sáha ri?

<sup>41</sup>Te yōhyo ni cayuhú de, te ni cacahān de jín jnáhan de:

¿Nde in ga cúu tēe yáha jéē nde tachí níhin jín mar cájetáhú jéē cahán de? áchí de.

*Tēe Gadara jeē ndóho tachí  
(Mt. 8.28-34; Lc. 8.26-39)*

## 5

<sup>1</sup>Te ni jinú Jesús jín de jínáhan de inga lado mar, región Gadara.

<sup>2</sup>Te ná ni quenda ya ini barco un, te in tēe ñuhun tachí ini, ni quenda de nde nuū yínduji ndiyi, te ni quee de nuū yā. <sup>3</sup>Tēe un ndéé de nuū yínduji ndiyi. Te tu jéniñu jeē jíhni ñayuu de, ni jín cadena. <sup>4</sup>Chi cuehē jínu ni conuhní jehē de ndaha de jín cadena. Te tāca jínu jéhnde de, te sácuchí de. Te tú ni in cúndeyí jín de. <sup>5</sup>Te nduú ñuú jica de yucu jín nuū yínduji ndiyi, te cána cóhó de, te stúj de máa de jín yúu. <sup>6</sup>Te náa jícá gá vēji Jesús, te ni jito de ya. Te jínu de ni quee de nuū yā, te ni jecuiñi yití de nuū yā. <sup>7</sup>Te ni cana cóhó de:

¿Naun vēji ní nuū ná, Jesús Sēhe Yaā Dios, Yaā cujénu téyí? Cáhán ndahú ná jín ní, jini nahín Yaā Dios, ma stóho ní sáña, áchí de.

<sup>8</sup>Súcuan ní cahān de, chi je ni cahān Jesús:

Táchí, quenda ini tēe yáha quihín rō.

<sup>9</sup>Te ni cajñuhun yá de:

¿Na vé naní ró?

Te ni cahān de:

Legión naní ná, chi cuehē tachí ñuhun ini ná, áchí de.

<sup>10</sup>Te ni cahān ndahú ndasí de jín yá jeē ma táji yá tachí quendacoo región ún. <sup>11</sup>Te yajni yucu yúcuan cáhiin cuehē quini cájitu ti. <sup>12</sup>Te tachí jeē ñuhun ini tēe un ní cacahān ndahú jín yá:

Núu tají ní sáña, te cuāha ní jñuhun quivicoo ná ini quini yúcuan, áchí.

<sup>13</sup>Te Jesús ni jēhe ya jñuhun. Te ni quendacoo tachí ún ini tēe ún, te ni quivicoo ini quini, te íyo nájnuhun uū mil tī. Te quini un ní cajinu ti ni ñingoo ti in yucáva, ni quivicoo ti nuū mar. Te ni ndaquhi ti ndute, ni cajihí tī.

<sup>14</sup>Te tēe cándito ti, ni cajinu de cuango de jeē ní cayuhú de. Te ni jinúcoo de ni cacastuhún de nuū ñayuu ñuu un jín ñayuu tāca rancho. Te cuango ñayuu un cuácondéhé i na vé ni cuu. <sup>15</sup>Te ni jinúcoo i nuū ine Jesús, te ni cajito i nuū tēe ni ñuhun cuehē tachí ini. Te néne de, te ñuhun de sahma, te je ni nducájí xini de. Te ni cayuhú ñayuu ún. <sup>16</sup>Te tēe ní cajito, ni canacani de jñuhun nuū ñayuu, ndese ni nduvāha tēe ni ñuhun tachí ini, jín ndese ni candoho quini ún. <sup>17</sup>Yúcuan na te ni caquejéé i cacahān ndahú i jín yá jeē na cújiyo ya región yúcuan quihín yā.

<sup>18</sup>Te ni ndivi ya ini barco. Te tēe ni ñuhun tachí ini un ní cahān ndahú de jín yá jeē na cuāha ya jñuhun quihín de jín yá. <sup>19</sup>Te Jesús tu ní jēhe ya jñuhun, chi ni cahān yá jín de:

Cuánuhun vehe ró núu jnáhan ró, te nacani ró jñuhun nuū i ndese yōhyo jénu jniñu ni sáha máa Jítoho rō jín ró, te ndese ni cundáhú ni yá rohó, áchí yá.

<sup>20</sup> Te ni quenda de cuahān de, te ni quejéé de nácani de jñūhun tãcá ñuu Decápolis ndese yōhyo jéñu jñiñu ni sáha Jesús jíin de. Te ndivii ñayuu un ní canaa ni i cájini nahín i.

*Jñūhun sēhe síhí Jairo jíin ñahan ní quehé yusáhma ya*

(Mt. 9.18-26; Lc. 8.40-56)

<sup>21</sup> Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū ine ya yumar. <sup>22</sup> Te ni quee ñn tēe cújéñu ini vehe ñi sinagoga, naní de Jairo. Te ná ni jito de nuū yā, te ni jecuiñi yití de nuū jehé yā. <sup>23</sup> Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquē i návāha na ndúvāha i te cotecu i, áchí de.

<sup>24</sup> Yūcuán na te cuahān yā jíin de. Te cuehē ñayuu cándiquin i ya, te ni chitú níhin i xiin ya cuango i. <sup>25</sup> Te mēhñu ñayuu un cuahān ñn ñahan cúhú, jeē ní cuu uxí uū cuiyā ndóho ña cuehyi niñi. <sup>26</sup> Te yōhyo ni ndoho ña, chí ni jexin ña tãca jéé névāha ña jíin cuehē tēe tájná, te tu ní jéjñiñu jeé ndúvāha ña, chí sa suhva víhyá gā sáha. <sup>27</sup> Te ñahan yáha ná ni nihín ña jñūhun Jesús, te ni quee ña ichi yátá yā mēhñu ñayuu cuehē ún, te ni quehé ña yusáhma ya. <sup>28</sup> Chi ni jeni ni ña: Vēsú maá sahma ya na níhín rí quehé rí, te nduvāha rí, jéni ni ña. <sup>29</sup> Te ni jecuiñi-ni niñi ña, te ni jini ña jeē ní nduvāha ña cuehyi ún. <sup>30</sup> Te Jesús ni jini yā jeē ní nduvāha ñn ñayuu jíin fuerza yā. Te ni ndió cóto ya nuū ñayuu cuehē, te ni cahān yā:

¿Ndé ñn ní quehé sahma rí? Achí yá.

<sup>31</sup> Te tēe cáscuáha jíin yá, ni cacahān de:

Jító ní jéé ñayuu cuehē yāha ní chitú níhin i xiin ní te cáquihí i níhín nñí cáni ichi, te cájnūhun ní ndé ñn ní quehé sahma ní.

<sup>32</sup> Te máá yá jító ya cháha chúcuan, cúni yā jeē na cáchi ñayuu ni sáha. <sup>33</sup> Te ñahan un yúhú ña te quisi i ña, te je jíni ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndihi ndese ni cuu jíin ña. <sup>34</sup> Te ni cahān yā jíin ña:

Sēhē, ni candíje ró jéé cuu nasávāha rí rohó, te jeé yúcuán ní nduvāha ró. Cuahán te na ndúsñi ní rō, chí je ní nduvāha ró cuehyi ní ndoho ró, áchí yá.

<sup>35</sup> Te níni cáhán gā yā súcuan, te ni quecoo ñayuu cáyúcú vehe tēe cújéñu ini vehe ñi sinagoga, te ni cacahān i jíin de:

Je ni jihí sēhe síhí ní. Te ma sajnēñu ga ní Maestro, áchí i.

<sup>36</sup> Te Jesús tu ní sáha ya cuenta jeé súcuan cacahān i, te ni cahān yā jíin tēe cújéñu ini vehe ñi sinagoga:

Ma yūhu ró, chí candíje ró jéé nastécu rí i, áchí yá.

<sup>37</sup> Te tu ní jéhe ga yā jñūhun condiquin ñayuu yā, chí máá-ni Pedro jíin Jacobo, jíin Juan ñani Jacobo. <sup>38</sup> Te ni jinū yā vehe tēe cújéñu ini vehe ñi sinagoga, te ni jito ya ñayuu, cácuvaā i, te cándahyū i, te cácana cóhó i. <sup>39</sup> Te ni quivi ya, te ni cahān yā:

¿Najehē yōhyo casávaā rō te cándahyū rō? Sūchi síhí yáha, tu ní jíhí i, chí quixí-ni i, áchí yá.

<sup>40</sup> Te ni cajecū catá i jeē ní cáhán yā. Te ni quenehen ndihi ya i cuahān i nuū quehé. Te ni cana ya máá-ni tátá jíin náná sūchi síhí un, jíin tēe cáhín jíin yá, te ni quivi ya jíin de nuū catú sūchi síhí ní jihí ún. <sup>41</sup> Te ni jñi ya ndaha i, te ni cahān yā jíin i:

Talita cumi, áchí yá. Te jñūhun un cúni cahān: Síhí, cáhán rí jíin rō, ndocuñi, áchí yá.

<sup>42</sup> Te ni ndocuñi-ni sūchi síhí un, te ni nacaca i, chí je íyó i uxí uū cuiyā. Te yōhyo ni canaa ni ñayuu cájito i. <sup>43</sup> Te ni ndacu níhin ya jñiñu

nuū i jijnáhan i jeē ma cáchi cuiti i nuū ni in. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ñuu yā. Te tēe cáscuáha jín yá cuangoo de jín yá. <sup>2</sup> Te máa quiví ndétatu ní steén yā jnūhun iní vehe íi sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnūhun yáha? ¿Te ndese cúu jeē cahán de jnūhun ndíhí yáha jín jéé sáha de jniñu jéhu yáha? <sup>3</sup> Chi tēe yáha cúu carpintero, te sēhe María cúu de, te ñani Jacobo jín José jín Judas jín Simón cúu de. Te suni cáyūcu cuáha de jín yó yāhá. Achí i.

Te súcuan ni cacujéē ni i nuū Jesús. <sup>4</sup> Te ni cahān yā jín i:

Tāca tēe nácani jnūhun Yaā Dios, íyó yíñúhún ñayuu jín de, chí máni ñayuu ñuu maá de, jín jnáhan de, jín ñáyuu vehe de cúu jeē tu íyó yíñúhún jín de. Achí yá.

<sup>5</sup> Te tu ní cúu sáha ya cuehē jniñu jéhu yūcuán. Chí jecu-ni ñayuu cácuñu ní soó yá ndaha ya siquí i, te ni nasávāha ya i. <sup>6</sup> Te nāá ni yā jító ya jeē tu cácaníje ñayuu jijnáhan i. Yūcuán na te ni jica cuu ya tācá ñuu yajni, ni steén yā jnūhun.

*Jeē ní tají yá ndihúxí uū de cuanacani de jnūhun*

*(Mt. 10.5-15; Lc. 9.1-6)*

<sup>7</sup> Te ni cana ya ndihúxí uū tēe cáscuáha jín yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. <sup>8</sup> Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chí máa vara-ni condahá de. <sup>9</sup> Te quihí de ndijēn, te ma quihín de jín úu

sahma, áhí yá. <sup>10</sup> Te suni ni cahān yā jín de:

Na-ni vehe núu ni quivicoo ró, te yūcuán coyūcu ró ndé quenda tucu ró quihín rō inga ñuu. <sup>11</sup> Te núu in ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yūcuán, te scóyo ró ticachā jehē rō, te súcuan stéén rō jeē íyó cuéchi i jeē tu ní cájetáhú i. Jendaá cahán rí jín ró jeē quiví coo juicio te xeēn gā coo castigo siquí ñuu casáha súcuan vésú siquí ñuu Sodoma jín ñuu Gomorra nuū ní casáha ndasí ñáyuu cuéchi.

<sup>12</sup> Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i. <sup>13</sup> Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduvāha i.

*Jeē ni jhí Juan tēe scuándute  
(Mt. 14.1-12; Lc. 9.7-9)*

<sup>14</sup> Te rey Herodes ni jini jnūhun de jnūhun Jesús, chí ni jité núu jnūhun ya ní cáhnu. Te ni cahān de:

Tēe yūcuán cúu Juan tēe ni scuándute, te ni natecu de. Jeē yūcuán íyó poder de sáha de jniñu jéhu. Achí de.

<sup>15</sup> Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chí in tēe nácani jnūhun Yaā Dios cúu de, nájnūhun tēe ni canacani jnūhun ya nde jenahán, áhí i.

<sup>16</sup> Te ná ni jini Herodes, te ni cahān de:

Tuú chí yūcuán cúu Juan jeē ní ndacu ri jniñu ni tahndé xiní, te ni natecu de núu súcuan, áhí de.

<sup>17</sup> Chí máa Herodes ni ndacu de jniñu jeē na quiví Juan vecāa, jín jéé na cónuhní de jín cadena. Súcuan ni sáha de jeē siquí Herodías, ñasíhí ñani de Felipe. Chí Herodes ni quihin de ña jeē cúu tucu ña

ñasihí de. <sup>18</sup> Te Juan ni cahān de nuū Herodes:

Tu iyó ley jeē cóndeca ró ñasihí ñani rō, achí de.

<sup>19</sup> Te jeē yúcuān Herodías ni jito uhū ña Juan, te cúni ña jeē na cúu de, te tu ní nihín ña modo. <sup>20</sup> Chi Herodes yúhú de cahni de Juan, chi jíní de jeē tē ndaā tē ndoo cúu Juan. Te jeē yúcuān ní jesi de jeē nducú ña jeē cúu Juan. Te núnjahan ni de jíní nahín de jnūhun cáhán Juan, vesú tu jécūhun vāha ni de.

<sup>21</sup> Te ni quee ñn quiví jeē ní cundeyí Herodías. Chi ní sáha Herodes ñn vico quiví ní cacu de, te ni jēhe de jeē ní cacuxíni tē cándiso jníñu nuū de, jín tēe cácuu capitán, jín tēe cácuajéñu región Galilea. <sup>22</sup> Te ni quiví sēhe síhí máá Herodías, ni jita jéhé i nuū chítú un. Te ni cacusñ ni rey Herodes jín tēe cácuixíni jín de. Te ni cahān de jín súchi síhí un:

Cacān na vé cuní rō, te cuāha ri nuū rō, achí de.

<sup>23</sup> Te ni cahān teyí de jeē cuāha de núu na vé cuní i cacān i, vesú nde sava región jeē yñi ndaha de. <sup>24</sup> Te ni quenda i, ni jecajñūhún i náná i: ¿Na vé cacān na núu de? achí i.

Te ni cahān ña:

Xiní Juan tēe scuándute cacān rō nuū de, achí ña.

<sup>25</sup> Yūcuān na te ni ndiví-ni i nuū rey, te ni cahān i:

Cúni na jéē vijna ñúhún-ni cuāha ní xiní Juan tēe scuándute, cone nuū ñn cohō, achí i jín de.

<sup>26</sup> Yūcuān na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ní jéjñūhun téyí de, jín jéē ní cajini sōho tēe cáyeji staā jín de, jeē yúcuān tu ní cúni de sásáhán de jeē ní jícān i. <sup>27</sup> Te ni tají-ni de ñn soldado jeē quíquihín de xiní Juan. <sup>28</sup> Te ni jehēn soldado un vecāa, te ni jehnde de xiní Juan. Te ni quee de jín xiní Juan, íne nuū ñn cohō. Te ni jēhe de nuū súchi síhí un, te máá i ni jēhe i nuū naná i.

<sup>29</sup> Te tēe cáscuáha jín Juan ni canihín de jnūhun, te ni jengoo de, ni candonehen de yiqui cúñu Juan, te ni cachindūji de.

*Jeē ni scáji yā uhūn mil tēe*

(Mt. 14.13-21; Lc. 9.10-17; Jn. 6.1-14)

<sup>30</sup> Yūcuān na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā táca jniñu ni casáha de, jín jnūhun ni castéén de. <sup>31</sup> Te ni cahān yā jín de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jín de. <sup>32</sup> Yūcuān na te ni quiví ya ñn barco jín táca tēe apóstol un, te cuangoo sñn ya jín de ñn lugar nuū tú ñayuu. <sup>33</sup> Te cuehē ñayuu ni cajito i jeē cuahán yā jín de, te ni canacuni i jeē máá yá cúu. Te nde táca ñuu ni quendacoo i, te yachí cuangoo i, te xihna gā i ní jinūcoco vesú máá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájñūhun lanchi jeē tú jitoho tī. Te ni steén yā cuehē jnūhun nuū i. <sup>35</sup> Te nuū ní ini, te tēe cáscuáha jín yá, ni quecoco de nuū yā, te ni cacahān de:

Je ni ini, te yāhá chi tú na ñayuu yúcu. <sup>36</sup> Núu súcuān te tají ní ñayuu na quíngoo i táca rancho jín ñuu yajni, te cuaan i staā caji i, chi tú na vé cándiso i caji i, achí de.

<sup>37</sup> Te ni cahān Jesús jín de:

Cuāha máá ró jeē cáji i, achí yá.

Te ni cacahān de:

¿Te ndese cuu? Chi ni ma cúu vesú núu quicuaan ná ndé uñ ciento denario staā caji ñayuu, achí de.

<sup>38</sup> Te ni cahān yā jín de:

¿Nasaa staā cánevāha ró? Cuacondēhe, achí yá.

Te nuū ní cajini de, te ni cacahān de:

Uhūn-ni staā jīn ū chācá íyó, áchí de.

<sup>39</sup> Yūcuán na te ni cahān yā jīn ñáyuu jeē na cūcōo sīn i cuenta grupo nuū íte. <sup>40</sup> Te ni cacucōo sīn ciento ciento i, jīn cincuenta cincuenta i. <sup>41</sup> Te ni quihin ya ndihúhún staā jīn ū chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jehe ya nuū tée cáscuáha jīn yá, te máá de ni casaja de nuū ñáyuu cuehē ún. Te suni ni jehe ya ndíndúú chācá, ni casaja de nuū i. <sup>42</sup> Te ndivii i ni cayejí, te ni candutú chíjí i. <sup>43</sup> Yūcuán na te ni canastútú de pedazo staā jīn cháca jéē ní quendōo, te ni chitú úxí uū jīca. <sup>44</sup> Te tēe ni cayejí, chi uhūn mil de cúu.

*Jeē ní jica jéhé yá nuū mar*  
(Mt. 14.22-27; Jn. 6.16-21)

<sup>45</sup> Yūcuán na te ni cahān-ni Jesús jīn tée cáscuáha jīn yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natajé yá ñáyuu quinhun i, te sáá te suni quihīn yā. <sup>46</sup> Te nuū ní cuu ni natajé yá i, te ni caa ya yucu cuacacān tahú yā. <sup>47</sup> Te jeē ní cuaa, te barco un je ni cuu sava nuū mar cuahān, te mañúhún-ni ya ni quendōo nuū ñíhūn ichi. <sup>48</sup> Te ní jito ya jeē yóhoyo jnūndóho cáscáca de barco, chí nīhin vējí tachī ichi núú de. Te jeē yínee gā ni quee ya nuū de, jīca jéhé yá nuū mar. Te yāha ya nuū de quihīn yā nuú. <sup>49</sup> Te ni cajito de jeē jīca ya nuū mar, te ni cajeni ní de jeē jihná cúu, te ni cacana cóhó de. <sup>50</sup> Chí ndihí de ní cajito nuū yā, te ni cayūhú ndasí de. Te ni cahān-ni ya jīn de:

Ndeyí coo ni rō, te ma yūhu ró, chí máá rí cúu, áchí yá.

<sup>51</sup> Te ni quívi ya ini barco un, te ni jecuñi-ni tachí. Te yóhoyo ni canaa ní de cájito de. <sup>52</sup> Chí cándāa néé gá jeē níjnūní de, chí ní jīn jniñu

jéhnu jeē ní nducuehē staā, tu ní cájecūhun ni de jeē maá yá cúu Yāā ní tají Yāā Dios.

*Jeē ní nasávāha ya ñáyuu cácuñū*  
*región Genesaret*  
(Mt. 14.34-36)

<sup>53</sup> Te ni quenda jíyo ya jīn de nuū mar ún, ní jinū yā región Genesaret. Te yundúte un ní cajihni de barco. <sup>54</sup> Te nuū ní quenda ya jīn de ini barco, te ñáyuu yūcuan ni canacuni-ni i ya. <sup>55</sup> Te yachí ni jengoo i táca ndañūú yūcuán, te ni caquindeca i ñáyuu cácuñū, cáyosó i nuū camilla, vējicoo ñáyuu nuū ní jito i íne ya. <sup>56</sup> Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñáyuu cácuñū yuhíchi, te cácahān ndahú i jīn yá jeē na quéhé i vēsú yusáhma ya. Te táca ñáyuu jeē ní caquehé sahma ya, ni canduvāha-ni i.

*Siquí ndese cújnehén ñáyuu*  
(Mt. 15.1-20)

## 7

<sup>1</sup> Yūcuán na te tēe grupo fariseo jīn jecu tēe cástéén tutu ley Yāā Dios, ni quendacoo de ñuu Jerusalén, te ni quecoo de nuū Jesús. <sup>2</sup> Te tēe un ní cajito de jeē sava tēe cáscuáha jīn Jesús, ni cayejí jnehén de staā, chí tu ní cáscuicu de costumbre jeē nándahá de nuū Yāā Dios. Te ni cacahān siquí de. <sup>3</sup> Chí tēe fariseo jīn ndihí ñáyuu hebreo, névāha i costumbre jenahán jéē ma cáji i staā núu tu nandahá váha i xīhna gā. <sup>4</sup> Te núu ni ndecoo i jeē ní jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquicu i, nájnūhun jeē ndúndoo taza, tindohō, cohō cáa, jīn jito. <sup>5</sup> Te tēe fariseo jīn tēe cástéén tutu ley Yāā Dios, ni cacajnūhún de ya:

Tēe cáscuáha jíin ró, ¿naun tu cáscuicu de costumbre ñayuu jenahán? Chi sa cáyeji jnehén de staā, achí de.

<sup>6</sup> Te ni cahān yā jíin de:

Ndaā ni nacani Isaías jnūhun siquī rō jijnáhan ró jēē tēe stáhú-ni cácuu ró. Chi súcuan ni tee de jnūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū,

te nasūu ndé jíin ini jíin ánuá i.

<sup>7</sup> Te cáchiñúhún sáa-ni i ruhū, chi jnūhun cástéén i cúu jniñu ní candacu tēe,

te nasūu jēē ní ndacu máá rí cúu.

Achí Yaā Dios. Achí Isaías. <sup>8</sup> Súcuan cácuu ró, chí ni casiaā rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tindhō jíin taza. Te cuehē gā costumbre súcuan cáscuicu ró, achí yá.

<sup>9</sup> Te suni ni cahān yā:

Cásiáá rō jniñu ní ndacu Yaā Dios, návaha squícu ró costumbre ni cajequin máá ró. <sup>10</sup> Chi Moisés ni cahān de: Coó yíñúhún ró jíin tátá rō jíin náná rō. Te núu ndé iin cahān siquī tátá chí síquī naná, na cúu nahín. Achí Moisés. <sup>11</sup> Te máá ró chí cácahān rō jeē cuu cahān iin tēe jíin tátá de náná de: Ma cúu chindéé ñáhán ná nihín cuáha na jēē cáji ni jēē cúhun ní, chí ndihí jeē névaha ná, chí Corbán cúu, achí ró. (Te jnūhun Corbán cuní cahān jeē ní sócō nuū Yaā Dios.) <sup>12</sup> Te cácahān rō jeē núu súcuan cahān iin tēe, te tuá cánuú chindéé ñáhán de tátá de náná de. <sup>13</sup> Te súcuan cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cása ha ró, achí yá.

<sup>14</sup> Te ni cana tucu ya ñayuu cuehē ún, te ni cahān yā jíin i:

Cuni sōho vāha ró jijnáhan ró, te chuhun ni rō: <sup>15</sup> Tāca jēē iyó, te núu ni quívi yuhu ñayuu te tu cújnehén

i sáha. Chi jeē quénda ini anuá ñayuu, yūcuan cúu jeē cújnehén i sáha. <sup>16</sup> Tāca rōhó jēē jíni sōho, na chúsóhó ró, achí yá.

<sup>17</sup> Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñúhún de ya siquī jnūhun yátá yáha jēē ni cáhān yā. <sup>18</sup> Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēē quívi ini ñayuu, ma cúu cújnehén i sáha? <sup>19</sup> Chi tu quívi ini anuá i, chí chíji i quívi, te quénda-ni cuahān, achí yá.

Súcuan ni steén yā jeē tāca jēē yéji ñayuu, tu cújnehén ánuá i sáha. <sup>20</sup> Te ni cahān gā yā:

Jeē quénda ini anuá ñayuu, yūcuan cúu jeē cújnehén i sáha. <sup>21</sup> Chi nde ini anuá ñayuu quénda jeē jéni néé ni, jeē casíquí ndéē jnāhan, jeē jíca jnéni, jeē jéhni ndívi, <sup>22</sup> jeē sacuíhná, jeē ndíyo ni ndajniñu jnāhan, jeē sáha néé, jeē stahú jnāhan, jeē máni cuéchi sáha, jeē cucuésún ni, jeē cahán yā siquī jnāhan, jeē sandúxi máá, jeē canéé xíní. <sup>23</sup> Tācá jniñu néé yáha, máni ini anuá ñayuu quénda, te cújnehén i sáha, achí yá.

*Ñahan inga nación jeē ní candíje nihin*

(Mt. 15.21-28)

<sup>24</sup> Te ni quenda ya yūcuan cuahān yā región Tiro jíin Sidón. Te ni quívi ya iin vehe, te cuní yā jeē tú ni iin ñayuu cuní jeē íne ya yūcuán. Te vésú súcuan, te tu ní cúu cone sáhi yá. <sup>25</sup> Te iin ñahan íyo séhe síhí ña jeē ñúhun tachí ini i, ni nihín-ni ña jnūhun jeē íne ya. Te ni quee ña, te ni jecuíñi yití ña nuū jehé yá. <sup>26</sup> Te ñahan ñuu jicá cúu ña, chí nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. <sup>27</sup> Te ni cahān Jesús jíin ña:

Nasūu núu máá ní vēji ná, chí máni nuū ñayuu cácuu séhe Israel.

Chi tu íyó váha jeē quénde yō staā sēhe te cuāha yó nuū ina, achí yá.

<sup>28</sup> Te ni cahān ña:

Jendaá cahān ní Tátá, te chindéé ñáhán ní sáña vēsú cúu ná nájñūhun ina. Chi suni máá tí cáhiin tí chíji mesa, cániñin tí staā cuechí jéé cóyo yuhu sūchi lúlí cáyeji tí, achí ña.

<sup>29</sup> Yūcuán na te ni cahān yā jíin ña:

Váha ni cahān ní. Cuáhán ní núu súcuán, chi je ni quenda tachí ún ini sēhe síhí ní, achí yá.

<sup>30</sup> Te ni najinū ña vehe ña, te ni jito ña jeē catú sēhe síhí ña nuū jito, te je ni quenda tachí ún ini i.

*Jeē ní nasávāha ya ñn tēe sóhó cástété*

<sup>31</sup> Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea.

<sup>32</sup> Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquí de. <sup>33</sup> Te ni quenehen sín ya de nuū ñáyyuu cuehē ún, te ni chune ya xini ndáha ya sōho de, te ni tesíhi yá, te ni quehé yá yaá de. <sup>34</sup> Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

<sup>35</sup> Te ni nanune-ni sōho de, te ni nduvāha yaá de, te ni nacahān vāha de. <sup>36</sup> Te ni ndacu ya jniñu nuū ñáyyuu un jéé ma cáchi i nuū ní ñn. Te vēsú ni cahān ñihin ya jíin i, te víhyá gā ni cajete i jñūhun. <sup>37</sup> Te yōhyo ni canaa ni i cájito i, te ni cacahān i:

Váha sáha ya tǎcá jniñu, chi nde tēe cásohó, cánacuni sōho de, te tēe cándāa ñhín, cánacahān vāha de sáha ya, achí i.

*Jeē ni scáji yā cuūn mil ñayuu*  
(Mt. 15.32-39)

## 8

<sup>1</sup> Te tiempo un ní candutútú cuehē ndasí ñáyyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

<sup>2</sup> Cúndáhú ni rí ñayuu yāhá, chi je ni cuu uní quiví cáyūcú i jíin rí, te tuá na vé caji i. <sup>3</sup> Te núu natají rí i quinuhun ndite i vehe i, te cuíta í i sava ichi, chi íyó sava i jeē jicá véjicoo i, achí yá.

<sup>4</sup> Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yúcu, achí de.

<sup>5</sup> Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

<sup>6</sup> Yūcuán na te ni cahān yā jíin ñáyyuu cuehē un jéé na cúcoo i. Te ni quihin ya ndihúxá staā ún, te ni nacuatáhú yá nuū Yā Dios. Te ni tahú cuechí yá, te ni jēhe ya nuū tēe cáscuáha jíin yá. Te máá de ni casaja de nuū ñáyyuu cuehē ún. <sup>7</sup> Te suni cándiso de jecu chācá lúlí. Te ni nacuatáhú yá siquí, te ni cahān yā jeē suni saja de jíināhan de. <sup>8</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. <sup>9</sup> Te tēe ni cayeji un, íyó nájñūhun cuūn mil de. Te ni nacuatáhú yá nuū ñáyyuu ún, te cuanungoo i. <sup>10</sup> Yūcuán na te ni ndiví-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhnu nuū yā*

(Mt. 16.1-4; Lc. 12.54-56)

<sup>11</sup> Yūcuán na te ni quecoo tēe grupo fariseo, te ni caquejéé de stíchí de Jesús. Te cácuni de coto ndee de ya, te ni cajicān de jeē sáha ya ñn jniñu jéhnu jeē coo ñn seña ichi ándiví. <sup>12</sup> Te ni jitū ni yā siquí jeē tu cácandíje de jíināhan de, te ni cahān yā:

¿Naun cájicān ñayuu yáha ñn jniñu jéhnu nuū rí? Jendaá cahān rí jeē ma stéén rí ni ñn jniñu jéhnu nuū ñáyyuu yāhá.



13 Te ni squéndōo ya de jijnáhan de, te ni ndivi tucu ya ini barco, te cuahān yā inga lado mar.

*Jnūhun levadura tēe fariseo*

(Mt. 16.5-12)

14 Te tēe cáscuáha jín yá ni canaa ni de condiso de jeē cáji de, chi ñn-ni pan cánevāha de ini barco.

15 Te ni ndacu ya jniñu nuū de:

Coto má candíje ró levadura tēe grupo fariseo jín levadura Herodes, achí yá.

16 Te ni cacahān tēe cáscuáha un jín táca jnāhan de:

Va siquī jeē tú na staā ndiso yó, jeē yúcuan cáhán yā súcuan, achí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuan siquī jeē tú na staā cándiso ró? ¿A ná tu cuni ró, á ná tu jecūhun ni ró jeē tu ní cáhān rī súcuan siquī jeē tu cándiso ró stáa? ¿A yóhoyo uun ni ró candíje ró? 18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni ró? 19 Chi ná ni tahu cuéchí rī uhūn staā ni cayejí uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, achí de.

20 Te suni súcuan ná ni tahu cuéchí rī uxā staā ni cayejí cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, achí de.

21 Te ni cahān yā jín de:

Te nde vijna ¿á ná tu jecūhun ni ró jijnáhan ró?

Súcuan ni cahān yatá yá jeē ma cándíje de jnūhun stáhu cástéén tēe ún.

*Jeē ní nasávāha ya tēe cuáa ñuu Betsaida*

22 Yūcuán na te ni jinū yā jín de ñuu Betsaida. Te ni caquindca ñayuu ñn tēe cuáa núu yā, te ni cacahān ndahú i jín yá jeē na tēe ya ndaha ya nuū de. 23 Yūcuán na te

ni jñi ya ndaha tēe cuáa un, te ni quenehen ya de yatā ñūu ún. Te ni tee ya tesíhi yá tñūu de, te ni tee ya ndaha ya siquī. Te ni cajñūhun yá de núu cuu coto de jecu. 24 Te ni ndacoto de, te ni cahān de:

Jíto ná ñayuu jeē cájica i, te tu jíto cáji ná, chi ná cáa yujnu cáa i, achí de.

25 Yūcuán na te ni tee tucu ya ndaha ya siquī tñūu de. Te ni ndacoto vāha de, te ni nduvāha-ni tñūu de, te ni jito cáji de ndihi-ni. 26 Te ni natajái yá de quinuhun de vehe de, te achí yá:

Ma quívi ró ñuu, ni ma cáchi cuiti ró nuū ní ñn, achí yá.

*Jeē ni cáhān Pedro jeē Jesús cúu Cristo*

(Mt. 16.13-20; Lc. 9.18-21)

27 Yūcuán na te Jesús jín tēe cáscuáha jín yá, cuahān yā táca ndañūu Cesarea Filipino. Te ichi un ní cajñūhun yá de:

Ruhū, ¿ndé ñn cúu ri cacahān ñayuu?

28 Te ni cacahān de:

Sava i cacahān jeē cúu ní Juan tēe ni scuándute. Te sava ga i cacahān jeē cúu ní Elías, tēe ni nacani jñūhun Yaā Dios nde jenahán. Te sava ga i cacahān jeē inga tēe ni nacani jñūhun Yaā Dios cúu ní.

29 Yūcuán na te ni cajñūhun yá de: Te máa ró, ¿ndé ñn cúu ri cacahān ró?

Te ni cahān Pedro:

Máa ní cúu Cristo, Yaā ní tají Yaā Dios, achí de.

30 Te ni ndacu ya jniñu nuū de jijnáhan de jeē ma cáchi de jñūhun yáha nuū ní ñn ñayuu.

*Jeē ní castūhún Jesús jeē cúu yā*

(Mt. 16.21-28; Lc. 9.22-27)

31 Te ni quejé yá steén yá nuū de: Máa rí, Yaā ní nduu tēe, cánuu ndoho xeēn rī. Te táca tēe jéhu jín sūtū cácujeñhu jín tēe cástéén tutu ley, squéhichí de ruhū, te cahni de ruhū. Te nuū uní quívi te natecu rí, achí yá.

<sup>32</sup> Te cájı ní cahān yā jnūhun yáha. Yūcuán na te Pedro, ni cana máñúhún de ya, te ni quejéé de cáhán de nuū yā jeē ma cuáha ya jnūhun coo súcuan. <sup>33</sup> Te máá yá ni ndıó cóto ya ni jito ya nuū téé cáscuáha jíın yá. Te ni cahān yā nuū Pedro:

Cujiyo quihīn rō, chi cáhán rō ná cáhán Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achı yá.

<sup>34</sup> Te ni cana ya tēe cáscuáha jíın yá jíın ñayuu cuehē ún, te ni cahān yā:

Na-ni ñayuu núu cúnı i condiquīn i ruhū, na cási i jeē cúnı maá i, te na cóndiquīn i ruhū te cuáha i jnūhun ndoho i jnūndóho jeē síquı rı, vēsú na cúu i. <sup>35</sup> Chi núu ndé ñayuu cúnı i cácu i nuū jnūndóho quiji nuū i jeē síquı ruhū, núu súcuan te jnahnú ndetū i ní cáni. Te núu ndé ñayuu, vēsú na cúu i jeē síquı ruhū jíın síquı jeē scáca i jnūhun jeē jnáma ri ñayuu, núu súcuan te cotecu i ní cáni. <sup>36</sup> ¿Chi ndé cuajníñu vēsú na cúndeyı ñayuu nihīn i ní ñayıví, te núu quıví i nuū jnahnú ndetū i? <sup>37</sup> Chi tú na jíın cuıti chunaa ñayuu jeē cácu ánuá i. <sup>38</sup> Te ñayuu yáha tu cácanđıje cuıti i, te máni máá cuéchi cásaáha i. Te núu na-ni ñayuu cúcanu i nuū ñayuu yáha jeē síquı ruhū, Yaā ní nduu tēe, jíın síquı jnūhun cáhán rı, sunı súcuan cucanu rı jeē síquı máá i, quıví ndıji ri jíın táca ndajéhé ndoo rı. Te quıví ún chi yōhyo luu cujéhnu ri nájnūhun cújéhnu Tátá rı. Achı yá.

## 9

<sup>1</sup> Te sunı ni cahān yā jíın de jíınáhan de:

Jendaá cahán rı jíın ró jeē sava tēe cáhīn yáha, ma cúu de chi nde cunı de jeē ndácu Yaā Dios jniñu jíın poder yá, achı yá.

*Jeē tucu ni nduu ya*  
(Mt. 17.1-13; Lc. 9.28-36)

<sup>2</sup> Yūcuán na te nuū iñú quıví te Jesús ni jeca ya Pedro jíın Jacobo jíın Juan, cuahān sún ya jíın de ñin yucu súcún. Te yūcuán, tucu ni nduu ya nuū de. <sup>3</sup> Te sahıa ya ni ndındéé, te ni nducujín quıyı, nájnūhun yuhvā volcán. Te tú ni ñin ñayuu ñayıví yáha cuu nacate jeē ndúquıyı ndası súcuan. <sup>4</sup> Te ni cajito de jeē Elıas jíın Moisés cándajnūhún de jíın yá. <sup>5</sup> Yūcuán na te ni cahān Pedro jíın Jesús:

Maestro, nacā jeē váha jeē cáhīn na yáha. Te na sáha ná únı vehe ramada, ñin cuu máá ní, inga cuu Moisés, te inga cuu Elıas, achı de.

<sup>6</sup> Chi yōhyo ni cayūhu tée cáscuáha ún, te Pedro tu ní sáha de cuenta na vé cúu jeē cahán de. <sup>7</sup> Te ni quiji vicō nūhun ní jesi-ni nuū de. Te nuū vicō un ní cahān ñin jnūhun:

Yáha cúu Sēhe ri jeē manı ndası rı jíın. Te na cúnı nahın ró jnūhun cáhán yá. Achı.

<sup>8</sup> Te ni candacoto-ni de, te tuá tēe un ní cájito de, chi máá ñin na Jesús.

<sup>9</sup> Te ni cananuu de jíın yá yucu ún. Te ni ndacu nīhin ya jniñu nuū de jeē ma cáchi de nuū ní ñin jeē súcuan ni cajito de, chi nde na nátecu maá yá, Yaā ní nduu tēe, achı yá. <sup>10</sup> Jeē yúcuan ní cachuváha de táca jéé ní cuu ún, te cácajnūhun jnáhan de na jnūhun cúu jeē nátecu yá. <sup>11</sup> Te ni cacajnūhún de ya:

Te tēe cástéén tutu ley Yaā Dios, ¿najehē cácahán de jeē cánuú ndıji Elıas xıhna gā, te sáa te quiji Yaā cúu Cristo? achı de.

<sup>12</sup> Te ni cahān yā:

Jendaá cúu jeē xıhna gā quiji ñin tēe cúu nájnūhun Elıas, te sátūhva de ndıhi, achı tutu. ¿Te ndese cáhán tucu tutu ñı síquı ruhū, Yaā ní nduu tēe? Cáhán jeē ndoho xeēn rı, te sájéé ni i nuū rı. <sup>13</sup> Te cáhán rı jíın ró jeé jé ni quiji tēe ni cuu nájnūhun Elıas, te ni casáha ndeváha ñayuu

jiín de tāca jēē ní cacuu ni maá i, nájnūhun cáhán jnūhun de nuū tútu, áchí yá.

*Jeē ní nasávāha ya ñn sūchi ñūhun tachī ini*

(Mt. 17.14-21; Lc. 9.37-43)

<sup>14</sup> Te ni najinū yá jiín de nuū sava ga tēe cáscuáha jiín yá, te ni cajito ya ñayuu cuehē ndasí, ni cajicó ndūú i de. Te suni cáhīn tēe cástéén tutu ley Yaá Dios, cátejñáhan jiín de. <sup>15</sup> Te nuū ní cajito tāca ñayuu un jēē véji ya, te ni canaa ni i. Te cájinu i cuangoo i nuū yá jeē cahān i jiín yá. <sup>16</sup> Te ni cajnūhun yá i:

¿Na siquī cátejñáhan ró jiín de jíjnáhan de? áchí yá.

<sup>17</sup> Te ni cahān ñn tēe íne yūcuán:

Maestro, vendeca ná séhe ná núū ní, chí ñūhun ñn tachī ini i, te ni cuñhín i ní sáha. <sup>18</sup> Te ndé-ni cúu nuū íne i, te tachī un scótúú i, te jéhni yihí-ni i. Te jée tiñū yuhu i, te squihñi jnúhun i. Te cuacuxií ndasí i sáha. Te ni cahān ndahú ná jiín tēe cáscuáha jiín ní jeē na quēnehen de tachī ún, te tu ní cúu sáha de, áchí de.

<sup>19</sup> Te ni cahān yá jiín de jíjnáhan de:

Ñayuu tu cándije cuiti cácuu ró. ¿Nasaa ga quiví condee rī jiín ró? ¿Te nasaa ga quiví cuandeyí ni rī jiín ró? Cuáquihin sūchí un, na quíji i, áchí yá.

<sup>20</sup> Te ni caquindeca de i nuū yá. Te nuū ní jito tachī un núū yá, te ni jehni yihí-ni i. Te ni cotúú i, te cónéhén cócáni i, te jée tiñū yuhu i.

<sup>21</sup> Te Jesús ni cajnūhun yá tatá i:

¿Nasaa cuiyā ni cuu jeē sáha súcuan jíjn i?

Te ni cahān de:

Nde lulí i. <sup>22</sup> Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jēē ndúvāha séhe ná, áchí de.

<sup>23</sup> Te ni cahān Jesús jíjn de:

Núu cuu cándije ró jēē sáha ri, chí ñayuu cándije te cuu tāca jēē cuní i, áchí yá.

<sup>24</sup> Te maá tátá sūchí un ní cahān jee de:

Cándije ná, te chindéé ñáhán ní sãña jēē cándije ñihin ga ná, áchí de.

<sup>25</sup> Te ni jito Jesús jeē ní cutútú cuéhē ñayuu nuū yá. Te ni cahān yá nuū tachí:

Tachí jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

<sup>26</sup> Yūcuán na te ni cana cóhó táchī ún, te ni jehni yihí tucu i, te ni quenda cuahān. Te sūchí un ní cuu i nájnūhun ndívi. Te ni cacahān cuehē ñayuu jeē jé ni jihí i. <sup>27</sup> Te Jesús ni jñi ya ndaha i, te ni ndonehen ya i, te ni nucuiñi-ni i.

<sup>28</sup> Yūcuán na te ni quívi ya ini ñn vehe, te tēe cáscuáha jiín yá, ni cacajnūhun sñn de ya:

¿Najehē tu ní cúu quenehen ná tachí un jíjnáhan ná? áchí de.

<sup>29</sup> Te ni cahān yá:

Ín tachí súcuan chí ma quénda cuiti te núu tú cacān tahú rō te coo ndite ni rō, áchí yá.

*Jeē ní cahān tucu ya jeē cúu yá*

(Mt. 17.22-23; Lc. 9.43-45)

<sup>30</sup> Te ni quenda ya yūcuan jíjn de jíjnáhan de, te ni yáha ya ndañū Galilea cuahān yá. Te tu ní cúní yá jeē cúní ni ñn ñayuu. <sup>31</sup> Chí stéén yá nuū tēe cáscuáha jiín yá, te áchí yá:

Máá rí, Yaá ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rí, te nuū uní quiví te natecu rí, áchí yá.

<sup>32</sup> Te tu ní cájecūhun ni de jnūhun yáha, te cáyūhú de cajnūhún de ya siquí jnúhun ni cahān yá.

*Nde ñayuu cúu jeē cujéhu ga*

(Mt. 18.1-5; Lc. 9.46-48)

<sup>33</sup> Te ni jinū yá jíjn de ñuu Capernaum, te nuū ní quívi ya ini vehe, te ni cajnūhun yá de:

¿Na jnūhun ni candajñūhun ró ichi véji yó? áchí yá.

<sup>34</sup> Te tu ní cacahān cuiti de, chi ichi un ní cacahān de siquī nūu ndé ñn de cújéhu ga. <sup>35</sup> Yūcuán na te ni cucōo ya, te ni cana ya ndihúxí uū de, te ni cahān yā:

Nūu ndé ñn ró cúní cujéhu ga, na cúu ró tée nūu ga nuū tāca jnāhan ró, te cuajniñū ró nūu jnāhan ró.

<sup>36</sup> Yūcuán na te ni jñi ya ndaha ñn sūchi lúli, te ni jeni ya i mehñú de jñjāhan de. Te ni nundee yā i, te ni cahān yā jñn de:

<sup>37</sup> Na-ni ñayuu nūu jeē siquí ruhū jetáhu i ñn sūchi lúli nájñūhun sūchi yáha, te ruhū jetáhu i. Te ñayuu jetáhu ruhū, nasūu máá ñn-ni ruhū, chí suni Yaā ní tají ruhū jetáhu i, áchí yá.

*Ñayuu tu cáhán siquí yā, ñn i jñnyá (Mt. 10.42; Lc. 9.49-50)*

<sup>38</sup> Yūcuán na te ni cahān Juan jñn yá:

Maestro, ni cajito ná ñn tée jeē jñn síhví ní quénehen de tachí ñni ñayuu. Te ni cajesí ná jéé sáha de, chí tu jíca de jñn yó, áchí de.

<sup>39</sup> Te ni cahān Jesús jñn de:

Ma cási ró jeē sáha de. Chi ni ñn tée jeē jñn síhví rí sáha de jñiñū jéhu, ma cúu nacahān de siquí rí.

<sup>40</sup> Chi tée tu cáhán siquí yó, ñn de jñn yó. <sup>41</sup> Te na-ni ñayuu nūu jeē siquí ruhū cuāha i vésú ñn ñajin ndute coho ró, siquí jeē cá candije ró ruhū, ndaā ndije cúu jeē nihín i tahū i. Achí yá.

*Xeēn coo siquí ñayuu quívi nuū cuéchi*

*(Mt. 18.6-9; Lc. 17.1-2)*

<sup>42</sup> Te nūu ñn sūchi lúli yáha cándije i ruhū, te nūu quívi i cuéchi sáha na-ni ñayuu, te vāha ga nūu ni conuhñi ñn yōso cáhnu sucūn ñayuu ún, te quēe i chíji ndute mar nuū. <sup>43</sup> Te nūu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi.

Chi vāha ga jeē cóndee ñn-ni ndaha ró te quívi ró nūu cotecu rō ní cáni, vésú jeē cóndee ndindúu ndaha ró te quívi ró infierno, nuū cayú ñuhūn jeē ma ndahvá cuiti. <sup>44</sup> Te yūcuán chi tu cájihí tindacú, te tu ndahvá cuiti ñuhūn. <sup>45</sup> Te nūu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró nūu cotecu rō ní cáni, vésú jeē cóndee ndindúu jehē rō te quívi ró infierno, nuū cayú ñuhūn jeē ma ndahvá cuiti. <sup>46</sup> Te yūcuán chi tu cájihí tindacú, te tu ndahvá cuiti ñuhūn. <sup>47</sup> Te nūu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jñiñū jñn ñn na tinūu ró, vésú jeē cóndee ndindúu tinūu ró te quívi ró infierno. <sup>48</sup> Te yūcuán chi tu cájihí tindacú, te tu ndahvá cuiti ñuhūn.

<sup>49</sup> Chi nájñūhun quénda vāha oro sáha ñuhūn, súcuan quénda vāha ñayuu sáha jññdóho. Te tāca cúñu jeē socó ñayuu nuū yā, cúhuhvuā sáha ññ. <sup>50</sup> Vāha íyó ññ, te nūu ññ ún na náa jeē uhvuá, ¿te ndese nduu uhvuá tucu sáha ró? Nūu súcuan te cuu ró ñayuu vāha, nájñūhun íyó vāha ññ. Te na cóyūcu vāha ró jñn jnāhan ró. Achí yá jñn de.

*Siquí jeē ma stóo jnāhan tée jñn ñahan (Mt. 19.1-12; Lc. 16.18)*

## 10

<sup>1</sup> Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñūhun nuū i, nájñūhun sáha ya. <sup>2</sup> Yūcuán na te jecu tée grupo fariseo ni quecoo de nuū yā, chí cácuni de coto ndee de ya nūu ndese cahān yā. Te ni cacajñūhún de ya nūu íyó ley jeē cuu ndusñn ñn tée

jíin ñasihí de. <sup>3</sup> Te ni cahān yā jíin de:

¿Na jniñu ni ndacu Moisés nuū rō nde jenahán?

<sup>4</sup> Te ni cacahān de:

Moisés ni jēhe de jnūhun jeē cúvāha ñn acta jeē ndusñn de jíin ña, te ndōo ña, áchí de.

<sup>5</sup> Te ni cahān Jesús jíin de:

Siquí jeē níhni ni rō jijnáhan ró, jeē yúcuán ní ndacu de jniñu yáha núū rō. <sup>6</sup> Te nde xīhna ñúhún, ná ni sáha Yaā Dios ndihi, chí tēe jíin ñahan ni sáha ya. <sup>7</sup> Jeē yúcuán cúu jeē stóo tēe tátá de náná de, te quiñáhan de jíin ñasihí de. <sup>8</sup> Te ñn na cuu ndíndúu de, áchí Yaā Dios. Núu súcuán te tuá cúu uū jnáhan de, chí ñn na cúu. <sup>9</sup> Jeē yúcuán tu íyó váha jeē stóo jnáhan, chí jeē ni squíjñáhan Yaā Dios cúu, áchí yá.

<sup>10</sup> Te tēe cáscuáha ún nuū ni quívicoo de vehe, te ni cacajñúhún tucu de ya siquí jnúhun ún. <sup>11</sup> Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuán te cásiquí ndé de ñasihí de. <sup>12</sup> Te núu ñn ñahan stóo ña yñ ña te condeca ña inga tēe, suni cásiquí ndé ña de. Achí yá.

*Jeē ni jicān tahú Jesús jehē sūchi lúlí*

(Mt. 19.13-15; Lc. 18.15-17)

<sup>13</sup> Yūcuán na te ni quecoo ñayuu jíin sūchi lúlí, jēe na sóo yá ndaha ya xinī i. Te tēe cáscuáha jíin yá, ni cacahān de nuū ñáyuu vējicoo jíin i. <sup>14</sup> Te ni jito Jesús, te ni quiñi ni yā, te ni cahān yā jíin de:

Cuāha jnūhun na quiñicoo sūchi lúlí jíñā nuū rī, te ma cásí rō jeē quiñicoo i. Chí ñayuu jeē ndió cóo ni i caní ni i nájnūhun sūchi yáha, suu i quiñi ndaha Yaā andiví jeē ndacu ya jniñu nuū i. <sup>15</sup> Te jendaá cahán rī jíin ró, núu ñn ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñn sūchi lúlí, ma quiñi cuiti i ndaha ya, achí yá.

<sup>16</sup> Te ni nundee ya i, te ni sóo yá ndaha ya xinī i, te ni jicān tahú yā jehē i jíináhan i.

*Jnūhun tēe cúcá*

(Mt. 19.16-30; Lc. 18.18-30)

<sup>17</sup> Yūcuán na te ni quiñin tucu ya ichi cuahān yā. Te jínu ñn tēe ni quee de, te ni jecuñi yití de nuū yā, ni cajñúhún de ya:

Tēe váha cúu ní Maestro, Te cachi ní, ¿na jniñu váha sáha ná te ñihñ tahú na cotecu na ní cání andiví? áchí de.

<sup>18</sup> Te ni cahān yā jíin de:

¿Naun cáhán rō jeē tēe váha cúu rí? Tú ni ñn tēe váha íyó, chí máa ñn-ni Yaā Dios. <sup>19</sup> Je jíni rō táca jniñu ní ndacu Yaā Dios: Ma cosiquí ndé jnáhan ró. Ma cáhni rō ndíyí. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tátá ró nuū naná rō. Achí yá.

<sup>20</sup> Te ni cahān tēe un jíin yá:

Táca jniñu yáha je ni squícu ná ndé ná lulí ná, Maestro, achí de.

<sup>21</sup> Yūcuán na te ndáhú jito ya nuū de jeē cúsiñi ni yā jíin de. Te ni cahān yā:

Ñn na jniñu cúmaní sáha ró núu súcuán. Cuáhán te xico ró ndihi jeē névāha ró, te cuāha ró núu ñáyuu ndahú. Te nde andiví cuāha ya jeē váha ndasí núū rō. Yūcuán na te quiñi ró condiquín rō ruhū, te cuāha ró jnúhun ndoho ró jnúndóho jeē siquí rī, achí yá.

<sup>22</sup> Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

<sup>23</sup> Yūcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de, achí yá.

<sup>24</sup> Te tēe cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu ténuū xūhún, yōhyo yí quívi coo i ndaha Yaā Dios jeē ndacu ya jniñu nuū i. <sup>25</sup> Yachī gā yāha ñin camello yaū yutícuí, vésú jeē quívi ñin ñayuu cucá ndaha Yaā Dios jeē ndacu ya jniñu nuū i, áchí yá.

<sup>26</sup> Te víhyá gā ni canaa ni de cájini de, te ni cacajñuhun jnāhan de:

¿Ndé ñayuu cúu jeē cácu núu súcuan?

<sup>27</sup> Te ni ndacoto ya nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, chí ndíhi-ni jniñu cuu sáha ya, achí yá.

<sup>28</sup> Yūcuán na te ni cahān Pedro jíin yá:

Sāña jíināhan ná, ní castóo ná ndíhi jeē cánevāha ná, te cándiquin na níhín, áchí de.

<sup>29</sup> Te ni cahān Jesús:

Jendaá cahān rī jíin ró jíināhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquí jeē scáca i jñuhun jeē jnáma ri ñayuu, <sup>30</sup> núu súcuan te nanihín i ñin ciento gā jeē súcuan vijna, cúu vehe, cúu ñani, cúu cuáha, cúu náná, cúu séhe, cúu ñuhun, te nde jíin jéé cóto xeēn ñayuu i. Te nde inga vida quíji te cotecu i ní cáni. <sup>31</sup> Te cuehē ñayuu jeē vijna cácujeñnu, nduu i ñayuu núu ga. Te ñayuu jeē núu ga vijna, chí ndujéñnu i, áchí yá.

*Jeē ni cahān tucu ya jeē cúu yā*  
(Mt. 20.17-19; Lc. 18.31-34)

<sup>32</sup> Te cáñuhun de ichi jeē cáa cuahān ñuu Jerusalén. Te Jesús yósnúu yá nuū téé cáscuáha ún. Te cánaa ni de ni cajini sōho de jñuhun ni cahān yā. Te cáyūhú de cuángoo de jíin yá. Yūcuán na te ni cana sín tucu ya ndíhí uū téé cáscuáha, te ni quejéé yá cástūhún tucu ya nuū de táca jéé quíji siquí yā. <sup>33</sup> Achí yá:

Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu téé, nuū sutú cácujeñnu jíin núu téé cástéén tutu ley. Te ndonda de siquí rī jeē cúu rī, te squívi de ruhū nuū téé nación Roma jeē cáyūcú Jerusalén cándacu jniñu. <sup>34</sup> Te táca téé un sácatā de nuū rī, te caní de ruhū, te tesíhí de nuū rī, te sáá te cahni de ruhū. Te nuū uní quívi te natecu rī, achí yá.

*Jeē ni jíicān Jacobo jíin Juan ñin favor nuū yā*

(Mt. 20.20-28)

<sup>35</sup> Yūcuán na te Jacobo jíin Juan, ndíndúú séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñin jeé cacān na núu ní, áchí de.

<sup>36</sup> Te ni cahān yā jíin de:

¿Ndese cácuni rō jeé sáha ri jíin ró? achí yá.

<sup>37</sup> Te ni cacahān de:

Cuáha ní jñuhun jeē cónēne ná xiin ní quívi ndujéñnu ní, ñin ná lado váha ní, te inga ná lado jecó ní, áchí de.

<sup>38</sup> Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jñúndóho nájnūhun jeē quíji siquí rī? ¿Te á canda ró ndoho xeēn rō nájnūhun ndoho ri? achí yá.

<sup>39</sup> Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jñúndóho nájnūhun jeē quíji siquí rī, te ndoho xeēn rō nájnūhun ndoho ri. <sup>40</sup> Te jeé cónēne ró lado váha ri jíin lado jecó rí, nasūu ruhū cúu jeé cuáha jñuhun. Chí je íyó túhva cuu táca téé jeé ní nacāji Tátá rī, te téé un níhín, achí yá.

<sup>41</sup> Te uxí gā téé cáscuáha un, ní cajini de jñuhun yáha, te ni caquítí ní de nuū Jacobo jíin Juan. <sup>42</sup> Te Jesús ní cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tēcá nación. Chí cándacu nihin de jniñu nuū i, te máá de cáhí ndese coo. <sup>43</sup> Te máá ró jijnáhan ró, chí ma sáha ró súcuan. Chí núu ndé ñn ró cúní cujéhu, sa suhva cuajniñu ró nuū jnáhan ró. <sup>44</sup> Te núu ndé ñn ró cúní cuu nuū, sa suhva sáha ró máá ró mozo nuū tēca jnáhan ró. <sup>45</sup> Chí suni súcuan sáha ruhū. Yaā ní nduu tēe, chí nasūu jeē véji ri jeē cuajniñu ñáyuu nuū rī, chí sa suhva véji ri jeē cuajniñu ri nuū ñáyuu. Te cuāha ri máá rí cuu rī návāha jnama ri cuehē ñayuu, achí yá.

*Jeē ní nasávāha ya Bartimeo tēe cuáá*

(Mt. 20.29-34; Lc. 18.35-43)

<sup>46</sup> Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, sēhe Timeo, néne de yuhíchi, jícan de caridad. <sup>47</sup> Te ni jini de jñūhun jeē Jesús ñuu Nazaret véji ya. Te ni quejé de cána jee de:

Jesús Sēhe yucūn David, cundáhú ni ni sáña, achí de.

<sup>48</sup> Te cuehē ñayuu ni cacahān i nuū de jeē na cásí de yuhu de. Te máá de víhyá gā ni cana jee de:

Máá ní jeē cúu ní Sēhe yucūn David, cundáhú ni ni sáña víi, achí de.

<sup>49</sup> Yūcuán na te ni jecuiñi Jesús, te ni cahān yā:

Cana de na quíj de.

Te ni cacana i tēe cuáá un:

Ndeyí coo ni rō. Ndocuiñi, na quíhín yō, chí cána ya rohó, achí i jíin de.

<sup>50</sup> Yūcuán na te ni scāne de ticāchí de, te yachí ni ndocuiñi de, te ni jinū de nuū Jesús. <sup>51</sup> Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

<sup>52</sup> Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūu de, te ni ndiquin de Jesús cuahān de jíin yá ichi ún.

*Jeē ni quívi Jesús ñuu Jerusalén*  
(Mt. 21.1-11; Lc. 19.28-40;  
Jn. 12.12-19)

## 11

<sup>1</sup> Te ni cuyajni ya ñuu Jerusalén, véji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. <sup>2</sup> Te achí yá jíin de:

Cuángoo ñuu lulí íne ichi núu. Te núu ni quívi-ni ró yūcuan, te nihin rō ñn burro núhni tī, jeē ní ñn tēe ná tu coso de ti. Te ndají ró tī, quijicoo ró jíin tī. <sup>3</sup> Te núu ndé ñn cajnūhún naun cándají ró tī, te cachi rō: Máá Jítoho yō jíni ñūhún yá tī, te yachí natají yá tī ndiji ti, achi rō. Achí yá jíin de.

<sup>4</sup> Te cuangoo de, te ni canihin de burro un núhni tī yehyí núu quéhe nuū náquijnáhan ichi. Te ni candají de ti. <sup>5</sup> Te sava ñayuu cáhlin yūcuan ní cacahān jíin de:

¿Na vé cúu jeē casáha ró jeē cándají ró burro jíin? achí i.

<sup>6</sup> Yūcuán na te ni cacahān de nájnūhun ni cachi Jesús. Te ni casiáá i ti véjicoo de jíin tī. <sup>7</sup> Te ni ndecoo de jíin tī nuū Jesús, te ni casoó de sahma de siquī tī, te ni jecosō yā tī. <sup>8</sup> Te cuehē ñayuu ni cascáa i sahma i ini ichi. Te sava ga i ní cajehnde i ndaha ñúu, te ni cachucun i ini ichi ún.

<sup>9</sup> Te ñayuu cuangoo ichi núu jíin ñáyuu cuangoo ichi yátá, cácana jee i:

Yōhoyo cújéhu ya. Yōhoyo vāha Yaā cúu Yaā jeē véji jíin jniñu máá Jítoho yō Yaā Dios. <sup>10</sup> Te yōhoyo luo coo, chí je yajni ndacu ya jniñu nájnūhun ni ndacu jíi yō rey David. Te yōhoyo cújéhu máá Yaā Dios. Achí i.

<sup>11</sup> Te ni quiví Jesús ñuu Jerusalén, jín ini templo cáhnu. Te ni jito ya nuū tācá ndajníñu yúcu ní yúcuán. Te ni quenda ya cuahān yā ñuu Betania jín ndihúxí uū de, chí je ni ini.

*Jeē ni cáhān yā nuū yújnu higo*  
(Mt. 21.18-19)

<sup>12</sup> Te inga quiví ún, nuū ní quenda ya ñuu Betania cuahān yā jín de, te jí yā sōco. <sup>13</sup> Te nde jicá ni jito ya ñin nundēhe higo jeē ín ndaha. Te ni jecondēhe yā núu sanaa te nihīn yā ndehē caji yā. Te tú na vé ni níhín yā, chí máá ndaha-ni ín. Chí nasūu tiempo ndehē cúu. <sup>14</sup> Yūcuán na te ni cahān yā nuū yujnu ún:

Tuá na ndehē cuun cuítí xinī rō jeē caji ñayuu, achí yā.

Te tēe cáscuáha jín yā ni cajini de jeē súcuán ni cahān yā.

*Jeē ní quenehen ya ñayuu ini templo*

(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jín de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quití te cánaxīco nuū ñáyuu jeē socó i. Te ni scotúú ndeyí ya tāca mesa tēe cástáyí xūhún, jín silla tēe cáxicó paloma. <sup>16</sup> Te tu ní jéhe ya jñuhun jeē yáha ñayuu ini templo jín ndajníñu ndíso i. <sup>17</sup> Te ni steén yā jñuhun nuū i, achí yā:

Yósó nuū tútu íi jeē cahán Yaā Dios: Vehe ri chí vehe nuū cájicān tahuñayuu tācá nación cúu, achí yā. Te máá rō jijnáhan rō chí nájñuhun yaū cava ñacuīhna ní canasáha rō, achí yā.

<sup>18</sup> Te tēe cástéén tutu ley Yaā Dios jín sūtū cácujeñnu, ni cajini de jñuhun yáha, te ni quejéé de cánducú de modo ndese cahni de ya. Chí cáyūhú de jeē ndujéñnu ga maá yā vēsú maá de, chí tāca ñáyuu yōhyo cácusñi ni i cájini i jñuhun steén yā. <sup>19</sup> Te jeē cuácuaa, te ni quenda ya ñuu Jerusalén cuahān yā.

*Jeē ni íchī nundēhe higo*

(Mt. 21.20-22)

<sup>20</sup> Te jenéhen inga quiví ni nayāha ya jín de cuahān yā. Te ni cajito de jeē nundēhe higo un je ni íchī nde yoho. <sup>21</sup> Yūcuán na te ni nucūhun ni Pedro, te ni cahān de jín yā:

Maestro, cundēhe ní nundēhe higo jeē ni cáhān ni núu, te vijna je ni íchī caján, achí de.

<sup>22</sup> Te ni cahān Jesús jín de:

Candíje rō jéé sáha Yaā Dios jeē jicán rō. <sup>23</sup> Chí jendaá cahán rī jín rō, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani siquí ni i, chí sa suhva candíje i jeē cóo nájñuhun ni cahān i, yūcuán na te cundaá jeē ni jícān i. <sup>24</sup> Jeē yúcuán cáhān rī jín rō, tāca jéé cacán tahuñ rō, te núu candíje rō jéé nihín rō, te nihīn rō.

<sup>25</sup> Te jeē cájicān tahuñ rō, te cone cáhnu ni rō nuū ñáyuu casáha cuēchi siquí rō, návāha máá Tátá rō jeē ndeé yā andiví, suni cone cáhnu ni yā nuū cuéchi rō. <sup>26</sup> Chí núu tú cone cáhnu ni rō nuū jnāhan rō, te suni máá Tátá rō jeē ndeé yā andiví, ma cóne cáhnu ni yā nuū cuéchi rō, achí yā.

*Siquí jeē ndíso jniñu Jesús*

(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutū cácujeñnu jín tēe cástéén tutu ley Yaā Dios jín tēe jéñnu cándacu jniñu, ni quecoo de nuū yā. <sup>28</sup> Te ni cacajñuhún de ya:

¿Ndé ní nihīn jniñu rō jéé sáha rō jniñu yáha? ¿Te ndé ñin ni tee jniñu siquí rō jeē sáha rō súcuán? achí de.

<sup>29</sup> Te ni cahān Jesús:

Suni ruhū, cajñuhun rí rohó ñin jñuhun jijnáhan rō. Te núu cuu stío cuíñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. <sup>30</sup> ¿Ndé ñin ni tee jniñu siquí Juan jeē ni scuándute de? ¿A Yaā Dios chí tāca tēe? Cachi nuū rī, achí yā.



<sup>31</sup> Yūcuán na te ni candajnūhun maá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cá candíje ró de? <sup>32</sup> Te núu cahān yō jeē ñayuu ni catee jniñu un síquī de, te quiñi ni ñayuu nuū yō, achí de cácahān maá de.

Chí cáyūhú de jeē quiñi ni ñayuu, chí ndivii i cá candíje i jeē tée ni nacani jñūhun Yaā Dios ni cuu ndíje Juan. <sup>33</sup> Jeē yúcuán ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha rī jniñu yáha, achí yá.

*Jñūhun yátá síquī tée néé cá sájniñu nuū uva*  
(Mt. 21.33-46; Lc. 20.9-19)

## 12

<sup>1</sup> Te ni quejéé yá cahān yā jñūhun yátá jíin de jíināhan de:

Ñn tée ni nachuhun de cuehē uva, te ni jesi de corral, te ni sáha de ñn nuū cúhun ndehē un táxin. Te ni sáha de ñn vehe súcun návāha cuu coto de ní cáhnu.

Te ni stóo de nuū sava tée sájniñu nuū, te cuu sava de ndehē jíin. Te ni tee de ichi cuahān jíca de. <sup>2</sup> Te maá tiempo ndutútu uva, te ni tají de ñn mozo de cuanuquihin sava uva nuū tée cá sájniñu ún. <sup>3</sup> Te tée un ní cajñi de mozo un, te ni cacani de i, te ni canatají de i cuanuhun i súcuan-ni. <sup>4</sup> Yūcuán na te tée chíí uva un ní tají tucu de inga mozo cuahān. Te tée cá sájniñu un ní cajēhe de yuū xinī mozo un, te ni castújí de, te ni cacahān ndevāha de nuū. <sup>5</sup> Te tée chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tée chíí uva, iyó ñn sēhe de jeē maní ndasí de jíin. Te jeē sándihí na ni tají de sēhe de un cuahān nuū

tée cá sájniñu. Te jéni ni de: Téē ún chí cuatáhú de jíināhan de nuū séhe ri. <sup>7</sup> Te tée cá sájniñu un ní cacahān maá: Téē chíí táhū cúu jeē yáha. Na cáhni yō de, te ndōo tahū de cuu maá yó, achí. <sup>8</sup> Te ni cajñi de i, ni cajehni de i, te ni cascāne de i inga lado. Achí yá.

<sup>9</sup> Yūcuán na te ni cajñūhun yá de:

Núu súcuan ¿te ndese sáha tée chíí uva un? Ndíji de te cahni de tée cá sájniñu ún, te cuāha de ñūhun cáá uva un núu inga sava tée sájniñu nuū.

<sup>10</sup> ¿Te á ná tu cahu ró jñūhun yáha jeē yosó núu tútu ñi, jeē ruhū cúu nájnūhun ñn yuū? Chí achí tutu:

Yuū jeē ní casquéhichí tée cájeni vehe,

yuū yáha nduu jeē quiñuu vehe.

<sup>11</sup> Máá Jítoho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu, achí yá.

<sup>12</sup> Yūcuán na te ni canducú de modo jñi de ya. Chí ni cajecūhun ni de jeē síquī maá de cúu jñūhun yátá ní cahān yā síquī tée cá sájniñu nuū uva jíin tée cájeni vehe. Te síquī jeē cáyūhú de jeē quiñi ni ñayuu, te ni castóo de ya te cuango de.

*Síquī xūhun renta*

(Mt. 22.15-22; Lc. 20.20-26)

<sup>13</sup> Yūcuán na te ni catají de sava tée grupo fariseo jíin tée grupo Herodes cuango de nuū yā, ndúcú de ndese sáha de návāha cahān yā ñn jñūhun jeē nihín de cuēchi síquī yā. <sup>14</sup> Te ni quecoo de, te ni cacahān de jíin yá:

Maestro, cájini na jéé tée cáhān ndaā cúu ní, te tu yúhú ní jeē cáhān ni ñn ñayuu síquī ní. Chí tu sáha ní cuenta ndese cúu ñn ñn i, chí ñnuú-ni sáha ní jíin i. Te stéén ndaā ní ndese squicu ñayuu nuū Yaā Dios. ¿Te á iyó váha jeē chúnaa yō renta nuū rey nación Roma jeē jñi nación yō, chí tuú? ¿A chúnaa

yō, chí má chúnaa yō? Achí de jíin yá.

<sup>15</sup> Te máá yá jiní yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha ñin xūhún na cóto ri, achí yá.

<sup>16</sup> Te ni cajēhe de xūhún. Te ni jito ya, te ni cajnūhun yá de:

¿Ndeé ñin nuū cúu jeē ndeé nuū xūhun yáha, te ndé síhví cúu jeē ndeé yáhá?

Te ni cacahān de jíin yá:

Nuū jíin síhví rey un cúu, áchí de.

<sup>17</sup> Yūcuán na te ni cahān yā jíin de:

Núu súcuan te nacuāha ró núu rey un jéé yáhi cuenta nuū de, te nacuāha ró núu Yaā Dios tāca jeē yáhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajnūhún de siquī jeē nátecu ndīyi*

(Mt. 22.23-33; Lc. 20.27-40)

<sup>18</sup> Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá siquī ñin jnūhun, áchí de:

<sup>19</sup> Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñi i nuū ndīyi ñani de, áchí tutu. <sup>20</sup> Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. <sup>21</sup> Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe unī. <sup>22</sup> Te ndihúxá de ni condeca de ña, te ni ñin de tú sēhe de ní íyo. Te jeē sándihí te suni ni jihí ñahan ún. <sup>23</sup> Núu súcuan te núu na nátecu de jíin náhan de quiñi nátecu ndīyi, ¿te ndé ñin de cuu ña ñasihí de? Chi ndihúxá de ni condeca de ña. Achí de jíin yá.

<sup>24</sup> Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu ñi,

ni tu cájini rō jeē iyó poder Yaā Dios jeē nastécu yā ndīyi. <sup>25</sup> Chi quiñi nátecu ndīyi, te tuá na jnūhun qui-

jnáhan tēe jíin ñahan coo. Chi coo i nájjnūhun ndajéhé Yaā Dios andívi.

<sup>26</sup> Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup> Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ñí cáni. Yōhyo cástívi ró jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*

(Mt. 22.34-40)

<sup>28</sup> Te ni quee ñin tēe stéén tutu ley Yaā Dios, te ni jini de jeē castíhí jnáhan tēe un jíin Jesús. Te ni jini de jeē váha ni nastío cuiñi yá jnūhun. Te ni cajnūhún de ya:

¿Ndeé ñin cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

<sup>29</sup> Te ni cahān Jesús jíin de:

Yáha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá ñin-ni ya iyó. <sup>30</sup> Núu súcuan te coo maní ndasí ró jíin máá Jítoho rō Yaā Dios, nde jnāá ndasí ró sáha ró ndihí jeē cúsi ni yā, nde jíin ini jíin ánuá rō, jíin ní jeē níjnūni rō, jíin ní fuerza rō. Yáha cúu jniñu ndácu ya jeē cánuú ndasí gá. <sup>31</sup> Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájjnūhun cundáhú ni rō maá ró. Tuá inga jnūhun ndácu jniñu cánuú gá iyó, chi suu máá jéé yáha-ni. Achí yá jíin de.

<sup>32</sup> Yūcuán na te ni cahān tēe stéén tutu ley jíin yá:

Yáha ni cahān ní, Maestro. Chi ndaā chí iyó ñin-ni Yaā Dios, te tuá na inga yá iyó. <sup>33</sup> Te cánuú jéé coo maní ndasí yó jíin yá nde jíin ini jíin ánuá yō, jíin ní jeē níjnūni yō, jíin ní

fuerza yō, te cundáhú ni yō jnáhan yó nájñuhun cúndáhú ni yō maá yó. Te cánuú ndasí gá jeē yáha vēsú jeē cáhmu yó quiti jíin táca gá jeē socó yō nuū yā. Achí de jíin yā.

<sup>34</sup> Yūcuán na te ni jini Jesús jeē váha ni stió cuíñí de, te ni cahān yā jíin de:

Je yajni cuu quiví ró ndaha Yāā Dios jeē ndacu ya jniñu nuū rō, achí yā.

Yūcuán na te ni ñin ga de, tuá ni chúndeyí ni de cajñuhún de ya.

*Siquí jeē cúu Cristo sēhe yucūn David*

(Mt. 22.41-46; Lc. 20.41-44)

<sup>35</sup> Te stéén Jesús jñuhun ini templo, te ni cahān yā:

¿Ndese cúu jeē cácahān tēe cástéén tutu ley Yāā Dios jeē Cristo cúu sēhe yucūn David? <sup>36</sup> Chí máá David suhva ni cahān de jñuhun ya ni sáha Espíritu Santo nde jenahán:

Máá Jítoho yō Yāā Dios ni cahān yā jíin Jítoho rī, Yāā quiji:  
Cucōo ró lado váha ri nuū kujéhu ró,

te na sáha ri jeē quende rō poder táca jéé cájito uhū rohó.

Achí Yāā Dios. Achí David. <sup>37</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítoho de cúu ya? áchí yā.

Te ñayuu cuehē, cánujnahan ni i cájini nahín i táca jñuhun cáhān yā.

*Jeē ni cáhān yā jeē iyó cuéchi de jíjnáhan de*

(Mt. 23.1-36; Lc. 11.37-54; 20.45-47)

<sup>38</sup> Te stéén yā jñuhun, te ni cahān yā jíin i:

Coto má candíje ró táca tée cástéén tutu ley. Chí cácusí ni de cáñuhun de sahma cáni jeē steén jeē kujéhu de, cájica cuu de jíin. Te cánujnahan ni de jeē cahán yíñuhún ñáyuu jíin de ini calle. <sup>39</sup> Te cánujnahan ni de cucōo de nuū silla yíñuhún gá ini vehe ñi sinagoga, jíin silla yíñuhún gá nuū

víco cáyeji ñayuu. <sup>40</sup> Te cáquende de vehe ñahan ní caquendōo ndáhú. Te nahán cájicān tahú de návaha caní ni ñayuu jeē tú na cuéchi de. Tēe yáha jíjnáhan de chí xeēn ga ndoho de castigo. Achí yā.

*Jeē ni sócō ñahan viuda xūhún (Lc. 21.1-4)*

<sup>41</sup> Te ñin quiví néne Jesús ini templo ichi núú táca yéjñū nuū cásocō i xūhún. Te jíto ya ndese cáchuhun ñayuu xūhún ini yejñū ún. Te cuehē ñayuu cucá ní cachuhun i cuehē xūhún. <sup>42</sup> Te ni quee ñin ñahan viuda jeē ndóho ndáhú. Te ni chuhun ña uū centavo lulí ini yejñū ún. <sup>43</sup> Yūcuán na te ni cana ya tēe cáscuáha jíin yā, te ni cahān yā jíin de:

Jendaá cahán rī jíin ró jeē cuehē gá cúu jeē ni sócō ñahan viuda ndahú yáha, vēsú jeē ní casocō táca ñáyuu cucá. <sup>44</sup> Chí táca i ni casocō i jeē ni ndóo siquí xúhun cuéhe i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yā jíin de.

*Jeē ní cachi yā jeē náā templo (Mt. 24.1-2; Lc. 21.5-6)*

## 13

<sup>1</sup> Te ni quenda Jesús ini templo cáhnu, te ñin tēe scuáha jíin yā ni cahān de:

Maestro, condēhe ní ná luu jíto táca vehe yáha jéé cúu templo, jíin táca yúū jeē ní cuvāha, áchí de.

<sup>2</sup> Te ni cahān yā jíin de:

Táca vehe náhnu yáha jéé cájito ró, chí ma cóso jnáhan ga ni ñin yuū, chí ndíhi jnanū. Achí yā.

*Na seña coo nuū cuácuyajni ndíhi ñayiví*

(Mt. 24.3-28; Lc. 21.7-24; 17.22-24)

<sup>3</sup> Te ni jehēn yā jíin de yucu Olivos jeē ñe ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni caca-jñuhun sín de ya:

4 Castūhun ní nuū ná, ¿ndé quiṽi coo tāca jéé ní cachi ní jéé coo? ¿Te na seña coo núu cuacuyajni squícu tāca jéé ní cahān ní? áchi de.

5 Te ni cahān yā jíin de:

Coto ró jéé ma stahú ni ĩn de róhó. 6 Chi quiijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stáhú de cuehē ñayuu.

7 'Te nihīn rō jnūhun jeē tāca lado iyó guerra, chí je yajni coo guerra. Te ma yūhu rō, chí cánuú coo súcuan. Te ni ná tu jinū quiṽi ndihí ñayīví. 8 Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquī jnáhan i. Te tāca jéé yáha cácuu jnūndóho quejéé xíhna ñúhún gá.

9 'Te condito ró máá ró, chí nastúu i róhó núu tāca tóhō, te ini tācá vehe ĩi sinagoga cani i róhó. Te quindeca i sava ró núu tācá gobernador jíin núu tāca rey, te cahān i cuēchi siquī rō siquī jeē cá candíje ró rúhū. Te súcuan te cuu nacani ró jnūhun ri nuū de. 10 Te jíni ñúhún jéé xíhna gā cuitē núu jnūhun nuū tācá nación ndese jnáma ri i, te sáa te ndihí quiṽi. 11 Te núu ni cajni de róhó cuángoo de jíin ró nuū tāca tóhō, te ma nacani ni rō xíhna gā ndese stío cuiñí rō nuū de te cácu ró. Chí máá hora un te máá Yaā Dios cuāha ya jnūhun nuū rō ndese cahān rō, te jnūhun ún cahān rō. Chí nasūu máá ró cúu jeē cahān, chí Espíritu Santo cúu jeē cahān. 12 Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jíin náná jeē cahni. 13 Te tāca ñayuu quiṽi ní i nuū rō jeē siquī ruhū. Te ñayuu cuiñi nihin jíin jnūhun ri nde quiṽi jínu, chí cácu i.

14 'Te Daniel, tēe ni nacani jnūhun Yaā Dios, ni tee de jnūhun ĩn tēe néé jéé quiji. Te róhó jéé cácahu tutu ún, na jécūhun ni rō. Chí ĩn quiṽi

te cuni rō jeē sáha ndevāha de jeē stívi de tācá ndajníñu ĩi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyúcú región Judea, na cúnu i caa i yucu quingoo i. 15 Te ñayuu cáyūcu núu quehe, ma ndívi i ini vehe jeē quénehen i ndajníñu i, chí cánuú cunu yachí i návāha cácu i. 16 Te ñayuu cáhīn nuū ítu, ma ndíji i vehe jeē quihin i sahma i. 17 Te quiṽi ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña. 18 Te cacān tahú rō jeē ma quiji jnūndóho un jéé cunu ró máá tiempo cúnu yuhvā. 19 Chí jeē quejéé un te coo cuehē jnūndóho xeēn, jeē ná tu coo súcuan nde quiṽi ní sáha Yaā Dios ñayīví te nde vijna. Te jeē ndihí jnūndóho ún te ni ma cóo ga jeē súcuan. 20 Te núu tú nastíyi máá Jítoho yō Yaā Dios tiempo jnūndóho ún, te ni ĩn ñayuu ma cácu cuiti i. Te jeē siquī ñayuu cá candíje jeē ní nacāji ya, jeē yúcuan nastíyi ya tiempo un.

21 'Núu súcuan te núu ĩn ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahān i. 22 Chí canecoo tēe cástáhú te cahān de jeē Cristo cúu de, chí cahān de jeē tēe nacani jnūhun Yaā Dios cúu de. Te sáha de jniñu jénu jeē naa ni ñayuu coto i, návāha stáhú de nde máá ñayuu ní nacāji ya, te núu na cúu. 23 Te ndito na cóo ni rō, chí je ni castūhun rí nuū rō vijna nde ná tu coo.

*Ndese coo quiṽi ndiji Yaā ní nduu tēe*

*(Mt. 24.29-35, 42-44; Lc. 21.25-36)*

24 'Te quiṽi ún, núu je ni ndihí jnūndóho ún, te cujnúú níandii, te yoō ma ndíi gā. 25 Te ñingoo quimi ĩn andívi. Te tāca jéé ĩn andívi chí quisi i. 26 Yūcuán na te coto ñayuu nuū máá rí, Yaā ní nduu tēe, ndiji rí jíin víco, te condiso rí cuehē poder,

te yōhyo luu cuyéhnū rī. <sup>27</sup> Yūcuán na te tají rí ndajéhé rī quinastútú yá ñayuu ní nacáji rí ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihni.

<sup>29</sup> Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quiví ndíji rī, te yachi coo. <sup>30</sup> Jendaá cahán rī jín rō jeē ma cúu ndíhi ñayuu jeē coto jnūndóho ún, chi nde squícu ndíhi jniñu ún. <sup>31</sup> Andiví jín ñáyiví chi naa, te tāca jnūhun cáhān rī chi ma náā, chi ndíhi squícu.

<sup>32</sup> 'Te quiví jín hora jeē ndíji rī, tú ni ñn ñayuu jiní, ni máá ndajéhé cáhiyo andiví, ni máá rí, Sēhe Yaā Dios. Chi máá ñn ni Tátá rī cúu jee jiní.

<sup>33</sup> 'Núu súcuan te na cócuhun ni rō tāca jnūhun yáha, te ndito na cóo ni rō, te cacān tahu rō, chi tu cájini rō na quiví ndíji rī. <sup>34</sup> Chi coo nájñūhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū tēe ndíto yéhyí jéē na cóndito de. <sup>35</sup> Te suni súcuan róhó jijnáhan ró, ndito na cóo ni rō. Chi cúu rī nájñūhun jitohe vehe ún, te tu cájini rō na hora ndíji rī, á jéē cuácuaa, chí ñuú, chí jéē cána líhli, chí jénéhen. <sup>36</sup> Chi ñn sanaa-ni te ndíji rī, te coto ró jéē ma nánihín rī rohó jéē tu ndíto ró. <sup>37</sup> Te jñūhun cáhān rī jín ró jijnáhan ró, suni cáhān rī jín ndiví ñayuu: Ndito na cóo ni rō jijnáhan ró. Achí yá.

*Jeē ní casquijnáhan de jñūhun jeē jñi de Jesús*

(Mt. 26.1-5; Lc. 22.1-2; Jn. 11.45-53)

## 14

<sup>1</sup> Te cúmaní uū gā quiví te quejéé vico pascua jeē cayeji ñayuu hebreo

pan jeē tú na levadura yáhi. Te sutú cácujeñu jín tēe cástéén tutu ley, ni canducú de modo ndese jñi de Jesús jín jñūhun stáhú, te cahni de ya. <sup>2</sup> Te ni cacahān de:

Ma jñi yó de máá quiví víco, chi ndonda ñayuu siquí yō, achí de.

*Jñūhun ñahan jeē ní chuhun perfume xiní yā*

(Mt. 26.6-13; Jn. 12.1-8)

<sup>3</sup> Te íne Jesús ñnu Betania vehe Simón, tēe ni ndoho cuehyí stehyú. Te níni yéji yā staā, te ni quee ñn ñahan nuū yā, ndáhá ña ñn frasco yuū luu jeē ññūhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xiní yā. <sup>4</sup> Te sava tēe cáhīn yūcuan ní caquití ni de, te ni cacahān de:

¿Najehē cúu jeē náā saá-ni perfume jiñā? <sup>5</sup> Chi cuu xicó yahu yó víhyá gā uní ciento denario, te cuáha yo núu ñayuu ndahú núu, achí de.

Te ni cacahān sōo de jín ña.

<sup>6</sup> Te ni cahān Jesús:

Ma stáhān rō ña. ¿Naun casáha ró jéē nácani uhū ni ña? Chi ñn jniñu váha cúu jeē ni sáha ña jín rí. <sup>7</sup> Chi níni coyūcu ñayuu ndahú jín ró, te núu cácuni rō te cuu sáha váha ró jín i. Te ruhū chi tuá condee rī jín ró. <sup>8</sup> Chi ni sáha ña ndíhi jeē cuu sáha ña jeē maní ña jín rí. Chi nde ná tu quindūji rī te je ni sátūhva ña ruhū jeē ní chuhun ña perfume ruhū. <sup>9</sup> Jendaá cahán rī jín ró jeē ní cáhnu ñayiví ndé-ni cúu nuū cuité núu jñūhun jeē jñama rī ñayuu, suni nacani i jñūhun jeē ni sáha ñahan yáha, návāha cocuhun ni ñayuu ña, achí yá.

*Jeē ní nastúu Judas yā*

(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñn jeē ndihúxi uū tēe cáscuáha un, ní jehēn de nuū sutú cácujeñu, ni sándaā de jín jéē nastúu de Jesús nuū jijnáhan. <sup>11</sup> Te nuū ní cajini

sōho sutū un jēē cahán de, te ni cacusī ni, te ni cajejnūhun jeē cuáha xūhun nuū de. Te nde quivī un ní nducú de modo ndese nastúu de ya.

*Jeē ní jequin yā Cena yā*  
(Mt. 26.17-29; Lc. 22.7-23;  
Jn. 13.21-30; 1 Co. 11.23-26)

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yhi, te suni quivī un cájehni i londe nájñūhun ní ndacu Yaā Dios jniñu jeē sáha i vico pascua un. Te tēe cáscuáha un ní cacajñūhún de ya:

¿Ndé nuū cuní ni jēē quísátūhva ná cuxíni ní vico pascua? achí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán nájñáhan ró jíin ñin tēe ndíso quiyi ndute. Te condiquín rō de quihín rō jíin de. <sup>14</sup> Te vehe jeē ndávi de, yūcuan cáhān rō jíin tēe chíi vehe: Achí máá Maestro: ¿Ndé ñin cúu cuarto vehe ní cuáha nuū ní nuū cuxíni ya vico pascua jíin tēe cáscuáha jíin yá? achí rō. <sup>15</sup> Te máá de stéen de ñin cuarto cáhnu nde xini vehe jeē je iyó túhva. Te yūcuan sátūhva ró jēē cuxíni yó, áchí yá jíin de.

<sup>16</sup> Te cuangoo tēe cáscuáha ún, te ni jinūcoo de ñuu, te ni canihín de nájñūhun ní cahān yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxí uū de. <sup>18</sup> Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñin róhó jēē yéji jíin rí, nastúu ro rúhū, achí yá.

<sup>19</sup> Yūcuán na te ni cacucuíhyá ní de, te ná ñin ná ñin de ní cacajñūhún de ya:

¿A sáña cúu? achí ñin de.

Te suni súcuan inga de:

¿A sáña cúu? achí ñin ñin de.

<sup>20</sup> Te ní cahān yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū.

<sup>21</sup> Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñūhun rī nuū tútu ñi. Te nacā xeēn ndoho tēe nastúu ruhū. Váha ga núu tu ní cácu tēe un núu, áchí yá.

<sup>22</sup> Te níni cáyeji de jíin yá, te ní quihin ya pan, te ní nacuatáhú yá, te ní tahu cuéchí yá, te ní jēhe ya nuū tēe cáscuáha jíin yá. Te ní cahān ya:

Caji rō jijnáhan ró, chí yāha cúu yiquí cúñu rī, achí yá.

<sup>23</sup> Yūcuán na te ní quihin ya ñin copa ndūxi uva, te ní nacuatáhú yá, te ní jēhe ya ní cajihí ndihí de. <sup>24</sup> Te ní cahān yā jíin de:

Yāha cúu ñiñi rī jeē cuáha rī jeē cúu contrato jeé, te cati jeē ndundoo cuēchi cuehē ñayuu. <sup>25</sup> Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Yaā Dios jniñu ní ñayiví, te sáa te cohó tucu rī jíin ró jijnáhan ró. Achí yá.

*Jeē ní cachi yā jeē yūhu Pedro cahān de jeē jiní de ya*

(Mt. 26.30-35; Lc. 22.31-34;  
Jn. 13.36-38)

<sup>26</sup> Te ní jita ya ñin yaa ñi jíin de jijnáhan de. Te ní quenda ya cuahān yā jíin de nde yucu Olivos.

<sup>27</sup> Yūcuán na te ní cahān yā:

Ndivii rō nayūhu ró jeē siquí ruhū jecuáa vijna. Chí suhva je yósó jñūhun rī nuū tútu ñi, ní cahān Yaā Dios: Cuáha rī jñūhun jeē cáhni ñayuu tēe ndíto lanchi, te lanchi un cuitē núu tí jeē yūhu tí, achí. <sup>28</sup> Te jeē nátecu rī, te xīhna ruhū cosnúu rí quihín rī región Galilea, te sáa te najñūcoo ró, achí yá.

<sup>29</sup> Yūcuán na te ní cahān Pedro:

Vēsú ndihí de na náyūhú de, te máá ná chí ma náyūhú cuiti ná, achí de jíin yá.

<sup>30</sup> Te ní cahān yā jíin de:

Jendaá cahán rī jíin ró jeē jecuáa vijna, nde ná tu cana líhli uū jínu, te yūhu ró jeē jñi ñayuu rohó, te

unī jínu cahān rō jeē tu jíní rō ruhū, achí yá.

<sup>31</sup> Te ni cahān teyí de jín yá:

Vēsú núu cuu na jín ní, te ma cahān cuiti na jéē tu jíní na níhín, áchí de.

Te suni súcuan ni cacahān ndihí de.

*Jeē ni jicān tahú yā nuū huerto Getsemaní*

(Mt. 26.36-46; Lc. 22.39-46)

<sup>32</sup> Yūcuán na te ni jínú Jesús jín téē cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī cacān tahú rī, achí yá.

<sup>33</sup> Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jnūndóho siquī yā. <sup>34</sup> Te ni cahān yā jín de:

Yōhō cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

<sup>35</sup> Te ni jica ya jecu gā, te ni jecuíñi yití yá ni jequin ya nuū yā nuū ñúhun. Te ni jicān tahú yā nuū Yāā Dios jeē núu cuu te ma ndóho ya jnūndóho jeē quejéé quíji siquī yā. <sup>36</sup> Te suhva ni cahān yā:

Tátá maá ná, ndihí-ni jniñu cuu sáha máá ní. Te tejiyo ní jnūndóho yáha jéē ma quíji siquī ná. Te nasūu jéē cuní maá ná, chí jeē cuní maá ní na cóo, achí yá.

<sup>37</sup> Te ni ndee yā nuū ndinúní téē cáscuáha jín yá, te ni jito ya jeē cáquixí de. Te ni cahān yā jín Pedro:

Simón, ¿á quíxí rō? ¿A tu ní cánda ró condito ró jín rí vēsú ñn hora?

<sup>38</sup> Coó ndito ni rō te cacān tahú rō jeē chindéé ñahān yā rohó jeē ma sáha ró cuéchi jeē coto ndee jeneé rohó. Chí cuní ndije ánuá rō squícu vāha ró, te yiquí cúñu rō chí tu fuerza, achí yá.

<sup>39</sup> Te ni jehēn tucu ya, ni jicān tahú yā, te suni jnūhun yúcuan ní cahān yā. <sup>40</sup> Te ni ndee ya nuū

de, te ni jito ya jeē cáquixí tucu de, chí yōhō cájii de māhná. Te tuá ni cánihín de jnūhun stíó cuiñí de nuū yā. <sup>41</sup> Te ni ndee yā jeē vuelta unī, te ni cahān yā jín de:

Vijna te cusū rō te ndetātu ró. Te tuú chí je ni cuu, chí je ni quee hora, te ruhū, Yāā ní nduu téē, natūu ri te jniñi téē cáhīyo cuéchi ruhū. <sup>42</sup> Ndocuíñi jijnáhan ró, chí je vēji téē nastūu ruhū, te quihín yō jín de. Achí yá.

*Jeē ní cajniñi de Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuan, te ni quee-ni Judas, ñn jnāhan jeē uxí uū téē cáscuáha jín yá. Te vējicoo cuehē téē jín de, cándaha de espada jín yujnu. Chí sutū cácujuhnu jín téē cástéén tutu ley jín téē jéhnu cándacu jniñu, ni catají de téē ún. <sup>44</sup> Te Judas, téē nastūu ya ún, je ni jēhe de ñn seña nuū téē un jijnáhan, chí ni cachí de:

Tēe jeē téchūhu rí un cúu. Te jniñi ró jijnáhan ró quihín rō jín, te ma siaá cuiti rō, achí de.

<sup>45</sup> Te ni quee de nde nuū Jesús, te ni cahān de jín yá:

Maestro, Maestro, achí de.

Te ni techūhú de ya. <sup>46</sup> Te tāca gá téē un ní cajniñi de ya, te cuango de jín yá.

<sup>47</sup> Te ñn téē íne jín yá ni tava de espada de, te ni jehnde de sōho ñn mozo maá sūtū cujéhnu ga. <sup>48</sup> Te ni cahān Jesús jín ñáyuu cuehē ún:

¿Te va téē cuihná cúu ri jeē vējicoo ró jín espada jín yujnu jniñi ró rúhū jeē súcuan? <sup>49</sup> Tāca quívī ni ine ri jín ró jijnáhan ró ñni templo cáhnu, ni steen rī jnūhun, te tu ní cájniñi ró rúhū. Te súcuan cása ha ró náyāha na squícu jeē cahān tutu ñi, achí yá.

<sup>50</sup> Yūcuán na te ndihí téē cáscuáha jín yā, ni castóo de ya, ni cajinu de cuango de.

*Tēe suchí jeē ní jinu*

<sup>51</sup> Te ñin tēe suchí, ndíquin de ya cuahān de jíin yá. Te ndíi de máá ñin sahma cuitá. Te ni cajniñ tēe ún de. <sup>52</sup> Te máá sahma cuitá un ní canihñ. Te ni jinu máá ññ-ni de cuahān de.

*Jeē ní indichi Jesús nuū junta tēe cácujuhnu ga*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ni jinūcoo de jíin Jesús nuū sutū cujéhnu ga. Te tāca sūtū cácujuhnu jíin tēe jéhnu cándacu jniñu jíin tēe cástéén tutu ley, ni candututú de. <sup>54</sup> Te Pedro chi jíicá-ni ndíquin de ya, te ni jinū de nde ini patio sutū cujéhnu ga. Te ni cucōo de jíin táca policía, násaā de ññuhñ.

<sup>55</sup> Te sutū cácujuhnu jíin ndihi tēe cásáha junta cujéhnu ga, ni canducú de cuēchi síquī Jesús, chi cahni de ya cácuni de. Te tu ní canihñ de. <sup>56</sup> Chi cuehē de ni cacahān yaá síquī yā, te tu ní quíjnáhan jñuhun ni cacahān de. <sup>57</sup> Yūcuán na te ni candocuiññ sava de, te ni catee de cuēchi síquī yā, achí de:

<sup>58</sup> Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quiví te nacani de inga jeē násūu jíin ndaha tēe cuvāha, achí de. Achí jíjnáhan.

<sup>59</sup> Te ni jñuhun yáha tu ní quíjnáhan tucu jeē cácahān de síquī yā.

<sup>60</sup> Yūcuán na te sutū cujéhnu ga ni ndocuiññ de nuū ñáyuu cuehē ún, te ni cajñuhún de Jesús:

¿Naun tu cáhán cuiti rō? ¿A íyó ndáā jeē cácahān tēe yáha síquī rō? achí de.

<sup>61</sup> Te máá yá tu ní cáhán cuiti yā, chi tú na vé ni stío cuññí yā. Te sutū cujéhnu ga ni cajñuhún tucu de ya:

¿A máá ró cúu Cristo, Sēhe Yaā váha jeē cujéhnu? achí de jíin yá.

<sup>62</sup> Te ni cahān yā:

Suu ri cúu. Te coto ró jēe ruhū, Yaā ní nduu tēe, condee rī lado váha

Yaā iyó poder, te ndiji ri ichi ándiví jíin vícō, achí yá.

<sup>63</sup> Yūcuán na te sutū cujéhnu ga ni jehnde de sahma de jeē quití ndasí ni de, te ni cahān de:

¿Ndé jíni ññuhún gá yō testigo núu súcuan? <sup>64</sup> Chi je ni cajini ró jēe cahán de jñuhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

<sup>65</sup> Te sava de ni catesñí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachi ndé ññ cúu jeē ní cani rōhó, achí de.

Te tāca tēe policía ni cacani de nuū yā.

*Jeē ní cachi Pedro jeē tu jíni de ya*  
(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Te íne Pedro ini patio ichi chíji nuū cáhñin de jíin Jesús. Te ni quee ññ ññahan jéjñññ vehe sutū cujéhnu ga ún. <sup>67</sup> Te ni jito ña nuū de jeē néne de násaā de yuññuhún. Te ni jito váha ña nuū de, te ni cahān ña:

Róhó chi suni ni jica ró jíin Jesús, tēe ññuu Nazaret, achí ña.

<sup>68</sup> Te máá de tu ní cáchi de, chi ni cahān de:

Tu jíni rī de, ni tu jíni rī na jñuhun cáhán rō, achí de.

Te ni quenda de yéhyí núu quéhe. Te ni cana-ni líhli. <sup>69</sup> Te ññahan jéjñññ un ní jito tucu ña nuū de, te ni quejéé ña cáhán ña jíin ñáyuu cáhñin yūcuán:

Tēe yáha suni jñáhan tāca tēe un cúu, achí ña.

<sup>70</sup> Te máá de tu ní cáchi tucu de. Te ni cunúu jecu gā, te ñáyuu cáhñin yūcuán ní cacahān tucu i jíin Pedro:

Jendaá ndije jeē suni jñáhan de cúu ró, chí tēe Galilea cúu ró, te inuú-ni cáhán rō jíin de jíjnáhan de. Achí i.



<sup>71</sup> Yūcuán na te ni quejé de cáhān teyí de jeē na cóndee cuēchi siquī de núu tu cáhān ndaā de:

Tu jíni rī tēe un jéē cácahān rō jñūhun de, áchí de.

<sup>72</sup> Yūcuán na te ni cana-ni líhli vuelta uū. Te ni nucūhun ni de jñūhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíni rō ruhū. Te ni nacani ni de siquī jñūhun ún, te ni ndahyū de.

*Jeē ní indichi Jesús nuū Pilato*

*(Mt. 27.1-2, 11-14; Lc. 23.1-5; Jn. 18.28-38)*

## 15

<sup>1</sup> Te jeē ní cundijin, te sutū cácujuhnu ni candutútú de jíin tēe jéhu cándacu jniñu, jíin tēe cástéén tutu ley, jíin ndihí tēe cása ha junta cujéhu ga, te ni casquínáhan de jñūhun. Te ni cajihni de Jesús, te cuango de jíin yá nuū Pilato, tēe cúu gobernador. <sup>2</sup> Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájñūhun cáhān rō.

<sup>3</sup> Te sutū cácujuhnu un ní cacahān de cuehē cuēchi siquī yā. <sup>4</sup> Te Pilato ni cajnūhún tucu de ya:

¿Naun tu cáhān cuiti rō? ¿A tu jíni ró jéē cuehē cuēchi cácahān de siquī rō? achí de.

<sup>5</sup> Te tu ní cáhān cuiti yā ni ññ jñūhun jíin de. Te nahān ní naa ni Pilato ndéhé de nuū yā.

*Jeē ní cundaā jeē cúu yā*

*(Mt. 27.15-31; Lc. 23.13-25; Jn. 18.38-19.16)*

<sup>6</sup> Te iyó costumbre Pilato jeē quiví víco un siaá de ññ tēe íne vecāa, núu na-ni tēe cácuñi ñayuu.

<sup>7</sup> Te iyó ññ tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndīyí. <sup>8</sup> Te ni quecoo ñayuu cuehē, te ni cacahān i jíin Pilato jeē na sáha de nájñūhun iyó

costumbre de. <sup>9</sup> Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu hebreo? achí de.

<sup>10</sup> Súcuñi ni cahān de, chí cúni de siaá de Jesús. Chí je ni jecūhun ni de jeē ní cacucuésún ni táca sūtū un cájito de ya, te jeē yúcuñi ní quiijicoo jíin yá nuū de. <sup>11</sup> Te sutū cácujuhnu un ní cascáhān de ñayuu cuehē un jéē váha ga na cácañ i jeē siaá Pilato Barrabás. <sup>12</sup> Yūcuán na te ni cajnūhún tucu Pilato:

Núu súcuñi ¿te ndese cácuñi rō jeē sáha ri jíin tēe jeē cácahān rō jeē cúu de Rey rohó ñayuu hebreo? achí de jíin i.

<sup>13</sup> Te ni cacana jee i:

Cata caa ní de jicā cruz, na cúu de, áchí i.

<sup>14</sup> Te ni cahān Pilato:

¿Na cuēchi ni sáha de núu súcuñi?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

<sup>15</sup> Te Pilato cuní de jeē na cúsiñi ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jíin jéē cata caa de ya jicā cruz.

<sup>16</sup> Yūcuán na te soldado un cuángoo de jíin yá iní patio palacio, jeē sácatā de nuū yā. Te ni canastútú de ndihí jnáhan de. <sup>17</sup> Te ni cachuhun de ya ññ sahma cuehé ndihí jéē cúu sahma rey. Te ni casáha de ññ corona íñu, ni cachuhun de xiní yā. <sup>18</sup> Yūcuán na te ni cacana de:

Nacā jeē váha rey cúu Rey ñayuu hebreo, achí de.

<sup>19</sup> Te ni cacani de yujnu xiní yā, te ni catesihí de nuū yā, te ni cajecuiñi yití de nuū yā, casáha de jeē chíñuhún de ya. <sup>20</sup> Te nuū ní cuu ni casácatā de nuū yā, te ni catava de sahma cuehé ndihí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

*Jeē ní cacata caa de ya jicā cruz*  
(Mt. 27.32-44; Lc. 23.26-43;  
Jn. 19.17-27)

<sup>21</sup> Te ñin tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

<sup>22</sup> Te cuango de jíin yá ñin lugar nuū naní Gólgota, jeē cuní cahān Lugar Yiquí Xíní. <sup>23</sup> Te ni cajēhe de vino jeē ni sácā núu jíin sūje uvuā jeē cóho ya, te tu ní jíhi ya. <sup>24</sup> Te ni cacata caa de ya jicā cruz. Te ni casáha de sorteo jeē siquí ndese nihīn ñin ñin de sahma ya.

<sup>25</sup> Te cahīn ni cacata caa de ya. <sup>26</sup> Te jñūhun ni catee de xinī cruz cahán na siquī ni jihī yā: Yāha cúu Rey ñayuu hebreo, achí. <sup>27</sup> Te suni ni cacata caa de uū tēe cuihná núu uū gā cruz, ñin de lado váha ya, te inga de lado jecó yá. <sup>28</sup> Te ni squícu jñūhun cahán tutu ii: Ni casquínahan de ya jíin tēe casáha neé, achí.

<sup>29</sup> Te ñayuu cáyāha yūcuán cáscuicó i xinī i, te cácahān neé i:

Jajaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró. <sup>30</sup> Núu súcyan te jnama ró máa ró, te nuu ró jicā cruz vii, achí i.

<sup>31</sup> Te suni súcyan ni cacahān catá sutū cácujeñnu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máa de vijna? <sup>32</sup> Núu na cúní yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jíjnhān de.

Te tēe cándita caa jíin yá, suni súcyan ni cacahān neé de.

*Jeē ni jíhi Jesús*  
(Mt. 27.45-56; Lc. 23.44-49;  
Jn. 19.28-30)

<sup>33</sup> Te nuū ní cuu cahuxī uū, te ni cunee ní cáhnu nde cahunī. <sup>34</sup> Te

nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jñūhun un cúní cahān: Yāa Dios maá ná, Yāa Dios maá ná, ¿naun ni stóo ní sáña?

<sup>35</sup> Te sava ñayuu cáhīin yūcuán, ní cajini i jñūhun ún, te ni cacahān i:

Cuni nahín, chi cána de xinī Elías, tēe ni nacani jñūhun Yāa Dios jeh-nahán, achí i.

<sup>36</sup> Te ni jinu ñin tēe, ni jechundaji de cachī nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, achí de.

<sup>37</sup> Te máa Jesús ni cana jee ya, te ni jihī-ni ya. <sup>38</sup> Yūcuán na te sahma ndíta caa jeē ndihyú cuarto ii ini templo cáhnu, ni ndatā sava sava nde xinī te nde nuū jehé. <sup>39</sup> Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yāa Dios cúu tēe yāha, achí de.

<sup>40</sup> Te suni cáhīin sava ñahan, cándēhe jicá ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé. <sup>41</sup> Te ñahan yáha ní candiquín ña ya, ni cajejníñu ña nuū yā nde náa jica ya Galilea. Te suni cáhīin cuehē gā ñahan jeē ni jéngoo jíin yá ñuu Jerusalén.

*Jeē ní quindūji Jesús*  
(Mt. 27.57-61; Lc. 23.50-56;  
Jn. 19.38-42)

<sup>42</sup> Te ni ini quivī ún. Te quivī sātūhva cúu, chi sajnē cúu quivī ndétatú. <sup>43</sup> Te ni quee José, tēe ñuu Arimatea. Te cúu de ñin tēe cújēhnu nuū junta cujēhnu ga. Te suni ñūhun ni de jeē quiji quivī jeē ndacu Yāa Dios jniñu. Te tu yúhú de chi ni quivī de nuū Pilato, ni jicān de yiquí cúñu Jesús. <sup>44</sup> Te Pilato chi náa ni de jeē yachí ni jihī yā. Te ni cana de capitán, te ni

cajnūhún de tēe un núu je ni jihī yā. <sup>45</sup> Yūcuán na te ni cucáhnu ni de jeē ni cáhān capitán jiín de, te ni jēhe de jnūhun jeē quihin José yiqui cúñu yā. <sup>46</sup> Te José ni jeen de iin sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini iin yaū jeē quíndūji ndīyi, jeē ní caan jicā iin cava. Te ni jesi de iin yuū yuhu yáú un. <sup>47</sup> Te María űuu Magdala, jiín María naná José, ni cajito űa nuū ní cachindūji de ya.

*Jeē ní natecu Jesús*

(Mt. 28.1-10; Jn. 20.1-10)      Lc. 24.1-12;

## 16

<sup>1</sup> Te ni ini quivī ndétátú, te María űuu Magdala, jiín María naná Jacobo, jiín Salomé, ni cajeen űa tēcá perfume jeē quíchuhun űa yiqui cúñu yā. <sup>2</sup> Te jenēhen quivī domingo, jeē ní cane niāndii, te ni jinūcoo űa nuū ní yindūji ya. <sup>3</sup> Te cácahān űa:

¿Ndé nihīn yō tēe tejiyo yuū ndihyú yuhu yáú? áchí űa.

<sup>4</sup> Te ni candacoto űa, te ni cajito űa jeē jé ni cujiyo yuū cáhnu un cuáhān. <sup>5</sup> Te ni quivicoo űa ini yaū ndīyi. Te ni cajito űa iin ndajéhé Yaā Dios jeē cáa nájñuhun tēe suchí, néne ya ichi lado váha, űñuhun ya iin sahma cuijín cáni. Te ni cayūhú űa. <sup>6</sup> Te ni cahān yā jiín űa:

Ma yūhu ró jijnáhan ró. Chi vendēhe ró Jesús űuu Nazaret, Yaā ni jihī jicā cruz. Tuá yā yāhá, chi je ni natecu yā. Yāhá condēhé ró nuū ní cachindūji de ya. <sup>7</sup> Cuánungoo te cachi rō nuū tēe cáscuáha jiín yá, jiín núu Pedro, jeē xīhna gā maá yá jinū Galilea, te sáá te najinūcoo de. Te yūcuán coto de nuū yā, nájñuhun ni cahān yā jiín de nde saá, áchí yá jiín űa.

<sup>8</sup> Yūcuán na te űahan un ní quendacoo űa nuū ní yindūji ya, te cájino űa cuangoo űa. Chi quísi i űa jee

cáyūhú űa. Te tu ní cácachi cuiiti űa nuū ní iin, chi cáyūhú űa.

*Jeē ní nane Jesús nuū María űuu Magdala*

(Jn. 20. 11-18)

<sup>9</sup> Te Jesús ni natecu yā jenēhen quivī domingo. Te xīhna gā ni nane ndijin yā nuū María űuu Magdala, űahan jeē ní quenehen ya uxā tachī ini. <sup>10</sup> Te cuahān űa cuacastūhún űa nuū tēcá tēe ni cajica jiín yá jeē ní nane ya nuū űa. Te cácuaihyá ni de te cándahyū de. <sup>11</sup> Te nuū ní cajini de jnūhun jeē ní jito űa nuū yā jeē tēcu yā, te tu ní cácaandije de jnūhun cáhān űa.

*Jeē ní nane ya nuū uū tēe cáscuáha jiín yá*

(Lc. 24.13-35)

<sup>12</sup> Yūcuán na te ni quendacoo uū jnāhan tēe ún, cájica de cuahān de ichi rancho, te sīn modo ni nane ndijin yā nuū de. <sup>13</sup> Te ni canandicó de, ni cacastūhún de nuū tēcá gá jnāhan de. Te ni tu ní cácaandije tucu jnāhan de jeē cácahān ndindúú de.

*Jeē ní tejñū ya de nacani de jnūhun*

(Mt. 28.16-20; Jn. 20.19-23)      Lc. 24.36-49;

<sup>14</sup> Te cúcuéé gá te ni nane ndijin yā nuū ndihúxí iin de jeē cáyūcú de mesa cáyeji de staā. Te ni cahān yā nuū de, chi nihni ni de jeē tu cácaandije de jeē cácahān jnāhan de un, jēe ní natecu yā ni cajito de ya. <sup>15</sup> Te ni cahān yā jiín de:

Cuángoo jijnáhan ró ní űayiví, te nacani ró jnūhun ri nuū tēcá űayuu ndese jnāma ri i. <sup>16</sup> Te űayuu candije te cuandute i, chi cácu i. Te űayuu tú candije, chi jnahnū ndetū i. <sup>17</sup> Te űayuu candije, sáha i tēcá jniñu jéhu yáha jeē steén jeē iyó rí jiín i: Jiín síhví rí quenehen i tachī ini űayuu. Te cahān i tijni yuhu jéé. <sup>18</sup> Te núu ni jniñi sanaa i coō, chí núu ni jihí i veneno, te ma sáha dañó jiín

i. Te suni soó i ndaha i siquī ñáyuu cácuñū, te nduvāha. Achí yá jíin de.

*Jeē ní ndaa ya cuanuhun yā andiví*

*(Lc. 24.50-53)*

<sup>19</sup> Yūcuán na te nuū ní ndihí ni cahān maá Jítoho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéñnu ya. <sup>20</sup> Te máá de ni quendacoo de, ni canacani de jñūhun ya tāca lado ndese jnáma ya ñayuu. Te máá Jítoho yō ni chindéé ñáhán yá de. Te ni jēhe ya fuerza jeē sáha de tācá jñiñu jéñnu jeē steén jeē iyó ndáa jñūhun cánacani de. Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcun de historia Jesús, tācā jniñu jeē ni sāha ya ni cajito yó. <sup>2</sup> Te ni catee de tāca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. <sup>3</sup> Te máá ná, suni ni nanducú yúcun ná tāca jnúhun ya, nde nuū ní quejéé. Te ni jeni ni na jēē suni iyó váha jeē tēe cájí ná tāca jnúhun yáha núū ní, amigo Teófilo. <sup>4</sup> Te súcuan te cuni ni jēē iyó ndāā tāca jnúhun jeē ní cacastūhún i nuū ní.

*Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni iyo ñin sutū ñayuu hebreo, nani de Zacarías, te grupo Abías cúu de. Te ñasihí de nani ña Elisabet, te suni sēhe yucún maá sūtū Aarón cúu ña. <sup>6</sup> Te ndindúú de cahīyo ndaā de nuū Yaā Dios, te ndaā váha cásquicu de jniñu ndácu ley maá Jítóho yō Yaā Dios, cájito tāca ñáyuu. <sup>7</sup> Te tú sēhe de iyó, chi ñahan nómá cúu Elisabet, te je jéhu ndindúú de.

<sup>8</sup> Te ñin quiví te jéjniñu Zacarías nuū jniñu jeē cúu de sutū nuū Yaā Dios, chi ni quee quiví jeē ndívi grupo de. <sup>9</sup> Te ni casáha de sorteo, nájnūhun iyó costumbre sutū. Te ni sāha tocar Zacarías jeē quiví de ini cuarto ñi templo Jítóho yō Yaā Dios, te cahmu de sūje cūtú. <sup>10</sup> Te hora jeē cayú sūje cūtú, te tāca ñáyuu cuehē cáhiin i fuera, cájicān tahú i. <sup>11</sup> Te ni cane ñin ndajéhé maá Jítóho yō nuū de, ñin ya lado váha altar nuū jéhu de sūje cūtú. <sup>12</sup> Te ni cunéé ni Zacarías ni jito de nuū yā, te yōhoyo ni yūhú de. <sup>13</sup> Te ni cahān ndajéhé un jín de:

Zacarías, ma yūhu ró, chi je ni chihí Yaā Dios cuenta jeē ni jícān

tahú rō. Te ñasihí ró Elisabet, scácu ña ñin sēhe yíi, te snání ró i Juan. <sup>14</sup> Te yōhoyo cusí ni rō. Te cuehē ñayuu cusí ni jeē cácu i. <sup>15</sup> Chi cújéhu sēhe ró sāha máá Yaā Dios. Te ma cóho i viño ni ndixi cuíi. Te cunuú máá Espiritu Santo jín i, nde ná tu cacu i. <sup>16</sup> Te sāha i jeē cuehē ñayuu nación rō Israel ndívicoo i nuū Jítóho i Yaā Dios. <sup>17</sup> Te xihna gā Juan quiji nacani jnúhun Jítóho yō Jesús, te sáa te quiji ya. Te sāha i nájnūhun ni sāha Elías, tēe ni nacani jnúhun Yaā Dios jenahān, te conevāha i poder jeē nācani i jnúhun, nájnūhun ni conevāha Elías. Te sāha i jeē tāca tátá ndumaní de jín sēhe de. Te suni sāha i jeē ñáyuu ñihni ni cuatáhú i nuū Yaā Dios, nduu i ñayuu ndaā. Súcuan sātūhva i ñayuu návāha candíje i máá Jítóho yō jeē quíji ya. Achí ndajéhé.

<sup>18</sup> Te Zacarías ni cajnúhún de ya: ¿Nde cucáhu ni na núu jendaá cúu? Chi tēe jéhu cúu ná, te suni jéhu ñasihí ná, achí de.

<sup>19</sup> Te ni cahān ndajéhé un jín de: Máá rí cúu Gabriel, te ñe ri nuū Yaā Dios, jejniñu ri nuū yā. Te ni tají yá ruhū vēji ri cahān rí jín ró, te nācani ri jnúhun váha yáha núū rō. <sup>20</sup> Te jeē tu ní cándíje ró jnúhun ni cahān rí, te cuñhín ró, te ma cúu cahān ró, chi nde na cácu sēhe ró. Te squícu nahín jnúhun cáhān rí yāhā, na quee quiví, achí ndajéhé.

<sup>21</sup> Te ñayuu cáhiin ichi fuera, cándetu i Zacarías, te cájeni ni i na vé ni cuu jeē cucuéé de ini cuarto ñi templo. <sup>22</sup> Te nuū ní quenda de, te tuá ni cúu cahān de jín i. Te ni cajecūhun ni i jeē ini templo ni jito ndijin de ñin jeē ni stéén yā nuū de. Te máá seña na ni sāha de nuū i, chi ni cuñhín de.

<sup>23</sup> Te nuū ni jínu quiví ni jejniñu de ini templo, te cuanuhun de vehe de. <sup>24</sup> Te ni cuu jecu quiví, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhen ña. Te jéni ni ña: <sup>25</sup> Súcuan

ni sáha máá Jítoho yō jíin rí, te ni tejiyo ya jnūhun jeē cúcanu rī nuū ñáyyu jeē tú sēhe ri, jéni ni ña.

*Jeē ní cachi ndajéhé jeē cacu Jesús*

<sup>26</sup> Te nuū iñu yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañúū Galilea. <sup>27</sup> Te ni jehēn yā nuū ñn sūchi síhí naní María. Te je ni cundaā jeē quijnáhan ña jíin ñn tēe naní José, te sēhe yucūn rey David cúu de. <sup>28</sup> Te ni quiví ndajéhé un núū ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhoyo ndetū gā cúu ró núū tāca gá ñahan, áchí yá.

<sup>29</sup> Te nuū ni jíto ña nuū yā, te ni cunéé ni ña jeē súcuan cáhān yā, te jéni ni ña naun cáhān yā súcuan jíin ña. <sup>30</sup> Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. <sup>31</sup> Te jecūhun sēhe ró te scácu ró ñn sēhe yí, te snání ró i Jesús. <sup>32</sup> Te kujéhu i, te conaní i Sēhe Yaā kujéhu téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájñūhun jíi i David ni cuu de rey. <sup>33</sup> Te ní cáni ndacu i jniñu nuū ñáyyu nación Israel. Te ma ndíhi cuiti jeē ndácu i jniñu. Achí ndajéhé.

<sup>34</sup> Yūcuán na te ni cajñūhún María:

¿Ndeese coo jeē ni cáhān ní? Chi ná tu coo yí ná, áchí ña.

<sup>35</sup> Te ni cahān ndajéhé un:

Máá Espíritu Santo quiji siquī rō, te poder máá Yaā kujéhu téyí sáha ñn jniñu jéhu jíin ró. Te jeē yúcuan máá súchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i. <sup>36</sup> Te suni cástūhun rí nuū rō jeē jnāhan ró Elisabet, suni scácu ña ñn sēhe vēsú je jéhu ña. Te vijna iyó iñu yoō jeē tuá cácahān ñayuu jeē cúu ña ñahan númá. <sup>37</sup> Chi ndíhi-ni cuu sáha Yaā

Dios, te tu iyó ni ñn jeē ma cúu sáha ya, achí ndajéhé un.

<sup>38</sup> Yūcuán na te ni cahān María:

Cuu núu súcuan, chí sáha ná tāca jniñu ndácu Jítoho yō Yaā Dios, te na cóo jíin ná nájñūhun ni cachi ní, áchí ña.

Te máá ndajéhé un cuáhān-ni ya.

*Jeē ni jécondēhé María Elisabet*

<sup>39</sup> Te ni cuu jecu quiví, te yachí cuahān María, ni caa ña yucu cuahān ña ñn ñuu región Judea. <sup>40</sup> Te ni jinū ña vehe Zacarías, te ni cahān ña jíin Elisabet. <sup>41</sup> Te nuū ní jini Elisabet jeē cahān María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. <sup>42</sup> Te ni cahān jee ña:

Ni sáha Yaā Dios jeē yóhoyo ndetū gā cúu ró núū tāca gá ñahan, jíin jéé yóhoyo ndetū sēhe ró. <sup>43</sup> ¿Te ndese cúu jeē ní quee naná máá Jítoho rí nuū rí? Chi tu cújéhu cuiti rí. <sup>44</sup> Chi jeē ní jini-ni ri jñūhun ni cahān rō jíin rí, te sūchi ñūhun chíji ri ni canda i jeē cúsi ni i. <sup>45</sup> Te nacā ndetū rō jeē ní candíje ró, chí squícu nahín tāca jñūhun ni cahān máá Jítoho yō jíin ró. Achí Elisabet.

<sup>46</sup> Yūcuán na te ni cahān María:

Cáhān rí jeē kujéhu ndasí máá Jítoho yō Yaā Dios,

<sup>47</sup> te cúsi ni rí jíin Yaā Dios, Yaā jnáma ruhū.

<sup>48</sup> Chi ni sáha ya cuenta ruhū, vēsú tu cújéhu rí.

Te na squícu ri jniñu ndácu ya.

Te nde vijna te tāca ñáyyu jeē nácacu, cahān i jeē yóhoyo ndetū rí.

<sup>49</sup> Chi Yaā jñí ndíhi poder, ni sáha ya jniñu jéhu jíin rí.

Te Yaā íi ndoo cúu ya.

<sup>50</sup> Te ní cáni cundáhú ni yā tāca ñáyyu ndíso íyo nuū yā.

<sup>51</sup> Ni sáha ya jniñu jéhu jíin poder yā,

chí ni scúnu ya ñayuu casándúxi máá,

52 te ñayuu cácujuhnu, ni quende ya jeē cujéhu i.

Te ñayuu ndahú chi ni sajuhnu ya i,  
53 te ñayuu cájii sóco ni jēhe ya jeē cáji vāha i.

Te ñayuu cucá ní natajǐ yá i súcuan-ni.

54 Te ni chindéé ñáhán yá yohó, ñáyuu nación Israel, jeē cácuu yó mozo yā, te tu náā ni yā jeē cundáhú ni yā yohó.

55 Chi súcuan ni jejnūhun ya nuū tāca jíi yō, nuū Abraham jíin tāca yúcūn de jeē cóo níí cáni.

Achí María.

56 Te ni condee ña jíin Elisabet nájñūhun unī yoō. Yūcuán na te cuanuhun ña vehe ña.

*Jeē ní cacu Juan tēe scuándute*

57 Te ni jinū quivǐ jeē scácu Elisabet sēhe ña, te ni scácu ña ñin sēhe yíí. 58 Te tāca ñáyuu ndeé yajni jíin ña jíin tāca jnāhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun sǐ ni jíin ña. 59 Yūcuán na te nuū uná quivǐ jeē ní cacu i, te ni jengoo ñayuu ni sáha i circuncidar sūchi yíquǐn un. (Te yūcuan cúu ñin jñunī nuū yiquǐ cúñu tāca súchi yíí hebreo jeē steén jeē cácuu i ñayuu Yaā Dios.) Te snání i sūchí un síhvǐ tátá i Zacarías nuú. 60 Te ni cahān naná i: Ma cúu, chi Juan conaní i, áchí ña.

61 Te ni cacahān i jíin ña:

¿Te naun? Chi tú ni ñin jnāhan ró nání súcuan, áchí i.

62 Yūcuán na te jíin seña ni cacajñūhún i tátá sūchí un ndese cúní de jeē cónaní i. 63 Te máá de ni jicān ñin tutu, te ni tee de: Juan conaní i. Te tāca ñáyuu un ní canaa ni i cájito i. 64 Te ni nduvāha Zacarías jeē ní cuññhán de, te ni quejéé de cáhán de jeē yóhoyo vāha Yaā cúu Yaā Dios. 65 Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jité núu tāca jñūhun yáha jeē súcuan ni cuu. 66 Te tāca

ñáyuu jeē ní cajini jñūhun, ni quejéé i cánacani ni i, te cácajnūhun jnāhan i:

¿Ndese coo na cuéhu sūchi yáha? áchí i.

Chi máá Jítóho yō yóhoyo ni sáha ya jeē vāha jíin i.

*Jñūhun luu jeē ní nacani Zacarías*

67 Te tátá i Zacarías ni cunuú Espíritu Santo jíin de, te ni nacani de jñūhun ni steén Yaā Dios nuū de:

68 Yóhoyo vāha Yaā cúu máá Jítóho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

69 Te ni jeni ya ñin Yaā iyó poder jeē jnáma ya yohó, te Yaā ún cacu yucūn mozo yā rey David.

70 Chi súcuan ni jejnūhun ya, ni cacahān tāca tēe ndoo ánuá jeē ní canacani de jñūhun ya jnahán.

71 Chi ni cacahān de jeē jnáma ya yohó núu jeē cájito uhū yohó, jíin núu jeē cáquǐtǐ ni nuū yō.

72 Chi ni cundáhú ni yā tāca jíi yō jijnāhan,

te tu ní náā ni yā contrato íi yā.

73 Chi suu un ní jejnūhun téyǐ ya nuū jíi yō Abraham,

74 suu jeē jnáma ya yohó núu ñáyuu cájito uhū yohó, návāha cuajníñu yó núu yā, te ma yūhu yó i.

75 Te coo ndaā coo ndoo ánuá yō, cuajníñu yó núu yā tāca quivǐ jeē cótecu yō.

76 Te róhó súchi lúli, cuu ró tēe nacani jñūhun Yaā cujéhu téyǐ.

Chi cosnūu ró ichi núu maá Jítóho yō, návāha sátūhva ró ñáyuu, te sáá te quiji ya.

77 Te castūhun ró nuū ñáyuu maá ya jeē jnáma ya i, jíin jéé cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cundáhú ni yā yohó.

Jeē yúcuán tají yá maá Yaā jeē sáha jeē cúndijin ini anuá yō, quiji ya nde andiví,

<sup>79</sup> návaha jecūhun ni yohó jéē cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo sñ ni yō.

Achí Zacarías.

<sup>80</sup> Te sūchi lúli un ní jehnu i te ni ije i jíin jñūhun ya. Te ni condee i nde nuū ñūhun téhé ndé quiṽi ní quenda ndijin i nuū ñáyuu Israel.

*Jeē ní cacu Jesús  
(Mt. 1.18-25)*

## 2

<sup>1</sup> Te ni cuu jecu quiṽi, te Augusto, tēe cúu rey, ni ndacu de jniñu jeē coo censo jeē núcosō sihví ndivii ñayuu ní cáhuu nuū ndácu de jniñu. <sup>2</sup> Yáha cúu censo xihna ñūhún jéē ní casáha de ná ni cuu Cirenio gobernador nación Siria. <sup>3</sup> Te ndivii ñayuu cuanungoo i ná ñuu ná ñuu maá i jeē nácuáha i sihví i. <sup>4</sup> Te suni José ni quenda de ñuu Nazaret, ndañū Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenhán. Chi sēhe yucūn David cúu de. <sup>5</sup> Te ni jehēn de návaha nacuáha de sihví de jíin María, chi je yajni quijnáhan ña jíin de. Te ñūhun sēhe ña ni sáha Espíritu Santo. <sup>6</sup> Te níni cáhīn de yūcuán te ni jinū quiṽi jeē cácu sēhe ña. <sup>7</sup> Te ni scácu ña sēhe yí núú ña, te ni chusúcún ña i sahma cuitá, te ni jequin ña i ini ñn nundōo núú yéji quiṽi, chi tuá núne mesón condee ña.

*Jeē ní canecoo ndajéhé yā nuū pastor*

<sup>8</sup> Te yajni ñuu Belén cáhīn tēe cácuu pastor, te cándito de lanchi de ní niñu jecuáa nde yucu ún. <sup>9</sup> Te ñn sanaa-ni te ni cane ñn ndajéhé maá Jítoho yō nuū de, te nduva maá Jítoho yō ni ndindēe ní núú cáhīn

de. Te yōhyo ni cayūhú de. <sup>10</sup> Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsi ndasí ni táca ñáyuu: <sup>11</sup> Chi vijna nde ini ñuu David ni cacu ñn Yaā jnama róhó, te maá Jítoho yō Cristo cúu ya. <sup>12</sup> Te sūcuán nacuni rō sūchi yíquin un, chi ñūsúcún i sahma cuitá te catú i ini ñn nundōo núú yéji quiṽi. Achí yá.

<sup>13</sup> Te ñn sanaa-ni te ni canecoo cuehé gā ndajéhé andiví, cáhīn ya jíin ndajéhé un, te cácahān yā jeē yóhyo vāha Yaā cúu Yaā Dios. Te áchí yá:

<sup>14</sup> Yōhyo luu cújéhu Yaā Dios nde nuū sucún.

Te na ndúvaha ni táca ñáyuu ñayiví, sáha ya jeē cúsi ni yā jíin i.

Achí táca ndajéhé.

<sup>15</sup> Yūcuán na te cuanungoo ndajéhé un andiví. Te tēe cácuu pastor ni cacahān de jíináhan de:

Na quihín yō nde ñuu Belén, te cuni yō na vé ni cuu jeē ní castūhun maá Jítoho yō nuū yō, achí de.

<sup>16</sup> Te yachí cuangoo de, te ni nanihīn de María jíin José jíin sūchi yíquin un, catú i ini nundōo núú yéji quiṽi. <sup>17</sup> Te nuū ní cajini de nuū i, te ni canacani de jñūhun jeē ní cachi ndajéhé yā nuū de siquī sūchi yíquin un. <sup>18</sup> Te ni canaa ni táca ñáyuu cájini nahín i jñūhun cácahān tēe cácuu pastor. <sup>19</sup> Te María, ni quendōo táca jñūhun yáha nuū jeē níjnūni ña, te nácani ni ña siquī. <sup>20</sup> Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī táca jéē ní cajini sōho de jíin jéē ní cajito de, chi ni squícu nahín nájñūhun ni cahān ndajéhé yā jíin de.

*Jeē ní castéén de i nuū Yaā Dios ini templo*

<sup>21</sup> Te ni cuu unā quiṽi jeē ní cacu ya, te ni casáha de circuncidar sūchi yíquin un. Te ni casnání de i Jesús,



chi síhví yúcuán ní cachi ndajéhé yā nuū María nde ná tu jecūhun i.

<sup>22</sup> Te ni jīnu quivī jeē casquícu ña costumbre jeē ndúndoo ña nuū Yaā Dios jijnáhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. <sup>23</sup> Súcuán ni casáha de, chi yósó núu tútu ley yā: Tāca sūchi yí nūú jéē cácau, quihí cuenta i nuū Jítóho yō Yaā Dios, achí tutu. <sup>24</sup> Te suni cuasocō de nájnūhun cáhán ley maá Jítóho yō: Socō rō uū livi chí úu paloma, achí tutu.

<sup>25</sup> Te ni iyo ñn tēe naní Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te máá Espíritu Santo iyó yá jíin de. <sup>26</sup> Te je ni castūhun yá nuū de jeē ma cúu cuiti de chi nde coto de nuū Cristo jeē tají maá Jítóho yō Yaā Dios. <sup>27</sup> Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájnūhun cáhán ley Moisés. <sup>28</sup> Te Simeón ni ñunundee de i, te ni cahān de jeē yóhyo váha Yaā cúu Yaā Dios, te achí de:

<sup>29</sup> Tátá Yaā Dios, vijna te cuu cuāha ni jnúhun jeē cuu ná, chí je ni cusí ni ná.

Chí je ni squícu ní jnúhun ni je-jnúhun ní núu sáña jéē cúu ná mozo ní.

<sup>30</sup> Chí ni jito jínúu na núu Yaā jnáma sáña jíjnáhan ná.

<sup>31</sup> Chí ni jeni ní yá jeē jnáma ya tāca ñáyuu ñayiví.

<sup>32</sup> Te máá yá sáha jeē cúndijin ini anuá ñayuu táca nación,

návāha jecūhun ni i síquī ní.

Te sáha ya jeē cujéhu ñayuu maá ní Israel.

Achí Simeón.

<sup>33</sup> Te José jíin naná i cánaa ni de cájini nahín de jnúhun ni cahān

Simeón síquī i. <sup>34</sup> Te ni jicān tahú Simeón jehē de jíjnáhan de, te ni cahān de jíin naná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chí cúu i Yaā ní tají Yaā Dios, te sa squéhichí ni cuehē ñayuu i. <sup>35</sup> Te súcuán te quenda ndijin ndese cájeni ni tāca ñáyuu. Te máá ró chí jnahuhū ndasí ni rō coto ró jéē ndóho i. Achí Simeón.

<sup>36</sup> Te suni íne ñn ñahan nácani jnúhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxā cuiyā.

<sup>37</sup> Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújijo ña ini vehe i, chí jéjníñu ña nuū Jítóho yō Yaā Dios nduú ñuú, te ndite ni ña te jicān tahú ña. <sup>38</sup> Te suni hora un ní quee ña, te ni nacuatáhú ña nuū Yaā Dios. Te ni cahān ña jnúhun sūchi yíquín un jíin tāca ñáyuu Jerusalén jeē cáñuhun ni i jeē quée Yaā jnama i.

### *Jeē cuánungoo de ñuu Nazaret*

<sup>39</sup> Te ni jīnu ni casquícu de táca jniñu ndácu ley maá Jítóho yō Yaā Dios, te cuanungoo de ñuu de Nazaret, ndañúu Galilea. <sup>40</sup> Te sūchi lulí un ní jehnu i, te ni ije i, te ni cundichí gá i. Te ni sáha Yaā Dios jeē váha ndasí jíin i.

### *Jeē íne sūchi lulí Jesús ini templo*

<sup>41</sup> Te ndijnahan cuiyā jéngoo tátá i naná i ñuu Jerusalén, jeē cúu vico pascua. <sup>42</sup> Te nuū ní cuu uxí uū cuiyā i, te cuangoo tucu de Jerusalén, nájnūhun sáha sáha de quiví vico ún. <sup>43</sup> Te ni yáha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin naná i. <sup>44</sup> Te cájeni ni de jeē cuahán i mēhñu ñáyuu cájica ichi ún. Te ni cajica de ñn quiví, te sáa te ni cananducú de i mēhñu táca jnáhan de jíin ñáyuu cájini jnáhan

de jíin. <sup>45</sup> Te tu ní cánanihĩn de i. Te ni canandicó de cuango de Jerusalén, cuananducú de i.

<sup>46</sup> Te nuū uní quivĩ te ni cananihĩn de i ini templo, néne i mēhñu tēe cástéén tutu ley Yaā Dios, te jíni nahín i jeē cácahān de te cájnūhún i de síquĩ jnūhun ún. <sup>47</sup> Te tāca ñáyuu cájini jnūhun cáhán i, cánaa ni cájito jeē váha cájí xínĩ i te váha nástiío cuñĩ i jnūhun. <sup>48</sup> Te nuū ní cajito tátá i náná i nuū i, te ñi canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rĩ cananducú rí rohó, achí ña.

<sup>49</sup> Yūcuán na te ni cahān i:

¿Naun cananducú ní sãña? ¿A tu cájini ni jéé cánuú cocu ná jíin jniñu Tátá na Yaā Dios? Achí i.

<sup>50</sup> Te tu ní cájecūhun ni tátá i náná i jnūhun ni cahān i.

<sup>51</sup> Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo tāca jnūhun yáha núū jeē níjnūní ña. <sup>52</sup> Te Jesús ni jehnu ga i, te ni cundíchí gá i, te cúshĩ ni Yaā Dios jíin i, te suni súcuan tāca ñáyuu.

*Jnūhun Juan tēe scuándute*

(Mt. 3.1-12; Mr. 1.1-8; Jn. 1.19-28)

### 3

<sup>1</sup> Te ni cuu xahūn cuiyā jeē ndácu Tiberio jniñu ní naciōn. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. <sup>2</sup> Te sutū cujéhnu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. <sup>3</sup> Te ni jica nuu de tācá ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i. <sup>4</sup> Te súcuan ni

squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenhán:

Coo ĩn tēe cana jee nde nuū ñūhun téhé:

Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya.

<sup>5</sup> Te tāca xéhvā na ndúndaā, te tācá yucu jíin loma na ndúnduhvā,

te na ndúyóhó ichi yácuá, te na ndúlĩ ichi ndáyí.

Te ndĩhi un cúu jeē ndúvāha ndundaā anuá ñayuu nuū yā.

<sup>6</sup> Te ndĩhi i cuni i jeē jnáma Yaā Dios i.

Súcuan cahān Juan, achí tutu.

<sup>7</sup> Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájnūhun coō. ¿A cájeni ni rō jeē cuu cunu ró cácu ró núū castigo xeēn jeē quíji? <sup>8</sup> Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cácu ró síquĩ jeē cácuu ró yúcūn Abraham. Chi cáhán rĩ jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje váha, te núu cúní yā. <sup>9</sup> Te cácuu ró nájnūhun nundéhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájnūhun je íyó túhva ĩn cāa jeē cahnde nde yoho yujnu. Núu súcuan te sáha ya jíin ró nájnūhun jíin táca yujnu jeē tu cúun ndehē váha, jeē tahndé te cayū nuū ñūhún. Achí de.

<sup>10</sup> Te ñayuu un ní cacajnūhún i de: ¿Te ndese sáha ná núu súcuan? Achí i.

<sup>11</sup> Te ni cahān de:

Róhó jéé cánevāha uū sahma, na cuáha ró ĩn nuū jeē tu névāha. Te róhó jéé cánevāha jeē yejí, suni súcuan na sáha ró, achí de jíin i.

<sup>12</sup> Te suni jecu tēe cástútú xúhun rentá, ni quecoo de jeē cuándute de. Te ni cacajnúhún de Juan:

Maestro, te máá ná, ¿ndese sáha ná jíjnáhan ná?

<sup>13</sup> Te ni cahān Juan jíin de:

Ma scaá ró cácan rō xúhún, chí máá cúhva-ni jeē ní ndacu jniñu nuū rō, achí de.

<sup>14</sup> Te suni ni cacajnúhún jecu soldado:

Te máá ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajniñu ni ñin jíin jnúhun siúhú ni jíin jnúhun stáú yáhu, te cusñ ni rō jíin yáhu ró, achí de.

<sup>15</sup> Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. <sup>16</sup> Te ni cahān Juan jíin i jíjnáhan i:

Ruhū chí jíin ndute scuándute ri rohó. Te vēji ñin Yaā jeē nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhūn. Te cújéhnú ndasí yá, chí tú na vé jéhnú cuítí cúu ri nuū yā, ni jeē cuajniñu ri nuū yā vēsú ñin jniñu lúli gá nájnūhun jeē ndají rí vēsú correa ndijēn yā. <sup>17</sup> Te sáha ya nájnūhun sáha tēe scánda trigo, chí sásñin ya ñayuu vāha jíin ñáyuu cunéé, nájnūhun cúndoo trigo jeē quénda sñin paja. Te nastútú yá trigo yā ndívi ini yacā yā. Te paja chí jnaa yā nuū ñuhún jeē ma ndahvá cuítí. Achí Juan.

<sup>18</sup> Te súcuan te jíin cuéhē gā jnúhun ní stíhví ní de ñayuu un, ní nacani de jnúhun vāha Yaā Dios nuū i. <sup>19</sup> Te suni ní cahān xeēn de nuū Herodes, tēe cúu gobernador, chí tēe un ní nacueca de Herodías, ñasihí ñani de Felipe. Te cuéhē gā jniñu néé súcuan ni sáha Herodes. <sup>20</sup> Te sa víhyá gā ni sáha de jeē neé gá, chí ni chune de Juan vecāa.

*Jeē ní jendute Jesús  
(Mt. 3.13-17; Mr. 1.9-11)*

<sup>21</sup> Te nde ná tu quívi Juan vecāa, ná ni ine de ni scuándute de táca ñáyuu, te suni ni scuándute de Jesús. Te jícan tahu yā, te ni nune-ni andívi. <sup>22</sup> Te ni cuun Espíritu Santo ni quee xiní yā, te cáa nájnūhun ñin paloma. Te ichi andívi ní cahān ñin jnúhun:

Máá ró cúu Sēhe ri jeē maní ndasí rí jíin, te yōhyo cúsní ní rí jíin ró, achí.

*Lista ñayuu yucūn ní quíji Jesu-cristo*

*(Mt. 1.1-17)*

<sup>23</sup> Te ná ni quejéé Jesús steén yā jnúhun, te íyó yá nájnūhun ocō uxí cuiyā. Te cájeni ni ñayuu jeē sēhe José cúu ya. Te José ni cuu sēhe Elí, <sup>24</sup> te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, <sup>25</sup> te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, <sup>26</sup> te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, <sup>27</sup> te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, <sup>28</sup> te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, <sup>29</sup> te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, <sup>30</sup> te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, <sup>31</sup> te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, <sup>32</sup> te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te

Obed ni cuu sêhe Booz, te Booz ni cuu sêhe Salmón, te Salmón ni cuu sêhe Naasón, <sup>33</sup> te Naasón ni cuu sêhe Aminadab, te Aminadab ni cuu sêhe Aram, te Aram ni cuu sêhe Esrom, te Esrom ni cuu sêhe Fares, te Fares ni cuu sêhe Judá, <sup>34</sup> te Judá ni cuu sêhe Jacob, te Jacob ni cuu sêhe Isaac, te Isaac ni cuu sêhe Abraham, te Abraham ni cuu sêhe Taré, te Taré ni cuu sêhe Nacor, <sup>35</sup> te Nacor ni cuu sêhe Serug, te Serug ni cuu sêhe Ragau, te Ragau ni cuu sêhe Peleg, te Peleg ni cuu sêhe Heber, te Heber ni cuu sêhe Sala, <sup>36</sup> te Sala ni cuu sêhe Cainán, te Cainán ni cuu sêhe Arfaxad, te Arfaxad ni cuu sêhe Sem, te Sem ni cuu sêhe Noé, te Noé ni cuu sêhe Lamec, <sup>37</sup> te Lamec ni cuu sêhe Matusalén, te Matusalén ni cuu sêhe Enoc, te Enoc ni cuu sêhe Jared, te Jared ni cuu sêhe Mahalaleel, te Mahalaleel ni cuu sêhe Cainán, <sup>38</sup> te Cainán ni cuu sêhe Enós, te Enós ni cuu sêhe Set, te Set ni cuu sêhe Adán, te Adán ni cuu sêhe Yaā Dios, chi ni sāha ya de.

*Jeē ní jito ndee jexeén Jesús  
(Mt. 4.1-11; Mr. 1.12-13)*

#### 4

<sup>1</sup> Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū űuhun téhé ní sāha Espíritu Santo. <sup>2</sup> Te ni ine ya yūcuan űū xico quivī, te ni jito ndee jexeén yā, chi cúní jeē sāha ya cuēchi. Te tāca quivī ún ní yéji cuiűi yā, te ná ni yāha quivī ún, te jíi yā sōco. <sup>3</sup> Yūcuán na te ni cahān jexeén un jíin yā:

Núu máá ró cúu Sêhe Yaā Dios, te cahān rō jeē yuū yāha na ndúu staā caji rō, achí.

<sup>4</sup> Te ni cahān Jesús jíin:

Tuú chi yósó núu tútu ii: Nasūu máni máá jíin stāā cátecu űayuu, chi suni jíin tāca jnūhun cáhán Yaā Dios, achí yā.

<sup>5</sup> Yūcuán na te cuahān jexeén un jíin yā nde xinī ĩn yucu súcún, te

ĩn núnúu-ni ni steén nuū yā tācá naciún ní cáhnu űayivī. <sup>6</sup> Te ni cahān jíin yā:

Núu máá ró cuāha ri jeē cujéhnu ró núu ndivii naciún yāha, chi yōhyo luu cáa. Chi máá rí jnū ndihi, te cuu cuāha ri nuū ndé ĩn cúní rī. <sup>7</sup> Núu súcuan te núu cuiűi yítí ró chiűnúhún ró ruhū, te cuāha ndihi ri nuū rō. Achí jexeén.

<sup>8</sup> Te ni cahān Jesús jíin:

Satanás, cujiyo quihīn rō, chi yósó núu tútu jeē chiűnúhún űayuu máá Jítóho i Yaā Dios, te nuū maā-ni ya cuajniűu i. Achí yā.

<sup>9</sup> Yūcuán na te cuahān jexeén un jíin yā nde űuu Jerusalén. Te ni jeni ya xinī torre templo. Te ni cahān jíin yā:

Te núu Sêhe Yaā Dios cúu ró, te sngava ró máá ró nde nuū űuhun, chi jnama ya rohó. <sup>10</sup> Chi yósó núu tútu:

Tejniűu ya ndajéhé yā quijicoo coto rōhó.

<sup>11</sup> Te cunundee yā rohó jíjnáhan ya, návāha ma cáchihí ró jéhē rō nuū yuū.

Achí tutu. Achí jexeén.

<sup>12</sup> Te ni cahān Jesús:

Tuú chi suni yósó núu tútu jeē ma coto ndee űayuu Jítóho i Yaā Dios, núu jnama ya i chí tuú, achí yā.

<sup>13</sup> Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

*Jeē ní quejéé Jesús nácani ya jnūhun región Galilea*

*(Mt. 4.12-17; Mr. 1.14-15)*

<sup>14</sup> Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jité núu jnūhun ya. <sup>15</sup> Te ni steén yā jnūhun ini tācá vehe ĩ sinagoga, te ndihi űayuu ní cajejnūhún i ya.

*Jeē cuánuhun yā űuu Nazaret*

*(Mt. 13.53-58; Mr. 6.1-6)*

<sup>16</sup> Te ni najinū yā űuu Nazaret nuū ní jehnu ya. Te quivī ndétátú ní quivī ya ini vehe ĩ sinagoga,

nájnūhun sáha sáha ya. Te ni ndocuiñī yā jeē cahu ya tutu īī. <sup>17</sup> Te ni cajēhe de tutu ni tee Isaías, tēe ni nacani jnūhun Yaā Dios nde jehán. Te ni nune ya tutu ún, te ni nanihīn yā nuū yosó jnūhun ni cahu ya:

<sup>18</sup> Espiritu maá Jítoho yō Yaā Dios iyó yá jíin rí,

chi ni tejnīñu ya ruhū jeē nácani rí jnūhun vāha nuū ñayuu ndahú.

Te ni tají yá ruhū vēji rí jíin jnūhun jeē ndúvāha ni ñayuu cácuclhyá ni.

Te castūhun rí nuū ñayuu cáyihī ndaha jexeén jeē coo libre i.

Te sáha rí jeē ndúndijin ini anuá ñayuu tu cájecūhun ni,

te jnama rí ñayuu jeē cándoho i sáha jnáhan i.

<sup>19</sup> Te nacani rí jnūhun jeē ní quee tiempo jeē sáha Jítoho yō Yaā Dios jeē vāha ñayuu.

Achí tutu ni cahu ya.

<sup>20</sup> Te ni nacasi yā tutu ún, te ni nacuāha ya nuū tēe jéjñīñu ini sinagoga, te ni nucōo ya jeē steén yā jnūhun nuū ñayuu cáhīin ini sinagoga. Te tācá i cájito vāha i nuū yā.

<sup>21</sup> Te ni quejéé yá cahán yā jíin i:

Vijna te ni squícu jnūhun cáhán tutu īī yāha ní cajini sōho ró, áchí yá.

<sup>22</sup> Te ndivii i ni cacahān jeē vāha tēe cúu ya, te cánaa ni i jeē ní cajini i tāca jnūhun luu ni cahán yā. Te ni cacajnūhun jnáhan i:

¿A násūu séhe José cúu tēe yáha?

<sup>23</sup> Te ni cahán yā jíin i:

Jíní vāha rí jeē cájeni ni rō cahán rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúní cahán jeē nájnūhun ni nasávāha rí cuehē ñayuu cácuclhū ini ñuu Capernaum ní canihīn rō jnūhun, suni súcuan na sáha rí ñuu yō yáhá návāha candíje ró cájeni ni rō. Achí yá jíin i.

<sup>24</sup> Te ni cahán gā yā:

Jendaá cahán rí jíin ró, ni ñn tēe nácani jnūhun Yaā Dios, tu cájetáhú ñayuu ñuu maá de nuū de. <sup>25</sup> Te suni jendaá cahán rí jíin ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiñi saū unī cuiyā yosáva, te ni íyo ñn jnamā xeēn ní cáhnu nación. <sup>26</sup> Te tu ní tájī Yaā Dios Elías quihīn de nuū ní ñn ñahan viuda nación yō Israel, chi nuū maá ñn-ni ñahan viuda jeē ndeé ñuu Sarepta ndañūú Sidón, ni jehēn de ni jito de jeē ní yeji ña. <sup>27</sup> Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñn de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

<sup>28</sup> Yūcuán na te tāca ñayuu cáhīin ini sinagoga, yōhyo ni caquitiñi ni i jnūhun ní cahán yā. <sup>29</sup> Te ni candocuiñī i, te ni caquenehen i ya yatā ñūú ún, cuahān i jíin yá xiní yúcu íne ñuu ún, chi cácuñi i chundahá i ya ñinga ya cava ún. <sup>30</sup> Te tu ní cúu sáha i, chi ni yāha-ni ya mēhñú i cuahān yā.

*Jeē ní quenehen ya tachī ini ñn tēe (Mr. 1.21-28)*

<sup>31</sup> Yūcuán na te cuahān Jesús ñuu Capernaum región Galilea. Te quivī ndétatu ní steén yā jnūhun nuū ñayuu. <sup>32</sup> Te ni canaa ni i cájini i jnūhun steén yā. Chi ni steén vāha ya nuū i, chi jíiní vāha maá yá.

<sup>33</sup> Te ini vehe sinagoga un íne ñn tēe jeē ñūhun tachī xeén ini de. Te tēe un ní cana cóhó de:

<sup>34</sup> Cuijiyo ní. ¿Naun vēji ní núu na jíjnéhan ná, Jesús ñuu Nazaret? ¿A véji ní jéé snāá ni sáña, chí naún? Je jíiní na ndé ñn cúu ní, chi Sēhe īī Yaā Dios cúu ní. Achí de.

<sup>35</sup> Te Jesús ni cahán xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachí ún. Te ni quenda ini de cuahān, te tú na vé ni sáha ga jíin de. <sup>36</sup> Te ndihí ñayuu un ní cayūhú i, te ni cacahān i jíin jnáhan i:

¿Na jnūhun cúu yāha jēe ní cuu súcuan? Chi cújéhnú tēe yáha jēe ndácu nīhin de jniñu nuū tachí, te quéndacoo-ni, áchí i.

<sup>37</sup> Te jnūhun ya ni jitē núu cuahān ní cáhnu región yūcuán.

*Jeē ní nasávāha ya naná chīsó Simón Pedro*

(Mt. 8.14-15; Mr. 1.29-31)

<sup>38</sup> Yūcuán na te ni quenda Jesús ini vehe i sinagoga, te cuahān yā te ni jinū yā vehe Simón. Te náná chīsó Simón, yáhi xeēn quíji ña, te ni cacahān ndahú de jíin yá jehē ña. <sup>39</sup> Te ni jíta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuiñi-ni ña, te ni sáha ña jeē ní yeji yā jíin de.

*Jeē ní nasávāha ya cuehē ñayuu*

(Mt. 8.16-17; Mr. 1.32-34)

<sup>40</sup> Te jeē ní quēe niāndii, te tāca ñáyuu jeē iyó jnáhan i cácuñú ndínuū cuehyi, ni caquindeca i jnáhan i un núū yā. Te ni soó yá ndaha ya siquī iin iin i, te súcuan ni nasávāha ya i. <sup>41</sup> Te suni cuehē ñayuu ni quéndacoo tachí ini i, te cácana cóhó táchí ún:

Máá ní cúu Sēhe Yāā Dios, achí.

Te ni cahān xeēn yā nuū, te tu ní jéhe ya jnūhun jeē cahān gā súcuan, chí cájini jeē maá yá cúu Cristo, Yāā ní taji Yāā Dios.

*Jeē ní nacani ya jnūhun región Galilea*

(Mr. 1.35-39)

<sup>42</sup> Te nuū ní cundijin, te ni quenda ya cuahān sīn ya yatá ñúū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i. <sup>43</sup> Te ni cahān yā jíin i:

Suni cánuú jēe nacani ri jnūhun vāha nuū tāca gā ñuu siquī ndese ndácu Yāā Dios jniñu, chí jeē yúcuán ní taji yá ruhū vēji ri. Achí yá.

<sup>44</sup> Te ni jica cuu ya ní región Galilea, nácani ya jnūhun ini tāca vehe i sinagoga.

*Jeē ní canihñ de cuehē chácá ni sáha ya*

(Mt. 4.18-22; Mr. 1.16-20)

## 5

<sup>1</sup> Te iin quiví te íne Jesús yumar Genesaret. Te ni quecoo cuehē ñayuu, te ni chitú nīhin i nuū yā, chí cácuñi i cuni nahín i jnūhun Yāā Dios. <sup>2</sup> Te ni jito ya jeē yúcu uū barco yajni yumar. Te tēe cájñi chácá, je ni quéndacoo de ini barco, te cáncate de ñunu de. <sup>3</sup> Te ni quiví ya ini iin barco jeē cúu barco Simón. Te ni cahān yā jíin de jeē na scáca yátá de quihñ jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. <sup>4</sup> Te nuū ni jínu ni steén yā, te ni cahān yā jíin Simón:

Scáca ró barco na quihñ yō nde nuū iyó cúnú ndute, te sínga ró ñunu ró jñi ró chácá, áchí yá.

<sup>5</sup> Te ni cahān Simón:

Maestro, ní niñu ni casínga ná ñunu jeē jñi ná tí, te tu ní níhín cuiti ná ní iin tí. Te jeē cahán maá ní súcuan, te na sínga tucu ná ñunu, áchí de.

<sup>6</sup> Te ni casínga de, te ni quivicoo cuehē ndasí chácá, nde nducú táhndē ñunu de. <sup>7</sup> Te ni cacaja ndahá de nuū jnáhan de cáhñ ini inga barco, na quíjicoo chindéé ñájñáhan jíin de. Te ní quecoo de, te ní cascútú ndá de tí ndíndúú barco, te nde je yajni quēe barco. <sup>8</sup> Te ni jito Simón Pedro jeē súcuan ni cuu. Te ni jecuiñi yití de nuū Jesús, te ni cahān de:

Cujiyo ní núū ná, chí tēe iyó cuéchi cúu ná, áchí de.

<sup>9</sup> Chi máá de jíin táca tée cáhīn jíin de, ni cayūhú de jeē ní canihīn de cuehē chācá un ní sáha ya. <sup>10</sup> Te suni ní cayūhú Jacobo jíin Juan, ndindúú séhe Zebedeo, chi tée chíndéé ñájnáhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

<sup>11</sup> Yūcuán na te nuū ni jíinūcoo de jíin barco nuū ñūhun íchi, te ni castóo de ndihī ndajníñu de, te ni candiquīn de ya cuango de.

*Jeē ní nasávāha ya ñn tēe ndóho cuehyī stehyú*

(Mt. 8.1-4; Mr. 1.40-45)

<sup>12</sup> Yūcuán na te íne Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñī yití de ni jequīn de nuū de nde nuū ñūhun, te ni cahān ndahú de jíin yá:

Jíní na jéē cuu sáha ní jéē nduvāha ná, te núu cúní ni, áchí de.

<sup>13</sup> Yūcuán na te ni soó yá ndaha ya siquī de, te ni cahān yá:

Cúní rī. Te na ndúvāha ró, áchí yá.

Te ná ni cahān yá súcuan, te ni nduvāha-ni tēe ndóho cuehyī stehyú un. <sup>14</sup> Te ni ndacu ya jniñu nuū de jeē ma cáchi cuiti de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yá, nájnūhun ni ndacu Moisés jniñu jehán. Te súcuan te cuni ñayuu jeē ní nduvāha ró. Achí yá.

<sup>15</sup> Te víhyá gā ni jītē núu jnūhun ya cuahān. Te ni cataca cuehē ñayuu jeē cuni nahín i jnūhun stéén yā, jíin jéē nasávāha ya i nuū tāca cuehyī cándoho i. <sup>16</sup> Te máá yá cuahān sáin ya nuū tú ñayuu, te ni jicān tahú yá.

*Jeē ní nasávāha ya ñn tēe ndóho cuehyī ní íjin*

(Mt. 9.1-8; Mr. 2.1-12)

<sup>17</sup> Te ñn quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de táca ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuu. <sup>18</sup> Yūcuán na te ni quecoo jecu tēe, cándiso de ñn tēe ndóho cuehyī ní íjin, cáttú de nuū ñn camilla. Te cánducú de squívī de tēe ún ini vehe, te caquin de nuū íne ya. <sup>19</sup> Te tu ní cáhīn de modo quívicoo de jíin tēe un, chi cáyūcú chítú ñáyuu. Te ni cacoo de siquī véhe, te ni canune de teja. Te ni cascúun de tēe cúde un jíin camilla de nde nuū íne Jesús mēhñu ñáyuu. <sup>20</sup> Te ni jini Jesús jeē cácandíje de jeē cúu nasávāha ya tēe cúde un. Te ni cahān yā jíin tēe cúde un:

Róhó, je íne cáhnu ni rī nuū tāca cuéchi ró, áchí yá.

<sup>21</sup> Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yá: ¿Ndé ñn cúu tēe yáha jéé cahán de jnūhun ndevāha jeē quití ni Yaā Dios? Chi nasūu Yáā Dios cúu de jeē cóne cáhnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeé cahán ndevāha ri? <sup>23</sup> Jeē uó jnūhun yáha, ¿ndé ñn yí gá cáa? ¿A jéé cahán rī jíin tēe cúde: Je íne cáhnu ni rī nuū tāca cuéchi ró? ¿Chí yí gá jeé cahán rī: Ndocuiñī te caca ró, chi je ni nduvāha ró, achi rī? <sup>24</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayívī yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

25 Te ni ndocuiñi-ni tēe ún, jito jínúu ñayuu. Te ni naquihin de camilla nuū ni cátu de, te cuanuhun de vehe de. Te nácuatáhu de nuū Yaā Dios. 26 Te yōhoyo ni canaa ni táca ñayuu cájito i, te ni cacahān i jeē yōhoyo vāha Yaā cúu Yaā Dios. Te suni yōhoyo cáyūhú i, te cacahān i:

Vijna te ni cajito yó jniñu jéhnú téyí, áchí i.

*Jeē ní cana ya Leví  
(Mt. 9.9-13; Mr. 2.13-17)*

27 Yūcuán na te ni quenda ya cuahān yā, te ni jito ya nuū in tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiqūn ruhū na quíhín yō.

28 Te ni ndocuiñi de, te ni stóo de ndihí ndajniñu de, te cuahān de jín yá.

29 Yūcuán na te ni sáha Leví in vico cáhnu vehe de, jeē cúsi ni de jín Jesús. Te cuehē tēe cástútú xúhun renta jín sava ga tēe, cáyucú de mesa cáyeji de staā jín yá. 30 Te tēe grupo fariseo jín tēe cástéén tutu ley Yaā Dios, ni quejé de cacahān de siquī tēe cáscuáha jín yá, te ni cacajñuhún de:

¿Najehē cáyeji rō cájili ró jín tēe cástútú xúhun renta jín tēe cása cuēchi? áchí de.

31 Te ni cahān Jesús:

Ñayuu cáhoyo vāha, tu jini ñuhún i tēe tájna, chí ñayuu cácuñú cúu jeē jini ñuhún. 32 Te ruhū nasūu jéé véji ri cana ri ñayuu tú cuēchi, jeē cúu i nájnūhun ñayuu cáhoyo vāha. Chí sa suhva véji ri cana ri ñayuu cáhoyo cuēchi, jeē na nácani ni i te stóo i cuēchi i. Achí yá.

*Jeē ní cacajñuhún de ya siquī jeē cōndite ni  
(Mt. 9.14-17; Mr. 2.18-22)*

33 Yūcuán na te ni cacahān de jín yá:

Tēe cáscuáha jín Juan, jín tēe cáscuáha jín grupo fariseo, cuehē jinu cáhoyo ndite ni de te cájcān

tahú de. Te tēe cáscuáha jín máá ní, ¿naun tu cása de súcuan? Chí cáyeji de cájili de.

34 Te ni cahān yā jín de:

¿A cuu condite ni de níni jéé iyó rí jín de? ¿A cuu sáha ró jéé condite ni ñayuu cáhīn vico nándāha, te núu níni néne tēe nándāha? 35 Te quee quivī jeē cújiyo tēe ni nandāha, te quivī ún chí condite ni i. Achí yá.

36 Te suni ni cahān yā uū jñūhun yátá síquī jeē tu quíjnāhan jñūhun jeé jéé steén yā jín táca jñūhun jehān. Achí yá:

Ni in ñayuu tu jéhn de i in pedazo sahma jéé i, te nachuhun i nuū in sahma túhú i. Chí núu súcuan te stívi i sahma jéé i, te suni tu quíjnāhan jeé jeé un jín jéé tuhú.

37 Te tú ni in chúhun vino jeé ini ñi túhú. Chí núu súcuan, te vino jeé un ndatá ñi, te naa vino jín ñi. 38 Chí cánuú jéé chúhun vino jeé ini ñi jéé, te súcuan te quéndōo vāha ndindúú. 39 Te ñayuu cájili vino áva, tu cúni i coho i jeé jeé, chí jeé áva cúu jeé vāha ga, achí i. Achí yá.

*Jeē ní cataxín de yoco trigo quivī ndétātu  
(Mt. 12.1-8; Mr. 2.23-28)*

## 6

1 Te in quivī ndétātu ní yāha Jesús cuahān yā mehñú nuū cáa trigo. Te tēe cáscuáha jín yá ni cataxín de yoco trigo, te ni caquín de ini ndaha de, te ni cayejí de. 2 Te sava tēe grupo fariseo ni cacajñuhún de:

¿Najehē cása ró jniñu jeé tu iyó vāha sáha ró quivī ndétātu?

3 Te ni cahān Jesús jín de:

¿A tu ní cácahu cuiti rō tutu ndese ni sáha David, in quivī jeé ni jí de sōco jín tēe cáhīn jín de? 4 Te ni quivī de ini vehe Yaā Dios, te ni quihin de pan i jeé yosó ndijin nuū Yaā Dios. Te ni yeji de, te suni ni jēhe de ni cayejí tēe cáhīn jín de. Te tú na ley jeé cáji ni in tēe, chí máá-ni sutú cuu caji. Te vēsú



súcuan te tú na cuēchi ní iyo siquī de. Achí yá.

<sup>5</sup> Te ni cahān gā yā jín de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétātú, áchí yá.

*Jeē ní nduvāha tēe ni ichī ndaha*

*(Mt. 12.9-14; Mr. 3.1-6)*

<sup>6</sup> Te inga quivī ndétātú, suni ni quivī ya ini vehe iī sinagoga, te ni steén yā jnūhun. Te yūcuan íne iin tēe ni ichī ndaha váha de. <sup>7</sup> Te tēe cástéén tutu ley jín tēe grupo fariseo, cájito yuhu de ya núu nasávāha ya tēe un quivī ndétātú, návāha nihīn de cuēchi siquī yá. <sup>8</sup> Te máá yá je jín yā ndese cájeni ni de. Te ni cahān yā jín tēe ni ichī ndaha ún:

Ndocuiñī, te condichi rō mēhñu yáha, áchí yá.

Te ni ndocuiñī de, te ni jecondichi de mēhñú. <sup>9</sup> Yūcuán na te ni cahān yā jín de jínáhan de:

Na cájnūhun rí rohó iin jnūhun: ¿Ndesé cáhán ley siquī quivī ndétātú? ¿A jéé sáha váha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? Achí yá.

<sup>10</sup> Te ndéhé yá nuū de jeé cáyūcú de ní xiin ya. Te ni cahān yā jín tēe cúhú un:

Scáá ndaha ró.

Te ni scaá de, te ni nduvāha-ni ndaha de. <sup>11</sup> Te yōhyo ni caquīñī ni táca tēe un, te ni quejéé de cándajnūhún de siquī Jesús, ndese cahni de ya.

*Jeē ní nacāji ya uxī uū tēe apóstol*  
*(Mt. 10.1-4; Mr. 3.13-19)*

<sup>12</sup> Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios. <sup>13</sup> Te nuū ní cundijin, te ni cana ya táca tēe cáscuáha jín yá. Te ni nacāji ya uxī uū de, te ni cahān yā jeé cuu de apóstol, condiso jniñu de nacani de jnūhun ya. <sup>14</sup> Te yāha cúu síhví de jínáhan de: Simón jeé ní nasnání

yá de Pedro, jín ñani de Andrés, te suni Jacobo jín Juan, Felipe jín Bartolomé, <sup>15</sup> Mateo, Tomás, Jacobo sēhe Alfeo, Simón tēe grupo cananista, <sup>16</sup> Judas ñani Jacobo, jín Judas Iscariote, tēe jeé ní nastú de ya.

*Jeē ni stéén yā nuū ñáyuu cuehē*

*(Mt. 4.23-25)*

<sup>17</sup> Te ni nanuu ya yucu jín táca tēe un jéé cascuáha jín yá, te ni jecuiñī yā iin nduhvá jín de. Te cuehē ñayuu ní región Judea jín ñuu Jerusalén, jín ñayuu yumar ñuu Tiro jín ñuu Sidón, ni quecoo i jeé cúni nahín i jnūhun stéén yā, jín jéé ndúvāha i cuehyī cándoho i. <sup>18</sup> Te ñayuu jeé ñúhun tachī ini i, suni ni canduvāha i ni sáha ya. <sup>19</sup> Te ndivii ñayuu cácuni i quehé i ya, chí súcuan ndúvāha i sáha ya jín poder yá.

*Jnūhun ñayuu yōhyo ndetū jín ñáyuu jeé xeēn ndoho*

*(Mt. 5.1-12)*

<sup>20</sup> Te ni ndacoto ya nuū tēe cáscuáha jín yá un, te ni cahān yā:

Yōhyo ndetū rohó jéé cándoho ndáhú, chí quivī ró ñuu nuū ndácu Yaā Dios jniñu.

<sup>21</sup> Yōhyo ndetū rohó jéé cájii sōco vijna, chí quiiji quivī jeé ndutú chíji ró.

Yōhyo ndetū rohó jéé cándahyū rō vijna, chí quiiji quivī jeé cuecú rō.

<sup>22</sup> Yōhyo ndetū rō te núu cáquīñī ni ñayuu nuū rō jeé siquí ruhū, Yaā ní nduu tēe, te cáscuéhichí i rōhó, te cácahān neé i nuū rō, te cácahān i jeé ñáyuu casáha jniñu neé cácuu ró. <sup>23</sup> Te na cóo sí ni rō quivī sáha i súcuan, te víhyá gā na cúsiñī ni rō, chí cáhnu téyí coo tahū rō nde andiví. Chí suni súcuan ni casáha uhū táca jii i jín tēe ni canacani jnūhun Yaā Dios nde jengahán.

<sup>24</sup> Te nacā jeé xeēn ndoho rōhó ñáyuu cucá, chí vijna-ni cúu jeé cáhíyo sí ni rō.

25 'Nacā jeē xeēn ndoho rōhó ñáyuu jeē vjna cáhiyo vetū chíji ró, chí quiji quivī jeē cuu rō sōco.

'Nacā jeē xeēn ndoho rōhó ñáyuu jeē vjna cájecū rō, chí quiji quivī jeē nducuíhyá ni rō te ndahyū rō.

26 'Nacā jeē xeēn ndoho tāca ró núu cájejnúhún ñáyuu rohó, chí suni súcuan ni cajejnúhún jíi i tāca téé ni canacani jnūhun stáhú ndé jenahán.

*Jnūhun jeē cundáhú ni yō ñáyuu cájito uhū yohó*

(Mt. 5.38-48; 7.12)

27 'Te cáhán rī jíin rōhó jeē cájini sōho: Cundáhú ni rō ñáyuu cájito uhū rohó. Te sáha vāha ró jíin ñáyuu cáquitī ni nuū rō. 28 Te cacān rō jeē váha coo ñáyuu cácahān ndevāha síquī rō. Te cacān tahú rō jehē ñáyuu cácahān neé núū rō. 29 Te núu ndé téé caní de ñin lado yiqui núú rō, te vāha ga suni cuāha ró inga lado caní de, vēsú jeē nácuāha ró jéé ndútahū de. Te núu ndé téé cúní de quende de ticāchi ró, suni cuāha ró jnūhun jeē na quíhín de jíin ndé camisa rō. 30 Te na-ni ñáyuu jicán nuū rō, te cuāha ró núú i. Te ñáyuu quíhin ndajníñu ró, ma nānacān rō. 31 Te nájnūhun cáconi rō jeē sáha vāha ñáyuu jíin ró, suni súcuan na sáha vāha ró jíin i.

32 'Chi núu íyó manī rō jíin máá-ni ñáyuu jeē maní jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni maní de jíin téé maní jíin máá de. 33 Te núu sáha vāha ró jíin máá-ni ñáyuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni súcuan cásáha de. 34 Te núu cuāha núú ró núu maá-ni ñáyuu jeē ñūhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihín tucu de. 35 Núu súcuan te cundáhú ni rō ñáyuu cájito uhū

rohó, te sáha vāha ró jíin i, te cuāha núú ró núú i. Te ma cuāha ró máá síquī jeē caní ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujéhnu téyí. Chi máá yá vāha ni yā jíin ñáyuu tu nácuatáhú núu yā jíin ñáyuu casáha neé. 36 Núu súcuan te cundáhú ni rō ñáyuu, nájnūhun máá Tátá rō cundáhú ni yā i.

*Ma cahán yō síquī cuéchi jnāhan yó*

(Mt. 7.1-5)

37 'Ma cahán rō síquī cuéchi ñáyuu ndese sáha i, návāha suni ma cahán Yaā Dios cuéchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. 38 Cuāha ró núú ñáyuu, te suni súcuan cuāha Yaā Dios nuū rō. Chi vāha ndasí cuāha ya nuū rō, nájnūhun jeē chícuāha váha ya, quisí ya, sánihín ya, te nde scáa ya cuāha ya nuū rō. Chi cūhva jeē cájēhe ró núú ñáyuu, suni cūhva un cuāha ya nuū rō. Achí yá.

39 Te ni cahán yā ñin jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā? 40 ñin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

41 'Te cuéchi jnāhan ró cúu nájnūhun jeē ñe ñin yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuéchi máá ró jeē cúu nájnūhun jeē ñe ñin nduhu tinūú máá ró? 42 ¿Te naun cácahān rō jíin jnāhan ró: Condetu, na táva rī yāca ñe tinūú ró, te tu canacani ni rō jeē ñe ñin nduhu tinūú máá ró? Tēe stáhú-ni cácuu ró núu súcuan. Xihna gā tinūú máá ró tava rō nduhu, te yūcuán

na te cuu condēhe váha ró jeē táva rō yāca tīnūu jnāhan rō.

*Jiín jniñu cásaha ñayuu te nácuni yō ndese ñayuu cácuu i*

(Mt. 7.17-20; 12.34-35)

<sup>43</sup> 'Tu iyó yujnu váha jeē jéhe ndehē neé, te ni tu iyó yujnu neé jeē jéhe ndehē váha. <sup>44</sup> Chi jíin ndéhē jeē jéhe ñn ñn yujnu, te jíini yō núu yujnu váha cúu. Chi tu scóyo yó ndehē higo xinī ñnu, ni tu scóyo yó ndehē uva xinī yucú zarza. <sup>45</sup> Te suni súcuan tēe vāha, cāhán de jnūhun vāha, chí vāha ánuá de. Te tēe sáha neé cāhán de jnūhun neé, chí cánéé ánuá de. Chi modo ndese iyó ánuá ñayuu, máni jeē yúcuan cúu jeē cacahān i.

*Siquī uú vehe*

(Mt. 7.24-27)

<sup>46</sup> ¿Najehē cacahān yiñúhún ró jíin rí: Jitoho ná, áchí ró, te tu cásquicu ró jniñu ndácu rí? <sup>47</sup> Tāca ñáyuu vēji nuū rī te jíini sōho jnūhun cāhán rī te squícu, na stéén rī nuū rō ndese cúu i. <sup>48</sup> Cúu i nájnūhun ñn tēe jeē ní jeni de vehe de, te ni jete cúnú de nde ni nihín de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáha, chí siquī toto ín. <sup>49</sup> Te tāca ñáyuu jíini sōho jnūhun cāhán rī, te tu squícu i, cúu i nájnūhun ñn tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ñ-ni. Achí yá jíin i jíjnāhan i.

*Jeē ní nasávāha ya mozo capitán*  
(Mt. 8.5-13)

## 7

<sup>1</sup> Te nuū ní jíinu ni cahān yā ni cajini nahín ñáyuu ún, te cuahān yā ñuu Capernaum. <sup>2</sup> Te ñn tēe nación Roma jeē cúu capitán, iyó ñn mozo de jeē manī ndasí de jíin. Te mozo un cūhú i te je yajni cuu i. <sup>3</sup> Te ni jíini capitán jnūhun Jesús. Te ni tají de jecu tēe jéhu cándacu jniñu nuū ñáyuu hebreo, cuango de nuū yá

jeē cahán ndahú de jíin yá jeē na quíji ya sávāha ya mozo de. <sup>4</sup> Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chí tēe vāha cúu de. <sup>5</sup> Chi manī de jíin nación yō, te máá de ni ndacu jniñu ni cuvāha ñn vehe sinagoga cuu yó. Achí de.

<sup>6</sup> Yūcuán na te cuahān Jesús jíin de jíjnāhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájnēñu de nihín, chí tu cújéñu de jeē quihín ni quívi ní vehe de. <sup>7</sup> Jeē yúcuan tu ní sájéñu de máá de jeē quíji de nuū ní, áchí de. Te máá jēe cahán-ni ní, te na ndúvāha-ni mozo de, áchí de. <sup>8</sup> Chi máá de suni ndiso jniñu de ni casáha tēe cácujeñu ga. Te cújéñu de nuū taca soldado de, áchí de. Te núu cāhán de jíin ñn tēe jeē na quihín de, te cuahān de. Te núu cāhán de jíin inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jíin yá.

<sup>9</sup> Te jeē ní jíini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní nihín rī ni ñn ñayuu candíje nihín súcuan, nájnūhun cándíje tēe ún, vēsú tēe nación tu jíini jnūhun Yā Dios cúu de. Achí yá.

<sup>10</sup> Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

*Jeē ní nastécu yā sēhe yú ñahan viuda*

<sup>11</sup> Yūcuán na te cuahān yā ñn ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá. <sup>12</sup> Te ná ni cuyajni ya yuñú ún, te yúcuan ní quendacoo ñayuu jeē quichindūji i ñn tēe suchí jéé ni

jihī. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. <sup>13</sup> Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

<sup>14</sup> Yūcuán na te ni jinū yā nde nuū ndíyí ún, te ni jn# ya yejnū, te ni cajecuiñī tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñī, achí yá.

<sup>15</sup> Yūcuán na te ni nucōo súchi ní jihī ún, te ni quejéé i nácahān i. Te ni nacuāha ya i nuū naná i. <sup>16</sup> Te ndivii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee ñin tēe cújéhnu nácani jnūhun Yaā Dios.

Te suni cácahān i:

Máá Yaā Dios ni quejéé yá chindéé ñáhán yá ñayuu yā. Achí i.

<sup>17</sup> Te ni jitē núu jnūhun ya ñi cáhnu región Judea jíin táca región yajni yūcuán.

*Jeē ní tají Juan uū tēe nuū yā  
(Mt. 11.2-19)*

<sup>18</sup> Te ine Juan vecāa, te tēe cáscuáha jíin de ni cacastūhun núu de jeē súcuau ni cuu táca jniñu yáha.

<sup>19</sup> Te ni cana Juan uū tēe ún, te ni tají de cuangoo nuū Jesús, návāha cajnūhún de ya núu máá yá cúu ndije Cristo jeē ní cachí Yaā Dios jeē tají yá, chí núu nasūu yá cúu te condetu de inga. <sup>20</sup> Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajnūhun ná nihín núu máá ní cúu Cristo jeē achí tutu jeē quíji, chí condetu yó inga tēe quiji. Achí de.

<sup>21</sup> Te máá hora un ní nasáyāha ya cuehē ñayuu cácuñū, jíin ñayuu cándoho cuehyī xeñ, jíin ñayuu ñūhun tachí ini. Te suni cuehē ñayuu cuaá ní ndundijin tinūú i ní sáha ya. <sup>22</sup> Te ni cahān yā jíin de:

Cuángoo te castūhun ró nuū Juan táca jniñu ni cajito ró jíin jnūhun

ni cajini ró. Te cachi rō nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha rī. Te suni nácani rī jnūhun nuū ñayuu ndahú jéé jnama Yaā Dios i. <sup>23</sup> Te yóhyo ndetū tēe jeē ma nácani yátá ni de jeē ruhú cúu Cristo. Súcuau cachi rō nuū Juan. Achí yá jíin de.

<sup>24</sup> Te ná cuanuhun ndindúú tēe ún, te ni quejéé Jesús cahān yā jnūhun Juan jíin ñayuu:

¿Na vé ni jécondēhe ró jijnáhan ró ndé nuū ñūhun téhé? ¿A ñin tēe jéni ñin jéni uū ni, nájnūhun ite jeē cánda sáha tachí? <sup>25</sup> Te núu tuú, ¿te na vé ni jécondēhe ró núu súcuau? ¿A ñin tēe cúní cujéhnu jeē ñūhun sahma lúu? Tuú chí cajini rō jeē tēe cáñuhun sahma lúu te cánducú táca jéé cúsiñi, máni ini vehe rey cáyúcú de. <sup>26</sup> ¿Te na vé ni jécondēhe ró núu súcuau? ¿A ñin tēe nácani jnūhun Yaā Dios? Cáhán rī jíin ró jeē suu ni jécondēhe ró. Te cújéhnu ga Juan yáha vésú táca gá tēe ni canacani jnūhun Yaā Dios. <sup>27</sup> Chí jnūhun Juan cúu jeē ni cahān Yaā Dios jeē yosó núu tútu i:

Tají rí tēe nacani jnūhun rī cosnūú de ichi núu Cristo,

návāha coo túhva ñayuu jeē jinú yā. Achí Yaā Dios, achí tutu. <sup>28</sup> Te cáhán rī jíin ró jeē ini ñayiví yáha cújéhnu ga Juan tēe scuándute vésú táca gá tēe jeē ni íyo ini ñayiví. Te vésú súcuau te táca tēe núu ga ini ñuu nuū ndácu Yaā Dios jniñu, cújéhnu ga de vésú Juan. Achí yá.

<sup>29</sup> Te táca ñayuu jíin táca tēe cástútú xūhun renta, ni cajini i jnūhun cáhán yā, te ni cajetáhú i jeē Yaā ndaá cúu Yaā Dios, chí je ni cajendute i nuū Juan. <sup>30</sup> Te tēe grupo fariseo jíin tēe cástéén tutu ley, ni casquéhichí de jnūhun jeē cuní Yaā Dios sáha ya jeē vāha de, chí tu ní cájendute de nuū Juan.

<sup>31</sup> Te ni cahān gā máá Jítoho yō:

Yāhá cachi rī ñn jñuhun yátá návāha na cúni rō ndese cúu ñayuu tiempo vijna. <sup>32</sup> Cúu i nájnūhun sūchi lúli cáhīn nuū yáhu cácasíquí i. Te cácana ndee i xinī jnáhan i: Ni cativi rī scuillí, te tu ní cájita jéhe ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúli un jéē tu ní núnjahan ni i ni ñn, suni súcuan cándāa ró. <sup>33</sup> Chi ni quiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujahan ni rō, chi ni cacahān rō jeē ñūhun tachī ini de. <sup>34</sup> Yūcuán na te ni quee máá rí, Yaā ní nduu tēe, te yéji rī jíhi ri, te tu cánujahan ni rō, te chísoó jñuhun ró cácahān rō jeē máni máá jéē yéji rī jíhi ri vino. Te quíjnáhan rī jíin tēe cástútú xūhun renta jíin táca gá tēe cásaáa cuēchi, achí ró. <sup>35</sup> Te núu cúndichí ñn tēe jíin jñuhun Yaā Dios, te jíin jniñu sáha de te cájini táca gá tēe ndíchí jeē ndichí de. Achí yá.

*Jeē íne Jesús vehe Simón tēe fariseo*

<sup>36</sup> Te ñn tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. <sup>37</sup> Yūcuán na te ñn ñahan sáha cuēchi, ndéé ña ñuu yúcuán, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ñn frasco yuū luu jeē ñūhun chitú aceite perfume. <sup>38</sup> Te íin yáí ña nuū jehé yā, te ndáhyú ña. Te ni quejéé ña stáji ña jehé yā jíin ndute tñúú ña, te ni nasíchí ña jíin íxi xíní ña. Te ni techūhú ña jehé yā, te ni chuhun ña perfume un. <sup>39</sup> Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñuhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de. <sup>40</sup> Yūcuán na te ni cahān Jesús jíin de:

Simón, cúni rī cahān rī jíin ró ñn jñuhun.

Te ni cahān maá de:  
Cahān ní, Maestro.

<sup>41</sup> Te ni cahān Jesús:

Íin tēe jéhe núu xūhún, ni iyo uū tēe táu nuū de. Íin de ni cotaū uhūn ciento denario, te ñnga de ni cotaū uū xico uxí denario. <sup>42</sup> Te tú na vé cánevāha tēe un jéē náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuan te cachi ró: Jeē ndindúú tēe ún, ¿ndé ñn de coo maní gá jíin de? Achí yá.

<sup>43</sup> Te ni cahān Simón:

Jéni ni na jéē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

<sup>44</sup> Te jíto ya nuū ñahan ún, te ni cahān gā yā jíin Simón:

¿A jíto ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehé rī nájnūhun íyó costumbre. Te ñahan yáha ní stáji ña jehé rī jíin ndute tñúú ña, te ni nasíchí ña jíin íxi xíní ña. <sup>45</sup> Te tu ní téchūhu ró ruhū nájnūhun íyó costumbre. Te ñahan yáha, nde jeē ni quívi ri vehe ró, tu jécuiñí ña jeē téchūhú ña jehé rī. <sup>46</sup> Te tu ní chūhun ró aceite xinī rī nájnūhun íyó costumbre. Te ñahan yáha ní chuhun ña aceite perfume jehé rī. <sup>47</sup> Núu súcuan te cáhán rī jíin ró jeē ni stéén ña jeē yóhyo maní ña jíin rí siquí jeē íne cáhnu ni rī nuū táca cuéchi ña, vésú cuehē cúu. Te núu cone cáhnu ni rī nuū ñn ñayuu íyó jecu-ni cuéchi, te jecu-ni stéén i jeē maní i jíin rí, achí yá.

<sup>48</sup> Te ni cahān yā jíin ña:

Je íne cáhnu ni rī nuū táca cuéchi ró, achí yá.

<sup>49</sup> Yūcuán na te ñayuu cáyeji staā jíin yá, ni quejéé i cácahān maá i:

¿Ndé ñn ga cúu tēe yáha jéé cahán jeē íne cáhnu ni nuū cuéchi? achí i.

<sup>50</sup> Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsī ni rō. Achí yá.

*Jnūhun ñahan ní cajejnīñu nuū yā*

## 8

<sup>1</sup> Yūcuán na te ni cuu jecu quiṽi, te ni jica cuu Jesús tācá ñuu náhnu jíin ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. <sup>2</sup> Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī. <sup>3</sup> Te inga ña cúu Juana, ñasihí Chuda, tēe ndíso jniñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñahán ña, jéhe ña tāca jéē jíni ñúhún yá jíin de jíjnáhan de.

*Jnūhun yátá síquī tēe jéte trigo*

*(Mt. 13.1-9; Mr. 4.1-9)*

<sup>4</sup> Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā ñn jnūhun yátá jíin i:

<sup>5</sup> ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu síquī, te ni cayejí saa. <sup>6</sup> Te jecu gā ní jítē nuū ñúhun yuū. Te ni cane, te ni ichī-ni, chí tú cuehē cajin. <sup>7</sup> Te jecu gā ní jítē nuū náne iñu. Te inuú-ni ní canecoó iñu jíin, te ní jesí nuū. <sup>8</sup> Te jecu ní jítē nuū ñúhun váha. Te nuū ní jehnu, te ní jēhe cuehē nunī, chí jeē ñn ñn ní jēhe nde ciento. Achí yá.

Yūcuán na te ni cahān jee ya:

Tāca róhó jéē jíni sōho, na chúsóhó ró, achí yá.

*Najehē cahán yā máni jnūhun yátá*

*(Mt. 13.10-17; Mr. 10-12)*

<sup>9</sup> Te tēe cáscuáha jíin yá ní cajnūhún de ya na vé cuní cahān jnūhun yátá yáha. <sup>10</sup> Te ni cahān yā: Róhó jíjnáhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnūhun yátá cáhán rī jíin sava ga i, návāha vēsú cájito i, te quéndōo i nájñūhun jeē tú na vé ní cájito i. Te vēsú cájini sōho i, te ma jécūhun ni i.

*Jeē ní castūhun cájityá jnūhun yátá tēe jéte trigo*

*(Mt. 13.18-23; Mr. 4.13-20)*

<sup>11</sup> Jnūhun yátá yáha cuní cahān: Trigo un cúu jnūhun Yaā Dios. <sup>12</sup> Te trigo jeē ní jítē yuhíchi cúu nájñūhun ñayuu cájini sōho jnūhun, te quiñi-ní jexeén te quénde-ni jnūhun ini anuá i, návāha ma candíje i te ma jnáma ri i. <sup>13</sup> Te trigo jeē ní jítē nuū ñúhun yuū cúu nájñūhun ñayuu cájini jnūhun, te cájetáhú i te cácusī ni i jíin. Te tu cúcutú jnūhun ún ini anuá i. Te jecu-ni quiṽi cácandíje i, te núu ni quejéé jnúndóho, te cájica yátá i. <sup>14</sup> Te trigo jeē ní jítē nuū náne iñu cúu nájñūhun ñayuu cájini jnūhun, te cuangoo i te cácuñéñu i jíin jniñu i jíin jéé cuní i cucúca i te coo sīñ ni i. Te tu íje i jíin jnúhun ya. <sup>15</sup> Te trigo jeē ní jítē nuū ñúhun váha cúu nájñūhun ñayuu cájini nahín jnúhun ya, te cájnī vāha i, chí íyó váha íyó ndáā anuá i. Te cáhije i jíin jnúhun ya, chí cácandíje váha i.

*Jnūhun yátá síquī lámpara*

*(Mr. 4.21-25)*

<sup>16</sup> Núu nástñn ñayuu ñn lámpara, te tu jesí i ní ñn síquī, ní tu jéni i chíji jito. Chí sa suhva jéni i nuū sucún, návāha cundijin nuū ñáyuu quívicoo vehe. <sup>17</sup> Te suni súcuan tu íyó ní ñn jnūhun sāhi jéé ma cuní ñayuu, chí ndihí tāca jnúhun cácahān i nane ndijin te cuní ñayuu.

<sup>18</sup> Núu súcuan te na cuní sōho váha ró, chí ñayuu je jécūhun ní,

stéén gā yā nuū i. Te ñayuu tu cándije, máá jecu jeē jeni ni i jeē jiní i, sa suhva naa. Achí yá.

*Náná yā jín ñani yā*

(Mt. 12.46-50; Mr. 3.31-35)

<sup>19</sup> Yūcuán na te ni quee naná yā jín táca ñani yā nuū íne ya. Te tu ní cúu quívicoo ña nuū yā siquī jeē chitú ñayuu. <sup>20</sup> Te ñn ñayuu ni castūhun núu yā:

Náná ni jín táca ñani ni cáhīn nuū quéhe, te cácuni cahān jín ní, áchí i.

<sup>21</sup> Te ni cahān maá yá:

Suní náná rī jín ñani rī cácuo ñayuu cájini sōho jñūhun Yaā Dios te cásquicu i, áchí yá jín i.

*Jeē ní jecuiñi tachī ñhin jín mar ni sáha ya*

(Mt. 8.23-27; Mr. 4.35-41)

<sup>22</sup> Te ñn quivī ni quivī ya ñn barco jín tée cáscuáha jín yá, te ni cahān yā jín de:

Na yáha yó quihīn yō inga lado mar:

Te ni cascáca de barco cuango de. <sup>23</sup> Te níni cáscáca de barco, te ni quixí yā. Te ni jecuiñi ñn tachī ñhin nuū mar, te je yajni chitú ndute ini barco, te ndúcú quée barco. <sup>24</sup> Te ni castóna de ya, te ni cacahān de:

Maestro, Maestro, vijna te quēo yó chíj ndute te naa yō, achí de.

Te ni ndocuiñi-ni ya, te ni cahān yā nuū tachī ñhin jín núu mar. Te ni cajecuiñi-ni, te ni cuu nayúú í-ni. <sup>25</sup> Te ni cahān yā jín tée cáscuáha jín yá:

¿Naun tu cácandije ró?

Te máá de yōhoyo ni cayūhú de, te cánaa ni de, te cácahān de jín jñāhan de:

¿Ndé ñn ga cúu tēe yáha jēe nde nuū tachí ñhin jín núu ndúte ndácu de jñiñu te cájetáhú jēe cahán de? Achí de.

*Tēe Gadara jeē ndóho tachī*

(Mt. 8.28-34; Mr. 5.1-20)

<sup>26</sup> Yūcuán na te ni cane ya jín de región Galilea, te cuahān ya

región Gadara jeē íne inga lado mar Galilea. <sup>27</sup> Te nuū ní nanuu ya nuū ñūhun íchi, te ñn tēe ñuu un ní quee de nuū yā. Te je ni cuu cuehē cuiyā ñūhun cuehē tachī ini de. Te tu ñūhun cuiñi de sahma, ni tu ndéé de vehe, chí sa suhva nuū cáyindūji ndiyi ndeé de. <sup>28</sup> Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núu ná, Jesús Sēhe Yaā kujéhu téy? Cáhan ndahú ná jín ní jeē ma stóho ní sáña, áchí de.

<sup>29</sup> Súcuan ni cahān de, chí je ni ndacu ya jñiñu nuū tachí un jēe na quéndacoo ini de. Te ni cuu cuehē jínu sáha xeēn tachí jín de. Te cájihni ñayuu ndaha de jehē de jín cadena, návāha tú na vé sáha de. Te ndihī-ni jéhnde de, te jínu de jéhén de nde nuū ñūhun téhé sáha tachí ún. <sup>30</sup> Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chí ñūhun cuehē tachí ini de. <sup>31</sup> Te ni cacahān ndahú táchī un jín yá jeē ma tají yá quihīn ini tūhnchi cúnú. <sup>32</sup> Te yucu yúcuan cáhīn cuehē quini cájitu ti. Te tachí jeē cáñūhun ini tēe un ní cacahān ndahú jín yá jeē na cuáha ya jñūhun quívicoo ini quini ún. Te ni jēhe ya jñūhun. <sup>33</sup> Te ni quendacoo tachí ún ini tēe ún, te ni quívicoo ini quini. Te quini un ní cajinu ti ni níngoo ti ñn yucáva, ni quívicoo ti nuū mar, te ni ndaquihī ti ndute, ni cajihī ti.

<sup>34</sup> Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñayuu ñuu un jín ñayuu táca rancho. <sup>35</sup> Te cuango ñayuu un cuácondéhé i na vé ni cuu. Te ni jinūcoo i nuū íne Jesús. Te ni cajito i nuū tée ni quendacoo tachí ini, néne de nuū jehé Jesús, te ñūhun de sahma, te je ni nducájí xini de. Te ni

cayūhu ñáyyu ún. <sup>36</sup> Te tēe ní cajito ni canacani de jnūhun nuū ñáyyu, ndese ni nduvāha tēe ni ñuhun tachī ini.

<sup>37</sup> Yūcuán na te tāca ñáyyu ní región Gadara, ni caquejéé i cácahān ndahú i jín yá jeē na cújiyo ya quihīn yā, chí yōhyo cáyūhú i. Te ni ndīvi ya ini barco jeē quínuhun yā. <sup>38</sup> Te tēe jeē ní quendacoo tachī ini, ni cahān ndahú de jín yá jeē na cuáha ya jnūhun quihīn de jín yá. Te Jesús ni cahān yā jeē na quéndōo de, te áchí yá:

<sup>39</sup> Cuánuhun vehe ró, te nacani ró jnūhun ndese yōhyo jéhu jniñu ni sáha Yaā Dios jín ró, achí yá jín de.

Te cuahān de, te ni nacani de jnūhun ní ñuu ún, ndese yōhyo jéhu jniñu ni sáha Jesús jín de.

*Jnūhun sēhe síhí Jairo jín ñahan ní quehé yusáhma ya*

(Mt. 9.18-26; Mr. 5.21-43)

<sup>40</sup> Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chí ndīhi i cándetu i ya. <sup>41</sup> Te ni quee ñn tēe cújéhu ini vehe ii sinagoga, naní de Jairo. Te ni jecuiñi yití de nuū jehé yā, te ni cahān ndahú de jín yá jeē na quihīn yā jín de vehe de. <sup>42</sup> Chí íyó ñn sēhe síhí de jeē mañuhún-ni i nuū de, te íyó i nájñuhun uxī uū cuiyā. Te sūchí un je yajni cuu i. Te cuahān yā jín de. Te cuehē ñayuu cándiquin i ya, te ni chitú ñhin i xiin ya cuangoo i.

<sup>43</sup> Te mēhñu ñáyyu un cuahān ñn ñahan chúhú jeē ní cuu uxī uū cuiyā ndóho ña cuehyi ññi. Te ni jexin ña tāca jéé névāha ña jín tēe tájna, te tu ní ndúvāha ña sáha ni ñn de. <sup>44</sup> Te ni quee ña ichi yátá yā, te ni quehé ña yusáhma ya. Te ni jecuiñi-ni ññi ña.

<sup>45</sup> Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivii i ni cacahān jeē tu ní quehé i. Te Pedro jín tēe cáhīn jín de, ni cacahān de:

Maestro, jito ní jéé ñáyyu cuehē yāha ní chitú ñhin i xiin ní, te cáquiñi i ñhin, te cájñuhun ní ndé ñn ni quehé sahma ní.

<sup>46</sup> Te ni cahān Jesús:

Tuú chí ñn ñayuu ni quehé sahma ri, chí ni jini rī jeē jín fuerza rī ni nduvāha ñn ñayuu, achí yá.

<sup>47</sup> Te ni jini ñahan un jéé tu ní cúu coo yuhu jeē ní sáha ña. Te quisi i ña ni quee ña, te ni jecuiñi yití ña nuū jehé yā. Te jito jínúu tāca ñáyyu, te ni cachi cají ña najehé ni quehé ña yusáhma ya, jín jéé ní nduvāha-ni ña. <sup>48</sup> Te ni cahān yā jín ña:

Séhē, ni candíje ró jéé cuu nasávāha ri rohó, te jeē yúcuan ní nduvāha ró. Cuahān te na ndúsiñi rō, achí yá.

<sup>49</sup> Te níni cáhān gā yā súcuan, te ni quee ñn tēe vēji vehe Jairo, tēe cújéhu ini sinagoga, te ni cachi nuū de:

Je ni jihí sēhe síhí ní. Te ma sájñéñu ga ní Maestro, achí de.

<sup>50</sup> Te ni jini Jesús jnūhun yáha, te ni cahān yā jín Jairo:

Ma yūhu ró, chí candíje-ni ró, te nastécu rī sēhe ró, achí yá.

<sup>51</sup> Te ni jinū yā vehe, te tu ní jéhe ya jnūhun quivi ñayuu jín yá, chí máa-ni Pedro jín Juan jín Jacobo jín tátá naná sūchi síhí un. <sup>52</sup> Te cácuquíyá ni ndīhi ñayuu cáyūcú ini vehe, te cándahyū i jehé sūchí un. Te ni cahān yā:

Ma ndahyú rō jijnáhan ró. Tu ní jihí i, chí quixí-ni i, achí yá.

<sup>53</sup> Te ni cajecū catá i jeē ni cáhān yā, chí cájini i jeē ni jihí sūchi síhí un.

<sup>54</sup> Yūcuán na te ni jñi ya ndaha i, te ni cahān jee ya jín i:

Síhí, ndocuiñi, achí yá.

<sup>55</sup> Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeē cáji i. <sup>56</sup> Te tátá i naná i yōhyo ni canaa ni de cájito de. Te ni ndacu ñhin ya jniñu nuū de jeē ma cáchi de nuū ni ñn jeē súcuan ni cuu.



*Jeē ní tají yá ndihúxí uū de cuanacani de jnūhun*  
(Mt. 10.5-15; Mr. 6.7-13)

## 9

<sup>1</sup> Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jéē nasávāha de ñayuu cácuñū. <sup>2</sup> Te ni tají yá de quingoo de jeē nácani de jnūhun ndese ndácu Yaā Dios jniñu, jíin jéē nasávāha de ñayuu cácuñū. <sup>3</sup> Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihñin rō jíin ñin-ni camisa, te ma cóndiso ró inga. <sup>4</sup> Te na-ni vehe núu ni quivicoo ró, te yūcuán coyūcu ró nde quenda tucu ró quihñin rō inga ñuu. <sup>5</sup> Te núu ñin ñuu tu cájetáhú i róhó, na quéndacoo ró yúcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Achí yá.

<sup>6</sup> Te ni quendacoo de cuahān de, ni cajica nuu de tãcá ñuu, ni canacani de jnūhun jnáma Yaā Dios ñayuu. Te tãca lado ni canasávāha de ñayuu cácuñū.

*Jeē ni jíhī Juan tēe scuándute*  
(Mt. 14.1-12; Mr. 6.14-29)

<sup>7</sup> Te Herodes, tēe cúu gobernador, ni jini jnūhun de tãcá jniñu sáha Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. <sup>8</sup> Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. <sup>9</sup> Te ni cahān Herodes:

Juan chi ni ndacu ri jniñu ni tahndē xinī. Núu súcuán ¿te ndé tēe cúu tēe yáha jeē jíni jnūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

*Jeē ni scáji yā uhūn mil tēe*  
(Mt. 14.13-21; Mr. 6.30-44;  
Jn. 6.1-14)

<sup>10</sup> Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tãcá jniñu ni casáha de. Te ni jeca ya de cuahān sñin ya jíin de ñin lugar nuū tú ñayuu, yajni ñuu Betsaida. <sup>11</sup> Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñū.

<sup>12</sup> Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yáhá na quíngoo i tãcá ñuu jíin táca rancho yajni yáhá, te nducú i nuū ndóo i te cuaan i jeē cáji i, chi tú na vé iyó yáha, áchí de.

<sup>13</sup> Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chi uhūn-ni staā jíin úu-ni chãcá. Te vēsú núu quicuaan ná stãcá caji ndihi ñayuu cuehē yáha, te ni ma cúu, áchí de.

<sup>14</sup> Chi iyó nájnūhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo sñin cincuenta cincuenta i, áchí yá.

<sup>15</sup> Te súcuán ni casáha de, te ni cacucōo ndihi ñayuu. <sup>16</sup> Te ni quihin ya ndihuhún staā jíin úu chãcá un, te ni ndacoto ya ichi ándiví, te ni nacuatáhú yá. Te ni tahú cuéchi yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē. <sup>17</sup> Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chítú úxí uū jíca.

*Jeē ní cahān Pedro jeē Jesús cúu Cristo*

(Mt. 16.13-19; Mr. 8.27-29)

<sup>18</sup> Te ñin quiví ni cusñin Jesús, jícan tahú yá, te máá-ni tēe cáscuáha un cáhñin de jíin yá. Te ni cajnūhun yá de:

Ruhū, ¿ndé ñn cúu ri cácahān ñayuu? achí yá.

<sup>19</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya ni natecu de.

<sup>20</sup> Yūcuán na te ni cajñūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

*Jeē ní castūhún Jesús jeē cúu yā  
(Mt. 16.20-28; Mr. 8.30-9.1)*

<sup>21</sup> Yūcuán na te ni ndacu ñihin ya jñiñu nuū de jeē ma cáchi de jñūhun yáha núu ní ñn ñayuu. <sup>22</sup> Te ni cahān yá:

Máá rí, Yaā ní nduu tēe, cánuú ndoho xeēn rī. Te tāca tēe jéhu jín sūtū cácujeñu jín tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

<sup>23</sup> Yūcuán na te ni cahān yā jín ndihī de:

Na-ni ñayuu núu cúní i condiquin i ruhū, na cási i jeē cuní maá i, te na cónidiquin i ruhū tāca quivī, te cuāha i jñūhun ndoho i jñūndóho jeē siquí rī, vēsú na cúu i. <sup>24</sup> Chi núu ndé ñayuu cuní i cācu i nuū jñūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē siquí ruhū, te cotecu i ní cáni. <sup>25</sup> ¿Chi ndé cuajñiñu vēsú na cúndeyí ñayuu nihin i ní ñáyiví, te núu squíví i máá i nuū jnahnū ndetū i ní cáni? <sup>26</sup> Chi núu na-ni ñayuu cúcanu i jeē siquí ruhū, Yaā ní nduu tēe, jín siquí jñūhun cáhān rī, suni súcuan cucanu rī jeē siquí máá i, quivī ndíji ri. Te quivī ún chi yōhyo luu cujéhu rī, nájñūhun cújéhu Tátá rī, te suni cácujeñu ndajéhé ndoo ya sáha ya. <sup>27</sup> Te jendaá cahān rī jín ró jeē sava tēe cáhīn yáha, ma

cúu de chi nde cuni de jeē ndácu Yaā Dios jñiñu jín poder yá. Achí yá.

*Jeē tucu ni nduu ya*

*(Mt. 17.1-8; Mr. 9.2-8)*

<sup>28</sup> Yūcuán na te nájñūhun nuū uná quivī jeē ni cáhān yā jñūhun yáha, te ni caa ya ñn yucu, cuacacān tahú yá. Te Pedro jín Jacobo jín Juan cuangoo de jín yá. <sup>29</sup> Te ní ní jícán tahú yá, te tucu ni nduu nuū yá, te sahna ya ni nducujín quiyi, te ndíndéé. <sup>30</sup> Yūcuán na te ni canecoo uū tēe, cándajñūhún de jín yá. Te cúu de Moisés jín Elías, tēe ni cahīyo jenahán. <sup>31</sup> Te luu ndíndéé de cáhīn de, te ni cacahān de jín yá siquí jeē ní cuyajni cuu yā ñuu Jerusalén. <sup>32</sup> Te Pedro jín tēe cáyūcu jín de, yōhyo cáji de máhna, te vēsú súcuan te tu ní cáquixī de. Te ni cajito de jeē lúu ndíndéé yá jín ndíndúú tēe cáhīn jín yá. <sup>33</sup> Te nuū ní cacujiyo tēe un núu yá, te ni cahān Pedro jín yá:

Maestro, nacā jeē váha jeē cáhīn ná yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahān de. <sup>34</sup> Te ní ní cáhān de súcuan, te ni quee vicō ñūhun ní jesi nuū de jínáhan de. Te ni cayūhú de jeē cáhīn de chíji vicō ún. <sup>35</sup> Te nuū vicō un ní cahān ñn jñūhun:

Yáha cúu Sēhe ri jeē maní ndasí rí jín. Te na cúní nahín ró jñūhun cáhān yá, achí.

<sup>36</sup> Te nuū ni jínu ni cahān jñūhun ún, te máá ñn na Jesús ín ya nuū de. Te máá de tu ní cácahān cuiti de, te tāca quivī ún tu ní cácachi de nuū ni ñn jeē súcuan ni cajito de.

*Jeē ní nasávāha ya ñn sūchi ñūhun tachī iní*

*(Mt. 17.14-21; Mr. 9.14-29)*

<sup>37</sup> Te inga quivī un ní nanuu ya yucu jín de. Te cuehē ñayuu ni jejnahan i ya. <sup>38</sup> Te mēñu ñayuu cuehē un ní cana jee ñn tēe:

Maestro, jícán tahu na núu ni jéē condēhe ní sēhe yí ná, chí máñúhún i nuū ná. <sup>39</sup> Te máni jeē sáha xeēn tachī jín i, te cána cóhó i sáha, te jéhni yíhí i, te jée tiñu yuhu i. Te yōhyo stóho i, te yōhyo uhū siaá i. <sup>40</sup> Te ni cahān ndahú ná jín té cáscaháha jín ní jeē na quénehen te tachī ún, te tu ní cúu sáha de, áchí de.

<sup>41</sup> Te ni cahān yā jín de jínáhan de:

Ñayuu yōhyo níhni ni cácuu ró, chí tu cácandíje ró jéē cuu nduváha i. ¿Nasaa ga quiví condee rí jín ró jeē cuándeyí ní rí jín ró? Cuáquihin sēhe ró na quíji i, áchí yá.

<sup>42</sup> Te níni véji i nuū yā, te ni cotúú i ní sáha tachī, te ni jehni yíhí i. Te Jesús ni cahān xeēn yā nuū tachí un, te ni nasáváha ya sūchí un, te ni nacuáha ya i nuū tatá i. <sup>43</sup> Te ndivii ñayuu nahán ní canaa ni i cájito i jeē yōhyo jéhu jniñu sáha Yaā Dios.

*Jeē ni cahān tucu ya jeē cúu yā*  
(Mt. 17.22-23; Mr. 9.30-32)

Te níni canaa ni i cájito i tācá jniñu ni sáha Jesús, te ni cahān yā jín té cáscaháha jín yá:

<sup>44</sup> Chuhun váha ni rō jnūhun cáhán rí yāhá, te ma náa ni rō, chí ruhū, Yaā ní nduu tēe, nastúu i ruhū quiví ri ndaha tāca tée xeēn, achí yá.

<sup>45</sup> Te tu ní cájecūhun ni de jnūhun cáhán yā, chí tu ní cúu cuiti jecūhun ni de. Te ni cayūhú de cajñuhún de ya siquí jnūhun ni cahān yā.

*Ndé ñáyuu cúu jeē cujéhu ga*  
(Mt. 18.1-5; Mr. 9.33-37)

<sup>46</sup> Yūcuán na te tēe cáscaháha jín yá ni caquejéé de cácahān de siquí núu ndé ñin de cújéhu ga. <sup>47</sup> Te Jesús ni jini yā jeē súcuca cájeni ni de. Te ni jñi ya ndaha ñin sūchi lúlí, te ni jeni ya i xiin ya. <sup>48</sup> Te ni cahān yā jín de:

Na-ni ñayuu núu jeē siquí ruhū jetáhu i sūchi lúlí yáha, te ruhū jetáhu i. Te ñayuu jetáhu rúhū, suni jetáhu i Yaā ní tají rúhū véji ri.

Te ñayuu núu ga mēhñu ró, máá i cújéhu ga, achí yá.

*Ñayuu tu cáhán siquí yā, ñin i jín yá*  
(Mr. 9.38-40)

<sup>49</sup> Yūcuán na te ni cahān Juan:

Maestro, ni cajito ná ñin tēe jeē jín sñví ní quénehen de tachí ñin ñayuu. Te ni cájesi na jéē sáha de, chí tu jica de jín yó, achí de.

<sup>50</sup> Te ni cahān Jesús jín de:

Ma cási rō jeē sáha de, chí tēe tu cáhán siquí yō, ñin de jín yó, achí yá.

*Jeē ni cahān yā nuū Jacobo jín Juan*

<sup>51</sup> Te ni cuyajni quiví jeē quínuhun yā andiví, te ni tee téyí ni yā jeē quihín yā ñuu Jerusalén.

<sup>52</sup> Te ni tají yá sava tēe yósnúu de jín jnūhun jeē jinú yā. Te cuango de ñin ñuu Samaría náváha nducú de nuū ndóo ya. <sup>53</sup> Te ñayuu Samaría un tu ní cájēhe i vehe ndōo ya, chí ni cajini i jeē ndé Jerusalén quihín yā.

<sup>54</sup> Te Jacobo jín Juan, tēe cáscaháha jín yá, ni cajini de jeē súcuca cúu, te ni cacahān de jín yá:

¿A cúni ni jéē ndácu yó jniñu quiji ñuhún nde andiví, nájnūhun ni sáha Elías, náváha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū véji jnūhun cácahān rō. <sup>56</sup> Chí ruhū, Yaā ní nduu tēe, tú véji ri jeē snáa rí ñayuu, chí sa suhva jeē jnáma ri ñayuu, achí yá.

Yūcuán na te cuahān yā jín de inga ñuu.

*Siquí ñáyuu jeē cácuca i condiquín*  
*i ya*

(Mt. 8.19-22)

<sup>57</sup> Te níni jica ya ichi jín de, te ni cahān ñin tēe jín yá:

Condiquín na níhín quihín yó ndé-ni cúu-ni nuū quihín ni, áchí de.

<sup>58</sup> Te ni cahān Jesús jín de:

Tāca ñucuii, iyó yáū cava cáñuhun ti. Te suni saa, iyó táca tí. Te ruhū,

Yaā ní nduu tēe, tú nuū cusú rī, achí yá.

<sup>59</sup> Te ni cahān yā jíin inga de:

Condiquin ruhū na quihín yō.

Te máá tēe un ní cahān de:

Condetu ní ndé na quichindūji ná tátá na xihna gā. Yūcuán na te condiquin na nihín, áchí de.

<sup>60</sup> Te ni cahān Jesús jíin de:

Stóo tāca ndíyí na chindūji jnāhan ndīyí, chí ndīyí cácuu ñayuu tu cácandíje. Te rōhó, cuáhán te nacani ró jnūhun ndese ndácu Yaā Dios jniñu, áchí yá.

<sup>61</sup> Yūcuán na te suni ni cahān inga de:

Cúni na condiquin na nihín, te cuāha ní jnūhun jeē xihna gā quicahān na jíin ñayuu cáyūcú vehe ná, áchí de.

<sup>62</sup> Te ni cahān Jesús jíin de:

Núu na-ni tēe quéjéé de condiquin de ruhū, te núu máni jeē nácani cuíhyá ni de siquī tāca jéé ni stóo de, núu súcuan te cúu de nájñūhun ñn tēe jítu jíin yátá, te jícó cóto de ichi vehe de. Te ma cuajniñu de condiquin de ruhū siquī jniñu ndácu Yaā Dios, achí yá.

*Jeē ní tají yá unī xico uxī de*

## 10

<sup>1</sup> Te ná ni cuu tācá jniñu yáha, te máá Jítoho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin táca lugar nuū jé yajni quihín maá yá. <sup>2</sup> Te ni cahān yā jíin de:

Ñayuu yáha cácuu i nájñūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. Núu súcuan te cacān tahú ró nuū maá Jítoho ró Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jnūhun ya nuū ñayuu. <sup>3</sup> Te cuángoo jíjnāhan ró, te na cástūhun rí nuū ró jeē tají rí rohó quíngoo ró nájñūhun londe mehñu yfhī. <sup>4</sup> Te ma cóndiso ró ñunu, ni yijni xūhún, ni ndijēn. Te

ichi ma cucuéé ró ndajñūhun ró jíin ni ñn. <sup>5</sup> Te na-ni vehe núu ni quiví ró, te xihna gā cahān ró: Na quíji jnūhun ndeyí jnūhun sīñ ni nuū rohó, ñayuu vehe yáha, achí ró. <sup>6</sup> Te núu vehe yúcuán íyó ñayuu vāha, te jnūhun ndeyí ní cahān ró jinū siquī i. Te núu tuú, te jnūhun ndeyí ní cahān ró ma jinú siquī i.

<sup>7</sup> Te suni vehe yúcuán coyūcu ró, te caji ró coho ró jéé cuāha ñayuu nuū ró. Chí siquī jniñu jeē nácani ró jnūhun nuū ñayuu, te cánuú coto i rōhó. Ma quéndōo ró tijni vehe, chí ñn-ni vehe. <sup>8</sup> Te na-ni ñuu núu ni quivícoo ró, te núu cuatáhu i rōhó, te caji ró tāca jéé cuāha i nuū ró.

<sup>9</sup> Te nasávāha ró ñayuu cácuñu ñuu yūcuán. Te cachi ró nuū i: Je ni cuyajni Yaā Dios jeē ndacu ya jniñu nuū ró, achí ró. <sup>10</sup> Te na-ni ñuu núu ni quivícoo ró, te núu tu ní cájetáhu i rōhó, te quendacoo ró ini calle yūcuán, te cahān ró: <sup>11</sup> Nde ticachā ñuu ró yāha jéé ni jniñu jehē rī, na náscóyo rí jeē cúu seña jeē íyó cuéchi ró jéé tu ní cájetáhu ró. Te na cónahán ró jeē Yaā Dios je ni cuyajni ya jeē ndacu ya jniñu nuū ró nuú. <sup>12</sup> Te cáhán rī jíin ró jeē quiví juicio te xeēn gā coo castigo siquī ñuu casáha súcuan vésú siquī ñuu Sodoma nuū ní casáha ndasí ñayuu cuéchi.

*Jeē ní cuxeēn yā nuū sava ñuu nihni ni*

*(Mt. 11.20-24)*

<sup>13</sup> Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chí núu ini ñuu Tiro jíin ñuu Sidón ni sáha rí jniñu jéhu jeē ní sáha rí ini ñuu maá ró, te yachí nacani ni ñayuu ñuu un jéé stóo i cuéchi i núú. Te sáha i seña jeē steén jeē nácani ni i siquī cuéchi i, chí cuhun i sahma jnúú te cuhun i yaā xinī i núú. <sup>14</sup> Núu súcuan te quiví coo juicio te xeēn gā coo castigo siquī ró jíjnāhan ró vésú jeē ní íyo siquī ñuu Tiro jíin

ñuu Sidón. <sup>15</sup> Te róhó ñáyyu ñuu Capernaum, ¿á cájeni ni rō jeē cujéhu ró nájñuhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Achí yá.

<sup>16</sup> Te ni cahān gā yā jíin tēe jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichí rohó, suni ruhū squéhichí i. Te ñayuu squéhichí ruhū, suni squéhichí i Yaā ní tají ruhū vēji ri. Achí yá.

*Jeē ní ndecoo tēe ni tají yá*

<sup>17</sup> Te ni ndecoo uní xico uxí tēe un, cácusī ni de te cácahān de jíin Jesús:

Nde tachí cájetáhú núū na jēe jíin síhví ní, chi quéndacoo ini ñayuu, achí de.

<sup>18</sup> Te ni cahān yā jíin de:

Súcuan cúu, chi ni jito ri jeē nájñuhun ñn taja ni ñingava Satanás ichi ándiví, chi ni quende rí ndihí poder un. <sup>19</sup> Te vijna te je ni jēhe rí fuerza nuū rō jeē cueñū rō nájñuhun siquī tāca cóo jíin tísuhma, te cundeyí ró siquī tāca fuerza maá jēe jito uhū yohó, te tú na vé sáha ga jíin ró. <sup>20</sup> Te ma cúsi ni rō maá-ni jeē cájetáhú táchi nuū rō, chi sa cusī gā ni rō jeē yosó síhví ró nde andiví. Achí yá.

*Jeē ní cusī ni Jesús*

*(Mt. 11.25-27; 13.16-17)*

<sup>21</sup> Te suní hora un ní cusī ni Jesús, ni sáha Espíritu Santo, te ni cahān yā:

Na cútahū na núū ni Tátā, Jitoho andiví jíin ñáyiví. Chi ni jesi ní táca jnúhun ndichí ní, jeē ma cúní ñayuu ndichí jíin ñayuu tūhva cuenta ñayiví yáha. Te ni steén ni núū ñayuu cácuu nájñuhun sūchi lúlí. Chi súcuan ni nujnahan ni ni Tátā, achí yá.

<sup>22</sup> Te ni cahān gā yā:

Ndivii ni jēhe Tátá rí nuū rí. Te tu cájini ñayuu ndé ñn cúu ruhū, Sēhe

Yaā Dios, chi máa-ni Tátá rí cúu jeē jiní yā ruhū. Ni tu cájini ñayuu ndese Yaā cúu máa Tátá, chi máa-ni Sēhe cúu jeē jiní. Te íyó ñayuu jeē cuní maá Sēhe steén yā nuū i ndese Yaā cúu Tátá yā, te máa i suni cuni i. Achí yá.

<sup>23</sup> Yūcuán na te jito ya nuū tēe cáscuáha ún, te ni cahān yā jíin máa-ni de:

Yōhyo ndetū ñayuu cájito jniñu jéhu jeē cájito máa ró. <sup>24</sup> Chi cáhān rí jíin ró jeē cuehē tēe ni canacani jnúhun Yaā Dios, jíin táca rey, ni cacuni de coto de jeē cájito máa ró, te tu ní cájito de. Te suni ni cacuni de cuni sōho de jeē cájini sōho máa ró, te tu ní cájini de. Achí yá.

*Jnúhun ñn tēe vāha ni nación Samaria*

<sup>25</sup> Yūcuán na te ñn tēe steén tutu ley Yaā Dios, ni ndocuiñi de ni jecahān de jíin Jesús, chi cúní de coto ndee de ya. Te ni cajñuhún de:

Maestro, ¿na vé sáha ná te nihīn tahú na cotecu na ní cáni andiví? áchí de.

<sup>26</sup> Te ni cahān yā jíin de:

¿Nde yosó núū tutu ley? ¿Nde se cáhān cáhu ró? Achí yá.

<sup>27</sup> Te máa tēe un ní cahān de jeē cahān nuū tútu:

Coo maní ndasí ró jíin máa Jitoho rō Yaā Dios, nde jnáa ndasí ró sáha ró ndihí jeē cúsi ni yā, nde jíin ini jíin ánuá rō, jíin ní fuerza rō, jíin ní jēe níjnūní rō. Te cundáhú ní rō jnáhan ró nájñuhun cundáhú ni rō maá ró, achí. Achí de.

<sup>28</sup> Te ni cahān yā jíin de:

Vāha ni cahān rō. Te núu cuu sáha ró súcuan te nihīn tahú rō cotecu rō ní cáni, áchí yá.

<sup>29</sup> Te máa tēe un cúní de jeē quéndoo ndaā de nuū yā jíin jnúhun ni cajñuhún de, te ni cahān de:

¿Te ndé ñayuu cácuu jnáhan ná? áchí de.

<sup>30</sup> Te ni cahān Jesús:

Ñn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo

ñacuïhna nuū de, te ni caquende ndihī ndajniñu de, te nde sahma ñuhun de. Te ni cacani ndevāha ún de jeē jé yajni cuu de nuú. Te ni castoo ún de, te cuango. <sup>31</sup> Te ni cuu jeē ichi un yāha ñn sutū quihīn de, te ni jito de nuū tēe ún, te ni síyo-ni de cuahān de. <sup>32</sup> Te suni súcuan ñn tēe grupo levita jeē cájejniñu ini templo, vēji de ichi ún, te ni jito de nuū tēe ún, te ni yāha jíca-ni de cuahān de. <sup>33</sup> Te ñn tēe nación Samaria, suni vēji de ichi ún, te nuū ní jito de, te ni cundáhú ni de tēe ún. <sup>34</sup> Te ni quee de nde nuū catú tēe ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin tēe un ndé ñn mesón, te ni condito de. <sup>35</sup> Te inga quivī ún, hora jeē quihín de, te ni tava de uū xūhun cáa, ni jēhe de nuū tēe chíi mesón. Te ni cahān de: Coto ní tēe yāha, te núu caxīn gā ni xūhun ní jíin de, te nuū nándicó ná te nachunaa ná nuū ní, áchí de. <sup>36</sup> Núu súcuan ¿te ndese jéni ni rō? Jeē ndinúni tēe ún, ¿ndé ñn de ni chihī cuenta jeē jnāhan de cúu tēe ni canecoō ñacuïhna nuú? Achí yá jíin tēe stéén tutu ley.

<sup>37</sup> Te ni cahān de:

Tēe jeē ní cundáhú ni tēe ni tujī, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

*Jeē ni íneya vehe Marta jíin María*

<sup>38</sup> Yūcuán na te ni quihin tucu ya ichi cuahān yā, te ni jíin yā ñn ñuu lulí. Te ñn ñahan nání Marta, ni cana ña ya ni jehēn yā vehe ña. <sup>39</sup> Te Marta, íyó ñn cuhū ña nání María. Te María ni cucōo ña nuū jehé Jesús, jíini nahín ña jnūhun cáhān yā. <sup>40</sup> Te Marta chí cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sāña nuū jniñu? Te cahān ni jíin ña na chíndéé ñáhan ña sāñá, áchí ña.

<sup>41</sup> Te ni cahān Jesús jíin ña:

Marta, yōhyo ndihví ni rō jíin cuéhē jniñu, te yōhyo stóho ró máá ró jíin. <sup>42</sup> Te íyó ñn-ni jniñu cánuú. Te María chí ni nacāji ña jniñu cánuú, suu jeē ndihví ni ña síquī jnūhun Yāa Dios, te ma quénehen yó ña nuū ún. Achí yá.

*Jeē ni stéén yā ndese cacān tahú yō*

(Mt. 6.9-15; 7.7-11)

## 11

<sup>1</sup> Te ñn quivī íne Jesús ñn lugar jíicán tahú yā. Te nuū ní ndihī ni jíicán tahú yā, te ñn tēe scuáha jíin yá, ni cahān de:

Stéén ni nuū ná ndese cacān tahú na jíināhan ná, nájnūhun ni steén Juan nuū tēe ni cascuáha jíin de, áchí de.

<sup>2</sup> Te ni cahān yā jíin de:

Jeē cacán tahú rō, te suhva cahān rō:

Tátá maá ná jíināhan ná jéē ndeé ní andiví,

níní na cóo yíñúhún ná nuū ní, chí Yāa íi cúu ní.

Te ñuhun ni na jéē yachī quiji quivī ndacu ní jniñu ní ñáyiví yāha.

Te na cóo tācá jniñu nújnahan ni ní, nájnūhun íyó ini andiví, súcuan na cóo ini ñáyiví.

<sup>3</sup> Staā jeē cátecu na táca quiví, cuāha ní nuū ná vijna.

<sup>4</sup> Te cone cáhnu ni ni nuū tāca cuéchi cásáha ná nuū ní,

nájñūhun cáhine cáhnu ni na nuū ñáyuu casáha cuéchi nuū ná.

Te ma cuáha ní jnūhun jeē coto ndee jexeén sāñá,

chí sa suhva jnama ní sáña nuū tāca jéē neé.

Achí rō jíināhan ró. Achí yá.

<sup>5</sup> Te ni cahān gā yā:

Núu ndé ñn róhó iyó ñn amigo rō, te núu quihñ rō vehe de sava ñuú te cahñ rō jiñ de: Amigo, cuāha núu unī staā nuū rī. <sup>6</sup> Chi ñn amigo rī jeē jíca de viaje, ni quee de vehe rī, te tú na vé névaha rī jeē cuāha rī caji de. Achi rō. <sup>7</sup> Te núu cahñ tēe ñne ini vehe: Ma stáhñ rō ruhū, chí ndíhyú yehyí rī, te je cáquixī sēhe rī jiñ rī, te ma cúu ndonda rī jeē cuāha rī nuū rō, achi de. <sup>8</sup> Te cáhñ rī jiñ ró, vēsú ma ndóna de cuāha de nuū rō siquī jeē cúu de amigo rō, te jeē yóhoyo stáhñ rō de, jeē yúcuñ ndonda de cuāha de ndíhi jeē jíni ññhún ró. <sup>9</sup> Núu súcuñ te cáhñ rī jiñ ró jijnáhan ró jeē suni súcuñ cacñ tahú rō nuū Yaā Dios, te cuāha ya nuū rō. Te nducú ró táca jēe váha iyó nuū yā, te nihñ rō sáha ya. Te cacñ tahú rō nde nihñ rō, nájnñhun sáha ñayuu cahñ yehyí ndé nune quívi i. <sup>10</sup> Chi táca ñayuu jicán, cuāha ya nuū i. Te ñayuu nducú, suni nihñ i. Te ñayuu cahñ, nune ya ichi nihñ i jeē cuní i.

<sup>11</sup> '¿Te ndé ñn ró cúu tátá, te núu sēhe ró jicán i staā nuū rō, te á cuāha ró ñn yuū nuū i? Te núu jicán i chácá, ¿te á cuāha ró ñn coō nuū i? <sup>12</sup> Chí núu jicán i ñn ndiví, ¿te á cuāha ró ñn tisuhma nuū i? Tú cuítí súcuñ. <sup>13</sup> Núu súcuñ te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jēe váha nuū sēhe ró. Te nagā ni cuu máá Tátá rō andiví jēe ma cuāha ya Espiritu Santo nuū ñayuu jicán nuū yā. Achí yā.

*Jeē ní cacahñ de jeē jejniñu ya fuerza Satanás*

(Mt. 12.22-30; Mr. 3.19-27)

<sup>14</sup> Te quénehen ya ñn tachī ini ñn tēe, jeē ní cuñññ de ni sáha. Te nuū ní quenda tachī, te ni nacaññ tēe ni cuñññ un. Te ni canaa ni ñayuu cájito i. <sup>15</sup> Te sava ñayuu ún chí ni cacahñ i:

Jiñ fuerza Satanás jeē cujéñnu nuū tachī, quénehen tēe yáha táca táchī ini ñayuu, achí i.

<sup>16</sup> Te sava ga i cuní i coto ndee i ya, te ni cajicñ i jeē sáha ya jeē coo ñn seña ichi ándiví. <sup>17</sup> Te máá yá jiní yā jeē súcuñ cájini ni i, te ni cahñ yā:

Tácá nación jeē sasñ máa te cuajnáhan máá, núu súcuñ te snáa jeē iyó váha máá. Te núu ñayuu ñn vehe sásñ máa te cuajnáhan máá, núu súcuñ te ma cúu ga coyūcu cáñnu. <sup>18</sup> Te suni súcuñ Satanás, núu sásñ máá jiñ jnáhan tachī, ¿te ndese cuiññ nihñ jeē ndácu jniñu núu súcuñ? Chi cácaññ rō jeē jiñ fuerza Satanás quénehen rī tachī ini ñayuu. <sup>19</sup> Te núu súcuñ cúu núu, te ñayuu cascuáha jiñ máá ró jijnáhan ró, ¿na jiñ fuerza cáquenehen máa i tachī, cájini ni rō? Núu súcuñ te máa i jijnáhan i cachi jeē ní castíví ndasí ró ni cacahñ rō jeē cáquenehen rī tachī jiñ fuerza Satanás. <sup>20</sup> Te tuú chí sa suhva jiñ fuerza Yaā Dios cúu jeē quénehen rī tachī. Núu súcuñ te je ndéé Yaā Dios mēñnu ró jēe ndácu ya jniñu.

<sup>21</sup> 'Te núu ñn tēe ndacuī, ndíto de vehe de jiñ nují de, núu súcuñ te tú ni ñn ndajniñu de ndoñññ. <sup>22</sup> Te núu quiji inga tēe ndacuī gā, te cundeyí jiñ tēe ún, núu súcuñ te quende nují de jeē ndíto de vehe de, te sáha de ndese cuní maá de jiñ ndajniñu jeē quénde de. Te nájnñhun tēe ndacuī gā ún, súcuñ cúu máá rī nuū Satanás.

<sup>23</sup> 'Te ñayuu tu iyó mání jiñ rí, núu súcuñ te jíto uhū i ruhū. Te ñayuu tu nástútú jiñ rí, núu súcuñ te sa jéte núu i ñayuu vējicoo nuū rī.

*Tachī jeē nastútú jnáhan ndívi ini ñayuu*

(Mt. 12.43-45)

<sup>24</sup> 'Núu ni quenda ñn tachī ini ñn tēe tu cándíje, te jíca cuu nuū ñññun téhé, ndúcú nuū ndétátú, te tu nihñ, yūcuññ na te jéni ni maá: Na quínñun rī vehe nuū ní quenda rī. <sup>25</sup> Te núu ni ndee tucu, te jíto jeē tēe tu cándíje un cúu de nájnñhun

in vehe jeē ní ndundoo. <sup>26</sup> Yūcuán na te jéquihin uxā gā tachī xeēn gā vēsú maá. Te quívicoo ini tēe un jēē cōyūcu yūcuán. Nūu sūcuán te xeēn gā ndoho tēe un jēē sándihí vēsú jee xihna ñúhún. Achí yá.

*Yōhyo ndetū ñayuu cájini nahín jnūhun ya*

<sup>27</sup> Te níni cáhán yā jnūhun yáha, te in ñahan íne mēhñu ñáyuu cuehē un, ní cahān jee ña jín yā:

Yōhyo ndetū ñahan ní scácu níhín te ní scáxin ña níhín, áchí ña.

<sup>28</sup> Te ní cahān yā:

Sa suhva yōhyo ga ndetū ñayuu cájini nahín jnūhun Yaā Dios te cásquicu i, áchí yá.

*Jeē ní cajicān ñayuu tu cācandije in jniñu jéhnu*

(Mt. 12.38-42; Mr. 8.12)

<sup>29</sup> Te ní cataca cuehē gā ñayuu nuū Jesús, te ní quejéé yá cahān yā:

Ñayuu iyó vjna máni cásáha néé i. Te cájicān i in jniñu jéhnu jeē steén núu Yaā ní tají Yaā Dios cúu rí. Te tú na inga jniñu jéhnu stéén rí nuū i, chí máá-ni jniñu jéhnu nájnūhun ní cuu jín Jonás, tēe ní nacani jnūhun Yaā Dios nde jenahán. <sup>30</sup> Chí nájnūhun ní cajini ñayuu ñuu Nínive jeē ní cuu in jniñu jéhnu jín Jonás, suni sūcuán cuni ñayuu tiempo yáha jeē coo in jniñu jéhnu jín rúhū, Yaā ní nduu tēe, jeē quijnáhan jín modo ní ndoho Jonás. <sup>31</sup> Te reina jeē ní cujéhnu naciún ichi sur, natecu ña jín ñáyuu tiempo yáha, quiví juicio jeē sándaā yā cuēchi, te cahān ña cuēchi siquí i. Chí nde jicá téyí ní quiji ña ní jini nahín ña jnūhun ndíchí ní cahān rey Salomón. Te vjna chí cújéhnu ga ruhū, Yaā íne yáhá vēsú Salomón, te tu cācandije ró rúhū. <sup>32</sup> Te tāca ñáyuu ñuu Nínive nuū ní nacani Jonás jnūhun, natecu i jín ñáyuu tiempo yáha, quiví juicio jeē sándaā yā cuēchi, te cahān i cuēchi siquí ñáyuu yáha. Chí máá i ní nacani ní i ní castóo i cuēchi

i quiví ní nacani Jonás jnūhun nuū i. Te vjna chí cújéhnu ga ruhū, Yaā íne yáhá vēsú Jonás, te tu cācandije ró rúhū.

*Jnūhun yátá síquí lámpara*  
(Mt. 5.15; 6.22-23)

<sup>33</sup> 'Núu nástin ñayuu in lámpara, tu chíshá i, ní tu chúne i chíji in cajón. Chí sa suhva jéni i nuū sucún, návāha cundijin nuū ñáyuu quívicoo vehe. <sup>34</sup> Te tinūu ró cúu nájnūhun lámpara nuū yiquí cúñu rō. Núu sūcuán te núu tinūu ró iyó ndijin, te ní-ni yiquí cúñu rō cundijin. Te núu tinūu ró tu iyó ndijin, te ní-ni yiquí cúñu rō iyó nee. <sup>35</sup> Te suni sūcuán cúu anuá rō, te coto ró jēe ma cáni néé ní rō, návāha tú coo nee ini anuá rō. <sup>36</sup> Chí núu máni jniñu váha cásáha ró, te tú na jniñu néé cásáha ró, núu sūcuán te luz yā cundijin váha ini anuá rō, nájnūhun in lámpara jeē sáha jeē cundijin váha. Achí yá.

*Jeē ní cahān yā jeē iyó cuēchi de jijnáhan de*

(Mt. 23.1-36; Mr. 12.38-40; Lc. 20.45-47)

<sup>37</sup> Te nuū ní cuu ní cahān yā, te in tēe grupo fariseo ní cana de ya jeē caji yā staā vehe de. Te ní quiví ya, te ní cucóo ya mesa jeē caji yā staā. <sup>38</sup> Te tēe fariseo un náa ní de jito de jeē tu squícu ya costumbre jeē nandahá yá te caji yā staā. <sup>39</sup> Te ní cahān maá Jítoho yō jín de:

Róhó tēe fariseo jijnáhan ró, chí nájnūhun jeē cánacate ró yátā vaso jín yátā cohó róu jeē nandahá ró. Te ichi íni ró chí ñúhun máni máá jnūhun cuíhna jín jnūhun néé. <sup>40</sup> Tēe cánéé cácuu ró. ¿A tu cájini ró jeē Yaā ní sáha yiquí cúñu rō, suni ní sáha ya anuá rō? <sup>41</sup> Te jeē cájēhe ró caridad nuū ñáyuu ndahú, na sáha ró síquí jeē cundáhú ndije ní ró i. Te sūcuán te coo ndaā anuá rō.

<sup>42</sup> 'Nacā xeēn ndoho róhó tēe fariseo, chí cásquicu ró tācá jniñu lúli, te tu cásquicu ró jniñu cánuú. Chí cásáha ró úxí uxí nuhni tamínu



jíin ruda jíin táca yucū, te cásocō rō ñin ñin siquī tāca úxī un núu Yaā Dios. Te tu casáha cuiti rō jniñu ndaā, ni tu cáhiyo mani rō jíin Yaā Dios. Táca jéē yáha cánuú sáha rō núú, te suni ma stóo rō jéē socō rō táca yúcū ún.

<sup>43</sup> 'Nacā xeēn ndoho róhó téé fariseo, chí máni cánujnahan ni rō cucōo rō núu silla yíñúhún gá ini vehe ñi sinagoga. Te cánujnahan ni rō jeē cahán yíñúhún ñáyuu jíin rō nuū calle.

<sup>44</sup> 'Te nacā xeēn ndoho róhó téé cástéén tutu ley Yaā Dios, jíin róhó téé fariseo, chí téé stáhú-ni cácuu rō. Chí cándāa rō nájñuhun yaū ndīyí jeē tú ndijin, chí cásnāa rō anuá ñáyuu, te tu jíin i jeē súcuan casáha rō jíin i. Achí yá jíin de.

<sup>45</sup> Yūcuán na te ni cahán ñin téé stéén tutu ley:

Maestro, jeē ni cahán ni táca jñuhun yáha, suni nde siquī maá ná jíjnahan ná ní cahán ní, áchí de jíin yá.

<sup>46</sup> Te ni cahán yā:

Suni nacā xeēn ndoho róhó téé cástéén tutu ley. Chí suni cástéén rō táca ley ni catava maá rō jeē yí sáha, te tu cácuñdeyí ñáyuu squícu i. Te máá rō, chí ni ñin xinī ndáha rō tu cáscānda rō jéē squícu rō.

<sup>47</sup> 'Nacā xeēn ndoho rō jíjnahan rō. Chí casáha rō vehe siquī nuū yíndūji ndīyí jíi rō, téé ni canacani jñuhun Yaā Dios nde jenahán. Te suni táca jíi rō ni cajehni de téé ún.

<sup>48</sup> Te jeē casáha rō súcuan cúu jeē cáquijnahan rō jíin de siquī jniñu ní casáha de. Chí máá de ni cajehni téé ún, te máá rō casáha rō vehe ndīyí ún.

<sup>49</sup> 'Jeē yúcuan nde jenahán ní cahán Yaā Dios ñin jñuhun ndíchí: Tají rí táca téé nacani jñuhun ri jíin táca téé apóstol quingoo de nuū i. Te sava de cahni i, te sava ga de coto xeēn i, áchí Yaā Dios. <sup>50</sup> Te súcuan te siquī ñáyuu tiempo yáha na cóndee cuéchi jeē ní cajehni jíi i téé ni canacani jñuhun Yaā Dios,

nde quiví ni jécōo ñayiví te nde vija, <sup>51</sup> nde Abel xihna gā te nde Zacarías, téé ni cajehni de ini templo sava mēñu cuarto ñi jíin al-tar. Núu súcuan te cáhán rí jíin rō jeē siquī ñáyuu tiempo yáha condee táca cuéchi ún.

<sup>52</sup> 'Nacā xeēn ndoho róhó jéé cástéén tutu ley, chí cájesi rō ichi jeé jécūhun ni ñáyuu jñuhun ya. Chí ni máá rō tu cácuñi rō jecūhun ni rō, ni tu cájēhe rō jñuhun jeé jecūhun ni ñáyuu cácuñi. Achí yá.

<sup>53</sup> Te jeē ni cáhán yā jñuhun yáha, te téé cástéén tutu ley Yaā Dios jíin téé fariseo, yōhyo ni caquití ni de nuū yā. Te ni caquejéé de cástíchí de ya siquī cuehē gā jñuhun. <sup>54</sup> Chí yuhu-ni cánducú de núu sanaa te stíví yá jñuhun cahán yā, návāha nihin de cuéchi siquī yā.

*Siquī jñuhun stáhú cácahán téé fariseo*

## 12

<sup>1</sup> Te níin súcuan cúu, te ni cacututú cuéhē mil ñáyuu, chí nde cájeñū i siquī jehé jnahan i. Te xihna gā ni quejéé yá cahán yā jíin téé cáscuáha jíin yá:

Coto má candíje rō levadura téé grupo fariseo, chí suu cúu jñuhun stáhú cácahán de. Chí jité núu nuū ñáyuu, nájñuhun ndécava levadura nuū ññjen pan. <sup>2</sup> Chí jñuhun stáhú un má quéndōo sáhi cuiti, chí ndíhi natūu ndijin, te cuni ñáyuu. <sup>3</sup> Núu súcuan te suni máá rō, táca jñuhun ni cacahán rō jeē tu ní jíin ñáyuu, ñin quiví te cuni vāha i. Te táca jñuhun ni cacahán sáhi rō jeé ndihyú yehyí, ñin quiví te cahán jee ñáyuu yatā táca vehe.

*Jeé ní cachi yā ndé ñin cúu jeé yūhu yó*

*(Mt. 10.28-31)*

<sup>4</sup> 'Cáhán rí jíin rō jíjnahan rō, amigo: Ma yūhu rō coto rō ñáyuu cahni yiquí cuñu rō, chí núu ni cajehni i róhó, te tuá na vé cúu sáha

ga i. <sup>5</sup> Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te iyó poder yā chune ya rohó inferno. Suu máá yá cúu jeē yūhu ró jeē ma stívi ró nuū yā.

<sup>6</sup> Te tācá saa chi tú yahu ndéé tī, chi nde uhūn tī jeē uú centavo lulí. Te ni ñn tī tu náā ni Yaā Dios jeē tu ndíto ya. <sup>7</sup> Te nagā ni cuu rōhó jijnáhan ró, chi nde ndíhi ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

*Ñayuu jejnúhún Jesucristo nuū inga ñayuu*

(Mt. 10.32-33; 12.32; 10.19-20)

<sup>8</sup> Te cáhán rī jín ró, tāca ñáyuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rí i nuū tācá ndajéhé Yaā Dios. <sup>9</sup> Te tāca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū tācá ndajéhé Yaā Dios.

<sup>10</sup> Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i siquī Espíritu Santo, ma cóne cáhnu ni Yaā Dios nuū i.

<sup>11</sup> Te núu cuandeca i rōhó tāca vehe ñi sinagoga nuū tēe cásandaā cuēchi, jín núu tēe cácuu tohō, te ma nácani ndasí ni rō ndese stíó cuíñi rō jnūhun nuū de. <sup>12</sup> Chi máá hora un te Espíritu Santo steén yā nuū rō ndese cahān rō. Achí yā.

*Siquī jeē ma ténuū yō ndajníñu cúcá*

<sup>13</sup> Yūcuán na te ñn tēe íne nuū ñáyuu cuehē un ní cahān de jín Jesús:

Maestro, cahān ni jín ñani na jéē na táhú sáva de tahū na jín de, achí de.

<sup>14</sup> Te ni cahān yā jín de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yā.

<sup>15</sup> Te ni cahān gā yā:

Condito ró máá ró jijnáhan ró jéē ma ndíyo ni rō xūhun jín táca gá. Chi vēsú cuehē ndasí ndajníñu névāha ñn tēe, te nasūu jéē yūcuán sáha jeē quéndōo ndetū de, achí yā.

<sup>16</sup> Yūcuán na te ni cahān yā ñn jnūhun yátá jín i:

Ni Iyo ñn tēe cúcá jeē névāha ñhun jeē cúu vāha ndasí itu. <sup>17</sup> Te tēe cúcá un ní nacani ni de: ¿Ndese sáha rí? Chi tuá ndé cuhun niñi ri. Achí de. <sup>18</sup> Te ni jeni ni de: Suhva na sáha rí. Na cánu rī tāca yácā rī, te nasáha ri jeē náhnu ga. Te yūcuán chuvāha ndíhi ri niñi ri jín tāca ndajníñu ri. <sup>19</sup> Yūcuán na te cahān rī jín ánuā rī: Vijna te cuehē teyí névāha yó jéē canda cuehē cuiyā. Na ndétātu yó te caji yō coho yó, te na cúsiñ ni yō, ni jeni ni de. <sup>20</sup> Te ni cahān Yaā Dios jín de: Tēe cánéé cúu ró. Chi jecuáā vijna cuu rō, te tāca jéē ní chuvāha ró, ¿ndé tēe cuu? Achí Yaā Dios jín de. <sup>21</sup> Te súcuan ndoho tāca tēe jeē sacúcá de máá de, te tu ndúcú de jeē quéndōo ndetū de sáha Yaā Dios. Achí yā.

*Yaā Dios ndíto ya yohó*

(Mt. 6.25-34)

<sup>22</sup> Te ni cahān yā jín tēe cáscuáha jín yá:

Núu súcuan te cáhán rī jín ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. <sup>23</sup> Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jéē cuhun ró. <sup>24</sup> Condēhe ró ndese cátecu quiti cácuu nájñhun calú, chi tu cátaji tī, ni tu cánastútú tī jeē chūvāha tī, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan ró vēsú tācá quiti ún. <sup>25</sup> ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō? <sup>26</sup> Te núu ma cúu sáha ró vēsú ñn jniñu lulí súcuan, ¿te najehē cánacani ndasí ni rō siquī jeē caji rō jín jéē cuhun ró?

27 'Condēhe jíjnáhan ró ndese jée ita tāca yúcū. Chi tu sájniñu, ni tu táu. Te cahán rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún. 28 Te núu súcuan jéhe Yaā Dios sahma lúu ita un jée jée vijna te sajnē cayū nuū ñuhún, te nagā ni cuu rōhó jíjnáhan ró jée ma sáha ya jeē nihín rō sahma. ¿Te naun tu cácanđije nihin ró jée ndito ya rohó? 29 Núu súcuan te ma nácani cuihyá ni rō ndese caji rō ndese coho ró. 30 Chi tāca ñáyuu ñayīvi jée tu cácanđije cúu jeē máni siquī jeē yáha cándihvī ni i. Te máá ró jíjnáhan ró, chí íyó Tátá rō andiví, te jíní yā jeē cájini ñuhún ró tāca jée yáha. 31 Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jée yáha.

*Ndese coo cúcáyó nde andiví  
(Mt. 6.19-21)*

32 'Ma yūhu ró jíjnáhan ró chí cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsiñi ni yā jeē quívicoo ró ñuu nuū ndácu ya jniñu. 33 Xico ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chívāha ró xúhun ini yijni. Chi nde andiví te ma nāá jeē váha coneváha ró. Chi yūcuan má quíví ñacuíhná, ni ma cúu stíví tiquíxin. 34 Chi nde nuū nihín rō tahū váha ró, yūcuan cúu nuū cóndihvī ni rō siquī.

*Jeē na cóo tūhva yó jée ndēē yā*

35 'Coo tūhva ró jíjnáhan ró jée ndēē Jitoho rō, te coo ró nájnūhun mozo jeē nastín i lámpara i. 36 Chi íyó tūhva i te cándetu i jeē ndēē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jíjnáhan i. 37 Te yōhoyo ndetū mozo un núu ni ndee

patrón i, te cuni de jeē cándito i. Jendaá cahán rī jíin ró jeē máá patrón sātūhva de máá de, te scúcoo de i mesa te caní de cohó i. 38 Te vēsú cucuéé de ndee de nde sava ñuu, chí jée néē gā, te núu cuni de jeē súcuan cándito mozo de, te yōhoyo ndetū i jíjnáhan i núu súcuan. 39 Te na jécūhun ni rō jeē cahán jnūhun yátá yáha: Tēe chíi vehe, núu ni jini de na hora quiji ñacuíhná, te condito de, te ma cuāha de jnūhun jeē sacuíhná vehe de núu. 40 Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

*Jnūhun mozo vāha jíin mozo tu squícu*

*(Mt. 24.45-51)*

41 Yūcuán na te Pedro ni cajnūhún de ya:

¿A jíin máá-ni ná jíjnáhan ná cahán ni jnūhun yátá yáha, chí suni cahán ni jíin ndihí ga ñayuu? achí de.

42 Te ni cahán máá Jitoho yō:

Cahán rī jíin ndé-ni ñayuu cúu nájnūhun mozo jeē ndito xiní te squícu vāha. Te máá patrón sáha de jeē condiso jniñu i coto i ñayuu vehe de, návāha scáji i máá hora. 43 Te yōhoyo ndetū mozo un jée núu ni ndee patrón, te cuni de jeē súcuan squícu vāha i. 44 Jendaá cahán rī jíin ró jeē caní de mozo un jée cóto i ndihí ndajniñu de. 45 Te núu jéni ni i jeē ma ndíji yachí patrón i, te quejée i caní i tēe jíin ñahan cácuu jnáhan mozo i, te caji i coho i te najini i, 46 núu súcuan te ndee-ni patrón quiví jeē tu ndétu i jíin hora jeē tú na vé jéni ni i. Te stóho xeēn de i, te squíví de i ndoho i jíin ñáyuu tu cásquícu.

47 'Te mozo jeē jini i ndese nújnahan ni patrón i, te núu tu sātūhva i ni tu squícu i jeē cuni de, ndoho xeēn i jíin yujnu xíi. 48 Te mozo jeē tu jíní i ndese nújnahan ni

patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

*Jeē siquí Jesús te cusín ini ñayuu  
(Mt. 10.34-36)*

<sup>49</sup> Ni quee rī jeē nájñuhun jeē scuiquín rī ñuhūn ini ñayiví, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quivicoo ñayuu ndaha Yaā Dios. <sup>50</sup> Te íyó ññ jñūdóho cánuú ndoho rī, te cúcuíhyá ndasí ni rī chi nde jīnu ndoho rī, te ndusī ni rī. <sup>51</sup> ¿A cájeni ni rō jeē véji ri jeē cóyūcu mání ñayuu ñayiví? Cáhán rī jín ró jeē tuú, chi sa suhva jeē cusín ini ñayuu jeē siquí ruhū. <sup>52</sup> Chi nde vijna te quejéé jéé uhūn ñayuu ññ vehe, sásín máá jijnáhan, uní siquí uú, te uú siquí uní. <sup>53</sup> Chi tátá cusín ini jín séhe yíí, te séhe yíí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

*Jeē ni cáhán yā siquí seña andiví  
(Mt. 16.1-4; Mr. 8.11-13)*

<sup>54</sup> Te suni ni cahán yā jín ñayuu cuehē ún:

Núu cájito ró jeē náne vicō ichi núu cáne niāndii, te cácahán rō jeē cuun saū, te súcuan cúu. <sup>55</sup> Te núu quee tachī véji ichi sur te cácahán rō jeē nandii, te súcuan cúu. <sup>56</sup> Tēe stáhú-ni cácuu ró. Chi cájecūhun ni rō ndese stéén seña andiví jín ini ñayiví, ¿te naun tu cájecūhun ni rō ndé ññ cúu ruhū jeē sáha rī táca jniñu jéhnu tiempo yáha?

*Jeē cóndihvī ni yō jeē ma cóndee  
cuēchi siquí yō*

*(Mt. 5.25-26)*

<sup>57</sup> ¿Te najehē tu cánacani ni maá ró ndé ññ cúu jniñu ndaá sáha ró? <sup>58</sup> Te núu ññ ñayuu quihīn i jín ró nuū tohó jeē cacán i cuēchi siquí

rō, núu súcuan te níni cuáhán rō jín i ichi te condihvī ni rō sándaā rō jín i. Chi núu tuú, te squívī i rōhó núu juez, te juez siáha de rōhó núu policía, te policía chune de rōhó vecāa. <sup>59</sup> Te jendaá cahán rī jín ró jeē ma quénda cuiti rō yūcuán chi nde chunaa rō ndihī cuiti xūhun cájicān de. Te suni súcuan condihvī ni rō cahán ndahú ró jín Yaā Dios, návāha ma ndácunehen ya cuēchi siquí rō. Achí yá jín de.

*Jeē cánuú nacani ni yō jeē stóo yō  
cuēchi yō*

## 13

<sup>1</sup> Te ññ quiví yúcuan ní quecoo jecu tēe, ni canacani de jñuhun nuū yā ndese ni candoho jecu tēe Galilea. Chi ná cájehni de quiti jeē socó de, te ni quecoo mozo Pilato ni cajehni tēe ún. <sup>2</sup> Te ni cahán Jesús:

Tēe Galilea un, ¿a cájeni ni rō jeē súcuan ni candoho de siquí jeē xeēn gā ni Iyo cuēchi de vésú táca gá ñayuu Galilea? <sup>3</sup> Cáhán rī jín ró jeē tuú. Te rōhó jijnáhan ró suni jnahnū ndetū rō núu tú nacani ni rō jeē stóo ró cuēchi ró. <sup>4</sup> Te xahūn uní tēe jeē ni cotúu torre Siloé siquí de, te ni cajihī de, ¿a cájeni ni rō jeē ní casáha de cuēchi xeēn gā vésú táca gá ñayuu ññu Jerusalén? <sup>5</sup> Cáhán rī jín ró jeē tuú. Te máá ró jijnáhan ró, suni jnahnū ndetū rō núu tú nacani ni rō jeē stóo ró cuēchi ró.

*Jñuhun yátá núndēhe higo*

<sup>6</sup> Yūcuán na te ni cahán yā jñuhun yátá yáha jéé steén yā ndese cácuu ñayuu tu squícu jñuhun Yaā Dios:

Cácuu i nájñuhun ññ nundēhe higo jeē ín nuū ññuhun ññ tēe. Te ni jecondēhé de núu ín ndehē xinī, te tú na vé ín. <sup>7</sup> Te ni cahán de jín mozo sájniñu nuū ññuhun de: Vijna te je íyó uní cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chí máá jéé sajnēñu nuū ññuhun, áchí de. <sup>8</sup> Te ni cahán

mozo un jín de: Stóo ní na cuiñi ñn na cuiyā, te na nástāyā ná jéhē te chuhun ná jéhen. <sup>9</sup> Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

*Jeē ní nasāvāha ya ñn ñahan quiñi ndétātú*

<sup>10</sup> Te ñn quiñi ndétātú te stéén Jesús jñūhun ini vehe ñi sinagoga.

<sup>11</sup> Te iyó ñn ñahan jeē ní cuu xahūn unī cuiyā huhú ña. Chi ñn tachī ni sáha jeē jíca tíhí ña, te tuá cúu cuiñi caca jnuu ña. <sup>12</sup> Te ni jito Jesús nuū ña, te ni cana ya ña, te ni cahān yā jín ña:

Vijna te nduvāha ní jéē huhú ni.

<sup>13</sup> Te ni soó yá ndaha ya siquī ña, te ni nucuiñi jnuu-ni ña, te ni nacuatáhu ña nuū Yaā Dios. <sup>14</sup> Te tēe cújéhu ñi vehe ñi sinagoga, ni quiñi ni de nuū Jesús jeē ní nasāvāha ya ñahan un quiñi ndétātú. Te ni cahān de jín ñayuu:

Iñū quiñi iyó jéē sájniñu yó, te tāca quiñi ún quiñicoo ró nduvāha ró. Te quiñi ndétātú chi ma cúu, achí de.

<sup>15</sup> Yūcuán na te ni cahān maá jítoho yó jín de:

Tēe stáhú-ni cácuu ró. Quiñi ndétātu ¿á tu cándají ró stiquī rō burro ró jéē quíscóho ró tí ndute?

<sup>16</sup> Te ñahan yáha jéē cúu ña ñn sēhe yucūn Abraham, chi nájnūhun ni conuhñi ña xahūn unī cuiyā ni sáha Satanás. ¿Te á tu iyó váha jeē nájnūhun nandají rí ña nuū cuehyi ndóho ña quiñi ndétātú? Achí yá.

<sup>17</sup> Te jeē ni cahān yā súcuan, te tāca tēe cájito uhū de ya, ni cacucanu de. Te ndihí ñayuu ún chi ni cacusiñi ni i jíto i tācá jniñu jéhu sáha ya.

*Jñūhun yátá síquī ndiquin mostaza*

(Mt. 13.31-32; Mr. 4.30-32)

<sup>18</sup> Te ni cahān yā:

Na cáhán rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū.

<sup>19</sup> Ndúcuehē i nájnūhun jéhu ñn ndiquin mostaza jeē jéquin ñn tēe nuū ñūhun de, te ndúu nájnūhun ñn yujnu. Te cúu cáhnu, te tācá saa chi cásáha ti tacá tí chíji ndaha ún. Achí yá.

*Jñūhun yátá síquī levadura (Mt. 13.33)*

<sup>20</sup> Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: <sup>21</sup> Cúu nájnūhun levadura jeē ní quiñi ñn ñahan, te ni saca ña jín unī kilo harina, te ni ndaa ndihí ñujen ni sáha. Achí yá.

*Siquī jeē quiñi yó yéhyí túū (Mt. 7.13-14, 21-23)*

<sup>22</sup> Te jíca Jesús jeē cuahán yā ichi ñūū Jerusalén, te yáha ya tācá ñuu náhnu jín ñuu lulí, te stéén yā jñūhun. <sup>23</sup> Te ñn ñayuu ni cajñuhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jín i:

<sup>24</sup> Condiñvi ni rō quiñicoo ró ndaha Yaā Dios. Chi cúu nájnūhun ñn yéhyí túū. Te cáhán rī jín ró jeē ñn quiñi te cuehē ñayuu nducú i quiñicoo i, te ma cúu ga. <sup>25</sup> Te quiñi ún te sáha rī nájnūhun ñn tēe chíi vehe jeē ndocuiñi de te nacasi de yéhyí. Te ichi yátá véhe cuiñi ró jíñáhan ró, te scáján ró yehyí, te cahān rō: Nune ní yéhyí na quiñicoo ná. Te cahān de jín ró: ¿Ndé nuū véjicoo ró? Chi tu jíní rī rohó, achí de. <sup>26</sup> Yūcuán na te quejéé ró cahān rō jín de: Ni cayeji ná ni cajihí ná jín ní, te ini calle ñuu na ní steén ni jñūhun, achí rō.

<sup>27</sup> Te cahān maá de: Cáhán rī jín ró jeē tu jíní rī rohó ndé chí véjicoo ró. Cujíyo quingoo ró, chí ñayuu casáha jniñu néé cácuu ró. Achí de. <sup>28</sup> Te quiñicoo ró núu ndahyú rō, te nacayihí yuhu ró jéē ndoho xeēn rō. Te coto ró núu Abraham jín Isaac jín Jacob jín ndihí tēe ni canacani jñūhun Yaā Dios, cáyucú

de ñuu nuū ndácu ya jniñu. Te róhó, vēsú cácuu ró yúcūn de, te quivicoo ró núu ndoho ró. <sup>29</sup> Te cuehē ñayuu, vēsú tu cácuu i yucūn de, te quijicoo i ichi núu cáne niāndii jín ichi núu quée niāndii, ichi norte jín ichi sur. Te cucōo i mesa caji i staā ñuu nuū ndácu Yaā Dios jniñu. <sup>30</sup> Te sava ñayuu jeē vijna cácuu i sandīhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandīhí. Achí yá.

*Jeē ní cucuñhyá ni yā siquī ñáyuu ñuu Jerusalén*

(Mt. 23.37-39)

<sup>31</sup> Te máa quivī un ní quecoo jecu tēe fariseo, te ni cacahān de jín yá:

Cujiyo ní quihīn ní inga lado, chí cúní Herodes cahni de níhīn, áchí de.

<sup>32</sup> Te ni cahān yā:

Cuángoo te castūhun ró nuū tēe mañoso un jēē ná tu jinū quivī cuu rī, chí vijna jín sājnē quenehen ri tachī ini ñayuu, te nasávāha ri ñayuu cácuu. Te isá te jīnu jniñu sáha ri, achí rō. <sup>33</sup> Chí cánuú jēē cáca ri quihīn rī vijna jín sājnē jín isá, te jinū rī Jerusalén. Chí tēe cáncani jnūhun Yaā Dios, tu cájihī de inga lado, chí máa-ni ini ñuu Jerusalén cájehni i de. Achí yá.

<sup>34</sup> Róhó ñuu Jerusalén, jēhni rō tēe cáncani jnūhun Yaā Dios, te jéhe ró yúu xinī tēe tájī Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jēē nastútú tí sēhe tí chíjī ndijēn tí, te tu ní cúní rō. <sup>35</sup> Núu súcuan te vijna te stóo uun na ri rohó jín sēhe ró. Te cáhān rī jín ró jēē ndé vijna te ma cóto cuiti gā rō nuū rī, chí nde quiji quivī jeē cahán sēhe ró: Yōhyo vāha Yaā cúu Yaā véndiji jín jniñu máa Jítoho yō Yaā Dios, achí i. Achí yá.

*Jeē ní nasávāha ya ñn tēe cúhú cuehyī cuiñi*

## 14

<sup>1</sup> Te ñn quivī ndétātu ní jehēn yā vehe ñn tēe fariseo cujēhnu, ni jecaji yā staā jín de. Te táca gá tēe fariseo cájito yuhu de ya núu stívi yá. <sup>2</sup> Te yúcuan íne ñn tēe cúhú de cuehyī cuiñi, índichi de nuū yā. <sup>3</sup> Te ni cajñūhun yá tēe cástéén tutu ley Yaā Dios jín táca tēe fariseo:

¿A íyó ley jeē nasávāha ri ñayuu cácuu quivī ndétātu, chí tuú? áchí yá.

<sup>4</sup> Te máa de tu ní cácahān cuiti de. Te ni jniñi ya tēe cúhú un, te ni nasávāha ya de, te ni cahān yā jeē na nūhun de vehe de. <sup>5</sup> Te ni cahān yā jín de jijnáhan de:

¿Ndé ñn róhó núu burro ró chí stíquī rō ñingava tí ini pozo, te á tu yachī natava rō tí vēsú quivī ndétātu cúu, chí naún? Achí yá.

<sup>6</sup> Te tu ní cúu stío cuiñi de ni ñn jnūhun nuū yā jeē súcuan ni cahān yā.

*Jnūhun siquī ñayuu jéngoo vico*

<sup>7</sup> Te ni jito Jesús jeē tēe ni cataca ún, cáncāji de silla yifūhún gá nuū mesa cucōo de. Te ni cahān yā jnūhun yáha jín de:

<sup>8</sup> Núu ñn tēe cana de jeē quihín rō ñn vico nándāha, te ma cucōo ró lugar nuū yifūhún gá. Chí núu súcuan te sanaa te je ni cana de ñn tēe cújēhnu ga vēsú rohó. <sup>9</sup> Te quee tēe ni cana róhó, te cahān de jín ró: Ndonga, te na cucōo tēe yáha jín. Yūcuán na te cucuan rō jeē quihín rō cucōo ró ndé sandīhí na.

<sup>10</sup> Chí sa suhva núu ni cana ñn tēe róhó, te cucōo ró ndé lugar sandīhí na. Te núu quee tēe ni cana róhó, te cahān de jín ró: Amigo, nehen cucōo ró ñn lugar nuū yifūhún gá, achí de. Yūcuán na te ñayuu cáyūcu mesa jín ró coto i jeē sajēhnu de róhó. <sup>11</sup> Súcuan ni cahān rī jnūhun yáha návāha cuni rō jeē táca ñayuu jeē sajēhnu i máa i, nuu i sáha Yaā Dios. Te ñayuu jeē snūi i máa i, ndujēhnu i sáha ya. Achí yá.

12 Te suni ni cahān yā jīn tēe ni cana ya yéji yā staā:

Núu sáha ró ñn vico cúsámá chí jéē cuxíni, te ma cána ró ñayuu cácuu amigo rō, jīn ñani rō, jīn jnánhan ró, jīn ñayuu cucá. Chí núu súcuan te suni máá i nacana i rōhó, te súcuan nanihīn rō jeē ni jéhe ró. 13 Chí sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jīn ñayuu cuaá. 14 Te súcuan te quendōo ndetū rō, chí ma cúu nacūāha i nuū rō. Te nihīn rō tahū rō quivī nátecu ñayuu ndaā, achí yá.

*Jñūhun yátá síquī vico cúxíni*

15 Te ñn tēe yéji staā jīn yá, ni jini de jñūhun yáha, te ni cahān de jīn yá:

Yōhō ndetū ñayuu jeē cáji staā nde ñuu nuū ndácu Yaā Dios jniñu, achí de.

16 Yūcuán na te ni cahān Jesús ñn jñūhun yátá jéē steén yā jeē cána Yaā Dios ñayuu quivīvicoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu. 17 Te máá quivī cuxíni, te ni tají de mozo de cuacana ñayuu jeē quíjicoo caji staā: Nehen ní jijnánhan ní, chí je íyó túhva ndíhi, achí mozo. 18 Te ndíhi i ni cacahān i jeē na cóne cáhnu ni de chí ma quíngoo i. ñn tēe ni cahān de: Sáá ní jeen ri ñn ñuhun te cánuú quícondēhe rí, te na cóne cáhnu ni de chí ma jeé rī. Achí de. 19 Te inga de ni cahān: Ni jeen ri uhūn yunta stiquī, te quihīn rī coto ndee rī tī, te na cóne cáhnu ni de nuū rī chí ma jeé rī, achí de. 20 Te inga de ni cahān de: Sáá ní quijnánhan rī, te jeē yúcuan ma cúu jeē rī, achí de. 21 Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quivī ni patrón, te ni cahān de jīn mozo de: Yachī quihīn rō táca calle náhnu jīn calle lulí, te cana ró ñayuu ndahú, ñayuu cuhndú, ñayuu

chacuá, jīn ñayuu cuaá, na quíjicoo i vico, achí de. 22 Te ni jehēn mozo, te ni ndee de, te ni cahān de jīn patrón de: Je ni sáha ná jéē ni cahān ní, te cúmanī gā ñayuu te chitú vehe ní, achí de. 23 Te ni cahān tucu patrón: Quihīn tucu ró táca calle jīn ichi, te cana fuerza rō ñayuu na quíjicoo i, návāha chitú vehe rī. 24 Chí cáhán rī jīn ró jeē ní ñn tēe ni cana ri xīhna ñúhún, ma cuáha cuiti rī jñūhun jeē cuxíni de vehe ri, achí de. Achí yá.

*Jñūhun jeē cánuú nacani vāha ni yō te condiquīn yō Cristo*

25 Te cuehē ndasí ñayuu cándiquīn i Jesús cuangoo i jīn yá, te ni ndió cóto ya nuū i, te ni cahān yā jīn i:

26 Núu na-ni ñayuu cuní condiquīn ruhū, te núu manī gā i jīn tátá i, náná i, ñasihi i, sēhe i, ñani i, cuāha i, vēsú jīn ruhū, ma cúu cuu i ñayuu scuáha jīn rí. Te núu ndíhvī gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu. 27 Te na-ni ñayuu núu tu jéhe i jñūhun ndoho i jñūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jīn rí. 28 Chí núu ndé ñn ró cúní rō sáha ró ñn vehe cáhnu, ¿á tu cánuú jéē xīhna gā cucōo ró te tava rō cuenta núu canda xūhun jéē sínu ró? 29 Chí núu tuú, te núu je ni jequin rō cimientō, te tu cánda xūhun ró sínu ró, yūcuán na te táca ñayuu sácata i coto i rōhó. 30 Te cahān i: Tēe yáha ní quejé de sáha de vehe, te tu ní cánda de sínu de, achí i. 31 Te suni súcuan núu ñn rey quihīn de cuajnáhan de jīn inga rey jeē véji síquī de, ¿á tu cánuú jéē xīhna gā cucōo de te nacani ni de núu canda uxī mil soldado jeē cuajnáhan de jīn inga rey jeē véji síquī de jīn ócō mil soldado? 32 Chí núu tú canda de, te níni jícá gá véji inga rey, te tají de tēe cándiso jniñu, cajnūhún de na vé cuní inga rey jeē cuáha de nuū, te jecuiñ-ni. 33 Te máá ró jijnánhan ró, suni súcuan cánuú jéē xīhna gā

nacani ni rō cahnde ni rō stóo ró ndihí jeē névāha ró, chí núu tuú te ma cúu cuu ró ñáyuu scuáha jíin rí.

*Jnūhun yátá síquī ñī*  
(Mt. 5.13; Mr. 9.50)

<sup>34</sup> Te ñayuu cácanđije cácuu i nájnūhun ñī. Vāha íyó ñī, te núu ñī ún na náa jeē uhvuá, ¿te ndese nduu uhvuā tucu? <sup>35</sup> Tuá cuajníñu cuiñi, ni jeē chúhun ñayuu nuū ítu, ni jeē ndúu jēhen, chí máa cate íi-ni i. Tāca rōhó jēé jíni sōho, na chúsohó rō. Achí yá.

*Jnūhun yátá síquī lanchi ní sana*  
(Mt. 18.10-14)

## 15

<sup>1</sup> Te tāca tēe cástútú xúhun renta jíin tāca gā tēe casáha cuēchi, ni que-coo de nuū Jesús jeē cuni sōho de jnūhun cáhán yā. <sup>2</sup> Te tāca tēe grupo fariseo jíin tēe cástéén tutu ley Yaa Dios, ni cacahān de síquī yā:

Tēe yáha jétáhú de tāca tēe casáha cuēchi te yéji de jíin, áchí de.

<sup>3</sup> Te ni cahān yā jnūhun yátá yáha jíin de:

<sup>4</sup> ¿Ndeé ñin ró núu névāha ró ñin ciento lanchi, te núu scuíta ró ñin tí, te á tu stóo ró cúñ xico xahūn cuñ gā tí yucu, te quinanducú ró quiñi ní sana ún ndé nanihīn rō tí? <sup>5</sup> Te núu ni nanihīn rō tí, te coso súcun ró tí, te cusī ni rō. <sup>6</sup> Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān ró jíin i: Na cusī ni yō, chí ni nanihīn rī lanchi rī jeē ní sana. Achí rō. <sup>7</sup> Te cáhán rī jíin ró jeē suni súcuan cúu nde andiví. Chí cusī gā ni yā jíin ñin ñayuu iyó cuéchi núu nacani ni i jeē stóo i cuēchi i, vésú jíin cúñ xico xahūn cuñ ñayuu iyó ndāa jeē tuá jíni ñúhún nacani ni i.

*Jnūhun yátá síquī ñahan ní scuíta xūhún*

<sup>8</sup> Te núu ñin ñahan névāha ña uxí peso cāa, te núu scuíta ña ñin, ¿á tu nastín ña lámpara te nastāa ña vehe, te nanducú yúcun ña nde nanihīn ña? <sup>9</sup> Te núu ni nanihīn ña, te

nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cusī ni yō, chí ni nanihīn rī xūhun jēé ni scuíta rī. Achí ña. <sup>10</sup> Te cáhán rī jíin ró jeē suni súcuan cusī ni tācá ndajéhé Yaa Dios síquī ñin ñayuu iyó cuéchi núu nacani ni i jeē stóo i cuēchi i. Achí yá.

*Jnūhun yátá síquī sūchi ní jēhēn jecó*

<sup>11</sup> Te ni cahān gā yā:

ñin tēe ni íyo uū sēhe yí de. <sup>12</sup> Te tēe suchí gā ni cahān i jíin tátá i: Tátá, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndindúú i. <sup>13</sup> Te ni cuu jecu-ni quiví, te tēe suchí gā un ní stutú ndihí i ndajníñu i. Te ni quenda i cuahān i ñin ñuu jicá. Te yūcuan ní snāa i tahū i, chí ni jexīn cāhá i. <sup>14</sup> Te ná ni ndihí ni jexīn i, te ni quee ñin jnamā xeén ini ñuu ún, te ni quejéé cúmaní jeé caji i. <sup>15</sup> Yūcuán na te cuanducú jniñu i nuū ñin tēe ñuu ún. Te ni tají de i cuahān i rancho de jeē cóto i quiví de. <sup>16</sup> Te cúní i caji i vésú soō ndúchi jeé cáyeji quiví ún, návāha ndutú chíji i. Te ni ñin ñayuu tú na vé jéhe nuū i. <sup>17</sup> Yūcuán na te ni quejéé i nácani ni i: Tāca mozo casájniñu vehe tátá rī, íyó cuéhē staā cáyeji i. Te ruhū chí jíí rī sōco yāhá. <sup>18</sup> Na quínuhun rī nuū tátá rī, te cahān rī jíin de: Tátá, ni sáha ná cuéchi nuū Yaa Dios jíin nuū máa ní. <sup>19</sup> Vijna te nasūu gā tēe vāha cúu ná jéé cónaní ná sēhe ní. Te cuāha ní jnūhun cuu ná nájnūhun ñin mozo ní, achí rī. <sup>20</sup> Yūcuán na te ni naquihin i ichi cuanuhun i vehe tátá i.

Te níni jicá gā vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de súcun i, te ni techūhú de i. <sup>21</sup> Yūcuán na te ni cahān i jíin de: Tátá, ni sáha ná cuéchi nuū Yaa Dios jíin nuū máa ní. Vijna te nasūu gā tēe vāha cúu ná jéé cónaní ná sēhe ní. Achí i. <sup>22</sup> Te máa tátá i chí sa ni cahān de jíin tátá



mozo de: Cuáquihin sahma váha ga te chuhun ró i. Te chuhun ró ñin xehyu ndaha i, te chihí ró ndíjēn jēhē i. <sup>23</sup> Te quiquīhin ró becerro xēhen, te cahni rō tī na cáji yō, chi sáha yó vico. <sup>24</sup> Chi sēhe yí rí yáha, nájnūhun je ni jihí i, te ni natecu i. Chi tu ní jíní rī ndé chi ní jēhēn i, te ni ndee i, áchí de. Te ni caquejéé de cásáha de vico.

<sup>25</sup> Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeé cúu yaa te cájita jéhé ñáyuu. <sup>26</sup> Te ni cana i ñin mozo, te ni cajnūhún i na vé cúu jeé cúu. <sup>27</sup> Te ni cachi mozo un núu i: Ni ndee ñani rō, te tátá rō ni jehni de becerro xēhen, chi ni ndee vāha i nuū de, áchí mozo. <sup>28</sup> Yūcuán na te ni quiṭi ni sūchi jévāha, te tu ní cúní i ndīvi i. Te ni quenda tátá i, te ni cahān ndahú de jín i jeé na ndívi i. <sup>29</sup> Te ni cahān i jín tátá i: Níní sáha ná jniñu ndácu ní, te tu cúnihni cuiṭi ni na núu ní. Te tu jéhe ní vēsú ñin lítú núu ná, jeé sáha ná vico caji na jín táca amigo na. <sup>30</sup> Te ni ndee sēhe ní yáha jeé ni jéxīn cáhá i xūhun ní jín táca ñahan. Te ni jehni ní becerro xēhen caji i, áchí i jín tátá i. <sup>31</sup> Yūcuán na te ni cahān de jín i: Séhē, róhó chi níní ndéé rō jín rí, te ndíhi jeé névāha ri chi suni cuenta maá rō cúu. <sup>32</sup> Te vijna chi iyó váha jeé sáha yó vico te cusī ni yō. Chi ñani rō yáhá, nájnūhun ni jihí i, te ni natecu i. Chi tu ní jíní yō ndé chi ní jēhēn i, te ni ndee i, áchí de. Achí yá.

*Jnūhun yatá síquī mozo jeé ni stáhú de patrón de*

## 16

<sup>1</sup> Te suni ni cahān Jesús jín téé cáscuáha jín yá:

ñin téé cúcá ní iyo ñin mozo de jeé ndíso jniñu nuū táca gá mozo. Te ni cacahān jín patrón un jéé mozo un snáa cáhá ndajniñu de. <sup>2</sup> Te ni cana de mozo un, te ni cahān de jín: ¿Na jnūhun cúu yáha jéé nihín rī síquī rō? Nacuāha cuenta jniñu

ndíso rō, chi ma cóndiso jniñu ga rō nuū mozo rī. Achí de. <sup>3</sup> Yūcuán na te jēni ní maá de: ¿Ndese sáha rī vijna? Chi patrón rī quenehen de jniñu ri. Te tú ndacuī rī jeé cáte ri ñuhun, te jeé cacán rī caridad chi cúcanu rī. <sup>4</sup> Núu sūcuan te jíní rī ñin jeé sáha ri, návāha ñayuu cájeen nuū patrón rī, cuāha i vehe condee rī núu na quée quiṭi jeé quēnehen de jniñu ri. <sup>5</sup> Te ni cana de ná ñin ná ñin téé jeé cátaū nuū patrón de. Te ni cajnūhún de ñin: ¿Nasaa táu rō nuū patrón rī? <sup>6</sup> Te ni cahān téé ún: ñin ciento barril aceite, achí de. Te ni cahān mozo un: Yáhá na cuáha ri lista rō, te cucōo yachī rō, te na sáha rō inga lista jeé uú xico uxī na, achí de. <sup>7</sup> Yūcuán na te ni cajnūhún de inga téé: Te róhó, ¿nasaa táu rō? Te téé un ní cahān de: ñin ciento cajón trigo, achí de. Te ni cahān de jín téé ún: Yáhá na cuáha ri lista rō, te na sáha rō inga lista jeé cuún xico na, achí de. <sup>8</sup> Yūcuán na te patrón ni cahān de: Nacā jeé ndichí ní sáha téé cúnéé un, achí de. Te cáhán rī jín rō jeé ñáyuu ñayivi yáha, ndíchí gá casáha i jeé quendōo váha i nuū jñahan i, vēsú ñayuu cácandíje nuū Yaā Dios.

<sup>9</sup> Núu sūcuan te cáhán rī jín rō jeé ndichí gá na sáha rō vēsú jeé ni sáha mozo ndichí un. Chi ñni ñayivi yáha nuū yíhi cuēchi, na sáha rō jniñu váha jín xūhun rō, cuāha rō núu ñáyuu ndahú, návāha vēsú núu ni ndíhi xūhun rō ñayivi yáha, te quiṭi coo rō andívi núu coo vehe rō ní cáni.

<sup>10</sup> Téé jeé squícu vāha jín ñin jniñu lúli-ni, suni squícu vāha de jín jniñu cáhnu. Te téé jeé stahú jín ñin jniñu lúli-ni, suni stáhú de jín jniñu cáhnu. <sup>11</sup> Núu sūcuan te núu tu squícu vāha rō jín xūhun jeé iyó ñayivi yáha nuū yíhi cuēchi, te ma cuáha ya jeé váha cuu rō ní cáni andívi. <sup>12</sup> Te núu tu squícu vāha rō jín ndajniñu jeé ni jéhe núu ya nuū rō ñayivi yáha, te ma cuáha ya tahū

cuu ró ní cáni.

<sup>13</sup> 'Ni ñn mozo ma cúu cuajníñu de nuū uū patrón. Chi quiñi ni de nuū ñn te coo maní de jíin inga, chí squícu vāha de nuū ñn te sájéē ni de nuū inga. Te suni súcuan ma cúu cuajníñu ró núu Yaā Dios te núu máni siquī xúhun ndíhví ni rō, achí yá.

<sup>14</sup> Te tēe fariseo ni casacatā de nuū yā jeē ní cajini de tāca jñūhun cáhān yā, chí tēe cutóó xúhun cácuu de. <sup>15</sup> Te ni cahān yā jíin de:

Máá ró casáha ró jéē tēe ndaā cácuu ró núu ñáyuu. Te Yaā Dios chí jíiní yā ndese cáa ini anuá rō. Chí jniñu cájeni ni ñayuu jeē jniñu jéhnū cúu, te nuū Yaā Dios chí jniñu néé cúu.

*Siquī ley Yaā Dios jíin siquī jeē ndácu ya jniñu*

<sup>16</sup> 'Nde ná tu quiñi Juan tēe scuándute, te ni ñyo ley jeē ni jéhe Yaā Dios nuū Moisés, te suni ni castéén tāca tēe cánacani jñūhun ya. Yūcuán na te ná ni quiñi Juan, te ni quejéé jítē núu jñūhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

<sup>17</sup> 'Te yíí gá cúu jeē náā ñn letra nuū tútu ley yā vēsú jeē náā andiví jíin ñáyíví, chí squícu ndíhi jñūhun cáhān.

*Siquī jeē ma stóo jnáhan tēe jíin ñahan*

*(Mt. 19.1-12; Mr. 10.1-12)*

<sup>18</sup> 'Núu ñn tēe stóo de ñasihí de te quiñáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, achí yá.

*Jñūhun tēe cúcá jíin Lázaro*

<sup>19</sup> Te ni cahān gā yā:

Ni ñyo ñn tēe cúcá, ní ñūhun de sahma lúu vāha ndasí. Te ndiquíví ni ñyo vāha ndasí jéē ní yeji de. <sup>20</sup> Te suni ni ñyo ñn tēe ndáhú, nání de Lázaro, néne de yéhyí tēe cúcá un, te níí cáhnu de íin ndíhyi. <sup>21</sup> Te máni cúní de jeē ndutú chíji de jíin

stáa cuēchi jeē stívi tēe cúcá un. Te quécoo ina te cánayuu ti nuū ndíhyi de. <sup>22</sup> Te ni jihí tēe ndáhú un, te tāca ndajéhé Yaā Dios cuango ya jíin ánuá de nde andiví nuū néne Abraham. Te suni ni jihí tēe cúcá un, te ni quindūji de. <sup>23</sup> Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. <sup>24</sup> Yūcuán na te ni cana cóhó de: Tātā Abraham, cundáhú ni ní saña, te tají ní Lázaro, na quíchundaji de xiní ndáha de nuū ndúte, te quiñi de stáji de yáá ná. Chi xeēn ndóho ná núu yáñuhūn yāhá. Achí de. <sup>25</sup> Te ni cahān Abraham jíin de: Séhē, nucūhun ni rō jeē ní níhñ rō ndíhi jeē vāha ná ni cotecu rō, te Lázaro chí sa suhva jñūndóho ni níhñ de. Te vijna je ní ndusñ ni de yāhá, te róhó chí ndóho ró jíñā. <sup>26</sup> Te suni íyó ñn jeē cunú téyí, íne mēhñu yó jíināhan yó. Te ñayuu cáhñin yāhá, vēsú cácani i yāha i jeē i nuū rō, te ma cúu. Te ni ma cúu yāha máá ró quiñicoo ró yāha. Achí Abraham. <sup>27</sup> Yūcuán na te ni cahān tēe cúcá: Núu súcuan te cáhān ndahú ná jíin ní, Tātā Abraham, tají ní Lázaro na quíhñ de vehe tātá na. <sup>28</sup> Chi íyó úhñ gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, achí de. <sup>29</sup> Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jñūhun Yaā Dios. Suu yūcuán na chúhun ni i, achí Abraham. <sup>30</sup> Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quíhñ nuū i, yūcuán na te nacani ni i jeē stóo i cuēchi i, achí de. <sup>31</sup> Te ni cahān Abraham jíin de: Núu tu chúhun ni i jñūhun ni nacani Moisés jíin táca tēe ni canacani jñūhun Yaā Dios, suni ma candíje cuiñi i núu natecu ñn ndíyí quíhñ nuū i, achí de.

*Xeēn coo siquĩ ñáyuu squĩvĩ jnáhan nuũ cuéchi*  
(Mt. 18.6-7, 21-22; Mr. 9.42)

## 17

<sup>1</sup> Te ni cahān Jesús jín tée cáscuáha jín yá:

Máni iyó jéē nducú squĩvĩ ñayuu nuũ cuéchi. Te nacā xeēn ndoho ñayuu jeē squĩvĩ jnáhan nuũ cuéchi. <sup>2</sup> Vāha ga núu ni conuhnĩ ñn yōso cáhnu sucūn i te quēe i chíji ndute mar, vēsú jeē squĩvĩ i ñn sūchi lúli yáha núu cuéchi. <sup>3</sup> Coto ma sāha ró súcuan jínáhan ró.

Te núu jnáhan ró sāha de cuéchi siquĩ rō, te cahān rō nuũ de. Te núu nacani ni de, te cone cáhnu ni rō nuũ de. <sup>4</sup> Te núu uxā jínu jeē ñn quĩvĩ sāha de cuéchi siquĩ rō, te núu uxā jínu nācani ni de te cahān de jín ró jeē cone cáhnu ni rō chí ma sāha ga de, te cánuú cone cáhnu ni rō nuũ de. Achí yá.

*Jeē yóh̄yo cújéhnu jnūhun cándije*

<sup>5</sup> Te tēe cácuu apóstol ni cacahān de jín Jítóho yō:

Sáha ní jéē ñihin ga candije ná jéē sāha Yaā Dios jeē cájicān na núu yā, achí de.

<sup>6</sup> Te ni cahān maá Jítóho yō jín de:

Núu cácandije ró vēsú ñn tíhli-ni, nájñuhun ñn ndiquin mostaza jeē tíhli-ni cáa, te cuu cahān rō jeē nuyūhndu yáha na quēnda te nucondichi nde nuũ mar, te coo nájñuhun cahān rō.

*Jeē cánuú squĩcu vāha yó núu yā*

<sup>7</sup> Ndé ñn ró iyó mozo rō jeē jítu de chí ndíto de quitĩ ndéca ró, te núu ni najinū de vehe ró, te tu cáhān rō jín de jeē cúcōo de caji de staā. <sup>8</sup> Chí sa suhva cáhān rō: Sáha ró ndeyu cuxini ri, te cani ró cóhō rī. Te núu ni cuu ni yeji rī ni jih̄i ri, yūcuán na te caji maá ró coho ró, cácahān rō. <sup>9</sup> Te cácahān rō jeē tu cánuú nacuatáhú ró nuũ mozo núu ni sāha de jniñu ní ndacu ró, chí jeē cánuú sāha de cúu. <sup>10</sup> Te suni súcuan maá ró jínáhan ró, cácuu ró mozo

Yaā Dios. Te núu ni casquĩcu ró táca jniñu ní ndacu ya nuũ rō, te cahān rō: Tu cánuú nacuatáhú yá nuũ rī, chí ni sāha rī maá-ni jeē cánuú sāha rī, achí rō. Achí yá.

*Jeē ní nasávāha ya uxĩ tēe ndóho cuehyĩ stehyú*

<sup>11</sup> Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jín Galilea. <sup>12</sup> Te ni jinū yā ñn ñuu, te uxĩ tēe ndóho cuehyĩ stehyú ni quendacoo de vejnahan de ya, te jícá ní cacacana jee de: <sup>13</sup> Te ni cacana jee de:

Jesús, Maestro, cundáhú ni ni sáña, áchí de jínáhan de.

<sup>14</sup> Te ni jito Jesús nuũ de, te ni cahān yā jín de:

Cuángoo te stéen rō maá ró nuũ táca sūtū jeē ní canduvāha ró, áchí yá.

Te níni cuángoo de te ni canduvāha-ni de. <sup>15</sup> Yūcuán na te ñn-ni de ní nandió cóo de nuũ Jesús, te cáhān jee de, nácuatáhú de nuũ Yaā Dios jeē ní nduvāha de. <sup>16</sup> Te ni jecuiñĩ yití de nuũ yā, te ni jequin de nuũ de nde nuũ ñúhun, te ni nacuatáhú de nuũ yā. Te tēe Samaria cúu de. <sup>17</sup> Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de? <sup>18</sup> ¿A máñúhún-ni tēe ñuu jicá yáha cúu jeē ní nandicó de nácuatáhú de nuũ Yaā Dios?

<sup>19</sup> Te ni cahān yā jín tée ún:

Ndocuiñĩ quinhun rō. Chí ni candije ró jéē cuu nasávāha rī rohó, te jeē yúcuu ní nduvāha ró, áchí yá.

*Ndese coo quĩvĩ jeē ndjija ndacu ya jniñu*

(Mt. 24.23-28, 36-41)

<sup>20</sup> Te tēe fariseo ni cacajnūhún de Jesús ndé quĩvĩ quejéé jéē ndácu Yaā Dios jniñu ini ñayivĩ. Te ni cahān yā jín de:

Ma quēē ndijin jeē ndácu Yaā Dios jniñu. <sup>21</sup> Ni ma cúu cahān

ñayuu: Yāha íne ya ndácu ya jniñu, chí: Yūcuan íne ya, achi í. Chi je ndácu Yaā Dios jniñu mēhñu ró jijnáhan ró. Achí yá.

<sup>22</sup> Yūcuán na te ni cahān yā jín tée cáscuáha jín yá:

Quee tiempo jeē yóhyo cúu ni rō coto ró jēē ndiji ruhū, Yaā ní nduu tēe, te ma coto ró jijnáhan ró.

<sup>23</sup> Te cahān ñayuu jín ró: Yāha íne ya, chí: Yūcuan íne ya, achi í. Te ma quíngoo ró condēhe ró, ni ma cóndiquān rō í. <sup>24</sup> Chi nájnūhun sáha taja jeē ndíndēé ñn lado andiví te cúndijin nde inga lado, suni súcuan cuu quiví ndíji ruhū, Yaā ní nduu tēe, chí ndihí ñayuu coto. <sup>25</sup> Te jini ñuhún jēē xihna gā ndoho xeēn rī, te ñayuu iyó vijna, squéhichí i ruhū. <sup>26</sup> Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe. <sup>27</sup> Chi quiví un ní cayejí í, ni cajihí í, ni canandāha í, ni cajēhe í sēhe síhí í jeē nándāha, nde ní jinū quiví jeē ní quiví Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndihí í. <sup>28</sup> Te suni súcuan ni cuu quiví ni íyo Lot. Ni cayejí í, ni cajihí í, ni cajeen í, ni caxícó í, ni catajé í itu, ni cajeni í vehe. <sup>29</sup> Te quiví jeē ní quenda Lot ini ñuu Sodoma cuahān de, te ni cuun ñuhūn jín azufre ichi ándiví, te ni snāá ndihí ñayuu. <sup>30</sup> Te suni súcuan coo quiví jeē ndíji ruhū, Yaā ní nduu tēe.

<sup>31</sup> Te quiví ún te ñayuu cáhñin yatā véhe, te ndajniñu í ñuhūn ini vehe, cáhān rī jín í jeē ma ndiví í naquihin í, chí cánuú cunu yachí í jeē cácu í. Te suni súcuan ñayuu casájniñu nuū ítu, ma quínuhun í vehe í jeē quíhin í ndajniñu í. <sup>32</sup> Te nucūhun ni rō ndese ni ndoho ñasihí Lot jeē ní jihí ña. <sup>33</sup> Te núu ndé ñayuu cuní í cácu í nuū jnúndóho quiji nuū í jeē síquí ruhū, núu súcuan te jnahñu ndetū í ññ cáni. Te núu ndé ñayuu, vēsú na cúu

í jeē síquí ruhū, te cotecu í ññ cáni.

<sup>34</sup> Te cáhān rī jín ró jeē quiví ndíji ri te quixí uū tēe ñn jito jecuáa, te ñn de naquihin ri, te inga de ndōo, chí tu ní cándíje de. <sup>35</sup> Te coo uū ñahan jeē ndíco cáhnu, te ñn ña naquihin ri, te inga ña ndōo. <sup>36</sup> Te uū tēe sájniñu de nuū ítu, te ñn de naquihin ri, te inga de ndōo. Achí yá.

<sup>37</sup> Te jeē ní cajini de jnūhun yáha, te ni cacajñuhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájnūhun jeē cutútú téji ndé-ni cúu nuū catú quiti ní jihí, suni súcuan coo táca jēē ni cáhān rī ndé-ni cúu-ni nuū cáhiyo ñayuu.

*Jnūhun yatá síquí juez jín ñahan viuda*

## 18

<sup>1</sup> Te ni cahān yā ñn jnūhun yatá jín de jeē cánuú jeē niní cácan tahu de, te ma ndínuu ni de jín. <sup>2</sup> Te ni cahān yā:

Ni íyo ñn juez ini ñn ñuu. Te ni tu ndíso íyo de nuū Yaā Dios, ni tu yúhú de nuū ní ñn ñayuu. <sup>3</sup> Te suni ñuu un íyo ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de síquí ñn ñayuu jeē jito uhū í ña. <sup>4</sup> Te cuehé quiví tu ní cúní de sándaā de, te yūcuán na te ni jeni ni de: Vēsú tu ndíso íyo ri nuū Yaā Dios, ni tu yúhú rí nuū ní ñn ñayuu, <sup>5</sup> te ñahan viuda yáha, yóhyo stáhān ña ruhū, te jeē yúcuan na sándaā rī síquí ñayuu jeē jito uhū í ña. Chí núu tuú, te quejéé rí jnaníni ni rí jeē quíji quíji ña. Achí de. Achí máá Jítoho yō.

<sup>6</sup> Te ni cahān gā ya:

Súcuan cúu jeē ni cáhān juez, tēe tú ndaa. <sup>7</sup> Te Yaā Dios, nasūu súcuan cúu ya, chí sándaā yā síquí jniñu ñayuu ní nacáji ya jeē nduu ñuu cácahān ndahú í jín yá. Chí jnama ya í nuū táca jéé cájito uhū í. ¿Te

á cuéé jnama ya i? <sup>8</sup> Cáhán rī jín ró jeē yachī. Te quíivī ndíji ruhū, Yaā ní nduu tēe, ¿á níhīn gā rī ñayuu cácan díje níhin ini ñayíiví? Achí yá.

*Jnūhun yátá síquī tēe fariseo jín tēe stútú xúhun renta*

<sup>9</sup> Te suni ni cahān yā jnūhun yátá yáha jín jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhiyo ndaā:

<sup>10</sup> ñin tēe fariseo cuahān de templo jeē cacān tahú de. Te ñin tēe stútú xúhun renta suni cuacacān tahú de templo. <sup>11</sup> Te tēe fariseo, índichi de, te súcuan ni jicān tahú de: Tátá Yaā Dios, na cútahū na núū ní, chí tu cúu ná nájñūhun cándāa sava ga tēe, tēe cuíhná, tēe néé, tēe cásíquí ndéē jnāhan cácuu de. Ni tu cúu ná nájñūhun cáa tēe yúcuan jéē stútú xúhun renta jeē scāa ga de jicān de nuū ñáyuu. <sup>12</sup> Te uū jínu jeē semana iyó ndite ni na núū ní, te jéhe ná nuū ní ñin ñin síquī tāca úxī ndajníñu níhīn na, áchí de. <sup>13</sup> Te tēe stútú xúhun renta, ni jecuíñī jicá de nuū templo, ni tu ní chúndeyí ni de jeē ndonehen de nuū de, chí sa suhva ni caní de yíquī jicá de jeē cucuíhyá ni de. Te ní cahān de: Tátá Yaā Dios, cundáhú ní ní sáña, chí tēe iyó cuéchi cúu ná, áchí de. <sup>14</sup> Te cáhán rī jín ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jetáhú yá de. Chí ñayuu jeē sajhēnu i máá i, sa ndululí i. Te ñayuu jeē sálulí i máá i, sa ndujéhnu i. Achí yá.

*Jeē ní jicān tahú Jesús jehē sūchi lúlí*

*(Mt. 19.13-15; Mr. 10.13-16)*

<sup>15</sup> Te ní quecoo ñayuu jín sūchi lúlí núū Jesús, jeē na sóó yá ndaha ya xini i. Te tēe cáscuāha un ní cajini de jeē súcuan cúu, te ní cacahān de nuū ñáyuu vējicoo jín i. <sup>16</sup> Te máá Jesús ní cana ya de, te ní cahān yā:

Cuāha jñūhun na quíjicoo sūchi lúlí jíñā nuū rī, te ma cási ró jee

quíjicoo i. Chí ñayuu jeē ndió cóo ni i caní ni i nájñūhun sūchi yáha, suu i quíiví ndaha Yaā Dios jeē ndacu ya jniñu nuū i. <sup>17</sup> Te jendaá cahān rī jín ró, núu ñin ñayuu tú cuatáhú i jeē ndácu Yaā Dios jniñu nuū i, nájñūhun jétáhú ñin sūchi lúlí, ma quíiví cuiti i ndaha ya, achí yá.

*Jnūhun tēe cúcá*

*(Mt. 19.16-30; Mr. 10.17-31)*

<sup>18</sup> Te ñin tēe cújéhnu ni cajñūhún de ya:

Tēe vāha cúu ní Maestro. ¿Te na jniñu vāha sáha ná te níhīn tahú na cotecu na ní cáni andíiví? Achí de.

<sup>19</sup> Te ní cahān Jesús jín de:

¿Naun cáhán rō jeē tēe vāha cúu rí? Tú ní ñin tēe vāha íyó, chí máá ñin-ni Yaā Dios. <sup>20</sup> Je jíní rō táca jniñu ní ndacu Yaā Dios: Ma cosíquí ndéē jnāhan ró. Ma cáhni rō ndíyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

<sup>21</sup> Te ní cahān maá de:

Táca jniñu yáha je ní squícu ná ndé ná lúlí ná, achí de.

<sup>22</sup> Te Jesús ní jini ya jñūhun yáha, te ní cahān yā jín de:

Ñin na jniñu cúmaní sáha ró núu súcuan. Xícó ndíhi jeē névāha ró, te cuāha ró núū ñáyuu ndahú. Te nde andíiví cuāha ya jeē vāha ndasí núū rō. Yūcuán na te quiji ró condiquín rō ruhū, achí yá.

<sup>23</sup> Te ná ní jini sōho de jñūhun yáha, te yōhyo ní cucuíhyá ni de, chí cúcá ndasí de. <sup>24</sup> Te jito Jesús jeē súcuan cúcuíhyá ni de, te ní cahān yā:

Tēe cúcá chí yōhyo yí quíivícoo de ndaha Yaā Dios jeē ndacu ya jniñu nuū de. <sup>25</sup> Yachí gā yāha ñin camello yaū yutícuí vēsú jeē quíiví ñin ñayuu cucá ndaha Yaā Dios jeē ndacu ya jniñu nuū i, áchí yá.

<sup>26</sup> Te tēe ní cajini jñūhun yáha, ní cacahān de:

¿Ndé ñáyuu cúu jeē cácu núu súcuan? Achí de.

<sup>27</sup> Te ní cahān yā jín de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

<sup>28</sup> Yūcuán na te ni cahān Pedro:

Saña jijnáhan ná ni castóo ná ndihi jeē cánevāha ná, te cándiquin na níhín, achí de.

<sup>29</sup> Te máá yá ni cahān yā jín de:

Jendaá cahán rī jín ró jijnáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu nuū ñayuu, <sup>30</sup> núu súcuan te nanihín cuehē gā i ini ñayívi yáha, te tiempo quiji te cotecu i ní cáni, achí yá.

*Jeē ni cahān tucu ya jeē cúu yā  
(Mt. 20.17-19; Mr. 10.32-34)*

<sup>31</sup> Te ni cana sín ya ndihúxí uū tēe cáscuáha jín yá, te ni cahān yā jín de:

Vijna je cuángoo yó ñuu Jerusalén. Te yūcuan squícu ndihi jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán. <sup>32</sup> Chí ñayuu nastúu i ruhū nuū tēe nación Roma jeē cáyúcu Jerusalén cándacu jniñu. Te tēe un sácatā de nuū rī, te cahān neé de nuū rī, te tesihí de nuū rī. <sup>33</sup> Te cani de ruhū, te sáá te cahni de ruhū. Te nuū uní quívi te natecu rī. Achí yá.

<sup>34</sup> Te máá de tu ní cájecūhun cuíti ni de tāca jnūhun yáha. Chi jnūhun yí cúu, te tu ní cúu jecūhun ni de jeē cahán yā.

*Jeē ní nasávāha ya ñn tēe cuáá ñuu  
Jericó*

*(Mt. 20.29-34; Mr. 10.46-52)*

<sup>35</sup> Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícán de caridad. <sup>36</sup> Te ni jini sōho de jeē yáha cuehē ñayuu cuangoo i, te ni cajnúhún de naun cuángoo i. <sup>37</sup> Te ni cacahān i jín de jeē Jesús, tēe ñuu Nazaret, yáha ya cuahān yā. <sup>38</sup> Yūcuán na te ni cana jee de:

Jesús Séhe yucūn David, cundáhú ni ni sáña, achí de.

<sup>39</sup> Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña ví, achí de.

<sup>40</sup> Yūcuán na te ni jecuíñi Jesús, te ni cahān yā jeē na quindeca i de. Te nuū ní cuyajni de nuū yā, te ni cajnúhun yá de:

<sup>41</sup> ¿Na vé cuní rō jeē sáha ri jín ró? achí yá.

Te ni cahān de:

Jeē na ndúndijin tinūu ná cuní na, achí de.

<sup>42</sup> Te ni cahān Jesús jín de:

Ndúndijin tinūu ró núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, achí yá.

<sup>43</sup> Te ni ndúndijin-ni tinúu de, te ni ndiquin de ya, te nácuatáhú de nuū Yaā Dios. Te ndihi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

### *Jnūhun Zaqueo*

## 19

<sup>1</sup> Te ni quívi Jesús ini ñuu Jericó, te ni yāha-ni ya cuahān yā. <sup>2</sup> Te yūcuan íyó ñn tēe cúca nání de Zaqueo, te cújehnu de nuū tēe cástútú xúhun renta. <sup>3</sup> Te cúní de coto de návāha cuni de ndé ñn cúu Jesús. Te tu ní cúu, chi cuehē ñayuu cuangoo i jín yá, te ndiqui-ni cáa de. <sup>4</sup> Te jínu de ni cosnúu de. Te ni caa de xiní ñn nuyūhndú návāha coto de nuū yā, chí yūcuan yáha ya quihín yā. <sup>5</sup> Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chí jini ñúhún jéē ndóo ri vehe ró vijna, achí yá.

<sup>6</sup> Yūcuán na te ni cusí ni de, te yachí ni nanuu de, te ni jeca de ya cuahān de jín yá vehe de. <sup>7</sup> Te ni cajito ñayuu jeē súcuan ni cuu,

te ni cacahān i siquī yā jeē cuahān yā ndōo ya vehe ñn tēe sāha cuēchi. <sup>8</sup> Yūcuán na te ni ndocuiñi Zaqueo, te ni cahān de jíin máá Jítoho yō:

Vijna te sava ndiñi ndajniñu ná chi cuāha ná núu ñayuu ndahú. Te núu ni scāa ga na ní jicān na xūhun nuū ñayuu, te nacuāha ná únī gā siquī naquihin i, áchí de.

<sup>9</sup> Te ni cahān Jesús:

Vijna te vehe yāha je ni cācu ñn tēe jeē ma jnahnú ndetū de, chi ni candíje de nájñuhun ni candíje jí de Abraham. <sup>10</sup> Chi ruhū, Yāā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

*Jñuhun yátá siquī uxī mozo jíin xūhun*

<sup>11</sup> Te nuū ñayuu ní cajini tāca jñuhun yāha, ní cahān gā Jesús ñn jñuhun yátá jeē steén yā ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñuhún quejéé jeē ndácu ya jniñu sāha Yāā Dios. <sup>12</sup> Te ni cahān yā:

Ñn tēe cújéhu cuahān jicá de inga nación, návāha nihñ jniñu de cuu de rey, te ndíji de ndacu de jniñu. <sup>13</sup> Te nde ná tu quihñ de, te ni cana de uxī mozo de, te nuū ñn ñn i ni jēhe de ñn xūhun jéē ndeé yahu ndasí. Te ni cahān de jíin i: Sájñiñu ró jéē na ndúcuehē xūhun yāha jíjnāhan ró níni jéē quihñ rí te ndee rí, achí de. <sup>14</sup> Te ñayuu nación de cáquiti ni i nuū de, te ni cataj i jecu tēe cándiso jniñu cuangoo yatā de jeē cahān: Tu cánujnahan ni ñayuu nación na jéē cuāha ní jniñu nuū tēe yāha jéē cuu de rey nuū i, áchí. <sup>15</sup> Te vésú súcuan te ni nihñ jniñu de cuu de rey, te vendíji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núu, návāha na cúni de nasaa ni canihñ ñn ñn i siquī. <sup>16</sup> Te ni quee ñn mozo un núu de, te ni cahān i: ñn xūhun jéē ni jéhe ní núu ná, ni nduu uxī, achí i. <sup>17</sup> Te ni cahān máá rey: Vāha mozo

cúu ró, te vāha ní sāha ró. Chi ni squícu vāha ró jíin ñn jniñu lúli-ni, te vijna te sāha ri jeē cujéhu ró ndacu ró jniñu nuū uxí ñuu jñi ri, achí de. <sup>18</sup> Te ni quee inga mozo, te ni cahān i: ñn xūhun jéē ni jéhe ní núu ná, ni nduu uhñ, achí i. <sup>19</sup> Te suni ni cahān de jíin mozo un: Róhó, cujéhu ró ndacu ró jniñu nuū uhñ ñuu jñi ri, achí de. <sup>20</sup> Te ni quee inga mozo, ni cahān i: Yāha nācuāha ná xūhun ní, chi ni chuvāha ná ini ñn pañuelo. <sup>21</sup> Chi ni yūhu ná nihñ, chi tēe xeēn cúu ní. Chi cuehē gā nādacān ní vésú jeē ni jéhe ní, te cuehē gā cuní ni vésú jeē cúu sāha mozo ni, achí de. <sup>22</sup> Yūcuán na te ni cahān rey: Mozo neé cúu ró núu súcuan, te jíin jñuhun ni cahān rō te sándaā rí jeē iyó cuéchi ró jéē tu ní sájñiñu ró jíin xūhun rí. Chi jéni ni rō jeē tēe xeēn cúu ri, te cuehē gā nādacān rí vésú jeē ni jéhe ri, te cuehē gā cuní rí vésú jeē cúu sāha mozo rí. <sup>23</sup> Núu súcuan ¿te naun tu ní chūne ró xūhun rí vésú nuū banco? Te jeē ní ndee rí te naquihin ri xūhun rí nde jíin séhe xūhun núu. Achí de. <sup>24</sup> Te ni cahān de jíin ñayuu cáhñ yūcuán: Quende xūhun jíñā nuū i, te cuāha ró núu mozo jeē névāha uxī, achí de. <sup>25</sup> Te ñayuu un ní cacahān i jíin de: Te ndese, chi je névāha de uxī, achí i. <sup>26</sup> Te ni cahān tucu rey: Cáhñ rí jíin ró jeē ñayuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vésú jecu jeē névāha i. <sup>27</sup> Te tēe jeē cájito uhñ ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

*Jeē ni quivi Jesús ñuu Jerusalén*  
(Mt. 21.1-11; Mr. 11.1-11;  
Jn. 12.12-19)

<sup>28</sup> Te nuū ní ndiñi ni cahān yā jñuhun yāha, te ni jica ga yā cuahān yā ñuu Jerusalén. <sup>29</sup> Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu

Olivos, te ni tají yá uū tēe cáscuáha jíin yá jeē quíngoo de. <sup>30</sup> Te áchí yá jíin de:

Cuáhán ñuu lulí íne ichi núú. Te núu ni quívi ró, te nihín rō ñin burro núhni tí, jeē ní ñin tēe ná tu coso de tí. Te ndají ró tí quíji ró jíin tí. <sup>31</sup> Te núu ndé ñin cajñuhún naun cándají ró tí, te cahán rō jíin: Máá Jítoho yō jíni ñúhún yá tí, achi rō. Achí yá.

<sup>32</sup> Te cuango tēe ni tají yá, te ni canihín de tí nájnūhun ni cahán yā jíin de. <sup>33</sup> Te jeē cándají de tí, te ni cacahán jitoho tí jíin de:

¿Naun cándají ró burro ri? achí.

<sup>34</sup> Te ni cacahán de:

Máá Jítoho yō jíni ñúhún yá tí.

<sup>35</sup> Te ni ndecoo de jíin tí nuū Jesús. Te ni casoó de sahma de siquí tí, te ni casáha de jeē ní jecosó yā siquí tí. <sup>36</sup> Te ná-ni cuahán yā, saá cáscáá ñayuu sahma i ini ichi. <sup>37</sup> Te nuū ní cuyajni ya nuū cúun ichi yucu Olivos, te ndihi ñayuu cáchandje jeē cándiquín i ya, ni caquejéé i cácusí ni i, te cácana jee i jeē yóhoyo vāha Yaā cúu Yaā Dios siquí táca jniñu jéhnu ni sáha ya ni cajito i. <sup>38</sup> Te áchí i:

Yóhoyo vāha Yaā cúu Rey jeē véji jíin jniñu máá Jítoho yō Yaā Dios. Te sáha ya jeē cóo maní yō jíin Yaā Dios andiví. Te yóhoyo cújéhnu Yaā Dios, achí i jíjnáhan i.

<sup>39</sup> Yūcuán na te jecu tēe fariseo cáhīn mēhñu ñayuu cuehē ún, ní cacahán de jíin yá:

Maestro, cahán ni núu ñayuu cándiquín nihín jéé na cási i yuhu i, achí de.

<sup>40</sup> Te ni cahán Jesús:

Cáhán rí jíin ró jeē núu ñayuu yáha na cási i yuhu i, te táca yúú chí cana jee, achí yá.

<sup>41</sup> Te nuū ní cuyajni ya Jerusalén, te ni jito ya ñuu ún, te ni ndahyū yā siquí. <sup>42</sup> Te ni cahán yā:

Róhó ñayuu Jerusalén, yóhoyo ni cuu ni rí jeé na jécūhun ni rō jeé cuu ndumaní rō jíin Yaā Dios sáha ri. Te siquí jeé tu cáchandje ró, te

vijna chí ma cúu ga jecūhun ni rō. <sup>43</sup> Chí quee quívi jeé coo jnūndóho, te ñayuu cájito uhú rohó, cuicó ndúú i ñuu rō, te casi cutú i jíin yúú, te táca lado ndonda i siquí rō. <sup>44</sup> Te ndihi vehe scótúú i, te cahni i róhó jíjnáhan ró. Te ma stóo i ni ñin vehe jeé cóso jnáhan ga yuú. Chí ni quíji ri nde nuū Yaā Dios jeé jnáma ri rohó, te tu ní cáchandje ró. Achí yá.

*Jeé ní quenehen ya ñayuu ini templo*

(Mt. 21.12-17; Mr. 11.15-19; Jn. 2.13-22)

<sup>45</sup> Te ni quívi ya ini templo cáhnu, te ni quejéé yá quenehen ya táca ñayuu cájeen quiti te cánaxico núu ñayuu jeé socó i. <sup>46</sup> Te ni cahán yā jíin i:

Yósó núu tútu ñi jeé cahán Yaā Dios: Vehe ri chí vehe nuū cájicān tahú cúu, achí Yaā Dios. Te máá ró jíjnáhan ró, chí nájnūhun yaū cava ñacuñna ní canasáha ró, achí yá.

<sup>47</sup> Te ndiquívi ni steén yā jnūhun ini templo. Te sutū cácujeñnu jíin tēe cástéén tutu ley Yaā Dios jíin tēe cácujeñnu nuū ñayuu ñuu ún, cánducú de modo ndese cahni de ya. <sup>48</sup> Te tu cániñ de modo sáha de, chí ndivii ñayuu yóhoyo cájetáhu i cájini nahín i jnūhun cáhán yā.

*Siquí jeé ndíso jniñu Jesús*

(Mt. 21.23-27; Mr. 11.27-33)

## 20

<sup>1</sup> Te ñin quívi steén yā jnūhun nuū ñayuu ini templo, te nácani ya jnūhun jeé jnáma Yaā Dios ñayuu. Te ni quecoo sutū cácujeñnu jíin tēe cástéén tutu ley Yaā Dios jíin táca tēe jéhnu cándacu jniñu. <sup>2</sup> Te ni cacahán de:

Castūhún, ¿ndé ní nihín jniñu ró jéé sáha ró jniñu yáha? ¿Te ndé ñin ni tee jniñu siquí ró jeé sáha ró súcuan? Achí de.

<sup>3</sup> Te ni cahán Jesús jíin de:

Suni ruhū cajñūhun rí rohó ñin jnūhun jíjnáhan ró. Castūhun núu rí: <sup>4</sup> ¿Nde ñin ni tee jniñu siquí Juan jeé



ni scuándute de? ¿A Yaā Dios chí táca téé? Achí yá.

<sup>5</sup> Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cá candije ró de núu súcuan?

<sup>6</sup> Te núu cahān yō jeē ñáyuu ni catee jniñu un síquī de, te ndivii ñáyuu cahni i yóhó jíin yūū, chí cá candije i jeē téé ni nacani jnūhun Yaā Dios ni cuu ndije Juan, achí de cá cahān máá de.

<sup>7</sup> Te ni cacahān de jeē tu cájini de ndé ñn ni tee jniñu síquī Juan jeē ni scuándute de. <sup>8</sup> Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha rī jniñu yáha, achí yá.

*Jnūhun yátá síquī téé néé cá sájniñu nuū uva*

(Mt. 21.33-44; Mr. 12.1-11)

<sup>9</sup> Te ni quejéé Jesús cahān yā jnūhun yátá yáha jíin ñáyuu ún:

Ñn téé ni nachuhun de cuehē uva nuū ñūhun de. Te téé un ní cacani de mozo, te ni canatajé de i cuanuhun i súcuan-ni. <sup>11</sup> Te téé chíí uva ni tájī tucu de inga mozo cuahān. Te téé cá sájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. <sup>12</sup> Te téé chíí uva ni tájī tucu de inga mozo cuahān. Te téé cá sájniñu ún, suni ni castújī de mozo un, te ni cascúnu de i.

<sup>10</sup> Te máá tiempo ndutútú uva, te ni tájī de ñn mozo cuahān nuū téé cá sájniñu ún, návāha naquihin de sava ndehē uva un. Te téé un ní cacani de mozo, te ni canatajé de i cuanuhun i súcuan-ni. <sup>11</sup> Te téé chíí uva ni tájī tucu de inga mozo cuahān. Te téé cá sájniñu ún, suni ni castújī de mozo un, te ni cascúnu de i.

<sup>13</sup> Yūcuán na te ni cahān téé chíí uva: ¿Ndese sáha rī? Na tájī rī sēhe rī jeē maní rī jíin, chí sanaa te núu ni cajito de i te coo yñūhún de nuū i. Achí de. <sup>14</sup> Te téé cá sájniñu ún, ná ni cajito de jeē véjī i, te ni cacahān

de: Téé chíí táhū cúu jeē véjī ún. Na cáhni yō de, te ndōo tahū de cuu máá yó, achí. <sup>15</sup> Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha téé chíí uva jíin téé cá sájniñu ún? <sup>16</sup> Ndiñi de te cahni de téé un jíjnáhan, te cuāha de ñuhun cáá uva un núu inga sava téé sájniñu nuū, achí yá.

Te jeē ní cajini ñáyuu jnūhun yáha, te ni cacahān i:

Aí, núu ma cóo cuiti súcuan víi, achí i.

<sup>17</sup> Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jnūhun yáha jéé yosó núu tútu ñi jeē cúu rī nájnūhun ñn yuū? Chí achí tutu:

Yuū jeē ní casquéhichí téé cájeni vehe,

yuū yáha nduu jeē quítuu vehe.

Achí. <sup>18</sup> Te ñáyuu tu cá candije, ndoho i nájnūhun ndóho ñáyuu jeē cotúú síquī yuū te jnánhú i. Te quiví sándaā Yaā Dios cuēchi, te ñáyuu tu cá candije, ndoho i nájnūhun ndóho ñáyuu jeē nínga yuū síquī i te cundihí i sáha. Achí yá.

*Síquī xūhun renta*

(Mt. 21.45-46; 22.15-22; Mr. 12.12-17)

<sup>19</sup> Yūcuán na te sutū cácuñhū jíin téé cástéén tutu ley Yaā Dios, ni cacuni de jñi de ya máá hora un. Chí ni cajecūhun ni de jeē síquī máá de cúu jnūhun yátá ní cahān yā síquī téé cá sájniñu nuū uva jíin téé cájeni vehe. Te tu ní cúu, chí cáyūhú de jeē quítī ni ñáyuu. <sup>20</sup> Yūcuán na te ni catajé de jecu téé cuacoto yuhu de ya, te téé un cá sáha-ni de jeē téé ndaā cácuu de. Te cánducú de sáha de jeē cahān yā ñn jnūhun jeē nihín de cuēchi síquī yā, te quindeca de ya nuū téé cúu gobernador. <sup>21</sup> Te ni cacahān de:

Maestro, cájini na jéé cahān vāha ní, te stéén ndaā ní. Te tu sáha ní

cuenta ndese cúu ñn ñn ñayuu, chi ñnuú-ni sáha ní jíin i. Te stéén ndaā ní ndese síquicu ñayuu nuū Yaā Dios. <sup>22</sup> Núu súcuan te cachi ní: ¿A iyó váha jeē chúnaa yō renta nuū rey nación Roma jeē jnñi nación yō, chí tuú? áchí de.

<sup>23</sup> Te ni jini yā jeē cācuni de stáhú de ya, te ni cahān yā jíin de:

¿Najehē cájito ndee rō ruhū? <sup>24</sup> Stéén ñn xūhún na cóto ri. ¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yáhá? áchí yá.

Te ni cacahān de jíin yá:

Nuū jíin síhví rey un cúu, áchí de.

<sup>25</sup> Yūcuán na te ni cahān yā jíin de:

Núu súcuan te nacuāha ró núū rey un jéé yíhi cuenta nuū de, te nacuāha ró núū Yaā Dios tāca jéé yíhi cuenta nuū maá yá, áchí yá.

<sup>26</sup> Te tāca téé ún tu ní cúu nihñ de cuēchi síquī yā jíin ni ñn jñūhun cáhān yā, cájito jínūū ñayuu. Chi sa ni canaa ni de jeē ndichí ní stió cuiñí yā jñūhun nuū de, te tuá na vé ni cacahān de.

*Jeē ní cacajñuhún de síquī jeē nátecu ndīyi*

(Mt. 22.23-33; Mr. 12.18-27)

<sup>27</sup> Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiñi ndīyi. Te ni cacahān de jíin yá:

<sup>28</sup> Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní iyó sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñí i nuū ndīyi ñani de, áchí tutu. <sup>29</sup> Núu súcuan te ni iyó uxā ñani. Te tēe núú ní quiñáhan de jíin ñahan. Te ni jihí de, te tú sēhe de ní iyó. <sup>30</sup> Te tēe uū ni naquihin de ña, te suni ni jihí de, te tú na sēhe de ní iyó. <sup>31</sup> Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihi de, te ni ñn de tú sēhe de ní iyó. <sup>32</sup> Te jeē sándhí te suni ni jihí ñahan ún. <sup>33</sup> Núu súcuan te núu na

nátecu de jíináhan de quiñí nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jíináhan de.

<sup>34</sup> Yūcuán na te ni cahān yā jíin de:

Ñayivi yáha chi cáquiñáhan tēe jíin ñahan. <sup>35</sup> Te ñayuu váha jeē nátecu i quiñicoo i andiví, ma quiñáhan ga i yūcuán, chí tuá na jñūhun quiñáhan tēe jíin ñahan coo.

<sup>36</sup> Ni ma cúu cuiñi gā i, chí coo i nájñūhun ndajéhé Yaā Dios. Te sēhe Yaā Dios cuu i, chí je ni canatecu i. <sup>37</sup> Te suni máá Moisés cáhān de jeē nátecu ndīyi, chí ni tee de nuū tútu ndese ni cahān yā jíin de mēhñu yúcú jeē cayú yáñuhñ. Chi ni cahān de jeē cúu ya Yaā Dios Abraham jíin Isaac jíin Jacob. <sup>38</sup> Te jeē ni cáhān de súcuan cúu jeē ní cachi de jeē cátecu tāca ndīyi. Chi vēsú je ni cajihí i, te cátecu i nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

<sup>39</sup> Te jecu tēe cástéén tutu ley Yaā Dios ni cacahān de:

Váha ni cahān ní Maestro.

<sup>40</sup> Te tuá ni cáchundeyí ni de cajñuhún de ya.

*Síquī jeē cúu Cristo sēhe yucñ David*

(Mt. 22.41-46; Mr. 12.35-37)

<sup>41</sup> Te ni cahān yā jíin de jíináhan de:

¿Ndese cúu jeē cacahān ñayuu jeē Cristo cúu sēhe yucñ David?

<sup>42</sup> Chi máá David suhva ni cahān de jñūhun ya nuū tútu Salmo:

Máá Jítoho yō Yaā Dios suhva ni cahān yā jíin Jítoho rī, Yaā quiñi:

Cucōo ró lado váha ri nuū cujéhu ró,

<sup>43</sup> te na sáha ri jeē quende rō poder tāca jéé cájito uhū rohó.

Achí Yaā Dios. Achí David. <sup>44</sup> Te núu sēhe yucñ David cúu Cristo, ¿te ndese cúu jeē ni cáhān de jeē Jítoho de cúu ya? áchí yá.

*Jeē ni cahān yā jeē iyó cuēchi de jijnáhan de*

(Mt. 23.1-36; Mr. 12.38-40; Lc. 11.37-54)

<sup>45</sup> Te ni cahān yā jiín tée cáscuáha jiín yá, te suni ni cajini sōho ndihi ñayuu:

<sup>46</sup> Coto má cándije ró táca tée cástéén tutu ley. Chi cácsuī ni de cáñuhun de sahma cáni jeē steén jeē kujéhu de, cájica cuu de jiín. Te cánujnahān ni de jeē cahān yñúhún ñayuu jiín de nuū yáhu. Te cánujnahān ni de cucōo de nuū silla yñúhún gá ini vehe iī sinagoga, jiín silla yñúhún gá nuū víco cáyeji ñayuu. <sup>47</sup> Te cáquende de vehe ñahan ní caquendōo ndáhú. Te nahān cájicān tahu de návāha caní ni ñayuu jeē tú na cuēchi de. Tēe yáha jijnáhan de chí xeēn gā ndoho de castigo. Achí yá.

*Jeē ni sócō ñahan viuda xūhún*

(Mr. 12.41-44)

## 21

<sup>1</sup> Te ná ni iyo ya ini templo, te jito ya nuū ñayuu cucá jéé cáchuhun i cuehē xūhún ini táca yéjñū nuū cásocō i. <sup>2</sup> Te suni ni jito ya nuū iin ñahan viuda jeē ndóho ndáhú, te ni chuhun ña uū centavo lulí ini yéjñū ún. <sup>3</sup> Te ni cahān yā:

Jendaá cahān rī jiín ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca gá ñayuu. <sup>4</sup> Chí táca i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihi ña jeē cótecu ña. Achí yá jiín de.

*Jeē ní cachi yā jeē náā templo*

(Mt. 24.1-2; Mr. 13.1-2)

<sup>5</sup> Te sava de ni cacahān de jeē luu cáa templo cáhnu, chí ni cuvāha jiín táca yūu luu jiín táca jéē ní casocō ñayuu. Yūcuán na te ni cahān yā:

<sup>6</sup> Ndihi jeē cájito ró yáha, quee quiví jeē ma cóso jnáhan ga ni iin yuū, chí ndihi jnanū, achí yá.

*Na seña coo nuū cuácuyajni ndihi ñayiví*

(Mt. 24.3-28; Mr. 13.3-23)

<sup>7</sup> Te ni cacajñuhún de ya:

Maestro, ¿ndé quiví coo táca jéē ní cachi ní jéē coo? ¿Te na seña coo nuū cuácuyajni squícu táca jéē ni cahān ní? áchí de.

<sup>8</sup> Te ni cahān yā:

Coto ró jéē ma stahú i róhó. Chi quiijicoo cuehē tēe jeē stahú jiín síhví rí, te cahān de: Máá rí cúu Cristo. Te suni cahān de: Je ni quee quiví ndihi ñayiví, achí de. Te ma cóndiquín ró de. <sup>9</sup> Te núu nihīn ró jñuhun jeē táca lado iyó guerra te cándonda ñayuu siquī tohō, te ma yūhu ró, chí cánuú jéē xíhna gā coo súcuan, te ni ma jinú yachí quiví ndihi ñayiví. Achí yá.

<sup>10</sup> Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. <sup>11</sup> Te cháha chúcuan jñāa téyí, te coo jnamā jiín cuéhyi xeēn. Te coo seña jéhu ichi ándiví jéé yūhú ndasi ñayuu coto i.

<sup>12</sup> Te nde ná tu coo táca jñiñu yáha, te coto xeēn i róhó, te jñi i róhó. Te quindecā i sava ró táca vehe iī sinagoga jeē cahān i cuēchi siquī ró. Te chune i sava ró vecāa. Te quindecā i sava ró núu táca rey jiín núu táca gobernador, te cahān i cuēchi siquī ró jeē siquí jeē cácandije ró rúhū. <sup>13</sup> Te jeē súcuan coo, te cuitē núu ga jñuhun ri, chí nacani ndaā ró nuū de jijnáhan de. <sup>14</sup> Núu súcuan te cundaā ni ró jeē ma nácani ni ró xíhna gā ndese stíó cuñí ró nuū de te cácu ró.

<sup>15</sup> Chí ruhū cuāha ri jñuhun ndíchí cahān ró, návāha ñayuu jeē cájito uhū rohó, ma cūndeyí i jiín ró ni ma cúu cahān i siquī ró. <sup>16</sup> Te nde tatá ró, naná ró, ñani ró, jnáhan ró, jiín amigo ró, nastúu i róhó núu ñayuu xeēn. Te cahni i sava ró. <sup>17</sup> Te táca ñayuu chí quití ni i nuū ró jeē siquí ruhū. <sup>18</sup> Te ni iin ixi xíní ró jijnáhan ró ma náā, chí coto ya rohó. <sup>19</sup> Te

núu cuiñi ñihin ró jín jnúhun ri, te cotecu ró ní cáni.

<sup>20</sup> Te núu ni cajito ró jéē ní cajicó ndúu soldado ñuu Jerusalén, te na jécūhun ni ró jeē jé yajni naa ñuu ún. <sup>21</sup> Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún. <sup>22</sup> Chi táca quiṽi un cuáha Yaā Dios castigo nuū ñáyuu jeē siquī cuéchi i, návāha squicu táca jnúhun jeē yosó nuū tútu. <sup>23</sup> Te quiṽi ún nacā jeē ndahú ñahan cáñuhun sehe jín ñahan cándeca yiquín, chi ma cúnihīn ña cunu yachī ña. Chi yōhyo xeēn coo jnúndóho ini ñayīṽi, te quiji castigo xeēn siquī ñáyuu yáha. <sup>24</sup> Te sava i cuu nuū guerra, te sava i quingoo preso nde táca inga nación. Te ñayuu táca gá nación ndacu ñihin i jniñu nuū ñáyuu ñuu Jerusalén, nde jīnu tiempo jeē jéhe Yaā Dios jnúhun ndacu i jniñu.

*Ndese coo quiṽi ndiji Yaā ní nduu tēe*

(Mt. 24.29-35, 42-44; Mr. 13.24-37)

<sup>25</sup> Yūcuán na te coo seña nuū níandii jín nuū yoó jín nuū quími. Te ini ñayīṽi te quiji jnúndóho xeēn siquī ñáyuu táca nación. Te cunéé ni i, te yūhú i jeē ñihin xeēn mar te ndóna xeēn ndute mar vēji nuū ñúhun. <sup>26</sup> Te cuu sōo sava ñayuu jeē cáyūhú i cándetu i táca jnúndóho quiji siquī ñayīṽi. Te táca jéē ín andiví chi quisi i. <sup>27</sup> Yūcuán na te coto ñayuu nuū maá rí, Yaā ní nduu tēe, ndiji ri jín vicō, te condiso ri cuehē poder, te yōhyo luu kujéhu ri. <sup>28</sup> Te núu ni quejéé táca jniñu yáha, te ndeyí coo ni ró, te cocunuū ró andiví, chi je yajni jnama ya rohó. Achí yá jín de jijnáhan de.

<sup>29</sup> Te suni ni cahān yā jnúhun yátá yáha:

Condēhe jijnáhan ró ndese sáha nundēhe higo jín táca gá yujnu. <sup>30</sup> Núu cájito ró jéē ní quejéé náne

numa yújnu ún, te cájini ró jeē jé yajni coo tiempo jihní. <sup>31</sup> Te suni súcuan núu ni cajito ró jéē ní quejéé cúu táca jniñu jeē ni cáhān rī, yūcuán na te na jécūhun ni ró jeē ní cuyajni quiṽi ndacu Yaā Dios jniñu ini ñayīṽi.

<sup>32</sup> Jendaá cahān rī jín ró jeē ma cúu ndihī ñayuu tiempo un, chi nde squicu ndihī jniñu ún. <sup>33</sup> Andiví jín ñayīṽi chi naa, te táca jnúhun cahān rī chi ma náa, chi ndihī squicu.

<sup>34</sup> Te coto ma stiví ró maá ró jijnáhan ró jéē sáha ró táca cuéchi, jín jéē najīni ró, jín jéē kujnéñu ró jín táca ndajniñu cotecu ró, návāha tú sanaa ni ró te quee quiṽi un siquī ró. <sup>35</sup> Chi nájñuhun jeē núu iin trampa, súcuan quee jnúndóho siquī ñáyuu cáyūcu ní cáhnu ñayīṽi. <sup>36</sup> Núu súcuan te ndito coo ni ró, te níni cácan tahú ró, návāha cuu cácu ró núu táca jnúndóho jeē quiji ún, te cuu cuiñi ró núu ruhū, Yaā ní nduu tēe. Achí yá.

<sup>37</sup> Te ndiquiṽi steén yā jnúhun ini templo, te ndijnahan jecuaā jéndo ya nde yucu jeē naní Olivos. <sup>38</sup> Te táca jénéhen quécoo ñayuu nuū yā ini templo jeē cúni sōho i jnúhun stéén yā.

*Jeē ní casquijnáhan de jnúhun jni de Jesús*

(Mt. 26.1-5, 14-16; Mr. 14.1-2, 10-11; Jn. 11.45-53)

## 22

<sup>1</sup> Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. <sup>2</sup> Te sutū cácujuhnu jín tēe cástéén tutu ley, ni canducú yuhu de modo cahni de Jesús, chi cáyūhú de jeē quitī ni ñayuu.

<sup>3</sup> Te ni quiṽi Satanás ini anuá Judas jeē nastúu de ya. Te suni nání de Iscariote, te cúu de iin jnáhan jeē ndihúxi uū tēe apóstol. <sup>4</sup> Te ni jehēn de ni candajñuhún de jín táca sutū cácujuhnu jín tēe cándiso jniñu

ini templo, núu ndese nastúu de ya nuū tée un jíjnáhan. <sup>5</sup> Te tée un ní cacusí ni de, te ni cajejnūhun de jeē cuáha de xūhun nuū Judas. <sup>6</sup> Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

*Jeē ní jequin yā Cena yā*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájehni i londe nájñūhun ni ndacu Yaā Dios jniñu jeē sáha i vico pascua un. <sup>8</sup> Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jeē cuxíni yó vico pascua, achí yá.

<sup>9</sup> Te ni cacajnūhún de ya:

¿Ndé nuū cuní ni jéé quisátūhva ná? áchí de.

<sup>10</sup> Te ni cahān yā jíin de:

Cuángoo ñuu yūcuán, te núu ni quivícoo ró te najnáhan ró jíin ñn tée ndíso quiví ndute. Te condiquín rō de quihín rō jíin de nde vehe nuū ndívi de. <sup>11</sup> Te cahān rō jíin tée chíi vehe ún: Achí maá Maestro: ¿Ndé ñn cúu cuarto vehe ní cuāha núu ní núu cuxíni ya vico pascua jíin tée cáscuáha jíin yá, achí rō. <sup>12</sup> Yūcuán na te stéén de ñn cuarto cáhnu nde xiní vehe jeē je íyó túhva, te yūcuán sátūhva ró jeē cuxíni yó, áchí yá.

<sup>13</sup> Te cuangoo de, te ni canihín de nájñūhun ni cahān yā. Te ni casátūhva de jeē cuxíni ya vico pascua.

<sup>14</sup> Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tée cácuu apóstol. <sup>15</sup> Te ni cahān yā jíin de:

Yōhoyo ni cuu ni rī cuxíni rī jíin ró jíjnáhan ró vico pascua yáha, vijna nde ná tu cuu rī. <sup>16</sup> Chi cáhán rī jíin ró jeē ma caji cuii gā rī vico pascua, chí nde quiji quiví ndacu Yaā Dios jniñu ní ñayiví, te sáa te caji tucu rī, achí yá.

<sup>17</sup> Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnāhan ró. <sup>18</sup> Chi cáhán rī jíin ró jeē ndé vijna te ma cóho ga rī ndūxi uva, chí nde quiji quiví ndacu Yaā Dios jniñu ní ñayiví, te sáa te coho tucu rī. Achí yá.

<sup>19</sup> Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū de jíjnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuéchi ró jíjnáhan ró. Te níni caji rō súcuan jeē cáñuhun ni rō ruhū jeē ni jíhi rī jehē rō. Achí yá.

<sup>20</sup> Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñí rī jeē cuáha rī jeē cúu contrato jeé, te cati jeē ndundo cuéchi ró jíjnáhan ró.

<sup>21</sup> Te vijna chí tée nastúu ruhū, néne de jíin rī nuū mesa yáha. <sup>22</sup> Chi ruhū, Yaā ní nduu tée, jendaá cúu jeē quihín rī cuu rī nájñūhun je ni sándaā Yaā Dios jeē súcuan coo. Te nacā xeēn ndoho tée jeē nastúu ruhū, achí yá.

<sup>23</sup> Yūcuán na te ni caquejéé de cacajnūhun jnāhan de ndé ñn de cúu jeē nastúu de ya.

*Jeē ní cacahān de siquī ndé ñn de cújéhnu ga*

<sup>24</sup> Yūcuán na te yōhoyo ni cacahān de siquī ndé ñn de cújéhnu ga nuū jnāhan de. <sup>25</sup> Te ni cahān Jesús jíin de:

Rey taca nación chí cándacu ñihin de jniñu nuū ñayuu cájni de, te cacahān i jeē tée casáha vāha cúu jeē cácujeñnu nuū i. <sup>26</sup> Te rōhó jíjnáhan ró, ma cóo ró súcuan. Chí núu ndé ñn ró cújéhnu ga, te sa nasáha lulí ró maá ró. Te núu ndé ñn ró ndacu jniñu, te sa nasáha ró máa ró tée jéjñu nuū jnāhan. <sup>27</sup> ¿Te ndé ñn cúu jeē cújéhnu ga, á té

yéji nuū mesa, chí téé jéni cohō? ¿A násūu téé jeē yéji nuū mesa cúu jeē cujéhnū ga? Te ruhū nasūu súcuan cúu rí, chí ní nasáha rí maá rí nájnūhun téé jéjníñu nuū rō, chí vēji rí sáha rí jeē nihín tahú rō.

<sup>28</sup> Te maá ró cácuu téé jeē niní cáhīn jíin rí tāca quívī jeē ndóho rí jnūndóho. <sup>29</sup> Núu súcuan te nájnūhun ní sáha Tátá rí jeē ndácu rí jniñu, suni súcuan sáha rí jeē ndacu ró jniñu jíjnáhan ró. <sup>30</sup> Te caji rō coho ró jíin rí ini ñuu nuū ndacu rí jniñu. Te cucōo ró ññ mesa jeē sándaā rō jniñu ndihúxí uū yucūn Israel. Achí yá.

*Jeē ní cachí yā jeē yūhu Pedro cahān de jeē jini de ya*

(Mt. 26.31-35; Mr. 14.27-31; Jn. 13.36-38)

<sup>31</sup> Te suni ní cahān maá Jítóho yō jíin Simón Pedro:

Simón, cuni sōho ró, chí ní jicān Satanás rohó jíjnáhan ró jéē coto ndee rohó nájnūhun jeē síjin trigo, te stúu ndé ññ ró cácuu nájnūhun paja jeē nayūhu ró, te ndé ññ ró cácuu nájnūhun trigo jeē candíje nīhin ró. <sup>32</sup> Te ní jicān tahú rí jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnāhan ró jíin jnūhun rí. Achí yá.

<sup>33</sup> Te ní cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

<sup>34</sup> Te ní cahān yā:

Pedro, cáhān rí jíin ró jeē nde ná tu cana líhli vijna, te yūhu ró jeē jniñ ñayuu rohó, te unī jínu cahān rō jeē tu jíiní rō ruhū, achí yá.

*Jeē ní cuyajni coto ya jnūndóho*

<sup>35</sup> Yūcuán na te ní cajnūhun yá de jíjnáhan de:

Ná ní tají rí rohó ní jengoo ró jéē tu ní cóndiso ró ñunu ní yijni xūhún ní ndijēn, ¿te á ní iyo ññ jeē ní cumani nuū rō? Achí yá.

Te ní cacahān de:

Tú ní ññ ní cúmanī.

<sup>36</sup> Te ní cahān yā:

Nde vijna sa cáhān rí jeē cóndiso ró ñunu ró, te suni yijni xūhún. Te téé jeē tu névāha espada jeē coto de maá de, na xíco de ticāchí de te na cuāan de. <sup>37</sup> Chí cáhān rí jíin ró jeē quee quívī ndoho yó jnūndóho, chí cánuú squícu jnūhun yáha jéē cahān nuū tútu siquī rí: Sáha ñayuu jíin yá nájnūhun cásáha i jíin téé sáha cuēchi xeēn, áchí tutu. Chí tāca jnūhun un jéé yosó cáhān siquī rí, chí squícu nahín, áchí yá.

<sup>38</sup> Yūcuán na te ní cacahān de:

Yáha íyó úu espada, achí de.

Te ní cahān yā jíin de:

Jíin jéé yáha-ní, áchí yá.

*Jeē ní jicān tahú yā nuū huerto Getsemaní*

(Mt. 26.36-46; Mr. 14.32-42)

<sup>39</sup> Te ní quenda ya cuahān yā yucu Olivos nájnūhun sáha sáha ya. Te téé cáscuáha jíin yá ní candiquín de ya cuango de jíin yá. <sup>40</sup> Te nuū ní jíinū yā yūcuán, te ní cahān yā jíin de:

Cacān tahú rō jijnáhan ró jéē chindéé ñhān yá rohó jéē ma sáha ró cuēchi núu coto ndee jeneé rohó, achí yá.

<sup>41</sup> Te ní jica ya jecu, cūhva jeē jicá jíinú yuū jeē squíin. Te ní jecuññ yití yá, te suhva ní jicān tahú yá:

<sup>42</sup> Tátā, núu cúní ní te tejiyo ní jnūndóho yáha jéē ma quíji siquī ná. Te nasūu jéē cuní maá ná, chí jeē cuní maá ní na cóo, áchí yá.

<sup>43</sup> Te ní cane ññ ndajéhé andiví núu yā, te ní jēhe fuerza nuū yā.

<sup>44</sup> Te cúcuíhyá ndasí ní yā jeē quiiji jnūndóho siquī yā, te ní nducú ndeyí gá yā ní jicān tahú yā. Te ní cane jnañū yā, te tóo nuū ñūhun nájnūhun yúyú náhnu niññ.

<sup>45</sup> Te ná ní ndocuññ yā jeē ní jicān tahú yā, te ní ndee yā nuū téé cáscuáha jíin yá. Te ní jito ya jeē cáquixī de, chí tuá cáhīyo ndeyí ní de cacān tahú de jeē cácuquíhyá ndasí ní de. <sup>46</sup> Te ní cahān yā jíin de:

¿Naun cáquixī rō? Ndonga te cacān tahú rō jeē chindéé ñáhan yá rohó jeé ma sáha ró cuéchi jeē coto ndee jeneé rōhó. Achí yá.

*Jeē ní cajñi de Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Te sá cáhan gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. <sup>48</sup> Te ni cahān Jesús jíin de:

Judas, ¿á jíin jeē téchūhu ró ruhū cúu jeē nastúu ró rúhū, Yaa ní nduu tēe? Achí yá.

<sup>49</sup> Te tēe cáhīn jíin yá, ni cajito de jeē ní quejéé cúu, te ni cacajñuhún de ya:

¿A ndonga ná jíin náhan ná síquī de jíin espada? áchí de.

<sup>50</sup> Te ñn de ni stují de mozo sutū cujéhu ga, chí ni jehnde de sōho lado váha. <sup>51</sup> Te ni cahān Jesús:

Siáá, na jécuiñi, achí yá.

Te ni tee ya ndaha ya sōho mozo un, te ni nasávāha ya de. <sup>52</sup> Te ni cahān yā jíin sūtū cácujeñhu jíin tēe cándiso jñiñu ini templo jíin táca tēe jéhu jeē ní quecoo de jeē jñi de ya:

¿Te va tēe cuihná cúu ri jeē véjicoo ró jíin espada jíin yujnu jeē jñi ró rúhū jeē súcuan? <sup>53</sup> Táca quívī ni ine ri jíin ró jijnáhan ró ini templo cáhnu, te tu ní cájñi ró rúhū. Te vijna te ni quee hora jeē jñi ró rúhū jíin jeē sáha ró táca jñiñu jeē ndácu jeneé jeē ndeé núu nēe. Achí yá.

*Jeē ní cachi Pedro jeē tu jíin de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Te ni cajñi de ya cuango de jíin yá vehe sutū cujéhu ga. Te Pedro chí jíicá-ni ndíquín de ya. <sup>55</sup> Te táca policía ni cascáyú de ñuhún ini patio, te ni condúu de yuñuhún un cáyucú de. Te suni ni cucōo Pedro jíin de. <sup>56</sup> Te ñn ñahan jéjñiñu ini

vehe un, ní jito ña nuū de jeē néne de yuñuhún. Te ni jito váha ña nuū de, te ni cahān ña:

Tēe yáha suni ní jica de jíin tēe ún, áchí ña.

<sup>57</sup> Te máá de tu ní cáchi de, chí ni cahān de:

Tu jíin rī tēe ún, áchí de.

<sup>58</sup> Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan táca tēe un cúu ró, áchí.

Te ni cahān Pedro:

Nasúu cúu ri, hombre, achí de.

<sup>59</sup> Te ni cuu nájnūhun ñn hora gā, te ni cahān ñhin inga de:

Jendaá ndije jeē tēe yáha ní jica de jíin tēe ún, chí suni tēe región Galilea cúu de, áchí de.

<sup>60</sup> Te ni cahān Pedro:

Hombre, tu jíin rī na jñūhun cáhan rō.

Te sá súcuan cáhan gā de, te ni cana-ni líhli. <sup>61</sup> Yūcuán na te ni ndió coto máá Jítoho yō, te ni jito ya nuū Pedro. Te ni nucūhun ní de jñūhun ni cahān yā jíin de: Nde ná tu cana líhli, te yūhu ró te cahān rō uní jinu jeē tu jíin rō ruhū. <sup>62</sup> Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

*Jeē ní casácatā de nuū yā*

(Mt. 26.67-68; Mr. 14.65)

<sup>63</sup> Te táca tēe cándito Jesús, ni casácatā de nuū yā, te ni cacani de ya. <sup>64</sup> Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

<sup>65</sup> Te cuehē gā jñūhun súcuan ni cacahān neé de jíin yá.

*Jeē ní indichi Jesús nuū junta tēe cácujeñhu ga*

(Mt. 26.59-66; Mr. 14.55-64; Jn. 18.19-24)

<sup>66</sup> Te jeē ní cundijin, te ni candutútú táca tēe jéhu cándacu jñiñu nuū ñayuu hebreo, jíin sūtū cácujeñhu, jíin tēe cástéén tutu ley Yaa Dios. Te cuango de jíin yá nuū

junta tēe cácujuhnu ga, te yūcuan ní cacajñuhún de ya:

<sup>67</sup> Cachi, ¿á máá ró cúu Cristo jeē ní tají Yaā Dios? Achí de.

Te ní cahān yā jíin de:

Vēsú na cáhān rī jeē suu ri cúu, te ní ma candije cuiti rō. <sup>68</sup> Te suni núu cajñuhun máá rí rohó jíjnāhan ró, te suni ma stió cuíñí rō nuū rī, ní ma siaá rō ruhū. <sup>69</sup> Te ruhū, Yaā ní nduu tēe, tāca quívi jeē quíji conene ri lado váha máá Yaā iyó poder, achí yá.

<sup>70</sup> Yūcuán na te ndihi de ni cacajñuhún de ya:

¿A máá ró cúu Sēhe Yaā Dios núu súcuan?

Te ní cahān yā jíin de:

Suu ri cúu, nájnūhun cácahān rō, achí yá.

<sup>71</sup> Yūcuán na te ni cacahān de:

¿Na testigo gā jíni ñuhún yó núu súcuan? Chi ní cajini sōho yó jíin yuhu máá de jeē cahán ndevāha de jeē cúu de Sēhe Yaā Dios. Achí de jíjnāhan de.

*Jeē ní indichi Jesús nuū Pilato*

(Mt. 27.1-2, 11-14; Mr. 15.1-5; Jn. 18.28-38)

## 23

<sup>1</sup> Yūcuán na te ní candocuiñi ndihi de, te cuango de jíin yá nuū Pilato. <sup>2</sup> Te yūcuan ní caquejé de cacahān de cuēchi siquī yā:

Ni canihīn na tēe yáha jēe stóna de ñayuu siquī tohō. Te cáhān de jeē tú váha jeē cuāha ná xuhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíjnāhan de.

<sup>3</sup> Yūcuán na te Pilato ni cajñuhún de ya:

¿A máá ró cúu Rey ñayuu hebreo? Te ní cahān yā:

Suu ri cúu, nájnūhun cáhān rō, achí yá.

<sup>4</sup> Te ní cahān Pilato jíin sūtū cácujuhnu jíin ñayuu cuehē ún:

Tú ní ñn jñuhun stívi cáhān tēe yáha jēe nihín rī cuēchi siquī de, achí de.

<sup>5</sup> Te máá de víhyá gā ni cacahān de:

Tēe yáha stóna ndasí de ñayuu siquī tohō jíin jñuhun stéen de ní Judea. Chi ní quejé de stéen de nde Galilea, te vijna te nde yāha, achí de.

*Jeē ní indichi Jesús nuū Herodes*

<sup>6</sup> Te nuū ní jini sōho Pilato jeē Galilea cácahān, te ní cajñuhún de ñayuu núu tēe región Galilea cúu ya.

<sup>7</sup> Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quívi ún suni ine Herodes ñuu Jerusalén.

<sup>8</sup> Te nuū ní jito de nuū Jesús, te yōhyo ní cusī ní de, chi je ní cuu cuehē tiempo jeē cuní de coto de nuū yā. Chi ní nihín de jñuhun ya, te ñuhun ní de jeē sáha ya ñn jniñu jénu coto de.

<sup>9</sup> Te ní cajñuhún de ya cuehē jñuhun, te tu ní stió cuíñí yā ní ñn jñuhun nuū de. <sup>10</sup> Te suni cáhiin tāca sūtū cácujuhnu jíin tēe cástéen tutu ley, te nihín ní cacahān de cuēchi siquī yā.

<sup>11</sup> Yūcuán na te Herodes jíin tāca soldado de ní cacahān neé de jíin yá, te ní casacatā de nuū yā, chí ní cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato. <sup>12</sup> Te máá quívi un ní candumanī jñāhan Pilato jíin Herodes, chí ichi yátá ní caquiti jñāhan ní de.

*Jeē ní cundaā jeē cúu yā*

(Mt. 27.15-26; Mr. 15.6-15; Jn. 18.39-19.16)

<sup>13</sup> Yūcuán na te ní cana Pilato tāca sūtū cácujuhnu jíin tāca tēe cándiso jniñu jíin tāca gá ñayuu, ní candutútú. <sup>14</sup> Te ní cahān de:

Ni caquindeca ró tēe yáha núu rī, jeē cacahān rō jeē stóna de ñayuu siquī tohō. Te je ní stichí rī de, ní



cajito jínū rō. Te tu ní níhín rī ní ñn cuēchi siquī de nájñūhun jeē cácahān rō. <sup>15</sup> Te ni Herodes, tu ní níhín de, chí ni natajī tucu de tēe yáha núū rī. Te tú cuiti ni ñn cuēchi ní sáha de jeē cúū de. <sup>16</sup> Núū súcuan te na cuáha ri castigo de, te siáá rī de quihīn de, áchí Pilato.

<sup>17</sup> Te íyó costumbre jeē tācá vico pascua siaá Pilato ñn preso jeē cuní ñayuu. <sup>18</sup> Te ñayuu cuehē ún, inuú-ni ní cacana jee í:

Na cúū tēe jíñá, te siáá ní Barrabás, achí i.

<sup>19</sup> Te Barrabás íne de vecāa siquī jeē ní stóna de ñayuu siquī tohō íni ñuu ún, te ni jehni de ndīyi. <sup>20</sup> Te Pilato cuní de siáa de Jesús, te ni cahān tucu de jíñ ñayuu. <sup>21</sup> Te máá i víhyá gā ni cacana jee í:

Cata caa ní de jicā cruz, na cúū de, áchí i.

<sup>22</sup> Te ni cahān tucu de jíñ i vuelta uní:

¿Na cuēchi ní sáha de núū súcuan? Tu ní níhín cuiti rī ní ñn cuēchi siquī de jeē cúū de. Núū súcuan te na cuáha ri castigo de, te siáá rī de quihīn de, áchí Pilato.

<sup>23</sup> Te víhyá gā ni cacana jee ñayuu un, ní cacahān níhín i jeē na cúū yā jicā cruz. Te máá i jíñ táca sūtū cácujuhnu, ní cacana jee ndasí i. Te ni cacundeyí i ní cascáhān i Pilato jeē na cúū yā. <sup>24</sup> Yūcuán na te ni ndacu Pilato jniñu jeē na cóo nájñūhun cáculi i. <sup>25</sup> Te ni siaá de tēe jeē ní cajicān i, tēe jeē íne vecāa jeē ní stóna de ñayuu siquī tohō te ni jehni de ndīyi. Te ní jēhe de jñūhun jeē na cúū Jesús nájñūhun cáculi i.

*Jeē ní cacata caa de ya jicā cruz*

(Mt. 27.32-44; Mr. 15.21-32; Jn. 19.17-27)

<sup>26</sup> Te cuangoo tācá soldado jíñ yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendijī de jeē ní jēhēn de rancho. Te ní catejníñu de tēe

un jēē cóndiso de cruz yā quihīn de yatā yā.

<sup>27</sup> Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuquíhyá ní ña jehē yā. <sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan rō, ma ndahyū rō jehē rī, chí sa suhva ndahyū rō jehē maá rō jíñ jēhe sēhe rō jíñáhan i. <sup>29</sup> Chi quee quivī jeē coo jñūndóho xeēn siquī rō, te cahān rō: Yōhyo ndetū tācá ñahan númá, jíñ jēe tu ní scácu sēhe, jíñ jēe tu ní cóndeca yiquín, chí tú sēhe ña jeē jnahuhū ní ña jeē ndóho i, achí rō jijnáhan rō. <sup>30</sup> Quivī ún te quejéé ñayuu cahān i jíñ táca yucu: Cotúú síquī rī jijnáhan ri návāha cuu rī. Te suni jíñ táca loma: Casi siquī rī jijnáhan ri, achí i. <sup>31</sup> Chi núū casáha xeēn i jíñ rúhū jeē tú na cuēchi ri, te nagā ní cuu jeē ma cóo xeēn siquī ndihí ñayuu chí íyó cuéchi i. Achí yá.

<sup>32</sup> Te suni cuangoo de jíñ úū tēe ni casáha cuēchi xeēn, jeē suni cuu de jíñ yá. <sup>33</sup> Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ní cacata caa de ndíndúú tēe ní casáha cuēchi xeēn un núū uū gā cruz, ñn de lado váha ya, te inga de lado jecó yá. <sup>34</sup> Te níñí jēe súcuan cúū, te ní cahān Jesús:

Tātā, cone cáhnu ní ní núū de jíñáhan de, chí tu cájini de na vé casáha de, áchí yá.

Te soldado un ní casáha de sor-teo jeē siquí ndese níhín ñn ñn de sahna ya. <sup>35</sup> Te cáhīn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núū inga ñayuu ní jnama de, te na jnama de máá de vijna, te núū ndaā jeē Cristo jeē ní nacāji Yaā Dios cúū de, áchí.

<sup>36</sup> Te tācá soldado suni ní casácatá de nuū yā, chí ní quecoo de nde nuū yā, te ní cajēhe de

vinagre iyá coho ya. <sup>37</sup> Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

<sup>38</sup> Te suni ni Iyo jnūhun jeē ndeé xinī cruz yā jeē cahán na siquī ni jhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup> Te ñin jeē ndindúú téé ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndindúú rí, achí de.

<sup>40</sup> Te ñnga de ni cahān de nuū jnáhan de:

¿A tu yúhú ró Yaā Dios naún? Chi ñnuú cándoho yó jíin Yaā yāha. <sup>41</sup> Te máá yó chi vetū-ni cándoho yó, chi yāha cánihīn yō castigo siquī jniñu neé ní casáha yó. Te Yaā yāha chí tú ni ñin cuēchi ní sáha ya, achí de.

<sup>42</sup> Te ni cahān de jíin yá:

Jesús, nucūhun ni ní sáña jéé quéjéé ní ndacu ní jniñu, achí de.

<sup>43</sup> Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, achí yá.

*Jeē ní jhī Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Te nuū ní cuu nájnūhun cahuxī uū, te ni cunee níí cáhnu nde cahunī. <sup>45</sup> Te ni cujnúú níāndii. Te sahma ndíta caa jeē ndihyú cuarto ñi ini templo cáhnu, ni ndatā-ni sava sava. <sup>46</sup> Yūcuán na te ni cana jee Jesús:

Tātā, naquihin ní ánuá na, achí yá.

Te súcuan ni cahān yā, te ni jihī-ni ya.

<sup>47</sup> Te téé nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te achí de:

Jendaá ndije jeē téé tú na cuēchi cúu téé yāha, achí de.

<sup>48</sup> Te ndivii ñayuu cáhīn yūcuan ní cajito i tāca jéé ní cuu, te cácani i yiqui jíca i jeē cájnahuhū ni i, te ni nandió cóo i cuanungoo i. <sup>49</sup> Te tāca ñayuu cájini jnáhan jíin yá, jíin tāca ñahan Galilea jeē ní cajica ña jíin yá, cáhīn jíca ña cájito ña tāca jéé ní cuu.

*Jeē ní quindūji Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Te ni Iyo ñin téé vāha téé ndaā, nání de José. Te téé ñuu Arimatea ndañū Judea cúu de. Te cúu de jnáhan tāca téé hebreo cácujeñnu ga jeē casáha junta. <sup>51</sup> Te ñūhun ni de jeē quiji quiví jeē ndacu Yaā Dios jniñu, te suni tu ní nūjnahan ni de jeé ní casánda junta un jéé cúu Jesús. <sup>52</sup> Te téé un ní jehēn de nuū Pilato, ni jicān de yiqui cúñu Jesús. <sup>53</sup> Te ni snúu de ya jíca cruz, te ni chusúcún de ya ñin sahma cuitá. Te ni chindūji de ya ini ñin yaū jeé ní caan jíca ñin cava, nuū ná tu quindūji ndiyi. <sup>54</sup> Te quiví un cúu quiví casátūhva ñayuu, chí jehini un quéjéé quiví ndétátú.

<sup>55</sup> Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. <sup>56</sup> Te cuanungoo ña vehe ña, te ni casátūhva ña tāca perfume jíin aceite yucū jeén asīn. Te ni candetátú ña quiví ndétátú, nájnūhun ndácu ley Yaā Dios jniñu.

*Jeē ní natecu Jesús*

(Mt. 28.1-10; Mr. 16.1-8; Jn. 20.1-10)

## 24

<sup>1</sup> Te jenéhen ndasí quiví domingo, te ni jinūcoo tucu ñahan un núū ní yindūji Jesús, te cándahá ña tāca perfume jíin aceite ni casátūhva ña. Te suni cuangoo sava ga ñahan jíin ña. <sup>2</sup> Te nuū ní jinūcoo ña, te ni cajito ña jeé ní cujiyo yuū ndihyú

yuyáú ndīyi. <sup>3</sup> Te ni quivicoo ña yaū ún, te tuá yiqui cúñu Jitoho yō Jesús ni cájito ña. <sup>4</sup> Te ni cacunéé ni ña cájito ña jeē tuá ndīyi. Sáá te ni cajito ña uū ndajéhé Yaā Dios jeē cáa nájnūhun tēe, cáhīin ya xiin ña, te cáñūhun ya sahma ndíndēé. <sup>5</sup> Te yōhoyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu? <sup>6</sup> Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. <sup>7</sup> Chi ní cachi ya jeē maá yá, Yaā ní nduu tēe, cánuú natuu ya nuū táca tēe cáhīyo cuēchi, jeē jñi de ya cahni de ya jicā cruz, te nuū uní quivī te natecu yā. Achí ndajéhé un.

<sup>8</sup> Yūcuán na te ni canucūhun ni ña táca jñūhun ni cahān Jesús. <sup>9</sup> Te ni quendacoo ña nuū ní yindūji ya, te cuanungoo ña. Te ni canacani ña táca jñūhun yáha nuū ndihúxí ñn apóstol jíin nuū táca gá de. <sup>10</sup> Te ñahan ní canacani jñūhun yáha nuū tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. <sup>11</sup> Te táca apóstol chi cájeni ni de jeē jñūhun cánéé cáñúú cácahān ña, te tu ní cácañde de.

<sup>12</sup> Te vésú súcuán, te Pedro ni quenda de, te jínu de cuacondéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu maá na. Te cuanuhun de vehe de, te nahán náá ni de jeē ní jito de jeē tuá yá.

*Jeē ní ndajnūhun yá jíin úú de ichi cuáhān Emaús*  
(Mr: 16.12-13)

<sup>13</sup> Te suu quivī un cuángoo uū jñáhan de ñn ñuu naní Emaús, jeē jicá nájnūhun uxí ñn kilómetro jíin ñuu Jerusalén. <sup>14</sup> Te cándajnūhún de siquī táca jñiñu jeē ní cuu ún. <sup>15</sup> Te níni cándajnūhún de te cácajnūhun jñáhan de, te maá Jesús ní cuyajni

ya yatā de, te jíca ya cuahān yā jíin de. <sup>16</sup> Te ni sáha jíin de jeē tu ní cánacuni de ya, vésú cájito de nuū yā. <sup>17</sup> Te ni cajñūhun yá de:

¿Na jñūhun cándajnūhun ró cájica ró? ¿Te najehé cácuuñhyá ní rō? Achí yá.

<sup>18</sup> Te ñn de jeē naní Cleofas ni cahān de jíin yá:

Ndihí cuiti ñayuu cájini i táca jñiñu ní cuu ini ñuu Jerusalén táca quivī yáha. ¿Te á mañūhún-ni níhín cúu jeē ní quee ní ñuu un jéé tu jíni ní na vé ní cuu? Achí de.

<sup>19</sup> Te ni cajñūhun yá de:

¿Te na vé ní cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jíin poder Yaā Dios ní sáha ya táca jñiñu jéhu te ni nacani ya jñūhun, jíto jíinúú Yaā Dios jíin táca ñayuu. <sup>20</sup> Te sutú cácujuhnu jíin tēe cándiso jñiñu nuū ná, ni canastúu de ya nuū táca tēe Roma, te tēe un ní casándaā de jeē cúu yā jicā cruz.

<sup>21</sup> Te maá ná ní cañūhun ni na jéé maá yá jnama ya nación na Israel nuū ñayuu Roma nuú. Te siquī táca jñiñu yáha, te ni cane inga jñūhun. Chi vijna je íyó uní quivī jeē ní cuu ún. <sup>22</sup> Te sava ñahan cájini jñáhan ná jíin, ni canacani ña ñn jñūhun jeē yóhoyo cánaa ní na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyi ún.

<sup>23</sup> Te tuá ni cájito ña yiqui cúñu yā. Te ni ndecoo ña nuū na jíjñáhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup> Te ni jengoo sava jñáhan ná ndé yaū ndīyi ún, te ni cajito de jeē súcuán íyó, nájnūhun ni cacahān ñahan ún, te tu ní cájito cuiti de nuū yā.

<sup>25</sup> Yūcuán na te ni cahān maá yá jíin de:

Tēe tu cájecūhun cuiti ní cácuu ró. Yóhoyo uhū cácañde ró táca jñūhun

de.

Tēe tu cájecūhun cuiti ní cácuu ró. Yóhoyo uhū cácañde ró táca jñūhun

de.

Tēe tu cájecūhun cuiti ní cácuu ró. Yóhoyo uhū cácañde ró táca jñūhun

Cristo ni cacahān tēe ni canacani jnūhun Yaā Dios nde jenahān. <sup>26</sup> ¿Te á tu súcuan ní jini ñúhún ndoho Cristo tāca jnúndóho yáha, te sáá te quinhun yā nuū lúu cujéhu ya? Achí yá.

<sup>27</sup> Te ni nacani cáji yá tāca jnūhun jeē yosó núu tútu ií jeē cahán siquí maá yá. Te ni quejéé yá jíin jnūhun ni tee Moisés, te ni cahān gā yā tāca jnūhun jeē ní catee tēe ni canacani jnūhun ya nde jenahān.

<sup>28</sup> Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihín yá. <sup>29</sup> Te máá de ni castéu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quiví ya jeē quéndōo ya jíin de. <sup>30</sup> Te nuū ní cucōo ya mesa jeē cáji yā jíin de jíjnáhan de, te ni quihín ya staā, te ni jicān tahu yá, te ni tahu cuéchi yá, te ni jēhe ya nuū de. <sup>31</sup> Te jeē sáha ya súcuan, te nájnūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. <sup>32</sup> Te ni cacahān maá de:

Jendaá jeē yóhoyo ni cacusií ni yō ná ni nacani ya jnūhun nuū yō ichi ún te ni castūhun cáji yá jnūhun cáhán tutu ií. Achí de.

<sup>33</sup> Yūcuán na te yachí ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxi ñn ga apóstol, cáyūcu tútu de jíin sava ga jnáhan de. <sup>34</sup> Te ni cacahān tēe cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíjnáhan de.

<sup>35</sup> Yūcuán na te ndindúú tée un ní canacani de jnūhun ndese ni najnáhan ya jíin de ichi, jíin ndese ni canacuni de ya ná ni tahu cuéchi yá staā.

*Jeē ní nane ya nuū tée cáscuáha jíin yá*

(Mt. 28.16-20; Mr. 16.14-18; Jn. 20.19-23)

<sup>36</sup> Te sá cacahān gā de tāca jnūhun yáha, te ni jecuiñi-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jíjnáhan ró, áchí yá.

<sup>37</sup> Te ni candacoto iyo de, ni cayūhú ndasí de, chi ni cajeni ni de jeē ñn ánuá cúu ya. <sup>38</sup> Te ní cahān yā jíin de:

¿Naun cáyūhu ró, te naun cájeni siquí ni rō súcuan? <sup>39</sup> Condēhé ndaha ri jíin jéhē rí, te cuni rō jeē maá rí cúu. Jñi ruhū te cuni rō, chi ñn ánuá tu névāha cūñu ni yiqui nájnūhun cájito ró jēé névāha máá rí, achí yá.

<sup>40</sup> Te jeē ní cáhān yā súcuan, te ni steén yā ndaha ya jehē yā nuū ni yíñi ndūyu cáa. <sup>41</sup> Te yóhoyo ni cacusií ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rí yahá? áchí yá.

<sup>42</sup> Yūcuán na te ni cajēhe de ñn pedazo chācá ní tau nuū yā, jíin ñn pedazo ñahmā ndūxi yocō. <sup>43</sup> Te ni quihín ya, te ni yeji yā nuū de jíjnáhan de. <sup>44</sup> Te ni cahān yā jíin de:

Tāca jēé ní cuu jíin rí cúu jeē ní cáhān rí ná ni ine ri jíin ró jíjnáhan ró ndé saá, jeē cánuú squícu tāca jnūhun ri jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

<sup>45</sup> Te ni nune ya jeē níjnūmí de, návāha cuu jecūhun ni de tāca jēé cahán tutu ií. <sup>46</sup> Te ni cahān yā:

Súcuan cáhán nuū tútu jeē ruhū Cristo, cánuú cuu rí, te nuū uní quiví natecu rí. <sup>47</sup> Te cuitē núu jnūhun ri jeē cánuú nacani ni ñayuu jeē stóo i cuéchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihín nuū ñayuu tācá nación. <sup>48</sup> Te máá ró cácuu tēe nacani jnūhun

tācá jniñu ní cajito ró. <sup>49</sup> Te taji  
 rí Espíritu Santo quiji ya nuū rō  
 jijnáhan ró, nájnūhun ni jejnūhun  
 Tátá rī. Te na quéndōo ró ñuu  
 Jerusalén condetu ró ndé nihīn rō  
 poder Espíritu Santo jeē quiji nde  
 andiví. Achí yá.

*Jeē ní ndaa ya cuanuhun yā  
 andiví*

*(Mr. 16.19-20)*

<sup>50</sup> Yūcuán na te ni quenda ya ñuu  
 Jerusalén, cuahān yā nde ñuu Beta-  
 nia jín de jijnáhan de. Te ni ndone-  
 hen ya ndindúú ndaha ya, te ni  
 jicān tahu yā jehē de. <sup>51</sup> Te ní ní jícán  
 tahu yā jehē de, te ni cujiyo-ni ya  
 nuū de, ni ndaa ya cuanuhun yā  
 andiví. <sup>52</sup> Te máá de ni cachiñúhún  
 de ya. Te sáá te cuanungoo de  
 ñuu Jerusalén, te yōh̄yo cácus̄ni de.  
<sup>53</sup> Te ní ní cáh̄in de ini templo cáhnu,  
 cánacuatáhú de nuū Yaā Dios. Te ni  
 cuu. Amén.

## JNUHUN VAHA NI TEE SAN JUAN

*Yaā naní Jnúhun Yaā Dios ni nduu ya tēe*

<sup>1</sup> Nde xīhna ñúhún ná ni jecōo ndihí jeē iyó, te je iyó Yaā naní Jnúhun Yaā Dios, chí steén yā ndihí jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. <sup>2</sup> Máá yá ndeé yá nde jeē xīhna ñúhún jíin Yaā Dios. <sup>3</sup> Te ní sáha Yaā Dios jeē jíin máá yá ní jecōo ndihí tāca jēe iyó. Te ma jecōo ní ñn jeē iyó núu tu ní sáha máá yá. <sup>4</sup> Máá yá sáha jeē técu ndihí-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ní i síquī Yaā Dios. <sup>5</sup> Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

<sup>6</sup> Te ní iyo ñn tēe jeē ní tají Yaā Dios, naní de Juan. <sup>7</sup> Tēe un ní quiji de jeē nácani cájī de jnúhun máá Yaā cúu luz, návaha candíje tāca ñayuu jeē jíin jnúhun cáhán de. <sup>8</sup> Nasūu máá Juan cúu luz ún, chí cúu de ñn jeē ní nacani cájī jnúhun máá luz un. <sup>9</sup> Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

<sup>10</sup> Te Yaā cúu Jnúhun Yaā Dios ní condee yā ini ñayíví, te vésú jeē jíin máá yá ní sáha Yaā Dios ñayíví, te ñayuu ñayíví tu ní cácuni i cuatáhú i jeē máá yá cúu. <sup>11</sup> Ní quiji ya nuū ñayuu máá yá nación hebreo, te ñayuu ún tu ní cájetáhú i ya. <sup>12</sup> Te vésú súcuan te sava ñayuu chí ní cajetáhú i ya, te ní cacandíje i jeē sáha ya jehē i. Te nuū máá i ní jēhe ya jnúhun jeē ndúu i sēhe Yaā Dios. <sup>13</sup> Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ní nasūu síquī jeē cácuni tēe,

chí máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ní nduu ya tēe, te ní condee yā jíin yó. Te ní cajito yó jēe yóhoyo luu cújéhnú ya, chí máñúhún-ni ya cúu Sēhe Tátá yā, Yaā cújéhnú súcuan. Te máni máá jēe sáha ya jeē váha yóhó, te máni máá jnúhun ndaā cahán yā. <sup>15</sup> Te Juan ní nacani de jnúhun ya, te ní cahán de:

Yaā yáha cúu jeē ní cáhán rī náa áchí rī jeē Yaā quiji chí cújéhnú ga yā vésú ruhū, chí je iyó yá nde ná tu cacu rí, achí de.

<sup>16</sup> Te ndihí yó ní canihín yō cuehē ndasí jeē váha iyó núu yā, chí máni jeē váha sáha sáha ya jíin yó. <sup>17</sup> Moisés ní steén de ley Yaā Dios nuū ñayuu jenahán, te Jesucristo chí sáha ya jeē váha yóhó te steén yā tāca jnúhun ndaā Yaā Dios nuū yō. <sup>18</sup> Tú ní ñn ñayuu ní jíto cuítí nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ní steén nuū yō ndese Yaā cúu Yaā Dios.

*Jnúhun Jesús jeē ní cáhán Juan tēe scuándute*

(Mt. 3.11-12; Mr. 1.7-8; Lc. 3.15-17)

<sup>19</sup> Te ñayuu hebreo ñuu Jerusalén, ní catají i jecu sutū jíin tēe grupo levita jeē cájejniñu ini templo, ní jengoo de nuū Juan, návaha cajnúhún de ndé ñn cúu Juan te na jniñu ndíso de. <sup>20</sup> Te Juan cájī ní cachí de:

Nasūu rúhū cúu Cristo, achí de.

<sup>21</sup> Te ní cacajnúhún tucu de:

Núu súcuan ¿te ndé ñn cúu ró? ¿A cúu ró Elías, tēe ní nacani jnúhun Yaā Dios nde jenahán, chí naún?

Te ní cahán Juan:

Nasūu de cúu rí.

Te ní cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quiji?

Tuú, achí tucu Juan.

<sup>22</sup> Te ní cacahán tucu jíin de:

¿Te ndé ñn cúu ró núu súcuan? Cachi nuū rī jijnáhan rí, chí jíni

ñúhún castūhun rí nuū tāca tée ni catajǎ rúhū vējicoo ri. Cachi na jniñu ndiso ró ví.

<sup>23</sup> Te ni cahān Juan:

Máá rí cúu tēe jeē ni cáhān Isaías, tēe ni nacani jnūhun Yaā Dios nde jenahán, jeē quǎji ri cana jee ri nde nuū ñūhun téhé. Te cáhān rǎ jǎn ñāyuu jeē na sátūhva i máá i, chi quǎji máá Jítóho yō. Achí Juan.

<sup>24</sup> Te tēe grupo fariseo cácuu jeē ní catajǎ tée ni quǎjicoo ún. <sup>25</sup> Te ni cacajñúhún de Juan:

Núu súcuan ¿te naun scuándute ró te núu nasūu Cristo ni Elías ni máá tée quǎji nacani jnūhun Yaā Dios cúu ró?

<sup>26</sup> Te ni cahān Juan:

Ruhū chi jǎn ndute scuándute ri. Te mēhñu ró jǎnahan ró íne ñn Yaā jeē tu cájini rō. <sup>27</sup> Te Yaā un cúu jeē ni cáhān rǎ jeē quǎji ya te cújēhnu ga yā vēsú ruhū. Chi tú na vé jēhnu cuiǎi cúu ri nuū yā, ni jeē cua-jniñu ri nuū yā vēsú ñn jniñu lúli gá nájñūhun jeē ndajǎ rǎ correa ndijēn yā. Achí de.

<sup>28</sup> Súcuan ni cuu jeē ní canda-jnūhún de jǎn Juan nde Betábara jeē íne ichi núu cáne niāndii yūte Jordán, nuū scuándute Juan.

*Siquǎ jeē cúu ya Londe Yaā Dios*

<sup>29</sup> Te inga quǎivǎ un ní jito Juan nuū Jesús jeē véji ya nuū de. Te ni cahān de jǎn ñāyuu:

Condēhe jǎnahan ró, chi yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayivǎ. <sup>30</sup> Yaā yāha cúu jeē ni cáhān rǎ jeē quǎji ñn Yaā cujēhnu ndasǎ, chi je íyó yá nde ná tu cacu ri. <sup>31</sup> Te nde saá te tu ní jǎn rǎ jeē yāha cúu Yaā ní tajǎ Yaā Dios. Te ni quǎji ri jeē scuándute ri ñayuu ñuu yō Israel jǎn ndute, návāha stéén rǎ nuū i jeē suu ya cúu, achí Juan.

<sup>32</sup> Te suni ni cahān gā de jnūhun ya:

Ni jito ri Espiritu Santo, ni cuun ya ichi ándivǎ, cáa ya nájñūhun

paloma, te ni quee ya xinǎ Jesús. <sup>33</sup> Te nde saá te ná tu cuni rǎ jeē Jesús cúu. Te máá Yaā Dios jeē ní tajǎ yá ruhū jeē scuándute ri jǎn ndute, ni cahān yā jǎn rǎ: Núu ni jito ró jēe cúun Espiritu Santo te quendōo xinǎ ñn tēe, yūcuan cúu Yaā jeē cuáha Espiritu Santo condee ini anuá ñayuu, achí Yaā Dios. <sup>34</sup> Te je ni jito ri ún, te nácani cájǎ rǎ jnūhun jeē máá yá cúu Sēhe Yaā Dios. Achí Juan.

*Uū tēe jeē ní cana ya xǎhna gā*

<sup>35</sup> Te inga quǎivǎ ún te Juan íne tucu de yūcuan jǎn uū tēe cájica jǎn de. <sup>36</sup> Te ni jito de nuū Jesús jeē jǎca ya yūcuán. Te ni cahān de:

Condēhe jǎnahan ró, chi yūcuan cúu Yaā cúu Londe jeē ní tajǎ Yaā Dios.

<sup>37</sup> Te ndǎndúú tée cájica jǎn Juan ni cajini sóho de jnūhun yāha, te ni candiquǎn de Jesús. <sup>38</sup> Te ni ndió cóto Jesús, te ni jito ya jeē cándiquǎn de yatā yā. Te ni cahān yā jǎn de:

¿Na vé cánanducú ró?

Te ni cacahān de jǎn yá:

Maestro, ¿ndé nuū ndeé ní?

<sup>39</sup> Te ni cahān yā jǎn de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jǎn yá quǎivǎ ún, chi nájñūhun cacuún jehǎni cúu.

<sup>40</sup> Te Andrés, ñani Simón Pedro, cúu ñn jeē ndǎndúú tée un jēe ní cajini sóho jnūhun ni cahān Juan, te ni candiquǎn Jesús. <sup>41</sup> Te Andrés, yachǎ ni jenanducú de ñani de Simón, te ni cahān de jǎn:

Ni caquijnahan ri jǎn Mesías, achí de. Te jnūhun un cúní cahān Cristo, Yaā ní tajǎ Yaā Dios.

<sup>42</sup> Yūcuán na te cuanuhun de nuū Jesús jǎn Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conani ró Cefas, achí yá. Te jnūhun un cúní cahān Pedro, jeē cuní cahān yūu.

*Jeē ní cana ya Felipe jiín Natanael*

<sup>43</sup> Te inga quivī un cúní Jesús quihīn yā región Galilea. Te ni nihīn jnáhan ya jiín Felipe, te ni cahān yā jiín de:

Condiquīn ruhū na quihīn yō.

<sup>44</sup> Te Felipe cúu tēe ñuu Betsaida, jeē cúu ñuu Andrés jiín Pedro. <sup>45</sup> Te ni jenanducú de Natanael, te ni cahān de jiín:

Ni canihīn jnáhan ri jiín Yaā jeē yosó jnúhun ya nuū tútu ley jeē ní tee Moisés, jiín núū tútu ni catee tēe ni canacani jnúhun Yaā Dios nde jenahán. Te Jesús sēhe José ñuu Nazaret cúu ya. Achí de.

<sup>46</sup> Te ni cahān Natanael jiín de:

¿Te ndese cúu cujéhu ñn tēe jeē ní cacu ñuu ndahú Nazaret?

Te ni cahān Felipe:

Quihīn yō de cuni rō, achí de.

<sup>47</sup> Te ni jito Jesús jeē véji Natanael, te ni cahān yā:

Yāha véji ñn tēe ndaā jeē cúu ndije yucūn Israel, chi tu stáhú cuiti de, achí yá.

<sup>48</sup> Te ni cahān Natanael jiín yá:

¿Ndese jíní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

<sup>49</sup> Yūcuán na te ni cahān Natanael jiín yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

<sup>50</sup> Te ni cahān Jesús:

¿A máá jéē ni cahān rī jeē ní jito ri rohó ná íne ró jéhē nundéhe higo, te jeē yūcuan cándije ró rúhū naún? Tuú chi coo jniñu jéhu ga coto ró vésú jeē yáha, achí yá jiín de.

<sup>51</sup> Te ni cahān gā yā:

Jendaá cahán rī jiín ró jijnáhan ró jéē nde vijna te coto ró jéē núne andiví, te tǎcá ndajéhé Yaā Dios cándaa cánuu nuū ruhū, Yaā ní nduu tēe, achí yá.

*Jeē ni jéhēn yā ñn vico nándāha ñuu Caná*

## 2

<sup>1</sup> Te ni yāha unī quivī, te ni iyo ñn vico nándāha ñuu Caná ndañūū Galilea. Te yūcuan íne náná Jesús.

<sup>2</sup> Te suni ni cacana i Jesús jiín tēe cáscuáha jín yá, ni jehēn yā vico un jiín de. <sup>3</sup> Te ni ndoco vino. Te náná Jesús ni cahān ña jiín yá:

Ni ndoco vino i, achí ña.

<sup>4</sup> Te ni cahān Jesús jiín ña:

¿Naun cáhán ni súcuan jiín ná náná? Chi ná tu quee quivī jeē sáha ná jniñu jéhu, achí yá.

<sup>5</sup> Te náná yā chi ni cahān ña jiín ñáyuu cájeni cohō:

Sáha ró jijnáhan ró tǎca jéē cahān yā jiín ró. Achí ña.

<sup>6</sup> Te yūcuan íyó íñū tenéjā yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te ñn ñn tenéjā un cánda cuhun cuūn xico chí ciento litro ndute. <sup>7</sup> Te ni cahān Jesús jiín ñáyuu cájeni cohō:

Scútú ndǎ rō tǎcá tenéjā yáha.

Te ni cascútú ndǎ i. <sup>8</sup> Te ni cahān yā jiín i:

Vijna te quēen ró jecu te quin-deca ró coto ndee tēe ndíto vico, achí yá.

Te ni cajendeca i nuū de. <sup>9</sup> Te ni séyühú de ndute jeē ní nduu vino, te tu jíní de ndé ní canihīn i. Chi máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha. <sup>10</sup> Te ni cahān de jiín:

Tǎca ñáyuu chí xīhna gā vino váha cájēhe i, te núu je ni cajihí váha ñayuu cáhīn vico, yūcuán na te jéhe de vino ndahú na. Te máá ró tucu ni sáha ró, chí nde jeē sándihí te jéhe ró vino jeē yóhoyo váha ga jíhi, achí de.

<sup>11</sup> Jniñu yáha jéē ni sáha Jesús ini ñuu Caná ndañūū Galilea cúu jniñu jéhu xīhna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhu ya. Te tēe cáscuáha jín yá ní cacandije de ya.



<sup>12</sup> Te ná ni yáha jniñu yáha, te cuahān yā ñuu Capernaum jiín náná yā jiín táca ñani yā jiín tée cáscuáha jiín yá. Te ni coyūcu yá yūcuán jecu quivī.

*Jeē ní quenehen ya ñayuu ini templo*

(Mt. 21.12-13; Mr. 11.15-18; Lc. 19.45-46)

<sup>13</sup> Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén. <sup>14</sup> Te ini templo cáhnu ni jito ya ñayuu cáxicó stiḡuī jiín lanchi jiín paloma, jiín ñáyuu castáyi xūhun, cáyūcú i nuū mesa i. <sup>15</sup> Te jeē súcuan ni jito ya, te ni sáha ya ñin cuarta ñii. Te ni scúnu ya táca i ini templo, nde jiín lanchi jiín stiḡuī i. Te ni jete yā xūhun ñáyuu castáyi. Te ni scotúú yá táca mesa i. <sup>16</sup> Te ni cahān yā jiín ñáyuu cáxicó paloma:

Tava táca quiti yáha. Te ma sáha ró yáhu ini vehe Tátá rī. Achí yá.

<sup>17</sup> Yūcuán na te tée cáscuáha jiín yá, ni canucūhun ni de jnūhun yósó núu tútu iī: Je yajni cuu na jéē yóhyo ndíhvī ni na síquī vehe ní, áchí yá jiín Tátá yā, achí tutu.

<sup>18</sup> Te tée ñuu yā hebreo ni caca-jnūhún de ya:

¿Na jniñu jéhnu sáha ró jéē steén ró poder ró, te cucáhnu ni rī jeē ndíso jniñu ró sáha ró súcuan? áchí de jiín yá.

<sup>19</sup> Te ni cahān yatá Jesús:

Canu ró templo yáha, te nuū uní quivī te nucondichi sáha rī, achí yá.

<sup>20</sup> Yūcuán na te ni cacahān tée hebreo un:

Uū xico iñū cuiyā te ni jīnu ni cuvāha templo yáha. Te róhó, ¿á núu uní-ni quivī te nucondichi sáha ró naún? Achí de.

<sup>21</sup> Te templo jeē cahán Jesús cúu máá yiqui cúñu yā, chi cahni ñayuu yā te natecu yā nuū uní quivī. <sup>22</sup> Jeē yúcuan cúu jeē ná ni natecu yā jeē ni jihī yā, te tée cáscuáha jiín yá ni canucūhun ni de jeē ni cáhān

yā jnūhun yáha. Te ni cacandíje de jnūhun jeē yosó núu tútu iī, jiín jnūhun yáha jéē ni cáhān Jesús.

*Jeē jini Jesús ndese cáa ini anuá ñayuu*

<sup>23</sup> Te ná ine Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chi ni cajito i táca jniñu jéhnu sáha ya jeē steén yā poder yā. <sup>24</sup> Te máá Jesús chi tu ní jétáhú yá i, chi je jini yā ndese cáa ini anuá i jijnáhan i. <sup>25</sup> Te tu jini ñúhún yá jeē cáchi ni ñin ñayuu nuū yā ndese iyó táca ñáyuu, chi máá yá je jini yā ndese cáa ini anuá i.

*Jeē ní candajnūhún Jesús jiín Nicodemo*

### 3

<sup>1</sup> Te ni iyo ñin tée grupo fariseo, naní de Nicodemo, te cújéhnu de nuū ñáyuu ñuu de hebreo. <sup>2</sup> Téē yáha ní quiji de nuū Jesús ñin jecuáā, te ni cahān de jiín yá:

Maestro, je cájini na jéē maá Yaā Dios ni tají yá nihín jéē steén ni jnūhun ya nuū na jijnáhan ná. Chi núu tu iyó Yaā Dios jiín ní, te ma cúu sáha ní ni ñin jniñu jéhnu nájñūhun sáha máá ní jeē steén ni poder ní, áchí de.

<sup>3</sup> Te ni cahān Jesús:

Jendaá cahán rī jiín ró jeē núu tu nacacu jeē ñin ñayuu, te ma cúu quivī i ndaha Yaā Dios jeē ndacu ya jniñu nuū i, áchí yá jiín de.

<sup>4</sup> Te ni cahān Nicodemo jiín yá:

¿Te ndese Nicodemo ñin téē te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

<sup>5</sup> Te ni cahān Jesús:

Jendaá cahán rī jiín ró jeē núu tú nacacu ñin ñayuu, te ma cúu quivī i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñūhun jiín ndute, te condee Espíritu Santo ini anuá i. <sup>6</sup> Jeē cácu sáha ñayuu, chi

sêhe ñayuu cúu. Te jeē cácu sáha Espíritu yā, chi sêhe ya cúu. <sup>7</sup>Ma náa ni rō cani ni rō ndese cúu jñūhun ni cahān rī jīn rō jeē cánuú jeē nacacu jeé rō jijnáhan rō. <sup>8</sup>Te tachī chi quée cuahān ndé-ni cúu nuū cuní maá, te jíní sōho rō jéē cáyu, te tu jíní rō ndé nuū véji ni ndé nuū quihín. Te suni súcuan cúu tāca ñayuu jeē nácacu sáha Espíritu, chi tu jíní rō ndese sáha ya jñiñu ún, áchí yá.

<sup>9</sup>Te ni cahān tucu Nicodemo:

¿Nde se ga cúu núu súcuan?

<sup>10</sup>Te ni cahān Jesús:

Máá rō cúu ñn maestro jeē kujéhu nuū ñayuu ñuu yō Israel, te ¿á tu jécūhun ni rō jñūhun yáha naún? <sup>11</sup>Jendaá cahān rī jīn rō jeē jñūhun cájecūhun ni rī cúu jeē cácahān rī jīn rō. Te cánacani cájí rí jñūhun jñiñu ní cajito rí. Te tu cácañje rō jñūhun cácahān rī. <sup>12</sup>Chi ni cahān rī jñūhun ndese sáha Yaā Dios ini ñayīví, te tu cácañje rō. Núu súcuan ¿te ndese candíje rō núu cahān rī jñūhun tācá ndese sáha ya nde andiví?

<sup>13</sup>Chi ni ñn tu ní cáa andiví jeē cūni ndese íyó yúcuan, chi mañúhún-ni ruhū, Yaā ní nduu tēe. Chi andiví ndéé rí, te ni cuun ri véji rí. <sup>14</sup>Te nájñūhun ni cata caa Moisés ñn coō cāa nuū ñn yujnu, ná ni cajica ñayuu nuū ññūhun téhé, suni súcuan máá rí, Yaā ní nduu tēe, cánuú jeē cóndita caa ri jicā cruz. <sup>15</sup>Te súcuan cánuú návāha tāca ñayuu jeē candíje i jeē jnáma ri i, ma jñahnú ndetū i, chi sa suhva cotecu i ní cáni andiví.

*Yōhyo ni cundáhú ni yā ñayuu ñayīví*

<sup>16</sup>Chi Yaā Dios yōhyo ni cundáhú ni yā ñayuu ñayīví. Jeē yúcuan ní tají yá Sêhe ya ni quiji, vésú mañúhún-ni ya iyó, návāha tāca ñayuu jeē candíje i jeē jnáma ya i, ma jñahnú ndetū, chi sa suhva cotecu i ní cáni andiví. <sup>17</sup>Chi tu ní tají Yaā Dios Sêhe ya ini ñayīví

jeē snahnú ndetū yā ñayuu, chi sa suhva jeē jnáma ya ñayuu.

<sup>18</sup>Ñayuu jeē candíje i jeē jnáma ya i, ma jñahnú ndetū i. Te ñayuu tu cándíje, je ni jñahnú ndetū i, chi tu ní cándíje i máá Sêhe Yaā Dios, te máá ñn-ni ya iyó. <sup>19</sup>Máá Yaā jeē stíndēé ini anuá ñayuu, je ni quée ya ini ñayīví. Te cánujnahan gā ni ñayuu caca i nájñūhun nuū néé vésú nuū luz yā, chi jñiñu cásáha i cúu jñiñu néé. Jeē yúcuan cúu jeē jñahnú ndetū ñayuu tu cácañje ún. <sup>20</sup>Chi tāca ñayuu casáha jñiñu néé, tu nújnahan cuiti ni i luz yā. Te tu jéhe i jñūhun jeē stíndēe yá ini anuá i, chi tu cūni i jeē natūu jñiñu néé cásáha i. <sup>21</sup>Te ñayuu jeē cájica jīn jñiñu ndaā, jéhe i jñūhun jeē stíndēe yá ini anuá i, návāha natūu ndijin jeē tācá jñiñu cásáha i cúu jñiñu cūni Yaā Dios. Achí yá jīn de.

*Jeē ni cáhān tucu Juan jñūhun Jesús*

<sup>22</sup>Yūcuán na te Jesús jīn tée cácuáha jīn yá, cuahān yā región Judea. Te ni condee yā yūcuán jecu tiempo jīn de, te cácuándute de ñayuu. <sup>23</sup>Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñayuu nuū de, te ni scuándute de i. <sup>24</sup>Súcuan ni sáha Juan nde ná tu quīví de vecāa.

<sup>25</sup>Yūcuán na te sava tēe cácuáha jīn Juan yōhyo ni cacahān de jīn sava jñáhan de hebreo siquī núu ndé ñn cúu modo vāha ga jeē cúchi ñayuu ndundoo i nuū Yaā Dios. <sup>26</sup>Te ni quecoo de nuū Juan, te ni cacahān de:

Maestro, tēe ní ine jīn ní yūte Jordán ichi núu cáne niāndii, jeē ní nacani ní jñūhun de nuū ná, vijna te scuándute máá de, te ndivii ñayuu cuangoo i nuū de.

<sup>27</sup>Te ni cahān Juan:

Ni ñn tēe ma cúu sáha de jñiñu Yaā Dios te núu ma tejñiñu ya de. <sup>28</sup>Máá rō jijnáhan rō chi ni cajini

sōho ró jēē ni cáhān cají rí jeē násūu máá rí cúu Cristo, chí cúu rí ñn jeē ní tají Yaā Dios jeē cósnūu nacani jnūhun jeē quíji ya. <sup>29</sup> Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jíin de, te jíni sōho jnūhun cáhán de. Te yōhyo cúsiñ ni jíni sōho jnūhun cáhán yíi ún. Te suni súcuan ruhū, chí cúu rí nájñūhun amigo yíi, chí ni quee maá Cristo, te yōhyo cúsiñ ni rí jíni sōho rí jnūhun cáhán yā. <sup>30</sup> Te jíni ñūhún jēē ndujéhu ga maá yá te ndululí gá maá rí, achí Juan.

### *Jeē ní quiji ya nde nuū sucún*

<sup>31</sup> Te Yaā jeē véji nde andiví, cújéhu ya nuū ndíhi. Chí táca jēē ní cacu ini ñayívi yáha, sēhe ñayívi cúu, te máni jnūhun ñayívi cáhán. Te Yaā jeē véji ichi ándiví, chí cújéhu ya nuū ndíhi ñayuu. <sup>32</sup> Te nácani ya jnūhun jeē ní jito ya jíin jēē ní jíni sōho ya. Te ñayuu chí tu cácan díje i jnūhun cáhán yā. <sup>33</sup> Te núu ñn ñayuu candíje i jnūhun cáhán yā, suu cúu jeē jejnúhún i jeē Yaā ndaā cúu Yaā Dios. <sup>34</sup> Chí Yaā ní tají Yaā Dios véji, máni máá jnúhun Yaā Dios cahán yā. Chí Yaā Dios tu yícuáha jéhe ya Espíritu yā nuū Yaā ní tají yá. <sup>35</sup> Máá yá jeē cúu ya Tatá, yōhyo maní yā jíin Séhe ya, te ndívi i ni jéhe ya ndaha Séhe ya jeē ndacu ya jniñu nuū. <sup>36</sup> Ñayuu jeē candíje máá Séhe ya jeē jnáma ya i, cotecu i ní cáni andiví. Te ñayuu tu cúni candíje Séhe ya, ma cótecu i ní cáni andiví, chí sa suhva cuáha Yaā Dios castigo jeē ndoho i ní cáni.

*Jeē ni cáhān Jesús jíin ñahan ñūū Samaria*

## 4

<sup>1</sup> Te tēe grupo fariseo, ni canihīn de jnūhun jeē iyó cuéhē gā tēe cáscuáha jíin Jesús vésú jíin Juan, jíin jēē cuéhē gā ñayuu scuándute ya vésú Juan. <sup>2</sup> Te nasūu jēē scuándute máá yá, chí tēe cáscuáha jíin yá cúu jeē cascuándute. <sup>3</sup> Te ná ni jíni Jesús

jeē súcuan ni canihīn de jnūhun, te ni quenda ya región Judea, te cuanuhun yā región Galilea.

<sup>4</sup> Te ichi jeē nuhún yā chí yáha región Samaria. <sup>5</sup> Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. <sup>6</sup> Te yūcuan íne pozo jeē naní pozo Jacob. Te ni cucōo Jesús xiin pozo un, chí ni cuíta yá jeē cuahán yā ichi. Te nájñūhun cahuxí uū cúu. <sup>7</sup> Te ni quee ñn ñahan Samaria, véji ña vequihin ña ndute. Te ni cahán Jesús jíin ña:

Cuáha ní ndute coho ná, áchí yá.

<sup>8</sup> Te tēe cáscuáha jíin yá, chí je cuango de nde ñuu, cuacuaan de jeē cáji de jíin yá. <sup>9</sup> Te ñahan Samaria un ní cahán ña jíin yá:

¿Ndese cúu jeē jíicán ní ndute nuū ná coho ní? Chí tēe hebreo cúu ní, te ñahan Samaria cúu ná, áchí ña.

Súcuan ni cahán ña, chí ñayuu hebreo tu cácahān i jíin ñáyuu Samaria. <sup>10</sup> Te ni cahán Jesús:

Núu jeē jíni ní ndese cúni Yaā Dios sáha ya jeē váha níhín, jíin ndé ñn cúu sáña jēē jíicán na ndute nuū ní, yūcuán na te máá ní cacān ni núu ná, te cuáha ná ndute jeē cótecu ni ní cáni sáha, áchí yá.

<sup>11</sup> Te ni cahán ña jíin yá:

Tátā, yōhyo cúnú pozo yáha, te tú na vé ndahá ní jēē táva ní ndute. Núu súcuan ¿te ndé nuū nihín ni ndute jeē cótecu na sáha? <sup>12</sup> ¿Te á cújéhu ga máá ní vésú jíi yō Jacob, chí naún? Chí máá de ni stóo de pozo yáha nuū yō. Te yáha ní cajihí máá de ndute, jíin táca séhe de, jíin quiti ndéca de. Achí ña.

<sup>13</sup> Te ni cahán Jesús:

Táca ñáyuu jeē jíhi ndute yáha, chí jichí tucu i. <sup>14</sup> Te ñayuu coho ndute jeē cuáha na núu i, chí ma jichí cuiti gā i. Chí ndute jeē cuáha ná un, cane ini i nájñūhun ndute jeē cáne ñuhún, te sáha jeē cotecu i ní cáni, áchí yá jíin ña.

15 Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ñúhun quiquihin ná ndute pozo yáha, áchí ña.

16 Te ni cahān Jesús jíin ña:

Cuácana ní yī ní te quiji ní jíin de, áchí yá.

17 Te ni cahān ña:

Tú yī ná íyó.

Te ni cahān Jesús:

Ndaā cahán ni jéē tú yī ní íyó.

18 Chi je ni cuu uhūn yī ní, te tēe ndéca ní vijna chi nasūú yī ní cúu de. Yāha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ni ná. 20 Tāca jíi na ñáyuu Samaria, yucu yáha ní cachíñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, áchí ña.

21 Te ni cahān Jesús jíin ña:

Nánā, candíje ní jnūhun cáhán na, chí quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chí ndihí-ni lugar te cuu chiñúhún ní yá. 22 Máá ní ñáyuu Samaria tu cájini ni ndé ñn cúu jeē cáchiñúhún ní. Te máá ná jijnáhan ná chí cájini na ndé ñn cúu jeē cáchiñúhún ná. Chí nde nuū maá ná jijnáhan ná ñáyuu hebreo cúu nuū véji Yaā jnama ñayuu. 23 Te je ni quee quivī jeē ñáyuu cáchiñúhún ndáā, vijna te chiñúhún ndije i Yaā cúu Tátá nde jíin ini jíin ánuá i. Chí máá Tátá cúní yā jeē súcuan chiñúhún ñáyuu yā. 24 Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

25 Te ni cahān ñahan ún:

Jíní na jéē quiji Mesías jeē cúu Cristo, Yaā jeē tají Yaā Dios. Te núu

ni quee maá yá, te stéén cají yá tāca jnūhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yaā ún.

27 Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájñūhun yá jíin ñahan yúcuan. Te ní ñn de tu ní cájnūhún de ya núu na vé cájnūhun yá ña chí na vé ndájñūhun yá jíin ña. 28 Yūcuán na te ñahan un ní stóo ña quiyi ña, te cuahān ña nde ñuu. Te ni cahān ña jíin ñáyuu ún:

29 Nehen na quíngoo yó te coto ró ñn tēe jeē ní cachi ndihí tāca jéē ní sáha ri. Sanaa te máá yá cúu Cristo, jeē cándetu yó quiji, áchí ña.

30 Yūcuán na te ni quendacoo i ñuu ún, te cuangoo i nuū íne Jesús.

31 Te nde ná tu jinūcoo i, te tēe cáscuáha jíin yá ní cacahān ndahú de jíin yá:

Maestro, cají ni stáā víi, áchí de.

32 Te ni cahān yā jíin de:

Iyó stáā cají rī jeē tu cájini rō ndese cúu.

33 Yūcuán na te tēe cáscuáha jíin yá, ni cacajnūhun jnáhan de:

¿A ní quíndeca ñn ñayuu jeē ní yeji yā, chí naún? áchí de.

34 Te ni cahān Jesús:

Jeē ní cachi rī jeē iyó jéē cáji rī cúu jeē cúsi ni rī sáha ri jniñu cúní Yaā ní tají ruhū véji rī, jíin jéē sínu rī jniñu ún. 35 Te cácahān rō jeē cúmaní cuñ gā yoō te tahndē trigo. Te ruhū chí cáhán rī jíin ró: Condēhe jijnáhan ró, chí ñayuu cuehē cácuu i nájnūhun trigo jeē jé ni cuan jeē tahndé, chí je cáhiyo tūhva i candíje i ruhū. 36 Te tēe scándíje ñayuu cácuu de nájnūhun tēe cájehnde trigo, te nihín de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnūhun rī, inuú-ni cusī ni de jíin tēe cástéén gā jnūhun rī. 37 Chí ndaā cúu jnūhun jeē cahán: ñn tēe jéte, te inga tēe nástútú, áchí. 38 Te suu cúu jeē ní

tají rí rohó jijnáhan ró jéē scándíje ró ñayuu jeē jé ní canihín jnūhun ya ní casáha inga tēe. Chi inga tēe je ní canacani de jnūhun nuū ñáyuu, te máá ró chi nájnūhun cánastútú ró i cúu jeē scándíje ró i.

<sup>39</sup> Te cuehē ñayuu Samaria jeē cáyucú ñuu ún, ní cacandíje i Jesús jeē ní jini sōho i jnūhun ní cahān ñahan ún. Chi ní cahān ña: Ní cachi ya ndíhi táca jéē ní sáha rí. <sup>40</sup> Te jeē yúcuán cúu jeē ñayuu Samaria un ní jinūcoo i nuū yā, te ní cacahān ndahú i jíin yá jeē na quéndōo ya ñuu i. Te ní ndōo ya yúcuán uū quiví. <sup>41</sup> Te cuehē gā i ní cacandíje i ya jíin jnūhun cáhān máá yá. <sup>42</sup> Te ní cacahān i jíin ñahan ún:

Tuá níni jéē cahān máá ró te candíje rí yā, chí je ní cajini sōho rí jnūhun cáhān máá yá. Te cajini yō jeē máá yá cúu ndíje Cristo, Yaā jnama ñayuu ñayiví. Achí i.

*Jeē ní nasávāha ya sēhe tēe ndíso jniñu nuū rey*

<sup>43</sup> Te nuū ní yáha uū quiví ún, te Jesús ní quenda ya Samaria, te ní quihín tucu ya ichi cuanuhun yā región Galilea. <sup>44</sup> Chí je ní cahān máá yá jeē tēe cánacani jnūhun Yaā Dios, tu cáhīyo yíñuhún ñáyuu ñuu de jíin de, te suni súcuán ní cuu jíin máá yá. <sup>45</sup> Te ná ní najinū yā Galilea, te ñayuu un ní cajetáhú i ya, chí suni máá i ní jengoo i vico pascua ñuu Jerusalén, te ní cajito i táca jniñu ní sáha ya quiví ní íyo vico ún.

<sup>46</sup> Yúcuán na te ní jehēn tucu ya ñuu Caná ndañú Galilea, nuū ní sáha ya jeē ndúte ní nduu vino. Te ini ñuu Capernaum ní íyo ñin tēe cújéhu jeē ndíso jniñu nuū rey. Te cúhú sēhe de. <sup>47</sup> Tēe un ní jini jnūhun de jeē ní najinū Jesús región Galilea jeē ní jehēn yā región Judea. Te ní jecondéhé de ya, te ní cahān ndahú de jíin yá jeē na quihín yā jíin de vehe de, te nasávāha ya sēhe

de, chí je yajni cuu i. <sup>48</sup> Te ní cahān Jesús jíin de:

Núu tú coto ró jniñu jéhu jeē náa ní rō sáha, te ma candíje cuiti ró jijnáhan ró, áchí yá.

<sup>49</sup> Te tēe ndíso jniñu nuū rey, ní cahān de:

Cava vāha ní ní na quihín yō, chí núu cucuée ní te cuu sēhe ná, áchí de.

<sup>50</sup> Yúcuán na te ní cahān Jesús:

Cuánuhun vehe ró, chí cotecu sēhe ró.

Te tēe un ní candíje de jnūhun ní cahān Jesús, te cuanuhun-ni de. <sup>51</sup> Te níni jíca de cuanuhun de vehe de, te ní quijicoo mozo de ní caqui-jnahan i de, te ní cacahān i:

Je ní nduvāha sēhe ní, áchí i.

<sup>52</sup> Te ní cajnūhún de na hora ní quejéé ndúvāha i. Te ní cacahān i jíin de:

Cahān jeē ícu ní quenda quíi i.

<sup>53</sup> Yúcuán na te máá tátá i ní sáha de cuenta jeē hora un cúu jeē ní cáhān Jesús jíin de jeē cótecu sēhe de. Te ní candíje de jíin ní vehe de jeē cúu ya Yaā ní tají Yaā Dios.

<sup>54</sup> Yāha cúu vuelta uū jeē ní sáha Jesús jniñu jéhu jeē ní stéén yā poder yā región Galilea, jeē ní najinū yā jeē ní jéhēn yā región Judea.

*Jeē ní nasávāha ya ñin tēe cáti yuhu pila Betesda*

## 5

<sup>1</sup> Yúcuán na te cuahān tucu Jesús ñuu Jerusalén, chí íyó tucu vico cásáha jnáhan ñuu yā hebreo. <sup>2</sup> Te Jerusalén íyó ñin pila ndute yajni yéhyí jéé naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. <sup>3</sup> Te ini táca corredor un cácaā cuehē ñayuu cácuñu, jeē cuaá, jeē chacua, jeē ní íjin. Te cándetu i jeē canda ndute ún. <sup>4</sup> Chí íyó quiví jeē cúun ñin ndajéhé yā ini pila un, te scánda ya ndute. Te ñayuu quiví xihna gā ini pila un ná scánda ya ndute, te ndúvāha i na-ní cuehyí ndóho i. <sup>5</sup> Te yúcuán íyó ñin

tēe jeē ní cuu ocō xahūn unī cuiyā cuhú de. <sup>6</sup> Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jīn de:

¿A cúní rō nduvāha ró? áchí yá.

<sup>7</sup> Te ni cahān tēe cuhú un jīn yá:

Tu níhín na ni ĩn tēe squívi sãñá ini pila hora jeē cãnda ndute. Chi tãca jīnu jeē cuní na quívi ná, te quívi-ni inga ñayuu xīhna gã. Achí de.

<sup>8</sup> Te ni cahān Jesús:

Ndocuĩñi te naquihin ró camilla rō te caca ró, áchí yá.

<sup>9</sup> Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún. <sup>10</sup> Yūcuán na te jnāhan de tēe hebreo un ní cacahān jīn de:

Quívi ndétātu cúu vijna. Te áchí ley jeē ma cúu condiso ró camilla rō.

<sup>11</sup> Te ni cahān tēe ni nduvāha ún:

Tēe ni nasávāha ruhū, ni cahān de jīn rí jeē náquihin rí camilla rí te caca rí, achí de.

<sup>12</sup> Yūcuán na te ni cacajnūhún un de:

¿Ndé tēe ni cahān jīn ró jeē náquihin ró camilla rō te caca ró?

<sup>13</sup> Te tēe ni nduvāha ún, tu jíní de ndé ĩn cúu jeē ní nasávāha de. Chi cáhīn cuehē ñayuu yūcuán, te Jesús je cuahān yā. <sup>14</sup> Te cúcuéé gá te ni najnáhan Jesús jīn de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiji ĩn jnūndóho xeēn gã siquī rō, achí yá.

<sup>15</sup> Yūcuán na te cuahān tēe ún, te ni castūhún de nuū jnāhan de hebreo un jéé Jesús cúu jeē ní nasávāha ya de. <sup>16</sup> Te siquī jeē ní sáha Jesús jniñu yáha quívi ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya. <sup>17</sup> Te ni cahān Jesús jīn de:

Maá Tátá rí chi ní cáni te nde vijna sáha ya jniñu váha, te suni súcuan ruhū sáha rí jniñu váha.

<sup>18</sup> Te siquī jeē ní cáhān yā súcuan, te tēe hebreo un víhyá gã cácuni de cahni de ya. Chi nasūu máa ĩn-ni jeē tu squícu ya jeē cahān ley siquī quívi ndétátú, chi suni jeē ní cáhān yā jeē Tátá yā cúu Yāā Dios, te súcuan sáha inuú yá máa yá jīn Yāā Dios.

*Siquī jeē ndíso jniñu Sēhe Yāā Dios*

<sup>19</sup> Te ni cahān Jesús:

Jendaá cahān rí jīn ró jijnáhan ró: Ruhū jeē cúu Sēhe Yāā Dios, tú na vé cúu sáha rí jeē máa rí, chi máni sáha rí jeē jito rí sáha Tátá rí. Chi tãca jéé sáha Tátá rí, suni sáha ruhū jeē cúu rí Sēhe ya. <sup>20</sup> Chi máa Tátá rí, manī yā jīn ruhū jeē cúu rí Sēhe ya, te stéén yā nuū rí ndihí jeē sáha ya. Te jéhu ga jniñu stéén yā vésú jeē ní cuu vijna, jeē naa ni rō coto ró jijnáhan ró. <sup>21</sup> Te nájñuhun jeē nastécu maá Tátá rí ndīyi te cotecu tucu i, suni súcuan ruhū jeē cúu rí Sēhe ya, nastécu rí ndé-ni cúu jeē cuní máa rí. <sup>22</sup> Te máa Tátá rí, tu sãndaā yā siquī ni ĩn ñayuu, chi ni jēhe ya jñuhun jeē sãndaā máa rí siquī tãca ñayuu, chi Sēhe ya cúu rí. <sup>23</sup> Te súcuan te coo yíñuhún ndihí ñayuu nuū rí, nájñuhun yíñuhún i nuū Tátá rí. Te ñayuu tu íyó yíñuhún núu rí, núu súcuan te suni tu yíñuhún i nuū máa Tátá rí jeē ní tají yá ruhū vēji rí.

<sup>24</sup> Jendaá cahān rí jīn ró: Núu ĩn ñayuu chuhun ni i jñuhun cáhān rí, te candíje i jeē Yāā ndaā cúu Yāā ní tají rúhū vēji rí, ñayuu ún cotecu i ní cáni andiví, te ma jnahnú ndetū i. Chi ma cúu ga i nájñuhun ndīyi, chi sa suhva cotecu i ní cáni. <sup>25</sup> Jendaá cahān rí jīn ró jeē quiji quívi, te vijna je ni quejéé, jeē tãca ñayuu cácuu nájñuhun ndīyi, cuni nahín i jñuhun cáhān ruhū, Sēhe Yāā Dios. Te ñayuu cuatáhú, chi cotecu i ní cáni. <sup>26</sup> Chi nájñuhun íyó poder máa Tátá rí jeē sáha ya jeē técu ndihí-ni, suni súcuan ni jēhe ya poder nuū ruhū jeē sáha rí jeē cotecu ndihí-ni.

27 Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe. 28 Ma náā ni rō cani ni rō siquī jnúhun cáhán rī. Chi quee quivī jeē tāca ndíyi cuni sōho i jnúhun cahán rī, 29 te quendacoo i nuū yíndūji i. Te ndíyi jeē ní casáha jniñu váha, natecu i jeē cótecu i ní cáni. Te ndíyi jeē ní casáha jniñu néé, natecu i te quivícoo i nuū jnahnú ndetū i.

*Ndé vé cúu jeē steén jeē ní tají Yaā Dios yā*

30 'Tú na vé cúu sáha ri jeē maá rī. Chi nájnūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rī, chi sáha ri jeē cuní maá Tátá rī, Yaā ní tají rúhū vēji ri. 31 Núu ruhū cahán rī jeē cúu ri Sēhe Yaā Dios, te cachi ñayuu jeē tu jéjniñu jnúhun cáhán rī. 32 Te íyó inga jeē cahán jeē cúu ri Sēhe ya. Te jíní rī jeē jnúhun un jéē cahán yā, chi níhín jniñu. 33 Máá ró ni catají ró tēe ni cacajnúhún de Juan. Te Juan chi ndaā ni cahán de jnúhun rī. 34 Te vésú súcuan te nasūu rúhū cúu jeē jíní ñúhún jeē steén ñn tēe jeē Sēhe Yaā Dios cúu ri. Chi máá ró cúu jeē jíní ñúhún návāha candíje ró te cācu ró jíjnáhan ró. Jeē yúcuan ní cahán rī jeē iyó ndáá jnúhun ri jeē ní nacani Juan. 35 Máá Juan ni cuu de nájnūhun ñn lámpara jeē cayú te cúndjín, cúu jeē ní nacani de jnúhun ri. Te máá ró, jecu-ni quivī ni canujnahan ni rō jeē ní steén de nuū rō. 36 Te íyó jéē steén cají gá jeē kujéhnū ri vésú jeē ní cáhán Juan. Suu jniñu sáha rī, jniñu jeē ní tejniñu Tátá rī ruhū jeē sáha rī, jniñu un steén ndije jeē maá yá ní tají rúhū vēji ri. 37 Te Tátá rī jeē ní tají yá ruhū vēji ri, suni máá yá cahán nuū tútu ñi jeē kujéhnū ri, vésú tu ní cájini sōho cuítí rō jeē cahán yā, ni tu ní cájito ró yá. 38 Te tu ní cáchuhun ni rō jnúhun un jéē ní cáhán Tátá rī, chi

tu cácandíje ró rúhū, Yaā ní tají yá vēji. 39 Cánanducú vīi rō tāca jnúhun cáhán tutu ñi, chi cájini ni rō jeē yúcuan níhín rō jnúhun jeē cótecu rō ní cáni sáha. Te jnúhun siquī maá rí cúu jeē cahán tutu ún. 40 Te vésú súcuan te tu cácuni rō cuatáhú ró ruhū quivícoo ró ndaha ri návāha cotecu rō ní cáni.

41 'Tu chíhi ri cuenta jnúhun jeē cácahán ñayuu jeē kujéhnū ri. 42 Chi je jíní rī ndese cándaā ánuá rō jeē tu cáhíyo maní rō jíjn Yaā Dios. 43 Ruhū vēji ri jíjn jniñu cuní Tátá rī, te tu cájetáhú ró ruhū. Te núu inga tēe quee de jíjn jniñu cuní maá de, sa tēe un yáchí cuatáhú ró de. 44 ¿Ndese cuu candíje ró jíjnáhan ró? Chi máni cácuni rō jeē kujéhnū ró sáha jnáhan ró, te tu cánducú ró jeē kujéhnū ró sáha Yaā Dios, jeē maá ñn-ni ya iyó. 45 Ma cáni ni rō jeē cáquin rī cuēchi siquī rō nuū Tátá rī. Chi íyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíjn ley jeē ní tee de. 46 Chi núu ní cácandíje ró jéē ní tee Moisés, te suni candíje ró rúhū nuú, chi jnúhun máá rí ní tee de. 47 Te núu tu cácandíje ró jnúhun ri jeē ní tee de, ¿te ndese candíje ró jnúhun cáhán maá rí núu súcuan? Achí yá jíjn de.

*Jeē ni scáji yā uhūn mil tēe*

(Mt. 14.13-21; Mr. 6.30-44; Lc. 9.10-17)

## 6

1 Yūcuán na te cuahán Jesús inga lado mar Galilea, jeē cúu mar Tiberias. 2 Te yōhyo cuehē ñayuu ni candiquín i ya, chi ni cajito i táca jniñu jéhnū jeē steén yā poder yā jeē ní nasávāha ya ñayuu cácuñ. 3 Te ni caa ya ñn yucu, te ni cucōo ya yúcuan jíjn tēe cáscuáha jíjn yá. 4 Te je ni cuyajni vico pascua jeē cánucūhun ni jnáhan ñuu yā hebreo jeē ní cácau i nuū ñayuu naciōn Egipto. 5 Te ni ndacoto ya, te ni jito

ya jeē vējicoo cuehē ndasí ñáyyu. Te ni cahān yā jiín Felipe:

¿Ndé nuū cuaan yó jēē cáji ñayuu yáha jijnáhan i?

<sup>6</sup> Te súcuan ni cahān yā jeē jíto ndee yā de núu ndese cahān de. Chi je jíni maá yá ndese sáha ya. <sup>7</sup> Te ni cahān Felipe jiín yá:

Te ni ma cánda uū ciento denario staā, ni vēsú jeē cáji i jecu jecu jijnáhan i, áchí de.

<sup>8</sup> Yūcuán na te ni cahān Andrés, ñani Simón Pedro, inga tēe scuáha jiín yá un:

<sup>9</sup> Yāha íne ñn sūchi yí jēē ndíso i uhūn staā cebada jiín úu chācá. ¿Te ndé canda cuiiti ún, chi ñayuu cuehē ndasí cúu?

<sup>10</sup> Yūcuán na te ni cahān Jesús:

Cahān jiín ñáyyu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mīl tēe cúu. <sup>11</sup> Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jiín yá, te máá de ni casaja de nuū ñáyyu ní cacucōo ún. Te suni súcuan ni sáha ya jiín cháca, te ni cayeji i nasaa cáconi maá i. <sup>12</sup> Te nuū ní candutú chíji i, te ni cahān yā jiín tēe cáscuáha ún:

Nastútú ró tǎcá pedazo jeē ni ndóo, návāha tu stívi cuiiti yō.

<sup>13</sup> Te ni canastútú de, te ni chitú úxī uū jica pedazo jeē ni ndóo síquī ndihúhún staā cebada un jeē tuá ni ndíhi caji ñayuu. <sup>14</sup> Te ñayuu un ní cajito i jniñu jéhnú ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíji ini ñayívi jēē nácani jnūhun Yaā Dios. Achí i.

<sup>15</sup> Te ni jini Jesús jeē cáconi i sáfuerza i ya jeē cuu ya rey i núú. Te ni cujiyo tucu máá ñn-ni ya, ni caa ya cuahān yā nuū sucún gá yucu.

*Jeē ní jica jéhé yá nuū mar  
(Mt. 14.22-27; Mr. 6.45-52)*

<sup>16</sup> Te nuū cuácuaa, te tēe cáscuáha jiín yá ni nanuu de cuangoo de nde mar. <sup>17</sup> Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. <sup>18</sup> Yūcuán na te ni jequíhi ñn tachī níhin, te sáha jeē ndóna ndute mar un. <sup>19</sup> Te jeē ní cuu nájnūhun uhūn chí íñū kilómetro cájica de jiín barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayúhú de. <sup>20</sup> Te máá yá ni cahān yā jiín de:

Máá rí cúu. Ma yūhu ró jijnáhan ró,

<sup>21</sup> Te ni cacusñ ni de jeē na quívi ya ini barco. Te ni sáha ya jeē yachī-ni ni jinūcoo-ni de ñuhun íchi núu cuángoo de ún.

*Jeē cánanducú ñayuu Jesús*

<sup>22</sup> Te inga quívi ún, te ñayuu jeē ní caquendōo inga lado mar, ni caji ni i jeē tēe cáscuáha jiín yá cuangoo de jiín máñuhún-ni barco ni íne yūcuán, jiín jēē tu ní quívi Jesús quihñ yā jiín de jijnáhan de. <sup>23</sup> Te sava ga barco jeē vējicoo ichi ñūu Tiberias, ni queeco yajni lugar nuū ní cayeji i staā jeē ní nacuatáhú máá Jítoho yō jehē. <sup>24</sup> Te jeē ní cajito ñayuu un jēē tuá Jesús íne ya yūcuán, ni tēe cáscuáha jiín yá, te ni quívicoo i tǎca barco un, te cuangoo i ñuu Capernaum cuananducú i ya.

*Jesús cúu staā jeē cótecu yō ní cáni*

<sup>25</sup> Te nuū ni jinūcoo i nde inga lado mar, te ni nanihñ jnáhan i jiín Jesús. Te ni cacajnūhún i ya:

Maestro, ¿na hora ni quee ni yáha?

<sup>26</sup> Te ni cahān Jesús:

Jendaá cahán rī jiín ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró tǎca jniñu jéhnú jeē steén rī poder rī.

<sup>27</sup> Ma cōndihví ni rō maá síquī jeē caji rō jeē yachī nataxñ, chí sa



suhva condihv̄i ni rō siqūi jeē nihín rō jeē cótecu rō ní cáni sáha. Te máá rí, Yaā ní nduu tēe, cuáha ri nájnūhun staā jeē cótecu rō ní cáni sáha. Chi Tátá rī Yaā Dios ni jeni ya ruhū jeē sáha ri súcuan. Achí yá jíin i.

<sup>28</sup> Yūcuán na te ni cacajnúhún i ya:

¿Ndese sáha ná návāha squícu ná jniñu cúní Yaā Dios?

<sup>29</sup> Te ni cahān Jesús:

Jniñu jeē cúní Yaā Dios cúu jeē candíje ró rúhū, Yaā ní tají yá v̄eji.

<sup>30</sup> Yūcuán na te ni cacahān i:

Núu súcuan ¿te na jniñu jéhu sáha ní coto ná jíjnáhan ná te candíje ná jēe ní tají yá nihín? ¿Na jniñu cúu jeē sáha ní? <sup>31</sup> Chi táca jíi yō jenahán ni cayeji de maná jeē ní cuun ichi ándiví ndé nuū ñūhun téhé, nájnūhun yósó núu tútu: Yaā Dios ní jēhe ya staā ni cuun ichi ándiví, ni cayeji i, áchí tutu. Achí i jíin yá.

<sup>32</sup> Te ni cahān Jesús:

Jendaá cahán rī jíin ró: Nasūú Moisés ni jēhe staā un núu de jíjnáhan de jeē ní cuun ichi ándiví, chí máá Tátá rī ni jēhe. Te máá yá jēhe staā ándiví jēe cótecu rō ní cáni sáha. <sup>33</sup> Chi staā jēhe Yaā Dios cúu máá Yaā ní quiiji ichi ándiví, te sáha ya jeē ñáyuu ñayiví cotecu i ní cáni ándiví. Achí yá.

<sup>34</sup> Te ni cacahān i jíin yá:

Níní cuáha ni stáa ún caji na núu súcuan.

<sup>35</sup> Te ni cahān Jesús:

Máá rí cúu máá stáa jeē cótecu rō ní cáni sáha. Ndé vé quiví ndaha ri, ma cúu cuiti gā sōco. Te ndé vé candíje ruhū, ma jichí cuiti gā. <sup>36</sup> Te nájnūhun je ni cahān rī jíin ró, tu cáncandíje ró rúhū, v̄esú ni cajito ró núu rī. <sup>37</sup> Táca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhú rí táca jēe cúní quiví ndaha ri, chí ma squéhichí cuiti ri quihín. <sup>38</sup> Chi ni quiiji rí ichi ándiví návāha sáha ri jniñu jeē cúní

Yaā ní tají rúhū, te nasūu jēe sáha ri jeē cúní máá rí. <sup>39</sup> Te jniñu jeē cúní Tátá rī, Yaā ní tají rúhū, cúu jeē ma scuíta ri ni ñin ñáyuu ní jēhe ya nuū rī, chí condito rí i te nastécu rī i quiví jínu ñayiví. <sup>40</sup> Te Yaā ní tají rúhū, cúní yā jeē táca ñáyuu jeē nihín i jnūhun ruhū, Sēhe Yaā Dios, te candíje i ruhū, cotecu i ní cáni ándiví. Chi nastécu rī i quiví jínu ñayiví. Achí yá.

<sup>41</sup> Yūcuán na te ni caquejé jnáhan ñuu yā hebreo cácahān de siqūi yā, chí ni cahān yā jeē máá yá cúu staā ní quiiji ichi ándiví. <sup>42</sup> Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quiiji de ichi ándiví núu súcuan?

<sup>43</sup> Te ni cahān Jesús jíin de:

Ma cahán rō siqūi rī jíjnáhan ró. <sup>44</sup> Ni ñin ñáyuu ma cúu quiví i ndaha ri núu ma sáha Tátá rī jeē cúu ni i quiví i, chí máá yá ní tají rúhū v̄eji rí. Te nastécu rī i quiví jínu ñayiví. <sup>45</sup> Te suhva yósó núu tútu ni catee tēe ni canacani jnūhun Yaā Dios: Táca i chí steén Yaā Dios nuū i, áchí. Núu súcuan te táca ñáyuu jíni sōho jnūhun cáhán Tátá rī, te jétáhú i jeē steén yā nuū i, ñáyuu ún chí quívicoo i ndaha ri.

<sup>46</sup> Te tu ní jíto ni ñin ñáyuu nuū máá Tátá rī. Chí máñūhún-ni ruhū ni jito ri nuū yā, chí nde nuū máá yá v̄eji rí. <sup>47</sup> Jendaá cahán rī jíin ró jíjnáhan ró jēe ñáyuu jeē candíje i jeē jnáma ri i, máá i cotecu i ní cáni. <sup>48</sup> Máá rí cúu staā jeē cótecu rō ní cáni sáha. <sup>49</sup> Táca jíi rō jenahán, ni cayeji de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ní cáni ándiví. <sup>50</sup> Te staā jeē cahán rī jeē véji ichi ándiví, chí na-ni ñáyuu caji, te cotecu i ní cáni ándiví. <sup>51</sup> Te suu máá rí cúu staā un jēe ní quiiji ichi ándiví jēe sáha jeē cótecu rō ní cáni. Te ñáyuu jeē cáji staā yáha, cotecu i ní cáni ándiví. Te staā jee

cuáha ri un cúu yiqui cúñu rī, te cuáha ri návaha ñayuu ñayiví cotecu i ní cáni andiví. Achí yá.

<sup>52</sup> Yūcuán na te jnáhan ñuu yā hebreo ni cacahān de jín táca jnáhan de:

¿Ndese cuu cuáha tēe yáha yiqui cúñu de caji yō? achí de.

<sup>53</sup> Te ni cahān Jesús jín de:

Jendaá cahán rī jín ró: Núu tú candíje ró jēe yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō ní cáni andiví. <sup>54</sup> Chī ñayuu cácandíje jeē yiqui cúñu rī cúu nájnūhun staā te niñī rī cúu nájnūhun ndute, máa i cotecu i ní cáni. Te nastécu rī i quiví jínu ñayiví. <sup>55</sup> Chī yiqui cúñu rī jín níñī rī cúu ndije jeē sáha jeē cótecu i ní cáni. <sup>56</sup> Te ñayuu cácandíje jeē yiqui cúñu rī jín níñī rī cúu nájnūhun staā jín ndute jeē cótecu i ní cáni sáha, máa i ní ní ndúu i jín rī, te ndúu rī jín i. <sup>57</sup> Máa Tátá rī, Yaā técu, ni tají yá ruhū vēji rī, te técu rī sáha máa yá. Te suni súcuan, ñayuu cácandíje jeē cúu rī nájnūhun staā i ndute i, suni súcuan cotecu i ní cáni sáha rī. <sup>58</sup> Máa rī cúu staā ní quiji ichi andiví. Te staā jeē cahán rī tu cúu nájnūhun staā maná jeē ní cayejí táca jí rō jenahán, chí tu ní sáha jeē cótecu de ní cáni. Te staā jeē cahán rī, chí ñayuu caji, cotecu i ní cáni sáha, achí yá.

<sup>59</sup> Táca jnūhun yáha ní steén Jesús nuū ñayuu ní candutútú ini vehe i sinagoga ñuu Capernaum.

*Jnūhun cotecu yō ní cáni*

<sup>60</sup> Te cuehē ñayuu cascuáha jín yá, ni cajini sōho i jnūhun yáha jēe ní steén yā. Te ni cacahān máa i:

Yōhyo yí jnūhun cáhan yā yāhá. ¿Ndese cuu cuatáhú yó?

<sup>61</sup> Te ni jini Jesús jeē cácahān i jeē yí cúu jnūhun yāhá, te ni cahān yā jín i:

¿A yí sáha jnūhun yáha jín ró jnāhan ró? <sup>62</sup> ¿Te ndese sáha ró núu

coto ró jēe ruhū, Yaā ní nduu tēe, ndaa ri nuhun rī nuū ní cóndee rī xīhna ñūhún? <sup>63</sup> Máa ánuá ñayuu cúu jeē sáha jeē técu i. Chī yiqui cúñu i tu jéjníñu cuii súcuan. Te táca jnūhun ni cahān rī jín ró cúu jeē quéndōo vāha ánuá rō, te cotecu rō ní cáni sáha. <sup>64</sup> Te sava ró chí tu cácandíje ró. Achí yá.

Chī nde xīhna ñūhún je jíní Jesús ndé-ni cúu ñayuu jeē ma cándíje, jín ndé in de cúu jeē nastúu de ya. <sup>65</sup> Te ni cahān gā yā:

Jeē yúcan ní cahān rī jín ró jeē ma cúu quiví ni in ñayuu ndaha rī, te núu tu sáha Tátá rī jeē cúu ni i quiví i, achí yá.

<sup>66</sup> Te nde quiví ún te cuehē ñayuu cascuáha jín yá, ni castóo i ya, te tuá ni cájica i jín yá. <sup>67</sup> Yūcuán na te ni cahān yā jín máa ndihúxí uū tēe cáscuáha jín yá:

¿A suni cácani máa ró quingoo ró, chí naún?

<sup>68</sup> Te ni cahān Simón Pedro:

¿Ndé núu gā quingoo ná? Chī máa ní cúu jeē nácani jnūhun jeē cótecu na ní cáni sáha. <sup>69</sup> Te ni cacandíje ná te cájini na jēe máa ní cúu Cristo, Sēhe Yaā Dios, Yaā técu, achí de.

<sup>70</sup> Te ni cahān Jesús:

Te vēsú ni nacāji rī ndihúxí uū rō, te íyó in ró jeē ní quiví jexeén ini. Achí yá.

<sup>71</sup> Te súcuan ni cahān yā siquī Judas Iscariote, sēhe Simón. Chī máa de nastúu de ya, vēsú in jnāhan jeē uxí uū tēe cáscuáha jín yá cúu de.

*Jeē tu ní cácandíje ñani Jesús*

## 7

<sup>1</sup> Yūcuán na te jica cuu Jesús región Galilea. Chī tu cúní yā caca cuu ya región Judea, chí jnāhan ñuu yā hebreo jeē cáyūcu yúcan, cácani de cahni de ya. <sup>2</sup> Te cuacuyajni vico jeē casáha ñayuu yā hebreo vehe ramadá, cáyūcú i chíji. <sup>3</sup> Te ñani yā ni cacahān de jín yá:

¿Naun máá yáha-ni íne ró? ¿Naun tú quihín rō región Judea, návaha tēe yūcuan jēē cá candíje de rōhó, suni coto de jniñu jéhnú sáha ró. <sup>4</sup> Chi núu cúní ñin tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéhnú, vāha ga na sáha ró jēē cúní ndivii ñayuu.

<sup>5</sup> Súcuan ni cacahān ñani yā jín yá, chi ni máá de tu cá candíje de ya.

<sup>6</sup> Yūcuán na te ni cahān Jesús:

Ná tu quee máá quiví jeē quihín rī. Te máá ró jijnáhan ró chi na-ni quiví-ni te cuu quingoo ró. <sup>7</sup> Chi ma quití ni ñayuu ñayiví núu rō, te máá rí chí quití ni i jito i ruhū, chí cáhán rī jeē jini rī jeē máni jniñu néé cásáha i. <sup>8</sup> Cuángoo máá ró vico ún. Te máá rí chí ma quihín rī vijna, chí ná tu quee máá quiví cánuú quihín rī. Achí yá.

<sup>9</sup> Súcuan ni cahān yā jnūhun yáha jín de, te ni quendōo ya Galilea.

*Jeē ni jéhēn Jesús vico vehe ramadá*

<sup>10</sup> Te nuū ni yáha ñani yā cuangoo de vico ún, te sáá te suni cuahān máá yá. Te tú cuahān ndijin yā, chí tu ní stéén yā máá yá. <sup>11</sup> Te jnáhan ñuu yā hebreo cánanducú i ya nuū vico ún, te cácahān i:

¿Ndé nuū íne tēe ún? áchí i.

<sup>12</sup> Te yōhyo ni cacahān ñayuu jeē siquí yá, chí sava i cácahān: Tēe vāha cúu de. Te sava ga i cácahān: Tuú chí stáhú de ñayuu.

<sup>13</sup> Te yuhu-ni ni cacahān i jnūhun ya, chí cáyūhú i jeē quití ni jnáhan i tēe hebreo.

<sup>14</sup> Te jeē ní cuu sava vico, te ni quee Jesús, ni quiví ya templo cáhnu, te ni quejéé yá stéén yā jnūhun. <sup>15</sup> Te ni canaa ni jnáhan ñuu yā hebreo cájini sōho i, te ni cacahān i:

¿Ndese jini tēe yáha cuéhē jnūhun ndíchí, chí tu ní jica de escuela? áchí i.

<sup>16</sup> Yūcuán na te ni cahān Jesús:

Jnūhun stéén rī chí nasūu jnūhun máá rí cúu, chí jnūhun jeē ní jéhe máá Yaā ní tají ruhū cúu. <sup>17</sup> Núu ñin ñayuu cuní i sáha i jniñu cúní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéén rī, chí jnūhun jeē jéni ni maá-ni ri cúu. <sup>18</sup> Tēe cáhán jnūhun jéni ni maá de, tēe un ndúcú de jeē na sájéhnú ñayuu de. Te núu ñin tēe ndúcú de jeē sajéhnú de Yaā ní tají de, tēe un cúu tēe ndaā, te tú na jnūhun stáhú íyó jín de.

<sup>19</sup> ¿A násūu jēē ni jéhe Moisés ley yā nuū rō jeē squícu ró? Te ni ñin ró tu cásquícu. Chí sa jeē cá cuni rō cahni rō ruhū, ¿te najehē cúu? Achí yá.

<sup>20</sup> Te ni cacahān ñayuu cuehē ún:

Tachí ndóho ró. ¿Ndé ñin cúní cahni rohó?

<sup>21</sup> Te ni cahān Jesús:

Ni nasávaha ri ñin tēe quiví ndétátú, te ndivii rō ni canaa ni rō ni cajito ró jēē quiví ndétátú ni sáha ri jniñu ún. <sup>22</sup> Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yí núu uná quiví jeē ní cacu i, vēsú quiví ndétátú cúu. (Te nasūu máá Moisés ní jéquin ley un, chí je ni iyo nuū táca jí de.) <sup>23</sup> Núu súcuan te núu cásáha ró circuncidar vēsú quiví ndétátú cúu, návaha squícu ró ley Moisés, ¿te najehē cáquití ni rō jeē ní nasávaha ndihí ri ñin tēe quiví ndétátú? <sup>24</sup> Ma yachí cani ni rō jeē cuéchi cúu jeē sáha ri. Chí sa cani vāha ni rō siquí táca jniñu vāha. Achí yá.

*Jeē ní cachi Jesús ndé nuū véji ya*

<sup>25</sup> Yūcuán na te sava ñayuu ñuu Jerusalén ni cacajjnūhun jnáhan i:

¿A násūu tēe yáha cúu jeē cánanducú tēe cácu jéhnú jeē cáhni de, chí naún? <sup>26</sup> Te yáha cáhán ndijin de nuū chitú, te tú na jnūhun cácahān jín de. ¿A sanaa te ni cacundaā ni tēe cácu jéhnú jeē tēe yáha cúu Cristo jeē achí tutu jeē quiji, chí naún? <sup>27</sup> Te tuú chí je cájini

yō nuū vēji tēe yáha. Te jeē quiji Cristo, chi ni ñin yó má cúni ndé chi quiji ya. Achí i.

<sup>28</sup> Yūcuán na te ni cahān jee Jesús jeē steén yā jñūhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaā cúu jeē ní tají rúhū vēji ri, te tú vēji ri jeē cuní máá rí. Te tu cájini rō ndese Yaā cúu ya. <sup>29</sup> Te máá rí chi jíni rí yā, chi nde nuū máá yá vēji ri, te máá yá ni tají rúhū, achí yá.

<sup>30</sup> Yūcuán na te ni canducú de jñi de ya. Te ni ñin de tu ní cúu jñi de ya, chi ná tu quee máá quívi jeē jñi de ya. <sup>31</sup> Te cuehē ñayuu chi ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jeē quiji? Chi cuehē ndasí jñiñu jéhnū sáha ya jeē steén yā poder yā. Achí i.

*Jeē ní catajé de policía jeē jñi de Jesús*

<sup>32</sup> Te ni cajini tēe fariseo jeē súcuan cacahān ñayuu jñūhun ya. Te máá de jíin sūtū cácujeñhu, ni catajé de policía cándito templo jeē jñi de ya. <sup>33</sup> Te ni cahān Jesús:

Jecu na quívi condee rí jíin ró jíjnáhan ró. Yūcuán na te nuhun rí nuū Yaā ní tají rúhū vēji ri. <sup>34</sup> Te nanducú ró ruhū, te ma nánihin rō ruhū. Chi ma cúu jinūcoo ró núu cóndee rí. Achí yá.

<sup>35</sup> Yūcuán na te máá tēe un ní cacajñūhun jñāhan de:

¿Te ndé nuū quihín tēe yáha jeē ma nánihin yō de? ¿A quíhín de nuū jñāhan yó hebreo jeē ní cajitē núu cáyūcu ndé nación Grecia? ¿Te á steén de jñūhun nuū ñayuu Grecia, chí naún? <sup>36</sup> ¿Te na jñūhun cúu jeē ní cahān de jíin yó jeē nanducú yó de te ma nánihin yō de, chí ma cúu jinūcoo yó núu cóndee de? Achí tēe un jíjnáhan de.

*Siquí ndute jeē cótecu yō ní cáni sáha*

<sup>37</sup> Te quívi sándihí vico ún te cúu vico cáhnū ga. Te quívi un ní ndocuiñi Jesús, te ni cahān jee ya:

Núu ndé ñayuu jnáa ndasí i tāca jeē váha jeē sáha ri jehé i, nájñūhun jeē jichí i ndute, núu súcuan te na quívi i ndaha ri te coho i ndute, cúu jeē nihín i jeē váha ún. <sup>38</sup> Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhán tutu i. Achí yá.

<sup>39</sup> Te súcuan ni cahān yā jeē ñayuu candíje jeē jnáma ya i, nihín i Espíritu Santo. Chi ná tu quee Espíritu ún, chí ná tu ndaa Jesús quínūhun yā nuū ndujéhnū ya.

*Jeē ní cacusín ñayuu siquí yā*

<sup>40</sup> Te sava ñayuu cuehē ún, ná ni cajini sóho i jñūhun yáha, te ni cacahān i:

Jendaá jeē tēe yáha cúu jeē achí tutu jeē quiji de nacani de jñūhun Yaā Dios, achí i.

<sup>41</sup> Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasūú Galilea quiji Cristo. <sup>42</sup> Chi cáhán tutu i jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

<sup>43</sup> Te súcuan te ni cacusín ñayuu jeē siquí yā. <sup>44</sup> Te sava i cácuni i jñi i ya, te ni ñin i tu ní jñi i ya.

*Jeē tu ní cácuandíje tēe cácujeñhu*

<sup>45</sup> Yūcuán na te policía cándito templo tu ní cájni de Jesús, te cuanungoo de nuū tāca tēe fariseo jíin núu sūtū cácujeñhu. Te tēe ún ni cacajñūhún de policía:

¿Najehé tu ní quecoo ró jíin de? achí.

<sup>46</sup> Te ni cacahān policía un:

Tú cuiti ni ñin tēe cáhán váha ndasí nájñūhun cáhán tēe yūcuán, achí.

<sup>47</sup> Te ni cacahān tēe fariseo:

¿Te á suni nde máá ró jijnáhan ró ní stáhú de naún? <sup>48</sup> Ni ìn jnáhan ruhū tēe cácujuhnu jíin tēe fariseo, tu cácadíje rí jnūhun cáhán tēe ún, ¿te naun cácadíje máá ró? <sup>49</sup> Te ñayuu cuehē yāhá jēē tu cájecūhun ni i ley Moisés, chí jnahnú ndetū i jeē cácadíje i tēe ún, áchí de jíjnáhan de.

<sup>50</sup> Te ni cahān Nicodemo, tēe ni jéhēn nuū yā ìn jecuáá, te suni ìn tēe fariseo cúu de:

<sup>51</sup> Cáhán ley yō jeē ma cúu tee yó cuēchi siquī ìn tēe, te núu tú xīhna gā cuni sōho yó ndese cáhán de, návāha cucáhnu ni yō na cuēchi ni sáha de. Achí de.

<sup>52</sup> Te ni cacahān jíin de:

Te róhó, ¿á suni nde Galilea vēji ró jēē cahán rō jehē tēe ún? Nanducú váha ró núu tútu ìi te cuni rō jeē ndé Galilea tu quēnda cuiti ni ìn tēe nácani jnūhun Yaā Dios. Achí jíin de. <sup>53</sup> Te cuanungoo de ná vehe ná vehe de.

*Jnūhun ñahan ní casiquí ndéē jnáhan*

## 8

<sup>1</sup> Te ni caa Jesús cuahān yā yucu Olivos. <sup>2</sup> Te jeē cuácundijin inga quiví, te ni ndee tucu ya templo. Te ndihí ñayuu ni quecoo i nuū yā. Te ni cucōo ya, te ni steén yā jnūhun nuū i. <sup>3</sup> Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ìn ñahan jeē ní canihín de ña jeē casiquí ndéē ña. Te ni cajeni de ña mēhñú. <sup>4</sup> Te ni cacahān de jíin yá:

Maestro, ni canihín ná ñahan yáha jēē casiquí ndéē ña. <sup>5</sup> Te ley Moisés ndácu jniñu nuū yō jeē cuáha yó yūū xinī ñahan cásáha súcuan návāha cuu ña. Te máá ní, ¿ndese cáhán ni?

<sup>6</sup> Te súcuan ni cacahān de jeē cájito ndee de ya núu cuatáhú yá jeē cahán ley un, chí núu tuú te caquin de cuēchi siquī yā. Te Jesús ni jita ndeyi ya, te ni tee ya nuū ñūhun jíin

xinī ndáha ya. <sup>7</sup> Te jeē cácajnūhun cácajnūhún de ya, te ni ndonehen ya máá yá, te ni cahān yā jíin de:

Núu ndé ìn máá ró tú na cuēchi ró, te xīhna gā máá ró cuáha yuū xinī ña núu súcuan, áchí yá.

<sup>8</sup> Te ni jita ndeyi tucu ya, te ni tee tucu ya nuū ñūhun. <sup>9</sup> Te nuū ní cajini de jeē súcuan ni cahān yā, te ni cajecūhun ni de jeē suni cáhiyo cuēchi de. Te ná ìn ná ìn de ni quendacoo de cuahān de, xīhna gā tēe jéhu ga te nde nuū ní ndihi na. Te ni ndōo máá ìn na Jesús jíin ñahan índichi mēhñú un. <sup>10</sup> Te ni ndonehen tucu ya máá yá, te tuá ni ìn tēe un ní jito ya, chí máá na ñahan ún. Te ni cahān yā jíin ña:

¿Ndé chí cuángoo tēe cájequin cuēchi siquī rō? ¿A tú ni ìn de ní ndóna cahān gā cuēchi siquī rō?

<sup>11</sup> Te ni cahān ña:

Tú ni ìn de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

*Jesús cúu máá luz jeē steén ini anuá ñayuu*

<sup>12</sup> Te inga jínu ni cahān Jesús jíin ñáyuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chí ma cáca i nájnūhun nuū néē, chí sa suhva coneváha i luz ini anuá i jeē sáha jeē cótecu i nñ cáni.

<sup>13</sup> Yūcuán na te ni cacahān tēe fariseo jíin yá:

Róhó chí cáhán rō jnūhun jehē máá ró, te tu jéjníñu jnūhun cáhán rō.

<sup>14</sup> Te ni cahān Jesús jíin de jíjnáhan de:

Vēsú cáhán rī jehē máá rí, te íyó ndáá jnūhun cáhán rī. Chí jíni rī ndé nuū vēji rí jíin ndé nuū quihín rī. Te róhó tu cajini rō ndé nuū vēji rí ni ndé nuū quihín rī. <sup>15</sup> Máá ró

chi cuenta ñayuu ñayīvi cásandaā rō siquī jnúhun cáhān rī. Te ruhū chi tu sándaā mañúhún rí siquī ni ñin ñayuu. <sup>16</sup> Te núu sándaā rī siquī i, te ndaā sáha rī, chi tu sáha mañúhún rí, chi sándaā rī nde jíin máá Tátá rī, Yaā ní tají rúhū vēji rī. <sup>17</sup> Te yósó núu tútu ley cánevāha ró jēe núu inuú cácahān uū testigo, te jíni ñúhún cuatáhú ró jēe cácahān, chi íyó ndáā jnúhun ún. <sup>18</sup> Núu súcuan te ruhū cúu ñin jēe cáhān ndaā rī jehē rī. Te inga jēe cáhān ndaā jehē rī cúu máá Tátá rī, Yaā ní tají rúhū. Achí yá.

<sup>19</sup> Te ni cacahān de jíin yá:

¿Nde núu ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jēe cájini rō ruhū, suni cuni rō Tatá rī nuú.

<sup>20</sup> Tāca jnúhun yáha ní cahān Jesús jēe steén yā ini templo nuú cáyūcu yéjñū jēe cásocō i xúhún. Te tú ni ñin de ní jñí de ya, chi ná tu quee maá quiví jēe jñí de ya.

*Jeē ni cahān yā jēe ma cúu jinūcoo de nuū cóndee yā*

<sup>21</sup> Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī ró quiví cúu rō. Te jēe yúcuán má cúu jinūcoo ró núu quihín rī, achí yá.

<sup>22</sup> Yūcuán na te tēe hebreo un ní cacahān maá de:

¿A cahni tēe yáha maá de, te jēe yúcuán cáhān de jēe ma cúu jinūcoo yó núu quihín de, chí naún? Achí de.

<sup>23</sup> Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andiví véji rī. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu rī. <sup>24</sup> Jeē yúcuán ní cahān rī jēe quendōo cuēchi ró siquī ró quiví cúu rō. Chi núu ma candíje ró jēe máá rí cúu Cristo, te quendōo nahín cuéchi ró siquī ró quiví cúu rō. Achí yá.

<sup>25</sup> Te ni cacajnúhún de ya:

Núu súcuan ¿te ndé ñin cúu ró?

Te ni cahān yā:

Je ni cachi rí nuū rō nde xihna ñúhún ndé ñin cúu rī. <sup>26</sup> Te íyó cuēhē gā jnúhun cuu cahān rī jíin ró te sándaā rī siquī rō. Te ma cáhān rī, chi ini ñayīvi yáha cáhān rī maá-ni jnúhun jēe ní jini rī ni cahān Yaā ní tají rúhū vēji rī. Te máni jnúhun ndaā cáhān yā. Achí yá.

<sup>27</sup> Te tu ní cájecūhun ni de jēe cáhān yā jnúhun Tátá yā andiví jíin de. <sup>28</sup> Jeē yúcuán ní cahān gā yā:

Nde na yáha jēe cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu rī. Te cuni rō jēe tú na vé sáha rī jēe máá rī, chí cáhān rī maá-ni jnúhun ni steén Tatá rī nuū rī. <sup>29</sup> Chi máá Tátá rī, Yaā ní tají rúhū, ndeé yá jíin rí. Te tu stóo mañúhún yá ruhū, chi níni sáha rī jñiñu jēe nújnahan ni maá yá. Achí yá.

<sup>30</sup> Te jēe ni cahān yā jnúhun yáha, te cuēhē ñayuu ni cacandíje i ya.

*Siquī ndé-ni cúu sēhe Yaā Dios jíin sēhe jexeén*

<sup>31</sup> Yūcuán na te ni cahān Jesús jíin jnáhan ñuu yā hebreo jēe ní candíje i ya:

Te núu cuiñi ñihin ró jíin jnúhun stéén rī nuū rō, te cuu ndije ró ñayuu scuáha jíin rí. <sup>32</sup> Te jecūhun ni rō jnúhun ndaā, te jnúhun ndaā un sáha jēe nduu libre ró nuū jēe yíhi ró ndaha.

<sup>33</sup> Te ni cacahān i jíin yá:

Sēhe yucūn Abraham cácuu rī, te tu cáyihí cuiñi rī ndaha ni ñin. ¿Te ndese cúu jēe cáhān rō jēe nduu libre rī núu súcuan?

<sup>34</sup> Te ni cahān Jesús:

Jendaá cáhān rī jíin ró jēe tāca ñayuu casáha cuēchi, tu íyó libre i, chí yíhi i chíji cuēchi jēe jejníñu cáhá i nuū. <sup>35</sup> Te ñayuu jejníñu cáhá, chí tu cúu i ñin jnáhan ñayuu vehe nuū jejníñu i. Te ñin sēhe chí sa suhva cúu ndije i jnáhan ñayuu

vehe ún. <sup>36</sup> Núu súcuan te máá rí jeē cúu Sēhe Yaā Dios, núu sáha rí jeē tuá cuajníñu cáhá ró nuū cuéchi, núu súcuan te nduu libre ndije ró jíjnáhan ró, te cuu ró sēhe ya. <sup>37</sup> Te jíni rí jeē sēhe yucūn Abraham cácuu ró, te vēsú súcuan te cácuu rō cahni rō ruhū, chí tu cájetáhú ró jñūhun cáhán rī. <sup>38</sup> Ruhū chí cáhán rī jñūhun jeē ní steén Tatá rī nuū rī. Te máá ró chí cásáha ró jniñu jeē ní cáhán tatá maá ró jíjnáhan ró. Achí yá.

<sup>39</sup> Te ni cacahān i:  
Sēhe yucūn Abraham cácuu ri.

Te ni cahān Jesús:

Núu jeē candíje ró nájnūhun ni candíje Abraham návāha cuu ndije ró yucūn de, yūcuán na te jniñu váha ni sáha de suni sáha máá ró nuū. <sup>40</sup> Te vijna chí cácuu rō cahni rō ruhū, vēsú ní cahān rī jíin ró táca jñūhun ndaā ni steén Tatá rī nuū rī. Te Abraham chí tu ní sáha cuiti de súcuan. <sup>41</sup> Máá ró chí inuū cásáha ró jíin tatá maá ró. Achí yá jíin i.

Yūcuán na te ni cacahān i:

Máá rí chí tu cácuu rí sēhe ndáhú jeē tu tátá. Chí iyó ñin-ni tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo manī rō jíin rí nuū. Chí nde nuū Yaā Dios ní quenda rí vēji rí. Te tú vēji rí jeē cuní máá rí, chí máá yá ní tají rúhū. <sup>43</sup> ¿Te najehē tu cájecūhun ní rō jñūhun cáhán rī núu súcuan? Suu siquī jeē tu cácuu rō chusóhó ró jñūhun nácani rí. <sup>44</sup> Máá ró jíjnáhan ró chí tátá rō cúu jexeén. Te cácuu rō sáha ró máá jéē cuní tátá rō ún. Máá jexeén ní jehni ndīyí nde jeē xíhna ñúhún. Te tu ní ín cuiti jíin jñūhun ndaā, te tú cuiti na jñūhun ndaā cahán. Te jeē cahán jexeén jñūhun stáhú cúu jeē súcuan cáa máá. Chí máá un cúu jeē ndíso jñūhun stáhú, te máá un cúu jeē ní squéjéé ndíhi jñūhun stáhú. <sup>45</sup> Te ruhū chí cáhán rí jñūhun ndaā, te jeē yúcuan cúu jeē tu cácuu rō rúhū. <sup>46</sup> Te ní ñin ró ma níhín rō

cuēchi siquī rī, chí tú cuiti na cuēchi rí. Te máni jñūhun ndaā cahán rī, ¿te naun tu cácuu rō rúhū? <sup>47</sup> Ñayuu cácuu sēhe Yaā Dios, chí cáchusóhó i jñūhun Yaā Dios. Te nasūu sēhe Yaā Dios cácuu ró, te jeē yúcuan tu cácuu rō chusóhó ró. Achí yá jíin de.

*Iyó Jesús nde ná tu coo Abraham*

<sup>48</sup> Yūcuán na te ni cacahān jñáhan ñuu yá hebreo un:

Ndaā cacahān rī jeē canéé ró nájnūhun ñayuu Samaria, te ñúhun tachī ini rō.

<sup>49</sup> Te ni cahān Jesús:

Tu ñúhun tachī ini rī, chí yíñúhún rí jíin Tátá rī. Te máá ró jíjnáhan ró chí tu cáhīyo yíñúhún ró jíin rí. <sup>50</sup> Máá rí tu ndúcú rí jeē cujéhnú rí. Iyó ñin jeē sáha jeē cujéhnú rí, te máá yá sándaā siquī jñūhun cacahān rō. <sup>51</sup> Jendaá cahán rī jíin ró, núu ndé ñayuu squícu jñūhun cáhán rī, ma cúu cuiti i. Achí yá.

<sup>52</sup> Te tēe hebreo un tu ní cájecūhun ní de, te ni cacahān de:

Vijna te ni cacucáhnu ní rī jeē ñúhun ndije tachī ini rō. Chí Abraham jíin táca téé ní canacani jñūhun Yaā Dios nde jenahán, ní cajihī de. Te róhó cáhán rō, núu ndé vé squícu jñūhun cáhán rō, te ma cúu cuiti i, áchí ró. <sup>53</sup> ¿Te chí jéhnú ga rō vēsú jíi yō Abraham naún? Chí ní jihī de, te suni ní cajihī táca téé ní canacani jñūhun ya. ¿Te ndé ñin ga sáha ró máá ró núu súcuan? Achí de.

<sup>54</sup> Te ni cahān Jesús:

Núu ruhū sajhénu rí máá rí, te tu níhín jniñu. Máá Tátá rí cúu jeē sajhénu ruhū. Te cacahān rō jeē máá yá cúu Yaā Dios máá ró. <sup>55</sup> Te vēsú súcuan te tu cácuu rō ndese Yaā cúu ya. Te ruhū chí jíni rí yá. Te núu cahān rī jeē tu jíni rí yá, te cuu rí tēe stáhú nájnūhun máá ró jíjnáhan ró. Te tuú chí jíni ndije rí yá, te squícu rí jñūhun cáhán yá. <sup>56</sup> Te jíi rō Abraham ní cusī ní de jeē coto de quiví quée rí. Te je ní jito de, te

ni jito ri jeē ní cusĩ ndasí ni de. Achí yá.

<sup>57</sup> Yūcuán na te ni cacahān tēe hebreo un jín yá:

Ni ná tu coo ró uū xico uxĩ cuiyā, ¿te ndese cúu jeē cahán rō jeē ní jito ró núū Abraham? achí de.

<sup>58</sup> Te ni cahān Jesús:

Jendaá cahán rī jín ró jeē nde ná tu cacu Abraham te je íyó rí, achí yá.

<sup>59</sup> Yūcuán na te ni caquihin de yuū jeē cuáha de xinī yā. Te Jesús chi ni quenda sāhi yá ni yāha ya mēhñū de, ni quenda ya ini templo cuahān yā.

*Jeē ní nasávāha ya ĩn tēe ni cacu cuáá*

## 9

<sup>1</sup> Te jeē jíca Jesús cuahān yā, te ni jito ya nuū ĩn tēe ni cacu cuáá. <sup>2</sup> Te tēe cáscuáha jín yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

<sup>3</sup> Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jniñu jéhnū sāha Yāā Dios jín de. <sup>4</sup> Níní jéē cúu nájñūhun nduú ini ñayīví, te cánuú sāha rī jniñu Yāā ní tají rúhū. Chí quee tiempo jeē coo nájñūhun jecuáá, jeē tuá cuu sájñiñu ni ĩn. <sup>5</sup> Níní jéē íyó rí ini ñayīví te cúu ri luz jeē cúndijin ini anuá ñayuu ñayīví, návāha jecūhun ni i siquī Yāā Dios. Achí yá.

<sup>6</sup> Te ná ni cahān yā súcuan, te ni tesīhi yá nuū ñūhun, te ni sāha ya ndehyū jín tesīhi yá un, te ni tee ya siquī tñūu tēe cuáá un. <sup>7</sup> Te ni cahān yā jín de:

Cuáhán núū pila Siloé te nacate ró tñūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūu de, te ni ndundi-jin-ni, te ni nandicó de vēji de.

<sup>8</sup> Yūcuán na te ñayuu yúcu yajni jín de, jín ñayuu jeē ní cajito jeē cúu de tēe cuáá, ni cacajnūhun jñáhan i:

¿A násūu tēe yáha cúu jeē ndeé-ni yāhá te jícan caridad?

<sup>9</sup> Te sava i ni cacahān:

Suu de cúu.

Te sava ga i ni cacahān:

Nasūu de cúu, te súcuan cuní coto de.

Te máá de chi ni cahān de:

Suu ri cúu.

<sup>10</sup> Yūcuán na te ni cacajnūhún i de:

¿Te ndese cúu jeē ní nanune tñūu ró núū súcuan?

<sup>11</sup> Te ni cahān de:

Tēe nání Jesús ní sāha de ndehyū, te ni tee de tñūu rí, te ni cahān de jín rí: Cuáhán núū pila Siloé te nacate ró tñūu ró. Te ni jehēn rī, te ni nacate ri, te ni nanune-ni tñūu rí, achí de.

<sup>12</sup> Yūcuán na te ni cacajnūhún i de:

¿Ndé nuū íne tēe ún? áchí i.

Tu jíní rī, achí de.

*Jeē ní castíchi tēe fariseo tēe ni cacu cuáá*

<sup>13</sup> Yūcuán na te ni cajendeca i tēe ni íyo cuáá un núū tēe grupo fariseo. <sup>14</sup> Te quivī ndétātu cúu jeē ní sāha Jesús ndehyū jeē ní nanune ya tñūu de. <sup>15</sup> Te tēe fariseo un ní cacajnūhún tucu de tēe ún ndese ni nanune tñūu de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

<sup>16</sup> Yūcuán na te ni cacahān sava tēe fariseo:

Tēe ún chi nasūu ndé nuū Yāā Dios vēji de, chí tu nēe ĩ de quivī ndétátú.

Te sava ga de chi ni cacahān:

¿Ndesse cuu sāha tēe un táca jniñu jéhnū yáha te núu tēe íyó cuéchi cúu de?



Te ni cacasín de siquī yā. <sup>17</sup> Te ni cacajnūhún tucu de tēe ni iyo cuáá un:

Róhó, ¿ndese cáhán rō siquī tēe ni nanune tinūu ró núu súcuan?

Te máá de ni cahān de:

Ín tēe nácani jnūhun Yaā Dios cúu de, áchí de.

<sup>18</sup> Te tēe hebreo un chi tu ní cácan díje de jeē ni iyo cuáá tēe ún te ni ndundijin tinūú de. Te ni cacana xinī tatá de náná de. <sup>19</sup> Te ni cacajnūhún de:

¿A yáha cúu sēhe ro jéē ní cacu cuáá cácahān rō? Núu súcuan ¿te ndese ni ndundijin tinūú de vijna? áchí.

<sup>20</sup> Te ni cacahān tatá de náná de:

Suu sēhe ri cúu tēe yáha jéē ní cacu cuáá. <sup>21</sup> Te tu cájini rī ndese ni ndundijin tinūú de vijna, ni tu cájini rī ndé tēe ni nanune tinūú de. Cajnūhun ró maá de, chi je jéhu de, te na cáchi máá de.

<sup>22</sup> Súcuan ni cacahān tatá de náná de, chi cáyūhú de cájito de jnáhan de tēe hebreo. Chi je ni casándaā tēe un jéē núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quivī i ini vehe i sinagoga. <sup>23</sup> Jeē yúcuan ní cacahān tatá de náná de: Cajnūhun ró maá de, chi je jéhu de.

<sup>24</sup> Yūcuán na te ni hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jíto jínū Yaā Dios. Chi cájini rī jeē tēe íyo cuéchi cúu tēe ni nanune tinūu ró.

<sup>25</sup> Yūcuán na te ni cahān de:

Tu jíni na núu íyo cuéchi de, chí naún. Te íyo ín jeē jíni ná, cúu jeē tēe cuáá ní cuu ná, te vijna chi ni ndundijin tinūu ná. Achí de.

<sup>26</sup> Te ni cacajnūhún tucu de:

¿Ndesse ni sáha de jíin ró? ¿Ndesse ni nanune de tinūu ró núu súcuan?

<sup>27</sup> Te ni cahān de:

Je ni cuu ni castūhun ná nuū ní, te tu ní cácani ní cuatáhú ní. ¿Te nahē cácani ni jéē cáchi tucu ná núu ní? ¿Te chí suni cácani ni jíjnhān ní candíje ní yá naún?

<sup>28</sup> Yūcuán na te ni cacahān neé jíin de, te áchí:

Máá ró chí cándíje ró tēe ún, te máá rí chí cácan díje ri Moisés. <sup>29</sup> Te cájini rī jeē ni cáhān Yaā Dios jíin Moisés. Te tēe yúcuan, ni tu cájini rī ndé nuū véji de.

<sup>30</sup> Te ni cahān tēe ni iyo cuáá:

Náa ni na jéē cácahān ni jéē tu cájini ní jeē véji de nuū Yaā Dios, vēsú ni nanune de tinūu ná. <sup>31</sup> Te cájini yō jeē Yaā Dios tu jíni nahín yá jeē cájicān ñayuu íyo cuéchi. Chi jíni nahín yá nuū maá-ni ñayuu jeē cáchiñūhún i ya te cása ha i jeē cuní yā. <sup>32</sup> Te ní véji yō te tu ní jíni sōho cuiti yō jeē ín tēe nanune de tinūú inga tēe ni cacu cuáá. <sup>33</sup> Te núu nasūu ndé nuū Yaā Dios véji tēe ún, te ma cúu cuiti sáha de ín jniñu súcuan. Achí de.

<sup>34</sup> Te ni cacahān tēe hebreo un:

Róhó chí íyo ndasí cuéchi ró ndé quivī ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe i sinagoga.

*Siquī ñayuu cáhīyo cuáá ánuá*

<sup>35</sup> Te ni jíni jnūhun Jesús jeē ní caquenehen de tēe ún. Te ni nihīn jnáhan ya jíin de, te ni cahān yā jíin de:

¿A cándíje ró Séhe Yaā Dios?

<sup>36</sup> Te ni cahān de:

¿Nde ín cúu ya návāha candíje ná yá?

<sup>37</sup> Te ni cahān Jesús:

Je ni jito ró núu yā, te suu cúu ruhū jeē cahān jíin ró, achí yá.

<sup>38</sup> Yūcuán na te ni jecuiñ yití de nuū yā, te ni cahān de:

Cándíje ná jéē nihín cúu Jitoho ná.

<sup>39</sup> Te ni cahān Jesús:

Véji ri ini ñayivī yáha jéē sándaā rī siquī ñayuu. Chi ñayuu jeē nájnūhun cácuáá ánuá, ndundijin ini ánuá i jeē jécūhun ni i siquī rī. Te ñayuu jeē jéni ní i jeē cájecūhun ni i, nájnūhun nducuáá ánuá i. Achí yá.

40 Te sava tēe fariseo jeē cāhīn jīn yá, ná ni cajini de jñūhun yáha, te ni cacahān de jīn yá:

¿Te chí jēni ní rō jeē suni tēe tu cájecūhun ní cácuu máá rí naún?

41 Te ni cahān Jesús:

Núu jeē cácuu ró tēe tu jécūhun ní nuú, te ma cóo cuēchi ró. Te siquī jeē ní cacahān rō jeē cájecūhun ní rō, te tu cájetáhú ró, jeē yúcuan condee cuēchi siquī rō.

*Jñūhun yátá siquī lanchi*

## 10

1 Jendaá cahán rī jīn ró, núu yáhi lanchi ini corral cánevāha cáhnu ñayuu, te núu ndé tēe tu quívi de ichi yéhyí corral un, chi sá suhva inga lado cáa de quívi de, tēe un cúu ñacuīhná, chi vēji jeē sacuíhná. 2 Te tēe quívi ichi yéhyí, chi tēe un cúu pastor ndíto lanchi. 3 Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhví lanchi máá de, te táva de tī. 4 Te núu ní tava de ndíhi lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de. 5 Te ma cóndiquīn tī yatā inga tēe, chi sa suhva cunu tī coto tī de, chi nácuni tī jeē nasūu jítoto tī cúu.

6 Jñūhun yátá yáha ní cahān Jesús jīn ñayuu, te tu ní cájecūhun ní i na jñūhun cúu jeē ní cahān yā.

*Jesús cúu máá pastor vāha*

7 Yūcuán na te ni cahān gā Jesús jīn i:

Jendaá cahán rī jīn ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi rī. 8 Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájñūhun ñacuīhná, chi tu ní cástéén de jñūhun ndaā. Te ñayuu cácuu nájñūhun lanchi rī, tu ní cájetáhú i de. 9 Máá rí cúu nájñūhun yéhyí. Te ñayuu jeē jīn máá rí quívicoo, jnama rī i. Te cuu i nájñūhun lanchi

jeē ndívicoo tī nuū yáhi vāha tī, te quéndacoo tī nuū cáji vāha tī.

10 Tēe cuīhná chi máni vēji de jeē sacuíhná de lanchi, te cahni de, te snāā de. Te ruhū chi vēji rī návāha cotecu ñayuu cácuu lanchi rī, te nde yōhyo vāha ndetū coo i. 11 Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquí tī. 12 Te iin tēe yíyāhu, nasūú pastor tī cúu de, chi nasūú lanchi máá de cúu tī. Te núu jító de jeē vēji yihī, te stóo de lanchi, te jínu de cuahān de. Te yihī chi jñá tī lanchi, te sáha tī jeē jité núu lanchi. 13 Te tēe yíyāhu ún chi jínu de cuahān de siquī jeē lanchi tátú cúu jeē ndíto de, te jeē yúcuan tu cúndáhú ní de tī.

14 Máá rí cúu máá pastor vāha. Te jíní rī tāca ñayuu cácuu nájñūhun lanchi rī, te máá i cájini i ruhū. 15 Te yāha cúu nájñūhun jeē Tatá rī jíní yā ruhū, te máá rí jíní rī Tatá rī. Te cuu rī jeē siquí ñayuu cácuu lanchi rī. 16 Te suni íyó gá ñayuu jeē cácuu lanchi rī, te sún sún ñayuu cácuu i. Te cánuú jéé suni condeca rī ñayuu ún. Te cuatáhú i jñūhun cáhán rī. Te coyūcu cáhnu-ni ndíhi ñayuu candíje, te coo iin-ni pastor i.

17 Te Tatá rī manī ndasí yá jīn rí siquí jeē jéhe rī máá rí jeē cúu rī jehē ñayuu, te natecu tucu rī. 18 Ni iin ma cúu cahni ruhū, chi máá rí cúu jeē jéhe jñūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahān Tatá rī jeē sáha rī. Achí yá.

19 Te jeē ní cajini jñáhan ñuu yā hebreo jñūhun yáha, te ni cacusīn tucu i. 20 Te cuehē i ni cacahān:

¿Naun cáchusóhó ró jeē cahán de? Chí ñūhun tachī ini de, te ní tīví xíní de.

21 Te sava ga i ni cacahān:

Tu súcuan cáhán tēe ñūhun tachī ini, nájñūhun cáhán tēe yáha. Te tēe ñūhun tachī ini, ¿á cuu nanune de tinūu tēe cuáá naún? Achí.

*Jeē ní casquéhichī i Jesús*

<sup>22</sup> Te tiempo mǐjin cúu, te ñuu Jerusalén cānasáha ñayuu vico jeē cānucūhun ni i quivī ní cuhīi templo cáhnu. <sup>23</sup> Te jíca cuu Jesús ini templo, ini corredor jeē naní Salomón. <sup>24</sup> Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachi cají núū rī jijnáhan ri núu máá ró cúu Cristo.

<sup>25</sup> Te ni cahān Jesús:

Je ni castūhun rī nuū rō, te tu ní cáandíje ró. Tācá jniñu jeē ní tejniñu Tátá rī ruhū sáha ri, yūcuan stéén cají jéē máá yá ni tají ruhū. <sup>26</sup> Te tu cáandíje ró, chi nasūú lanchi ri cácuu ró, nájnūhun je ni cahān rī jín rī. <sup>27</sup> Ñayuu cácuu lanchi ri, chi náconi i jeē máá rí cúu jeē cahān jín i. Te jíní rī i, te cándiquñ i ruhū. <sup>28</sup> Te cotecu i ní cáni sáha ri, te ma jnahnú ndetū cuiti i. Te ni ñn ma cúu quende i ndaha ri. <sup>29</sup> Máá Tátá rī ni squivī ya i ndaha ri. Te cújéhnu ga máá yá vésú táca gá. Te ni ñn ma cúu quende i ndaha ya. <sup>30</sup> Máá rí jín Tátá rī, chi ñn-ni cúu ri, achí yá.

<sup>31</sup> Yūcuán na te jnáhan ñuu yā hebreo ni caquihin tucu de yuū jeē cuáha de xinī yā. <sup>32</sup> Te ni cahān yā jín de:

Ni steén rī cuehē jniñu váha nuū rō jeē ní sáha ri jín poder Tátá rī. ¿Te á síquī jeē ní sáha ri jniñu váha cúu jeē cuáha ró yūu xinī rī núu súcuan? Achí yá.

<sup>33</sup> Te ni cacahān de jín yá:

Nasūu síquī jeē ní sáha ró jniñu váha cúu jeē cuáha ri yuū xinī rō, chi síquī jeē cahān ndevāha ró jéē achí ró jeē inuú cúu ró jín Yaā Dios. Chi tēe-ni cúu ró, te sáha ró jéē inuú cúu ró jín Yaā Dios. Achí de jín yá.

<sup>34</sup> Te ni cahān Jesús:

Yósó núu tútu ley cánevāha ró jéē ní cahān Yaā Dios: Nájnūhun yaā cácuu ró, achí Yaā Dios, achí tutu. <sup>35</sup> Chi ñayuu jeē ní cajetáhú jnúhun

ya, ni cahān yā jeē cácuu i nájnūhun yaā. Te cájini yō jeē ma cúu cahān yō jeē tú ndaā jnúhun cahān tutu i.

<sup>36</sup> Núu súcuan ¿te naun cácahān rō jeē jnúhun ndevāha cúu jeē ní cahān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu i, te ni tají yá ruhū vēji ri ini ñayivī.

<sup>37</sup> Núu tu sáha ri jniñu sáha Tátá rī, núu súcuan te ma candíje ró ruhū.

<sup>38</sup> Te núu sáha ri, te vésú tu cáandíje ró ruhū, te na cándíje ró síquī jniñu sáha ri ún. Te súcuan te cuáhnu ni rō jeē ñn-ni cúu Tátá rī jín rī, te ñn-ni cúu ri jín Tátá rī. Achí yá.

<sup>39</sup> Yūcuán na te cánducú tucu de jni de ya. Te ni ndoñhún-ni ya cuahān yā.

<sup>40</sup> Te cuanuhun yā yūte Jordán ichi núu cáne niāndii, nuū ni íne Juan ni scuāndute de. Te ni condee yā yūcuán. <sup>41</sup> Te ni quijicoo cuehē ñayuu nuū yā, te ni cacahān i jín táca jnáhan i:

Ndaā chi vésú tu ní sáha Juan ni ñn jniñu jéhu, te ni cundaā ndihi jnúhun ní cahān de síquī ndese sáha tēe yáha. Achí i.

<sup>42</sup> Te cuehē ñayuu jeē ní jéngoo nuū yā yūcuán, ní cacandíje i ya.

*Jeē ní jhī Lázaro***11**

<sup>1</sup> Te ni íyo ñn tēe cúhú, nání de Lázaro. Te máá de jín cuáha de María jín Marta, cácuu de ñayuu ñuu Betania. <sup>2</sup> Te María un jéē cúu cuáha Lázaro, suu ña cúu jeē ní chihí aceite perfume jehē Jitoho yō, te ni nasíchí ña jín ixi xíní ña. <sup>3</sup> Te ndíndúú cuáha de un ní catajé ña jnúhun cuahān nuū Jesús:

Tēe jeē maní ni jín, cúhú de, achí ña, achí mozo.

<sup>4</sup> Te ná ni jini Jesús jnúhun, te ni cahān yā:

Cuehyī yáha chi nasūu cuéhyī jeē ví cuu de cúu, Chi sa suhva sáha Yaā Dios jeē cuni ñayuu ndese cújéhnu ya. Chi ruhū, Séhe Yaā Dios, jín

cuéhyi yáha te stéén rī jeē suni cújéhnū máá rí. Achí yá.

<sup>5</sup> Te manī Jesús jíin Marta jíin cúhū ña jíin Lázaro. <sup>6</sup> Te vēsú súcuan te nuū ni níhīn yā jnūhun jeē cuhú de, te ni quendōo ya uū gā quivī nuū ndeé yá un. <sup>7</sup> Yūcuán na te ni cahān yā jíin téē cáscuáha jíin yá:

Na quíhīn tucu yó región Judea.

<sup>8</sup> Te tēē cáscuáha un ní cacahān de jíin yá:

Maestro, ná tu cuu quivī jeē ní canducú jnāhan yó hebreo cuāha de yuū xinī ní. ¿Te cúni ní quíhīn tucu ní yúcuan naún? Achí de.

<sup>9</sup> Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájñūhun jeē iyó úxī uū hora ĩn nduú. Te jeē sáha rī jeē cuní Yaā Dios, cúu rī nájñūhun tēē jeē jíca nduú, te tu cáchihi de jehē de, chi cúndijin nuū de ñayivī yáha. <sup>10</sup> Te tēē jeē tu sáha jeē cuní Yaā Dios, chi nájñūhun jíca de jecuaā, te nájñūhun cáchihi de jehē de, chi tu cúndijin ini anuá de. Achí yá.

<sup>11</sup> Yūcuán na te ni cahān tucu ya:

Amigo yō Lázaro quíxī de, te quíhīn rī sáha rī jeē nátahū ni de. Achí yá.

<sup>12</sup> Yūcuán na te tēē cáscuáha un ní cacahān de:

Núu quíxī de te jíni yō jeē nduvāha de.

<sup>13</sup> Te Jesús chi súcuan ni cahān yā jeē jé ni jihī de. Te cájeni ni téē cáscuáha jeē quíxī ndije de. <sup>14</sup> Yūcuán na te ni cahān cají yá:

Je ni jihī Lázaro. <sup>15</sup> Te cúsi ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jéhnū sáha rī. Núu súcuan te na quíngoo yó núu ndíyī ún. Achí yá.

<sup>16</sup> Yūcuán na te Tomás, tēē cúu cuatí, ni cahān de jíin jnāhan de jeē cascuáha jíin yá:

Suni na quíngoo yó návāha cuu yō jíin yá, achí de.

*Jesús cúu jeē sáha jeē nátecu te cotecu ní cáni*

<sup>17</sup> Te nuū ní quee Jesús, te jíni yā jeē ní cuu cuūn quivī yíndūji Lázaro. <sup>18</sup> Te yajni-ni ĩne ñuu Betania jíin ñuu Jerusalén, nájñūhun uū kilómetro yosáva. <sup>19</sup> Te Marta jíin María, ni quecoo cuehē jnāhan ña hebreo jeē cahán i jnūhun ndeyí ni jíin ña jeē siquí jeē ni jíhī cuāha ña. <sup>20</sup> Te nuū ní jíni Marta jeē véji Jesús, te ni quenda ña cuajnahān ña ya. Te María chi ni ndōo ña vehe. <sup>21</sup> Te ni cahān Marta jíin Jesús:

Núu ní íyo ní yáha, te ma cúu cuāha ná núu. <sup>22</sup> Te vēsú súcuan te jíni na jéē tāca jéē cacán ni núu Yaā Dios, te sáha ya, achí ña.

<sup>23</sup> Te ni cahān Jesús jíin ña:

Natecu cuāha ró.

<sup>24</sup> Te ni cahān Marta:

Jíni na jéē nátecu de quivī nátecu tāca ndíyī nde quivī jínu ñayivī.

<sup>25</sup> Te ni cahān Jesús:

Maá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnāma rī i, vēsú na cúu i, te natecu i. <sup>26</sup> Te ñayuu cátecu te cándíje i ruhū, cotecu i ní cáni andivī. ¿A cándíje ró jnúhun yáha? Achí yá.

<sup>27</sup> Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayivī, achí ña.

*Jeē ni ndáhyū Jesús nuū yíndūji Lázaro*

<sup>28</sup> Te ná ni cahān ña súcuan, te cuahān-ni ña, cuacana yuhu ña cuhū ña María:

Maá Maestro ni quee yā, te cána ya rohó, achí ña.

<sup>29</sup> Te jeē ní jíni María jnūhun yáha, te yachī ni ndocuiñī ña, cuahān ña nuū yā. <sup>30</sup> Te ná tu quivī Jesús ñuu, chi ni ndōo-ni ya nuū ni jéjnahan Marta yā. <sup>31</sup> Te ñayuu hebreo un jéē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuiñī ña cuahān ña. Te ni candiquín i ña cuango i, chí cájeni ní

i jeē cuándahyū ña nde nuū yíndūji ndíyí.

<sup>32</sup> Yūcuán na te ni jinū María nuū íne Jesús, te ni jecuñí yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

<sup>33</sup> Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i. <sup>34</sup> Te ni cajnúhun yā ña:

¿Nde mí ní cachíndūji ró de?

Te ni cacahān ña jíin yā:

Quihín yō te cuni ní, áchí ña.

<sup>35</sup> Te ni ndahyū Jesús. <sup>36</sup> Yūcuán na te ni cacahān ñayuu hebreo un:

Condēhe náa yōhyo maní de jíin ndíyí ún.

<sup>37</sup> Te sava i chi ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuū? áchí i.

*Jeē ní natecu Lázaro*

<sup>38</sup> Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñin yaū cava cúu, te yuyáú un ndíhyú ñin yuū. <sup>39</sup> Te ni cahān yā:

Tejiyo yuū un jíjnáhan ró, áchí yā.

Te Marta, cuāha ndíyí un, ní cahān ña:

Je jéén xicō de, chi je ni cuu cuūn quiví yíndūji de.

<sup>40</sup> Te ni cahān Jesús jíin ña:

¿A násúú je ni cahān rí jíin ró jeē núu candíje ró te coto ró jéē yōhyo cújéhnu Yaā Dios jíin poder yā? áchí yā.

<sup>41</sup> Yūcuán na te ni catejiyo i yuū jeē ndési yuyáú ndíyí ún. Te ni ndacoto-ni Jesús ichí ándiví, te ni cahān yā:

Tátā, na cútahū na núu ní jéē sáha ní jéē jicán na. <sup>42</sup> Te jíin na jéē niní sáha ní jéē jicán na. Te jeē váha ñayuu cáhīin yáha cúu jeē súcuan cáhán na, návāha na cándíje i jeē maá ní ni tají sáña.

<sup>43</sup> Te ná ni cahān yā súcuan, te ni cahān jee ya:

Lázaro, quenda quiji ró, áchí yā.

<sup>44</sup> Te ni quenda-ni tēe ni jihí ún, te ñúsúcún ndaha de sīhīn de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yā. Te ni canandají i.

*Jeē ní casqujínáhan de jnūhun jeē cáhni de Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Yūcuán na te cuehē ñayuu hebreo jeē ní quiijicoo nuū María, ni cacandíje i Jesús, chi ni cajito i jniñu ní sáha ya. <sup>46</sup> Te sava i chi cuangoo i nuū tēe grupo fariseo, te ni cacastühún i ndese ní sáha Jesús. <sup>47</sup> Yūcuán na te tēe fariseo un jíin sūtū cácujuhnu ni candutútú de junta jíin táca gá tēe cácujuhnu. Te ni cacahān de:

¿Nde se sáha yó? Chi tēe ún yōhyo cuehē jniñu jéhnu sáha de. <sup>48</sup> Te núu condéhé-ni yó, te ndivii ñayuu candíje i de. Te quiijicoo táca tēe nación Roma jeē cácujuhnu, te canu de templo cáhnu yó, te scuíté núu de ñayuu nación yō, áchí de jíjnáhan de.

<sup>49</sup> Te ñin jnáhan de jeē naní Caifás, jeē cúu maá sūtū cujuhnu ga cuiyā ún, ni cahān de:

Róhó chi tu cájini cuiñi rō, <sup>50</sup> ni tu cájecūhun ni rō jeē váha ga jeē cúu ñin tēe jehē ñayuu nación yō vésú jeē náa ndivii i, áchí de.

<sup>51</sup> Te tu ní cáhán de jnūhun yáha jéē jéni ni maá de. Chi siquí jeē cúu de sūtū cujuhnu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo. <sup>52</sup> Te nasūu maá ñin-ni jehē nación hebreo, chi suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíjnáhan i. <sup>53</sup> Yūcuán na te nde quiví ún te táca tēe hebreo cácujuhnu un, ní casqujínáhan de jnūhun jeē cáhni de Jesús.

<sup>54</sup> Jeē yúcuan tuá ní jíca ndijin yā nuū jnáhan ñuu yā hebreo un, chí ni quenda ya región Judea, te cuahān yā ñin ñuu nani Efraín, nuū iyó vajni ñuhun téhé. Te ni condee yā yúcuan jíin tée cáscuáha jíin yá.

<sup>55</sup> Te ni cuyajni vico pascua jeē cánasáha ñayuu hebreo. Te cuehē ñayuu tācá ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáa te quejéé vico pascua. <sup>56</sup> Te cánanducú i Jesús, te cácajnūhun jnáhan i ini templo:

¿Ndesé cájeni ní rō? ¿A quiji de vico, chí tuú? Achí i.

<sup>57</sup> Te sutū cácujuhnu jíin tée fariseo ni candacu de jniñu jeē núu ndé ñin ñayuu jini ndé nuū íne ya, te na cástūhún i, návāha jniñi de ya.

*Jeē ní chuhun María perfume jehē Jesús*

(Mt. 26.6-13; Mr. 14.3-9)

## 12

<sup>1</sup> Te cúmanī iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. <sup>2</sup> Te ni casáha i ñin vico xíni jeē yíñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. <sup>3</sup> Yūcuán na te María ni quee ña jíin nájñūhun sava litro aceite perfume jeē máni ita nardo cúu, te yōhoyo yahu ndeé. Te ni chuhun ña jehē Jesús, te ni nasíchí ña jíin ixí ña. Te ní ini vehe un ní chitú xícō perfume un. <sup>4</sup> Yūcuán na te ni cahān Judas Iscariote sēhe Simón, ñin tēe scuáha jíin yá un, te suu de cúu jeē nastúu de ya:

<sup>5</sup> ¿Najehē tu ní cúyāhu perfume yáha jéē uní ciento denario, te cuāha yó núu ñayuu ndahú núu. Achí de.

<sup>6</sup> Súcuan ni cahān de, nasūu jéē cundáhú ndije ni de ñayuu ndahú, chí sa suhva jeē cúu de tēe cuíhná. Chí máa de ndíso yijni xūhún, te

quíhin cuíhná de jeē cájequin tāca tēe ún. <sup>7</sup> Yūcuán na te ni cahān Jesús:

Ma stáhān rō ña. Chí jeē ní sáha ña yáhá cúu jeē ní sátūhva ña ruhū nde quivī jeē quíndūji rí. <sup>8</sup> Chí níni cáyūcu ñáyuu ndahú jíin ró, te ruhū chí tuá condee rí jíin ró. Achí yá.

*Jeē ní casquíjnáhan de jñūhun jeē cahni de Lázaro*

<sup>9</sup> Te cuehē ñayuu hebreo ni cajini jñūhun i jeē néne ya ñuu Betania. Te ni jinūcoo i, te nasūu máa ñin jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā. <sup>10</sup> Yūcuán na te sutū cácujuhnu ni casquíjnáhan de jñūhun jeē suni cahni de Lázaro. <sup>11</sup> Chí jeē siquí Lázaro te ni cujiyo cuehē jnáhan ñuu de hebreo nuū de, te cácandíje i Jesús.

*Jeē ní quivī Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Te inga quivī ún, te ñayuu cuehē jeē ní quecoo vico pascua un, ní cajini jñūhun i jeē véji Jesús ñuu Jerusalén. <sup>13</sup> Te ni cajehnde i ndaha ñúú, te ni quendacoo i cuajnahan i ya. Te cácana jee i:

Yōhoyo cújehnu Yaā Dios. Yōhoyo vāha Yaā cúu Yaā jeē véji jíin jniñu máa Jítoho yō Yaā Dios. Yōhoyo vāha Yaā cúu Rey nación yō Israel. Achí i.

<sup>14</sup> Te ni nihīn Jesús ñin burro, te ni jecosō yā tí, nájñūhun cáhán tutu íi:

<sup>15</sup> Ñayuu ñuu Jerusalén jeē nani ñuu Sion, ma yūhu ró jijnáhan ró.

Yáhá condēhe ró jeē véji Rey rō, te yósó yá ñin burro.

Achí tutu.

<sup>16</sup> Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jéē yosó núu tútu íi. Te nde ná ni ndujehnu Jesús jeē cuánuhun yā andiví, te sáa te ni canucūhun ni de tāca jñūhun yósó síquī yā, jíin jéē ní casáha de súcuan jíin yá.

<sup>17</sup> Te ñayuu ní cahān jīn yá ná ni cana ya xinī Lázaro nuū ní yindūji de, te ni nastecu yā de, ni canacani i jnūhun ndese ni sáha ya. <sup>18</sup> Jeē yúcuán ní quendacoo ñayuu cuehē un, ní jejnahan i ya, chí ni cajini jnūhun i jeē ni sáha ya jniñu jéhu un jéē ni steén yā poder yā. <sup>19</sup> Yūcuán na te ni cacahān maá téé fariseo:

Vijna te je ni cajito yó jéē ma cúu cuiti gā casi yō. Chí jito yó jéē ndivii cuiti ñayuu cuango i jīn de. Achí de jijnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ni quijicoo i ñuu Jerusalén vico pascua un jéē chiñuhún i Yaā Dios. <sup>21</sup> Te ni quecoo i nuū Felipe, tēe ñuu Betsaida ndañúu Galilea. Te ni cacahān i jīn de:

Tátā, cácuni ná cahān na jīn Jesús, achí i.

<sup>22</sup> Te ni jehēn Felipe, ni castūhún de nuū Andrés. Te ndindúu de cuacastūhún de nuū Jesús. <sup>23</sup> Te ni cahān Jesús jīn de:

Je ni quee quivī jeē ndujéhu Yaā ní nduu tēe. <sup>24</sup> Te jendaá cahán rī jīn ró, ñn nunī trigo núu tú ningava nuū ñuhun te quindūji, núu súcuán te quendōo máá ñn-ni. Te núu quindūji, te nacayā cuehē ndasí. Te suni súcuán cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. <sup>25</sup> Te na-ni ñayuu núu tu jéhe i jnūhun ndoho i jeē siquī ruhū, te jnahnū ndetū i. Te ñayuu jeē jéhe i jnūhun ndoho i jeē siquī ruhū ini ñayiví yáha, cotecu i ní cáni andiví. <sup>26</sup> Núu ndé ñayuu cuní i cuajniñu i nuū rī, na cóndiquīn i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chí sáha Tátá rī jeē cujéhu i.

*Jeē ni cahān Jesús jeē cuu yā*

<sup>27</sup> Te vijna te cúcuñháyá ndasí ni rī sáha jnūndóho quiiji siquī rī. ¿Te

ndese cahān rī? ¿A cáhān rī jīn Tátá rī: Jnama ní sáña nuū jnūndóho jeē quiiji siquī ná, achí rī? Ma cúu, chí jeē siquī yúcuán cúu jeē véji rī. <sup>28</sup> Tátā, steén ni jéē cujéhu ndasí ní jīn poder ni, achí yá.

Yūcuán na te ichi ándiví ní cahān ñn jnūhun:

Je ni steén rī jeē cujéhu rī, te sáha tucu rī inga jīnu, achí yá.

<sup>29</sup> Te ni cajini ñayuu cáhān yūcuán, te ni cacahān i jeē taja cáhán. Te sava ga i ni cacahān:

Ñn ndajéhé Yaā Dios ni cahān jīn yá.

<sup>30</sup> Te ni cahān Jesús jīn i:

Tu ní cáhán jnūhun yáha jéē siquī ruhū, chí sa suhva návāha cuní rō siquī jnūhun jeē ni cáhán yā jīn rī. <sup>31</sup> Vijna cúu jeē sándaā Yaā Dios siquī cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha. <sup>32</sup> Te ruhū, núu na jīnu condita caa rī cuu rī ini ñayiví, te sáha rī jeē jnāá taca ñayuu quivícoo i ndaha rī, achí yá.

<sup>33</sup> Súcuán ni cahān yā jeē steén yā ndese modo cuu yā. <sup>34</sup> Te ni cacahān ñayuu jīn yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Nde ñn cúu máá Yáa ní nduu tēe núu súcuán? Achí i.

<sup>35</sup> Yūcuán na te ni cahān Jesús:

Máá jecu na quiví condee rī jīn ró jeē cúu rī luz cundijin ini anuá rō. Núu súcuán te vijna jeē iyó gá luz rī jīn ró, te caca ró jīn, chí sanaa ni rō te cuahān rī, te nájñuhun quendōo ró núu néē. Chí ñayuu cájica nájñuhun nuū néē, tu cájini i ndé nuū cuango i. <sup>36</sup> Núu súcuán te níni ndéé gá rī jīn ró, te candije ró ruhū jeē cúu rī luz, návāha nduu ró ñayuu cájica jīn luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ní stéén yā maá yá nuū i.

*Jeē tu ní cácanđije ñayuu hebreo jeē cúu ya Cristo*

<sup>37</sup> Te vésú cuehē jniñu jéhu ni sáha Jesús jeē steén yā poder yā nuū i, te tu ní cácanđije i ya. <sup>38</sup> Chi squícu nahín jnūhun ni cahān Isaías, tēe ni nacani jnūhun Yaā Dios nde jenahán:

Tátá Yaā Dios, tu ní cácanđije ñayuu jnūhun ni canacani ná, te tu ní cácanđije i jniñu jéhu jeē ní stéén ní poder ní nuū i.

Achí Isaías. <sup>39</sup> Jeē yúcuan tu ní cúu candíje i, chi ní cahān tucu Isaías:

<sup>40</sup> Ní sáha ya jeē nájñūhun cáhīyo cuáá ánuá i,

jíin jéē cácanñhi ní i,

návāha coo nájñūhun jeē tu cájito i,

te ní ma jécūhun ní i,

ní ma násāma ini i quívicoo i nuū rī, jeē nasāvāha rī anuá i nuū cuéchi i.

Achí Cristo, achí tutu. <sup>41</sup> Jnūhun yáha ní cahān Isaías, chi je ní jito ndese yóhyo cújéhu Jesús, te ní cahān de ndese coo quívi jeē quíji ya.

<sup>42</sup> Te vésú súcuan te cuehē ñayuu hebreo chi ní cacandíje i ya, te suni nde jíin sava tēe cándacu jniñu. Te tu ní cácanđije de jeē cácanđije de ya, chi siquī jeē cáyūhú de tāca tēe fariseo. Chi núu súcuan te quenehen ún de ini vehe i sinagoga jeē ma cuáha ga jnūhun quívicoo de. <sup>43</sup> Chi cácusī gā ní de jeē cujéhu de sáha ñayuu, vésú jeē cujéhu de sáha Yaā Dios.

*Jnūhun cáhán Jesús cúu jeē sándaā siquī ñáyuu*

<sup>44</sup> Te ní cahān jee Jesús:

Ñayuu cácanđije ruhū, nasūu máñūhún-ni ruhū cácanđije i, chi suni cácanđije i nde maá Tátá rī, Yaā ní tají ruhū. <sup>45</sup> Te ñayuu cájito nuū rī, suni cájito i nuū Yaā ní tají ruhū.

<sup>46</sup> Máá rí jeē cúu rí luz cúndijin ini anuá ñayuu, ní quiji rí ini ñayívi

návāha tāca ñáyuu cácanđije ruhū, ma cáca i nájñūhun nuū néē. <sup>47</sup> Te núu iin ñayuu jíni sóho i jnūhun cáhán rī, te núu tu jétáhú i, te nasūu ruhū sándaā siquī i. Chi tú vēji rí jeē ndénehen rí cuéchi siquī ñayuu ñayívi, chi sa suhva jeē jnáma rí i. <sup>48</sup> Te ñayuu jeē casquéhichí i ruhū te tu cájetáhú i jnūhun cáhán rī, íyó iin jeē sándaā siquī i. Suu tāca jnūhun jeē ní cahān rī, jnūhun un cúu jeē ndenehen cuéchi siquī i quívi jínu ñayívi. <sup>49</sup> Chi tu cáhán rī jeē cúu ní maá rí, chi Tátá rī, Yaā ní tají ruhū, máá yá ní ndacu jniñu nuū rī ndese cahān rí jíin ndese steén rī. <sup>50</sup> Te jíni rí jeē jniñu ndacu Tátá rí sáha jeē cótecu ñayuu ní cáni. Núu súcuan te jnūhun cáhán rī, chi máni jnūhun jeē ní cachi Tátá rí cúu, áchí yá.

*Jeē ní nacate ya jehē tēe cáscuáha*

### 13

<sup>1</sup> Te jehíni inga quívi te quejéé vico pascua. Te je jíni Jesús jeē ní quee quívi jeē quénda ya ñayívi yáha quínuhun yā nuū Tátá yā. Te níni cúndáhú ní yā ñayuu maá yá jeē cáyúcú ini ñayívi. Te vijna jeē jínu jeē íne ya ñayívi, te sáha ya iin jniñu jeē steén cají yá jeē cundáhú ní yā i.

<sup>2</sup> Te jexeén je ní squívi ini anuá Judas Iscariote sēhe Simón, jeē vjna nastúu de ya. <sup>3</sup> Te jíni Jesús jeē véji ya nuū Yaā Dios, te nuhūn yā nuū Yaā Dios, jíin jéē ní sáha Tátá yā jeē cujéhu ya siquī ndíhi-ni. <sup>4</sup> Te cúxíni ya jíin tēe cáscuáha jíin yá, te ní ndocuíñi yā. Te ní stáa ya sahma ndíi ya, te ní jihni yā iin toalla chíji ya. <sup>5</sup> Te ní chuhun ya ndute ini iin tijeñē. Te ní quejéé yá nacate ya jehē tēe cáscuáha. Te násíchí yā jíin toalla jeē nuhní chíji ya.

<sup>6</sup> Te ní jinū yā nuū Simón Pedro. Te ní cahān Pedro jíin yá:

¿Sa máá ní nacate jehē ná naún?

<sup>7</sup> Te ní cahān Jesús:

Tu jécūhun ní rō jeē sáha rí vijna, te cúcuéé gá te jecūhun ní rō.



8 Te ni cahān Pedro jiín yá:  
Ma nácate cuiiti ni jéhē ná.  
Te ni cahān Jesús:  
Núu tú nacate ri jehē rō, te ma  
cúu cundúú ró jiín rí.

9 Te ni cahān Simón Pedro:  
Núu súcuan cúu te nasūu máá  
jéhē-ni ná, chi suni nacate ní ndaha  
ná jiín xíní ná, áchí de.

10 Te ni cahān Jesús jiín de:  
Tēe jeē sa ní jichi, tu jini ñúhún  
ndundoo ní cáhnu de, chi máá  
jéhē-ni de, chi je iyó ndoo ní cáhnu  
de. Te máá ró chi je ni candundoo  
ró. Te tú ndihí ró cáhíyo ndoo.

11 Chi je jíní yā ndé ñn de cúu jeē  
nastúu de ya, te jeē yúcuan ní cahān  
yā: Tú ndihí ró cáhíyo ndoo.

12 Te nuū ni jínu ni nacate ya jehē  
de jijnáhan de, te ni naquihin ya  
sahma ndíi ya, te ni nucōo tucu ya  
nuū mesa. Te ni cahān yā:

¿A cájecūhun ni rō na vé cuní  
cahān jeē ni sáha ri jiín ró?

13 Cácahān rō jeē Maestro jiín Jítóho  
ró cúu ri, te ndaā cácahān rō, chi  
suu ndije cúu rí. 14 Núu súcuan te  
vēsú Maestro rō jiín Jítóho rō cúu  
ri, te ni nacate ri jehē rō jijnáhan  
ró, te suni súcuan cánuú jéē nacate  
máá ró jehē jnáhan ró. 15 Chi jniñu  
yáha ni sáha ri jeē steén rī nuū rō  
jeē suni súcuan sa cuajniñu ró núu  
jnáhan ró, nájñuhun sa máá rí ni  
jejniñu ri nuū rō. 16 Jendaá cahán  
rī jiín ró jeē ñn mozo tu cújéhnú  
de nuū patrón de, te tēe jíca jniñu  
táhu nuū de, te cújéhnú de nuū tée  
ni tají de. Te máá ró cácuu mozo  
rī, te na cuajniñu ró núu jnáhan ró  
nájñuhun ni steén rī nuū rō. 17 Te  
núu ni cajecūhun ni rō jñuhun yáha,  
te yōhýo ndetū rō te núu squícu ró.

18 Te nasūu jéē cahán rī jeē ndihí  
ró ndétū, chi je jíní rī táca róhó jéē  
ní nacāji ri. Te cánuú squícu jñuhun  
yáha jeē cahán tutu i: Tēe yéji staā  
jiín rí, ni ndió cuiñí de siquí rī, achí  
tutu. 19 Te vijna te je cástūhun rí  
tāca jéē yáha núu rō nde ná tu coo,

návāha núu na cóo, te candije ró  
jéē maá rí cúu Yaā ní tají Yaā Dios.  
20 Jendaá cahán rī jiín ró jeē na-ni  
ñayuu jeē cuatáhu i táca jéē tají rí, te  
ruhū jetáhu i. Te ñayuu jetáhu rúhū,  
suni jétáhu i Yaā ní tají rúhū vēji ri,  
achí yá.

*Jeē ní cachi yā jeē nastúu Judas  
yā*

(Mt. 26.20-25; Mr. 14.17-21;  
Lc. 22.21-23)

21 Te ná ni cahān Jesús táca  
jnúhun yáha, te ni cucuíhyá ndasí  
ni yā. Te ni cahān cají yá:

Jendaá cahán rī jiín ró jijnáhan ró  
jéē ñn máá ró nastúu ruhū, achí yá.

22 Yūcuán na te tēe cáscuáha jiín  
yá, ni candacoto de nuū jnáhan de,  
cájeni ni de ndé ñn de cúu jeē ni  
cahān yā. 23 Te ñn máá tée scuáha  
jeē maní gā yā jiín, néne de xiin ya  
mesa jeē cácuixíni de jiín yá. 24 Te ni  
sáha Simón Pedro seña nuū de jeē  
na cájnūhún de ya ndé ñn de cúu jeē  
ni cahān yā. 25 Yūcuán na te tēe un  
ní scáyí de máá de nuū Jesús, te ni  
cajnūhún de ya:

¿Ndé ñn de cúu? áchí de jiín yá.

26 Te ni cahān Jesús:

Na chundaji ri staā te cuāha ri nuū  
ñn de, te suu tēe un cúu, áchí yá.

Te ni chundaji ya staā, te ni jēhe  
ya nuū Judas Iscariote séhe Simón.

27 Te jeē ní quihin de staā ún, te  
ni quívi-ni Satanás ini anuá de.  
Yūcuán na te ni cahān Jesús jiín de:

Jniñu jeē sáha ró, na sáha yachí  
rō.

28 Te ni ñn tēe cáyeji staā jiín yá,  
tu ní cájecūhun ni de naun ni cahān  
yā súcuan jiín de. 29 Chi sava de  
cájeni ni de jeē ni cahān Jesús jiín  
Judas jeē cuáan de jeē jini ñúhún yá  
vico ún, chí jéē cuáha de jecu xūhun  
núu ñayuu ndahú. Chi máá de ndíso  
yijni xūhún. 30 Te jeē ní yeji de staā  
ún, te ni quenda-ni de cuahān de.  
Te je ni cuaa.

*Jeē ní ndacu ya jniñu jéē*

<sup>31</sup> Yūcuán na te jeē cuahán Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnu rī, te suni jíin rúhū te cuni ñayuu ndese cújéhnu Yaā Dios. <sup>32</sup> Te núu jíin rúhū cuni ñayuu ndese cújéhnu Yaā Dios, núu súcuan te suni stéén Yaā Dios ndese cújéhnu ruhū jeē cúu rī Sēhe ya. Te yachī-ni stéén yā. <sup>33</sup> Séhē, tuá nahán condee rī jíin ró jijnáhan ró. Te nanducú ró ruhū, te nájñuhun ni cahān rī jíin táca jnáhan yó hebreo, suni súcuan cáhán rī jíin ró vijna, jeē ma cúu jinūcoo ró núu quihín rī. <sup>34</sup> Te vijna te ndácu rī ñn jniñu jéé núu rō, jeē na cúndáhú ni rō jnáhan ró. Nájñuhun cúndáhú ni rī rohó, suni súcuan na cúndáhú ni rō jnáhan ró. <sup>35</sup> Te núu cúndáhú ni rō jnáhan ró, súcuan te cuni táca ñáyuu jeē cácuu ró téé cáscuáha jíin rī, achí yá.

*Jeē ní cachi yā jeē yūhu Pedro cahān de jeē jini de ya*

(Mt. 26.31-35; Mr. 14.27-31; Lc. 22.31-34)

<sup>36</sup> Te ni cahān Simón Pedro jíin yá:

¿Nde núu quihín ni núu súcuan?

Te ni cahān Jesús:

Nuū quihín rī chi ma cúu condiquín rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquín na nínin vijna? Tu yúhú ná cuu na jéé siquí ni.

<sup>38</sup> Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jíin ró jeē nde ná tu cana líhli, te unī jínu yūhu ró te cahān rō jeē tu jíin rō ruhū. Achí yá.

*Jesús cúu ichi jeē jinú yō nuū Tatá yā*

Ma cucuíhyá ni rō siquí táca jnúndóho. Na cándíje ró jéé sáha Yaā Dios jehē rō, te suni na cándíje ró jéé sáha rī jehē rō. <sup>2</sup> Chi nuū ndeé Tatá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rī nuū rō nuū. Núu súcuan te quihín rī quisátūhva rī nuū cóyūcu ró. <sup>3</sup> Te jeē quihín rī sātūhva rī nuū cóyūcu ró, te ndiji rī quinaquihín rī rohó quihín yō, návaha suni coyūcu ró nuū cóndee maá rí. <sup>4</sup> Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup> Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jínú yūcuu núu súcuan?

<sup>6</sup> Te ni cahān Jesús jíin de:

Máá rí cúu ichi jinū rō andiví, te máá rí cúu jnūhun ndaā jíin jnúhun cotecu rō ní cáni. Te ni ñn ma jinú nuū Tatá rī te núu tú ruhū. <sup>7</sup> Te núu je ni cajini rō ruhū, te suni je ni cajini rō Tatá rī nuū súcuan. Te ndé vijna je cájini rō yá, chi je ni cajito ró núu rī, achí yá.

<sup>8</sup> Te ni cahān Felipe jíin yá:

Stéén ni Tatá ni núu ná, te na cúvaha ni na jijnáhan ná, achí de.

<sup>9</sup> Te ni cahān Jesús:

Felipe, je ni cuu cuehē quiví jíca rī jíin ró jijnáhan ró, ¿te á ná tu cuni rō ndé ñn cúu rī naún? Tēe jeē jito ruhū, suu Tatá rī jito de. Núu súcuan ¿te najehē cahán rō jeē steén rī Tatá rī nuū rō? <sup>10</sup> ¿A tu cándíje ró jéé ñn-ni cúu rī jíin Tatá rī, te Tatá rī ñn-ni cúu ya jíin rí? Táca jnúhun cáhán rī jíin ró, nasūu jnúhun máá rí cúu. Chi Tatá rī jeē ñn-ni cúu ya jíin rí, máá yá sáha táca jniñu jeē sáha rī. <sup>11</sup> Candíje ró jijnáhan ró jéé ñn-ni cúu rī jíin máá Tatá rī, te Tatá rī ñn-ni cúu ya jíin rí. Te núu tu cájecūhun ni rō, te candíje ró rúhū siquí táca jniñu sáha rī. <sup>12</sup> Jendaá cahán rī jíin ró, núu ndé ñáyuu candíje ruhū, jniñu jéhu jeē sáha rī yáha, suni sáha i. Te

## 14

<sup>1</sup> Te ni cahān gá yá:

jéhnū ga jniñu sáha i vēsú yāhá, chi quínuhun rī nuū ndeé Tātá rī. <sup>13</sup> Te tācá na-ni vé cacán rō nuū Tātá rī siquī jeē cácañdije rō jée cúu rī Sēhe ya, te sáha ri jeē cacán rō, te súcuan stéén rī jeē yóhō cújéhnū Tātá rī. <sup>14</sup> Chi tācá na-ni vé cacán rō siquī jeē cácañdije rō rúhū, te sáha nahún rī.

*Jeē ni jéjnūhun ya jeē tají yá Espíritu Santo*

<sup>15</sup> Te núu manī rō jíin rí jijnáhan rō, te na squícu rō jniñu ndácu rī nuū rō. <sup>16</sup> Te cacán tahu rī nuū Tātá rī, te tají yá inga Yaā chindéé ñáhán rōhó, te sáha ya jeē cóo sīi ni rō jijnáhan rō. Te Yaā un cúu máá Espíritu jeē steén jnūhun ndaā, te condee yā jíin rō ñí cáni. <sup>17</sup> Te ñayuu ñayīví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máá rō chi je cájini rō ndese Yaā cúu ya, chi ndeé yá jíin rō, te condee yā ini anuá rō ñí cáni. <sup>18</sup> Ma stóo uun rī rohó, chi ndiji rī nuū rō. <sup>19</sup> Jecu na quivī te ma cóto ga ñayuu ñayīví núu rī. Te máá rō jijnáhan rō chi coto rō núu rī, chi cotecu rī ñí cáni, te jeē yúcuan suni cotecu máá rō. <sup>20</sup> Te quivī ún te cuni rō jeē ñn-ni cúu rī jíin Tātá rī, te máá rō ñn-ni cúu rō jíin rí jeē ndeé rí ini anuá rō jijnáhan rō. <sup>21</sup> Te na-ni ñayuu núu ñūhun ni i jniñu ní ndacu rī, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo manī Tātá rī jíin i. Te suni ruhū coo manī rī jíin i, te stéén rī nuū i jeē nduú rí jíin i. Achí yá.

<sup>22</sup> Te ni cahān Judas jíin yá (te nasūu tée cúu Iscariote):

Najehē cúu jeē steén ni máá ní nuū ná, te nuū ñayuu ñayīví chi tuú?

<sup>23</sup> Te ni cahān Jesús:

Ñayuu jeē maní jíin rí, chi cásquícu i jeē cahān rī. Te coo maní Tātá rī jíin i. Te Tātá rī jíin máá rí quijicoo rī cundúú rí jíin i. <sup>24</sup> Te ñayuu jeē tú maní jíin rí, tu cásquícu i jeē cahān

rī. Te jnūhun cájini sōho rō cáhān rī, nasūu jnūhun máá rí cúu, chi jnūhun máá Tātá rī jeē ní tají rúhū cúu.

<sup>25</sup> Tāca jnūhun yáha cáhān rī jíin rō níni íne ga rī jíin rō. <sup>26</sup> Te Tātá rī chi tají yá Espíritu Santo, quiji nucuiñī nuū rī. Te máá yá chindéé ñáhán yá rohó, te sáha ya jeē cóo sīi ni rō. Te stéén yā tāca jnūhun nuū rō, te nacachi tucu ya tāca jéē ni cáhān rī jíin rō.

<sup>27</sup> Te jeē quihín rī, te sáha ri jeē cóo ndeyí coo sīi ni rō. Nájñūhun íyó ndeyí sīi ni máá rí, suni súcuan coo ndeyí sīi ni rō sáha rī. Te jeē sáha ri jeē cóo ndeyí sīi ni rō, tu quíjnáhan jíin jnūhun ndeyí cácahān ñayuu ñayīví. Ma cucuíhyá ni rō siquī tāca jnúndóho, te ni ma yūhu rō. <sup>28</sup> Je ni cajini sōho rō jéē ni cáhān rī jeē quihín rī, te ndiji rī cundúú rí jíin rō. Te núu cáhiyo manī vāha rō jíin rí, te cusīi ni rō jeē ni cáhān rī jeē nuhún rī nuū Tātá rī. Chi cújéhnū ga Tātá rī vijna vēsú ruhū. <sup>29</sup> Je ni castūhun rī nuū rō tāca jnūhun yáha nde ná tu coo, návāha núu je ni cuu, te candíje rō rúhū jijnáhan rō.

<sup>30</sup> Ma cahān rī cuehē gā jnūhun jíin rō, chi je vēji jexeén jeē ndácu jniñu ini ñayīví yáha. Te tú na vé cúu sáha siquī rī nuū. <sup>31</sup> Te na cóo nájñūhun ni ndacu Tātá rī jniñu nuū rī, návāha cuni ñayuu ñayīví jéē maní rī jíin Tātá rī, te sáha ri jniñu ní ndacu ya. Ndocuiñī jijnáhan rō na quíngoo yó. Achí yá.

*Jesús cúu nájñūhun yoyúcu uva*

## 15

<sup>1</sup> Máá rí cúu nájñūhun yoyúcu uva vāha ndaā, te Tātá rī cúu nájñūhun tēe ndíto yoyúcu uva un.

<sup>2</sup> Te máá rō chi cácuu rō nájñūhun ndaha, te núu tu jéhe rō ndéhē te quende yā rohó. Te núu cácuu rō nájñūhun ndaha jeē jéhe ndehē, te nasándooy ya nacahnde yā rohó nájñūhun jeē cúu rō ndaha ún,

návāha cuāha ró cuéhē gā ndehē.  
 3 Te máá ró chi je ni candundoo ánuá rō jíin jnúhun ni steén rī nuū rō, nájñūhun ndúndoo ndaha uva.  
 4 Na cúndúú ró jíin rī, te suni máá rī cundúú rī jíin rō. ñn ndaha uva ma cúu cuāha ndehē jeē maá, te núu tu yíjnī jicā yóho. Te suni súcuan máá ró, ma cúu sáha ró jniñu váha te núu tu cúndúú ró jíin rī.

5 'Máá rī cúu yoyúcu un, te máá ró cácuu ndaha rī. Ñayuu jeē nduú jíin rī, te ruhū ndúú rī jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rī, te tú cuiti na jniñu váha cuu sáha ró.  
 6 Ñayuu jeē tu cúndúú jíin rī, quende yā i nájñūhun ñn ndaha uva, te ichī. Te ndoho i nájñūhun ndaha uva un jeē ndutútú te cayū nuū ñuhún.

7 'Núu ndúú ró jíin rī, te cáñuhun ni rō jñūhun cáhān rī, yūcuán na te cacān rō na-ni vé cácuu rō, te sáha rī jeē cácahān rō.  
 8 Te núu cásáha ró cuéhē jniñu váha, súcuan cástéén rō jeē cúu ndije ró ñáyuu cascuáha jíin rī, te súcuan nácuni ñayuu jeē yóhoyo cújéhnú Tátá rī.  
 9 Nájñūhun manī Tátá rī jíin rī, suni súcuan manī rī jíin ró jijnáhan ró. Núu súcuan te ma siaá rō jñūhun manī rī jíin ró.  
 10 Núu squícu ró jniñu ní ndacu rī nuū rō, te níni coo manī rī jíin ró, nájñūhun máá rī squícu rī jniñu ní ndacu Tátá rī nuū rī, te níni íyó mánī yā jíin rī.

11 'Súcuan ni cahān rī jíin ró návāha coo sīñ ni rō nájñūhun íyó sīñ ni rī, chi nde cusīñ teyí ni rō.  
 12 Te yāha cúu jniñu ndácu rī nuū rō jijnáhan ró: jeē na cúndáhú ni rō jnáhan ró nájñūhun cúndáhú ni rī rohó.  
 13 Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de.  
 14 Te máá ró cácuu amigo rī núu squícu ró jniñu ndácu rī nuū rō.  
 15 Ma cahān gā rī mozo jíin ró, chi ñn mozo tu cástühún patrón nuū i ndese jéni ni de sáha de. Chi sa suhva amigo cahān rī jíin ró, chi je

ni castūhun rī nuū rō táca jnúhun ni cahān Tátá rī jíin rī.  
 16 Máá rī ni nacāji rohó jéē jnáma rī rohó, te nasūu máá ró ni cánacani ni xihna gā jeē cóndiquín rō ruhū. Te ni jeni rī rohó jéē caca ndaā rō te scándlje ró cuéhē ñayuu jeē cuu i sēhe rī níí cáni. Te súcuan te ndihí jeē cacán rō nuū Tátá rī siquí jeē cácuandje ró ruhū, sáha ya jeē jicán rō.  
 17 Te yāha cúu jniñu ndácu rī nuū rō: jeē na cúndáhú ni rō jnáhan ró.

*Jeē cáquitī ni ñayuu ñayīvi núu Jesús jíin núu ñáyuu cácuandje*

18 'Te núu cáquitī ni ñayuu ñayīvi núu rō jijnáhan ró, te je cájini rō jeē xihna gā nuū maá rī ni caquitī ni i.  
 19 Te núu jeē iyó gá rō jíin modo ñayuu ñayīví, te coo manī ñayuu ñayīvi jíin ró nuú, nájñūhun manī i jíin jnáhan i. Te ni nacāji rī rohó jéē tuá coo ró jíin modo ñayuu ñayīví. Te jeē yúcuu cáquitī ni i nuū rō, chi tuá cácuu ró cuenta ñayīví.  
 20 Nucūhun ni rō jñūhun ni cahān rī jíin ró: Núu tu íyó yíñúhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rohó jéē cácuu ró mozo rī. Te núu jeē ní cájetáhú i jñūhun ni steén rī, te suni cuatáhú i jñūhun cástéén rō.  
 21 Te táca jniñu yāha sáha i jíin ró jeē siquí ruhū, chi tu cájini i Yāā ní tají ruhū vēji rī.

22 'Núu jeē tu ní quíji rī nacani rī jñūhun nuū i, te ma cóo cuēchi i núu. Te vijna chi ma cúu ga cahān i jeē tu jíní i jeē iyó cuēchi i.  
 23 Ñayuu jeē cáquitī ni nuū rī, suni nuū Tátá rī cáquitī ni i.  
 24 Núu jeē tu ní sáha rī jniñu jéhnú nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tátá rī.  
 25 Te súcuan cásáha i návāha squícu jñūhun yósó núu tútu ley Yāā Díos jeē cánevāha i: Ní caquitī ni i nuū rī, vēsú tú na cuēchi rī, achí.

26 'Te taji rí maá Yaā chindéé ñáhán róhó te sáha ya jeé cóo sī ni rō. Te Yaā un cúu máá Espíritu jeé steén jnūhun ndaā, te quiji ya nde nuū Tatá rī, te nacaní cájī yá jnūhun rī. 27 Te suni máá ró nacani ró jnūhun rī, chí je cáhīn ro jíin rí nde ná ni quejéé rí nácani rí jnūhun.

## 16

1 'Tāca jnūhun yáha ní cahān rī jíin ró návāha ma náyūhu ró jeé quíji jnūndóho. 2 Chi quenehen i róhó jéé ma cuáha ga i jnūhun cone ró táca vehe i sinagoga. Te quee quivī jeé cahni i róhó, te cani ni i jeé in jniñu yáha ni sáha i nuū Yaā Dios. 3 Te súcuan sáha i jíin ró, chí tu cájini cuiti i máá Tátá rī ni máá rí. 4 Te ni cahān rī jnūhun yáha jíin ró návāha núu je ni quee quivī jeé súcuan coo, te nucūhun ni rō jeé jé ni cahān rī jíin ró.

### *Jniñu sáha Espíritu Santo*

'Te tu ní cahān rī jnūhun yáha jíin ró nde xīhna ñūhún, chí íne máá rí jíin ró jijnáhan ró. 5 Te vijna chí nuhūn rī condee rī jíin Yaā ní taji rúhū vēji rī. Te ni in ró tu cájnūhun ró ndé nuū quihín rī. 6 Chi máá jéé cácuuhyá ndasí ni rō jeé ni cahān rī súcuan jíin ró. 7 Jendaá cahān rī jíin ró: Jeé yáha máá ró jijnáhan ró cúu jeé quihín rī. Chí núu tú quihín rī, te ma quíji Yaā chindéé ñáhán róhó te sáha ya jeé cóo sī ni rō. Te núu cuahān rī, te taji rí yā quiji ya nuū rō. 8 Te jeé quee yā, te stéén yā nuū ñayuu ñayivī jéé iyó cuéchi i, jíin ndese quivīcoo i ichi ndaā, jíin jéé sándaā Yaā Dios siquī cuéchi i. 9 Stéén yā jeé iyó cuéchi i, chí tu cácandíje i ruhū. 10 Te stéén yā siquī ichi ndaā, chí máá rí nuhūn rī nuū Tatá rī, te ma cóto ga rō nuū rī. 11 Te stéén yā siquī jeé sándaā Yaā Dios cuéchi ñayuu, chí je ni cundaā jeé jnahnú ndetú máá jéxeén jeé cujéhnu ini ñayivī yáha.

12 'Te iyó cuéhē gā jnūhun cúni rī cahān rī jíin ró, te ma cúu jecūhun ni rō vijna. 13 Te jeé quee máá Espíritu jeé steén jnūhun ndaā, te máá yá steén táca jnūhun ndaā un núu rō. Chí ma cahān yā jeé máá yá, chí cahān yā táca jéé jini sōho ya cahān Yaā Dios. Te stéén yā siquī táca jniñu jeé coo. 14 Te stéén yā jeé cujéhnu rī, chí nacastūhun yá nuū rō táca jnūhun jeé jé ni cahān rī, te sáha ya jeé jécūhun ni rō. 15 Ndihi ndese cújéhnu Tátá rī, suni súcuan cújéhnu máá rí. Jeé yúcuan ní cahān rī jeé Espíritu Santo nacastūhun yá nuū rō táca jnūhun jeé jé ni cahān rī, te sáha ya jeé jécūhun ni rō jijnáhan ró.

*Vēsú cácuuhyá ni rō, te ndusī ni rō*

16 'Jecu na te ma cóto ga rō nuū rī. Te jecu tucu quivī te coto tucu ró núu rī, chí quinuhun rī nuū ndeé Tátá rī. Achí yá.

17 Yūcuán na te sava tēe cáscuáha jíin yá, ni cacajnūhun jnáhan de:

¿Na jnūhun cúu jeé yáha jeé cahān yá jíin yó? Chí achí yá jeé jecu na te ma cóto ga yō nuū yā, te jecu tucu quivī te coto tucu yó núu yā, chí siquī jeé quínuhun yā nuū ndeé Tátá yā. 18 ¿Na jnūhun cúu jeé yáha jeé cahān yā, jecu na? Tu cájecūhun ni yō na vé cúu jeé cahān yā. Achí de.

19 Te ni jini Jesús jeé cácuu de cajnūhún de ya. Te ni cahān yā jíin de:

¿A cácajnūhun jnáhan ró na vé cúu jeé ni cahān rī jíin ró jeé jecu na te ma cóto ga rō nuū rī, te jecu tucu quivī te coto tucu ró núu rī? 20 Jendaá cahān rī jíin ró jeé ndahyū rō jijnáhan ró te cucuhyá ni rō, te ñayuu ñayivī chí sa cusī ni i. Te vēsú cucuhyá ni rō, te sa ndusī ni rō jeé cóto tucu ró núu rī. 21 In ñahan núu cuacuyajni scácu ña, te jéhnde chíji ña, chí je ni quee ña sōho jeé scácu ña. Te núu je ni scácu ña sūchi lúlú, te tuá nahán ña jeé ní ndoho ña, chí cúsi ni ña jeé ní cacu sēhe ña. 22 Te suni

súcuan cúu jeē cándoho ró vijna, chi cácuclíhá ní rō jíin rí. Te jecu-ni quiví te coto jnáhan tucu yó, te cusí ndasí ní rō. Te ni in ma cúu casi jeē cúsi ní rō.

<sup>23</sup> Te quiví ún chi tú na vé cacān gā rō nuū rī. Chi jendaá cahán rī jíin ró jeē nuū maá Tátá rī cacān rō, te sáha ya ndíhi jeē cájicān rō, siquí jeē cácandíje ró rúhū. <sup>24</sup> Nde vijna te ná tu cacān rō nuū Tátá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusí ndasí ní rō.

*Je ni quende yā poder ndíhi jeneé cáhīyo iní ñayiví*

<sup>25</sup> Tāca jnúhun yáha ní cahān yatá rí jíin ró. Te quee quiví jeē ma cahán yatá gá rí jíin ró, chi sa suhva castúhun cájī rí nuū rō siquí Tátá rī. <sup>26</sup> Te quiví ún chi cacān rō nuū Tátá rī siquí jeē cácandíje ró rúhū. Te tu cáhán rī jíin ró jeē cacān tahú rī jehē rō nuū Tátá rī. <sup>27</sup> Chi máá Tátá rī je cúndáhú ni yā rohó siquí jeē cáhīyo manī rō jíin rí, te ni cacandíje ró jéé ndé nuū maá yá vēji rí. <sup>28</sup> Ni quenda rí nde nuū Tátá rī, te ni quee rí iní ñayiví. Te vijna te quenda rí iní ñayiví, te nuhūn tucu rí nuū Tátá rī. Achí yá.

<sup>29</sup> Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní. <sup>30</sup> Vijna te cájini na jéé jini ní ndivii cuiti, te tuá jini ñúhún jéé cájnúhún ni in ná nihín. Jeé yúcuan cácandíje ná jéé véji ní ndé nuū Yaā Dios. Achí de.

<sup>31</sup> Te ni cahān Jesús jíin de:

¿A ndé vijna te cácandíje ró naún?

<sup>32</sup> Te quiji quiví, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéé quéndōo máñúhún rí, chi Tátá rī íne ya jíin rí. <sup>33</sup> Tāca jnúhun yáha ní cahān rī jíin ró návāha coo ndeyí coo síh ní rō siquí jeē cácandíje ró rúhū. Iní ñayiví chi cánuú coto ró jnúndóho.

Te vésú súcuan te na cóo síh ní rō, chi je ni quende rī poder tāca jéneé cáhīyo iní ñayiví. Achí yá.

*Jeē ni jíicān tahú Jesús jehē ñayuu cácandíje*

## 17

<sup>1</sup> Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátá, je ni quee quiví jeē ndóho ná. Vijna te steén ni jéé cujéhu máá ná jeē cúu ná Séhe ní, návāha suni máá ná steén na jéé cujéhu máá ní. <sup>2</sup> Chi ní sáha ní jéé ndíso jniñu ná síquí tāca ñáyuu, návāha tāca ñáyuu jeē ni jéhe ní núu ná, cotecu i ní cáni sáha ná. <sup>3</sup> Te suhva cúu jnúhun cotecu i ní cáni: suu jeē na cúni i nihín jéé mañúhún-ni ní cúu Yaā ndaā, jíin jéé cúni i sáñá jeé cúu ná Jesucristo, Yaā ní tají ní.

<sup>4</sup> Je ni steén na núu ñáyuu ñayiví jéé cujéhu ní, te je sínu ná jniñu ní ndacu ní núu ná. <sup>5</sup> Te vijna, Tátá, sáha ní jéé ndujéhu tucu ná ndé nuū néne ní, nájnúhun cújéhu ná jíin ní nde ná tu jecōo ñayiví.

<sup>6</sup> Ñayuu jeē ní nacāji ní iní ñayiví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i. <sup>7</sup> Te vijna te cájini i jeé ndé nuū maá ní vēji tāca jéé iyó jíin ná. <sup>8</sup> Chi tāca jnúhun ni cahān ni jíin ná, ní castúhun ná núu i, te ni cajetáhú i. Te ni cajini i jeé ní quenda ndije ná ndé nuū maá ní, te ni cacandíje i jeé maá ní ni tají sáña.

<sup>9</sup> Te jíicān tahú na jéhe maá i jíináhán i. Tu jíicān tahú na jéhe ñáyuu ñayiví jéé tu cácandíje, chi sa jehē maá ñáyuu ni jéhe ní núu ná, chi cuenta maá ní cácuu i. <sup>10</sup> Te tācá i jeé yáhi i ndaha máá ná, suni cuenta maá ní cúu. Te tācá i jeé cúu i cuenta maá ní, suni cuenta maá ná cúu i. Te cásteén i ndese cújéhu ná.

11 "Te tuá condee ná ini ñayiví. Te máá i chi quendõo i ini ñayiví, te máá ná chi najee ná condee na jíin ní. Yaā i Yaā ndoo cúu ní, Tátā. Te jíin poder ní condito ní táca ñáyuu ni jéhe ni núu ná, návāha inuú na cóo ni i jíināhan i, nájnūhun cúu máá yó. 12 Te jeē ní condee na jíin i ini ñayiví, te jíin poder ni ní condito ná i. Táca ñáyuu ni jéhe ni núu ná, ni condito yúcún ná i. Te tu ní jéhe na jnúhun naa i jíināhan i, chi máá ñn-ni tēe jeē je cúu de tēe jnahnú ndetū, návāha squícu jnúhun yósó núu tútu i.

13 "Te vijna te najee na núu ní, te cáhán na táca jnúhun yáha jíin i níni jéē íne ga ná ini ñayiví, návāha na cóo sñ ndasí ni i nájnūhun cúsiñ ni máá ná. 14 Ni castūhun ná jnúhun ní núu i. Te ni caquití ni ñayuu ñayiví núu i, chi tuá cácuu i cuenta ñayiví, nájnūhun máá ná tu cúu ná cuenta ñayiví. 15 Te tu jíicán tahú na jéē quenehen ní i ini ñayiví, chi sa suhva jeē cóndito ní i nuū jexeén. 16 Nasūu cuenta ñayiví cácuu i, nájnūhun máá ná jéē násūu cuenta ñayiví cúu ná. 17 Jíin jnúhun ndaā ní te sáha ní jéē coo ndoo coo i i nuū ní. Táca jnúhun cáhán máá ní cúu jnúhun ndaā. 18 Te nájnūhun ni tají ní sãña ní quiji ná ini ñayiví, suni súcuan tají ná i nacani i jnúhun ní núu ñáyuu ñayiví. 19 Te jehē máá i cúu jeē jéhe ná máá ná cuu ná, návāha suni máá i coo ndoo coo i i nuū ní jéē jíin jnúhun ndaā.

20 "Te nasūu máá ñn-ni jehē ñáyuu yáha jíicán tahú na, chi suni jehē táca gá ñáyuu jeē candíje i sãña núu na cúni sóho i jnúhun jeē nacani máá i jíināhan i. 21 Te jíicán tahú na jéē inuú na cóo ni i jíināhan i. Nájnūhun ñn-ni cúu ní jíin ná, Tátā, te ñn-ni cúu ná jíin máá ní, suni súcuan na cóo inuú i jíin yó. Te cúni na jéē inuú na cóo ni i, návāha na cándíje ñayuu ñayiví jéē máá ní ni tají ní sãña. 22 Ni sajéhnu ná i nájnūhun ni sajéhnu ní sãña, návāha inuú na cóo

ni i, nájnūhun inuú-ni cúu yó. 23 Te ndúu ná jíin i, te ndúu ní jíin ná, te súcuan te inuú cuiti coo ni i jíināhan i. Yūcuán na te cuni ñayuu ñayiví jéē máá ní ní tají ní sãña, jíin jéē maní ndasí ní jíin i nájnūhun maní ni jíin ná.

24 "Tátā, máá ní ni jéhe ní i nuū ná. Te cúni na jéē cóyucú i jíin ná nuū cóndee ná, návāha coto i ndese luu cújéhnu ná ni sáha ní. Chi iyó maní ndasí ní jíin ná nde ná tu jecõo ñayiví te nde vijna. 25 Yaā ndaā cúu ní, Tátā, te ñayuu ñayiví tu jíin i níhín, te máá ná chi jíin na níhín. Te ñayuu yáha chi cájini i jeē máá ní ni tají sãña. 26 Ni steén na núu i jíināhan i ndese Yaā cúu ní. Te steén gā na súcuan nuū i, návāha na cóo maní ndasí i jíin jnāhan i, nájnūhun iyó maní ndasí ní jíin ná, te návāha condee ná ini anuá i. Achí yá.

*Jeē ní cajni de Jesús*

(Mt. 26.47-56; Mr. 14.43-50; Lc. 22.47-53)

## 18

1 Te nuū ní cuu ni cahān Jesús táca jnúhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan iyó ñn huerto nuū ní quiví ya jíin tēe cáscuáha jíin yá. 2 Te Judas, tēe jeē nastúu de ya, suni jíin de lugar un, chi cuehē jíinu ni nataca Jesús yūcuan jíin tēe cáscuáha jíin yá. 3 Te ni jinū de yūcuan jíin ñn grupo soldado jíin jecu policía cándito templo, jeē ní catajé sutū cácujeñnu jíin tēe grupo fariseo. Te cándiso de machete, te cájni de linterna jíin yiti. 4 Te Jesús je jíin yā táca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñn cámanducú ró?

5 Te ni cacahān de jíin yá:

Jesús tēe ñuu Nazaret cámanducú rí.

Te ni cahān yā:

Máá rí cúu.

Te Judas, tēe jeē nástúu de ya, suni íne de jíin tēe ún. <sup>6</sup> Te jeē súcuan ni cahān yā, máá rí cúu, te ni cajica yátá de, te ni cacotúu-ni de. <sup>7</sup> Yūcuán na te ni cajnūhún tucu ya de:

¿Ndé ñin cánanducú ró?

Te ni cacahān de:

Jesús tēe ñuu Nazaret.

<sup>8</sup> Te ni cahān Jesús:

Je ni cachi rī jeē máá rí cúu. Te núu ruhū cánanducú ró, te máá-ni rí jñií ró, te tēe yáha na quíngoo de. Achí yá.

<sup>9</sup> Súcuan ni cuu návāha na squícu jñūhun jeē ni cahān yā jíin Tátá yā: Tu ní jéhe na jñūhun naa ni ñin tēe jeē ni jéhe ni núu na, áchí yá. <sup>10</sup> Te Simón Pedro ndíso de ñin espada. Te ni tava de, te ni jehnde de sōho lado yáha ñin tēe nání Malco. Te tēe un cúu de mozo máá sūtū cujéhnū. <sup>11</sup> Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēē ndóho rí jñūndóho yáha jeē ni sándaā Tatá rī jeē ndóho rí? Achí yá.

*Jeē ní indichi Jesús nuū sutū cujéhnū*

(Mt. 26.57-58; Mr. 14.53-54; Lc. 22.54)

<sup>12</sup> Yūcuán na te tēcá soldado un, jíin capitán de, jíin táca policía tēe hebreo un, ni cajñi de Jesús, te ni cajihni de ya. <sup>13</sup> Te xīhna gā vehe Anás cuangoo de jíin yá. Te tátá chīsó Caifás cúu Anás. Te Caifás cúu máá sūtū cujéhnū ga cuiyā ún. <sup>14</sup> Te suu de ni cachi nuū jñāhan de hebreo jeē cánuú jēē cúu ñin tēe jehé nación de.

*Jeē ní cachi Pedro jeē tu jíin de ya*  
(Mt. 26.69-70; Mr. 14.66-68; Lc. 22.55-57)

<sup>15</sup> Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chí jíin jñāhan de jíin sūtū cujéhnū. Jeē yúcuán ní quiví de jíin Jesús ini patio vehe sutū cujéhnū ún. <sup>16</sup> Te Pedro ni quendōo de yatā yehyí. Te

máá tēe scuáha jēē jíin jñāhan jíin sūtū cujéhnū ún, ni quenda de ni cahān de jíin ñāhan ndító yéhyí, te ni squiví de Pedro ini patio. <sup>17</sup> Yūcuán na te ñāhan ndító yéhyí un ní cajñūhún ña Pedro:

¿A násūu ñin tēe scuáha jíin tēe índichi nuū sutū un cúu ró?

Te ni cahān de:

Nasūu cúu ri, achí de.

<sup>18</sup> Te táca mozo jíin policía un ní cascáyú de ñūhūn jíin tícāyi, chí mījin sáha. Te cáhīn de cánasaā de. Te suni índichi Pedro, násaā de jíin táca tēe ún.

*Jeē ní stichí sutū cujéhnū ún Jesús*  
(Mt. 26.59-66; Mr. 14.55-64; Lc. 22.66-71)

<sup>19</sup> Te sutū cujéhnū un ní stichí de Jesús ndé-ni cúu tēe cáscuáha jíin yá, jíin na jñūhun cúu jeē steén yā. <sup>20</sup> Te ni cahān Jesús:

Níní ní cahān rī nuū chítú ñáyuu, ni cajini sōho ndihí ñáyuu. Te níní ní steén rī jñūhun ini tēcá vehe ñi sinagoga jíin ini templo cáhnū nuū ndutútú ndivii jñāhan yó hebreo. Te tú ni ñin jñūhun ní cáhán sáhi rí. <sup>21</sup> ¿Te naun cájnūhun ró ruhū? Cajñūhun ñáyuu ní cajini sōho jñūhun ni cahān rī, te máá i cachi ndese ni cahān rī. Chí cajini i ndese ni cahān rī.

<sup>22</sup> Te jeē ni cahān Jesús súcuan, te ñin policía ndító templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū cujéhnū naún?

<sup>23</sup> Te ni cahān Jesús:

Núu ni cahān rī ñin jñūhun néé, cachi na jñūhun néé ní cahān rī. Te núu tu ní cáhán rī ñin jñūhun néé, ¿te naun cáni ró rúhū? achí yá.

<sup>24</sup> Yūcuán na te Anás, sutū cujéhnū un, ní tají de ya, núhni yā cuahān yā nuū Caifás, tēe cúu máá sūtū cujéhnū ga.



*Jeē ní cachi tucu Pedro jeē tu jíní de ya*

(Mt. 26.71-75; Mr. 14.69-72; Lc. 22.58-62)

<sup>25</sup> Te ní ní jeē súcuan cúu, te índichi-ni Pedro, násaā de yuñuhún. Te ni cacahān jín de:

¿A násūu ñn tēe scuáha jín tēe un cúu ró, chí naún?

Te máá de tu ní cáchi de:

Nasūu cúu ri, achí de.

<sup>26</sup> Yūcuán na te ñn mozo sutū cujéhu, jnáhan tēe jeē ní jehnde Pedro sōho, ni cahān jín de:

¿A násūu máá ró cúu jeē ní jito ri jín de ini huerto?

<sup>27</sup> Te Pedro tu ní cáchi tucu de. Te ni cana-ni líhli.

*Jeē ní indichi Jesús nuū Pilato*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Yūcuán na te ni quendacoo de jín Jesús vehe Caifás, cuangoo de jín yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahán jeē ma quívi i ini vehe ñn ñayuu jeē násūu hebreo cúu. Chí núu súcuan te ma cúu cuxíni i vico pascua jeē cóo inga quívi ún. <sup>29</sup> Yūcuán na te ni quenda Pilato, tēe cúu gobernador, ni cahān de jín i jínáhan i:

¿Na cuēchi cájicān rō siquī tēe yáha?

<sup>30</sup> Te ni cacahān i:

Núu jeē násūu tēe cúnéé cúu tēe yáha, te ma jnái ná de jeē quíndeca ná de nuū ni núu, achí i.

<sup>31</sup> Te ni cahān Pilato:

Cuángoo jínáhan ró, te sándaā rō siquī de jín ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéé cáhni ná ni ñn ñayuu.

<sup>32</sup> Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. <sup>33</sup> Te ni ndívi Pilato

ini palacio, te ni cana de jeē na quíji Jesús. Te ni cajnúhún de ya:

¿A máá ró cúu Rey ñayuu hebreo naún?

<sup>34</sup> Te ni cahān Jesús jín de:

¿A cájnhun ró ruhū jeē súcuan jéni ni máá ró, chí jeē ní cacastūhun ñayuu hebreo nuū rō?

<sup>35</sup> Te ni cahān Pilato:

¿Chí tēe hebreo cúu ri jeē cúni rí? Ñayuu nación máá ró jín sūtū cácujeñhu ni cachihí rōhó ndaha ri. ¿Na vé ni sáha ró núu súcuan? Achí de.

<sup>36</sup> Te ni cahān Jesús:

Nasūu jéé ndácu ri jniñu nájnhun cándacu táca rey ñayívi yáha. Chí núu jeē ñayuu ñayívi ní casáha jeē cúu ri rey, yūcuán na te tēe cándiquin ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

<sup>37</sup> Yūcuán na te ni cahān Pilato jín yá:

¿Te á ñn rey cúu ró jéé súcuan?

Te ni cahān Jesús:

Rey cúu ri, nájnhun cáhán rō. Ni quíji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhú jnūhun ndaā, cájini nahín i jnūhun cáhán rí. Achí yá.

<sup>38</sup> Te ni cahān Pilato:

¿Ndese cuni yō ndé ñn cúu máá jnūhun ndaā?

*Jeē ní cundaā jeē cúu yā*

(Mt. 27.15-31; Mr. 15.6-20; Lc. 23.13-25)

Te jeē ni cahān de jnūhun yáha, te ni quenda tucu de nuū ñayuu hebreo. Te ni cahān de jín i:

Tú cuíti na cuēchi nihín ri siquī de.

<sup>39</sup> Te íyó costumbre máá ró jínáhan ró jéé vico pascua te siaá rí ñn tēe íne vecāa nuū rō. ¿Te á tu cácu ni rō jeē siaá rí Rey rō nuū rō? Achí de.

<sup>40</sup> Yūcuán na te ndívi i ni cacana jee tucu i:

Ma siaá ni tée jíñá, chi Barrabás siaá ni, áchí i.

Te tée cuihná cúu Barrabás.

## 19

<sup>1</sup> Yūcuán na te ni cahān Pilato jeē na jnī soldado Jesús, te caní de ya jíñ cuarta ñii. <sup>2</sup> Te ni casáha de ñn corona ññu, ni cachuhun de xinī yā. Te ni cachuhun de ya ñn sahma cuehé ndíhí jéé cúu sahma rey. <sup>3</sup> Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

<sup>4</sup> Yūcuán na te ni quenda Pilato inga jínu, te ni cahān de jíñ ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

<sup>5</sup> Te ni quenda Jesús, ññhun ya corona ññu jíñ sahma cuehé ndíhí un. Te ni cahān Pilato jíñ i:

Yāhá condēhe ró de jíñáhan ró.

<sup>6</sup> Te nuū ní cajito sutū cácujeñhu jíñ táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najñi máá ró de te cahni rō de. Chi ruhū, tú na cuēchi níhín rī siquī de.

<sup>7</sup> Te ni cacahān ñayuu hebreo un: Cánevāha ná ñn ley, te jeē siquí ley un cánuú jéé cúu de, chí sáha de máá de jeē Séhe Yaā Dios cúu de.

<sup>8</sup> Te jeē ní jini sōho Pilato jññhun yáha, te víhyá gā ni yūhú de. <sup>9</sup> Te ni ndñvicoo tucu de ini palacio, te ni cajññhún de Jesús:

¿Ndé nuū véji ró?

Te tu ní cáhán cuiti Jesús jíñ de.

<sup>10</sup> Yūcuán na te ni cahān de jíñ yá:

¿Naun tu cáhán rō jeē cahān rī? ¿A tu jíñ rō jeē ndíso jñññu ri jeē cáhni rī rohó jicā cruz, te suni ndíso jñññu ri jeē siaá rī rohó quihñ rō?

<sup>11</sup> Te ni cahān Jesús:

Núu tu ní sáha Yaā Dios jeē ndíso jñññu ró, te tú na vé cúu sáha ró síquī

rī. Jeē yúcuán tée jeē ní nacuāha ruhū ndaha ró, cuēchi xeēn gā condee siquī de vésú maá ró. Achí yá.

<sup>12</sup> Yūcuán na te nde hora un ndúcú ndéyí Pilato ndese siaá de ya. Te ñayuu hebreo chí cácana jee i:

Núu siaá ní tée jíñá, te tu cúu ní amigo rey Roma jeē cujéñhu ndácu jñññu núu súcuan. Chí táca tée jeē sáha de rey maá de, núu súcuan te cúu de enemigo siquī rey un. Achí i.

<sup>13</sup> Te jeē ní jini sōho Pilato jññhun yáha, te ni ndacu de jñññu jeē na quenda Jesús ini vehe quiji ya. Te ni cucōo de silla nuū cúndaá jñññu, nuū máni máá yūu ní jecáva, te lugar un nání Gabata nuū yūhu hebreo. <sup>14</sup> Te cuacuu cahuxī uū, te jehíni quivī ún quejéé vico pascua. Te ni cahān Pilato jíñ ñayuu hebreo:

Yāha índichi máá rey rō.

<sup>15</sup> Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíñ i:

¿A jéé cata caa rī rey rō jicā cruz naññ?

Te sutū cácujeñhu un ní cacahān de:

Tuá na inga rey cánevāha ná jíñáhan ná, chí máá-ni rey Roma jeē cujéñhu ndácu jñññu nuū ná.

<sup>16</sup> Yūcuán na te Pilato ní nacuāha de ya nuū i jeē na cúu yā jicā cruz. Te ni cajññi i ya cuango o jíñ yá.

*Jeē ní cacata caa de ya jicā cruz*  
(Mt. 27.32-44; Mr. 15.21-32;  
Lc. 23.26-43)

<sup>17</sup> Te ni quenda Jesús, ndíso ya cruz yá, cuango de jíñ yá ñn lugar nuū naní Yiquí Xíní, te nuū yūhu hebreo naní Gólgota. <sup>18</sup> Te yūcuán ní cacata caa de ya jicā cruz. Te suni ní cacata caa de uū tée nuū uū gā cruz, ñn ñn de ñn lado yā, te máá Jesús mēññú. <sup>19</sup> Te suni ní ndacu Pilato jñññu jeē na cóndee jñññun

xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. <sup>20</sup> Te cuehē ñayuu hebreo ni cacahu i jñūhun yáha, chi máá yajni yuñúú cúu nuū ní cacata caa de ya. Te jñūhun un yósó jíin yuhu hebreo jíin griego jíin latín. <sup>21</sup> Te tāca sūtú cácujuhnu nuū ñáyuu hebreo, ni cacahān de jíin Pilato:

Ma tée ní jeē cúu de Rey ñayuu hebreo, chi sa suhva tee ní jeē maá de ni cahān jeē cúu de Rey ñayuu hebreo.

<sup>22</sup> Te ni cahān Pilato:

Ma násama ri jeē jé ni ndacu ri jniñu ni jecondee.

<sup>23</sup> Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chi ni cunu ní. <sup>24</sup> Te ni cacahān maá de:

Ma cáhnde yō, chi vāha ga na sáha yó sorteo, te na cóndēhe yó ndé ñin yó níhīn, achí de.

Te súcuan ni squícu jñūhun yósó núu tútu ñi nde jenahán jeē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

<sup>25</sup> Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. <sup>26</sup> Te ni jito Jesús nuū naná yā jíin núu tée scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuiñī de cuu de sēhe ní.

<sup>27</sup> Yūcuán na te ni cahān yā jíin tée scuáha ún:

Nde vijna te cuu ña nájñūhun náná rō, achí yā.

Te nde hora un ní cana de ña cuacondee ña vehe de condito de ña.

*Jeē ni jihī Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Yūcuán na te ni jini Jesús jeē jé ni jinu tācá jniñu jeē cánuú ndoho ya. Te návāha squícu jñūhun cáhán tutu ñi, te ni cahān yā:

Jíchi rī ndute, achí yā.

<sup>29</sup> Te yūcuan íin ñin tindohō ñūhun chitú vinagre iyá. Te ni cachundaji de ñin cachī nuū vinagre un, te ni catee de xinī ñin ndaha yújnu hisopo, te ni catee de yuhu ya jeē cóho ya. <sup>30</sup> Te ná ni jihī ya vinagre un, te ni cahān yā:

Je ni jīnu, achí yā.

Te ni cāyī-ni xinī yā, te ni jihī-ni ya.

*Jeē ní cují soldado lanza xiin ya*

<sup>31</sup> Te inga quivī ún coo vico pascua. Te tēe hebreo tu cácu ni de jeē cóndita caa ndāyī ún jicā cruz quivī ndétátú un. Chi quivī ndétátú jeē cúu vico pascua, ñi ndasí gá vésú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhīn tēe cándita caa, te na cújiyo de jicā cruz. <sup>32</sup> Te ni quecoo soldado, te ni cajehnū de sīhīn ñin tēe jeē ndíta caa jíin yā, te suni súcuan inga de. <sup>33</sup> Te nuū ní quecoo de nuū Jesús, te ni cajito de jeē jé ni jihī yā. Jeē yūcuan tu ní cájehnū de sīhīn ya.

<sup>34</sup> Te ñin soldado chi ni cují de lanza xiin ya, te ni cane-ni niñī jíin ndute. <sup>35</sup> Te máá rī jeē tée tutu yáha, ni jito ri jeē súcuan ni cuu, te nácani ndaā rī jñūhun ndese ni cuu. Te jíin rī jeē iyó ndaā jñūhun cáhán rī, návāha suni candíje máá ró jijnáhan ró. <sup>36</sup> Chi súcuan ni cuu návāha squícu jñūhun cáhán tutu ñi: Ma cahnú de ni ñin yiquí ya, achí. <sup>37</sup> Te suni inga jñūhun cáhán tutu ñi: ñin quivī te coto i nuū Yaā jeē ní cují i lanza, achí.

*Jeē ní quindūji Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Te ni cuu tāca jéē yáha. Te iyó ñin tēe ñuu Arimatea jeē naní José, te cúu de tēe cándíje Jesús. Te yuhu-ni

cándije de, chi yúhú de jnáhan de hebreo. Te ni cahān ndahú de jíin Pilato jeē na cuáha jnúhun quihin de yiqui cúñu Jesús. Te ni jēhe Pilato jnúhun. Yūcuán na te cuahān José, ni snúu de yiqui cúñu Jesús. <sup>39</sup> Te suni ni jinū Nicodemo, tēe ni quiji nuū Jesús ñn jecuáa. Te ndiso de nájnūhun ocō uxī kilo sūje uvuā jeē ní saca jnáhan jíin yúcū áloe. <sup>40</sup> Te ndindúú de ni caquihin de yiqui cúñu Jesús, te ni cachusúcún de jíin tira sahma jeē ni quívi yucū jeē jeén asīn ún, nájnūhun íyó costumbre maá ñáyuu hebreo jeē cáchindūji i ndīyi. <sup>41</sup> Te yajni nuū ni jihī Jesús íyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyi. <sup>42</sup> Te yūcuan ní cachindūji de Jesús, chí íne yajni yaū ndīyi ún. Chí je yajni quejéé quívi ndétátú de jeē cácuu de ñayuu hebreo, te tú na ley chindūji de ndīyi núu je ní quejéé quívi ún.

*Jeē ní natecu Jesús*  
(Mt. 28.1-10; Mr. 16.1-8;  
Lc. 24.1-12)

## 20

<sup>1</sup> Te jenéhen quívi domingo ni jinū María ñuu Magdala nuū ní yindūji Jesús, te yínee gā cúu. Te ní jito ña jeē ní cujiyo yaū ndihyú yuyáú ndīyi. <sup>2</sup> Yūcuán na te jíinu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup> Te ní quendacoo Pedro jíin inga tēe scuáha ún, cuácondēhé de yaū ndīyi. <sup>4</sup> Te cájini tayí ndindúú de. Te inga tēe scuáha ún, ñihin ga ní jinu de vēsú Pedro. Te xīhna gā de ní jinū yaū ndīyi. <sup>5</sup> Te ní scáyí de maá de, te ní jito ñihni de ini yaū. Te ní jito de jeē tira sahma un cáyūcu maá na. Te tu ní quívi

de. <sup>6</sup> Te sáa te ní jinū Simón Pedro jeē ndiquín jnáhan de vēji de jíin inga tēe ún. Te ní quívi de nuū ní yindūji Jesús. Te suni ní jito de jeē tira sahma cáyūcu maá na. <sup>7</sup> Te ní jito de sahma jeē ní ñúsúcún xínī Jesús, tu cátú jíin tira sahma, chí ní natuu te cátú sīn. <sup>8</sup> Yūcuán na te suni ní quívi inga tēe scuáha jeē ní jíinū xīhna gā nuū ní yindūji ya. Te ní jito de ndese íyó, te ní candije de jeē ní natecu yā. <sup>9</sup> Chí nde ná tu jinūcoo de yaū ndīyi, te tu ní jécūhun ní de jnúhun cáhān tutu íi, jeē jíni ñúhún natecu yā núu je ní jihī yā. <sup>10</sup> Yūcuán na te ndindúú tēe cáscuáha ún cuanungoo de vehe de.

*Jeē ní nane ya nuū María ñuu Magdala*

(Mr. 16.9-11)

<sup>11</sup> Te María índichi ña ndáhyú ña nuū ní yindūji ya. Te níni ndáhyú ña, te ní scáyí ña maá ña, ní jito ñihni ña ini yaū ún. <sup>12</sup> Te ní jito ña uū ndajéhé andívi, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ní cátu yiqui cúñu Jesús. <sup>13</sup> Te ní cacahān yā jíin ña:

¿Najehē ndahyú rō?

Te ní cahān ña:

Ni catava de Jitoho ná, te tu jíni na ndé nuū ní cachune de ya.

<sup>14</sup> Te jeē ní cáhān ña súcuan, te ní ndió cóto ña, te ní jito ña nuū Jesús jeē índichi yā yūcuán. Te tu ní nácuni ña jeē maá yá cúu. <sup>15</sup> Te ní cahān yā jíin ña:

¿Najehē ndahyú rō? ¿Ndé ñn nánducú ró? achí yá.

Te maá ña jéni ní ña jeē tēe ndíto huerto cúu ya. Te ní cahān ña jíin yá:

Núu maá ní ní quenehen ní yá, te cachi ní ndé nuū ní jéchune ní yá, te na quínuquihin ná yá, achí ña.

<sup>16</sup> Te ní cahān Jesús jíin ña:

María, achí yá.

Te jeē ni cāhān yā súcuan, te ni nacuni ña ya, te ni ndió coto ña, te ni cāhān ña jíin yuhu hebreo:

Raboni, achí ña. Te jnūhun un cúní cāhān, Maestro.

<sup>17</sup> Te ni cāhān Jesús jíin ña:

Ma quehé ró rúhū, chí ná tu ndaa ri quínuhun rī nuū Tatá rī. Te cuáhán núū tācá hermano rī, tēe ni cascuáha jíin rí, te cachi rō nuū de jeē ndaa ri quínuhun rī nuū Tatá rī, jeē suni Tátá maá ró jijnáhan ró cúu. Te cúu ya Yaā Dios maá rí jíin Yaā Dios maá ró jijnáhan ró. Achí yá.

<sup>18</sup> Yūcuán na te María ñuu Magdala un, cuáhān ña, te ni castūhūn ña nuū tēe cascuáha un jēē ní jito ña nuū maá Jítoho yō jíin jēē ni cāhān yā jnūhun yáha jíin ña.

*Jeē ní nane ya nuū tēe cascuáha jíin yá*

(Mt. 28.16-20; Mr. 16.14-18; Lc. 24.36-49)

<sup>19</sup> Te jeē ní cuaa maá quívī domingo un, te cāhīn tútu tēe cascuáha ún ini ñn vehe. Te cāndihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cāhān yā jíin de:

Ndeyí sñ coo ni rō jijnáhan ró, achí yá.

<sup>20</sup> Te ná ni cāhān yā súcuan, te ni steén yā ndaha ya jíin xiin ya nuū de. Te ni cacusiñī ni tēe cascuáha un jēē ní cajito de nuū maá Jítoho yō.

<sup>21</sup> Yūcuán na te ni cāhān tucu Jesús:

Ndeyí sñ coo ni rō jijnáhan ró. Te nájnūhun ni tájī Tátá rī ruhū ini ñayívī, suni súcuan tájī rí rohó nacani ró jnūhun rī nuū ñayuu. Achí yá.

<sup>22</sup> Yūcuán na te ni tīvī tachī yā nuū de jijnáhan de. Te ni cāhān yā:

Vijna te ni canihīn rō Espírītu Santo. <sup>23</sup> Te tāca ñayuu jeē cone cāhnu ní rō nuū cuéchi i, núu súcuan te coo jnūhun cāhnu ní nuū cuéchi i. Te núu tú cone cāhnu ní rō nuū

cuéchi i, te ma cóo jnūhun cāhnu ní nuū cuéchi i. Achí yá.

*Jeē ní nane ya nuū Tomás*

<sup>24</sup> Te Tomás, tēe ni cacu cuatí, ñn jnáhan jeē uxí uū tēe cascuáha jíin yá, tu ní íne de quívī jeē ní nane Jesús nuū tāca gá tēe cascuáha. <sup>25</sup> Yūcuán na te sava ga tēe cascuáha un, ní cacahān de jíin Tomás:

Ni cajito ri nuū maá Jítoho yō.

Te ni cāhān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune rí xinī ndáha rí nuū ní íne ndūyu cāa, te núu tú chune rí ndaha rí xiin ya, te ma candíje cuiti rī, achí de.

<sup>26</sup> Te nuū uná quívī, te tēe cascuáha un cāhīn tútu tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cāndihyū yehyí. Te ni cāhān yā jíin de:

Ndeyí sñ coo ni rō jijnáhan ró.

<sup>27</sup> Te ni cāhān-ni ya jíin Tomás:

Chune xinī ndáha ró ini ndaha ri yáhá te coto ró. Te scáá ndaha ró, te chune ró xiin rí nuū ní tújī. Te ma cáni siquí gá ni rō, chí sa suhva na cāndíje ró.

<sup>28</sup> Yūcuán na te ni cāhān Tomás jíin yá:

Aí, Jítoho maá ná jíin Yaā Dios maá ná cúu ní, achí de.

<sup>29</sup> Te ni cāhān Jesús jíin de:

Tomás, nde ní jito ró núu rī, te ni candíje ró. Te yōhyo ndetū tāca ñayuu jeē candíje ruhū vēsú tu ní jito i nuū rī, achí yá.

*Najehē ni tee Juan libro yáha*

<sup>30</sup> Te suni ni sáha Jesús cuehē gā jniñu jéhnu jeē ni stēén yā poder yā nuū tēe cascuáha jíin yá, jeē tu yósó núu tútu yáha. <sup>31</sup> Te tāca jniñu yáha ní tee rí návāha candíje ró jijnáhan ró jēē Jesús cúu Cristo, maá Séhe Yaā Dios. Chí jeē candíje ró yá, te cotecu rō ní cáni sáha ya.

*Jeē ní nane ya nuū uxá tēe cáscuáha jíin yá*

## 21

<sup>1</sup> Te ni cuu jecu quiví, te inga jínu ni nane Jesús nuū tēe cáscuáha jíin yá, jeē cáhiin de yumar Tiberias. Te suhva ni steén yā maá yá nuū de: <sup>2</sup> Cáhīin tútú Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañú Galilea, jíin ndindúú sēhe Zebedeo, jíin úū gā tēe cáscuáha. <sup>3</sup> Te ni cahān Simón Pedro jíin de jíináhan de:

Quíjnī ri chācá.

Te ni cacahān de:

Suní quingoo ri jíin ró.

Te cuangoo de, te ni quivícoo de ñin barco. Te tu ní cánihīn cuiiti de ti jecuáá yúcuān. <sup>4</sup> Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. <sup>5</sup> Yúcuān na te ni cahān yā jíin de:

Aá rō jíináhan ró, ¿á ní canihīn rō chācá caji yō?

Te ni cacahān de:

Tú cuiiti, achí de.

<sup>6</sup> Yúcuān na te ni cahān yā jíin de: Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiiti natava de, jeē ni quivícoo cuehē ndasí cháca. <sup>7</sup> Yúcuān na te tēe scuáha jeē maní gā Jesús jíin, ni cahān de jíin Pedro:

Máá Jítoho yō cúu, achí de.

Te jeē ní jini sōho Simón Pedro jeē maá Jítoho yō cúu, te ni nachuhun de sahna de, chí ni tava de jeē sájniū de. Te ni ndava-ni de nuū mar cuahān de nuū yā. <sup>8</sup> Te tāca gā tēe cáscuáha ún, vendícoo de jíin barco yundúte, cástaa de ñunu ñuhun chitú cháca. Chí tu jíicá cáhiin de jíin ñuhun íchi, chí nájnūhun ciento-ni metro cúu. <sup>9</sup> Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñin chācá chíhyó. <sup>10</sup> Te ni cahān Jesús jíin de:

Cuáquihin jecu chācá jēe sa ní cajni ró, na táu yó, achí yá.

<sup>11</sup> Te ni quiví Simón Pedro ini barco, te ni staa de ñunu, ni quee de jíin ndé nuū ñuhun íchi. Te ñuhun chitú cháca náhnu, ñin ciento uū xico uxí uní tī cúu. Te vésú ñin súcuān tī ñuhun, te tu ní táhndé ñunu. <sup>12</sup> Te ni cahān Jesús jíin de:

Nehen jíináhan ró na cási ni yō.

Te ni ñin tēe cáscuáha ún tu ní cūndeyí ni de cajnūhūn de ya núu ndé ñin cúu ya. Chí je cájini de jeē maá Jítoho yō cúu ya. <sup>13</sup> Te ni quindēhe Jesús yuñúhūn, te ni quihin ya staā ún, te ni jēhe ya nuū de, te suni súcuān chācá un.

<sup>14</sup> Yāha cúu vuelta uní jeē ní nane Jesús nuū tēe cáscuáha jíin yá, ná ni natecu yā.

*Jeē ní ndajnūhūn Jesús jíin Simón Pedro*

<sup>15</sup> Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á maní gā rō jíin rí vésú tāca gā tēe yāha?

Te ni cahān de:

Je jíiní ni jēe maní na jíin ní, achí de.

Te ni cahān yā jíin de:

Núu súcuān te steén rō jnūhun ri nuū ñáyuu cácuu nájnūhun londe ri.

<sup>16</sup> Te ni cajnūhun yá de vuelta uū: Simón sēhe Jonás, ¿á maní rō jíin rí?

Te ni cahān de jíin yá:

Je jíiní ni jēe maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuān.

<sup>17</sup> Te ni cajnūhūn tucu ya de vuelta uní:

Simón sēhe Jonás, ¿á maní rō jíin rí?

Te ni cucuíhyá ni Pedro jeē ní cajnūhun yá de vuelta uní núu maní de jíin yá. Te ni cahān de:

Máá ní jíiní ni ndihí, te jíiní ni jēe maní na jíin ní.

Te ni cahān yā:

Núu súcuān te steén rō jnūhun ri nuū ñáyuu cácuu nájnūhun lanchi ri. <sup>18</sup> Te jendaá cahán rí jíin ró

jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yá ró, te nasūu jéē cuní maá ró, chi inga ñayuu quindēca i rōhó nuū tu cuní rō quihīn rō. Te scáá rō ndindúú ndaha ró jéē cuu rō.

<sup>19</sup> Jnūhun yáha ní cahān yā jeē ni stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnū Yaa Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

*Jnūhun tēe scuáha jeē maní gā yā jín*

<sup>20</sup> Te ni ndió cóto Pedro, te ni jito de tēe scuáha jeē maní gā Jesús jín, ndíquin de vēji de yatā. Tēe un cúu jeē ní conene xiin Jesús ná ni cacuxíni de jín yá, te ni cajnūhún de ya: ¿Ndé iin de cúu jeē nastúu níhín? <sup>21</sup> Te jeē ní jito Pedro nuū téé ún, te ni cajnūhún de Jesús:

Te tēe yáha, ¿ndese coo jín de?

<sup>22</sup> Te ni cahān Jesús:

Núu cuní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

<sup>23</sup> Yūcuán na te jnūhun yáha ní jitē núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chí sa suhva ni cahān yā: Núu cuní rī jeē cótecu de nde quivī ndíji ri, ¿te naun ndíhví ni rō?

<sup>24</sup> Te tēe scuáha un jéē maní gā Jesús jín, suu cúu ruhū jeē nácani jnūhun tācá jniñu yáha, te suu ri téé tāca jnúhun yáha. Te cājini rō jijnáhan ró jéē iyó ndáa jnūhun nácani ri.

<sup>25</sup> Te suni iyó cuéhē ndasí gá jniñu ní sáha Jesús. Te núu tee yó ná iin ná iin, te ma cánda ní ñáyiví cuhun tutu jeē cóso jnūhun ún, jéni ni rī. Te ni cuu. Amén.

## JNIÑU JEHNU JEE NI CASAHA TEE APOSTOL

*Jeē ni jéjnūhun ya quiji Espiritu Santo*

<sup>1</sup> Amigo Teófilo, nuū tútu jeē ní tee ná xíhna gā ní castūhun ná nuū ní táca jniñu ní sáha Jesús, jíin táca jnúhun ní steén yā nde quiví ní que-jéé yá ní sáha ya <sup>2</sup> te nde quiví ní ndaa ya cuanuhun yā andiví. Te nde ná tu ndaa ya quihín yā, te ní sáha Espiritu Santo jeē ní ndacu ya jniñu nuū táca apóstol, tēe ní nacāji ya. <sup>3</sup> Te nuū ní jínu ní ndoho ya jeē ní jíhí yā, te uū xico quiví te tijni jínu ní steén ndijin yā maá yá nuū tée un jíjnáhan de, te súcuan ní cajini de jeē iyó ndáa jeē ní natecu yā. Te ní cahān yā jíin de siquí ndese ndácu Yaā Dios jniñu.

<sup>4</sup> Te ná cáhiin tútu de jíin yá, te ní cahān yā jíin ndihí de jeē ma quéndacoo de ini ñuu Jerusalén, chí áchí yá:

Condetu ró ndé quee Espiritu Santo jeē ní jéjnūhun máá Tátá rí Yaā Dios. Chí je ní cachi rí nuū rō jeē ní jéjnūhun ya quiji Espiritu Santo. <sup>5</sup> Chí Juan, jendaá jeē maá ndute-ní ní scuándute de ñayuu. Te róhó jíjnáhan ró, jecu na quiví te nájnūhun cuandute ró jíin Espiritu Santo, cúu jeē condee yā ini anuá rō, achí yá.

*Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhiin tútu jíin yá, ní cacajnūhún de ya:

¿A vijna te nasáha ní jéē ñáyuu ñuu yō Israel ndujéhu i ndacu i jniñu nuū nación yō chí naún? áchí de.

<sup>7</sup> Te ní cahān yā:

Ma cúu cuni rō quiví chí cuíyā jeē cóo jeē ní sándaā maá Tátá rí, chí máá ñin-ní máá yá jiní yā na quiví

sáha ya. <sup>8</sup> Te jeē cúni rō cúu jeē quee Espiritu Santo te condee yā ini anuá rō jíjnáhan ró. Yūcuán na te nihín rō poder te nacani ró jnúhun rí ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

<sup>9</sup> Te ní ndihí ní cahān yā táca jnúhun yáha. Te ní ní cájito de nuū yā, te ní ndaa-ni ya cuanuhun yā andiví. Te ní quee vicō ní jesi-ni nuū cuahán yā, te tuá ní cájito de ya. <sup>10</sup> Te ní ní cáhiin de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajúcuñí yā xiin de jíjnáhan de, te cájito ya nájnūhun tēe. <sup>11</sup> Te ní cacahān yā jíin de:

Róhó tēe Galilea, ¿najehe cájito ndaa ró ichi ándiví? Chí máá Yáa Dios ní naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

*Jeē ní canacāji de Matías jeē nucuñí de nuū Judas*

<sup>12</sup> Yūcuán na te ní nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñin kilómetro-ni, cūhva jeē ní jéhe ley permiso caca ñayuu quiví ndétátú. <sup>13</sup> Te ní ndivicoo de ini ñuu. Te ní ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. <sup>14</sup> Táca tēe yáha, ní ní cándutútú ñuu de cájicān tahu de jíin táca ñani Jesús jíin náná yā María jíin sava ga ñahan.

<sup>15</sup> Te ñin quiví te ní jecondichi Pedro nuū táca hermano cácadje. Te cáhiin nájnūhun ciento ocō ñayuu. Te ní cahān de:

<sup>16</sup> Hermano jíjnáhan ní, ní squícu nahín jnúhun cáhán tutu ñi jeē ní



cáhān David nde jenahān ní sáha Espírítu Santo. Te jñūhun un ní cuu siquī Judas jeē ní yosnūu núū téē ní cajññi Jítoho yō Jesús. <sup>17</sup> Te suu téē un ní jica de jín yó, te ni chindéé ñáhān jñāhan de jín yó siquī jñíñu ní jeni ya yohó. <sup>18</sup> Te ni cajeen ññuhun jín xūhun ní nihīn téē un siquī jñíñu neé ní sáha de. Te ni ñinga ndeyi de, te ni ndatā sáva chíji de, te ndíhi yiti de ni jité. <sup>19</sup> Te ni jité jñūhun yáha núū tāca ñáyuu cáyūcú ññuu Jerusalén, te jeē yúcuan cúu jeē ní casnání i ññuhun ún Acéldama nuū yúhu máá i, jeē cuní cahān ññuhun jeē cúu cuenta ñññ. <sup>20</sup> Chi súcuan je yósó núū tútu Salmo siquī Judas:

Vehe de na quéndō iyú,  
te ma cóndee ni ññ ga ñáyuu ini vehe ún.

Te suni cáhān:  
Jñíñu ní condiso de na cóndiso inga téē.

Achí.

<sup>21</sup> Núu súcuan te jini ññuhún jéé núcuññi ññ téē lugar máá de jín yó. Te téē nucuiññi jín yó un, nacāji yó de mēhñu tāca téē ní cajica jín yó tāca quívī jeē ní jica máá Jítoho yō Jesús jín yó. <sup>22</sup> Te téē nacāji yó un cúu téē jeē ní iyo de jín yó nde quívī ní jendute ya ni sáha Juan, te nde quívī ní ndaa ya cuanuhun yā andívī. Te téē nucuiññi jín yó na cúu de testigo jín yó jeē jé ni natecu yā, achí de.

<sup>23</sup> Te ni cateē nuū de uū jñāhan téē: Matías jín José jeē naní de Barsabás te suni naní de Justo. <sup>24</sup> Te ni cajicān tahu de:

Tátā Yāā Dios, máá ní chi jíní ni ndese cáa ánuá tāca ñáyuu. Núu súcuan te jeē ndíndúú téē yáha, stéén ni ndé ññ de cúu jeē ní nacāji ní. <sup>25</sup> Te condiso jñíñu de cuu de apóstol. Te naquihín de jñíñu ní stóo Judas, chi ni sáha de cuēchi te cuahān de lugar xeēn nuū cánuú quíhín de, achí de.

<sup>26</sup> Yūcuán na te ni casáha de ññ sorteo te ni jinū Matías, te

ni nucuiññi de ni nduu de jñāhan ndíhúxí ññ apóstol.

*Jeē ní quee Espírítu Santo*

## 2

<sup>1</sup> Te máá quívī víco Pentecostés ni cahīn tútú ñáyuu cácandíje ññuu Jerusalén. <sup>2</sup> Te sanaa-ni te ni quejéé ñññin vēji nde andívī nájññuhun tachī níhín quee, te tāca ñáyuu jeē cáyūcú ini vehe un ní cajini sōho i jeē ñññin ún. <sup>3</sup> Te ni cajito i nájññuhun yáññuhún jeē ní cajitē núu te ni cacucōo xini ná ññ ná ññ i. <sup>4</sup> Te ndíhi i, ni cunuú Espírítu Santo jín i, te ni quejéé i cácahān i sññ sññ yuhu, ndese ni steén máá Espírítu nuū ná ññ ná ññ i cahān i.

<sup>5</sup> Te ññuu Jerusalén, suni cáhīn ñáyuu hebreo, yññuhún núu Yāā Dios, jeē ní quijicoo i nde tāca naciōn ññ cáhnu ññayívī. <sup>6</sup> Te jeē ni ñññin súcuan te ni cacutútú cuéhē ñáyuu ún. Te ni cunéé í ni i jññāhan i, chi ná ññ ná ññ i ni cajini sōho i jeē téē ni canihñn Espírítu Santo cácahān de jññuhun yuhu ññú jicá nuū vēji i. <sup>7</sup> Te ni canaa ni i cájito i te ni cacahān i:

¿A násūu téē Galilea cácuu tāca téē yáha jéé cácahān de tāca yuhu ññú nuū vējicoo yó? <sup>8</sup> ¿Na vé ni cuu yāha núu súcuan? Chi ná ññ ná ññ yó cájini sōho yó cácahān de jññuhun yuhu ññú nuū ní cacacu yó. <sup>9</sup> Chi vējicoo yó ndé tāca ññuu jicá. Sava yó vēji nde Partia jín Media jín Elam. Te sava ga yō vēji yó ndé Mesopotamia jín Judea jín Capadocia jín Ponto jín Asia. <sup>10</sup> Suni nde Frigia jín Panfilia jín Egipto jín tijni ññuu jeē íne nde yatā gā ññuu Cirene ññuhun Africa vējicoo yó. Te sava ga yō nde ññuu Roma vējicoo yó, te cáyūcu jínu-ni yó yáha. Te máá yó jeē vējicoo ññuu Roma, sava yó cácuu máá ñáyuu hebreo te sava ga yō cácuu ñáyuu sññ ññuu, ni cacandíje yó ndíquín yō ley ñáyuu hebreo. <sup>11</sup> Suni nde Creta jín Arabia vējicoo sava yó. Te cájini sōho yó

jeē jīn jnūhun yuhu ñūū ná ñn ná ñn máá yó cácahān de tācā jniñu jéhnū ní sáha Yaā Dios, achí i.

<sup>12</sup> Te ndihí i chí ní canaa ī ní i cájini nahín i. Te ni candajñuhún i jīn jnāhan i:

¿Na vé cúu jeē ní cuu núu súcuan jeē cácahān de yuhu ñūū yō? achí i.

<sup>13</sup> Te sava i ni cacahān catá i:

Tuú chí jeē cánañi de, achí i.

*Jeē ní nacani Pedro jñūhun nuū ñáyuu*

<sup>14</sup> Yūcuán na te ni candocuiñi Pedro jīn ndihúxi ñn ga apóstol, te ni cahān jee Pedro jīn ñáyuu ún:

Nihín jnāhan ñuu yō hebreo, jīn ndihí nihín jēē cáyūcu ní Jerusalén, jñūhun yáha na chúhun ni ní jījnāhan ní, chí cuni nahín ní cahān na jīn ní. <sup>15</sup> Chí máá ná jijnāhan ná, nasūu jēē cájini ná nájñūhun cájeni ni ní, chí sáá cahñ jenéhen cúu, te nasūu hora cánañi ñáyuu cúu. <sup>16</sup> Chí sa suhva squícu jniñu yáha nájñūhun ni cahān Joel, tēe ni nacani jñūhun Yaā Dios nde jenahán, chí súcuan ni cahān de:

<sup>17</sup> Achí Yáā Dios: Quiví sándihí na te tají rí Espíritu rí cunuú yá jīn táca ñáyuu,

te sēhe yí ró jīn séhe síhí ró, nacani i jñūhun rí,

te tāca tēe lulí chí coto ndijin de jeē steén rí nuū de,

te tāca tēe jéhnū chí sáha rí jeē scóto jēni de.

<sup>18</sup> Te quiví ún chí tají rí Espíritu rí cunuú yá jīn táca mozo rí, cúu tēe cúu ñahan,

te nacani i jñūhun rí.

<sup>19</sup> Te ichi ándiví sáha rí jniñu jéhnū jeē náá ni ñáyuu coto i,

te sáha rí jniñu jéhnū ini ñayívi jēē steén jeē cujéhnū rí,

chí coo ññí jīn ñúhūn jīn ñúhmā nájñūhun vicō.

Yūcuan cúu jeē sáha rí jeē cóo jñūndóho xeēn.

<sup>20</sup> Te nduu jnúú níandii te ma cúndijin gā,

te yoō coto cuéhé nájñūhun niñí.

Yūcuán na te quee quiví jeē ndíji máá Jítoho rō Jesús.

Quiví ún coo cuehē jniñu jéhnū, te cuni ndihí ñáyuu jeē quiví máá Jítoho rō cúu.

<sup>21</sup> Te tāca ñáyuu jeē cahān ndahú i jīn yá te jnama ya i, achí Yáā Dios.

Achí Joel ni nacani de jñūhun ya.

<sup>22</sup> 'Jeē yūcuan nihín tēe ñuu yō Israel, cuni nahín gá ni jñūhun yáha jījnāhan ní. Ni steén Yaā Dios jeē ní tají yá máá Jesús, Yaā ní jehnu ñuu Nazaret, chí máá Yáā Dios ni jēhe ya jeē ní sáha Jesús jniñu jéhnū mēhñu máá ní, jīn jniñu jeē steén jeē cujéhnū ya, te jniñu un ní canaa ni ní cajito ní. Te je cájini vāha ní jēē súcuan ni cuu. <sup>23</sup> Te máá ní ni cajñi ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jīn tiempo je ni jini Yaā Dios jeē súcuan sáha ní jījnāhan ní, chí súcuan je ni sándaa yā. <sup>24</sup> Te ni nastécu Yaā Dios Jesús te tuá ni cúu ya ndīyí, chí jñūhun xeēn jeē jihí ñáyuu, tuá na vé cúu ga sáha jīn yá. <sup>25</sup> Chí nde jenahán suhva ni tee David jñūhun ndese ni cahān Jesús jīn Yáā Dios:

Jíní na núu máá ní jeē cúu ní Jítoho

ná, chí ní cáni ndéé ní jīn ná,

chí ndéé ní ichi ndáváha ná, cúu jeē chindéé ñáhán ní sāña náváha coo ndeyí ni ná.

<sup>26</sup> Jeē yūcuan cúsi ni ná te cáhán na jñūhun sñi.

Jeē yūcuan ma nácani uhū ni na síquí jñūhun cuu ná.

<sup>27</sup> Chí ma cuáha ni jñūhun quendōo ánuá na lugar nuū cáyūcu ánuá ndīyí,

ni ma cuáha ni jñūhun tehyū ná, chí jéjñíñu ná núu ní te maní ni jīn ná.

<sup>28</sup> Te ni steén ni núu na jēē nátecu ná,

te sáha ní jēē cusñi teyí ni ná condee

na jīn ní ní cáni.

Achí Jesús, ni achi David.

<sup>29</sup> Tāca níhín jínáhan ní, na cástūhun cájí ná nuū ni jnúhun jíí yō David, chí tu ní cáhán de jnúhun yáha síquī maá de. Chí ní jīhī de te ní quindūji de, te jíní yō nuū yíndūji de nde vijna. <sup>30</sup> Chí ní cuu de tēe ni nacani jnúhun Yaā Dios nde jenahán. Te ní jini de jeē váha ni jejnūhun ya nuū de jeē chíjí yucūn maá de quiji Cristo, te condee yā mesa de ndacu ya jniñu nájnūhun ní ndacu de jniñu jeē ní cuu de rey. <sup>31</sup> Te nde jíín tiempo ní jini de jeē nátecu Cristo, te ní cahān de jeē anuá yā, ma ndóo lugar nuū cáyūcu ánuá ndéyí, ni yiquí cúñu yā ma tehyú. <sup>32</sup> Chí Yaā Dios ní nastécu yā Jesús, te máá ná cácuu ná testigo jeē ní natecu yā. <sup>33</sup> Te ní ndujéhuu tucu ya ní sáha Yaā Dios jíín poder yā. Te nde nuū maá Yáā Dios, Yaā cúu Tátá yā, ni nihín Jesús Espíritu Santo, chí súcuu ni jejnūhun ya. Te ní tají Jesús Espíritu Santo, te suu ya sáha jniñu jeē cájito ní te cájini sōho ní vijna. <sup>34</sup> Te David, nasūu síquī maá de ní cáhán de tāca jnúhun yáha, chí tu ní ndáa yiquí cúñu de andiví. Chí síquī Cristo cúu jeē ní cáhán de suhva:

Máá Yáā Dios ní cahān yā jíín Jítóho rí Cristo:  
Cucōo ró ichi ndáváha ri jeē steén jeē kujéhuu ró.

<sup>35</sup> Te na sáha ri jeē quende rō poder tāca jéé cájito uhū rohó, áchí yá.

Achí David.

<sup>36</sup> Núu súcuu te ndihí ní jéé cácuu yó ñayuu Israel, na cúni váha ní jéé vésú ní cajehni ni yá jicā cruz, te Yaā Dios ní jeni ya maá Jesús jeē cúu ya Jitoho yō te suni cúu ya Cristo, Yaā jnáma yóhó, áchí Pedro jíín i.

<sup>37</sup> Te jeē súcuu ni cajini sōho i jnúhun yáha, te ní cajnahuhū ni anuá i. Te ní cacajnūhún i Pedro jíín tāca gá apóstol:

¿Te ndese sáha ná jíínáhan ná núu súcuu? áchí i.

<sup>38</sup> Te ní cahān Pedro jíín i:

Nacani ní ní jéé stóo ní cuéchi ní jíínáhan ní, te candute ní jéé ní cacandíje ní Jesucristo, náváha cone cáhnu ní Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ní. <sup>39</sup> Chí súcuu ni jejnūhun máá Tátá yō Yaā Dios nuū yō jíín núu séhe yó, te suni súcuu ni jejnūhun ya nuū ñáyuu tāca gá naciún, tācá i jeē cána ya i candíje i.

<sup>40</sup> Te jíín cuéhē gā jnúhun súcuu ni cahān cají Pedro, te ní stihví ní de i:

Nducú ndéyí ní jeē na cácu ní, chí jnahnū ndetú ñayuu casáha jniñu néé, áchí de.

<sup>41</sup> Yūcuán na te tācá i jeē ní cajetáhú jnúhun ní cahān de, ní cajendute i. Te quiví un ní nducuehē gā ñayuu cácandíje, nájnūhun uní mil gā ñayuu. <sup>42</sup> Te ní cahíin nihin i síquī jnúhun cástéén apóstol. Te inuú-ni cándajnūhun mání i te cájicān tahú i, te in cáhnu-ni cáyeji i pan, nájnūhun ní steén maá Jítóho yō jeē núcūhun ní yō síquī yā.

*Ndese ni coyūcu ñáyuu jeē ní cacandíje jeē xihna ñúhún*

<sup>43</sup> Te ndihí ñayuu ní cayūhú i ní cajito i, chí cuehē jniñu jéhuu jeē steén jeē kujéhuu ya ní casáha tēe apóstol. <sup>44</sup> Te inuú ní cahíyo ní ñayuu cácandíje, te ní cacuu inuú i tāca jéé cáneváha i. <sup>45</sup> Te ní caxícó i na-ni na vé cáneváha i, te ní casaja i xūhún un núu tāca jnáhan i, núu ndese jíni ñúhún in in i. <sup>46</sup> Te ndijnahan quiví ní candutútú i ini templo. Te maní ní cayejí cáhnu i pan tācá vehe jnáhan i nájnūhun ní steén yā, te ní cahíyo sī ní i. <sup>47</sup> Te ní cacahān i jeē yóhyo cújéhuu Yaā Dios. Te ndihí ñayuu ñuu un ní cajejnūhún i ñayuu cácandíje. Te ndijnahan quiví ní jnama Jítóho yō

sava ga ñayuu, te ni nduu inuú i jíin ñáyuu cácandíje.

*Jeē ní nduvāha tēe ríngo*

### 3

<sup>1</sup> Te ñin quiví te máa cáhunī jehíni ni caa Pedro jíin Juan cuango de templo, chi hora un cájican tahu jnáhan de hebreo. <sup>2</sup> Te cájendēca ñayuu ñin tēe cáringo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jícan de caridad nuū táca ñáyuu quívicoo ini templo. <sup>3</sup> Te tēe un ní jito de nuū Pedro jíin Juan jeē véji de quívicoo de ini templo, te ni jícan de caridad nuū Pedro jíin Juan. <sup>4</sup> Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núū rī jijnáhan ri, achí de.

<sup>5</sup> Te máa tēe un ndétu tūhva de, ni jeni ni de jeē cuáha Pedro jíin Juan jecu xūhun núū de. <sup>6</sup> Te ni cahān Pedro:

Tú na xūhun plata ni xūhun oro cánevāha ri. Te iyó ñin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhān rī jíin ró, ndocuiñi te caca ró, achí de.

<sup>7</sup> Te ni jñi de ndavāha tēe ún, te ni ndonehen de. Te jehē de jíin súcūn jehē de ni nduvāha-ni. <sup>8</sup> Te ñin ni scānda de máa de ni ndocuiñi de, te ni quejé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios. <sup>9</sup> Te ni cajini táca ñáyuu jeē jíca de te nácuatáhú de nuū yā. <sup>10</sup> Te ni canacuni i de jeē maá de cúu tēe ni condee yehyí templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

*Jeē ní nacani Pedro jñuhun ini corredor jeē naní Salomón*

<sup>11</sup> Te tēe ni nduvāha ún, tu siáa de Pedro jíin Juan. Te ni cacutútú-ni

cuehē ñayuu nuū de ini corredor jeē naní Salomón, te ni canaa ni i cájito i. <sup>12</sup> Te ni jito Pedro jeē ní cutútú ñáyuu ún, te ni cahān de jíin i:

Níhín tēe ñuu yō Israel jijnáhan ní, ¿najehē cánaa ni ni cájito ní jñiñu yáha? ¿Najehē cájito ní núū ná te cájeni ni ní jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? <sup>13</sup> Tuú chi máa Yāā Dios jíi yō Abraham jíin Isaac jíin Jacob jíin táca gá jíi yō, ni sáha ya jñiñu yáha návāha cuni ñayuu jeē cujéhnu Sēhe ya Jesús, Yaā jeē ní cajendēca ní núū tēe cácujeñnu. Te ná ni cuni Pilato jeē siaá de ya, te tu ní cájēhe ni jñuhun. <sup>14</sup> Te ni casquéhichí ni yá vésú cúu ya Yāā ndaā, Yāā ñi. Te sa suhva ñin tēe jéhi ndīyi ni cacahān ni jíin Pilato jeē na siáa de. <sup>15</sup> Te ni cacahān ni jéē na cúu Yāā jeē sáha jeē técu ndihi-ni. Te Yāā Dios ni nastécu yā Jesús jeē ní cuu ya ndīyi, te máa ná cácuu testigo jeē ní natecu yā. <sup>16</sup> Te tēe yáha jéē cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñuhun cájito ndihi ní.

<sup>17</sup> Te na cástūhun ná nuū ni jijnáhan ní, je jíni na jéē maá ní jijnáhan ní jíin tēe cácujeñnu nuū yō, tu ní cájecūhun ni ní, te jeē yúcuan ní cajehni ní yá. <sup>18</sup> Te súcuan ni squícu jñuhun ni cahān Yāā Dios nde jenhán jéē cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñuhun ya nde jenhán. <sup>19</sup> Te na nácani ni ní jéē stóo ni cuéchi ní, te nasāma ini ní, te quívicoo ní ndaha Yāā Dios návāha ndahva yā cuéchi ní. Te quee quiví jeē ndúsñi ni ní sáha máa Jítoho yō. <sup>20</sup> Te natajé yá Jesús ndiji ya, chi cúu ya Cristo, Yāā ní jeni Yāā Dios jeē jnáma ya

yohó. <sup>21</sup> Te jíni ñúhún jéē cóo ya andiví ndé nasájeé yá taca jéē iyó, nájnūhun ni cacahan tēe ndoo ni canacani jnūhun nde jenahán ní sáha Yaā Dios. <sup>22</sup> Chi suhva ni nacani jíi yō Moisés jnūhun nuū taca jíi yō: Máá Jítoho yō Yaā Dios cani ya Yaā nacani jnūhun nuū rō j-jnáhan ró, nájnūhun ni jeni ya ruhū. Te cuu ya ñin jnáhan ñuu yō. Te na chúhun ni rō taca jnúhun jéē nácani ya ún. <sup>23</sup> Te núu ndé téé tú chuhun ni de jnūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

<sup>24</sup> Te taca téé ni canacani jnūhun nde jenahán, nde tiempo ni quiiji Samuel te ní gá nde vijna, suni ni canacani de jnūhun siquī taca jniñu cúu quiví yáha. <sup>25</sup> Yucūn maá téé ni canacani jnūhun ya nde jenahán cácuu yó, te suni siquī maá yó j-jnáhan yó cúu jeē ní sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū taca ñayuu ñí cáhnu ñayiví, áchí yá. <sup>26</sup> Te jeē ní nastécu Yaā Dios Sēhe ya, te ni quiiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jíin Juan nuū tēe cácujeñhu*

#### 4

<sup>1</sup> Te Pedro jíin Juan níni cácahān gā de jíin ñayuu ún te ni quecoo taca sūtū jíin téé grupo saduceo, jíin téé cácujeñhu nuū téé cándito templo. <sup>2</sup> Te yōhyo ni caquití ni de siquī jeē castéén Pedro jíin Juan nuū ñayuu, jíin jéē cánacani de jnūhun jeē nátecu ndiyí chi je ni natecu Jesús. <sup>3</sup> Te ni cajñi ún de, te ni cachuhun ún de vecāa cone de nde cundijin inga quiví, chi je ni ini. <sup>4</sup> Te cuehē ñayuu jeē ní cajini sōho jnūhun ni cacahān Pedro jíin Juan ní cacandíje i. Te

ni nduu nájnūhun uhūn mil jeē maá nene tēe jeē ní cacandíje.

<sup>5</sup> Te jeē ní cundijin inga quiví ún, te tēe cácujeñhu nuū ñayuu hebreo jíin téé jéñhu cándiso jniñu jíin téé cástéén jnūhun tutu ley yā, ni candutútú de ini ñuu Jerusalén. <sup>6</sup> Te suni ni candutútú de jíin Anás jeē cúu sūtū cujeñhu ga, jíin Caifás jíin Juan jíin Alejandro jíin taca gá jeē cácuu jnáhan sūtū cujeñhu ga ún. <sup>7</sup> Te ni candacu jniñu jeē na quijicoo Pedro jíin Juan condichi de mēhñú, te ni cacajnūhún de:

¿Ndé ñin ni tejniñu róhó te ndese ni nihín jniñu ró ní sáha ró jéé ndúvāha tēe yáha? áchí.

<sup>8</sup> Yūcuán na te Pedro chi ni cunuú maá Espiritu Santo jíin de, te jíin poder yā ni cahān de jíin taca téé ún:

Taca níhín téé cácujeñhu nuū ñúu yō Israel jíin taca níhín téé jéñhu cándiso jniñu, <sup>9</sup> vijna te cástíhí ni sáña siquī ñin jniñu váha ní casáha ná jéé ní nduvāha tēe chúhú yāhá.

<sup>10</sup> Te na cástūhun ná nuū nihín jéé cácujeñhu ní, návāha suni cuni ndihi jnáhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jíicā cruz, te ni sáha Yaā Dios jeē ní natecu yā.

<sup>11</sup> Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ni casquéhichí ni yá nájnūhun jeē cátejiyo ní yūu, chi tu ní cacandíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe. <sup>12</sup> Te tú cuiti inga jeē cúu jnama yóhó, chi tuá na inga jeē cujeñhu ní jéni Yaā Dios ini ñayiví yáha jéé cúu jnama yóhó, áchí Pedro.

<sup>13</sup> Yūcuán na te ni cajini un jéé Pedro jíin Juan jéñhu-ni cácahān de. Te je cajini jeē tú tūhva de, chi tēe súcuán-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. <sup>14</sup> Te

cándēhe núū tée ni nduvāha un, índichi de jíin Pedro jíin Juan, te tu ní cánihin gā modo ndese ga cahān.

<sup>15</sup> Yūcuán na te ni candacu jniñu jeē na quéndacoo s̄in de yatā véhe juzgado te ndajnūhun máá jíjnāhan.

<sup>16</sup> Te ni cacahān:

¿Ndese sáha yó jíin tée yáha núū súcuan? Chi ni jitē jnūhun yáha núū tāca ñayuu ñuu Jerusalén jeē súcuan ni casáha de ñin jniñu jéhnū, te ma cúu cahān yō jeē tu iyó ndáa. <sup>17</sup> Te návāha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní ñin ñayuu, áchí.

<sup>18</sup> Te ni cacana ún de, te ni cacahān ñihin jíin de jeē ma cahán cuiti gā de jnūhun Jesús ni ma steén gā de jnūhun un núū ní ñin ñayuu.

<sup>19</sup> Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. <sup>20</sup> Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áchí de.

<sup>21</sup> Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáa de cuango de, chí tú cuiti na modo stóho de chí cáyūhu cájito ñayuu, chí siquī jniñu jéhnū ni cuu ún te ndihí i cácahān i jeē yóhō cújéhnū Yaā Dios. <sup>22</sup> Chi tēe jeē ní sáha ya jniñu jéhnū jíin de jeē ní nduvāha de, víhyá gā uū xico cuiyā de.

*Jeē ní cajicān tahú ñayuu cácañdije*

<sup>23</sup> Te ná ni casiáa un Pedro jíin Juan cuango de, te ni najinūcoo de nuū tāca gā jnāhan de, te ni cacachi de ndese ni cacahān sutū cácujehnū jíin tēe jéhnū cándiso jniñu. <sup>24</sup> Te jeē ní cajini sōho de jnūhun yúcuán, te inuú-ni ni cajicān tahú de nuū Yaā Dios:

Tátā Yaā Dios jeē cújéhnū ní núū ndihí, máá ní cúu Yaā Dios ní sáha andiví jíin ñáyivi jíin mar jíin táca

ndihí jeē iyó. <sup>25</sup> Te jeē jíin Espiritu Santo te ni sáha ní jēe ni cáhān mozo ní David nde jenahán:

¿Najehē cáquitī ndevāha ni ñayuu s̄in nación?

¿Te najehē cájeni sáa ni i jeē ndóna i siquī ní?

<sup>26</sup> Ni cacutútú jēe cácuu rey ñayiví jíjnāhan,

te tēe cácujehnū ni cacutútú de, te inuú-ni ni candonda de siquī máá ní jeē cúu ní Jitoho ná,

jíin siquī Cristo, Yaā jeē ní jeni ní.

Achí David.

<sup>27</sup> Te jendaá chí Herodes jíin Poncio Pilato jíin táca tēe ñuu yō Israel jíin tēe táca gā nación, ni cacutútú de ini ñuu yáha ní candonda de siquī Séhe ñi ní Jesús, Yaā ní jeni ní. <sup>28</sup> Te súcuan ni cuu návāha squícu táca jniñu jeē jíin poder ni ní cundaá ni ní ndé jenahán jēe súcuan coo. <sup>29</sup> Te vijna, Tátā, coto ní ndese cácahān xeēn de nuū na jíjnāhan ná, te cuāha ni fuerza ni núū na jēe cácuu ná mozo ni, návāha jéhnū-ni nacani ná jnūhun máá ní. <sup>30</sup> Te jíin poder ní nasávāha ni ñayuu cácuñū, te sáha ní jniñu jéhnū jeē steén jeē cújéhnū ní. Te táca jēe yáha sáha ní jíin poder Séhe ñi ní Jesús, áchí i jíjnāhan i.

<sup>31</sup> Te nuū ní ndihí ni cajicān tahú i, te nuū cáyūcu tútú i un ní sáha ya jeē ní jnáa. Te ndihí i ni cunuú Espiritu Santo jíin i, te ni jēhe ya fuerza te jéhnū-ni ni canacani i jnūhun Yaā Dios.

*Jeē ní canevāha cáhnu i ndajniñu*

<sup>32</sup> Te ñayuu cuehē jeē ní cacandije chí inuú cáhīyo ni i jíjnāhan i. Te tú ni ñin i ní cáhān jeē ndajniñu jeē névāha máá i cuu máá-ni i, chí táca ndajniñu ni canevāha cáhnu i.

<sup>33</sup> Te ñihin cánacani apóstol jnūhun jeē ní cajito de jeē ní natecu Jitoho yō Jesús. Te yóhō ni chindéé ñáhán yá ñayuu cácañdije. <sup>34</sup> Chí tú cuiti ni ñin i ní ndóho jeē cumani nuū i, chí táca ñayuu cánevāha cuehe

ñuhun chí vehe, ni caxīco i sava te ni caquindeca i xūhún un. <sup>35</sup> Te ni cajēhe i xūhún un nūū tēe apóstol, te ni casaja tēe apóstol nuū ñáyuu cácanđije núu ndese jini ñúhún ñin ñin i. <sup>36</sup> Te íyó ñin tēe nání José jeē cúu yucūn Leví, ni cacu de Chipre, ñuhun jeē íne sūn nuū ndúte. Te tēe apóstol ni casnámí de tēe ún Bernabé, jeē cuní cahān: tēe cáhán jñuhun ndeyí ni. <sup>37</sup> Te ni xīco de ñin ñuhun de, te ndáhá de xūhún un ní jēhe de nuū tēe apóstol.

*Siquí cuēchi jeē ní casáha Ananías jíin Safira*

## 5

<sup>1</sup> Te suni inga tēe nání Ananías jíin ñasíhí de Safira, ni caxīco de ñin ñuhun de. <sup>2</sup> Te ni chuvāha de sava xūhún un cuu máá de jíin ña, chí súcuan ni candajnūhún de jíin ña, te ndáhá de inga sava nájnūhun jeē ndíhi cúu, te ni jēhe de nuū tēe cácuu apóstol. <sup>3</sup> Te ni cahān Pedro:

Ananías, ¿naun ni jēhe ro jñuhun jeē quívi jexeén, jeē cúu Satanás, ñin anuá rō te stáhú ró Espíritu Santo cuní rō? Chí jeē ní caxīco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máá ró, chí ni sáha ró nájnūhun jeē ndíhi xūhun ní jēhe ró. <sup>4</sup> ¿Te á násūu cuenta máá ró cúu ñuhun un ndé ná tu xīco ró? Te ná ni xīco ró ¿te á násūu cuenta máá ró cúu xūhun jeē cuajníñu ró ndé nuū cuní máá ró? ¿Te naun ni jeni ni rō jeē stáhú ró súcuan? Te nasūu máni máá tēe cúu jeē jícu ró stáhú ró, chí suni Yaā Dios, áhí Pedro.

<sup>5</sup> Te ná ni jini sōho Ananías táca jñuhun yáha, te ni cotúú-ni de ni jihí de. Te táca ñáyuu ní canihñ jñuhun ún, yōhyo ni cayūhú i. <sup>6</sup> Te ni candocuíñ tēe suchí, te ni cachusúcún de ndíyi un cuáchindūji de.

<sup>7</sup> Te ni cunúu nájnūhun unī hora. Te ni jinú ñasíhí ndíyi un ní quívi ña ñin vehe ún, te tú na vé jiní cuiti ña. <sup>8</sup> Te Pedro ni cajñūhún de ña:

Cachi nuū rī, ¿á ñin súcuan-ni ni caxīco ró ñuhun ró chí tuú? áhí de.

Te ni cachi ña:

Suu súcuan-ni ni caxīco ná, áhí ña.

<sup>9</sup> Te ni cahān Pedro jíin ña:

¿Naun ni casquijnáhan jñuhun ró jeē cóto ndee ró Espíritu Santo máá Jítoho yō? Chí ni nducú ró stáhú ró yā. Cuni nahín jeē cáhma nanecoo tēe cuachindūji yíi ró, te suni súcuan quichindūji de rōhó, áhí de.

<sup>10</sup> Te ni cotúú-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jeē je ní jihí ña, te ni caquenehen de ña, te ni jechindūji de ña xiin yí ña. <sup>11</sup> Te yōhyo ni cayūhú ndíviñ ñayuu cácanđije jíin táca gá ñayuu jeē ní cajini jñuhun jeē súcuan ni cuu.

*Cuehē jniñu jéhnú ni casáha apóstol*

<sup>12</sup> Te cuehē jniñu jéhnú jeē steén jeē cujéhnú Yaā Dios ni casáha tēe apóstol nuū ñáyuu. Te táca ñáyuu cácanđije, inuú-ni cándutútú i ñin corredor jeē naní Salomón. <sup>13</sup> Te tu ní cáchundeyí ni inga ñayuu quijnáhan jíin i. Te cájejnūhún i ñayuu cácanđije. <sup>14</sup> Te ni nducuehē gā i, chí cúu tēe cúu ñahan ni cacandíje i máá Jítoho yō. <sup>15</sup> Te cáquindeca ñayuu jñahan i jeē cácuñu, te cájequin i ñin calle cácaa i nuū camilla jíin núu yúu, chí cácuni i vēsú ste cuándahū Pedro na yáha siquí i te nduvāha i. <sup>16</sup> Te suni cuehē ñayuu táca ñuu cáhíyo yajni yūcuan ní quijicoo i ñuu Jerusalén ni caquindeca i jñahan i jeē cácuñu jíin jeē cándoho tachí, te ndíhi i ni canduvāha i.

*Jeē ní cajito xeñ i tēe cácuu apóstol*

<sup>17</sup> Yūcuán na te sutū cujéhnú ga jíin táca gá jñahan jeē cácanđije sahān saduceo, ni cacucuésún ni jeē siquí tēe cácuu apóstol. <sup>18</sup> Te ni cajñi de tēe cácuu apóstol ni cachuhun de vecāa. <sup>19</sup> Te ñin ndajéhé máá Jítoho yō ni nune

ya yehyí vecāa ún jecuāa, te ni quenehen ya de jijnáhan de. Te ni cahān yā jiín de:

<sup>20</sup> Cuáhán te cuiñi ró ini templo, te yūcuán nacani cáji ró jnūhun nuū ñayuu siquī ndese nihin tahú i cotecu i ní cáni, áchí ndajéhé yā.

<sup>21</sup> Te ni cajini sōho de jnūhun yáha. Te nuū ní cundijin te nehen ni quivico de ini templo, te cástéén de jnūhun ya nuū ñayuu.

Te níni cástéén de te sutū cujéhnū ga jiín táca jnáhan de ni canastútú de tēe junta cujéhnū ga, jeē cúu ndihi tēe jéhnū cándiso jniñu nuū ñayuu nación Israel. Te ni catajái de policía cuaquenehen tēe apóstol ini vecāa. <sup>22</sup> Te nuū ni jínūcoo te tuá gā tēe apóstol. Te ni canandió cóo te ni cacachi:

<sup>23</sup> Jendaá cúu jeē ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuiñi gā tēe un cáhiin ini vecāa ún, áchí de.

<sup>24</sup> Te sutū cujéhnū ga jiín tēe cujéhnū nuū tēe cándito templo jiín sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. <sup>25</sup> Te ni quee-ni iin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñayuu, áchí de.

<sup>26</sup> Yūcuán na te tēe cácujehnū nuū tēe cándito templo, jiín tēe cácuu policía de, ni jengoo de, te yúcún ní nacueca de táca tēe apóstol vendicoo de jíin, chí cáyūhú de jeē sanaa te cuāha ñayuu yuū xiní de núu sáha xeēn de jíin táca tēe apóstol. <sup>27</sup> Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū cujéhnū ga ni cahān:

<sup>28</sup> Ni cacahān nihin ri jíin ró jeē ma steén cuiñi gā ró jnūhun tēe nání Jesús. ¿Te naun ni casáha ró jéē ní ndecáva jnūhun un ní ñuu Jerusalén yáha? Te cácuu ró stau yáhu ró rúhū jijnáhan ri siquī jeē ni jíhí tēe ún, áchí.

<sup>29</sup> Te Pedro jiín táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz. <sup>31</sup> Te ni sáha Yaā Dios jeē ní ndujéhnū tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ní sáha Yaā Dios náváha yóhó, jéē cácuu yó ñayuu Israel, na nácani ni yō jeē stóo yó cuéchi yó, te cone cáhnū ni yā nuū táca cuéchi yó.

<sup>32</sup> Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chí jéhe Yaā Dios Espíritu Santo yā condee ini anuá táca ñayuu jeē cájendetū nuū yā, achí de.

<sup>33</sup> Te ná ni cajini sōho un jnūhun yáha, te yōhyo ni caquiñi ni, te cahni de cácuu nuú. <sup>34</sup> Te mēhñū un jijnáhan néne iin tēe grupo fariseo nání de Gamaliel, te cúu de maestro jeē steén ley yā, te táca ñayuu cájejnūhún i de. Te ni ndocuiñi de, te ni ndacu de jniñu jeē na cújiyo núu tēe apóstol. <sup>35</sup> Te ni cahān de:

Róhó jnáhan ñuu yō Israel, cani vāha ni ró núu na vé cácuu ró sáha ró jíin táca tēe yáha. <sup>36</sup> Chí nucūhun ni ró jeē iin cuiyā ni ndonda Teudas siquī gobierno, te ni cahān de jeē tēe téyí cúu de, te ni cacatútú najnūhun cuñ ciento tēe jíin de. Yūcuán na te ni cajehni ñayuu Teudas, te táca jéē ní caquiijnáhan jíin de ni cajitē núu cuangoo sáa-ni, te ni jecuiñi-ni jniñu ún. <sup>37</sup> Yūcuán na te quiví ni íyo censo te Judas, iin tēe Galilea, ni ndonda de siquī gobierno, te ni cacatútú cuéhē tēe jíin de. Te suni ni cajehni ñayuu Judas, te táca tēe jeē ní caquiijnáhan jíin de ni cajitē núu cuangoo. <sup>38</sup> Te vijna na cuáha ri consejo rohó. Ma stáhan gā ró tēe yáha. Siáa de na quingoo de. Chí núu ñayuu-ni ni squejéé jniñu yáha, te jecuiñi i.



<sup>39</sup> Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

<sup>40</sup> Te ni cachusóhó jéé ni cáhān Gamaliel. Te ni canacana tēe cácuu apóstol, te ni cacani de jíin cuarta ñiī te ni cacahān xeēn jíin de jeē ma cahán gā de jnūhun Jesús, te ni casiáá de cuangoo de. <sup>41</sup> Te máá apóstol ni quendacoo de nuū junta cuangoo de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácadíje de ya. <sup>42</sup> Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

*Jeē ní cajeni de uxā tēe cuajniñū mēhñū ñáyuu cácadíje*

## 6

<sup>1</sup> Te ni cucuehē ñayuu cácadíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnāhan hebreo de, áchí de jeē ñahan viuda jeē cácahān yuhu griego tu cánihñ vāha ña staa jeē cása de táca quívī cuu ña. <sup>2</sup> Yūcuán na te máá ndihúxí uū apóstol ni canastútú de táca ñáyuu cácadíje, te ni cacahān de:

Tú vāha jeē jécuiñī jniñu jeē cánacani ri jnūhun Yaā Dios siquī jeē cása rī staa. <sup>3</sup> Núu súcuan te rōhó, hermano, nacāji ró úxā jnāhan máá yó, te na cóndiso jniñu de saja de staa. Te nacāji ró tēe jeē cájejnūhún ñáyuu de, tēe ndíchí jéé ni cunuú Espíritu Santo jíin de. <sup>4</sup> Te ruhū jijnāhan ri, máni cacān tahú rī jíin jéé nácani ri jnūhun ya, achí de.

<sup>5</sup> Te ndihī ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo.

<sup>6</sup> Te ni cajeni i táca tēe yáha núu tēe cácuu apóstol, te tēe apóstol un ní casoó de ndaha de xinī táca tēe un ní cajicān tahú de nuū Yaā Dios siquī jniñu condiso de.

<sup>7</sup> Te jnūhun Yaā Dios ni jité gā cuahān, te ni nducuehē teyí ñáyuu cácadíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

### *Jeē ní cajni de Esteban*

<sup>8</sup> Te ni chindéé ñahán yá Esteban ni jéhe ya poder nuū de, te ni sáha de táca jniñu jéhnu nuū ñáyuu, jniñu jeē steén jeē cujéhnu Yaā Dios. <sup>9</sup> Te ñayuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástāhān jnāhan de jíin Esteban. <sup>10</sup> Te tu ní cácuu de jíin de, chi ndíchí ní cahān de ní sáha máá Espíritu Santo. <sup>11</sup> Yūcuán na te ni cascāhān sava tēe jeē na cáhan jnūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jíin siquī Yaā Dios. <sup>12</sup> Te jeē súcuan ni cacahān te ni caquitī ni táca ñáyuu jíin tēe jéhnu cándiso jniñu jíin tēe cástéén jnūhun tutu ley yā. Te ndihī de ni candonda siquī Esteban, te ni cajni de cuangoo jíin de nde nuū junta cujéhnu ga. <sup>13</sup> Te ni cajeni de tēe cahān jnūhun yáá siquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de siquī templo i yáha jíin siquī ley yā. <sup>14</sup> Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yó, áchí.

<sup>15</sup> Yūcuán na te ndihī tēe cáyūcu núu junta un ní candacoto vāha nuū Esteban, te ni cajini jeē jito nuū de ná jito nuū ñn ndajéhé Yaā Dios.

### *Jnūhun ni nacani Esteban*

## 7

1 Te máá sūtū cujéhnū ga ni ca-jnūhún Esteban:

¿A ndáā jeē súcuan ni sáha ró nájñūhun cácahān de yāhá? áchí.

2 Te ni cahān Esteban:

Ndihí níhín jēē cácuu ní jnāhan ñūu yō, jíin ndihí níhín jēē cácujehnū ní nūū ñūū yō, cuni nahín ní jñūhun cahān ná: Máá Yāā Dios jeē yóhyo cújéhnū ya, ni steén yā maá yá nuū jí yō Abraham nde na nēne ga de región Mesopotamia, nde ná tu quihín de condee de ñūu Harán.

3 Te ni cahān yā jíin de: Stóo ñūu rō jíin táca jnāhan ró te quihín rō nuū cuáha ri condee rō, chí máá rí steén ichi nuū quihín rō, achí yá.

4 Yūcuán na te ni quenda de región Caldea, te ni jinū de ni condee de ñūu Harán. Te yūcuan ní jihí tatá de.

Yūcuán na te ni sáha Yāā Dios jeē ní quee de ñūu yáha nūū cáyūcu yó vijna. 5 Te tu ní jéhe ya ni ññ tíhlí ñūhun yáha cuu tahū de. Te vēsú súcuan te ni jejnūhun ya jeē cuáha ya ñūhun un nūū de nde jíin nūū táca séhe de, vēsú ná tu coo séhe de sáá.

6 Te súcuan ni cahān Yāā Dios jíin de: Séhe ró coyūcu jíca i inga ñūu, te cuūn ciento cuiyā sájniñū sáá-ni i te stóho ñayuu yūcuan i. 7 Te siquī jeē súcuan sáha i jíin séhe ró, te máá rí chí stóho ri ñayuu ñūu ún. Te sáá te quendacoo séhe ró yūcuan, te nucoyūcú i yāhá chíñūhún i ruhū, achí yá.

8 Te ni cahān yā jíin Abraham jeē na cúu de circuncidar, jeē cúu ññ jnūñi jeē ni sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te suni súcuan ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

9 Te táca séhe Jacob ni cacu-cuésún ni de jíin ññani maá de José, te ni caxícó de i nuū téee jeē ní ca-jendēca i nde nación Egipto. Te Yāā Dios chí ni ndito ya José. 10 Te ni jnama ya i nuū táca jnūndóho ní jito

i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejniñū de José jeē cúu de gobernador te ndacu de jniñū nación Egipto jíin nūū ñáyuu cáyūcú vehe Faraón.

11 Te ni quiji quivī jeē ni íyo ññ jnamā xeēn, te ni ndoho ñayuu ní cáhnu nación Egipto jíin ndé ñūu Canaán. Te táca jíí yō ún, tuá ni cánihín de jeē cáji de. 12 Te ni nihín Jacob jñūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ññ. 13 Te jeē cuángoo de vuelta uū te ni nastúu José jeē maá de cúu ññani de jíjnāhan de. Yūcuán na te ni jini rey Faraón ndé ññ jnāhan cúu José. 14 Te ni cahān José jíin táca ññani de jeē na cóndeca de tátá de Jacob jíin ndihí jnāhan vehe de. Te ni íyo unī xico xahūn i. 15 Te súcuan ni cuu jeē ni jíin Jacob ni condee de nación Egipto nde ni jihí de. Te suni yūcuan ní coyūcu séhe de jeē cácuu jíí yō un ndé ni cajihí maá de. 16 Te ná ni quee quivī jeē ndénehen ya táca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndiyi jíí un jēe ndíji ñūu Siquem, te ni cachindūji de ini yaū ndiyi ndeé jíca cáva jeē ní jeen jíí yō Abraham nuū táca séhe Hamor ñūu Siquem.

17 Te nde ná cáyūcu gá de nación Egipto, te cuacuyajni quivī jeē squícu jñūhun ni cahān Yāā Dios jíin Abraham jeē quéndacoo séhe de nucoyūcú i ñūu ni jéjnūhun ya nuū i, te ñayuu un ní tahū cuehē i ini nación Egipto. 18 Yūcuán na te ni nucuiñi inga rey ñūu Egipto jeē tu ní jíin de jeē váha ni sáha ndiyi José. 19 Te rey un ní stahú de táca jíí yō te ni sáha ndevāha de jíin i, chí ni sáha fuerza de i jeē ma cóto ga i séhe yiquín i te na cúu. 20 Te tiempo un ní cacu Moisés, te ni cusī ni Yāā Dios jíin i. Te unī yoō

ni condito sāhi náná i tátá i. <sup>21</sup> Te tuá ni cúu condito sāhi de i, te ni cachune de i nuū nanihīn sēhe sīhī Faraón i, te ni naquihīn sēhe ña i ni scuéhnu ña i nájñuhun sēhe maá ña. <sup>22</sup> Te ni cutūhva Moisés tāca jñuhun ndíchí ñuu Egipto, te ni cujéhnu de jín jñuhun cāhán de jín jniñu sāha de.

<sup>23</sup> Te nuū uú xico cuiyā de te ni jecondéhé de jnáhan de jeē cácuu ñayuu Israel. <sup>24</sup> Te ni jito de nuū ñin tēe nación Egipto jeē sāha ndevāha jín ñin tēe Israel. Te Moisés ni jnama de jnáhan de Israel ún, chí ni jehni de tēe Egipto un. Te súcuan ni ndutahū jeē ni sāha ndevāha jín jnáhan de ún. <sup>25</sup> Te máá Moisés jéni ni de jeē jécūhun ni tāca jnáhan de jeē Yáa Dios ni tají yá de jeē jnáma de jnáhan de ún ini nación Egipto nuū, te tu ní cájecūhun cuiñi ni jnáhan de ún. <sup>26</sup> Te inga quiñi suni ni jito de nuū uú tēe Israel jeē cájéjñahan, te cúní de jeē na jécuiñi. Te jeē yúcuan ní cahān de jín: ¿Najehē casáha ndevāha ró jín jnáhan ró? Chí nájñuhun ñin ñani-ni cácuu ró, áchí de. <sup>27</sup> Te máá tēe cáni tahū jnáhan un ní chundahá de Moisés te ni cahān de: ¿Ndé ñin ni jeni róhó jéē cujéhnu ró núū rī te sándaā rō jniñu rī jijnáhan rī? <sup>28</sup> ¿Chí suni cúní rō cahni rō ruhū nájñuhun ni jehni rō tēe Egipto icu chí naún? áchí de jín Moisés. <sup>29</sup> Te nuū ní jini sōho Moisés jñuhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū sēhe yí de.

<sup>30</sup> Te ni jīnu uū xico cuiyā jeē néne de yūcuán. Yūcuán na te ñin ndajéhé Yáa Dios ni quenda ya nuū de nde nuū ñuhun téhé nuū ñin yucu súcún Sinaí. Te ni quenda ya nuū de xinī ñin yucū cuiñi cáhnu cándahá yáñuhūn, te tu ní cáyú yucū ún. <sup>31</sup> Yūcuán na te Moisés ni naa ni de jító de ún, te ni jehēn de nde nuū, návāha coto vāha de. Te ni jini sōho

de jeē cahān maá Jítóho yō jín de: <sup>32</sup> Máá rí cúu Yáa Dios tāca jíi rō jenahán, Abraham jín Isaac jín Jacob, achí yá. Te Moisés, quiñi i de jeē yūhú de, te jeē yúcuan tuá ni cúndeyí ni de coto de nuū. <sup>33</sup> Te máá Jítóho yō ni cahān yā jín de: Quenehen ndijēn rō chí nuū ñin ró, ñuhun íi cúu. <sup>34</sup> Je ni jini rī ñayuu maá rí jeē yóhoyo cándoho i nación Egipto, te suni jini sōho rī jeē cájnana uhū i, te ni cuun rī vēji rī jeē jnáma rī i jijnáhan i. Núu súcuan te vijna chí tají rí rohó ndicó ró quiñi rō nde nación Egipto, achí yá jín de.

<sup>35</sup> Te nde ná tu quenda Moisés Egipto, te tāca jnáhan de ni casquéhichī i de jeē ní cacahān i jín de: ¿Ndé ñin ni jeni róhó jéē cujéhnu ró núū rī te sándaā rō jniñu rī? ni cacahān i jín de. Te vesú súcuan te máá ndajéhé Yáa Dios ni quenda nuū Moisés un jéē cándahá cáyú yucū cuiñi ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. <sup>36</sup> Te máá Moisés ni sāha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úu xico cuiyā. Te ñí tiempo un ní sāha de cuehē jniñu jénu jeē steén jeē cujéhnu Yáa Dios. <sup>37</sup> Te máá Moisés cúu jeē suhva ni cahān de jñuhun yáha jín jnáhan ñuu yō Israel: Máá Yáa Dios cani ya Yáa nacani jñuhun nuū rō jijnáhan ró nájñuhun ni jeni ya ruhū. Te cuu ya ñin jnáhan ñuu yō. Te na chúhun ni rō jñuhun cahān Yáa ún, áchí. <sup>38</sup> Te suni nde ná ni cajica cuu jíi yō nde nuū ñuhun téhé, te ni cahān ndajéhé yā jín Moisés xinī yúcu súcún Sinaí, te ni nihīn de jñuhun jeē cahān ndese nihīn tahú yō cotecu yō, te ni nacani de jñuhun un núū tāca jíi yō, te ni quendoo jñuhun un núū yō.

<sup>39</sup> Te tāca jíi yō ún tu ní cácuni de cuandetū de nuū Moisés, chí sa

suhva ni cacuni de squéhichī ni de Moisés, te ni cacuni de nandicó de nungoo de Egipto nuú. <sup>40</sup> Te ni cacahān de jín Aarón: Sáha ní tjini yaā na cósnū nū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéé jeē cuahán de xinī yucu Sinaí, achí. <sup>41</sup> Yūcuán na te ni cajēhe de oro ni cuvāha in becerro oro, te nuū becerro ídolo un ní casocō de quiti, te ni cacusi ni de jín ídolo ní casáha de ún. <sup>42</sup> Te Yaā Dios ni cujiyo ya cuahān yā, te ni stóo ya de na chíñúhún de nuū tāca jeē jító yó ín andiví, nájnūhun yósó nū tūtu tēe ni canacani jnūhun Yaā Dios nde jenahán:

Ni cahān yā: Róhó ñayuu Israel, ¿á cájeni ni rō jeē nuū ruhū ni casocō rō quiti

ná ni cajica cuu ró úu xico cuiyā nde nuū ñūhun téhé?

<sup>43</sup> Tuú, chi sa suhva ni cacondiso ró nicho jeē íne ídolo jeē naní Moloc

jín figura quimi jeē naní Renfán, ídolo jeē ní casáha máá ró ni cachíñúhún ró.

Jeē yúcuan cúu jeē siáha ri rohó quíhñ jicá ró nde yatā ñū Babilonia, achí yá.

<sup>44</sup> Te ni ndacu ya jniñu nuū Moisés jeē na sáha de vehe ñū nuū chíñúhún de ya, nájnūhun cáa jeē ní steén yā nuū de. Te tāca jí yō, nde nuū ñūhun téhé ní canevāha de vehe í un nū ní cachuvāha de tabla yuū jeē yosó jnūhun ley yā.

<sup>45</sup> Te ni castóo de vehe un nū ndihí sēhe de jeē cúu jí yō. Te ni quívi Josué jín jí yō ini nación yáha, te ni sáha ya jeē ní cacundeyí de jín táca ñayuu jeē ní cacoyūcu yáha ní cajinu i cuango i. Te ni quívicoo de táca ñuu i jín vehe í ún, te ni quendōo nde quiví ní cuu David rey. <sup>46</sup> Te ni cusí ni Yaā Dios jín rey David. Te ni jicān de nuū yā jeē sáha de in vehe í yā nuú, chí máá yá cúu Yaā Dios jí de Jacob. <sup>47</sup> Te ni cuu jeē nde sēhe yí de Salomón ni sáha

vehe í yā. <sup>48</sup> Te vēsú súcuan ni cuu te Yaā cujéhu téyí, tu ndéé yá maá vehe jeē casáha ñayuu, nájnūhun ni cahān tēe ni nacani jnūhun ya nde jenahán:

<sup>49</sup> Ni cahān yā:

Andiví cúu nájnūhun mesa nuū ndácu ri jniñu

te ñayiví cúu nájnūhun in nuū yítuu jehē rí.

Núu súcuan ¿te ndese cuu sáha ró vehe jeē cóndee rí,

te ndese cuu sáha ró nū ndétatu rí? <sup>50</sup> ¿A násūu máá rí ní sáha ndihí jeē iyó?

áchí máá Jítóho yō Yaā Dios.

<sup>51</sup> Te cáhān gā Esteban:

Yōho cácuñhni ní ní, te tu cácuñ ní chusóhó ní, te cácuñ ní nájnūhun ñayuu táca nación jeē tu cájini i jnūhun ya ni tu cácuñje i ya. Chi ní ní cájesi ní nū Espíritu Santo, te nájnūhun ni casáha jí yō jenahán, suni súcuan casáha ní vijna. <sup>52</sup> ¿A ní Iyo tēe nácani jnūhun ya nde jenahán jeē tu ní sáha ndevāha jí yō jín de? Chi jí yō ni cajehni de tēe ni canacani jnūhun jeē quíji máá Yáa ndaā. Te je ni quíji Yaā ún, te máá ní ni canastúu ni yá nuū tēe ni cajehni de ya. <sup>53</sup> Te vēsú nde jín táca ndajéhé yā ni jēhe ya ley yā nuū yō, te máá ní chí tu cásquicu ní, achí Esteban.

*Jeē ní cajehni de Esteban*

<sup>54</sup> Táca jnúhun yáha ní cajini sōho, te yōho ni caquiti ní, te cánacayihí yuhu cájito nuū Esteban. <sup>55</sup> Te máá Esteban chí ni cunuú Espíritu Santo jín de. Te ni jito de ichi ándiví, te ni jini de jeē ndíndee nū néne Yaā Dios, te índichi Jesús ichi ndávaha ya. <sup>56</sup> Te ni cahān de:

Vijna te jító ri jeē núne andiví, te jító ri nuū maá Yáa ní nduu tēe, índichi yā nuū cujéhu ya lado váha Yaā Dios, achí de.

<sup>57</sup> Yūcuán na te ni cajesi un sóho, te ni cacana cóhó, te inuú-ni ni candonda siquí Esteban. <sup>58</sup> Te ni

caquenehen Esteban cuangoo jíin de nde yatā ñúú. Te tēe ni cacahān yaá un jíin ndihi jnāhan de ni cachucú de ticāchí de ndíto ñin tēe suchí nání Saulo, te ni cacani de yuū xinī Esteban. <sup>59</sup> Te níní jéē cācāni tāca tēe un yúū xinī de te ni jicān tahú de nuū yā:

Tátā Jesús jeē cúu ní Jitoho ná, naquihín ní ánuá na vijna, áchí de.

<sup>60</sup> Te ni jecuíñi yití de te ni cahān jee de:

Tátā Yaā Dios, ma quénehen ní cuéchi siquí i jeē casáha i jíin ná, áchí de.

Súcuan ni cahān de te ni jihī-ni de.

*Jeē ní jito xeēn Saulo ñayuu cácanđje*

## 8

<sup>1</sup> Te Saulo, ni nujnahan ni de jeē ni jihī Esteban.

Te quívi un ní caquejéé de cájito xeēn ndasí de ñayuu cácanđje Jesús ini ñuu Jerusalén, te jeē yúcuan cúu jeē ní cajitē núu ñayuu cácanđje cuangoo i ní Judea jíin ní Samaría. Te tēe apóstol chí tu ní cájitē núu de. <sup>2</sup> Te sava tēe yíñúhún núu Yaā Dios, ni cachindúji de Esteban. Te yōhyo ni candahyū de jeē ni jihī Esteban. <sup>3</sup> Te Saulo chí jito xeēn de ñayuu cácanđje, te quívi de ndijnahan vehe te jnái de tēe, ñahan, chúhun de i vecāa.

*Jeē ní canacani i jnūhun Yaā Dios ndañúú Samaría*

<sup>4</sup> Te tācá ñuu nuū cuángoo tāca ñayuu ní cajitē núu un ní canacani i jnūhun ndese jnáma Yaā Dios ñayuu. <sup>5</sup> Te ni jinū Felipe ñin ñuu ndañúú Samaría, te nuū ñayuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. <sup>6</sup> Te tāca ñayuu ní cacutútú un ní cajini nahín váha i tāca jnūhun ni nacani Felipe, te ni cajito i tācá jniñu jéhu ni sáha de. <sup>7</sup> Chí cuehē ñayuu cándoho tachí ni canduváha

i, te cācana cóhó táchī un ní caque-ndacoo. Te cuehē ñayuu ni íjin jíin ñayuu ríngo ni canduváha. <sup>8</sup> Te jeē yúcuan ní cacusñi teyí ni ñayuu ñuu ún.

<sup>9</sup> Te ini ñuu un néne ñin tēe nání Simón, te tēe tásí cúu de. Te nde ná tu jinū Felipe ñuu Samaría, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñin tēe cújéhu tēyí cúu máá de. <sup>10</sup> Te nde tēe cácujeñu jíin ndivii cuiti ñayuu, cájetáhú ndasí i jnūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

<sup>11</sup> Te cájetáhú váha i jnūhun cáhán de, chí cuehē tiempo ni sáha de jniñu stáhú ní canaa ni i ni cajito i.

<sup>12</sup> Te nuū ni jíin Felipe, ni nacani de jnūhun váha ndese ndácu Yaā Dios jniñu, jíin jnūhun Jesucristo, te ni cacandje i te ni cajendute i, cúu tēe cúu ñahan. <sup>13</sup> Te ñuni máá Simón ni candje de te ni jendute de, te ni jica cuu de jíin Felipe. Te ni naa ni de jito de tācá jniñu jéhu jeē sáha Felipe jeē steén jeē cujéhu Yaā Dios.

<sup>14</sup> Te cáyūcu tēe apóstol ñuu Jerusalén, te ni canihín de jnūhun jeē ñayuu Samaría ni cacandje i jnūhun Yaā Dios. Te ni catají de Pedro jíin Juan cuangoo de yūcuán. <sup>15</sup> Te ni jinūcoo de, te ni cajicān tahú de jehē ñayuu un návāha na quívi Espíritu Santo ini anuá i jíjnāhan i. <sup>16</sup> Chí ná tu quívi ya ini anuá ni ñin i, chí máá-ni jeē ní cajendute i jeē ní cacandje i Jitoho yō Jesús. <sup>17</sup> Yūcuán na te Pedro jíin Juan ni casoó de ndaha de xiní i jíjnāhan i, te ni quívi Espíritu Santo ini anuá i.

<sup>18</sup> Te ni jito Simón jeē súcuan casoó apóstol ndaha de xiní ñayuu ún te súcuan quívi Espíritu Santo ini anuá i, te cúní de cuāha de xūhun núu tēe apóstol návāha nihín de poder un núu. <sup>19</sup> Chí ni cahān de:

Cúni na jéē cuāha ní poder yáha núu na, návāha núu ndé ñáyuu soó ná ndaha ná xíní i te quívi Espíritu Santo ini anuá i, áchí de.

<sup>20</sup> Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. <sup>21</sup> Ma nihín tahú rō jeē sáha ró jniñu yáha, chi tu íyó ndáa anuá rō nuū Yaā Dios. <sup>22</sup> Núu súcuan te jíni ñúhún jéē stóo rō jnúhun jeē jéni néé ni rō súcuan te cahān ndahú ró jíin Yaā Dios, te máá yá sanaa te cone cáhnu ni yā siquī jeē jéni néé ni rō súcuan. <sup>23</sup> Chi jíni rī jeē cucuésún ni rō siquī jeē sáha ri jniñu yáha. Te táca jéē neé jéni ni rō ni cunuú un jíin ró, achí Pedro jíin de.

<sup>24</sup> Yūcuán na te ni cahān Simón jíin de:

Cacān tahú ni jéhē na jíjnáhan ní núu maá Jítóho yō návāha tú jnahnū ndetū na nájnūhun ni cahān ní, áchí de.

<sup>25</sup> Te Pedro jíin Juan ni cacahān cají de ndese cácan díje de jnúhun Yaā Dios. Te jeē cuánungoo de ichi ñúu Jerusalén, te tíjni ndañúu Samaria ni canacani de jnúhun jeē jnáma ya ñayuu.

#### *Felipe jíin tée nación Etiopía*

<sup>26</sup> Yūcuán na te ni cahān ndajéhe maá Jítóho yō jíin Felipe:

Quihín ichi te quihín rō ichi sur, ichi jeē quénda Jerusalén cuahān nde ñuu Gaza, áchí yá.

Te ichi chúcuan chi máá ñuhun téhe cúu. <sup>27</sup> Te ni quihín Felipe ichi cuahān de. Te nde nación Etiopía ni quiji ñn tée eunuco jeē ndíso jníñu de cúu de tesorero nuū ñāhan cúu reina ndácu jniñu nación Etiopía, nání ña Candace. Téē un ní quichiñúhún de Yaā Dios ñuu Jerusalén. <sup>28</sup> Te cuanuhun de néne de nuū carreta de, te cáhu de tutu jeē ní tee Isaías, téē ni nacani jnúhun Yaā Dios nde jenahán. <sup>29</sup> Te máá Espíritu ni cahān yā jíin Felipe:

Cuáhán quíjnahan rō téē cuahān jíin carreta un.

<sup>30</sup> Te ni jejnahan Felipe carreta un, te ni jini sóho de jeē cáhu téē ún tutu jeē ní tee Isaías. Te ni cajnúhún de téē ún:

¿A jécūhun ni ni jnúhun jeē cáhu ní chí tuú? áchí de.

<sup>31</sup> Te ni cahān maá téē un jíin Felipe:

¿Te ndese jecūhun ni ná? Chi tú na téē castūhun núu ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

<sup>32</sup> Te jnúhun cáhu de tutu íi un cáhán suhva:

Nájnūhun lanchi jeē cuahán tí nuū cúu tí, súcuan ni casáha ñayuu jíin yá.

Te nájnūhun ñn londe quiti sáte jéē tu ndáhyú tí, súcuan ni sáha ya,

chi tú na vé ni cáhán cuiti yā ná ni cajicān i cuēchi siquī yā.

<sup>33</sup> Te hora jeē ní cajēhe i jnúhun canu yā, tu ní casáha ndaā i siquī yā jíin jnúhun ndaā,

te ni cajehni i ya ini ñayívi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

<sup>34</sup> Yūcuán na te ni cahān téē Etiopía un:

Cava vāha ni ní cachí ni núu ná, ¿ndé siquī cahán téē ni nacani jnúhun yáha? ¿A siquī maá de chí siquī ñnga téē? áchí de jíin Felipe.

<sup>35</sup> Yūcuán na te ni nacani Felipe jnúhun vāha Jesús nuū téē ún, chi ni quejéé de ni castūhún de jnúhun jeē ní cahu téē ún, jíin táca gá jnúhun jeē yosó núu tutu yā. <sup>36</sup> Te níni cuángoo de ichi ún te ni jinūcoo de nuū ñúhun ndute, te ni cahān téē Etiopía:

Yáha ñúhun ndute ¿te á tú cuu cuandute ná? áchí de.

<sup>37</sup> Te ni cahān Felipe:

Cuu te núu cándíje nīhin ni ndé jíin ini jíin ánuá ni táca jēē ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jēē Jesucristo cúu máá Séhe Yaā Dios, achí de.

<sup>38</sup> Te ni sáha de jeē na jécuiñī carreta de, te ni nuu ndindúú de cuango de ichi véyí núu ñūhun ndute ún, te ni scuándute Felipe tēe Etiopía. <sup>39</sup> Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñhún-ni Felipe. Te tēe Etiopía vēsú tuá ni jító de nuū Felipe, te cúsiñi de cuahān de. <sup>40</sup> Te ni nane Felipe ñuu Azoto. Te nácani de jñūhun ndese jnáma ya ñayuu, cuahān de táca ñuu nde ni jinū de Cesarea.

*Jeē ní nasāma ini Saulo ni sáha Jesucristo*

*(Hch. 22.6-16; 26.12-18)*

## 9

<sup>1</sup> Te Saulo chi máni cáhán de jeē cáhni de táca ñayuu cácandíje i máá Jítoho yō, te jeē yúcuan ní jehēn de nuū sutú cujéhnu ga. <sup>2</sup> Te ni jicān de carta jeē cahān jeē quihín de táca vehe i sinagoga ñuu Damasco te cuhni de tēe ñahan jeē cácandíje i Jesús, quiñi de jíin i ñuu Jerusalén nuú. <sup>3</sup> Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndéé iñ luz nuū de. <sup>4</sup> Te ni cotúú-ni de nuū ñūhun, te ni jini sōho de iñ jñūhun cáhán jíin de:

Saulo, Saulo, ¿najehe jító xeēn rō ruhū? achí.

<sup>5</sup> Te ni cahān maá de:

¿Na nihín cúu jeē cahān, Tátā?

Te ni cahān yā jíin de:

Máá rí cúu Jesús, te jeē jító xeēn rō ñayuu cácandíje i ruhū cúu jeē jító xeēn rō ruhū. Te jeē sáha ró súcuan cúu nájnūhun siquī jeē tu jéñdije ti te jéñú yatá tí xiní pulla, te súcuan stóho ti maá tí, achí yá.

<sup>6</sup> Te máá de chi quási i de jeē yūhú de, te ni cahān de:

Tátā, ¿na vé cuní ni jēē sáha ná núu súcuan? achí de.

Te ni cahān maá Jítoho yō jíin de:

Ndocuiñī, quiví ró ini ñuu, te yúcuan íyó iñ tēe jeē cachi nuū rō na vé cúu jeē cánuú sáha ró, achí yá.

<sup>7</sup> Te tēe cuango jíin Saulo, ni canaa ndasí ni de cájini sōho de ndusu jeē cahān, te tu ní cájito cuiti de nuū jeē cahān un. <sup>8</sup> Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco. <sup>9</sup> Te yúcuan ní condee de uní quiví. Te tu ní cúu cuiti coto de, ni tú na vé ni yéji de, ni tú na vé ni jíhi de.

<sup>10</sup> Te ñuu Damasco néne iñ tēe cándíje, nání de Ananías. Te máá Jítoho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní saña, Tátā, achí de.

<sup>11</sup> Te ni cahān maá Jítoho yō jíin de:

Quihin ichi te quihín rō calle jeē naní Calle Derecha, te vehe Judas cajñūhun ró iñ tēe nání Saulo ñuu Tarso, chi jicān tahu de. <sup>12</sup> Te nájnūhun ni jító ndijin de jeē maá ró, Ananías, ni jinū rō, te ni soó ró ndaha ró xiní de, te ni nanune tinūú de, achí yá.

<sup>13</sup> Yūcuán na te ni cahān Ananías:

Tátā, cuehē ñayuu cácahān jeē tēe yúcuan yōhyo jító xeēn de ñayuu cácandíje i nihín ñuu Jerusalén. <sup>14</sup> Te vijna ni quee de yahá, chi sutú cácujeñnu ni catejñiñu de vēji de jñi de táca ñayuu cácahān ndahú i jíin ní, achí de.

<sup>15</sup> Te ni cahān maá Jítoho yō jíin de:

Cuáhán, chi máá rí ni nacāji tēe un jēē quihín de nacani de jñūhun ri nuū táca ñayuu nación Israel jíin núu ñayuu táca gá nación nde jíin núu táca rey. <sup>16</sup> Chi steén rī nuū de jeē cánuú ndoho de cuehē jñūndóho jeē siquí rī, achí yá.

17 Yūcuán na te cuahān Ananías. Te ni quivī de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sãña véji ná nuū ni návāha na nánune tinūu ní, te návāha na cúnuú Espíritu Santo yā jín ní, áhí de.

18 Te ni nanune-ni tinūu Saulo, chi ni nungoo-ni nájnūhun soó chācá ní condihyū tinūú de ún. Te ni ndocuiñī de ni jendute de. 19 Yūcuán na te ni nacaji de staā, te ni nanihīn ni de. Te ni condee de jecu quivī jín tēe cácanđije jeē cáyūcú ini űuu Damasco.

*Jeē ní nacani Saulo jnūhun ini űuu Damasco*

20 Te ni quejéé-ni de nácani de jnūhun Jesús ini tãcá vehe ĩ sinagoga, áhí de jeē Jesús cúu Sēhe Yaā Dios. 21 Te tãca ñayuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jito xeēn de tãca ñayuu Jerusalén jeē cájicān tahu nuū Jesús? Te siquī yūcuan ní quee de yáha jéé cúhni de ñayuu cácanđije, te quihīn de jín i nuū sutú cácujeēnu nuú, áhí i.

22 Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú űuu Damasco, tu ní cánihīn de modo cahān de jeē tu íyó ndáa jeē cahān Saulo.

*Jeē ni cácu Saulo nuū jnáhan de hebreo*

23 Te ni yáha cuehē quivī. Te jnáhan de hebreo ni casquijnáhan jnūhun de jeē cáhni de Saulo. 24 Te ni nihīn Saulo jnūhun jeē cándito de nduú űuú tãca yéhyí pared jeē ní condūu ndihyú űuu ún. 25 Yūcuán na te ĩn jecuáa te tēe cácanđije ni caquihīn de Saulo, te ini ĩn jica cáhnu ni cascūun de Saulo jica pared ún, te súcuan ni cácu de.

*Jeē ní najinū Saulo űuu Jerusalén*

26 Te nuū ní najinū de űuu Jerusalén, te cúni de najnáhan de jín tēe cácanđije. Te ni cayūhu tēe un ní cajito de Saulo, chi tu ní cácanđije de jeē ní nduu Saulo tēe cándije nuū Jesús. 27 Te Bernabé cuahān de jín Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū máá Jítóho yō ichi nuū cuahān de, jín jéé ni cáhán yā jín de, jín jéé jéhu-ni ni nacani de jnūhun Jesús ini űuu Damasco. 28 Te ni condee Saulo űuu Jerusalén ni jica de jín tãca tēe apóstol. 29 Te jéhu-ni ni nacani de jnūhun máá Jítóho yō. Te jnáhan űuu de hebreo jeē cácahān yuhu griego, ni castáhān jnáhan jín de, te máá tēe un cácuni de cahni de Saulo. 30 Te ni cajini tãcá hermano cácanđije, te ni cajendēca de Saulo nde űuu Cesarea. Te yūcuan ní canatajé de Saulo cuanuhun de nde űuu de Tarso.

31 Te ñayuu cácanđije Jesús jeē cáyūcú Judea jín Galilea jín Samaria, tuá ni cájito xeēn ñayuu i. Te ni ije ga i jín jnūhun ya, te cándiso ĩyo i nuū máá Jítóho yō. Te Espíritu Santo ni chindéé ñáhán yá i te ni nducuehē gā i.

*Jeē ní nduvāha Eneas*

32 Te tãca lado jécondēhe Pedro ñayuu cácanđije, te suni ni jécondēhé de ñayuu cácanđije cáyūcú űuu Lida. 33 Te yūcuan ní jini de nuū ĩn tēe nání Eneas jeē ní cuu unā cuiyā cáa de chi ni ĩjin de. 34 Te ni cahān Pedro jín de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áhí de.

Te ni ndocuiñī-ni tēe ún. 35 Te tãca ñayuu cáyūcú űuu Lida jín ndúhvā Sarón ni cajito i jeē ní nacaca Eneas, te ni casquéndōo i tãca jnūhun jeē tu íyó ndáa te ni cacandije i máá Jítóho yō.

*Jeē ní natecu Dorcas*



<sup>36</sup> Te nde ñuu Jope ni iyo ñin ñahan cándije, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū. <sup>37</sup> Te tiempo yúcuan ní quejéé cuéhyi jín ña, te ni jihī ña. Te ni cascúchi i ndīyi ún, te ni cajequin i ndīyi un ndé ini cuarto xinī véhe. <sup>38</sup> Te yajni íne ñuu Lida jín ñuu Jope, te tēe cácandije ñuu Jope ni cajini jnūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

<sup>39</sup> Yūcuán na te ni quihin Pedro ichi cuahān de jín tēe ún. Te nuū ni jínū de, te ni cacao tēe un jín de nde xinī véhe nuū catú ndīyi ún. Te tēcá ñahan viuda ni candicó ndūū ña de cándahyū ña, te cástéén ña tēcá sahma jín tícachi jeē ni sáha Dorcas te ni saja ña nde na técu ña. <sup>40</sup> Yūcuán na te ni ndacu Pedro jniñu jeē na quéndacoo ndihi ñayuu ún quíngoo i nde yatā véhe. Te ni jecuiñi yití de ni jicān tahú de, te ni nandió cóto de nuū catú ndīyi ún, te ni cahān de:

Tabita, ndocuiñi ní, achí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. <sup>41</sup> Te ni jni de ndaha ña, te ni ndonehen de ña. Yūcuán na te ni nacana de xinī ñayuu cácandije nde jín ñahan viuda ni ndīvicoo i, te ni steén de ña nuū i jeē ní natecu ña. <sup>42</sup> Te ni jitē jnūhun jniñu yáha ní ñuu Jope cuahān, te cuehē ñayuu ni cacandije i jnūhun máá Jitoho yō. <sup>43</sup> Te cuehē quivī ni ndōo Pedro ini ñuu Jope, néne de vehe ñin tēe sáha curtir ñi, nání de Simón.

*Pedro jín Cornelio*

## 10

<sup>1</sup> Te ini ñuu Cesarea ni iyo ñin tēe nání Cornelio, ni cuu de capitán grupo soldado jeē naní Italiano.

<sup>2</sup> Te cúu de tēe ndíso iyo nuū Yaā Dios nde jín ndihi ñayuu vehe de, te yōhyo caridad ni tēe cúu de, chí jehe de xūhun núu ñayuu hebreo cándoho ndáhú, vésu nasūu tēe hebreo cúu de. Te níni jicān tahú de nuū Yaā Dios. <sup>3</sup> Te ñin quivī ni steén ndijin yā nuū tēe yáha nájnūhun cahunī jehíni, te ni jito de jeē ñin ndajéhé maá Yáa Dios ni quivī ya nuū néne de. Te ni cahān yā jín de:

Cornelio, achí yá.

<sup>4</sup> Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jín de:

Je chíhi Yaā Dios cuenta jeē jicān tahú rō jín jeē sáha ró caridad.

<sup>5</sup> Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

<sup>6</sup> Chí néne núu de vehe tocayo de Simón, tēe sáha curtir ñi, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhé yā.

<sup>7</sup> Te ndajéhé yā jeē ni cáhān jín Cornelio, cuahān-ni ya. Te ni cana de uū mozo de jín ñin soldado jeē yñūhún núu Yaā Dios, chí cúcāhnu ni de jeē squícu vāha tēe ún. <sup>8</sup> Te ni nacani ndihi de jnūhun nuū tēcá tēe ún, te ni tají de cuangoo nde ñuu Jope.

<sup>9</sup> Te inga quivī un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siquī véhe chí cándaā, te yūcuan cácān tahú de.

<sup>10</sup> Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijin yā nuū de.

<sup>11</sup> Te ni jito de jeē núne andiví. Te ni jito de nájnūhun ñin sahma manta jité cáhnu te núhni jñahan ndicúún punta, te ni cuun vēji nuū de. <sup>12</sup> Te chíji un cáñūhun ndínuu quiti, tēcá quiti cúun ndaha jín táca cóo jín táca quiti cándava. <sup>13</sup> Te ni jini sōho de ñin jnūhun ni cahān:

Pedro, ndocuiñi te cahni rō tācá quiti jiñā, te caji rō tī, áchí.

<sup>14</sup> Te ni cahān Pedro:

Ma caji na, Tātā, chi tu yéji cuiti na táca quiti jeē cahán ley ni jéē tú vāha caji na tí, chi nájnūhun jeē tu cáhīyo ndoo ti nuū ní, áchí de.

<sup>15</sup> Te ni cahān tucu jnūhun un jíin de:

Achí rí jeē iyó váha caji rō tācá quiti jiñā, chi ni sándoo rí, te ma cahán maá ró jeē tu cáhīyo ndoo ti, áchí. Te súcuan ni steén caji yá nuū de jeē cúu quihín de nuū ñáyuu vésú násūu jnāhan ñuu de hebreo cúu.

<sup>16</sup> Te unī jíinu ni cahān súcuan jíin de. Te sahma un ní ndaa cuanuhun andiví. <sup>17</sup> Te níni nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí téé ún. <sup>18</sup> Te cácahān jee de cácajnūhún de núu yúcuan ndeé Simón jeē suni nání de Pedro. <sup>19</sup> Te níni nácani ga ni Pedro siquí jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cánanducú róhó. <sup>20</sup> Ndocuiñi te nanuu ró, te ma cáni ni rō jeē tú vāha quihín rō jíin de, vésú násūu jnāhan ñuu rō hebreo cácuu de, chí maá rí ni tají rí de vējicoo de, áchí yá.

<sup>21</sup> Yūcuán ña te ni nanuu Pedro nuū tēe ni tají Cornelio, te ni cahān de:

Maá ná cúu tēe cánanducú ní. ¿Te na siquí vējicoo ní núu na núu súcuan? áchí de.

<sup>22</sup> Te ni cahān mozo un:

Cornelio, tēe cúu capitán, ni tají de sañá. Te tēe ndaā, tēe ndiso iyo nuū Yaā Dios cúu de, te táca ñáyuu hebreo suni cácahān i jeē téé vāha cúu de. Te ni cahān iin ndajéhé yā jíin de jeē na cána de níhín jéé ní vehe de te chusóhó de jnūhun cahān ni jíin de.

<sup>23</sup> Yūcuán na te ni cahān Pedro jíin mozo un jéé na cúcōo de ini vehe ún, te ni candōo de yūcuán.

Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácañdije ñuu Jope jíin de.

<sup>24</sup> Te nde inga quiví ni jinūcoo de ñuu Cesarea. Te Cornelio ndétu de jinūcoo Pedro, chí ni nastútú de táca jnāhan de jíin táca amigo de jeē quijnáhan vāha ga de jíin.

<sup>25</sup> Te nuū ni jíin Pedro jijnáhan de, te ni quenda Cornelio ní cahān de jíin Pedro, te ni jecuiñi yití de jeē chiñúhún de Pedro nuú. <sup>26</sup> Te Pedro ni ndonehen de Cornelio, te ni cahān de:

Ndocuiñi ní, chí sañá suni iin tēe-ni cúu ná, áchí de.

<sup>27</sup> Te cándajnūhún de ni quivícoo de ini vehe. Te ni jito Pedro jeē cáyūcu cuéhē ñáyuu ini vehe de.

<sup>28</sup> Te ni cahān Pedro jíin ñáyuu ún:

Je cājini vāha ni jijnáhan ní jéé ley jeē cánevāha saña ñáyuu hebreo, cáhān jeē tú vāha jeē quijnáhan ná jíin ní quivícoo ná vehe ní siquí jeē cúu ní ñáyuu sñn nación. Te Yaā Dios chí ni steén yā nuū na jéé ma cujéé ni na núu ní iin ñáyuu. <sup>29</sup> Jeé yúcuan cúu jeē vēji-ni ná, chí ni cana ní saña, te tu ní sájéé ni ná. Te na cájnūhun ná nihín, ¿na siquí ni cana ní saña? áchí Pedro.

<sup>30</sup> Yūcuán na te ni cahān Cornelio:

Vijna iyó cúun quiví nájnūhun maá hora yāha jéé cúu cahuní jehíni, te ndite ni ná chí súcuan chíñúhún ná nuū yā, te jicán tahu na ini vehe ná. Te ni quiji iin ndajéhé yā nuū ná, te ndíndéé sahma ñúhun ya. <sup>31</sup> Te ni cahān yā jíin ná: Cornelio, je ni jini sōho Yaā Dios jeé jicán tahu rō, te chíhi ya cuenta jeé sáha ró caridad. <sup>32</sup> Núu súcuan te tají ró mozo na quíngoo de ñuu Jope quicana de Simón jeé suni nání de Pedro, na quíji de nuū rō. Chí tēe un néne de vehe tocayo de Simón, tēe sáha curtir ñii, te yajni yumar ndeé vehe de. Te quee tēe ún te castúhún de nuū rō jnūhun cánuú, áchí yá jíin ná. <sup>33</sup> Súcuan

ni cuu te ni tají-ni ná mozo na cuajécoo de cana de níhín, te na cútahū ná, chí vāha ní sáha ní jéē véji ní. Te vijna ní candutútú ná yāha návāha tāca ná cuni sōho ná ndíhi jnūhun Jitoho yō Yaā Dios jeē ní jéhe ya cahān ní, áchí de.

*Jeē ní nacani Pedro jnūhun ya vehe Cornelio*

<sup>34</sup> Yūcuán na te ni cahān Pedro:  
Vijna te ni jini vāha ná jéē Yaā Dios inuú-ni sáha ya jíin táca ñáyuu, cúu ñáyuu hebreo jíin ñáyuu tāca gá nación. <sup>35</sup> Chi cúsi ní yā jíin ñáyuu tācá-ni nación núu cándiso Iyo i nuū ya te cásáha i jniñu ndaā. <sup>36</sup> Chi ní cahān yā jíin ñáyuu Israel jeē ndávicoo tāca ñáyuu nuū jnūhun manī yā jíin i sáha Jesucristo. Te máá yá cúu Jitoho tāca yóhó. <sup>37</sup> Máá ní je cájini ní ndese ní cuu. Chi ná ní jmu ní nacani Juan jnūhun jíin jéē ní scuándute de ñáyuu, te ní quejéé Jesús nácani ya jnūhun nde Galilea, te ní jitē jnūhun un ní cáhnu Judea. <sup>38</sup> Te cájini ní jéē Yaā Dios ní jéhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ní jéē ní jica cuu ya ní sáha ya jniñu vāha, te ní nasávāha ya tāca ñáyuu jeē cándoho i sáha jexeén, chí Yaā Dios ní chindéé ñáhán yá Jesús. <sup>39</sup> Chi máá ná cánacani cájí ná jnūhun tācá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ní cajehni i ya, chí ní cata caa i ya jicā cruz. <sup>40</sup> Te Yaā Dios ní nastécu yā maá Jesús nuū uní quiví, te ní ndiji ya nuū na ní cajito ná núu yā ní sáha Yaā Dios. <sup>41</sup> Te tu ní quíji ya nuū tācá inga ñáyuu, chí nuū maá-ni tāca ná jeē jé ní nacāji Yaā Dios sāña jéē nácani ná jnūhun tācá jniñu jeē ní cajito ná. Chí ní cayejí na stáā ní cajihí ná ndute jíin yá ná ní nane ya jeē ní natecu yā. <sup>42</sup> Te ní ndacu ya jniñu nuū na jíjnāhan ná jéē na nácani ná jnūhun ya nuū tāca ñáyuu te cahān cají ná jeē maá

Yāā Dios ní jeni ya Jesús jeē sándaā yā jniñu ñáyuu cátecu jíin ñáyuu ní cajihí. <sup>43</sup> Chí jnūhun Jesús cúu jeē ní cacahān tāca téē ní canacani jnūhun Yaā Dios nde jenahán. Chí ní cacahān de jeē tāca ñáyuu jeē candíje i Jesús, cone cáhnu ní yā nuū cuéchi i, áchí Pedro.

*Jeē ní quiví Espíritu Santo ini anuá ñáyuu jeē násuú hebreo cácuu*

<sup>44</sup> Te ní cáhán gā Pedro tāca jnūhun yáha te ní quiví-ni Espíritu Santo ini anuá táca ñáyuu cájini nahín jnūhun ya jeē cahán de. <sup>45</sup> Te téē hebreo jeē ní jínūcoo jíin Pedro jeē suni cácandíje de Jesús, nahán ní canaa ní de ní cajito de jeē suni ní quiví Espíritu Santo ini anuá ñáyuu jeē násuú hebreo cácuu. <sup>46</sup> Chí ní cájini sōho de cacahān ñáyuu un sín yuhu, te cacahān i jeē yōhyo cújéhnu Yaā Dios. <sup>47</sup> Yūcuán na te ní cahān Pedro:

¿Ndé in casi jeē ma cuándute ñáyuu yáha? Chí ní quiví Espíritu Santo ini anuá maá i, nájnūhun ní quiví ya ini anuá maá yó, áchí de.

<sup>48</sup> Te ní cahān de jíin i jeē na cuándute i síquí jeē ní cacandíje i Jesucristo. Yūcuán na te ní cacahān ndahú i jíin Pedro jeē na quéndōo de jecu quiví jíin i.

*Jeē ní nacuāha Pedro cuenta nuū ñáyuu cácandíje ini ñuu Jerusalén*

## 11

<sup>1</sup> Te téē apóstol jíin táca hermano cáyucú Judea, ní canihín de jnūhun jeē súni ñáyuu sín nación ní cacandíje i jnūhun Yaā Dios. <sup>2</sup> Te cuanuhun Pedro ñuu Jerusalén. Te sava téē hebreo jeē cácandíje de ya ní cacahān de nuū Pedro:

<sup>3</sup> ¿Najehē ní condee ní vehe ñáyuu jeē násuú ñáyuu nación yō cúu? Te ní yeji ní jíin i, áchí.

<sup>4</sup> Yūcuán na te ní nacani cájí Pedro jnūhun nuū téē ún ndíhi ndese ní cuu síquí téē sín nación:

<sup>5</sup> Néne ná ñuu Jope. Te níni jícan tahu na, te ni steén ndijin yā nuū ná, te ni jito ná nájñuhun ñn sahma manta jité cáhnu jeé nuhní jnáhan ndicúun punta, te nde ichi ándiví ní cuun ni quiji nuū ná. <sup>6</sup> Te ni jito vāha ná, te ni jini na jéē chíji un cáñuhun quití cúun ndaha jíin quití xéén jíin cóo jíin quití cándava. <sup>7</sup> Te ni jini sōho ná ñn jñuhun ni cahān jíin ná: Pedro, ndocuññi te cahni rō tācá quití jíñā, te caji rō tī, áchí jíni ná. <sup>8</sup> Te ni cahān ná: Ma cáji na, Tātā, chí tu yéji cuiti na táca quití jeē cahán ley ni jéē tu cáhīyo ndoo tī nuū ní, áchí ná. <sup>9</sup> Yūcuán na te jñuhun jeē véji nde andiví ní cahān tucu jíin ná: Ni sándoo máá rí tī, te ma cahán gā rō jeē tu cáhīyo ndoo tī, áchí jíni ná. <sup>10</sup> Te unī jínu ni cahān súcuan. Yūcuán na te ni ndaa sahma un cuánuhun andiví. <sup>11</sup> Te hora un ní jinūcoo unī tēe vehe nuū ni cóndee ná un, cánanducú de sañá, te ñn jnáhan ñuu de Cesarea ni taji de vējicoo de. <sup>12</sup> Te máá Espíritu ni cahān yā jíin ná jeē ma cáni ni na jéē tú vāha quihñn na jíin de. Te suni iñū hermano yáha ní jengoo jíin ná, te ni quivícoo ná ini vehe tēe nání Cornelio. <sup>13</sup> Te tēe un ní nacani de jñuhun nuū na jíjnáhan ná jéē ní jito de ñn ndajéhé Yāā Dios, índichi yā ini vehe de, te ni cahān yā jíin de: Taji rō jecu tēe na quíngoo de ñuu Jope, quicana de Simón jeē suni nání de Pedro, na quíji de. <sup>14</sup> Te tēe ún cachi de nuū rō ndese jnama Yāā Dios rohó jíin ndihí ñayuu cáyūcú vehe rō, áchí yá. Achí Cornelio jíin ná. <sup>15</sup> Te nuū ní quejéé ná cahán na, te ni quiví-ni Espíritu Santo ini anuá i jíjnáhan i, nájñuhun ni quiví ya ini anuá máá yó xīhna gā. <sup>16</sup> Yūcuán na te ni nucūhun ni na jñuhun ni cahān máá Jítoho yō: Jendaá jeē máá ndute-ni ní scuándute Juan ñayuu. Te rohó jíjnáhan rō chí nájñuhun cuandute rō jíin Espíritu Santo, cúu jeē cóndee yā ini anuá rō, achí yá. <sup>17</sup> Te suni ni

jéhe Yāā Dios Espíritu yā nuū máá i nájñuhun ni jéhe ya nuū máá yó jeē cácandíje yó Jítoho yō Jesucristo. Núu súcuan ¿te ndé ñn cúu ná jéē cási ná jniñu jeē sáha Yāā Dios? áchí Pedro.

<sup>18</sup> Súcuan ni cajini sōho de jñuhun yáha, te tuá ni cácahān de nuū Pedro, chí sa suhva ni cacahān de jeē yóhoyo cújéhu Yāā Dios. Te ni cacahān de:

Suni ni jéhe Yāā Dios jñuhun jeē na nácani ni ñayuu táca gá nación jeē stóo i cuēchi i návāha cotecu i níí cáni núu súcuan, áchí de.

*Ñayuu cácandíje ini ñuu Antioquía*

<sup>19</sup> Te quiví ní cajehni de Esteban ni quejéé de cájito xeén de ñayuu cácandíje, te jeē yúcuán ní cajitē núu ñayuu un táca ñuu cuangoo i, te ni jinūcoo i Fenicia jíin Chipre jíin ñuu Antioquía. Te ni canacani i jñuhun vāha ya nuū máni jnáhan hebreo i jeē cáyūcu yúcuán, te tu ní cánacani i jñuhun ya nuū ínga ñayuu. <sup>20</sup> Te jecu tēe cácandíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu táca nación jeē tu cájini i jñuhun ya ni canacani de jñuhun máá Jítoho yō Jesús jeē jnáma ya i. <sup>21</sup> Te máá Jítoho yō ni chindéé ñáhán yá de, te cuehē ñayuu ni castóo i jniñu jeē tu íyó ndáā te ni cacandíje i máá Jítoho yō.

<sup>22</sup> Te ñayuu cácandíje ini ñuu Jerusalén ni cajini jñuhun i, te ni catajī i Bernabé cuahān de nde ñuu Antioquía. <sup>23</sup> Te nuū ni jínū Bernabé yūcuán, te ni jini de jeē yóhoyo vāha ni sáha Yāā Dios jíin i, te ni cusī ndasí ni de. Te ni stihví ní de táca ñayuu un jéē jíin ini jíin ánuá i na cóndihví ní i squícu vāha i nuū máá Jítoho yō, te ma náyūhú i. <sup>24</sup> Chí tēe vāha cúu Bernabé, te ni cunuú Espíritu Santo jíin de, te cándíje níhin de. Te ni cacandíje cuehē ñayuu nuū máá Jítoho yō ni sáha de.

<sup>25</sup> Yūcuán na te cuahān de nde ñuu Tarso cuananducú de Saulo.

Te ni nanihīn jnāhan de jīin Saulo, te ndéca de tēe un ní ndee de ñuu Antioquía. <sup>26</sup> Te ní ñin cuiyā ni candutútú de jīin ñáyuu cácandíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano siquī jeē ní candíje i Cristo.

<sup>27</sup> Te suni tiempo un ní quenda-coo tēe cánacani jnūhun Yaā Dios ñuu Jerusalén cuango de nde ñuu Antioquía. <sup>28</sup> Te ñin jnāhan de jeē naní Agabo ni ndocuiñī nuū hermano cácandíje. Te ni steén Espíritu Santo nuū de, te ni castūhún de jeē cóo ñin jnamā xeēn ní cáhnu. Te ni cuu jnamā ún ñin parte tiempo jeē ní ndacu Claudio jniñu jeē ní cuu de rey. <sup>29</sup> Yūcuán na te ni candajñūhun tēe cácandíje ñuu Antioquía jeē cuáha ñin ñin de nasaa canda de cuáha de te tají de quihīn cotecu hermano cáyūcú Judea. <sup>30</sup> Te súcuan ni casáha de. Te ni catají de Bernabé jīin Saulo ni cajendēca de nuū tēe jéhnu cándiso jniñu nuū ñáyuu cácandíje cáyūcú Judea.

*Jeē ní jehni Herodes Jacobo, te ni chune de Pedro vecāa*

## 12

<sup>1</sup> Te suu tiempo un ní quejéé rey Herodes jito xeēn de sava ñayuu cácandíje. <sup>2</sup> Te ni ndacu de jniñu jeē jīin espada na cáhni i Jacobo ñani Juan. <sup>3</sup> Te ni jini de jeē ní cacusī ni tēe hebreo jeē ní sáha de súcuan, te jeē yúcuán suni ni jni de Pedro. Te máá quivī un ní cuu vico jeē yéji ñayuu pan jeē tu yīhi levadura. <sup>4</sup> Te nuū ní jni de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ñin ñin grupo. Chi cúní Herodes jeē na yáha vico un jéé cúu vico pascua de quenehen de Pedro vecāa un stéén de nuū ñáyuu cuehē. <sup>5</sup> Te súcuan íne Pedro vecāa,

te cándito soldado un de. Te ñayuu cácandíje chi ñihin ni cajicān tahú i jehē Pedro nuū Yaā Dios jeē na cácu de.

*Jeē ní quenehen Yaā Dios Pedro vecāa*

<sup>6</sup> Te jéni ni Herodes jeē na cundijin inga quivī te quenehen de Pedro vecāa, te stéén de nuū ñáyuu un núú. Te núhni Pedro jīin úu cadena, cátu de quixí de mēhñu úu soldado jecuáa ún, te suni cáhīn ga soldado cándito yéhyí vecāa ún. <sup>7</sup> Te suu jecuáa ún te sanaa-ni te ni jinū ñin ndajéhé maá Jítoho yō, te ni ndindéé ini vecāa. Te ni squīhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhni ndaha de un ní canandajī-ni. <sup>8</sup> Te ni cahān ndajéhé yā jīin de:

Nacuhni ñihin chíji rō, te nuquīhi rō ndíjēn rō, achí yá.

Te súcuan ni sáha de. Te ni cahān tucu ndajéhé yā jīin de:

Condií ticāchi rō, te condiquīn rō ruhū na quihín yō, achí yá.

<sup>9</sup> Te ni quenda de ndíquín de ya cuahān de jīin yá, te jéni ni de jeē násūu jéndaá cúu jeē sáha ndajéhé yā jīin de, chí jéni ni de jeē ñin jeē ni stéén yā jito ndijin de cúu. <sup>10</sup> Te ni yáha ya jīin de uū nuū cándito soldado. Te ni jinū yā jīin de yéhyí cáa nuū quenda de caca de calle, te yéhyí un ní nune iī-ni máá. Te ni quenda ya jīin de, te ni yáha de ñin calle cuahān de. Yūcuán na te ni cjiyo-ni ndajéhé yā nuū de cuahān yā. <sup>11</sup> Te ni nducájí ni Pedro te ni cahān maá ní cahān ñin de:

Vijna te ni jini ndaā rī jeē ní tají máá Jítoho rī ndajéhé yā ni quiji, te ni jnama ya ruhū nuū Herodes jīin núu tāca ñáyuu hebreo jeē cácuni i sáha xeēn i jīin rí nuú, achí de.

<sup>12</sup> Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuán cáhīn

tútú cuéhē ñayuu cájicān tahú i jehē Pedro. <sup>13</sup> Te cáhán Pedro ni jinū de yéhyí fuera, te ñin sūchi sǎhí nání Rode cuahān i jeē cūni i núu ndé ñin cúu jeē cáhán. <sup>14</sup> Te ni nacuni i tachí Pedro, te jeē ní cusī ni i te tu ní núne i yéhyí un, chi ni nandió cóo i te jínu i ni ndāvi i ini cuarto. Te ni castühún i jeē ní quee Pedro índichi de yéhyí fuera. <sup>15</sup> Te ni cacahān jín i:

Jeē cáhán neé ró, achí.

Te máa i ñihin cáhán i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

<sup>16</sup> Te víhyá gā cáhán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. <sup>17</sup> Te máa de ni sáha de ndaha de jeē ma cúvaā gā i, te ni castühún de ndese ni quenehen máa Jítóho yō de vecāa. Te ni cáhán de:

Castühun núu Jacobo jín núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

<sup>18</sup> Te nuū ní cundijin, te ni cacuvaā teyí soldado jeē tuá Pedro. <sup>19</sup> Te ni ndacu Herodes jniñu jeē na nánducú váha i Pedro. Te tu ni cānanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

*Jeē ni jhī Herodes*

<sup>20</sup> Te yōhyo ni quivī ni rey Herodes nuū ñayuu ñuu Tiro jín ñuu Sidón. Te ñayuu un ní candajnühún i jeē inuū-ni quivicoo ndih i nuū rey un. Te ni casáha i amigo i jín Blasto, tēe cújéhu jéjníñu nuū rey un. Te ni cacahān ndahú i jín de jeē na cáhán ndahú de jín rey un jēe na ndéi ni de jín i. Chi nde ñuu maá rey un cájeen i jeē cáyeji i. <sup>21</sup> Te ni jeni Herodes ñin quivī. Te ni nucūhun

de sahma yñühún de, te ni cucōo de mesa nuū ndácu de jniñu, te ni cáhán de ñin jnūhun jehū ni cajini sōho i. <sup>22</sup> Te ñayuu un ní caquejé i cácahān jee i jnūhun yñühún jín de:

Nasūu tēe-ni cúu ní, chi ñin yaā cúu ní, achí i jijnáhan i.

<sup>23</sup> Te máa hora un ní sáha-ni ñin ndajéhé maá Jítóho yō jeē ní jniñ ñin cuehyī xeñ rey Herodes, te ni cayeji tindācú de, te ni jihī de, chi ni sandúxí-ni de máa de te tu ní cáhán de jeē Yaā Dios cúu jeē cujéhu.

<sup>24</sup> Te ni jite gā jnūhun máa Jítóho yō, te cuehē ndasí ñayuu ni candíje i tācá-ni lugar.

<sup>25</sup> Te ni jinu jniñu jeē ní quindeca Bernabé jín Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándeca de Juan jeē suni nání de Marcos cuahān jín de.

*Jeē ní caquejé Bernabé jín Saulo caca cuu de nacani de jnūhun ya*

## 13

<sup>1</sup> Te mēhñu grupo ñayuu cácandíje ini ñuu Antioquía ní cahīyo tēe cástéen jín tēe cānacani jnūhun Yaā Dios, te cānaní de Bernabé, Simón jeē suni nání de Negro, Lucio ñuu Cirene, Saulo, jín Manaén tēe ni jehnu jín inga Herodes jeē ní cuu gobernador Galilea. <sup>2</sup> Te ñin quivī jeē cahīyo ndite ni tēe yáha cáchiñühún de nuū maá Jítóho yō, te ni cáhán maá Espíritu Santo jín de:

Cúni rī jeē sasín ró Bernabé jín Saulo na quíngoo de jniñu jeē ní jeni ri de, achí yá.

<sup>3</sup> Yūcuán na te ni cajicān tahú ndite ni de, te ni casoó de ndaha de xinī Bernabé jín Saulo, te súcuan ni catajī de ndindúú tēe ún cuanacani de jnūhun nuū tāca ñayuu.

*Jeē ní canacani Bernabé jín Saulo jnūhun ya nde Chipre*

<sup>4</sup> Te ni sáha Espíritu Santo jeē íchi ñuū Seleucia cuangoo de. Te

yūcuan ní quīvicoo de ñn barco cuango de nde Chipre, ñuhun jeē ñe sñn nuū ndúte. <sup>5</sup>Te ni jinūcoo de ñuu Salamina nuū cájecuññi barco, te ni canacani de jñuhun Yaā Dios ini tācá vehe ñi sinagoga jñahan hebreo de. Te suni cuahān Juan chindéé ñáhán jíin de. <sup>6</sup>Te ni cajica nuu de ní-ni Chipre nde ni jinūcoo de ñuu Pafos jeē suni ñe nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te cáhán stahú de jeē ñn tēe nácani jñuhun Yaā Dios cúu de. <sup>7</sup>Te tēe tásí un jéjññu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñuhun Yaā Dios. <sup>8</sup>Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. <sup>9</sup>Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. <sup>10</sup>Te ni cahān de:

Tēe sáha jññu néé stáhú ñáhán cúu ró, chí sēhe jexeén cúu ró te jési rō nuū tācá jññu ndaā. Te tu jécuiññi rō jeē sáca núu ró síquí jñuhun ndaā maá Jítoho yō návāha ma cándíje ñayuu nuū yā. <sup>11</sup>Te maá Jítoho yō stóho ya rohó vijna, te cucuáá ró jeē ma cóto ga rō niāndii jecu quiví, achí Pablo.

Te ni cunee-ni nuū tēe tásí un, te quéndāha quéhíyú de cuahān de ndúcú de ndé vé jññi ndaha de stéén ichi nuū de quínuhun de. <sup>12</sup>Yūcuán na te ni jini gobernador jeē súcuan ni cuu, te ni cándíje de jñuhun maá Jítoho yō, te náā ni de jini sōho de jñuhun ya.

*Jeē ní coyūcu Pablo jíin Bernabé Antioquía ndañúu Pisidia*

<sup>13</sup>Yūcuán na te ni quendacoo Pablo jíin Bernabé jíin Juan ñuu Pafos, te ni quīvicoo de barco te cuango de ñuu Perge ndañúu Panfilia. Te yūcuan ní cusñn Juan, te

cuanuhun de ñuu Jerusalén. <sup>14</sup>Te ni quendacoo Pablo jíin Bernabé ñuu Perge cuango de, te ni jinūcoo de ñuu Antioquía ndañúu Pisidia. Te quiví ndétātu ní quīvicoo de ini vehe ñi sinagoga, te ni cacucōo de. <sup>15</sup>Te ni cahu tutu ley yā jíin tutu ní catee tēe ni canacani jñuhun ya nde jenahán. Yūcuán na te tēe cácujeñnu ini vehe ñi sinagoga, vii-ni ni catajé de tēe cahān jíin Pablo jíin Bernabé:

Amigo, núu íyó jñuhun cahān ni jéē stihví ni ni ñáyuu yāha, te cahān ní na cúni nahín i núu súcuan, achí de.

<sup>16</sup>Yūcuán na te ni ndocuññi Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jñahan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní.

<sup>17</sup>Maá Yáa Dios yohó ñáyuu Israel, ni nacaji ya jíi yō jijnáhan de. Te níni jéē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yā ni quenehen ya de nación Egipto.

<sup>18</sup>Te uū xico cuiyā ni cajica de nuū ñuhun téhé, te ni jendeyí ni yā jíin de jeē ní castívi de. <sup>19</sup>Te ni snāa yā uxā nación Canaán, te ni jēhe ya ñuhun un núu tāca jíi yō cúu tahū de.

<sup>20</sup>Yūcuán na te ni jeni ya tāca tēe ni candacu jññu nuū de nájñuhun cuñ ciento uū xico uxí cuiyā, nde quiví ní cotecu Samuel, tēe ni nacani jñuhun ya. <sup>21</sup>Yūcuán na te maá ñáyuu un ní cajicān i ñn rey, te ni jeni Yaā Dios Saúl ni ndacu de jññu nuū i uū xico cuiyā.

Te yucūn Benjamín sēhe Cis ni cuu Saúl. <sup>22</sup>Te ni quenehen ya jññu Saúl, te ni jeni ya David ni cuu de rey nuū i. Te ni cahān cají yá jñuhun de: Cúsñi ni rī jíin David sēhe Isaí, chí sáha de tāca jéē cuní rī, achí yá.

<sup>23</sup>Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jñama ya yohó ñáyuu Israel, chí súcuan ni

jejnūhun ya. <sup>24</sup> Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnāhan ñuu yō Israel jeē na nācani ni i jeē stóo i cuēchi i, te cuandute i. <sup>25</sup> Te nuū cuácuyajni jeē cúu Juan, te ni cahān de: Cándētu ró jéé quiji Cristo, te jéni ni rō jeē ruhū cúu, te nasūu rí cúu. Chi quiji ya, te cújéhnū ndasí yá jeē ni ndijēn yā tu cújéhnū ri tava rī, achí de.

<sup>26</sup> 'Amigo jijnāhan ní, tāca níhín jeē cácuu yó séhe yucūn Abraham jíin tāca níhín jeē suni cándiso Iyo ní núu Yaā Dios, chi cúní Yaā Dios jeē na cúní yō jnūhun yáha jeē cáhán ndese jnáma ya yohó. <sup>27</sup> Chi tāca ñáyuu ñuu Jerusalén jíin tāca tée cácujehnū nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahān quivī ndétātu ní cajini sōho i jnūhun ni cacahu jeē ní catee tée ni canacani jnūhun Yaā Dios nde jenahán. Te vésú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jnūhun jeē ní cacahān tée ni canacani jnūhun ya nde jenahán. <sup>28</sup> Vésú tu ní cánihín i ni ñn cuēchi siquī yá jeē cúu yā, te ni cacahān níhín i jíin Pilato jeē na cúu yā. <sup>29</sup> Te ná ni jinu ni squícu siquī yā tāca jnūhun cáhán nuū tútu iī, te ni casnúu de ya jicā cruz, te ni cachindūji de ya ñn yaū ní jete jicā cáva. <sup>30</sup> Te ni sáha Yaā Dios jeē ní natecu yā. <sup>31</sup> Te ñayuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cáji jnūhun ya nuū tāca gá jnāhan yó hebreo vijna.

<sup>32</sup> Te maá ná jijnāhan ná cánacani ná jnūhun vāha yáha núu ni jíjnāhan ní jéé súcuan ni jejnūhun ya nuū tāca jíi yō. <sup>33</sup> Te jnūhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā

Jesús. Chi suhva cáhán salmo uū jeē cáhán yā jíin Séhe ya Jesús: Máa ró cúu Séhe rí, te vijna ni sajehnū ri rohó jéé cúu ri Tatá rō, achí yá.

<sup>34</sup> Te ni nastécu yā Séhe ya Jesús návāha ma tehyú cuiṭi yā, chi suhva cáhán tutu iī jeē ni cáhán Yaā Dios nde jenahán: Te nihín maá ró tāca jéé váha ni jejnūhun ri nuū David, achí. <sup>35</sup> Te suni súcuan cáhán inga salmo jeē ní tee David jnūhun jeē cáhán Jesús jíin Yaā Dios: Ma cuáha ni jnūhun tehyū ná, chi jéniñū ná núu ní te manī ni jíin ná, achí. <sup>36</sup> Te David chi jíin yō jeē ní jejnūñū de nuū ñáyuu ní cotecu de jíin, nájnūhun ni cuni Yaā Dios. Te ni jihí de, te ni quindūji de nájnūhun ni quindūji tāca jíi yō, te ni tehyū de.

<sup>37</sup> Te Jesús, Yaā ní nastécu Yaā Dios, chi tu ní téhyú cuiṭi yā. <sup>38</sup> Jeē yúcuan jíin níhún jecūhun ni ní, amigo, jeē Jesús cúu Yaā cóne cáhnu ni nuū tāca cuēchi yó. <sup>39</sup> Chi ni canducú ní ndahva ni cuēchi ní jéé squícu ní ley jeē ni jéhe ya nuū Moisés, te tu ní cúu ndahvā cuēchi ní súcuan. Te Jesús cúu Yaā ndáhva ndíhi cuēchi ñáyuu jeē cácandíje i tāca jéé ni sáha ya jehé i. <sup>40</sup> Núu súcuan te coto ní jíjnāhan ní jéé ma ndóho ní tāca castigo jeē ní cacahān tée ni canacani jnūhun Yaā Dios nde jenahán, chi suhva ni cahān Yaā Dios:

<sup>41</sup> Tāca rōhó ñáyuu jeē casácatā, na cóto ró na castigo xeēn quiji siquī rō,

te naa ni rō coto ró, te cuu rō.

Chi tiempo maá ró te sáha ri jniñu xeēn

jeē ma cándíje cuiṭi rō jeē súcuan sáha ri vésú nacani ñayuu jnūhun un núu rō, achí yá.

Achí Pablo.

<sup>42</sup> Te ni quendacoo Pablo jíin tāca jnāhan de vehe iī sinagoga jnāhan hebreo de. Te ñayuu sñn nación ni cacahān ndahú i jíin de jeē inga quivī ndétātu nacani tucu de jnūhun yáha núu i. <sup>43</sup> Te ni jité ñayuu un cuángoo i. Te cuehé



ñayuu hebreo jiín ñáyuu s̄in nación jeē ní cacandíje saḥān hebreo te cáchiñúhún i nuū Yaā Dios, cuangoo i jiín Pablo jiín Bernabé. Te ni cacahān n̄ihin de jiín i jeē na cuíñi n̄ihin i jiín jnūhun jeē maní Yaā Dios jiín i.

<sup>44</sup> Te quiv̄i ndétátú inga semana te je yajni ndih̄i ñayuu ñuu un ní candutútú i jeē cúni nahín i jnūhun Yaā Dios. <sup>45</sup> Te nuū ní cajini t̄ee hebreo jeē ní candutútú cuéhē ñayuu, te ni cacacuésún ni de, te ni cacahān de jeē násūu jnūhun vāha cúu jeē steén Pablo, te ni cacahān neé de nuū Pablo. <sup>46</sup> Yūcuán na te jéhnuni ni cacahān Pablo jiín Bernabé, áchí de:

Cánuú jéé x̄ihna gā nuū maá ní jeē cácuu ní jnāhan ñuu yō hebreo nacani ná jnūhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahú ni cotecu ni n̄í cáni. Te vijna te quinacani ná jnūhun ya nuū ñáyuu táca nación jeē tu cájini i jnūhun ya. <sup>47</sup> Chi suhva ni ndacu máá Jítoho yō jniñu nuū na jijnāhan ná:

Ni jeni ri rohó jéé cúu ró nájjnūhun luz jeē steén ini anuá ñayuu táca nación, chi n̄í ñayiv̄i stéén rō jnūhun ri nuū ñáyuu jeē jnáma ri i, áchí yá. Achí de.

<sup>48</sup> Te ñayuu s̄in nación, nuū ní cajini sōho i jnūhun yáha te ni cacusīi teyí ni i. Te ni cacahān i jeē yōh̄yo vāha jnūhun cúu jnūhun máá Jítoho yō, te táca ñáyuu jeē ní nacāji Yaā Dios i jeē cótecu i n̄í cáni, ni cacandíje i. <sup>49</sup> Te ni jité jnūhun máá Jítoho yō cuahān n̄í región yūcuán. <sup>50</sup> Te ñuu Antioquia cáyucú ñahan cácuu nuū te cáchiñúhún ña Yaā Dios. Te t̄ee hebreo ni cascáhán de ña, te suni ni cascáhán de t̄ee cácujeñu ñuu ún, te ni cajito xeēn i Pablo jiín Bernabé te nde ni cascúnu i de cuangoo de. <sup>51</sup> Te ni cascóyo de ticachā jehē de jeē steén de jeē iyó cuéchi

i. Te ni jinūcoo de ñuu Iconio. <sup>52</sup> Te v̄esú súcuan te ñayuu cacandíje un ní cunuú Espiritu Santo jiín i, te cácus̄i teyí ni i.

*Jeē ní coyūcu Pablo jiín Bernabé ñuu Iconio*

## 14

<sup>1</sup> Te ñuu Iconio ni qūiv̄icoo Pablo jiín Bernabé ini vehe īi sinagoga jnāhan de hebreo. Te jiín jnūhun jeē ní canacani de te ni cacandíje cuehē jnāhan de hebreo, te suni súcuan cuehē ñayuu s̄in nación ni cacandíje i. <sup>2</sup> Te jnāhan de hebreo jeē tu ní cacandíje, ni cascáhán de ñayuu s̄in nación, te ni cajeni ni i jeē násūu ñáyuu vāha cácuu ñayuu cacandíje. <sup>3</sup> Te ni caquendōo Pablo jiín Bernabé yūcuán cuéhē gā quiv̄i. Te jéhnuni ni canacani de jnūhun Jítoho yō, chi cácuah̄nu ni de ya jeē vāha quih̄in jniñu un sáha ya. Te máá yá chi ni steén yā jeē iyó ndāā jnūhun jeē yóh̄yo vāha ni yā jiín i jeē cánacani de, chi ni jēhe ya jeē sáha de jniñu jéhnuni jeē steén jeē cujéñu ya. <sup>4</sup> Te ñayuu ñuu un ní cacusīin ni i jijnāhan i, sava i jiín t̄ee hebreo jeē tu cacandíje de Jesús, te sava ga i jiín t̄ee apóstol. <sup>5</sup> Te ñayuu hebreo jiín ñáyuu s̄in nación jiín t̄ee cácuu tohō ni casquijnāhan jnūhun jeē sáha xeēn jiín Pablo jiín Bernabé, jiín jéé cuáha yuū xin̄i de núú. <sup>6</sup> Te ni cajini de jeē súcuan cácuu sáha, te ni cajinu de cuangoo de nde ñuu Lистра jiín ñuu Derbe ndañúu Licaonia jiín táca ñuu yajni yūcuán. <sup>7</sup> Te yūcuán ní canacani de jnūhun jeē jnáma ya yohó.

*Jeē ní cajēhe i yuū xin̄i Pablo ini ñuu Lистра*

<sup>8</sup> Te ñuu Lистра néne ñin t̄ee jeē tu cúu caca, te tu jíca cuiti de chi nde quiv̄i ní cacu de cácójó de. <sup>9</sup> T̄ee un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha t̄ee un

jeē ndúvāha de. <sup>10</sup> Te ni cahān jee Pablo jíin de:

Ndocuifī, condichi rō, achí de.

Te ni scānda tēe un máa de ni nucōndichi-ni de, te ni quejéé de caca de. <sup>11</sup> Te ni cajini ñayuu ún jniñu jéhu jeē ni sáha Pablo, te ni cacahān jee i jíin yuhu máa i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, achí i.

<sup>12</sup> Te ni cacahān i jeē Bernabé cúu yaā Júpiter, te Pablo cúu yaā Mercurio chí Pablo cúu tēe nácani jnūhun. <sup>13</sup> Te yajni yuñū un néne veñūhun yaā Júpiter. Te máa sūtū jejniñu ini veñūhun un ní quihin de stiquī jijnáhan ti te ni scutú de ti ita te vēji de nde nuū quívi i yuñū, te máa de jíin ñáyuu ñuu un cácuni de cahni de stiquī un sócō de nuū Bernabé jíin Pablo nuū. <sup>14</sup> Te Bernabé jíin Pablo, tēe cácuu apóstol, ni cajito de jeē súcuan cácuni ñayuu un sáha i, te ni candatá de sahna de jeē steén de jeē castívi ndasí i jeē casáha i súcuan. Te ni quenendava de ni quívicoo de mēhñu ñáyuu cuehē ún, te ni cacana jee de:

<sup>15</sup> Tātā jijnáhan ní, ma sáha cuiti ni súcuan, chí sāñá suni tēe-ni cácuu ná nájnūhun máa ní jijnáhan ní. Te vējicoo ná nacani ná jnūhun vāha Yaā Dios nuū ní, chí cahān na jíin ní jeē ma sáha ga ni táca jniñu yāha jéé tu ndé jéjniñu cuiti, chí sa suhva na chíñuhún ní maá Yāa Dios, Yaā técu, Yaā ni sáha andiví jíin ñáyívi jíin ndute mar jíin táca gá jeē iyó ní cáhnu. <sup>16</sup> Te nde jenahán ní jéhe ya jnūhun jeē na sáha tāca ñáyuu modo cácuni máa i. <sup>17</sup> Te vēsú súcuan te níni stéén yā ndese Yaā cúu ya, chí máni sáha ya jniñu vāha jíin yó, chí scúun ya saū, te sáha ya jeē cúu vāha itu yō, te jéhe ya jeē jíni ñuhún yó návāha caji yō te coo sī ni yō, achí ndindú de.

<sup>18</sup> Te vēsú súcuan ni cacahān de, te yōhyo uhū ni cajesi de nuū ñáyuu

un návāha tú socō i stiquī un nuū de jeē chíñuhún i ndindú de.

<sup>19</sup> Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhan de ñayuu cuehē ún, te ni cajéhe i yuū xiní Pablo. Te ni caquenehen i de yatā ñūū ún, chí ni cajeni ni i jeē jé ni jihī de. <sup>20</sup> Te tēe cácandije ni cacondú de Pablo, te ni ndonda Pablo, te ni ndívi de ini ñuu. Te inga quívi ní quihin de ichi cuahān de jíin Bernabé nde ñuu Derbe.

<sup>21</sup> Te ini ñuu un ní canacani de jnūhun jeē jnáma ya ñayuu, te ni cacandije cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía. <sup>22</sup> Te ni cahije ga ni ñayuu cácandije yūcuan ní casáha de. Te ni castívi ní de i jeē na cuíñi níhin i jíin jnūhun ya, chí ni cacahān de jeē níni quiji cuehē jnūndóho siquí yō te yūcuán na te jinú yō ñuu nuū ndácu Yaā Dios jniñu. <sup>23</sup> Te táca ñuu ni cajeni de tēe jéhu cándiso jniñu condito de ñayuu cácandije. Te ni cahíyo ndite ni Pablo jíin Bernabé nuū yā, te ni cajicān tahu de, te ni cacahān de jíin máa Jítoho yō jeē na cóto ya ñayuu ún chí cácandije i máa yá.

*Jeē cuánuhun tucu Pablo jíin Bernabé ñuu Antioquía ndañū Siria*

<sup>24</sup> Te ni cayāha de cuango de región Pisidia, te ni najinūcoo de región Panfilia. <sup>25</sup> Te ni canacani de jnūhun ya ini ñuu Perge región Panfilia, te sáa te cuango de ñuu Atalia. <sup>26</sup> Te yūcuan ní quívicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chindéé ñáhán yá de jeē quíngoo de nacani de jnūhun. Te ni jinu jniñu, te ni najinūcoo de ñuu ún. <sup>27</sup> Te nuū ní najinūcoo de yūcuán, te ni casáha de junta jíin ñáyuu cácandije, te ni canacani de jnūhun táca ndese cuehē jeē vāha ni

sáha Yaā Dios jiín de, chi ni jêhe ya jñūhun jeē suni candíje ñayuu tācá nación jeē tu ní cájini i jñūhun ya. <sup>28</sup>Te ni caquendo de yūcuan cuéhē quivī jiín ñayuu cáncandíje.

*Siquī junta ñuu Jerusalén*

## 15

<sup>1</sup>Yūcuán na te jecu tēe Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájñūhun cáhán ley jeē ni jêhe ya nuū Moisés, te tú na modo cācu i. <sup>2</sup>Te Pablo jiín Bernabé ni catejnáhan de jiín tēe ún, te tu ní cūndaā. Te jeē yūcuan ní candajnūhún de jeē quíngoo Pablo jiín Bernabé jiín jecu gā tēe cáncandíje un ndé ñuu Jerusalén, te yūcuán ndajnūhún de siquī jñūhun yáha jiín tēe cácuu apóstol jiín tēe jéhnu cándiso jniñu nuū ñayuu cáncandíje yūcuán.

<sup>3</sup>Te ñayuu cáncandíje un ní canachuhun íchí i de. Te ni cayāha de ichi Fenicia jiín Samaria, te canacani de jñūhun jeē suni ñayuu tāca gá nación jeē tu ní cájini i jñūhun ya, ni castóo i jniñu jeē tu iyó ndāā te ni cacandíje i Yaā Dios. Te yōhyo ni cacusiñi ni tācá hermano jeē ní canihín de jñūhun jeē súcuan ni cacandíje ñayuu ún.

<sup>4</sup>Te ni najinūcoo de ñuu Jerusalén, te ñayuu cáncandíje yūcuan jiín tēe apóstol jiín tēe jéhnu cándiso jniñu nuū ñayuu un, ni cacusiñi ni de jeē ní najinūcoo jnáhan de ún. Te Pablo jiín Bernabé ni canacani de tāca jñūhun ndese cuehē jeē váha ni sáha ya siquī jniñu jeē ní canacani de jñūhun ya. <sup>5</sup>Te sava tēe grupo fariseo jeē cáncandíje ni candocuiñi te ni cacahān:

Ñayuu sín nación jeē cáncandíje i Jesús, jini ññhún jēe sáha i circuncidar nájñūhun casáha máá yó, te cánuú ndacu yó jniñu nuū i jeē na squícu i ley jeē ni jêhe ya nuū Moisés, áchí.

<sup>6</sup>Te tāca tēe apóstol jiín táca tēe jéhnu cándiso jniñu nuū ñayuu cáncandíje, ni candututú de junta návāha ndajnūhún de te sándaā de siquī jñūhun yáha. <sup>7</sup>Te tācá de ni cacahān de ndese cájini ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini vāha ni jēe je iyó tiempo jeē ní nacāji Yaā Dios sáña jēe quihín na núu ñayuu sín nación te nacani ná jñūhun nuū i jeē jnáma ya i, návāha candíje i Jesucristo. <sup>8</sup>Te Yaā Dios chi jini yā ndese cáca ánuá ndihi ñayuu, te ni steén yā jeē jetáhú yá i, chi suni ni jêhe ya Espíritu Santo nuū i jijnáhan i, nájñūhun ni jêhe ya nuū maá yó. <sup>9</sup>Te inuú-ni sáha ya jiín yó jiín máá i, chi siquī jeē suni ni cacandíje i jñūhun jeē jnáma ya i, te jeē yūcuan ní sándoos ya anuá i nuū tāca cuéchi i. <sup>10</sup>Te vijna znaun cácuni ní ndacu ní jniñu jeē na squícu i ley un? Chi tu nájñahan ni Yaā Dios jeē súcuan. Chi cácuni ní tee ní jniñu yí yáha siquī ñayuu cáncandíje ún, te ni tāca jí yó tu ní cácundeyí de squícu de, te ni máá yó. <sup>11</sup>Chi sa suhva cáncandíje yó jēe jnáma ya yohó súcuan-ni siquī jeē yóhyo vāha ni maá Jítoho yó Jesús jiín yó, te suni súcuan-ni jnáma ya maá i, nasūu siquī jeē squícu i ley un, áchí de.

<sup>12</sup>Yūcuán na te tēe cuehē un ní cacuu nayúu de, te ni cajini nahín de jñūhun cacahān Bernabé jiín Pablo. Chi ni cacastūhún de jeē ni jêhe ya poder jeē ní casáha de tācá jniñu jéhnu jeē steén jeē cujéhnu ya, ni cajito ñayuu tācá nación jeē tu cájini i jñūhun ya. <sup>13</sup>Te nuū ni jinu ni cacahān Pablo jiín Bernabé, te ni cahān Jacobo:

Hermano jijnáhan ní, cuni sōho ní na cáhán na. <sup>14</sup>Ni nacani Simón Pedro jñūhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jñūhun ya, chi suni mēhñu máá i nacāji ya ñayuu jeē ndúu i ñayuu maá yá. <sup>15</sup>Te

quijnáhan jnūhun ni cahān de yāha jín jnūhun ni catee tēe ni canacani jnūhun Yaā Dios nde jenahán jeē yosó núū tútu i:

<sup>16</sup> Achí Yáa Dios:

Nájnūhun ni cotúú vehe David cúu jeē tuá ndácu sēhe yucūn de jniñu,

nájnūhun ni ndacu máá de jniñu nde jenahán.

Te ñin quiví te ndee rí

te jeē nasáha ri vehe de cúu jeē sáha ri jeē nandacu Sēhe yucūn de jniñu.

<sup>17</sup> Súcuán sáha ri návāha tāca gá ñayuu na nánducú i ruhū

nde jín ñáyuu tācá nación jeē tu cajini jnūhun ri, tācá i jeē cána ri i candíje i ruhū.

<sup>18</sup> Súcuán cáhán maá Jítoho yō, te nde jenahán ní steén yā jnūhun yáha núū ñáyuu.

Achí tutu i.

<sup>19</sup> Jeē yúcuán jéni ni na jéē ñáyuu tāca gá nación jeē ní castóo i jniñu jeē tu iyó ndáa te ni cacandíje i máá Yáa Dios, ma stáhān yō i jeē ndácu yó jniñu jeē squícu i ley Moisés.

<sup>20</sup> Chi sa suhva na tēe yó carta quihñ nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñí tī, te ni ma cáji i niñí. <sup>21</sup> Jnūhun yáha-ni tee yó quihñ nuū i nájnūhun je cástéén nde jenahán. Chi nde jenahán je iyó tēe cástéén jnūhun ley jeē ni jéhe ya nuū Moisés, te ndijnahan quiví ndétātu cácahu de ley un ini vehe i sinagoga tācá ñuu, áchí Jacobo.

<sup>22</sup> Yūcuán na te tēe apóstol, jín tēe jénnu cándiso jniñu, jín ndivii ñayuu cacandíje, ni cacundaā ni de jeē nácāji de tēe quingoo jín Pablo jín Bernabé nde ñuu Antioquía. Te tēe ni canacāji de un cácuu Silas jín Judas, te inga sihví de cúu Barsabás. Te cándiso jniñu de nuū tācá hermano cacandíje. <sup>23</sup> Te ni cajendēca de carta jeē cáhán suhva:

Máá ná cácuu tēe apóstol, jín táca tēe jénnu cándiso jniñu nuū ñáyuu cacandíje, jín táca gá hermano yō. Te cátee ná carta yáha cuájeē nuū ni jijnáhan ní, hermano, jeē cácuu ní ñáyuu sñin nación jeē cáyūcu ní ñuu Antioquía jín Siria jín Cilicia. Cuandeyí ni ni jijnáhan ní. <sup>24</sup> Ni cajini jnūhun ná jéē ní quendacoo sava jnáhan ná yáha ní jengoo nuū ní, te jín jnūhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñu jeē sáha ní circuncidar jín jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají tēe un jéē jeé de nuū ní. <sup>25</sup> Jeē yúcuán ní cajeni ni ná, te ñnuū-ni ni cacundaā ni ná, te ni nacāji ná tēe cuajēcoo nuū ni jín úu hermano yō jeē maní yō jín, cúu Bernabé jín Pablo. <sup>26</sup> Te ndíndúú de je ni catana de máá de nuū jnúndóho vēsú na cúu de jeē siquí jnūhun Jítoho yō Jesucristo. <sup>27</sup> Núu súcuán te cátají ná Judas jín Silas jeē nuū ní, te suni nájnūhun cáhán carta yáha suni súcuán castuhún de nuū ni jijnáhan ní. <sup>28</sup> Chi máá Espíritu Santo ni steén yā ñin modo jeē ní cacundaā ni na jéē ma tēe ná táca jniñu yí ley Moisés siquí ní, chi máá-ni jniñu yáha jéē cánuú gá: <sup>29</sup> Ma cáji ni táca jéē ní casocō nuū ídolo, ni ma cáji ni niñí ni quiti jeē jihí jeē tu jéti niñí tī, te ma cáca jnéni ní. Te vāha squícu ní núu tuá sáha ní táca jéē yáha. Súcuán na cóo te sándeyí ni ní, áchí carta.

<sup>30</sup> Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cacandíje ni candutútú de junta, te ni cajēhe de carta un núu i. <sup>31</sup> Te ni cacahu i, te ni candusñ ni i jeē ni níhñ i jnūhun ndeyí ni nuū carta ún. <sup>32</sup> Te suni tēe canacani jnūhun Yaā Dios cácuu Judas jín Silas, te jín cuéhē jnūhun ni cacahān de te ni candundeyí ni táca hermano un, te ni cahije ga

ni i jíin jnúhun ya. <sup>33</sup> Te ni coyūcu de yūcuán jecu quivī. Yūcuán na te hermano yúcuán ní canacuatahú i nuū de jeē quinuuhun de nuū tée jeē ní catají de. <sup>34</sup> Te Silas ni nujnahan ni de ni quendōo de yūcuán. <sup>35</sup> Te suni ni caquendōo Pablo jíin Bernabé űuu Antioquía, te máa de jíin sava ga tēe ni castéén de te ni canacani de jnúhun vāha máa Jítóho yō.

*Jeē quihín Pablo inga jíinu nacani de jnúhun ya*

<sup>36</sup> Te ni cuu ga quivī, te ni cahān Pablo jíin Bernabé:

Vijna te na quícondēhe yó tācá hermano yō ndijnahan űuu nuū ní nacani yó jnúhun máa Jítóho yō, na cóndēhe yó ndese cáhīyo i, áchí de.

<sup>37</sup> Te Juan jeē suni nání de Marcos, cúni Bernabé jeē quihín tēe un jíin de. <sup>38</sup> Te tu ní cúni Pablo jeē quihín tēe un jíin de, chi nde Panfilia ni cusín Marcos nuū Pablo jíin Bernabé, chi tuá ni chindéé űáhán de ndindúú tēe un síquī jníñu ya nde saá. <sup>39</sup> Te nahán ní canda-jnúhun Pablo jíin Bernabé, te tu ní cácuandaā ni de síquī Marcos, te ni cacusín de. Te Bernabé ni jeca de Marcos, te ni quivícoo de barco cuango de nde Chipre, űuhun jeē íne sán nuū ndúte. <sup>40</sup> Te Pablo ní nacáji de Silas quihín jíin de. Te tācá hermano cácuandíje ni cajicān tahu de nuū máa Jítóho yō jeē síquī jeē váha ni yā te na chindéé űáhán yá Pablo. Te cuahān Silas jíin Pablo. <sup>41</sup> Te ni cajica cuu de ní Siria jíin Cilicia. Te tāca grupo űayuu cácuandíje ni cahije ga ni i jíin jnúhun ya ni casáha de.

*Jeē cuahán Timoteo jíin Pablo jíin Silas*

## 16

<sup>1</sup> Yūcuán na te saá te ni jinū Pablo jíin Silas űuu Derbe jíin űuu Listra. Te yūcuán néne ĩn tēe suchí cándíje, nání i Timoteo. Sēhe yí ĩn űahan

hebrea cúu i, te űahan cándíje cúu űa. Te tátá i chi tēe griego cúu de. <sup>2</sup> Te tācá hermano űuu Listra jíin űuu Iconio cácejnúhun de Timoteo. <sup>3</sup> Te cúni Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúni Pablo jeē cahān űayuu hebreo jeē tu ní squícu Timoteo costumbre un, chi ndihí űayuu cájini i jeē tēe griego cúu tátá i. <sup>4</sup> Te tācá űuu nuū cuángoo de te ni cacastūhún de nuū űayuu cácuandíje jeē na squícu i máa jniñu jeē ní casándaā tēe apóstol jíin táca tēe jēhnu cáyūcú űuu Jerusalén jeē cándiso jníñu nuū űayuu cácuandíje. <sup>5</sup> Te űayuu cácuandíje ni cahije ga ni i. Te ndijnahan quivī ni cacandíje cuehē gā űayuu.

*Jeē ní jito ndijin Pablo ĩn tēe űuu Macedonia*

<sup>6</sup> Te tu ní jéhe Espíritu Santo yā jnúhun jeē nácani de jnúhun ya ní Asia. Jeē yúcuán ní cayāha de ichi Frigia jíin Galacia cuango de. <sup>7</sup> Te ni jinūcoo de nuū quijnáhan Misia jíin Bitinia. Te cácuani de quingoo de Bitinia, te máa Espíritu Jesús tu ní jéhe ya jnúhun quingoo de. <sup>8</sup> Te ni cayāha de ĩn lado Misia cuango de űuu Troas jeē íne yajni yumar. <sup>9</sup> Te ĩn jecuáa te nájnūhun ĩn jēni ni jito ndijin Pablo, te ni jito de jeē índichi ĩn tēe űuu Macedonia nuū de cáhán ndahú jíin de: Nehen ní űuu ná Macedonia te chindéé űáhán ní sãña jijnáhan ná, áchí. <sup>10</sup> Te súcuán ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jijnáhan de jeē quingoo ná Macedonia, chi ni cajini cají ná jeē máa Yáa Dios tájí yá sãña jijnáhan ná jēe castūhun ná nuū űayuu yūcuán jnúhun jnama ya i.

*Jeē ní coyūcu Pablo jíin Silas űuu Filipos*

<sup>11</sup> Te jíin barco ni quendacoo ná űuu Troas, te cuango ndaā-ni ná ndé Samotracia, űuhun jeē íne sán

nuū ndúte. Te inga quivī ni jinūcoo ná űuu Neápolis. <sup>12</sup> Te yūcuan ní quendacoo ná, te ni jinūcoo ná űuu Filipos jeē cúu űuu kujéhu ga íne Macedonia, chí máá űáyuu űuu Roma ni casáha i űuu i ún. Te ni coyūcu ná űuu Filipos jecu quivī. <sup>13</sup> Te in quivī ndétatu ní quendacoo ná űuu ún, te ni jengoo ná in yuyúte, chí yūcuan cúu in lugar nuū cájicān tahu űayuu. Te ni cacucōo ná, te ni canacani ná jnūhun ya nuū táca űahan ní canataca yūcuán. <sup>14</sup> Te in űa nání Lidia jeē véji űa űuu Tiatira, xico űa sahma ndihí jéē yáhu ga ndeé. Te máá űa ní ní chíñúhún űa Yaā Dios. Te ni jini sōho űa jnūhun cánacani ná, te máá Jítóho yō Jesús ni sáha ya jeē ní candíje űa jnūhun jnáma ya űa jeē ní cáhān Pablo. <sup>15</sup> Te ni jendute űa nde jíin űáyuu cáyúcú vehe űa, te ni cahān ndahú űa jíin ná:

Núu cá cucáhu ni ní jéē candíje ndije ná máá Jítóho yō, te cuajeē ní coyūcu ní vehe ná, áchí űa.

Te ni cana fuerza űa sãña jíjnáhan ná.

<sup>16</sup> Te in quivī te cuangoo tucu ná suu lugar nuū jéngoo űayuu cájicān tahu. Te ni canajnáhan ná jíin in sūchí síhí jéē űūhun tachī ini i, te máá un sáha jeē cahán i táca ndese coo te cúndaā jeē cahán i. Te sūchí un ní cajeen patrón i, návāha nihīn de cuehē xūhun síquī jeē cástūhún i nuū in in űayuu ndese coo ichi núú. <sup>17</sup> Te sūchí un ndíquín i sãña jíjnáhan ná cána jee i:

Tēe yáha cájejnīnu de nuū Yaā Dios, Yaā kujéhu téyí, te cácastūhún de ndese cācu ní núu cuéchi ní jíjnáhan ní, áchí i.

<sup>18</sup> Te cuehē quivī ni cuu súcuan te nde ní jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder máá Jesucristo ndácu ri jniūnu nuū rō jeē na quénda ró ini i quihīn rō, áchí de.

Te hora un ní quenda-ni cuahān.

<sup>19</sup> Yūcuán na te ni cajini patrón i jeē ma níhín gā i xūhún cuu de, te jeē yūcuan ní cajini de Pablo jíin Silas cuangoo jíin de nde vehe juzgado nuū cáyūcu tóhō. <sup>20</sup> Te ni cajeni ún de nuū juez, tēe casándaā jniūnu, te ni cacahān:

Tēe hebreo cácuu tēe yáha, te cástóna de űayuu űuu yō cúvaā i. <sup>21</sup> Te cájequin de inga costumbre jeē ma cúu cuatáhu cuiti yō, ni ma cúu sáha yó, chí tu jéhe ley nación yō jnūhun, chí űayuu nación Roma cácuu yó, áchí.

<sup>22</sup> Te suni ni candonda űayuu síquī Pablo jíin Silas. Te tēe cácuu juez ni candacu de jniūnu jeē na quénda sahma ndindúú de te cani yujnu síquī de. <sup>23</sup> Te nuū ni jínu ni cacani téyí un de, te ni casquívī de vecāa. Te ni candacu jniūnu nuū tēe ndító vecāa jeē na cóndito ndasí de jeē ma cácu ndindúú tēe ún. <sup>24</sup> Te jeē súcuan ní tahū jniūnu nuū tēe ndító vecāa te ni squívī de Pablo jíin Silas nde ichi íni gā, te ni squívī jehē de tisin yujnu ndeé yaū te ni cajihni de.

<sup>25</sup> Te nuū ní cuu sava űuú, te cájicān tahu Pablo jíin Silas, te cájita de yaa ii nuū máá Yaā Dios. Te űayuu cáhīn jíin de vecāa un ní cajini nahín i. <sup>26</sup> Te sanaa-ni te ni jnáa nihin téyí, te nde nuū cimientó vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhni táca űáyuu ún. <sup>27</sup> Te ni natahū ni tēe ndító vecāa, te ni jito de jeē núne yéhyí vecāa ún. Te ni tava de espada jeē cáhni de máá de núú, chí ni jeni ni de jeē ndivii cuiti űayuu cáhīn vecāa un cuángoo i. <sup>28</sup> Te ni cana jee Pablo:

Ma cáhni ni máá ní, chí cáhīn ndihí ná, áchí de.

<sup>29</sup> Yūcuán na te máá tēe ndító vecāa ni cana de jeē na quíndeca i űuhūn, te yachī ni quivī de ini vecāa. Te ni jecuiñī yití de nuū Pablo jíin Silas, te quísí i de jeē yūhú

de. <sup>30</sup> Te ni quenehen de Pablo jíin Silas, te ni cajnúhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jíin téé ún:

Candíje ní táca jéē ní sáha Jitoho yō Jesucristo jehē ní te cācu ní, te suni súcuan cācu ndihi ñayuu cáyūcú vehe ní, áchí de.

<sup>32</sup> Te ni canacani de jnúhun máá Jitoho yō nuū téé un jíin núū táca ñayuu cáyūcú vehe de. <sup>33</sup> Te suu máá jecuaā yúcuan ní nacate tēe ndíto vecāa un núū ní catují Pablo jíin Silas jeē ní cacani yujnu siquī de. Yūcuán na te ni jendute de jíin ndihi ñayuu cáyūcú vehe de. <sup>34</sup> Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusīī ní ndihi de vehe de jeē ní cacandíje de Yaā Dios.

<sup>35</sup> Te nuū ní cundijin, te tēe cácuu juez ní catají de policía cuango jíin jnúhun jeē na siáá tēe ndíto vecāa un Pablo jíin Silas quingo de. <sup>36</sup> Te tēe ndíto vecāa un ní castühún de jnúhun yáha núū Pablo:

Tēe cácuu juez ní catají de jnúhun vējí jeē na siáá na níhín quíngoo ní. Núu súcuan te quendacoo ní quíhín ní, te cuandeyí ní ní, áchí de.

<sup>37</sup> Te ni cahān Pablo jíin policía:

Cuehē ñayuu ni cajito i jeē ní canani de sãñá, te ni tu ní cásandaā de xihna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu séhe nación Roma. Te vijna ¿á quenehen sãhí de sãña cácuu de ñaún? Ma cúu cuiti. Na quícoo máá de quenehen de sãña jíin náhan ná, áchí Pablo.

<sup>38</sup> Te ni canandió cóo policía ní castühún de jnúhun yáha núū téé cácuu juez, te ni cayūhú de jeē ní cajini sōho de jnúhun jeē séhe nación Roma cácuu Pablo jíin Silas.

<sup>39</sup> Te ni quecoo tēe cácuu juez ún, te yōhyo ní cacahān ndahú jíin Pablo jíin Silas jeē na cōne cáhnu ní de.

Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. <sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnúhun ndeyí ní jíin táca hermano. Te ni caquihin de ichi cuango de.

*Jeē ní cacuvaā ñayuu Tesalónica*

## 17

<sup>1</sup> Te Pablo jíin Silas ní cayāha de ñuu Anfípolis jíin ñuu Apolonia cuango de, te ni jinūcoo de ñuu Tesalónica nuū iyó in vehe i sinagoga jnáhan de hebreo. <sup>2</sup> Te ni coyūcú de yúcuan únī semana, te táca quíví ndétātu jéhén Pablo vehe i sinagoga, nájnúhun sáha sáha de, te ni nacani de jnúhun ya nuū téé un. <sup>3</sup> Te jíin jnúhun cáhán tutu i ní steén de jeē súcuan ní jini ñúhún ndoho Cristo jeē cúu yā te natecu yā. Te ni cahān de:

Jnúhun nácani ná núū ní cúu jnúhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

<sup>4</sup> Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ní i jíin Pablo jíin Silas. <sup>5</sup> Yūcuán na te yōhyo ní cacucúesún ní jnáhan de hebreo jeē tu cacandíje, te ní castútú téé cunéé jéé cájica cúxí-ní, te ní quejéé cácana ndee cuango. Te súcuan ní casaca núu de xinī ñayuu ñuu ún. Te ni jengoo de vehe Jasón cánanducú de Pablo jíin Silas jeē jnái de tēe un quíndēca de nuū ñayuu cuehē. <sup>6</sup> Te tu ní cánanihín de, te ní cañuhun de Jasón jíin sava ga hermano cuango de jíin núū tohó ñuu ún. Te jeē siquí Pablo jíin Silas ní cacana jee de:

Tēe jeē castíví xínī ñayuu níí ñáyíví, je ní quecoo de nde yāhā. <sup>7</sup> Te máá Jasón ní jēhe núu vehe cáyūcu téé ún. Te tēe ún tu cájetáhu

de ley maá rey yohó ñáyyu Roma, chi sa suhva cacahān de jeē cájetáhú de nuū inga rey jeē naní Jesús, achí de jínáhan de.

<sup>8</sup> Te ñayuu jín tée cácuu tohō ni cajini sōho i jnūhun yáha, te ni cacuvaā i siquī. <sup>9</sup> Te Jasón jín táca gá hermano ni castóo de xūhún de, chi ni cacahān tohō un jín de jeē nde núu tají de Pablo jín Silas quingoo de inga ñuu, yūcuán na te nacuaāha tohō un xūhun de. Te súcuan te ni casiáá de Jasón jín táca gá hermano cuangoo de.

*Jeē ní coyūcu Pablo jín Silas ñuu Berea*

<sup>10</sup> Yūcuán na te tēcá hermano un, yachī-ni ni cascáca de Pablo jín Silas jecuáá un, cuángoo de nde ñuu Berea. Te nuū ni jínūcoo de yūcuán, te ni quīvicoo de vehe iī sinagoga jnāhan ñuu de hebreo. <sup>11</sup> Te jnāhan ñuu de hebreo cáyūcu yúcuan, vāha ga ni maá de vēsú jnāhan ñuu de hebreo cáyūcú ñuu Tesalónica, chi vāha ni cacusiī ni de jín jnūhun ni cacahān Pablo jín Silas. Te ndijnahan quīvī cānanducú yúcún de nuū tūtu iī núu súcuan cáhán chí tuú. <sup>12</sup> Jeē yúcuan ní cacandije cuehē jnāhan ñuu de hebreo te suni nde jín cuehē ñayuu griego, cúu tēe cúu ñahan cácuu nuū. <sup>13</sup> Te jnāhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihín de ichi cuangoo de Berea, te suni yúcuan ní castóna de ñayuu siquī Pablo. <sup>14</sup> Yūcuán na te tēcá hermano ni catajī-ni de Pablo cuahān de nde yumar. Te ni ndōo Silas jín Timoteo ñuu Berea. <sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jín de jeē cahān de jín Silas jín Timoteo jeē na quíngoo yachī de nuū Pablo. Te vendicoo de ñuu Berea.

*Jeē ní ñe Pablo ñuu Atenas*

<sup>16</sup> Te níni ndétu Pablo jeē jinúcoo Silas jín Timoteo nuū de ñuu Atenas, te ni jini de jeē ñáyyu ñuu ún yōhyo cáchiñúhún i ídolo, te ni nacani cuíhyá ni de. <sup>17</sup> Te ini vehe iī sinagoga ni cahān de jnūhun ya jín jnāhan ñuu de hebreo jín táca gá tēe cáchiñúhún Yāā Dios. Te suni táca quívī ni nacani de jnūhun ya nuū táca ñayuu cáhīn nuū yáhu. <sup>18</sup> Te sava tēe cáscuáha jnūhun jeē castéén grupo epicúreo, jín inga sava tēe cáscuáha jnūhun jeē castéén grupo estoico, ni caquejéé cacahān jín Pablo. Te sava ni cacahān:

¿Na jnūhun cáhán tēe tlóhlé yāha? áchí.

Te sava ga de ni cacahān:

Tēe nácani jnūhun táca yāā jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyí. <sup>19</sup> Te ni cajeca de Pablo cuangoo de, te ni jinúcoo de nde lugar nuū naní Areópago nuū cándutútú ñayuu cándacu jniñu, te ni cacahān de:

Cácuni ná cachi ni núu na jnūhun jeé jéē steén ni. <sup>20</sup> Chi cáhán ni jnūhun jeé ná tu cuni cuiti na jínáhan ná, te jeē yúcuan cácuni ná jecūhun ni na síquī táca jnūhun yáha, áchí jín de.

<sup>21</sup> Chi táca ñayuu ñuu Atenas jín táca ñayuu inga ñuu jeē cáyūcu núu i yūcuán, tuá na inga jniñu cácusī gā ni i jín chí máá-ni jeē cuni nahín i jnūhun jeé chí jéé cahán i jnūhun jeé.

<sup>22</sup> Te índichi Pablo mēhñu ñayuu ní candutútú núu naní Areópago, te ni cahān de:

Tēe ñuu Atenas jijnáhan ní, jito ná jéé yóhyo cáchiñúhún ní yaā maá ní.

<sup>23</sup> Chi ni jica nuu ná, te ni jecondēhe ná nuū jeē cáchiñúhún ní, te ni jito ná iñ altar jeé yosó jnūhun yáha: Yāha cúu altar yaā jeē ná tu cuni yō jnūhun ya, achí. Te máá Yāā un jéé cáchiñúhún ní, vēsú ná tu cuni ni



jnūhun ya, suu jnūhun Yaā un cúu jeē nácani ná núu ní vijna.

<sup>24</sup> Chi Yaā un cúu Yaā jeē ni sáha ñayiví jíin táca ndihí jeē iyó, te máá yá cúu Jitoho andiví jíin ñáyiví, te tu ndéé yá ini veñūhun cásáha ñayuu.

<sup>25</sup> Te ni tu cúmaní ni ñin nuū yā jeē cuáha ñayuu nuū yā, chi máá yá sáha jeē técu ñayuu, jíin jéē stáa i tachí i, jíin jéē nihín i ndihí jeē jíni ñūhún i.

<sup>26</sup> Te ni sáha ya jeē chíji ñin-ni yucūn ni tahū táca ñáyuu jeē ní nduu táca nación, náváha coyūcú i níí cáhnu ñayiví, te ni tana yā cuiyā cotecu ñayuu jíin lugar coyūcú i jíináhan i. <sup>27</sup> Te súcuan ni sáha ya chí cúní yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya jíin ñin ñin yó. <sup>28</sup> Chi máá yá sáha jeē iyó yó jíin jéē cátecu yō jíin jéē cácada yō. Chí suni súcuan ni cacahān sava tēe ñuu ni jéē cátava yaa: Suni nde yucūn maá yá cácuu yó, áchí. <sup>29</sup> Te núu yucūn Yaā Dios cácuu yó, te ma cáni ni yō jeē ídolo oro chí plata chí yúu cúu ya, chí cájeni ni ñayuu jeē súcuan cáa ya, te súcuan cásáváha i ídolo. <sup>30</sup> Te ni jendeyí ni yā siquí jeē tu ní cájecūhun ni i níí ndé saá, te vijna chí ndácu ya jniñu jeē ñáyuu níí cáhnu ñayiví na nácani ni i jeē stóo i cuéchi i. <sup>31</sup> Chi Yaā Dios, je ni jeni ya quiví jeē ndaā sándaā yā siquí ñayuu ñayiví, te ni jeni ya Jesús jeē maá yá sándaā. Te je ni steén cají Yaā Dios nuū táca ñáyuu jeē maá yá ni jeni Jesús, chí ni nastécu yā Jesús, achí Pablo.

<sup>32</sup> Te jeē ní cajini sōho i jnūhun jeē nátecu ndiyí te sava i ni cacahān catá i, te sava ga i ni cacahān i:

Váha te núu cuu cuni sōho na jnūhun cáhán ni ndé inga jínu, áchí i.

<sup>33</sup> Te ni quenda Pablo mēhñu ñáyuu un cuahān de. <sup>34</sup> Te cuahān jecu ñayuu jíin Pablo, te ni candije. Te ñin de cúu Dionisio, tēe ndútútú jíin tēe cácujeñu cásáha

junta nuū naní Areópago, jíin ñin ñahan naní Dámaris, jíin jecu gā i.

*Jeē ni íne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Atenas, te cuahān de nde ñuu Corinto. <sup>2</sup> Te yūcuan ní jito de nuū ñin jnáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chí rey Claudio ni ndacu de jniñu jeē na quéndacoo táca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. <sup>3</sup> Te suni jniñu sáha tēe un sáha Pablo, chí cáquicu de ñin cuu vehe. Te ni quendōo Pablo jíin tēe ún, te ni casájniñu de. <sup>4</sup> Te táca quiví ndétātu ní jehēn Pablo vehe íi sinagoga ni nacani de jnūhun ya, te ni nducú ndeyí de jeē na cándije ñayuu jnūhun Jesús, cúu jnáhan ñuu de hebreo jíin ñáyuu táca nación jeē tu ní cájini i jnūhun ya.

<sup>5</sup> Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí máni jnūhun ya nácani cáj de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. <sup>6</sup> Te ni caquejéé i ni cacahān i siquí jnūhun ún, te ni cacahān xeēn i nuū Pablo. Te máá de ni caja de sahna de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihín na núu ñáyuu táca nación jeē tu cájini i jnūhun ya, te nacani ná jnūhun ya nuū i, áchí de.

<sup>7</sup> Te ni quenda de ini vehe íi sinagoga, te ni jinū de vehe ñin tēe naní Justo ni condee de. Te chíñūhún tēe un Yáa Dios, te vehe tēe un hēne yajni xiin véhe íi sinagoga. <sup>8</sup> Te

Crispo, tēe cújehnu ini vehe iī sinagoga, ni candije de máá Jítóho yō nde jiín ndihi ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandije i, te ni cajendute i. <sup>9</sup>Te iin jecuáa ni sáha máá Jítóho yō jeē ní jito ndijin Pablo yā ni cahān yā jiín de:

Ma yūhu ró ni ma cási rō yuhu ró, chí níni nacani ró jnūhun ri. <sup>10</sup>Chi ndíto ri rohó, te ma cúu sáha xeēn ni iin ñayuu jiín ró. Nacani ró jnūhun ri, chí coo cuehē ñayuu candije jnūhun ri ñuu yáha, áchí yá.

<sup>11</sup>Te ni condee Pablo yūcuán iin cuiyā yosáva ni steén de jnūhun Yaā Dios nuū ñayuu ún.

<sup>12</sup>Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iin cáhnu-ni ni candonda i siquī Pablo. Te ni cajeca i de cuango i jiín de nde vehe juzgado. <sup>13</sup>Te ni cacahān i jiín Galión:

Tēe yáha yōhyo scáhán de táca ñayuu jeē inga modo chiñúhún i Yaā Dios, suu iin modo jeē cúu contra siquī ley, achí i.

<sup>14</sup>Te quejé Pablo cahān de núu, te ni cahān-ni Galión jiín ñayuu hebreo un:

Ñayuu hebreo jijnáhan ró, núu iin cuēchi xeēn cúu, te cánuú cuni nahín rí jnūhun cácahān rō núu.

<sup>15</sup>Te tuú, chí máni siquī jnūhun-ni jiín siquī ley máá ró jiín siquī téé cástéén cúu. Te na sándaā máá ró siquī jniñu yáha, chí tu sándaā rí siquī máá iin jeē súcuan-ni, áchí de.

<sup>16</sup>Te ni cahān de nuū i jeē na quíngo i fuera. <sup>17</sup>Yūcuán na te ñayuu griego ni cajni i Sóstenes, tēe cújehnu ini vehe iī sinagoga, te máá fuera yehyí vehe juzgado ni cacani i de, te Galión chí tu ní sáha cuiti de cuenta.

*Jeē ní najinū Pablo ñuu Antioquía, de cuahān de vuelta uní jeē nacani de jnūhun ya*

<sup>18</sup>Te cuehē gā quiví ni condee Pablo ñuu Corinto. Yūcuán na

te ni nacuatáhu de nuū táca hermano yūcuan, te Aquila jiín ñasihi de Priscila cuango de jiín Pablo, te ni jinūcoo de ñuu Cencrea. Te yūcuan ní saté lii Pablo xiní de, te súcuan stéén de jeē squícu de nuū Yaā Dios jeē ní jéjnūhun de. Te ni quivícoo de barco jiín Aquila jiín Priscila quihín de región Siria. <sup>19</sup>Te ni jinūcoo de ñuu Efeso, te yūcuan ní caquendōo Aquila jiín Priscila. Te ni jehēn-ni Pablo vehe iī sinagoga, te ni cahān de jnūhun ya jiín jnáhan ñuu de hebreo jeē cándutútu yūcuan. <sup>20</sup>Te ni cacahān ndahú i jiín de jeē na cónēne de jecu gā quiví jiín i, te tu ní jéhe de jnūhun. <sup>21</sup>Chi ni nacuatáhu de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiví de barco cuahān de. <sup>22</sup>Te ni jinū de ñuu Cesarea, te ni jehēn de ñuu Jerusalén. Te nuū ní ndihi ni cahān de jiín grupo ñayuu cácaandije yūcuán, te cuanuhun de ñuu Antioquía. <sup>23</sup>Te ni coyúcú de yūcuán jecu quiví, te sáa te ni quenda tucu de cuahān de ni jica cuu de ní Galacia jiín Frigia. Te ñayuu cácaandije ni cahije ga ni i jiín jnūhun ya ni sáha de.

*Jeē ní nacani Apolos jnūhun Jesús ñuu Efeso*

<sup>24</sup>Te ñuu Efeso ni quee iin tēe hebreo nání Apolos, te tēe ñuu Alejandría cúu de. Te vāha nácani de jnūhun ya, chí vāha jini de jnūhun jeē cahán tutu i. <sup>25</sup>Te je ni cutūhva vāha tēe un jiín jnūhun máá Jítóho yō Jesús, vésú jini de máni máá jnūhun ya jeē ní stéén Juan ná ni scuándute de ñayuu, te ndíhví ni de stéén cají de jnūhun ya nuū ñayuu. <sup>26</sup>Te jéhnu-ni ni nacani de jnūhun ya ini vehe iī sinagoga. Te ni cajini sōho Aquila jiín Priscila jnūhun nácani de, te ni cajeca de Apolos

cuangoo s̄in de, te ni cacastūhun yúcun nd̄indúú de jnūhun ya jeē ná tu cuni Apolos. <sup>27</sup> Te cúní Apolos quih̄n de nde región Acaya. Te je cá candíje sava ñayuu yúcuan ní sáha Yaā Dios siquī jeē váha ni yā. Te táca hermano ñuu Efeso ni cachindéé ñáhán i de, chí ni catee i carta quih̄n de jín núú ñáyuu cá candíje cáyūcú Acaya jeē na cuatáhú i Apolos. Te nuū ni jínú de yūcuán, te váha ni chindéé ñáhán de táca ñáyuu cá candíje un jín jnūhun ya. <sup>28</sup> Te nuū táca ñáyuu ñuu un ndé jín jnánhan ñuu de hebreo jeē cáyūcu yúcuan, ní steén cají de ndese cástívi táca jnánhan hebreo de siquī jnūhun ya. Te tu ní cánih̄n jnánhan de un jnūhun cahán siquī jeē ni steén de, chí jín jéé cahán tutu i ni steén de jeē Jesús cúu Cristo, Yaā jeē cáñūhun ni de quiji ya.

*Jeē ni íne Pablo ñuu Efeso*

## 19

<sup>1</sup> Te níni néne Apolos ñuu Corinto, te ni yáha Pablo ichi siquī ñuu Efeso, te ni nanuu de ni jinú de máá ñuu ún. Te yūcuán ní nijnánhan de jín tijni tēe cá candíje. <sup>2</sup> Te ni cajnūhún de tēe ún:

¿A ní canih̄n ní Espíritu Santo ná ni cacandíje ní, chí ná tuú? áchí de.

Te ni cacahán de jín Pablo:

Tuú, chí ni ná tu nih̄n na jnūhun jeē iyó Espíritu Santo, achí de.

<sup>3</sup> Yūcuán na te ni cahán Pablo:

¿Na siquī ni cajendute ní núu súcuán? áchí de.

Te ni cacahán de:

Ni cajendute ná siquī jnūhun ni steén Juan, achí de.

<sup>4</sup> Te ni cahán Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahán de jeē na cándíje i máá Yáa quiji jeē cúu Cristo Jesús, áchí Pablo.

<sup>5</sup> Te nuū ní cajini sōho tēe un jnūhun yáha, te ni cajendute de jeē ní cacandíje de máá Jítoho yō Jesús.

<sup>6</sup> Te ni soó Pablo nd̄indúú ndaha de xinī táca tēe ún, te ni quiv̄i ní Espíritu Santo ini anuá de jínánhan de, te ni cacahán de s̄in s̄in yuhu te ni canacani de jnūhun ya. <sup>7</sup> Te ni iyo nájnūhun ux̄i uū jnahán tēe.

<sup>8</sup> Te unī yoō ni jeh̄n jeh̄n Pablo vehe i sinagoga. Te jéhu ni nacani de jnūhun ya, te ni nducú ndéyí de jeē na cándíje ñayuu jnūhun ndese ndácu Yaā Dios jniñu. <sup>9</sup> Yūcuán na te sava i ni cacunih̄ni ni i te tu ní cá candíje i, chí sa ni cacahán neé i siquī jnūhun váha Yaā Dios jín ñáyuu cá natata. Jeē yúcuan ní cujiyo-ni Pablo nuū ñáyuu ún, te ñayuu cá candíje cuangoo i jín de. Te ndijnahan quiv̄i ni steén de nuū ñáyuu ún ini escuela in̄ tēe nání Tiranno. <sup>10</sup> Te súcuán ní sáha de uū cuiyā, te táca ñáyuu cáyūcu Asia, cúu ñayuu hebreo cúu ñayuu táca gá nación, ni cajini sōho i jnūhun máá Jítoho yō Jesús. <sup>11</sup> Te ni jēhe Yaā Dios poder nuū Pablo jeē sáha de cueh̄e jniñu jéhu téyí. <sup>12</sup> Te nde pañú jín sah̄ma jeē ní jn̄i de ni cajengoo jín núú ñáyuu cácuñu, te ni canduváha-ni i cuehȳi cándoho i, te ni quendacoo tach̄i ini i cuangoo.

<sup>13</sup> Te jecu tēe hebreo cájica cuu de jeē quénehen de tach̄i ini ñayuu, te ni cajeni siquī ní de jeē suni jín poder máá Jítoho yō Jesús quenehen de tach̄i, te suhva ni cacahán de jín táca tách̄i:

Jín poder Jesús jeē nácani Pablo jnūhun ya, cáhan n̄ihin ri jín ró jeē na quénda ró quíh̄n rō, achí de.

<sup>14</sup> Te súcuán ni casáha ux̄a sēhe yíi in̄ tēe hebreo nání Esceva, cúu de in̄ sutú cujéhu. <sup>15</sup> Te ná ni casáha de, te ni cahán-ni tach̄i ún:

Je jíní rī Jesús, te suni jíní rī Pablo. Te róhó jínánhan ró ¿ndé tēe cácuu ró jéé cuatáhú rí rohó? áchí jín de.

<sup>16</sup> Te tēe ndóho tach̄i un ní ndonda de, te ni cundeyí de siquī ndihúxá tēe ún. Te ni sáha xeē ndasí de jín ndé ni catují te ni cacuvichí lí ni quendacoo vehe

un ní cajinu cuangoo. <sup>17</sup> Te jnūhun yáha ní cajini táca ñayuu cáyūcú ini ñuu Efeso, cúu ñayuu hebreo cúu ñayuu táca gá nación, te yōhyo ní cayūhú i, te ní cacahān i jeē yóhyo cújéhnū máá Jítóho yō Jesús.

<sup>18</sup> Te cuehē ñayuu jeē ní cacandíje ní quiijicoo i nuū Pablo ní nacani ndaā i jnūhun táca jniñu neé ní casáha i. <sup>19</sup> Te cuehē i jeē ní casáha jniñu tási ní jinūcoo i cándiso i tutu i, te ní cajehmu i tutu un jító nuū táca ñayuu. Te ní catava i cuenta nasaa ndéé tutu ní cáyū ún, te ní cajini i jeē uú xico uxí mil xūhun plata cúu. <sup>20</sup> Te ní jitē jnūhun máá Jítóho yō cuahān, te ndihi ñayuu ní cajini i jeē cújéhnū ndasí jnúhun ya.

<sup>21</sup> Te nuū ní ndihi táca jniñu yáha, te jéni téyí ní Pablo jeē quihīn de Macedonia jíin Acaya, te sáá te najinū de ñuu Jerusalén. Te ní cahān de jeē na nájinū de ñuu Jerusalén, yūcuán na te jini ñúhún quihīn de nde ñuu Roma. <sup>22</sup> Te uū tēe jeē cáchindéé ñáhán jíin Pablo cúu Tímoteo jíin Erasto, te ní scāndu de ndindúú tēe yāhá cuángoo de nde Macedonia, te ní quendōo máá de Asia jecu gā quivī.

*Jeē ní cacuvaā ñayuu ñuu Efeso*

<sup>23</sup> Te suu quivī ún yōhyo ní candonda ñayuu siquī jnúhun ya. <sup>24</sup> Chi ní Iyo ñn tēe sájniñu siquī plata, nání de Demetrio. Te máá de jíin ndihi tēe casájniñu jíin de, cánihīn de cuehē xūhún, chí jíin plata casáha de vehe lulí jēe modo veñūhun ídolo i jeē cúu yaā Diana. <sup>25</sup> Te Demetrio ní nastútú de tēe casájniñu jíin de jíin táca gá tēe jeē suni jniñu yúcuán casáha, te ní cahān de:

Tátā, cájini ní jēe siquī jniñu casáha yó yáha vāha cánihīn yō xūhún. <sup>26</sup> Te cájito ní te cájini sōho ní jēe ñn tēe nání Pablo chí cáhán de jeē násūu yāá cácuu jeē casáha ñayuu. Te je ní scandíje de cuehē ñayuu, nasūu máá ñn-ní ñuu Efeso yāhá chí ní cáhnu Asia. <sup>27</sup> Te

quíyūhú ní na jēe cahān ñayuu jeē tu ndé jéjniñu jeē casáha yó. Te sanaa te suni súcuan cahān i coto i máá veñūhun yaā sihi Diana jeē cújéhnū, te suni sájéé ní i nuū yaā Diana, te ma cúu ga cújéhnū ya vēsū ndivii ñayuu Asia jíin ñayuu ní cáhnu ñayiví cáchiñúhún i ya vijnā, áhí de.

<sup>28</sup> Súcuan ní cajini sōho de jnūhun yáha te yōhyo ní caquitī ní de, te ní cacana jee de:

Cújéhnū téyí Diana, yaā cúu patrona ñuu yō Efeso, achí de.

<sup>29</sup> Te ñayuu ñuu Efeso ní cacuvaā i, te ñn cáhnu-ní ní candonda i ní cajni i Gayo jíin Aristarco cuangoo i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. <sup>30</sup> Te cúní Pablo quivī de nuū ñayuu cuehē un cáhán de jíin i, te ñayuu cáchandíje tu ní cájēhe i jnūhun quihīn de. <sup>31</sup> Te suni sava tohō jeē cácuu amigo de cáyūcu Asia, ní catajī jnúhun cuahān nuū de, cácahān ndahú jíin de jeē ma quihín de nuū ní cacutútú ñayuu ún. <sup>32</sup> Te ñayuu ní cacutútú un, sava i ní cacana jee i ñn jnūhun te sava ga i ñnga jnūhun, te súcuan ní cacuvaā teyí i, te cuehē i ní tu cájini cuiti i na siquī cúu jeē ní cacutútú i. <sup>33</sup> Te sava tēe hebreo ní cajeni de ñn jnáhan de jeē naní Alejandro nuū ñayuu cuehē ún, te ní cacastūhún de nuū tēe ún na siquī cúu jeē cacuvaā i. Yūcuán na te Alejandro ní sáha de seña jíin ndaha de jeē na cúnayúú ñayuu, chí cúní de cahān de jíin i jeē násūu cuéchi táca ñayuu hebreo cúu. <sup>34</sup> Te ní canacuni ñayuu un jéé tēe hebreo cúu de, te jeé yúcuán ní cacana jee téyí gá i nájnūhun uū hora:

Cújéhnū téyí Diana, yaā cúu patrona ñuu yō Efeso, achí i.

<sup>35</sup> Yūcuán na te ní cacunahín ñayuu ní sáha tēe cúu secretario ñuu ún, te ní cahān de:

Nihín ñáyuu ñuu yō Efeso, ndihi ñayuu chi je cājini i jeē cándito vāha yó veñuhun yaā Diana jín imagen Diana jeē ní ñinga nde andiví. <sup>36</sup> Te ni ñin chi ma cúu cahān jeē tú ndaā jñuhun yáha. Núu súcuan te vāha ga na cási ní yuhu ní, te ma sáha yachí ní ñin jeē tu ní nácani vāha ni ní síquī. <sup>37</sup> Chi tēe yáha ní caquin-deca ní de yāhá vēsú tu ní cásáha de ni ñin cuēchi síquī Diana yō, ni tu ní cácahān ndevāha de ni ñin jñuhun síquī. <sup>38</sup> Te Demetrio jín táca gá tēe jeē ñin-ni jniñu cásáha jín de, núu cācuni de cahān de cuēchi síquī ñin tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā síquī de jínáhan de. <sup>39</sup> Te núu iyó jñuhun jeē ma cúu cundaā yūcuán, te jini ñúhún cundaā nuū ñin junta nájnuhun tájnúní ley. <sup>40</sup> Chi yúhú ná jeē sanaa te cahān táca tóhō Roma jeē síquī gobierno de ni candonda yó, chí ma nihín yō jñuhun castūhun yó na síquī cúu jeē ní cacutútú yó ni cacuvaā yō vijna, áchí de.

<sup>41</sup> Te nuū ní ndihi ni cahān secretario jñuhun yáha, te ni cajitē ñayuu un cuángoo.

*Jeē ni jéhēn Pablo Macedonia jín Grecia*

## 20

<sup>1</sup> Te ná ni yāha jēe ní cacuvaā ñayuu, te ni cana Pablo ñayuu cácañdeje, te ni jeni ichí de i. Te ni cañunundee jnáhan de jín Pablo jeē ní nacuatáhú de, te cuahān de Macedonia. <sup>2</sup> Te ni jica cuu de táca ñuu yúcuan. Te jín cuéhē jñuhun ni stihví ní de táca hermano cácañdeje. Te ni jinū de Grecia. <sup>3</sup> Te ni condee de yúcuan únī yoō. Te je yajni quihín de jín barco nde Siria nuū, te máa quiví ún te ni nihín de jñuhun jeē jnáhan ñuu de hebreo ni casquijnáhan jñuhun jeē ndonda síquī de ichi nuū quihín de, te jeē yúcuan ní nacani ní de

te cuahān tucu de ichi Macedonía. <sup>4</sup> Te ni cahiyó sava tēe cájica jín Pablo, te cánani de Sópater ñuu Berea, Aristarco jín tēe nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo. <sup>5</sup> Te ni cacandu tēe yáha, te cándetu de Pablo jín sáña, Lucas, nde ñuu Troas. <sup>6</sup> Te nuū ni yáha vico jeē cáyeji i pan jeē tu yáhi levadura, te jín barco ni quendacoo ná ñuu Filipos, te nde nuū uhún quiví te ni canajnáhan ná jín de nde ñuu Troas. Te ñuu yúcuan ní coyūcu ná uxā quiví.

*Jeē ni íne Pablo ñuu Troas*

<sup>7</sup> Te máa quiví domingo ni candutútú ñáyuu cácañdeje jeē caji i pan, nájnuhun ni steén maá Jítoho yō jeē núcūhun ni yō síquī yā. Te ni steén Pablo jñuhun nuū ñáyuu ún. Te síquī jeē inga quiví un jini ñúhún quenda de quihín de, te nahán ní nacani de jñuhun nde ni cuñuú. <sup>8</sup> Te vehe yósó jnáhan cúu vehe ún. Te nde cuarto xiní nuū ní candutútú ná un ní iyo cuehē lámpara ni cundijin. <sup>9</sup> Te ñin sūchi yá nání i Eutico, néne i yuhu ventana. Te jeē ní cunahán nácani Pablo jñuhun, te yōhyo jíi i máhná, te ni quixí-ni i. Te nde piso uní un ní ñinga i nde nuū ñuhun. Te je ni jihí i ní candonehen de i. <sup>10</sup> Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jínáhan ní, chi ni natecu i, áchí de.

<sup>11</sup> Te ni ndaa Pablo, te ni yeji de pan jín i jínáhan i jeē cánućūhun ni de síquī yā. Te nahán gá ni nacani de jñuhun nde cuacundijin. Yūcuán na te ni quenda de cuahān de. <sup>12</sup> Te Eutico chí iyó vāha i cuanuhun i jín de jínáhan de, te ndivii ñayuu ún yōhyo cácusí ni i.

*Jeē ní quenda Pablo ñuu Troas cuahān de ñuu Mileto*

<sup>13</sup> Te ní quívicoo ná ini barco cuángoo ná. Te Pablo chí cúní de

caca jéhé de, te ni cundaā jeē najnāhan ná jíin de nde űuu Asón. <sup>14</sup> Te nuū ní canajnáhan ná jíin de űuu Asón, te ni quiví de barco te cuangoo ná jíin de nde űuu Mitilene. <sup>15</sup> Te yūcuan ní quendacoo tucu ná jíin barco te inga quiví ni jinūcoo ná xiin Quío, űuhun jeē íne sñn nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná űuu Mileto. <sup>16</sup> Te tu ní jéngoo ná űuu Efeso, chi jéni ni Pablo jeē yáha-ni de űuu un quihín de, návāha ma cucuéé de Asia te naa tiempo nuū, chí núú de jinū yachi de űuu Jerusalén cone de máá quiví Pentecostés núu na cúu.

*Jeē ní jeni ichí Pablo tēe jéhu cándiso jniñu nuū ñáyuu cáandíje űuu Efeso*

<sup>17</sup> Te ná íne ga Pablo űuu Mileto, te ni tají de jnūhun cuahān nde űuu Efeso jeē na quijicoo tēe jéhu cándiso jniñu nuū ñáyuu cáandíje yūcuán. <sup>18</sup> Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. <sup>19</sup> Chi ní tiempo jeē ni íne ná jíin ní te nde vijna, jéjniñu vāha na síquī jnūhun máá Jítoho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnūndóho ni casáha jnáhan űuu ná hebreo, chí ni casquijnáhan jnūhun i síquī ná. <sup>20</sup> Te cájini ni jéé te tu ní táñúhún ná ni ñn, vésú ndese ga cácahān ñáyuu síquī ná, chí ni nacani ná ndihí jnūhun ya jeē quéndōo vāha ní sáha. Te ni steén na jnūhun ya nuū ni jíjnáhan ní, cúu nuū chitú cúu tǎcá vehe ní. <sup>21</sup> Te inuú-ni jnūhun ni nacani ná núú ndihí ní, cúu jnáhan űuu ná hebreo cúu ñáyuu tǎca gá nación, chí ni cahān na jéé na nacani ni ni jéé stóo ni cuéchi ní te na cándíje ní máá Jítoho yō Jesucristo. <sup>22</sup> Te vijna chí űūhun ichí ná quihín ná

ñuu Jerusalén, chí stǎhví ni Espiritu Santo sǎña quihín ná. Te tu jíni ná ndese ga coo jíin ná yūcuán. <sup>23</sup> Te íyó ñn jeé jíni ná, cúu jeé chune i sǎña vecāa te quiji jnūndóho síquī ná, chí Espiritu Santo súcuan cáhán jíin ná ndijnahan űuu nuū jíca ná. <sup>24</sup> Te ni tu sáha ná cuenta vésú na cáhni i sǎñá, chí jeé cuní na cúu jeé na sínu vāha ná jniñu jeé ní tee máá Jítoho yō Jesús síquī ná, te súcuan cusí ni ná. Te jniñu un cúu jeé nácani ná jnūhun vāha ya nuū tǎca ñáyuu ndese vāha ni Yaā Dios jíin yó.

<sup>25</sup> Te je ni jica cuu ná, ní nacani ná jnūhun ya nuū ní ndese ndácu Yaā Dios jniñu. Te vijna chí jíni na jéé ni ñn ní ma najnáhan ga yō nuū ñáyiví yáha. <sup>26</sup> Jeé yūcuan cástūhun cájí ná nuū ni jíjnáhan ní vijna jeé násūu cuéchi ná cúu núu ndé ñn ní stǎvi. <sup>27</sup> Chí ni nacani ná núú ní ndihí jnūhun Yaā Dios jeé ni sǎndaā yā ndese coo, te tu ní quéndōo ni ñn jnūhun. <sup>28</sup> Núu súcuan te coto vāha ní máá ní jíin ndihí ñáyuu cáandíje, chí Espiritu Santo ni jeni ya nihín jéé cóndito ní ñáyuu maá Jítoho yō, chí ni nacuaan ya i jíin níñí yā. <sup>29</sup> Chí jeé quihín na te jíni na jéé quijicoo tēe cástáhú quivícoo mēhñu ní, te nducú de snāa de jnūhun ni cajetáhú ñáyuu cáandíje, te xeén sáha jnūhun stáhú de nájñūhun xeén sáha yihí jeé cájehni tǎ lanchi. <sup>30</sup> Te suni nuū grupo maá ní quejéé sava de cahān de jnūhun stáhú, te stáhú de sava ñáyuu cáandíje jeé na cóndiquín i jnūhun stáhú stéén de. <sup>31</sup> Jeé yūcuan condito ní jéé ma cóo súcuan. Te ma náā ni ni jéé uní cuiyā ndiquiví ndíñuu ni condihví ndasí ni na ndé ndahyú na jéhē ní, ní jeni ichí ná ñn ñn ní jíjnáhan ní.

<sup>32</sup> Te vijna, hermano, jícan tahú na núu Yaā Dios jeé coto ya nihín. Chí jnūhun jeé vāha ni yā ndíso poder sáha jeé íje ga ni jíin, te suu sáha jeé ñn quiví te cuāha ya tahū jeé ndujéhu luu ní ndé jíin ndihí

ñayuu ní nacāji ya jeē cóo ndoo coo i i nuū yā. <sup>33</sup> Tu ní ndúcú ná jeē nihín na xúhun chí sahma nuū ní i. <sup>34</sup> Chí je cājini váha ni jéē sa suhva ni sájniñu nihín ná návāha nihín na jeē cótecu na ndé jín táca téé cájica jín ná. <sup>35</sup> Te níni ní steén na núū ni jéē súcuan jini ñúhún sájniñu yó návāha nihín yō jeē cuáha yó núū ñayuu cúmani nuū. Te ma náā ni ni jnúhun jeē ni cáhān maá Jítoho yō Jesús, chí suhva ni cahān yā: Ndetū gā quendōo yó jéē cuáha yó vēsú jeē nihín yō, achí yā. Achí Pablo.

<sup>36</sup> Te ni ndihi ni cahān de táca jnúhun yāha, te ni jecuiñi yití de, te ni jicān tahu de jín ndihi tēe ún. <sup>37</sup> Yūcuán na te ndihi de ni cajecunundee jnáhan de jín Pablo ni catechuhú de jeē cánacuatahú de, te ni candahyū de. <sup>38</sup> Chí cácuuihyá ndasí ni de jín jnúhun ni cahān Pablo jeē ma ndácoto jnáhan ga de. Te cuangoo-ni de jín Pablo nde núū in barco.

*Jeē cuánuhun Pablo ñuu Jerusalén*

## 21

<sup>1</sup> Yūcuán na te ni caquendōo táca hermano ñuu Efeso, te ni quivicoo ná barco, te cuangoo ndaā-ni ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. <sup>2</sup> Te ni cane in barco jeē quihín Fenicia, te ni quivicoo ná cuángoo ná. <sup>3</sup> Te nuū ní cajito ná núū Chipre jeē íne sín nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndiso barco ún. <sup>4</sup> Te ni jenanducú ná ñayuu cáandíje, te ni caquendōo ná jín i uxā quiví. Te maá Espíritu Santo ni steén nuū i jeē quiji jnúndóho siquí Pablo ñuu Jerusalén, te jeē yūcuan ní cacahān i jín de jeē ma quihín. <sup>5</sup> Te ni yāha uxā quiví ún, te ni quendacoo ná. Te táca téé cáandíje jín ñasihí

de jín séhe de ni cachuhun ichi de sãña ní jengoo de jín ná nde yatã ñúū, te ni cajecuiñi yití ná jín de yumar te ni cajicān tahu na. <sup>6</sup> Te ni cañunundee jnáhan ná ní canacuatáhú ná yūcuán, te ni quivicoo ná barco cuangoo ná. Te ni canandíó cóo de cuanungoo de vehe de.

<sup>7</sup> Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano, te ni caquendōo ná jín de in quiví. <sup>8</sup> Te inga quiví un ní cajica jéhé ná jín Pablo, te ni jinūcoo ná ñuu Cesarea, te ni quivicoo ná vehe Felipe, tēe nácani jnúhun váha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jín de. <sup>9</sup> Te tēe un íyó cúūn séhe síhí de jeē cáhíyo maá i, te cáncani i jnúhun Yáa Dios. <sup>10</sup> Te ni coyūcu ná yūcuán tijni quiví. Te ichi Judea ni quiji in tēe nácani jnúhun Yáa Dios, nání de Agabo. <sup>11</sup> Te ni quee de nuū ná. Te ni quihin de sanchí Pablo, te ni jihni de ndaha de jín jéhé de, te ni cahān de:

Suhva cáhān Espíritu Santo. Jnáhan yó hebreo súcuan cuhni i tēe chí sanchí yáha ini ñuu Jerusalén, te nastúu i de nuū ñáyuu sín nación, achí de.

<sup>12</sup> Te jeē ní cajini sōho na jnúhun yáha te maá ná jín táca téé cáandíje cáyūcú ñuu Cesarea ni cacahān ndahú ná jín Pablo jeē ma quihín de ñuu Jerusalén. <sup>13</sup> Yūcuán na te ni cahān Pablo:

¿Najehē cándahyū ni jínáhan ní, te casáha ní jéē cucuíhyá ni ná? Chí sãña je íyó túhva ná jéē násūu maá jéē cónuhni ná ini ñuu Jerusalén, chí suni jeē vēsú na cúū na jéē siquí maá Jítoho yō Jesús, achí de.

<sup>14</sup> Te jeē tu ní cúu cuíti casicoo ná, yūcuán na te sa suhva ni cacahān ná:

Na cóo ndese cúni maá Jítoho yō nuu súcuan, achí ná.

<sup>15</sup> Yūcuan na te sáa te ni casátūhya ná, te cuangoo ná űuu Jerusalén. <sup>16</sup> Te suni jecu tēe űuu Cesarea jeē cácanđije cuangoo de jíin ná. Suni cuahān ĩn tēe Chipre nání de Mnasón, te je ni cuu cuehē cuiyā candíje de. Te ná ni jínūcoo ná űuu Jerusalén, te ni cacoyūcu ná vehe de.

*Jeē ni jécondēhe Pablo Jacobo*

<sup>17</sup> Te nuū ni jínūcoo ná űuu Jerusalén, te hermano cáyūcú űuu ún yōho ni cacusi ni de jeē ni jínūcoo ná. <sup>18</sup> Te inga quivī un ní cajengoo ná jíjnāhan ná jíin Pablo vehe Jacobo, te yūcuan ní candutútú táca tēe jéhnū cándiso jniñū nuū űayuu cácanđije. <sup>19</sup> Te Pablo ni sáha de saludar tēe ún jíjnāhan de. Yūcuán na te ni castūhún de ndihī jniñū ní sáha Yaā Dios ná ni nacani de jñūhun ya nuū űayuu táca nación jeē tu cájini i jñūhun ya. <sup>20</sup> Te ni cajini sōho de jñūhun yáha, te ni cacahān de jeē yóhō cújéhnū Yaā Dios. Te ni cacahān de jíin Pablo:

Hermano, vijna te jíní ni náa cuehē mil jnāhan űuu yō hebreo ni cacandíje i Jesús, te cacahān nīhin i jeē cánuú squícu yó ley jeē ni jéhe ya nuū Moisés. <sup>21</sup> Te ni canihīn i jñūhun cacahān jeē stívi ní steén ni núu táca jnāhan yó űayuu hebreo cáyūcu jíca i táca gá nación, chi ni steén ni núu i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i táca gá jeē tajnúni jenhán. <sup>22</sup> ¿Nde se sáha ní núu súcuan? Chi cuni űayuu un jéē ní ndee ní te cutútú cuehē i. <sup>23</sup> Suhya sáha ní núu súcuan. Yáha íyó cúin tēe jeē ní cajejnūhun de ĩn jeē squícu de nuū Yaā Dios. <sup>24</sup> Cueva ní tēe yáha quihīn ni jíin de templo, te cuchi ní nasándoo ní máá ní jíin de nuū yā, te cuaan ní jeē socó de nuū Yaā Dios jíjnāhan de. Yūcuán na te cuu sáte de xinī de, te suu steén jeē ní

casquícu de ndihī jeē ní cajejnūhun de nuū yā. Yūcuán na te cuni ndihī űayuu jeē tú ndaā táca jñūhun ni cajini sōho i siquī ní, chi coto i jeē suni máá ní sa squícu ní ley yā. <sup>25</sup> Te űayuu táca nación jeē násūu űayuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cáji i cúñu jeē ni sóco nuū ídolo ni niñī ni quitī jeē jihí jeē tu jéti niñī tī, te ni ma cáca jnéni i, áchí de.

*Jeē ní cajni de Pablo ini templo*

<sup>26</sup> Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jíin jeē nasándoo tēe un máá de nuū yā, te quindecá de quitī jeē socó de nuū yā.

<sup>27</sup> Yūcuán na te cácuu de jeē sínu de ndihúxá quivī jeē cándundoo de nuū yā, te sava jnāhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihī űayuu, te ni cajni i Pablo. <sup>28</sup> Te ni cacana jee i:

Tēe űuu yō Israel, cuāha núu ní ndaha jíjnāhan ní na jni yó tēe yáha. Chi máá de cúu tēe jíca cuu ní cáhnu stéén de nuū táca űayuu, te cáhán de siquī nación yó jíin síquī ley jeē ni jéhe ya nuū Moisés jíin síquī templo yáha. Te suni je ni quivicoo de jíin jecu tēe griego ini templo ĩ yāhā, te súcuan stívi de jñūhun ĩ jeē cahán jeē ma cúu quivī űayuu ini templo te núu nasūu űayuu hebreo cúu i, áchí.

<sup>29</sup> Chi nde na íne Pablo ini űuu un ní cajini tēe hebreo jeē jíca de jíin Trófimo, tēe űuu Efeso jeē násūú hebreo cúu de, te cájeni ni de jeē ni quivī tēe un jíin Pablo ini templo.

<sup>30</sup> Te ndihī űayuu űuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. <sup>31</sup> Te ni cacani i cahni i de núu. Te general, tēe cújéhnū nuū ndihī soldado, ni nihīn de jñūhun



jeē ndihī ñayuu ñuu Jerusalén ni candonda i cácuvaā i. <sup>32</sup> Te ni jeca general tãcá soldado jíin capitán, te cájiru de cuango de nde nuū cáhiin ñayuu cuehē ún. Te ná ni cajito ñayuu jeē ni jíinūcoo general jíin soldado, te ni cajecuiñi i jeē cácani i Pablo. <sup>33</sup> Yūcuán na te ni quivī general mēhñu ñayuu, te ni jñi de Pablo, te ni ndacu de jñiñu jeē conuhnī de jíin úu cadena. Yūcuán na te ni cajñuhún general ndé tée cúu Pablo te na cuēchi ni sáha de. <sup>34</sup> Te ni cacana ñayuu cuehē ún, sava i ñin jñuhun te sava ga i inga jñuhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jñiñu cuahān Pablo nde cuartel. <sup>35</sup> Te nuū ni jíinū Pablo escalera cuartel ún, te soldado ni cajñi de Pablo cándiso de siquī jeē cácani ñayuu ún jñi i Pablo sáha xeēn i jíin de. <sup>36</sup> Chi ndihī i vējicoo i ichi yátá soldado, te cácana jee i:

Cahni ni tée jíinā, achí i.

*Jeē ni cáhān Pablo jehē maá de nuū ñáyuu*

<sup>37</sup> Te cásquivī de Pablo ini cuartel nuū, te jíin jñuhun griego ni cahān Pablo jíin general:

¿A cuáha ni jñuhun cahān ná ñin jñuhun jíin ní? achí de.

Te ni cahān general jíin de:

Te jíinī rō cahān rō yuhu griego jeē súcuan. <sup>38</sup> Núu súcuan te nasūu rōhó cúu tēe Egipto jeē jé ni cuu quivī ni ndonda siquī gobierno te ni quenehen cuūn mīl tēe jéhni ndīyī cuango jíin de nde nuū ñuhun téhé, achí.

<sup>39</sup> Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ñin ñuu jeē kujéhnu ndañúu Cilicia. Te quíñuhun ni ni cuáha ní jñuhun na cáhān na jíin ñáyuu yáha jíināhan i, achí de.

<sup>40</sup> Te general ni jēhe de jñuhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúu ñáyuu

ún. Te nuū ní cuu nayúu-ni i, te jíin jñuhun yuhu ñúu de hebreo ni cahān de:

## 22

<sup>1</sup> Ndhī níhín jeē cácuu ní jnāhan ñuu yō jíin ndihī níhín jeē cácujuhnu ní nuū ñúu yō, cuni sōho ní jñuhun cahān na jéhē maá ná, achí de.

<sup>2</sup> Te ni cajini sōho i jeē cahān Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahān Pablo:

<sup>3</sup> Máa ná cúu jnāhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndihī siquī ley jeē ni jēhe ya nuū jíi yō. Te nde jíin ini jíin ánuá na ní nducú ndéyí ná squicu ná súcuan nuū Yāā Dios, nájnūhun cásaaha máa ní vijna. <sup>4</sup> Te ni jito xeēn na ñáyuu cácadje i jñuhun Jesús te nde cuni na jée na cúu ndihī i núu. Chi cúu tēe cúu ñahan ni jñi ná ni chuhun ná vecā. <sup>5</sup> Te sutū kujéhnu ga jíin táca tée jéhnu cándiso jñiñu nuū ñúu yō, cácuu de testigo jeē súcuan ni sáha ná, te suni máa de ni cajēhe de tijni carta cuahān na jíin jée cuáha na núu táca jnāhan yó cáyūcú ñuu Damasco. Chi cuahān ná ñuu un jée jñi ná ñáyuu cácadje i Jesús te quindecā ná i ñuu Jerusalén yáha, návāha ndoho i núu.

*Jeē ní cachi Pablo ndese ni sama ya de*

(Hch. 9.1-19; 26.12-18)

<sup>6</sup> Te ni quihin ná ichi cuahān ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñin nduva ní ndindéé ndaxín núu ná. <sup>7</sup> Te ni cotúu-ni ná núu ñuhun, te ni jini sōho ná ñin jñuhun cáhān jíin ná: Saulo, Saulo, ¿najehe jito xeēn rō ruhū? achí. <sup>8</sup> Yūcuán na te ni cahān ná: ¿Na nihín cúu jeē cahān, Tātā? achí ná. Te ni cahān yā jíin ná: Máa rí cúu Jesús jeē ní jehnu ñuu Nazaret, te jeē jito

xeēn rō ñayuu cácanđije i ruhū cúu jeē jito xeēn rō ruhū, achí yá. <sup>9</sup> Te tēe cuangoo jíin ná ni cajini ndije de jeē ndíndēé, te ni cayūhú de, te tu ní cájini sōho de ndese ni cahān yā jíin ná. <sup>10</sup> Yūcuán na te ni cahān ná: Tātā, ¿na vé cuni ni jéē sāha ná? áchí ná. Te ni cahān maá Jítoho yō jíin ná: Ndocuiñi te quihīn rō ñuu Damasco, te yūcuan íyó ñin tēe jeē cachi nuū rō na vé cúu jeē cánuú sāha ró, áchí yá jíin ná. <sup>11</sup> Te jeē ní ndíndēé un ní sacuaá núu ná, te tēe cuangoo jíin ná un ní cajini de ndaha ná cuangoo de jíin ná ní jinūcoo ná ndé ñuu Damasco.

<sup>12</sup> Te yūcuan ní condee ñin tēe nání Ananías, te tāca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés. <sup>13</sup> Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núu de. <sup>14</sup> Te ni cahān Ananías: Máa Yāa Dios tāca jíi yō, je ni nacāji ya nihín návāha cuni ní na vé cuni yā jeē sāha ní, te coto ní núu maá Cristo, Yāa ndaā, te cuni sōho ni jnúhun jeē cahán yā. <sup>15</sup> Te nacani ní jnúhun ya nuū ndivii ñayuu tāca jéē ní jito ní jíin jéē ní jini sōho ní. <sup>16</sup> Ma cúhuun ni ní núu súcuan. Ndocuiñi ní, te cuandute ní te cahān ndahú ní jíin maá Jítoho yō, návāha nacate ya anuá ní núu cuéchi, áchí de jíin ná.

*Jeē ní cachi Pablo ndese ni taji Yāa Dios de nuū ñayuu tāca gá nación*

<sup>17</sup> Te ni nandió cóo ña ní ndee ná ñuu Jerusalén. Te jícan tahu na ini templo, te ni sāha maá Jítoho yō jeē ní jito ndijin ná. <sup>18</sup> Te ni jini na núu yā ni cahān yā jíin ná: Yachī quenda ró ñuu Jerusalén yāhá, chi ma cuatáhu ñayuu yáha jéē nácani ró jnúhun ri nuū i, áchí yá. <sup>19</sup> Te ni cahān na jíin yá: Tuú, chi cuatáhu i, Tātā, chi je cájini i jeē ni quívi ná ndijnahan vehe ñi sinagoga ni jni

ná tāca ñayuu cácanđije i nihín, te ni cani ná i, te ni chuhun ná i vecāa. <sup>20</sup> Te je cájini i jeē quívi ní cajehni i Esteban, tēe ni nacani cáji jnúhun ní, suni ni indichi na yúcuán, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. <sup>21</sup> Te ni cahān yā jíin ná: Cuáhán, chi maá rí taji rí rohó quíhin jicá ró nde nuū ñayuu tāca nación jeē tu cájini i jnúhun ri, achí yá jíin ná. Achí Pablo.

*Jeē ni íne Pablo nuū general*

<sup>22</sup> Te tāca ñayuu ún vāha-ni ni cajini sōho i te nde jnúhun sandíhi yáha jéē ní taji yá de nuū ñayuu tāca gá nación. Yūcuán na te ni cacuvaá i, te ni cacahān jee i:

Na cúu tēe jíin, chi tú vāha jeē cótecu gā de, áchí i.

<sup>23</sup> Te súcuan cácana jee i, te ni cascádoó i ticáchí i, te ni cascánda i ticachá. Te súcuan cástéén i jeē cáquiti xeēn ni i. <sup>24</sup> Te ni ndacu general jniñu jeē na quívi Pablo ini cuartel, te ni cahān de jeē na stúchí soldado Pablo nde jíin cuarta ñi, návāha cujnúni ní general na síquí cúu jeē ní candonda ñayuu un síquí de. <sup>25</sup> Te ni cajihni de Pablo návāha súcuan te cani de. Te ni cahān Pablo jíin capitán jeē indichi tūhva:

¿A jéhe ley jnúhun jeē cani ní cuarta tēe cúu sēhe nación Roma núu ná tu sándaá ní núu íyó cuéchi de? áchí de.

<sup>26</sup> Te ni jini sōho capitán jnúhun yáha, te ni jecahān jíin general:

Coto vāha ní jéē ma stívi ní sāha ní jíin tēe yáha, chi cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajnúhún de:

Cachi núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

<sup>28</sup> Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sãñá chi nde quiivī ní cacu ná cúu ná séhe nación yō Roma, achí de.

<sup>29</sup> Yūcuán na te tãca tée jeē cáconi cani Pablo nuú, ni cacujiyo-ni cuangoo, te suni nde general ni yūhú de, chi ni stívi de jeē ní jhni de Pablo, chi tu iyó váha sáha súcuan jíin séhe nación Roma.

*Jeē ni índichi Pablo nuū junta cujéhnu ga jnāhan ñuu de hebreo*

<sup>30</sup> Te inga quiivī un cúní general cundaā váha ni de na siquī cúu jeē ní candonda tée hebreo siquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñnu jíin táca tée cásáha junta cujéhnu ga, te ni quenehen de Pablo, te ni jeni de nuū tée ni candutútú un.

## 23

<sup>1</sup> Yūcuán na te ni ndacoto Pablo nuū tée ni candutútú junta un, te ni cahān de:

Tátā jijnáhan ní, ní ndé vijna váha iyó ní anuá na jéé tú na cuēchi ná, jíto jínúu Yaā Dios, achí de.

<sup>2</sup> Yūcuán na te Ananías, sutū cujéhnu ga, ni cahān jíin tée cáhīin yajni nuū de jeē na cátu maá yuhu de. <sup>3</sup> Te ni cahān Pablo jíin sūtū cujéhnu ga ún:

Yaā Dios stóho ya nihín chi tée stáhú-ni cúu ní, chi néne ní jéé sándaā ni núu ni stívi ná ley yā, ¿te naun stívi maá ní ley jeē ndácu ní jniñu jeē cáni de sãñá? achí de.

<sup>4</sup> Te ni cacahān tée cáhīin nuū de ún:

¿Naun cáhán rō súcuan jíin sūtū cujéhnu ga? Chi nuū Yaā Dios jeniñu de, achí jíin de.

<sup>5</sup> Te ni cahān Pablo:

Tátā jijnáhan ní, tu ní jíin na jéé sutū cujéhnu ga cúu de, chi núu ní jíin na te ma cahán na súcuan núu, chi yósó núu tútu íi jeē ní cahān yā jeē ma cahán neé yó coto yó táca tée cácujeñnu nuū yō, achí Pablo.

<sup>6</sup> Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñn jnāhan grupo fariseo, te suni súcuan ni iyo tátá na. Chi suni máá ná ñúhun ni na jéé nastécu yā ndíyi, te siquī yúcuan cúu jeē cácahān ni cuēchi siquī ná, achí de.

<sup>7</sup> Te jeē súcuan ni cahān de te ni cacusín ni tée junta jeē cácuu grupo fariseo jíin grupo saduceo, te ni cacahān ñihin. <sup>8</sup> Chi cácahān tée grupo saduceo jeē ma nátecu ndíyi, ni tu cáhīyo ndajéhé yā ní ánuá, te tée grupo fariseo cájejnúhún de ndinúní jnúhun yáha. <sup>9</sup> Te yōhyo ni cuvaā. Te sava tée cástéén jnúhun cáhán tutu ley yā jeē cácuu jnāhan grupo fariseo, ni candocuiñi de, te ni cacahān de:

Tú ni ñn cuēchi cánihīn na síquī tée yáha. Sanaa te ni cahān ndije ñn ánuá jíin de chí ñn ndajéhé yā. Ma sáníhni ni yō nuū Yaā Dios nuu súcuan, achí.

<sup>10</sup> Te yōhyo ni catejnáhan, te yúhú general jeē quende i chiyō Pablo, te ni ndacu de jniñu jeē na quiivī soldado te quenehen de Pablo sava mēhñú i, te na ndívi de ini cuartel.

<sup>11</sup> Te jecuāā un ní quee-ni máá Jítoho yō nuū de, te ni cahān yā jíin de:

Pablo, cuandeyí ni rō, chi nájnúhun ni nacani ró jnúhun ri ini ñuu Jerusalén yáhá, suni súcuan nacani nahín ró jnúhun ri ini ñuu Roma, achí yá.

*Jeē ní casquijnáhan jnúhun cahni Pablo*

<sup>12</sup> Te nuū ní cundijin te ni cacutútú sava ñayuu hebreo, te ni casquijnáhan jnúhun, te ni cacahān teyí i jeē ma cáji cuiti i ni ñn ni ma cóho cuiti i nde núu tu cahni i Pablo. <sup>13</sup> Te víhyá gā uū xico tée hebreo ni cacahān teyí jnúhun yáha. <sup>14</sup> Te ni jengoo nuū sutú cácujeñnu jíin núu

tée jéhnú cándīso jníñu nuū ñáyuu hebreo, te ni cacahān jíin tée ún:

Ni cacahān teyí ná jeē ma cáji cuíti ná ni ñin níni nde ná tu cahni na Pablo. <sup>15</sup> Nūu súcuān te máá ní jijnáhan ní jíin táca gá tēe cásáha junta cujéhnú ga, cuácáhān ni jíin general jeē quenehen de Pablo na jée de nuū junta sajnē, chi cachi ni jée cáconi ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhīn tútú ní, achí.

<sup>16</sup> Te sēhe yíí cuáha Pablo ni nihīn i jñūhun jeē súcuān ni cacahān, te ni jehēn i cuartel, te ni castūhún i nuū Pablo. <sup>17</sup> Te ni cana Pablo xīnī ñin jnáhan capitán, te ni cahān de:

Condeca ní súchi yáha quíhīn ni jíin i nuū general, chí iyó ñin jñūhun castūhún i nuū de, achí de.

<sup>18</sup> Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jee quíndeca ná súchi yáha nuū ní, chí iyó ñin jñūhun cahān i jíin ní, achí de.

<sup>19</sup> Te ni jñī general ndaha i cuahān de jíin i ñin lado, te yuhu-ni ni cajñūhún de i:

Na jñūhun cúní rō cahān rō jíin rí, achí de.

<sup>20</sup> Te ni cahān i:

Tēe hebreo ni casquíjnáhan jñūhun de jeē cahān ndahú de jíin ní quenehen ní Pablo sajnē quíhīn de nuū táca tēe cásáha junta cujéhnú ga, chí cahān-ni de jíin ní jeē cáconi de jeē stíchí vāha ga de Pablo. <sup>21</sup> Te ma cuáha ni jñūhun, chí víhyá gā uū xico de cándētu sáhi de ichi, te ni cacahān teyí de jeē ma cáji cuíti de ni ñin ni ma cóho cuíti de nde nūu tú cahni de Pablo, te vijna je cándētu túhva de jeē cuáha ni jñūhun quíhīn Pablo nuū junta, achí i.

<sup>22</sup> Te ni cahān general jíin i jeē ma cáchi i nuū ní ñin ñayuu jeē ni cahān i jñūhun yáha jíin de, te ni tají de i cuanuhun i.

*Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuān na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jíin únī xico uxī jeē cáyōsó caballo jíin uū ciento jeē cándāha lanza, chí cahīn jecuāá ún quendacoo de jíin Pablo quingoo de nde ñuu Cesarea. <sup>24</sup> Te suni ni ndacu de jniñu jeē coo túhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. <sup>25</sup> Te ni tee de ñin carta jeē cahān jñūhun yáha:

<sup>26</sup> Máá ná cúu Claudio Lisias, te tēe ná carta yáha cuajeē nuū ní, señor Félix, gobernador cujéhnú. Ndese tahū cúu ní. <sup>27</sup> Ñayuu hebreo ni cajñī i tēe yáha, te je yajni cahni i de nūu, te ni jnama ná de jíin soldado, chí ni jini na jée séhe nación Roma cúu de. <sup>28</sup> Te ni jendeca ná de nuū junta maá i jijnáhan i jeē sándaā i nūu na cuēchi ni sáha de. <sup>29</sup> Te ni jini na jée siquí ley maá i cúu cuēchi cácahān i siquí de, te tu níhīn na ni ñin cuēchi siquí de jeē cúu de ni jeē cóne de vecāa. <sup>30</sup> Te ni nihīn na jñūhun jeē sava tēe hebreo ni casquíjnáhan jñūhun de jeē cahni de tēe yáha, te jee yúcuān cúu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquí de jecoo i nuū ní, te jíin cahān i jíin ní na cuēchi ni sáha de. Je ni cahān yō, achí carta.

<sup>31</sup> Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. <sup>32</sup> Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jíin Pablo. <sup>33</sup> Te ni jinūcoo ñuu Cesarea, te ni cachihi carta ndaha gobernador, te suni ni cajeni Pablo nuū de. <sup>34</sup> Te ni cahu gobernador carta un. Te ni cajñūhún de ndé

ñuu cúu Pablo, te ni jini de jeē téé ndañúú Cilicia cúu Pablo. <sup>35</sup> Te ni cahán de:

Nde na quecoo tēe cájequin cuēchi siquī rō te cuni nahín rí jnūhun cahán rō, áchí de.

Te ni cahán de jeē na quíndihyū Pablo ini palacio ndīyi Herodes.

*Jeē ni cahán Pablo jehē maá de nuū Félix*

## 24

<sup>1</sup> Te nuū uhún quivī te Ananías, sutū cujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jíin in tēe cúu abogado, nání de Tértulo. Te ni quívicoo de nuū gobernador jeē cahán de cuēchi siquī Pablo. <sup>2</sup> Te ni cana gobernador Pablo ni quee de. Te ni quejéé Tértulo cahán de cuēchi siquī Pablo, chi suhva ni cahán de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jnūhun cájejnáhan íyó, chí cáyūcu váha yó. <sup>3</sup> Te na cútahū ná, chí táca quivī váha cúu táca núú ndácu ní jniñu jeē váha sáha ní, tátā Félix. <sup>4</sup> Te tu cúni na snáa na cuéhē tiempo ni, te cahán ndahú ná jíin ní cuni nahín ní jecu-ni jnūhun cahán na jíin ní. <sup>5</sup> Chí ni cajini na téé yáha jéé cúu de in tēe tíxín, te sáha de jeē cánacuajnáhan máá jnáhan ñuu ná hebreo níí cáhnu-ni táca lado, te cúu de tēe cújéhu nuū ñáyuu cascuáha jnūhun tēe nání Jesús jeē ní jehnu ñuu Nazaret. <sup>6</sup> Te suni je ndúcú de jeē stívi de táca jniñu ini templo íi, te ni cajni ná de. Te cácu ni na sándaá na síquī de núú, nájnūhun cahán ley ñuu ná. <sup>7</sup> Te ni jinū-ni general Lisias, te ni quende fuerza de tēe yáha núú na jíjnáhan ná. <sup>8</sup> Te ni ndacu de jniñu jeē táca ná jeē cácahán na cuéchi siquī téé yáha quijicoo ná ndé nuū ní. Te vijna cuu stíchí maá ní de, te jíin

jnūhun cahán maá de te cuni ni jéé ni sáha de cuēchi jeē cácahán na jíin ní, áchí Tértulo.

<sup>9</sup> Te suni ni cacahán tēe hebreo jeē ní jinūcoo jíin de jeē iyó ndáa jeé súcuan cúu cuēchi Pablo. <sup>10</sup> Yūcuán na te ni sáha gobernador seña nuū Pablo jeē na cahán de, te ni cahán Pablo:

Je jíin na jéé cuehē cuiyā cúu ní gobernador ñuu yáha, te jeē yúcuan nújnahan ni na jéé sándaá ni síquī ná. <sup>11</sup> Chí máá ní cuu nanducú ní te cuni ni jéé sáa máá úxí uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. <sup>12</sup> Te tu ní stáhán jnáhan ná jíin ní in ñayuu, ni tu ní stóna ná ñáyuu ini templo ni ini vehe íi sinagoga ni ini maá ñuu. <sup>13</sup> Ni tú na jíin stéén de jeé iyó ndáa jnūhun cácahán de siquī ná. <sup>14</sup> Te jnūhun cahán cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te maá jnūhun yáha-ni cúu jeē cácahán de jeé stívi ná. Te cándíje ná táca jnūhun yósó núú tútu ley yā jíin núú tútu jeé ní catee tēe ni canacani jnūhun ya nde jenahán. <sup>15</sup> Te inuú ñūhun ni na jíin de jeé sáha Yaā Dios jeé nátecu táca ndíyi, cúu ñayuu ní casáha váha jíin ñáyuu ní casáha néé. <sup>16</sup> Te jeé yúcuan máni jeē váha ndíhví ni na sáha ná. Súcuan te váha íyó ni anuá na jéé tú na cuēchi ndéé siquī na núú Yaā Dios ni nuū ñáyuu.

<sup>17</sup> Te ni jica cuu ná táca ñuu jicá jecu cuiyā, te sáa te ni ndee na jíin xúhun jéé ní cajēhe táca ñáyuu jeé chindéé ñáhán í jnáhan ñuu na cáyúcú Jerusalén. Te suni ni ndee na jéé socó na quití nuū Yaā Dios. <sup>18</sup> Te íne ná ini templo siquī jeé cuchi ná ndundoo ná núú Yaā Dios te socó ná. Te jecu jnáhan ñuu ná hebreo jeé véjicoo Asia ni cajito de sañá ini templo, te tú na ñayuu cuehē ní cóyūcu jíin ná jeé sávaá í. <sup>19</sup> Te núu ni stívi ná zte naun tu ní quíjicoo tēe Asia un návaha

suní cahān de ndese nī stívī ná? <sup>20</sup> Chí téē nī quecoo yāhá na cáhān maá de núu na cuēchi nī canihīn de siquī na ná nī indichi na núu junta téē cácujuhnu iní űuu ná. <sup>21</sup> ¿Te chí cájequin de cuēchi siquī na jéē nī cáhān jee ná suhva ná nī iyo ná nuū junta naún? Chí nī achi na jéē cándíje ná jéē nátecu tāca ndíyi, te jéē yúcuān cájequin nī cuēchi siquī ná, nī achi na jíin de. Achí Pablo.

<sup>22</sup> Te Félix chí je jíin vāha de ndese cácañdíje űayuu Cristo. Te jéē ní jini sōho de jnūhun yāha te nī stétu de un jíināhan, te nī cahān de:

Nde na quée general Lisias te cajnūhun gá rī siquī jniñu yāha, áchí de.

<sup>23</sup> Te nī ndacu de jniñu nuū capitán jéē na cóne ga Pablo vecāa, te ma cási jéē sáha de jéē cuní de, te nī ma cási jéē quíjicoo jnāhan de jéē chindéē űahán i de.

<sup>24</sup> Te nī cuu jecu quivī, te nī quiji tucu Félix jíin űasihí de Drusila, te űahan hebrea cúu űa. Te nī ndacu de jniñu jéē na quíji Pablo návāha nacani de jnūhun ndese cándíje yó Jesucristo. <sup>25</sup> Te nī cahān Pablo jíin de jéē cánuú sáha yó jniñu ndaā, te cánuú coto yó máá yó jéē ma sáha yó jniñu stívī, chí quivī sándihí te sándaā Yaā Díos jniñu ndivii űayuu ndese nī casáha i. Te nī yūhu Félix te nī cahān de:

Vijna te cuáhān, te inga quivī jéē núne ri te cana ri rohó quiji ró, áchí de.

<sup>26</sup> Te űūhun nī de jéē cuāha Pablo xūhun núu de te siáa de quenda de vecāa. Jéē yúcuān tijní jínu nī cana de Pablo nī candajnūhún de. <sup>27</sup> Te súcuān nī cuu uū cuiyā, te sáa te nī nuquīñī Porcio Festo nuū Félix. Te cúní Félix jéē na cúsiñ nī űayuu hebreo jíin de, te jéē yúcuān ní squéndō de Pablo vecāa.

*Jéē nī indichi Pablo nuū Festo*

## 25

<sup>1</sup> Te sáa únī quivī jéē nī quivī Festo cuu de gobernador Judea, te nī quenda de űuu Cesarea cuahān de űuu Jerusalén. <sup>2</sup> Te tāca sūtū cácujuhnu jíin téē cácujuhnu nuū űáyuu hebreo nī jinūcoo nuū Festo, te nī cajicān cuēchi siquī Pablo. <sup>3</sup> Te nī cacahān ndahú jíin Festo jéē núu vāha nī de te na nátañ de Pablo ndiji űuu Jerusalén. Súcuān nī cacahān, chí je nī casquínāhan jnūhun jéē cahñi Pablo ichi. <sup>4</sup> Te nī cahān Festo jéē yíndesi vāha Pablo nde űuu Cesarea, te je jéni nī de jéē jecu na quivī te nuhūn maá de űuu Cesarea. <sup>5</sup> Te jéē yúcuān ní cahān de jíin táca téē ún:

Tāca níhín jéē cándíso jniñu, na quíngoo yó nde Cesarea, te yúcuān cácañ nī cuēchi siquī de te núu iyó cuēchi de, áchí de.

<sup>6</sup> Te nī ine de yúcuān únā chí úxi-ni quivī, te nī ndee de űuu Cesarea, te inga quivī nī cucōo de mesa nuū sándaā de jniñu, te nī cahān de jéē na quíji Pablo. <sup>7</sup> Te je cáhīn téē hebreo jéē ní quiji-coo nde űuu Jerusalén. Te nī quee Pablo, te nī cajicó ndūū nuū de, te nī caquejéé-ni cásañhún téyí siquī de, te tú na jíin ní cástéén jéē iyó ndáā jnūhun cácahān. <sup>8</sup> Te nī cahān Pablo jehē maá de:

Tu ní sáha ná nī in cuēchi siquī ley űuu na jéē cácuu ná űayuu hebreo, nī siquī templo, nī siquī rey nación Roma, achí de.

<sup>9</sup> Te Festo chí cúní de jéē cusīñ nī űayuu hebreo jíin de, te nī cajnūhún de Pablo:

¿A tu cúní rō quinhun rō Jerusalén te yúcuān sándaā rī siquī rō? achí de.

<sup>10</sup> Te nī cahān Pablo:

Je indichi na núu cúndaā jniñu jéē ndácu máá téē cúu rey nación Roma, te yāha cúu nuū cánuú cundaā jniñu ná. Máá ní je jíin vāha nī jéē tú na cuēchi ní sáha ná siquī tāca jnāhan űuu ná hebreo. <sup>11</sup> Chí

núu ni sáha ná ñn cuēchi xeēn jeē jini ñúhún cuu ná, te íyó váha jeē cúu na núu súcuan. Te núu tu íyó ndáa jnúhun jeē casájnúhún téé yáha síquī ná, te ni ñn tēe ma cúu chihi de sáñá ndaha tēe yáha jínáhan de. Núu súcuan te cúní na quihín na núu maá rey nación Roma sándaā de síquī na, áchí de.

<sup>12</sup> Te ni cajnúhun Festo ndese cájeni ni tēe cándiso jníñu jín de. Yūcuán na te ni cahān de jín Pablo:

Je ni cahān rō jeē cuní rō quihín rō nuū maá rey nación Roma sándaā de síquī rō. Núu súcuan te quihín nahín ró nuū de, áchí de.

*Jeē ni índichi Pablo nuū rey Agripa*

<sup>13</sup> Te ni cuu jecu quivī, te rey Agripa jín Berenice ni jecondēhé de Festo nde ñuu Cesarea. <sup>14</sup> Te tijni quivī ní coyūcú de yūcuán. Te ni nacani Festo jnúhun síquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñn tēe íne vecāa yāhá. <sup>15</sup> Te ná ni jehēn ná ñuu Jerusalén, te sutū cácujuhnu jín ñáyuu jéhu cándiso jníñu nuū ñáyuu hebreo ni jinūcoo i nuū na cájequin i cuēchi síquī téé ún, te cácuni i jeē na cúu de. <sup>16</sup> Te ni cahān na jín i jeē tu íyó costumbre táca tóhō Roma jeē cahni de ñn tēe súcuan-ni, chi jini ñúhún condichi de jín ñáyuu cájequin cuēchi síquī de, návāha cahān de jehē maá de te cundaā núu íyó cuéchi de. <sup>17</sup> Yūcuán na te ni quecoo tútú i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuéchi, te ni ndacu ná jniñu jeē na quíji tēe ún.

<sup>18</sup> Te cáhín ñáyuu cájequin cuēchi síquī de. Te ni jeni ni na jēe iyó cuéchi xeēn cahān de síquī tēe un núu, te tú cuiti. <sup>19</sup> Chi jeē cácahān de cúu máni síquī jnúhun cácañíje-ni maá de, jín síquī ñn tēe nání Jesús jeē jé ni jihí de, te Pablo cahān ñhín de jeē ní natecu ndije tēe ún. <sup>20</sup> Te tu

ní cújnúní cuiti ni ná ndese sándaā ná, te ni cajnúhun ná de núu cúní de quihín de ñuu Jerusalén te yūcuán cundaā síquī de. <sup>21</sup> Te maá Pablo ni cahān de jeē cuní de quihín de nuū Augusto, rey yō nación Roma, te yūcuán sándaā rey cuēchi de, ni achi de. Te ni cahān na jēe na cóne de vecāa nde tají ná de quihín de nuū rey un, áchí Festo.

<sup>22</sup> Yūcuán na te ni cahān Agripa jín Festo:

Suni cúní maá ná cuni sōho ná jēe cahán tēe un, áchí de.

Te ni cahān Festo:

Sajnē te cuni sōho ní jēe cahán de núu súcuan, áchí de.

<sup>23</sup> Te inga quivī un ní quecoo Agripa jín Berenice. Te cáñuhun de sahma cújéhu de, ni quivícoo de ini vehe juzgado jín táca general jín téé cácujuhnu ini ñuu ún. Te ni ndacu Festo jniñu jeē na quíji Pablo. <sup>24</sup> Te ni cahān Festo:

Cahān na jín ní, tátā rey Agripa, jín ndihi níhín jēe cáyūcu jín yó yāhá vijna. Yāha cúu tēe jeē síquī de ni candonda ndivii jnāhan de hebreo ñuu Jerusalén jín ndé ñuu Cesarea yāhá, te máni cácahān i jeē tú váha jeē cótecu gā de. <sup>25</sup> Te jeni ni maá ná jēe tú na cuēchi xeēn ni sáha de jeē cúu de. Te je ni cahān de jeē cuní de quihín de nuū rey Augusto jeē sándaā rey un síquī de, te jeē yūcuán ní cahān na jēe tají ná de quihín de nuū rey un. <sup>26</sup> Te tu cúcahnu ni ná na jnúhun tee ná núu tútu quihín jín de nuū rey yō. Jeē yūcuán ní ndacu ná jniñu ni quee de nuū yō jijnáhan yó, te cánuú gá nuū maá ní, tátā rey Agripa. Te stíchí ní de návāha níhín na jnúhun tee ná síquī de, te quihín jnúhun un jín de nuū rey. <sup>27</sup> Chi tu jéjníñu cuiti jeē tají ná ñn preso quihín te núu tú castūhun ná nuū tútu na cuēchi ni sáha de, áchí Festo.

*Jeē ni cáhān Pablo jehē maá de nuū rey Agripa*

## 26

<sup>1</sup> Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

<sup>2</sup> Tātā rey Agripa, cúsi ni ná vjna jeē cúu cahān na jíin ní siquī ndihí jeē casájnūhún ñayuu ñuu yō hebreo siquī ná. <sup>3</sup> Chi je jíiní vāha máá ní tāca jéé ní tajnúni ñayuu ñuu yō hebreo jíin tāca jnūhun jeē tu cáhāin inuú i jíin. Jeē yúcuán cáhán ndahú ná jíin ní jeē coo paciencia ni cuni sōho ní jnūhun cahān na jíin ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> Je cájini tāca jnáhan ñuu yō hebreo ndese ni sáha ná ini ñuu nuú ní cacu ná jíin ini ñuu Jerusalén nde ná lulí ná. <sup>5</sup> Te núu cácuni maá de cahān ndaā de, te je cájini de sāña jéé ndé lulí ná ni quívi ná nuú grupo fariseo, te grupo un nīhin ga cánducú ndéyi de squícu de ley yā vesú tāca gá grupo tēe nación yō. <sup>6</sup> Te ñūhun ni na jnūhun ni jejnūhun Yaā Dios nuú tāca jíi yō jeē nastécu yā ndīyi, te máá siquī tāca jnūhun yáha-ni cúu jeē cájequin de cuēchi siquī ná. <sup>7</sup> Chi máá yó jeē cácuu yó jnáhan ndihúxi uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yúcuán nduú ñuú cáchiñūhún yó Yaā Dios te cájejniñu yó núu yā. Te suni súcuán ñūhun ni maá ná, tātā rey Agripa, te siquī jeē nácani ná jnūhun jeē natecu ndīyi cúu jeē cájicān jnáhan ñuu yō hebreo cuēchi siquī ná. <sup>8</sup> ¿Te chí má nastécu Yaā Dios tāca ndīyi cájeni ni ní naún?

*Jeē ní cachi Pablo ndese ni jito xeēn de ñayuu cácandíje*

<sup>9</sup> Te máá ná chi ni jeni ni na jéé jíiní ñūhún ndonda ná siquī ñayuu cácandíje i Jesús, Yaā ní jehnu ñuu

Nazaret. <sup>10</sup> Te súcuán ni sáha ná ini ñuu Jerusalén, chi tāca sūtū cácujeñhu ni cajēhe de jnūhun jeē cóndiso jniñu ná chuhun ná cuēhē ñayuu vecāa siquī jeē cácandíje i Jesús, te iyó vāha ni na núu cájehni de i. <sup>11</sup> Te tijni jínu ni sáha ndevāha na jíin i ini tāca vehe i sinagoga jeē ni sáha fuerza na i jeē na stóo i jnūhun cácandíje i. Te xeēn ni quití ni na núu i, chi nde ñuu jicá ní jehēn ná ni sáha xeēn na jíin i.

*Jeē ní cachi tucu Pablo ndese ni sama ya ini de*

*(Hch. 9.1-19; 22.6-16)*

<sup>12</sup> Te sūtū cácujeñhu ni cajēhe de jnūhun jeē cóndiso jniñu ná quihīn na sáha xeēn na jíin ñayuu cácandíje cáyucú ñuu Damasco nuú. <sup>13</sup> Te cuahān ná ichi ún, tātā rey, te caxū cúu, te ichi ándivi ní quiji iin nduva ni ndindéé ndaxín núu na jíin núu tēe cuangoó jíin ná, te víhyá gā ndíi vesú niāndii. <sup>14</sup> Te ndihí ná ní cacotúú ná nuú ñūhun. Te ni jíiní sōho ná iin jnūhun ni cahān jíin ná jíin jnūhun yuhu yó hebreo: Saulo, Saulo, ¿najehē jito xeēn rō ruhū? Chi jeē sáha ró súcuán cúu nájnūhun stiquī jeē tu jéndije ti, te jéñú yatá tí xiní pulla, te súcuán stóho ti maá tí, achí. <sup>15</sup> Yūcuán na te ni cahān ná: ¿Na nihín cúu jeē cahán, Tātā? achí ná. Te máá Jítoho na ní cahān yā jíin ná: Máá rí cúu Jesús, te jeē jito xeēn rō ñayuu cácandíje i ruhū cúu jeē jito xeēn rō ruhū. <sup>16</sup> Ndonda condichi rō, chi vēji ri nuú rō jeē tejniñu ri rohó sáha ró jniñu cúni rí, te nacani cáji ró jnūhun tāca jéé ní jito ró vijna, jíin jéé steén gā rí nuú rō tāca quívi quiji. <sup>17</sup> Te jnama ri rohó núu tāca jnáhan ñuu rō jíin núu ñayuu tāca gá nación, chi nuú ñayuu un táji rí rohó quihīn rō. <sup>18</sup> Te táji rí rohó quihīn rō nuú i, chi nájnūhun nanūne ró tñūú i cúu jeē steén rō jnūhun ri nuú i te jecūhun ni i. Chi ñayuu ná tu candíje i ruhū, nájnūhun cájica i nuú néé. Te jeē



candíje i ruhū, quīvi i nuū luz rī, te tuá quíhi i chíji jniñu jeē cúní jexeén jeē cúu Satanás, chí sa suhva quíhi i chíji jniñu cúní maá rí. Te tájí rí rohó quíhīn rō nuū i, návaha candíje i ruhū te cone cáhnu ni rī nuū cuēchi i. Yūcuán na te inuū níhīn tahú i jíin táca gá ñayuu jeē ni sándoo ri anuá i, áchí yá jíin ná.

*Jeē ní cachi Pablo ndese ni jetáhú de jnūhun ni cahān yā*

<sup>19</sup> Jeē yúcuan tu ní sánīhni ni na núū jnūhun ni cahān yā ichi ándiví jíin ná, tátā rey Agripa. <sup>20</sup> Chí ni jetáhú ná, te ni nacani ná jnūhun ya xīhna gā nuū ñayuu ñuu Damasco, te sáá te ni nacani ná jnūhun ya nuū ñayuu ñuu Jerusalén jíin ní región Judea jíin núū ñayuu táca gá nación. Te jnūhun ni nacani ná núū i cúu jeē na nacani ni i jeē stóo i cuēchi i te nasāma ini i sáha Yāā Dios, te na sáha i jniñu váha jeē steén jeē ní nasāma ini i. <sup>21</sup> Te siquī jeē súcuan ni nacani ná jnūhun te ni cajni jnāhan ñuu yō hebreo sāñá ini templo, te ni cacuni i cahni i sāñá núú. <sup>22</sup> Te ni chindéé ñahán Yāā Dios sāñá, te jeē yúcuan índichi níhīn na ndé vijna nācani cájí ná jnūhun ya nuū ñayuu cácujeñu jíin núū táca-ni ñayuu. Chí tu chíso gá na jnūhun siquī jnūhun jeē ní nacani Moisés jíin táca gá tē ni canacani jnūhun Yāā Dios nde jenahán. <sup>23</sup> Te ni cundaā jnūhun ni canacani de un jéē cánuú ndoho Cristo nde cuu yā, te xīhna gā maá yá natecu vēsú táca gá ndīyī, te súcuan stéén cají yá nuū ñayuu jeē jnāma ya i, cúu ñayuu nación yō Israel jíin ñayuu táca gá nación, áchí Pablo.

*Jeē ní nducú ndéyí Pablo scandíje de Agripa jnūhun Jesús*

<sup>24</sup> Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuan ní tīvi xíní rō, áchí de.

<sup>25</sup> Te ni cahān Pablo:

Tu ní tīvi xíní na, tátā Festo, chí sa suhva iyó cájí ndāā jnūhun cáhān na. <sup>26</sup> Te maá rey Agripa je jíin váha de táca jniñu ní iyo jeē ní nacani ná, te tu yúhú ná cahān na táca jnūhun yáha, chí je jíin váha na jéē jíin de táca jnūhun yáha, chí tú sáhi ní cúu táca jniñu yáha. <sup>27</sup> Tátā rey Agripa, ¿á candíje ní jnūhun jeē ní cacahān tēe ni canacani jnūhun ya nde jenahán? Jéni ni na jéē candíje ní, áchí Pablo.

<sup>28</sup> Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sáha ró jeē candíje ri Cristo, achí de.

<sup>29</sup> Te ni cahān Pablo:

Vēsú jíin jecu-ni jnūhun chí jíin cuéhē, te jícán tahú na jéē maá ní jíin táca gá tēe cájini sōho jnūhun cáhān na vijna, na candíje ní nájjnūhun candíje máá ná, te tu cúní na jéē cónuhni ní nájjnūhun núhni na.

<sup>30</sup> Te ni ndihí ni cahān Pablo táca jnūhun yáha. Te ni ndocuiñí rey jíin gobernador jíin Berenice jíin táca gá tēe cácujeñu cáyūcu jíin de. <sup>31</sup> Te ni cacujiyo de, te ni candajnūhun sán máá de:

Tú ni in cuēchi ní sáha tēe yáha jéē cúu de ni jeē cóne ga de vecāa.

<sup>32</sup> Te ni cahān Agripa jíin Festo:

Cuu siáá ni tēe yáha núu jeē tu ní cáhān maá de jeē quihín de nde nuū rey yō nación Roma núu, áchí de.

*Jeē ní catají de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quívicoo de ndaha in capitán naní Julio jeē quíndēca de tēe un ndé Italia. Te Julio cúu in jnāhan grupo soldado naní Augusto. <sup>2</sup> Te nde ñuu Adramitio nuū cájecuiñí barco ní quenda in barco ni quee, te ni quívicoo

ná, te quihīn barco un táca ñuu jeē yāhi chīji Asia jeē yūcu yumar. Te suni cuahān Aristarco jīn ná, te máá de cúu tēe ñuu Tesalónica región Macedonia. <sup>3</sup> Te inga quivī ni jinūcoo ná ñuu Sidón nuū cájecuiñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo táca amigo de, te ni cachindéé ñáhán i de. <sup>4</sup> Te ñuu yūcuan ní quenda barco cuahān jīn ná. Te siquī jeē níhin yāhi tachī te tu ní cúu quihīn yohó barco, te ni tee xiin barco cuahān jīn ná xiin isla Chipre, ñuhun jeē íne sán nuū ndúte, te lado jecó barco ni quendōo Chipre. <sup>5</sup> Te ni cayāha ná yumar Cilicia jīn Panfilia cuahān ná, te ni jinūcoo ná ñuu Mira ndañú Licia.

<sup>6</sup> Te ñuu yūcuan ní nihīn capitán ñin barco jeē véji ñuu Alejandría te quihīn ichi Italia, te ni cahān de jīn ná ni quivīcoo ná barco un. <sup>7</sup> Te cuehē quivī ni cahīn na nuū ndúte jīn barco, chi cuéé ní jica, te fuerza-ni ni jinūcoo ná yuñú Gnido. Te tuá ni jēhe tachī un jnūhun quihīn yohó barco, te ni cayāha ná nuū jnūhma tachī xiin ñū Salmón jeē íne nuū isla Creta. <sup>8</sup> Te yōhyo ni canducú ndéyí tēe cáscaca barco un, ní yāha jīn ná ní yumar xiin Creta. Te ni jinūcoo ná ñin lugar naní Buenos Puertos nuū cájecuiñī barco, te yajni un íne ñuu Lasea.

<sup>9</sup> Te je ni cuu cuehē quivī ni cajica ná jīn barco. Te je yajni quejéé vico míjin, te yūcuan cúu tiempo jeē yí jica barco te sanaa te coo jnūndóho nuū mar. Te ni cahān nihīn Pablo jīn de:

<sup>10</sup> Tātā jijnáhan ní, jíní na jéé yōhyo yí coo viaje yāha, te quiji jnūndóho siquī barco, te naa barco jīn ndajniñu, te nde maá yó sanaa te cuu yō, achí de.

<sup>11</sup> Te tu ní chúsóhó capitán jeē cahān Pablo, chi sa suhva jeē cahān tēe scáca barco un jīn tēe chíi

barco. <sup>12</sup> Te siquī jeē tu íyó váha lugar nuū ni jécuiñī barco un jéé cóyucú de ní vico míjin, te ni cajeni ni cuehē gā de jeē váha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyucú de vico míjin. Chi Fenice suni íne yundúte isla Creta nuū cájecuiñī barco, te ndijin ichi noroeste jīn suroeste.

*Jeē ni jéquihi ñin tachī nihīn jeē stóna ndute mar*

<sup>13</sup> Te ni jequīhi vīta táchī ichi sur, te ni cajeni ni de jeē jinú de Fenice nuū, te ni cáscaca ga de barco jica jīn de xiin Creta. <sup>14</sup> Te ni cunúu jecu gā, te ni quejéé-ni ñin tachī nihīn ndasí jeē naní táchī nordeste. <sup>15</sup> Te tuá ni cúu ga quihīn yohó barco, chi ni chundahá-ni tachī cuahān jīn, te ni casiáá-ni de jeē cáscaca de, te cháha chūcuan cuahān barco jīn ndihi ná sáha tachī. <sup>16</sup> Te ni yāha jīn ná xiin isla lulí jéé naní Clauda, nuū jnūhma tachī. Te vésú sūcuan te yōhyo uhū ni cáscaca ná barco lulí jeē ndiquín yatā barco cáhnu. <sup>17</sup> Te ni casquíví ná ñin barco cáhnu. Te ni casacun núu de barco cáhnu jīn yoho. Te cáyuhú de jeē quihín barco nuū yaxín ndute nuū naní Sirte te jnī nuū ñiti, te jeē yūcuan ní casnúu de sahna cóquin jeē stechí te jica barco. Te ni casiáá de jeē na quihín ndé chi chundahá táchī. <sup>18</sup> Te tu jécuiñī cuiti jeē yāhi tachī nihīn. Te inga quivī un ní caquejéé de cájete de ndajniñu ndíso barco, návāha nduñama gā barco te ma queé chīji ndute. <sup>19</sup> Te quivī uní ni cajēhe núu ná ndaha ni cajete ná máá ndajniñu jéjníñu barco. <sup>20</sup> Te cuehē quivī tu ní cájito ná níandii ni quāmi siquī jeē ín vicō, ni tu jécuiñī cuiti tachī nihīn ún, te tuá cáñuhun ni na cácu ná.

<sup>21</sup> Te ni cuu quivī jeē tuá cáyeji cuiti na stáa. Te ni jecondichi Pablo sava mēhñu tēe ún, te ni cahān de:

Tátā jijnáhan ní, núu ní cájetáhú ní jnūhun jeē ni cáhān ná te ma quéndaco yó Creta nuū, te ni ma cóto yó jnúndóho yáha ni ma náa ndajniñu núú. <sup>22</sup> Te vijna cáhān nihin na jín ní jeē cuandeyí ni ni jijnáhan ní, chi ni ñn ní má cúu ní, vēsú naa barco. <sup>23</sup> Chi jeē cúni ni quiji ñn ndajéhé jeē ní tají máá Yáa Dios nuū ná. Chi máá yá cúu Jitoho ná, te jéjniñu ná núu yā. <sup>24</sup> Te ndajéhé yā ún suhva ni cahān yā jín ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yáa Dios jeē cácu ndihi tēe cáhīn jín ró ini barco yāhá, áchí yá jín ná. <sup>25</sup> Tátā jijnáhan ní, ma yūhu ní núu súcuan, chi máá ná cúcáhu ni na Yáa Dios jeē coo nájnūhun ni cahān ndajéhé yā jín ná. <sup>26</sup> Te jinū nahín yó ñn isla, te ma jinú yachí yō nuū quíngoo yó, áchí de.

<sup>27</sup> Te ni cuu uxī cuñn jecuāā nde jeē ní quejéé táchī, te jica barco nuū mar Adria, te cháha chúcuan cuahān barco sáha tachī. Te máá jecuāā ún te jeē ní cuu sava ñuū te cájeni ni tēe cáscáca barco jeē jé cuacuyajni jinū barco ñuhun íchi. <sup>28</sup> Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. <sup>29</sup> Te cáyūhú de jeē jécujnáhan barco jín toto, te ni cajihni de cuñn cāa gancho náhnu yatā barco un, te ni cascāne de nde jehē ndúte návāha chituu te jecuiñi barco. Te yōhyo jināa de jeē na cúndijin yachī. <sup>30</sup> Te tēe cáscáca barco un ní canducú de cunu de quíngoo de jín barco lulí te cácu de nuū jnúndóho quiji siquí barco cáhnu núú. Jeē yúcuan ní casnúu de barco lulí un núu ndúte, te cásáha-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de. <sup>31</sup> Te ni cahān

Pablo jín capitán jín táca soldado:

Núu tú coyūcu tēe yáha ini barco cáhnu jín yó, te ma cácu cuiti maá ní jijnáhan ní, áchí de.

<sup>32</sup> Yūcuán na te soldado ni cajehnde de yoho núhni barco lulí, te ni jneni-ni cuahān.

<sup>33</sup> Te nuū cuácundijin te ni cahān Pablo jín táca tēe un jēe na cáji de staā. Te suhva ni cahān de:

Vijna iyó uxī cuñn quiñi jeē cándito ní te tu cáyeji cuiti ni stāā.

<sup>34</sup> Te cáhān ndahú ná jín ní jeē na cáji ni stāā, návāha nanihīn ni ní te cácu ní, chi ni ñn yó má cúu, ni ma tují cuiti yó, áchí de.

<sup>35</sup> Te ni ndihi ni cahān de jnūhun yáha, te ni quihin de ñn staā, te mēhñu táca ñáyuu un ní nacuatáhú de nuū Yáa Dios, te ni tahu sáva de staā ún, te ni quejéé de yéji de.

<sup>36</sup> Yūcuán na te ni candusiñi ni ndihi de, te suni ni cayejí de staā. <sup>37</sup> Te ndivii na jēe cáñūhun ná ini barco

cúu uū ciento uní xico xahūn ñn ná.

<sup>38</sup> Te ni cayejí vāha ndihi ná. Yūcuán na te ni cajete de trigo cuahān nuū ndúte un, návāha na ndúñama gā barco.

### *Jeē ni quēe barco chíji ndute*

<sup>39</sup> Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuñi ndute, te suni máá ñiti cúu,

te cájeni ni de jinū de yūcuan jín barco núu na cúu núú. <sup>40</sup> Te ni cajehnde de yoho núhni cāa gancho yúcuan, te ni caquendāo cāa un núu mar. Te ni candandají de yujnu jeē scotú chíí barco, te ni nacata caa de sahma cóquin ichi

núu návāha chundahá táchī barco, te ni quejéé caca quihin jín de ichi núu iyó ñiti. <sup>41</sup> Te ni jinū barco nuū

nihin náquijnáhan ndute. Te ni quēe barco nuū ñiti ñuhun chíji ndute, te ni jñi-ni ichi núú te tuá ni jica

cuiti, te yatā barco un ní cahya-ni jeē nihin ni cani suhmā ndute mar.

<sup>42</sup> Yūcuán na te ni candajñuhún soldado jeē cáhni de táca preso návāha

ma súde i te cunu i quingoo i. <sup>43</sup> Te cúní capitán un jéē cācu Pablo, te ni jesicoo de. Chi sa ni cahān de núu ndé ñáyuu jiní suté te xihna gā i na núngoo i suté i nuū ndúte, te na quénda-ni i quihīn i nuū ñuhun íchi. <sup>44</sup> Te suni súcuan na quécoo ndihí i quihīn i, sava i coso candá i jín yujnu cúnu te sava ga i jín pedazo yujnu barco. Te súcuan ni cacācu ndihí ná ní jinūcoo ná ñuhun íchi.

*Jeē ni ine Pablo isla Malta*

## 28

<sup>1</sup> Te nuū ní cacācu ná te ñayuu cáyūcu yúcuan ní cacachi i nuū na jéē isla un nání Malta. <sup>2</sup> Te ñayuu un ní cacundáhú ni i sāña jínáhan ná, te ni cascáyú i ñn ñuhūn cáhnu, te ni cacahān i jín ná jeē nasaā ná, chi mījin sáha jeē cúun saū. <sup>3</sup> Te ni stutú Pablo jecu tujnu íchi. Te jeē jnāā de tujnu un núū ñuhún te ñn coō xeén jínu ti ni quenda ti tujnu un jéē ní cujihní, te ni chiyuhú-ni ti ndaha de. <sup>4</sup> Te ñayuu cáyūcu yúcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyí núu súcuan, te vēsú je ni cācu de nuū mar, te máá yāā sándaā jniñu ñayuu tu jéhe ga yā jnūhun jeē cótecu de, áchí i.

<sup>5</sup> Te ni caja Pablo ndaha de, te ni nīnga coō un núū ñuhún, te tú na vé ni ndóho de. <sup>6</sup> Te cándētu tāca ñáyuu jeē chūhun i cuiñi de chí cotúú-ni de te cuu de. Te ni cunahan téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

<sup>7</sup> Te yajni yúcuan íyó ñuhun tēe cújéhnu ga Malta un, nání de Publio. Te ni cana tēe un sāña jínáhan ná, te ni jēhe núu de vehe de ni coyūcu ná jín de uní quivī, te ni jito yúcún de sāñā. <sup>8</sup> Te tátá Publio cáa de, chi ndóho de cuehyī quiji jín cuehyī niñi. Te ni jecondēhe

Pablo tēe ún, te ni jicān tahú de te ni soó de ndaha de siquī tēe ún, te ni nduvāha-ni de. <sup>9</sup> Yūcuán na te ni quijicoo ndihí ga ñayuu cácuñu yūcuán, te suni súcuan ni canduvāha-ni i. <sup>10</sup> Te ñayuu un ní cajēhe i cuehē ndajniñu ni cacutahū ná. Te nuū ní jín quivī jeē quingoo tucu ná jín barco, te ni cajēhe i tāca ndajniñu cuu ná ichi.

*Jeē ni jínū Pablo ñuu Roma*

<sup>11</sup> Te uní yoō ni coyūcu ná Malta. Te ñn barco jeē véji ñuu Alejandría ni ine Malta ní vico mījin, te ichi núu barco un ndéē uū figura ídolo ñuu de nání Cástor jín Pólux. Te ni quivīcoo ná barco un cuángoo ná. <sup>12</sup> Te ni jinūcoo ná ñuu Siracusa, te yúcuan ní coyūcu ná uní quivī. <sup>13</sup> Te ni quenda barco cuahān jín ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachí ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. <sup>14</sup> Te yúcuan ní caquijnáhan ná jín jecu hermano cácanđje, te ni cacana de sāña ní coyūcu ná jín de ñn semana. Yūcuán na te ni quendacoo ná jéē quihīn ná ñuu Roma. <sup>15</sup> Te hermano cáyūcú ini ñuu Roma, je ni canihīn de jnūhun jeē jinúcoo ná, te ni quendacoo de, te sava de ni caquijnahan de sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jínáhan de, te ni nacuatáhú de nuū Yaā Dios, te ni ndundeyí ni de. <sup>16</sup> Te sáa te ni jinūcoo ná ini ñuu Roma, te capitán ni squivī de tāca preso ndaha tēe cújéhnu nuū tāca soldado ñuu Roma. Te ni cajēhe de jnūhun jeē cone sán Pablo te condito ñn soldado de.

*Jeē ní nacani Pablo jnūhun ya ini ñuu Roma*

<sup>17</sup> Te nuū uní quivī te ni cana Pablo tāca tēe cújéhnu nuū jnāhan ñuu de hebreo cáyūcú ini ñuu

Roma. Te ni cacutútú de, te ni cahān Pablo jíin de:

Tátā jijnáhan ní, tú cuítí na vé ni sáha ná síquī jnáhan yó hebreo ni síquī táca jniñu ní catajnúmí jíi yō. Te vēsú súcuan te ni cajnií i sãña ndé ñuu Jerusalén ni casquíví i sãña ndaha tēe ñuu Roma jijnáhan de. <sup>18</sup> Te tēe ñuu Roma jeē cácujuhnu cáyūcú Cesarea ni castíchí de sãña, te cácuñi de siáá de sãña núú, chí ni cajini de jeē tú na cuēchi ná jéē cúū ná. <sup>19</sup> Te jnáhan ñuu yō hebreo tu ní cájēhe de jñūhun. Jeē yúcuan ní cahān na jéē quiji ná núū maá rey cujuhnu ga nde ñuu Roma yáhá te sãndaá maá de síquī ná. Te tú vēji ná jéē cácuñi na cuēchi síquī ñayuu nación yō. <sup>20</sup> Jeē yúcuan ní cana ná níhín jijnáhan ní, návaha cuni na táca ní te ndajñūhun yó. Chí yóhó ñayuu Israel cáñūhun ni yō jeē nátecu ndīyí, te suu jñūhun un nácani ná, te jeē yúcuan cúu jeē nuhní na jíin cadena yáha, áchí de.

<sup>21</sup> Te ni cacahān tēe un jíin Pablo:

Tú ni ñn carta ni cátají ñayuu cáyūcú Judea nuū na jéē cástūhún de jñūhun ní, te táca jnáhan yó Judea jeē ní quiijicoo yáhá, tú ni ñn jñūhun néé ní cacahān de síquī ní. <sup>22</sup> Te cánujnahān ni ná cuni sōho ná ndese cúu jñūhun jeē cahán ni, chí je cájini na jéē táca-ni lado cacahān ñayuu contra síquī jñūhun jeē jéē steén ni, áchí de.

<sup>23</sup> Te ni cajeni de ñn quiíví, te ni quiijicoo cuehē de vehe nuū néne Pablo. Te ni nacani de jñūhun ndese ndácu Yaā Dios jniñu, te ni steén cají de jñūhun nde jenéhen te nde ni ini. Te súcuan ní nducú ndéyí de scándíje de táca tēe un jñūhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jñūhun jeē ní catee tēe ni canacani jñūhun Yaā Dios nde jenahán. <sup>24</sup> Te ni cacandíje sava de jñūhun ni cahān Pablo, te sava ga de tu ní cájetáhú de. <sup>25</sup> Chí tú

inuú cáhīyo ni de. Te sáá cánducú de quingoo de te ni cahān Pablo:

Ndaā cahán jñūhun jeē ni cahān Isaías, tēe ni nacani jñūhun Yaā Dios nde jenahán, chí suhva ni cahān de jíin táca jíi yō ni sáha Espíritu Santo:

<sup>26</sup> Ni cahān Yaā Dios:

Cuáhán nuū jnáhan ñuu rō yáhá te cahān rō jíin i:

Vēsú cuni nahín váha ró te ma jécūhun ni rō,

te vēsú coto váha ró te ma cúni rō.

<sup>27</sup> Chí yōhyo níhni ni rō,

chí tu cácuñi rō cuatáhú ró.

Te yōhyo uhū cájini sōho ró,

chí tu cánujnahān ni rō cuni sōho ró jñūhun ri.

Te nájnūhun cájesi rō tinūu ró

cúu jeē tu cácuñi rō nanducú ró ndese cúu,

te tu cácuñi rō jeē násāma ini rō

návaha nasávaha ri anuá rō nuū cuēchi ró, ní achí Yaā Dios.

Achí tutu. <sup>28</sup> Núu súcuan te na cástūhun ná nuū ni jéē jñūhun ni tají Yāā Dios jeē jnáma ya yohó, nde vijna te tájí yá jñūhun yáha quihñ nuū ñayuu táca nación jeē tu cájini i jñūhun ya, te máá i chí cuni sōho i, áchí de.

<sup>29</sup> Te ni jíinu ni cahān de jñūhun yáha, te cuangoo jnáhan de hebreo, te yōhyo ni cacahān de síquī jñūhun yáha jíijnáhan de.

<sup>30</sup> Te ni condee Pablo uū cuiyā vehe jeē ní quihñ núu de ún. Te ni cusñí ni de cahān de jíin táca ñayuu ní quiijicoo nuū de. <sup>31</sup> Te jéhnū-ni ni nacani de jñūhun ndese ndácu Yaā Dios jniñu, te ni steén de jñūhun máá Jítoho yō Jesucristo, te tú ni ñn ní jési jeē nácani de jñūhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chi ni cana Yaā Dios ruhū cúu rí apóstol yā, ni jeni ya ruhū te ni tají yā ruhū jeē nácani ri jnūhun jeē jnáma ya ñayuu.

<sup>2</sup> Te jnūhun un ní jejnūhun ya nde jenahán ndasí, te yósó núu tútu ñi jeē ní catee tēe ni canacani jnūhun ya. <sup>3</sup> Te jnūhun un cáhán siquī Jítoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucún rey David. <sup>4</sup> Te ni natecu yā mēhñu ndíyí ni sáha Espíritu ñi, te súcuan ni steén Yaā Dios jeē cúu ya Sēhe ya jeē ndíso poder. <sup>5</sup> Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu táca nación jeē candíje i jeē sáha ya jehē i, te cutatáhú i nuū yā. <sup>6</sup> Te suni máá ró jijnáhan ró, suni ni cana ya rohó ní quívicoo ró ndaha Jesucristo.

<sup>7</sup> Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéé coo ndoo coo ñi ró nuū yā. Te ñúhun ni rí jeē maá Tátá yō Yaā Dios jíin Jítoho yō Jesucristo sáha ga yā jeē váha rōhó, te sáha ya jeē coo ndeyí coo sñi ni rō.

*Jeē cuní Pablo quihñ de ñuu Roma*

<sup>8</sup> Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyívi jíté núu jnūhun cuahān ndese váha cácuandíje ró yā. <sup>9</sup> Te máá Yaā Dios jiní yā jeē niní jícán tahú rí jehē rō jijnáhan ró nuū jícán tahú rí. Chi yōhyo ndíhví ni rí jejniñu ri nuū yā jeē nácani ri jnūhun Sēhe ya.

<sup>10</sup> Te niní jícán tahú rí nuū yā jeē núu cuní yā te nde vijna te cuu jecundēhe rí rohó. <sup>11</sup> Chi cúu ñi rí coto rí nuū rō jijnáhan ró, te steén gā rí jnūhun ya nuū rō, návāha quendōo váha ga anuá rō te cuiñi ñihin ga rō jíin. <sup>12</sup> Súcuan cuní rí návāha sáha yó jéé inuú coo ndeyí ni yō jijnáhan yó siquí jeē inuú cácuandíje yó yā.

<sup>13</sup> Hermano jijnáhan ró, cuní rí jeē na jécūhun ni rō jeē tíjni jínu ni cuu ni rí jecundēhe rí rohó, te nde vijna ná tu cuu. Chi cuní rí scuité núu ga rí jnūhun ya mēhñu ró, nájñūhun ni sáha ri mēhñu ñayuu táca gā nación. <sup>14</sup> Chi cúu rí tēe táu siquí jnūhun ya, chi táu rí nacuáha ri jnūhun ya nuū ndíhi ñayuu, cúu ñayuu jiní gā siquí ndíhi jeē iyó ñáyívi jíin jéé tu jíni cuiñi, cúu ñayuu túhva jíin jéé tú túhva. <sup>15</sup> Jeē yúcuan cúu jeē ndíhví ni rí jeē suni nuū rohó ñayuu ñuu Roma nacani ri jnūhun jnáma ya yohó.

*Jeē ndíso jnūhun váha ya poder*

<sup>16</sup> Chi tu cúcanu rí siquí jnúhun váha ya, chi yúcuan cúu poder Yaā Dios jeē jnáma ya táca ñayuu cácuandíje, xihna gā ñayuu hebreo te suni táca gā ñayuu. <sup>17</sup> Chi jnūhun váha ya un steén nuū yō jeē ndáhva Yaā Dios cuéchi yó siquí jeē candíje yó jéé sáha ya jehē yō, te máá jéé candíje yó ní cuáhān yō. Chi súcuan cáhán nuū tútu ñi: Ñayuu jeē ní ndahva yā cuéchi i, técu i jeē candíje i jeē sáha ya jehē i, áchí.

*Siquí jeé iyó ndasí cuéchi ñayuu*

<sup>18</sup> Chi jiní váha yó jéé Yaā Dios andívi, cuáha ya castigo xeén nuū táca ñayuu tu cácuandíje te máni cuéchi cásáha. Chi jíin jniñu néé cásáha i te cájesi i nuū jnúhun ndaā. <sup>19</sup> Te ma cúu cahān i jeē tu jécūhun ni i siquí ndese Yaā cúu Yaā Dios, chi máá yā ni steén nuū i. <sup>20</sup> Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñáyívi

jíin ndé vijna te cúu jécūhun vāha ni i jeē maá yá cúu Yaā Dios te íyó poder yā ní cáni. Te jeē yúcuán má cúu cuiti cahān i jeē tu jíni i jeē iyó yá. <sup>21</sup> Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhá ni, chi ni candunéé íi i, te ni quendōo nee ini anuá i. <sup>22</sup> Cácahān i jeē ndichí i, te sa suhva cáacunéé i. <sup>23</sup> Chi ni castóo i Yaā Dios jeē yóhyo luu cújéhu, jeē ma cúu cuiti. Te ni cajetáhú i tǎcá imagen jeē casáha i, jeē cáa nájnūhun tēe cájihī, te suni nde imagen saa jíin cóo jíin quiti cájica ndicúún ndaha.

<sup>24</sup> Te jeē yúcuán ní siaá Yaā Dios i jeē na sáha i tǎcá jniñu jnéhén jniñu néé jéē cuní i. Te casáha i jniñu néé jíin jnáhan i jeē cúu máá jnúhun canu. <sup>25</sup> Chi tu ní cácandíje i jnūhun ndaā Yaā Dios, chi sa ni cacandíje i jnūhun stáhú. Te cáhīyo yíñúhún i te cáchiñúhún i nuū tǎca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cújéhu ya ní cáni. Amén.

<sup>26</sup> Jeē yúcuán ní siaá Yaā Dios i jeē na sáha i tǎcá jniñu néé jéē cándiyo ni i jeē cúu máá jnúhun canu. Chi nde ñahan ni caşama ña modo síhí, te ni quiví ña jíin modo neé. <sup>27</sup> Te suni súcuan tēe ni casiáá de modo chíjniñu jíin ñahan. Te nde ni nduqujíi de ni casáha ndiyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo siquī jniñu néé ní casáha de.

<sup>28</sup> Te jeē tu ní cácuni i cuajnúhún i Yaā Dios, jeē yúcuán ní siaá yā i jeē na cáni néé ni i, te sáha i tǎcá jniñu jeē tu íyó váha. <sup>29</sup> Te máni máá na jniñu jeē tu íyó ndáa cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cácuésún ni, cájehni ndīyi, cájejnáhan, cástáhú, cáśáhuhū jnáhan, cáśájnúhún siquī

jnáhan. <sup>30</sup> Cácahān jnūhun néé siquī jnáhan, cájito uhū Yaā Dios, cácujeē ni, cáśándúxí máá, cáśátéyí máá, cájequin costumbre neé, tu cájendetū nuū tatá nuū naná. <sup>31</sup> Te tu cájecūhun cuiti ni, tu squícu jnūhun jéjnūhun, tu íyó máni jíin jnáhan, tu íne cáhnu ni nuū jnáhan, tu cúndáhú ni jnáhan. <sup>32</sup> Te je cajini vāha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vēsú súcuan cajini i, te níni casáha i jniñu néé un, te suni cánujnahan ni i jeē casáha jnáhan i súcuan.

*Ndaā sándaā Yaā Dios siquī cuéchi*

## 2

<sup>1</sup> Núu súcuan te róhó jéē cahán cuéchi siquī jnáhan, núu na-ni ñayuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi siquī jnáhan ró cúu jeē ndénehen ró cuéchi siquī maá ró. Chi róhó jéē cahán cuéchi, suni súcuan sáha máá ró cuéchi. <sup>2</sup> Chi jíni yō jeē Yaā Dios, ndaā sáha ya jeē ndóna ya siquī cuéchi ñayuu casáha súcuan. <sup>3</sup> Te róhó jéē cahán cuéchi siquī ñayuu casáha cuéchi, te suni súcuan sáha máá ró, ¿te á jéni ni rō jeē cácu máá ró quiví ndóna Yaā Dios siquī cuéchi, chí naún? <sup>4</sup> ¿A cújéē ni rō nuū jnúhun jeē yóhyo vāha ni Yaā Dios jíin ró, jíin jéē iyó paciencia ya jeē tu yachí cuāha ya castigo nuū rō? ¿Te á tu jécūhun ni rō jeē jnúhun jeē yóhyo vāha ni yā sáha jeē nácani ni rō siquī cuéchi ró? <sup>5</sup> Chi níñni ni rō te tu nácani ni rō siquī cuéchi ró. Te jeē yúcuán cáyā gā rō castigo siquī rō quiví sáha Yaā Dios juicio, máá quiví jeē cóo ndi-jin jeē ndaā sándaā yā siquī cuéchi. <sup>6</sup> Chi chunaa yā nuū ná ñn ná ñn ñayuu núu ndese jniñu ni casáha i. <sup>7</sup> Te ñayuu jeē tu jécuiñī i jeē sáha i jniñu váha, cuāha ya jnūhun jeē cótecu i ní cáni. Chi ndúcú i quiví

i nuū ndujéhnū yíñúhún i, nuū níf cáni cotecu i. <sup>8</sup> Te quití ni yā te cuāha ya castigo nuū ñayuu kujéē ni nuū yā, te cúnihni ni nuū jnúhun ndaā, chí sa nuū jnúhun yacuá yóho jetáhú i. <sup>9</sup> Te tāca ñayuu casáha jniñu néé, chí nihín i jnūndóho xeēn te cucuíhyá ndasí ni i, xíhna gā ñayuu hebreo te suni súcuan ñayuu tāca gá nación. <sup>10</sup> Te sa suhva tāca ñayuu casáha jniñu váha, chí quívi i nuū ndujéhnū yíñúhún i, te coo ndeyí coo sí ni i, xíhna gā ñayuu hebreo te suni súcuan ñayuu tāca gá nación.

<sup>11</sup> Chi Yaā Dios tu sáha ya cuenta ndese cúu ñin ñin ñayuu, chí inuú sáha ya jíin i. <sup>12</sup> Chi tāca ñayuu jeē casáha cuēchi, vēsú tu cáyihí i chíji ley jeē ni jéhe ya nuū Moisés, te tu níni ley un te jnahnū ndetú i. Te tāca ñayuu cáyihí chíji ley Moisés te casáha cuēchi, jíin ley un sándaā yā cuēchi i. <sup>13</sup> Chi tu ndáhva Yaā Dios cuēchi ñayuu jeē máá jéē cúni nahín-ni i jnúhun cáhán ley yā. Chí sa suhva ñayuu squícu jeē cahán ley yā cúu jeē ndáhva yā cuēchi i. <sup>14</sup> Chi ñayuu tācá nación jeē tu cánevāha tutu ley jeē ni jéhe ya nuū ñayuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. <sup>15</sup> Te súcuan cástéén i jeē jnúhun ndácu ley un chí ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i síquí núu ni sáha i cuēchi chí váha ni sáha i. <sup>16</sup> Te súcuan coo máá quívi jeē jíin Jesucristo sándaā Yaā Dios síquí tāca jéē tu íyó váha jeē ní cajeni sáhi ní tāca ñayuu. Súcuan cáhán jnúhun váha ya jeē nácani ri.

*Siquí jeē tu cásquícu ñayuu hebreo ley Moisés*

<sup>17</sup> Te róhó cácahān rō jeē tēe hebreo cácuu ró, te cátenuū rō máá ley Moisés, te cácutéyí ró jeē síquí Yaā Dios. <sup>18</sup> Te cájeni ni rō jeē jíin rō ndese nújnahan ní yā, jíin jéē cúu nácāji váha ró ndé-ni cúu

jniñu váha, chí ni cacutúhva ró ley un. <sup>19</sup> Te cájeni ni rō jeē máá ró cácuu tēe steén ichi Yaā Dios nuū ñayuu tu cájini cuíti, jíin jéē cúu sáha ró jéē cúndijin ini anuá ñayuu cájica nájñuhun nuū néé. <sup>20</sup> Te cájeni ni rō jeē cúu steén rō nuū ñayuu tú tühva jnúhun ya, jíin jéē máá ró cácuu maestro nuū ñayuu tu jécúhun ni. Chí jíin tutu ley yā te cájini rō ndese cúu jnúhun ndíchí jnúhun ndaā, cájeni ni rō. <sup>21</sup> Núu súcuan te máá ró jeē cástéén nuū ñayuu, ¿te naun tu cástéén rō nuū máá ró? Te máá ró jeē cácahān jeē ma sácúíhná i, ¿te naun cásácúíhná máá ró? <sup>22</sup> Te máá ró jeē cácahān jeē ma cósíquí ndéē i, ¿te naun cásíquí ndéē máá ró? Te máá ró jeē cácahān jeē cácuquini ni rō ídolo, ¿te naun cásácúíhná ró ndajniñu jeē yúcu ini vehe ídolo? <sup>23</sup> Te cácutéyí ró jíin ley Yaā Dios, te vēsú súcuan te casáha ró jéē cácahān ñayuu síquí yā, chí tu cásquícu máá ró jnúhun ndácu ley yā ún. <sup>24</sup> Chí súcuan yósó núu tútu i: Ñayuu tāca gá nación, máni cácahān ndevāha i síquí Yaā Dios, jeē síquí cuéchi róhó ñayuu hebreo.

<sup>25</sup> Te núu cásquícu ró ley Moisés, yūcuán na te níhín jniñu ndije jeē ní canihín rō jnuní circuncidar. Te núu tu cásquícu ró ley un, te vēsú ni cuu ró circuncidar, te nájñuhun jeē tu ní cúu ró. <sup>26</sup> Te tēe tācá nación, núu cásquícu de jniñu ndácu ley un, vēsú tu ní canihín de jnuní circuncidar, núu súcuan te nájñuhun ní canihín de jnuní circuncidar. <sup>27</sup> Te tēe jeē tu ní cúu circuncidar yiquí cúñu de, te cásquícu de ley yā, máá de cahān cuēchi síquí rō. Chí tu cásquícu ró, vēsú cánevāha ró tutu ley un, te ní cuu ró circuncidar. <sup>28</sup> Chí nasūu jéē cáa ichi síquí ñin tēe sáha jeē cúu ndije de tēe hebreo. Te ní nasūu jéē cúu circuncidar yiquí cúñu ñin tēe sáha jeē cúu de tēe ndaā. <sup>29</sup> Chí sa suhva tēe cúu hebreo ndije, cúu jeē ini



anuá de ñúhun jnúhun ndaā. Te tēe cú circuncidar ndije, chi nde jín ini jín anuá de sáha de jniñu ndaā te nasūu jēē ndiso de jnuni circuncidar jeē cahán ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

### 3

<sup>1</sup> ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé nihín jniñu jeē casáha i circuncidar? <sup>2</sup> Vāha ndasí nihín jniñu. Xihna gā nihín jniñu jeē ni jéhe Yaā Dios jnúhun ya nuū máá i. <sup>3</sup> Te vēsú sava i tu ní cá candíje, ¿te á suu sáha jeē ma squícu ga Yaā Dios jnúhun ni jejnúhun ya, chí naún? <sup>4</sup> Tú cuiti jeē súcuan, chi vēsú núu ndihí ñáyuu castáhú i, te Yaā Dios chí iyó ndáa yā. Chi suhva yósó nuū tútu i jeē ni cáhán in tēe jín yá: Cahán ñáyuu jeē iyó ndáa ni jín táca jnúhun cáhán ni, te cuni i jeē iyó ndáa ní vēsú núu cáhán i siquí ní.

Achí tutu.

<sup>5</sup> Te cáhán sava ñáyuu jeē iyó vāha jeē sáha yó cuéchi, chí cuéchi yó jéjniñu stéen jeē iyó ndáa Yaā Dios. Núu súcuan ¿te á cuu cahán yō jeē tú vāha sáha Yaā Dios jeē jéhe ya castigo núu jéjniñu cuéchi yó súcuan? (Va cáhán-ni nde ri nájnúhun cáhán ñáyuu ñayiví.) <sup>6</sup> Tú cuiti jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuéchi ñáyuu ñayiví?

<sup>7</sup> Te núu jnúhun stáhú cáhán ñáyuu jéjniñu stéen jeē yóhio cújéhu Yaā Dios siquí jeē máni cáhán ndaā yā, ¿te á cuu cahán yō jeē tú vāha jeē cahán yā jeē cuéchi cúu jeē castáhú i? <sup>8</sup> Tuú, chí núu jeē súcuan cúu, te cuu cahán yō jeē vetū-ni sáha yó jéē neé návāha quee jeē vāha núu. Te sava ñáyuu cáhán ndevāha i siquí rí jeē súcuan cástéén rí, te tú ndaā. Ñáyuu ún chí iyó vāha jeē ndénehen ya cuéchi siquí i.

### *Ndivii yō iyó cuéchi*

<sup>9</sup> Núu súcuan ¿te á vāha ga ñáyuu cácuu yóhio ñáyuu hebreo vēsú inga ñáyuu naún? Tú cuiti jeē súcuan. Chí je ni cacahán yō jeē vēsú ñáyuu hebreo chí ñáyuu táca gá nación, ndivii yō yhi chíji cuéchi. <sup>10</sup> Chí suhva cáhán tutu i:

Tú cuiti na ñáyuu ndaā iyó, ni in i.

<sup>11</sup> Te tú cuiti ñáyuu jécúhun ni iyó, te tú ni in i nánducú i Yaā Dios.

<sup>12</sup> Ndihi i ni cascuíta i jnúhun ya, te inuú-ni ni castiví ndihí i máá i. Te tú cuiti ñáyuu sáha jniñu vāha iyó, ni in i.

<sup>13</sup> Yaū sucūn i cúu nájnúhun yaū ndiyi jeē núne,

chí máni jnúhun stáhú cáhán i.

Te nájnúhun veneno coō yhi yuhu i,

<sup>14</sup> chí máni máá jnúhun ndevāha jnúhun uvuā cáhán i.

<sup>15</sup> Te yóhio ñama jehē i jeē cáhni i ndiyi.

<sup>16</sup> Te ndé-ni cúu-ni nuū cájica i te squívi i jnúndóho jeē jnahnú ndetū ñáyuu.

<sup>17</sup> Te tu cájica cuiti i jín jnúhun coyūcu máni i,

<sup>18</sup> te ni tu cánacani ni i jeē cónso iyo i nuū Yaā Dios.

Achí tutu.

<sup>19</sup> Te jini yō jeē táca jnúhun cáhán ley jenahán, chí cáhán nuū ñáyuu yhi chíji ley un, návāha ndihí i ma cúu cahán i jehē i. Chí ndenehen Yaā Dios cuéchi siquí i nde jín ñáyuu ní ñayiví. <sup>20</sup> Chí tú ni in ñáyuu quéndōo ndaā i nuū yā jeē nducú i squícu i jniñu ndácu ley un. Chí ley un jéjniñu máni návāha cuni yō jeē iyó cuéchi yó.

*Jeē jnáma ya yohó siquí jeē candíje yó jéē sáha ya jehē yó*

<sup>21</sup> Te vijna te je cájini vāha yó ndese ndáhva Yaā Dios cuéchi yó. Te nasūu ley un sáha jeē quéndōo ndaā yō, vēsú maá tutu ley jín tēe ni canacani jnúhun ya, ni cacahán ndese ndáhva yā cuéchi ñáyuu.

<sup>22</sup> Chí táca ñáyuu jeē cá candíje i jeē ni

jihī Jesucristo jeē chúnāa yā cuēchi i, chí ndahva Yaā Dios cuēchi i siquī jeē súcuan cáandije i. Chí inuú-ni cúu táca ndihī ñayuu. <sup>23</sup> Chí ndihī yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. <sup>24</sup> Te siquī jeē yóhoyo vāha ni Yaā Dios, jeē yúcuan ndáhva yā cuēchi yó súcuan-ni. Chí siquī jeē ni jíhī Cristo Jesús cúu jeē jnáma ya yohó. <sup>25</sup> Chí Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhī yā. Te jnáma ya yohó núu súcuan cáandije yó. Te súcuan ni sáha Yaā Dios návāha stéén yā jeē Yaā ndaā cúu ya. Chí ichi yátá ni Iyo paciencia yā, te tu ní chíhi ya cuenta cuēchi ñayuu. <sup>26</sup> Te tiempo yáha stéén yā jeē Yaā ndaā cúu ya, chí ndaā sáha ya jeē squéndōo ndaā yā ñayuu candije vésú iyó cuēchi i, chí cáandije i jeē ní chunaa Jesús cuēchi i ní ndahva yā.

<sup>27</sup> Núu súcuan ¿te á cuu cutéyí gá yō siquī maá yó? Ma cúu cuíti, chí ma cúu cutéyí yó cani ni yō jeē vāha squícu yó ley yā. Chí jnáma ya yohó maá siquī jeē candije yó jéē sáha ya jehē yō. <sup>28</sup> Núu súcuan te je jíni yō jeē ndáhva Yaā Dios cuēchi yó siquī jeē súcuan cáandije yó, te nasūu jéē nducú yó squícu yó jéē ndácu ley.

<sup>29</sup> ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñayuu táca gá nación. <sup>30</sup> Chí in-ni Yaā Dios iyó, te ndáhva yā cuēchi ñayuu cáandije jeē ni sáha ya jehē i, cúu ñayuu ndiso jnunī circuncidar, cúu ñayuu jeē tuú. <sup>31</sup> Te jeē candije yó jéē jnáma ya yohó, ¿á sáha jeē tuá jíni ñhún squícu yó ley yā, chí naún? Tú cuíti, chí sa suhva sáha jeē vāha ga cuu squícu yó ley yā.

*Abraham cúu in ejemplo nuū yō*

#### 4

<sup>1</sup> Núu súcuan ¿te ndese cahān yō siquī táca jéē ní cuu jíni jíni yō Abraham? ¿Ndesse ni ndahvá cuēchi de?

<sup>2</sup> Nasūu jéē ni sáha maá de cúu jeē ní ndahva Yaā Dios cuēchi de. Chí núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chí nasūu siquī jeē ni sáha maá de cúu jeē ní ndahva Yaā Dios cuēchi de. <sup>3</sup> ¿Chí ndese cáhān tutu i? Cáhān jeē ní candije Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de. <sup>4</sup> Te in ñayuu sájniñu, te yāhu i chí nasūu jéē cútahū i cúu, chí jeē chúnāa yō nuū i cúu. <sup>5</sup> Te jeē jnáma Yaā Dios ñayuu, chí jeē cútahū i cúu. Chí vésú tu cúu squícu i táca jniñu vāha, te núu candije i jeē jnáma ya i nuū cuēchi i, yūcuán na te ndahva yā cuēchi i. <sup>6</sup> Te David suni ni cahān de ndese yóhoyo ndetū ñayuu jeē ndáhva Yaā Dios cuēchi i, vésú tu cúu sáha i ni in jniñu jeē quéndōo ndaā i nuū yā. <sup>7</sup> Chí ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i.

<sup>8</sup> Te nacā ndetū tēe jeē tuá chíhi maá Jítoho yō cuenta cuēchi de. Achí tutu.

<sup>9</sup> ¿Te á máni maá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni maá i quéndōo ndetū i. Chí je ni cahān yō jeē ní candije Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. <sup>10</sup> Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē je ni cuu de circuncidar, chí nde ná tuú. <sup>11</sup> Te cuéé gá te ni nihín de jnunī circuncidar. Te suu ni cuu in seña, nájnūhun in sello jeē ní ndahva yā cuēchi de siquī jeē súcuan ni candije de. Te jeē yúcuan ní cahān yā jeē cuu de jíni nuū táca ñayuu jeē candije i jeē sáha ya jehē i, suni nuū ñayuu tu ní cúu circuncidar, chí suni ndahva yā cuēchi maá i. <sup>12</sup> Te suni cúu de jíni nuū ñayuu ní cuu circuncidar, te nasūu máni

jeē ní cuu i circuncidar, chi suni jeē ní jñi i ejemplo de. Chi cácanđije i jeē sáha ya jehē i, nájnūhun ni candije máa de nde ná tu cuu de circuncidar.

*Núu candije yó te sáha Yaā Dios jeē ni jéjnūhun ya*

<sup>13</sup> Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chi sa suhva síquī jeē ní candije de jeē ni jéjnūhun ya, te ni ndahva yā cuēchi de. <sup>14</sup> Chi núu jeē máni máa ñáyuu nducú squícu ley cúu jeē nihín jeē ni jéjnūhun ya, núu súcuan te cándije cāha yó nuú, te ma nihín jñiñu jeē ni jéjnūhun ya ún. <sup>15</sup> Te ley chi sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jñūhun stívi ñayuu síquī ley coo núu.

<sup>16</sup> Núu súcuan te ni jejnūhun ya jeē sáha ya jeē váha jíin ñáyuu síquī jeē candije i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, iyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñáyuu cácanđije nájnūhun ni candije Abraham. Te súcuan cúu de jíi nuū tāca yó jeē cácanđije yó. <sup>17</sup> Súcuan ni sáha Yaā Dios chi ni candije de jeē sáha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñáyuu. Súcuan ni cahán maá Yaā jeē nastécu ndíyī te cáhán yā ndese coo tāca jéé ná tu coo.

<sup>18</sup> Te ni candije de, te ni cocuhun teyí ni de jeē ni jéjnūhun ya jeē coo cuehē yucūn de, vésú tuá na modo coo sēhe de núu. Te jeē yúcuan ní nduu de jíi nuū cuehē ndasí ñáyuu, nájnūhun ni cahán Yaā Dios: Súcuan nducuehē yucūn rō, achí yá jíin de. <sup>19</sup> Te je yajni jinū de ciento cuiyā, te vésú súcuan te tu ní quéndā de nuū jñūhun cándije de, vésú jiní de jeē

maá de jíin ñasihí de Sara je jéhnū ndasí ndíndúu de jeē ma cúu ga coo sēhe de. <sup>20</sup> Te tu ní nácani síquí ni de jeē ma cándije ga de jñūhun ní jejnūhun Yaā Dios jeē coo sēhe de. Chi sa suhva ni candije níhin ga de, te ni nacuatáhú de nuū Yaā Dios. <sup>21</sup> Chi ni cucáhnu váha ni de jeē cúu squícu Yaā Dios ndihi jeē ni jéjnūhun ya. <sup>22</sup> Te jeē yúcuan ní ndahva yā cuēchi de síquī jeē súcuan ni candije de.

<sup>23</sup> Te nasūu máa-ni síquī Abraham cúu jeē yosó núu tútu jeē ní ndahva yā cuēchi de jeē ní candije de. <sup>24</sup> Chi suni yósó jéē síquí yohó jíjnáhan yó. Chi suni ndáhva yā cuēchi máa yó jéē candije yó jéé cúu ya Yaā ní nastécu Jitoho yó Jesús. <sup>25</sup> Chi ni jihí Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

*Ndese quéndōo ñayuu jeē ndáhva yā cuēchi*

## 5

<sup>1</sup> Núu súcuan te je ni ndahva Yaā Dios cuēchi yó síquī jeē ní candije yó jéé sáha ya jehē yō. Te jeē yúcuan ní sáha ya jeē ní ndívi yó núu jñūhun maní yā jíin yó, síquī jeē ni jíhí Jitoho yó Jesucristo jehē yō. <sup>2</sup> Chi máa Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquī jeē súcuan cándije yó. Te cáhīn níhin yó jíin jñūhun jeē sáha ya jeē váha yóhó. Te cúsi ni yó chi ñūhun ni yó jeē jinú yó nuū lúu cujéhnū yó jíin Yaā Dios. <sup>3</sup> Te nasūu máa yáha-ni, chi suni cúsi ni yó jeē ndóho yó jñúndóho. Chi jíni yó jeē maá jñúndóho sáha jeē jéndeyí ni yó. <sup>4</sup> Te jeē jéndeyí ni yó sáha jeē íje váha yó cuu yó ñáyuu ndaā. Te jeē íje váha yó sáha jeē ñūhun ni yó tāca jéé váha jeē cóo. <sup>5</sup> Te tāca jéé ñūhun ni yó, chi nihīn nahín yó. Chi jñūhun cúndáhú ni Yaā Dios yohó, ni cunuñ iní anuá yó, sáha Yaā Dios jeē jíin Espiritu Santo jeē ni jéhe ya nuū yó.

6 Chi náa ndóho yó jéē ma cúu cuiti jnama yó máá yó, te ni jihí Cristo jehē yohó jéē cúu yó ñayuu iyó cuéchi. Te ni jihí yā maá quívi jeē jé ni jeni Yaā Dios. 7 Te yíi cúu jeē cúu ñn ñayuu jehē inga ñayuu, vésú jehē ñn ñayuu ndaā. Chí sanaa te iyó jínu jeē chúndeyí ni ñn tēe cuu de jehē ñn tēe ndaā vāha. 8 Te máá Cristo chi ni jihí yā jehē yó náa máni cuéchi sáha yó, te súcuan ni steén Yaā Dios jeē cundáhú ni yā yohó. 9 Te vijna je ni ndahva Yaā Dios cuéchi yó síquī jeē ni jihí Cristo jehē yó. Núu súcuan te suni jíní vāha yó jéē jéē jnama Cristo yohó núu castigo quiji quívi sáha Yaā Dios juicio. 10 Chi náa cúu ga yó enemigo Yaā Dios, te síquī jeē ni jihí Sēhe ya jehē yó, te ni sáha ya jeē ndívi yó núu jnúhun maní yā jíin yó. Te jeē súcuan ní ndívi yó núu jnúhun maní yā jíin yó, te suni jíní vāha yó jéē cácu yó síquī jeē técu Cristo, nduú yá jíin yó. 11 Te nasūu máá yáha-ni, chi suni cúsiñ ndasí ni yó jíin Yaā Dios síquī jeē ni sáha Jitoho yó Jesucristo jehē yó, chi máá yá ni sáha jeē ní ndívi yó núu jnúhun maní Yaā Dios jíin yó.

#### *Jnúhun Adán jíin jnúhun Cristo*

12 Núu súcuan te jíní yó jeē ni quívi cuéchi ini ñayívi ní sáha máá ñn-ni tēe Adán. Te jeē síquī cuéchi yúcuan te ni jecōo cuehyí jéñni ñayuu. Te jeē yúcuan cúu jeē jihí ndíhi ñayuu, chi ndíhi i yíhi cuéchi. 13 Te nde ná tu cuāha ya ley nuū Moisés, te je iyó cuéchi ini ñayívi. Te síquī jeē ná tu coo ley yā, te tu ní chíhi ya cuenta jeē castívi i. 14 Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéñni i síquī jeē iyó cuéchi i. Chi ni jihí i síquī cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cuníhni ni de nuū ñn jniñu ní ndacu ya. Te Adán ni cuu de ñn muestra maá Yaā ní quiji cuéé gá.

15 Te jnúhun jeē ni sáha Adán cuéchi, tu quíjnáhan cuiti jíin táhū jeē jnáma Yaā Dios yohó. Chi jeē ni stívi máá ñn-ni tēe ún, jeē yúcuan cúu jeē jihí ndíhi yó. Te jnúhun jeē jnáma Yaā Dios yohó cújéñnu ndasí gá, chi síquī jeē ni sáha máá ñn-ni tēe Jesucristo cúu jeē súcuan-ni jnáma ya ndíhi ñayuu candíje. 16 Te cuéchi jeē ni sáha máá ñn-ni Adán, tu quíjnáhan cuiti jíin jnúhun jeē jnáma Yaā Dios yohó. Chi síquī máá ñn-ni cuéchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vésú yóhyo cuehē cuéchi ni casáha i. 17 Chi síquī jeē ni sáha máá ñn-ni tēe Adán cuéchi, te ni nihín poder cuehyí jéñni ñayuu. Te sa suhva síquī jeē ni jihí máá ñn-ni tēe Jesucristo, te víhyá gā ni nihín ñayuu maá yá poder jeē cótecu i caca ndaā i jíin yá. Chi ni ndahva yā cuéchi i síquī jeē yóhyo vāha ni yā.

18 Núu súcuan te síquī jeē ni sáha máá ñn-ni tēe Adán cuéchi, te ni quívicoo ndíhi ñayuu chíhi jnúhun jnahnū ndetū i. Te sa suhva síquī jeē ni sáha máá ñn-ni tēe Jesucristo ñn jniñu vāha ndasí, te ndáhva Yaā Dios cuéchi ndíhi ñayuu te cotecu i ní cáni. 19 Chi síquī jeē tu ní jéndije máá ñn-ni tēe, te ni quívicoo cuehē ndasí ñayuu chíhi cuéchi. Te suni súcuan síquī jeē ní jéndije máá ñn-ni tēe Jesucristo, te ndáhva Yaā Dios cuéchi cuehē ndasí ñayuu.

20 Te ni jéhe ya ley yā návāha cuni yó jeē cuehē cuéchi casáha yó. Te jeē ní nducuehē cuéchi yó, te víhyá gā cuehē cúu jnúhun jeē vāha ni yā jeē íne cáhnu ni yā nuū yó. 21 Núu súcuan te nájnúhun ni nihín poder cuehyí jéñni ñayuu síquī jeē iyó cuéchi i, suni súcuan iyó poder jnúhun jeē vāha ni yā jíin yó. Chi ndáhva yā cuéchi yó te cotecu yó ní cáni síquī jeē ni jihí Jitoho yó

Jesucristo jehē yō.

*Jeē tuá yíhi yó chíji cuēchi chí yíhi yó ndaha Cristo*

## 6

<sup>1</sup> Núu súcuan ¿te ndese cahān yō? ¿A caca ga yō jíin cuēchi návāha víhyá gā sáha ya jeē váha yóhó jeē cóne cáhnu ni yā nuū yō? <sup>2</sup> Ma cúu cuiti. Chi nájnūhun je ni jihī yō jeē tuá yíhi yó chíji cuēchi, te ma cúu ga caca yó jíin cuēchi núu súcuan. <sup>3</sup> ¿A tu cájēcūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jíhi yō jíin yá? <sup>4</sup> Chi jeē ní jendute yó cúu nájnūhun ni quindūji yó jeē ni jíhi yō jíin yá. Te vijna te cuu caca yó jíin vida jeē jeē ni jéhe ya nuū yō, chí nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhnu ndasí yá.

<sup>5</sup> Chi núu ni cundúu yó jíin yá síquī jnūhun jeē ni jíhi yō jíin yá, te suni súcuan cundúu yó jíin yá síquī jnūhun jeē ní natecu yō jíin yá. <sup>6</sup> Chi jíni yō jeē ní naa modo maá yó jeē ni jíca yó jíin ichi yátá, chí ni quívi yó núu jnūhun jeē ni jíhi yō jíin Cristo jicā cruz. Te súcuan ni naa modo yō jeē cúu yó mozo nuū cuēchi, návāha tuá cuajníñu yó núu tācá jniñu jeē máni cuēchi cúu. <sup>7</sup> Chi ñayuu jeē jé ni cajihī, je ni quendacoo i chíji tāca cuēchi. <sup>8</sup> Te núu je ni jihī yō jíin Cristo, te cándíje yó jeē suni súcuan ni natecu yō jíin yá. <sup>9</sup> Chi jíni yō jeē ní natecu Cristo, te ma cúu cuiti ga yā, chí cuehyí jéhni yóhó, tuá na vé cúu sáha jíin yá. <sup>10</sup> Chi jeē ni jíhi yā, te ñin jínu-ni ni jihī yā jeē síquí cuēchi ñayuu. Te jeē técu yā vijna, chí sáha ya jeē cuní Yaā Dios. <sup>11</sup> Te suni súcuan róhó jíinánan ró, sáha ró cuenta jeē nájnūhun ni cajihī rō jeē ní quen-dacoo ró chíji cuēchi. Te cátecu rō

návāha sáha ró jeē cuní Yaā Dios, chí ndúu ró jíin Jítóho yō Cristo Jesús.

<sup>12</sup> Núu súcuan te ma cuáha ga rō jnūhun quíhi ró chíji cuēchi jíin yíqui cúñu rō jeē cúu. Chi cuēchi ún stíhví ni rohó jeē na sáha ró táca jeē ndíyo néé ni rō. <sup>13</sup> Te ma cuáha ró máá ró cuajníñu ró núu cuēchi jeē cócuu ró jíin jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuāha ndihí ró máá ró nuū yā jeē cuajníñu ró núu jniñu ndaā. <sup>14</sup> Chi tuá na poder cuēchi jeē cundeyí jíin ró, chí tuá cáyihí ró chíji ley jenahán, chí sa cáyihí ró chíji jnūhun jeē váha ni yā jíin ró.

*Jnūhun mozo jeē steén ndese quéndō ñayuu cácandíje*

<sup>15</sup> ¿Ndeese sáha yó núu súcuan? ¿A caca ga yō jíin cuēchi síquī jeē tuá yíhi yó chíji ley jenahán, chí sa yíhi yó chíji jnūhun jeē váha ni yā jíin yó? Ma cúu cuiti. <sup>16</sup> Chi cájini rō jeē núu cuāha ró máá ró jeē cuatáhú ró sájniñu ró núu ñin tēe, núu súcuan te cácuu ró mozo nuū tēe ún, te cánuu cuandíje ró núu de. Te suni súcuan núu cuāha ró máá ró jeē sáha ró cuēchi, te mozo cuēchi cácuu ró, te cuu rō. Te núu cuatáhú ró nuū maá yá, te mozo yā cácuu ró jeē cáca ndaā rō. <sup>17</sup> Te na cútahū yō nuū Yaā Dios, chí vésú ni cacuu ró mozo nuū cuēchi, te vijna chí nde jíin ini jíin ánuá rō ní cajetáhú ró nuū jnūhun ya jeē ni quívicoo ró núu. <sup>18</sup> Te vijna te je ni nduu libre rō jeē tuá cácuu ró mozo nuū cuēchi, te cájejniñu ró núu jniñu ndaā. <sup>19</sup> (Ni cahān rī ñin jnūhun ndese cúu síquī mozo ini ñayívi yáha, chí tu cájēcūhun yachī ni rō síquī jnūhun ya.) Núu súcuan te nájnūhun ni cajéhe ró máá ró nde saá jeē ní cajejníñu ró núu táca jniñu jnéhén jniñu néé, suni súcuan cuāha ró máá ró vijna jeē cuajníñu

ró núu jniñu ndaā, návāha coo ndoo coo ñi rô nuū Yaā Dios.

<sup>20</sup> Chi nde náa cácuu ró mozo nuū cuéchi, te tu ní cájejniñu ró núu jniñu ndaā. <sup>21</sup> ¿Te na vé ni canihñi rô siquī cuéchi ní casáha ró un jéé cáccuanu rô vijna sáha? Tú cuiti, chi máá jéé jnahnú ndetū rô ní cáni sáha. <sup>22</sup> Te vijna te je ni canduu libre rô jeé tuá cácuu ró mozo nuū cuéchi, te cájejniñu ró núu Yaā Dios. Te suu sáha jeé quéndō vāha ró, chi cáhiyo ndoo cáhiyo ñi rô nuū yā, te nde sandihí te cotecu rô ní cáni. <sup>23</sup> Chi yāhu jeé nihñi ñayuu siquī cuéchi cúu jeé jnahnú ndetū i. Te sa tahū jeé jéhe Yaā Dios cúu jeé cótecu yō ní cáni andiví, siquī jeé nduú yó jín Jítoho yō Cristo Jesús.

*Jñuhun ñasihí jín yñ jeé steén ndese quéndō ñayuu cáccandíje*

## 7

<sup>1</sup> Hermano, je cájini rô ndese cáhán ley yā, te cájini rô jeé yñi ñayuu chíji ley maá-ni núu técu i ñayiví yáha. <sup>2</sup> Te yāha cúu nájnñuhun ññ ñahan jeé ní quijnáhan, chi cáhán ley jeé yñi ña ndaha yñ ña maá-ni núu técu de. Te núu ní jihí yñ ña, te je ni quenda ña chíji ley jeé ní quijnáhan ña jín de. <sup>3</sup> Núu súcuan te núu quijnáhan ña jín inga tēe níni técu gā yñ ña, te casíquí ndéé ña de. Te núu je ni jihí yñ ña, te je ni quenda ña chíji ley un. Te cuu quijnáhan ña jín inga tēe, chi nasūu jéé casíquí ndéé ña núu súcuan.

<sup>4</sup> Te suni súcuan rōhó jíjnáhan ró, ñánñi mánñi, chi ndúú ró jín Cristo. Chi nájnñuhun ni cajihí rô jín Cristo, te ni quendacoo ró chíji ley jenahán. Te vijna chi nájnñuhun ni quijnáhan ró jín inga, cúu jeé ní quivicoo ró ndaha Cristo, Yaā ni natecu mēhñu ndíyí, návāha cuu sáha ró jniñu váha jeé cuní Yaā Dios. <sup>5</sup> Chi ná ni cajica yó jín modo maá yó nde saá, te ley un ní sáha jeé ní ndíyo néé ni yō tāca jéé cuní yiquí cúñu yō jeé sáha yó. Te yūcuan ní

sáha jeé jnahnú ndetū yō nuú. <sup>6</sup> Te vijna te je ni quenda yó chíji ley jenahán, chi nájnñuhun je ni jihí yō jeé ma nihñi gā poder siquī yō. Te súcuan te íyó libre yō jeé cuajniñu yó núu Yaā Dios. Te jíca yó jíjn modo jeé jéé cuní maá Espiritu, chi tuá yñi yó chíji ley jeé ní tee Moisés jenahán.

*Siquī cuéchi jeé ññuhun ini anuá yō*

<sup>7</sup> ¿Ndese cahán yō núu súcuan? ¿A ley ndíso cuéchi? Tú cuiti jeé súcuan. Te núu jeé tú ley yā, te ma cúni cuiti rí jeé íyó cuéchi rí. Chi ma cúni rí jeé cuéchi cúu jeé ndíyo ní rí ndajniñu jnahan rí núu tu ní cáhán ley jeé ma ndíyo ní yō. <sup>8</sup> Te súcuan ní nihñi cuéchi modo cocuu jíjn rí. Chi siquī jeé ndácu ley jniñu jeé ma sáha yó cuéchi, te ni quejéé ndíyo ní rí sáha rí tāca jéé neé. Te núu jeé tu ley, te suni tú na jñuhun stíví yó siquī ley nuú. <sup>9</sup> Chi ní íyo tiempo jeé técu rí jeé ná tu jecūhun ní rí jeé cahán ley. Te ná ni quejéé rí jécūhun ní rí jniñu jeé ndácu ley, te ni jecūhun ní rí jeé íyó cuéchi rí, te ni nduu rí nájnñuhun ndíyí. <sup>10</sup> Chi ní jini rí jeé ley jeé sáha jeé cótecu anuá rí nuú, te tuú chi sa ní sáha jeé jnahnú ndetū rí nuú. <sup>11</sup> Chi jíjn jéé ndácu ley un jniñu, te ni nihñi cuéchi modo cocuu jíjn rí, te ni stahú ruhū. Chi jíjn jéé ndácu ley jniñu, te cuéchi ní sáha jeé ní quenda jñuhun jeé jnahnú ndetū rí.

<sup>12</sup> Núu súcuan te íyó ndáā maá ley, te tācá jniñu ndácu chí íyó ndoo íyó ndáā vāha. <sup>13</sup> Núu súcuan te ley jeé íyó váha ún, ¿a suu sáha jeé jnahnú ndetū rí naún? Tú cuiti. Chi sa suhva máá cuéchi cúu jeé sáha jeé jnahnú ndetū rí, te súcuan stúu cuéchi ndese íyó máá. Chi jíjn jniñu váha jeé ndácu ley te ni natūu jniñu néé jéé cúu cuéchi.

<sup>14</sup> Chi jíni yō jeé nuū maá Espiritu vēji ley. Te ruhū chí sa névāha rí ññ modo neé máá rí jeé ní squíví ruhū jejniñu cáha rí nuū cuéchi. <sup>15</sup> Chi

tāca jēē sāha ri, tu jécūhun ni rī nahēhē cūu jēē sāha ri. Chi jniñu váha jeē cuní rī sāha ri, tu ndé níhín rī fuerza sāha ri, chi sa suhva sāha ri jniñu néé jēē tu cívāha ni rī sāha ri. <sup>16</sup> Te náa sāha ri jniñu néé jēē tu cuní rī sāha ri, núu súcuan te nácuni rī jēē iyó ndáa ley. <sup>17</sup> Núu súcuan te nasūu rúhū cūu jēē sāha jniñu néé un, chi modo neé jēē ñúhun iní anuá rī cūu jēē sāha cuēchi. <sup>18</sup> Chi jíni rī jēē modo maá rí jēē névāha ri iní anuá rī, tú cuítí na vé jēē váha iyó. Chi cuní rī sāha ri jniñu váha, te tu ndé níhín rī fuerza sāha ri. <sup>19</sup> Chi jniñu váha jeē cuní rī sāha ri, tu sāha ri. Te jniñu néé jēē tu cuní rī, sa yūcuan sāha ri. <sup>20</sup> Te náa sāha ri jniñu jēē tu cuní rī sāha ri, te nasūu rúhū cūu jēē sāha, chi modo neé jēē ñúhun iní anuá rī cūu jēē sāha.

<sup>21</sup> Núu súcuan te ni jini rī jēē súcuan cūu jíni rí: Vēsú cuní rī sāha ri jniñu váha, te sa máni modo neé cūu jēē ñúhun iní anuá rī. <sup>22</sup> Chi cúsí ni rī jíni ley Yaā Dios nde jíni iní anuá rī. <sup>23</sup> Te ni nacuni rī jēē iyó inga modo neé maá rí jēē jésí nuū jēē cuní rī sāha ri jēē váha. Te cūu ri nájnūhun preso nuū cuēchi jēē jícu jíni rí.

<sup>24</sup> Nacā jēē ndahú gá cūu ri núu súcuan. ¿Ndé ñn jnama ruhū nuū modo neé maá rí jēē jícu jíni rí jēē jnahnú ndetū rí? <sup>25</sup> Na cútahū ndasí rí nuū Yaā Dios, chi máa yá cūu jēē jnama ruhū nuū modo neé rí siquī jēē ni jíhí Jitoho rí Jesucristo jēhē rí. Núu súcuan te vēsú cuní yō squícu yó ley Yaā Dios, te jēē jíni fuerza maá yó ma cūu, chi modo neé maá yó sāha jēē jējniñu cāha yó nuū cuēchi.

*Siquī jēē jíca yó jíni modo cuní Espíritu Yaā Dios*

## 8

<sup>1</sup> Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chi tuá cájica i jíni

modo neé maá i, chi sa suhva cájica i nájnūhun cuní maá Espíritu yā. <sup>2</sup> Chi modo jēē sāha Espíritu cūu jēē técu yō siquī jēē yíhi yó ndaha Cristo Jesús. Te yūcuan ní sāha jēē ní nduu libre yō nuū jnúhun jēē ni yíhi yó chíji cuēchi jēē jnahnú ndetū yō nuú. <sup>3</sup> Chi ní sāha Yaā Dios jēē quéndōo váha ñayuu jēē tu ní cūu quendōo váha jíni ley Moisés, siquī jēē tú na fuerza i jíni modo maá i jēē squícu i ley un. Chi ní tají yá Sēhe ya ni quiji, te ni nduu ya nájnūhun ñayuu cáhíyo cuēchi, návāha socō yā maá yá siquī cuēchi, vēsú tú na cuēchi ya. Te súcuan ni ndonda Yaā Dios siquī cuēchi jēē ní casāha ñayuu jíni modo neé maá i. <sup>4</sup> Súcuan ni cuu návāha cuu squícu yó táca jniñu ndaā jēē ndácu ley, chi tuá jíca yó jíni modo neé maá yó, chi jíca yó nájnūhun cuní maá Espíritu.

<sup>5</sup> Chi ñayuu jēē cájica jíni modo neé maá, chi máni ndíhví ni i siquī jēē cuní maá i. Te ñayuu jēē cájica nájnūhun cuní Espíritu, chi máni ndíhví ni i siquī jniñu cuní maá Espíritu. <sup>6</sup> Te jēē ndíhví ni yō siquī modo cuní maá yó sāha jēē jnahnú ndetū yō. Te jēē ndíhví ni yō siquī jniñu cuní maá Espíritu, sa suhva sāha jēē cotecu yō ní cáni te coo ndeyí coo sí ni yō. <sup>7</sup> Chi ñayuu jēē ndíhví ni siquī modo neé cuní maá i, chi jíto uhū i Yaā Dios, chi tu cuní i cuatáhú i ley Yaā Dios, te ni ma cūu squícu i. <sup>8</sup> Jēē yūcuan, ñayuu jíca jíni modo cuní maá, tu cūu sāha i jēē cúsí ni Yaā Dios jíni i.

<sup>9</sup> Te maá ró jijnáhan ró, chi tuá cájica ró jíni modo cuní maá ró, chi cájica ró nájnūhun cuní Espíritu, chi ndéé Espíritu Yaā Dios iní anuá rō. Te ñayuu jēē tu ndéé Espíritu Cristo iní i, tu cáyihí i ndaha ya. <sup>10</sup> Te núu ndéé Cristo iní rō, te vēsú ñn quiví te cuu yíqui cūñu rō jēē siquí cuēchi, te cotecu anuá rō siquī jēē ní ndahva Yaā Dios cuēchi ró. <sup>11</sup> Te núu iní rō jijnáhan ró ndéé Espíritu

maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiqui cúñu rō jeē cū. Te sáha ya sūcuan jeē jíin máá Espíritu yā jeē ndeé ini rō.

<sup>12</sup> Núu sūcuan, hermano jijnáhan rō, ndeé jñíñu yó jēē caca ndaā yō, te nasūu jēē sáha yó modo neé cúní máá yó. <sup>13</sup> Chi núu caca rō jíin modo neé máá rō, te jnahnū ndetū rō. Te núu jíin fuerza máá Espíritu snāā rō tācá jñíñu cásáha rō jíin modo neé máá rō, te cotecu rō ní cání.

<sup>14</sup> Chi tāca ñáyuu jeē cándiquín modo jeē steén Espíritu Yaā Dios, máá i cácuu sēhe Yaā Dios. <sup>15</sup> Chi Espíritu jeē ní canihñin rō, tu ní sáha ya rohó jēē cuu rō nájñūhun mozo nuū yā jeē yūhú tucu rō núu yā, chí sa ní sáha ya jeē cúu yó sēhe ya. Te jeē yúcuán cúu jeē cahán jee yó: Tátá máá ná. <sup>16</sup> Te máá Espíritu steén yā ini anuá yō jeē cúu ndije yó sēhe Yaā Dios. <sup>17</sup> Te núu sēhe ya cácuu yó, te suni nihñin yō maá táhū jeē ní jéjnūhun ya, te iin cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

<sup>18</sup> Núu sūcuan te sáha rí cuenta jeē tāca jñúndóho jeē ndóho yó vijna, lúlí ndasí cúu nuū jñūhun jeē cujéhnu luu yó jíin yá cucuéé gá. <sup>19</sup> Chi ndihí jeē ní jécōo, yōhyo cándetu jeē na sáha Yaā Dios jeē nduvāha, quiví quénda ndijin jeē cujéhnu sēhe Yaā Dios jijnáhan i. <sup>20</sup> Chi tāca jēē ní jécōo, chí ní quívi chíji jñūhun jeē tu quéndōo vāha. Te nasūu jēē ní castívi máá, chí ñayuu ni casáha cuēchi, te jeē yúcuán ní squéndōo Yaā Dios sūcuan. Te máni cándetu jeē ndúvāha. <sup>21</sup> Chi iin quiví te tāca jēē ní jécōo, chí quenda chíji jñūhun jeē tívi jíin jēē tehyú. Te nduluu ndasí nájñūhun coo tāca sēhe Yaā Dios, chí cācu nuū jñūhun jeē tu quéndōo vāha. <sup>22</sup> Chi jíin yō jeē tāca jēē ní jécōo, chí nde vijna te nájñūhun inuú-ni cándoho

te cájitū ní jeē na ndúvāha ndihí. <sup>23</sup> Te nasūu máá-ni tāca jēē ní jécōo cúu jeē ndóho, chí suni nde máá yó ndóho yó, vesú je névāha yó Espíritu jeē cúu seña jeē iin quiví te nihñin yō ndihí tahū yō. Chi yōhyo ndóho yó jñúndóho, te ndétu yó jēē náquihin sēhe ya yohó te jnama ya yiqui cúñu yō jeē tuá ndoho yó jíin. <sup>24</sup> Chi ní jnama ya yohó síquí jeē ñūhun ní yō jeē sūcuan coo. Te núu je ní sáha ya nájñūhun ñūhun ní yō, yūcuán na te tuá ñūhun ní yō jeē sáha ya sūcuan jíin yó. Chi tuá ndétu yó te núu je ní cuu sūcuan. <sup>25</sup> Te núu ná tu coto yó jēē sáha ya jeē ñūhun ní yō, yūcuán na te jíin paciencia ndétu yó jēē sáha ya.

<sup>26</sup> Te suni sūcuan máá Espíritu chindéé ñáhan yá yohó jēē tú na fuerza ini yō. Chi tu jíin yō cacān tahú yō nájñūhun cánuú. Te máá Espíritu cahán ndahú yá jíin Yaā Dios jehē yō síquí tāca jēē jítu ndasí ní yō te tu níhín yō jñūhun ndese cacān tahú yō. <sup>27</sup> Te máá Yaā Dios jeē jító ndee anuá yō, chí jíin yā tāca jēē cúní máá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájñūhun cúní Yaā Dios.

*Vāha-ni cūndeyí yó síquí ndihí jeneé*

<sup>28</sup> Te jíin yō jeē tācá-ni jeē quíji nuū ñáyuu maní jíin Yaā Dios, jeē váha chí jēē uhú, chí quéndōo vāha ga i nuū yā, sáha ya jíin tāca jēē yúcuán. Chi cácuu i ñayuu jeē ní cana ya i ní quívicoo i ndaha ya síquí jeē sūcuan ní tee ní yā nde jenahán. <sup>29</sup> Chi nde ná tu coo i te je jíin yā i, te je ní jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnu nuū cuehē ñayuu cácuu ñani cácañdije. <sup>30</sup> Te jeē ní jeni ya i, te suni ní cana ya i. Te jeē ní cana ya i, te suni ní ndahva yā cuēchi i. Te jeē ní ndaha yā cuēchi i, te suni ní sáha ya jeē cujéhnu i.



31 ¿Te ndese ga cahān yō siquī jnūhun jēhnu yáha núu súcuan? Chi núu íne Yaa Dios jíin yó, ¿te ndé ìin cuu cahān siquī yō? Tú ni ìin. 32 Chi máá yá tu ní jnáma ya Sēhe ya jeē ma cúu yā, chi sa suhva ni jēhe ya Sēhe ya ni jihī yā jehē ndihi yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíni nūhún yó. 33 ¿Te ndé ìin cuu cahān cuēchi siquī ñayuu jeē ní nacāji Yaa Dios? Tú ni ìin. Chi máá yá ní ndahva yā cuēchi i. 34 ¿Te ndé ìin cuu ndenehen cuēchi siquī yō núu súcuan? Tú ni ìin. Chi máá Cristo cúu jeē ni jihī yā jehē yō, te suni ní natecu yā. Te vijna te ndéé yá lado váha Yaa Dios nuū cujēhnu ya, te cáhán ndahú yá jíin Yaa Dios jehē yō. 35 ¿Te ndé ìin cuu quenehen yóhó núu jnūhun cundáhú ni Cristo yohó? ¿A jnúndóho, chí táca jéé yíí sáha, chí jéé cájito xēen ñayuu yohó, chí jnámā, chí jéé cúmanī sahma, chí jnūhun yúhú, chí jéé cáhni i yóhó naún? Ni ìin tāca jéé yáha. 36 Chi súcuan yósó núu tútu ìi jeē cácahān ñayuu cácañdije jíin Yaa Dios: Jeē siquí maá ní te ndihi-ni hora cácuni i cahni i sãñã. Te casáha i jíin ná nájñūhun casáha i jíin lanchi, quiti cúu. Achí tutu. 37 Te tuú chi vēsú cándoho yó táca jéé yáha, te vāha-ni cúndeyí yó siquī ndihi-ni, sáha máá Yaa jeē ní cundáhú ni yohó. 38 Jeē yúcuan cúcáhnu ni rī jeē tú ni ìin cuu quenehen yóhó núu jnūhun cundáhú ni Yaa Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéé neé jéé cácujeñnu jñí poder, ni jeē iyó vjna, ni jeē cóo, 39 ni jeē iyó núu sūcún, ni jeē iyó núu cūnú, ni tāca gá jeē ní jecōo, ma cúu cuiti quenehen yóhó núu Yaa Dios, jeē jíin Jítoho yó Cristo Jesús ni cundáhú ni yā yohó.

*Siquí ndese ni nacāji ya yucūn Israel*

## 9

1 Te cáhán ndaā rī chi cúu ri tēe cándije Cristo, te tu stáhú rí, te jíni rī ini anuá rī jeē cahān ndaā rī sáha Espiritu Santo. 2 Yōhoyó cúcuíhyá ni rī, te níni jnáhuhū ni anuá rī 3 jeē siquí tāca jnāhan ri ñayuu nación hebreo, chí ìin-ni yucūn rī jijnāhan rī. Chi jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuan te cuu cácu ánuá maá i núu. 4 Chi cácuu i yucūn ñayuu Israel, te nde jenahán ni sáha Yaa Dios jeē cúu i sēhe ya, te mēññu vícō jeē ndíndéé ní condee yā jíin i sáa. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñūhún i ya ini templo, te nuū maá i ni jejnūhun ya cuehē jnūhun. 5 Te máá i cácuu yucūn tāca jíí yō jeē ní cacujéñnu, te suni yucūn maá i ni cacu Cristo jeē ní nduu ya tēe. Te máá yá cúu Yaa Dios jeē jñí ndihi-ni, te ní cáni cahān ñayuu jeē cujēhnu ya. Amén.

6 Te nasūu jéé tu ní quée ndaā tāca jnūhun jeē ni jéjnūhun Yaa Dios nuū ñayuu Israel. Chi ni quee ndaā nahín núu vēsú jecu-ni i, chí tú ndihi-ni yucūn Israel cúu jeē cácañdije. 7 Chi nasūu ndihi yucūn Abraham cácuu ndije sēhe de jeē ni jéjnūhun ya. Chí ni cahān Yaa Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. 8 Te jnūhun yáha cúní cahān jeē ni ìin ñayuu tu cúu i sēhe Yaa Dios siquí jeē ní cacu i ìin yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. 9 Chi yáha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ìin sēhe yíí ñasihí ró Sara, achí yá.

10 Te nasūu máá yáha-ni, chí suni Rebeca ni cacu uū sēhe yíí ña, te ìin-ni tátá ndíndúú i, jeē ní cuu jíí

yō Isaac. 11-13 Te nde ná tu cacu ndíndúú i, te ná tu sáha i jeē váha jeē uhú, te je ní cahān yā jíin Rebeca: Sūchi ní cacu xīhna gā cuajníñu i nuū súchi sándihí, áchí yá. Chì suni sūcuan cáhán tutu iī: Ni jito manī rī Jacob, te Esaú chì tuú, áchí Yaā Dios. Te sūcuan jíin yō jeē maá Yaā Dios cuu nacāji ya ñayuu núu ndese téé ni maá yá, te nasūu síquī jniñu jeē sáha i, chí sa suhva síquī ndese cúní maá yá nacāji ya i.

14 ¿Nde se cahān yō núu sūcuan? ¿A jeē tu iyó ndāā Yaā Dios jeē sáha ya sūcuan, chí naún? Tú cuiti. 15 Chì nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha rī jeē váha jíin, te sáha rī jíin, áchí yá. 16 Núu sūcuan te nasūu síquī jeē cuní maá ñayuu, ni nasūu jéē nducú ndéyí maá i cúu, chí síquī ndese cúní maá yá cundáhú ni yā i. 17 Chì suni sūcuan yósó núu tútu iī jeē ní cahān yā jíin rey ñuu Egipto: Ni jeni rī rohó jéē cúu ró rey, návāha jíin rōhó te stéén rī poder rī, te návāha cuitē núu síhví rī ní ñáyiví, áchí yá. 18 Núu sūcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cuníñi ni, te sáha ya jeē cuníñi ni.

19 Te sanaa te cahān ñn ró jíin rī: Núu sūcuan cúu ¿te najehē cahān gā yā jeē cuēchi sáha yó? Chì ma cúu casi yō nuū yā jeē ndese cúní maá yá sáha ya. Achì rō. 20 Te sa suhva cáhán rī jíin ró: Róhó, ¿ndé ñn cúu ró jéē jeni ni rō stió cuiñí rō nuū Yaā Dios? ¿A cuu cahān quāsi ñuhun jíin téé ni sáha: Najehē ní sáha ró rúhū sūcuan? achì. 21 Chì tē sáha quāsi, cuu sáha de ndese cúní maá de, chí ñn-ni ñuhun cuu sáha de ñn quāsi fino te inga quāsi corriente.

22 ¿Te á tu jétáhú ró jeē suni sūcuan sáha Yaā Dios jíin ñayuu? Chì cúní yā stéén yā ndese sáha ya juicio síquī ñayuu, te sūcuan te cuní

i poder yā. Te vēsú sūcuan te ní iyo paciencia ni yā jeē tu ní ndóna yachí yā síquī ñayuu jeē jnahnú ndetū. 23 Te sáha ya sūcuan návāha stéén yā ndese yōhyo luu cújéñu ya síquī jniñu sáha ya jíin yóhó ñayuu cundáhú ni yā. Chì nde jenahán je ní sátühva ya yohó jéē luu cújéñu yó jíin yá. 24 Chì ní cana ya yohó jéē candíje yó, te sava yó cúu ñayuu hebreo te sava yó cúu ñayuu tāca gá naciún. 25 Chì suni sūcuan ní cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní iyo manī rī jíin, vijna te cahān rī jeē cácuu i ñayuu jeē manī rī jíin.

26 Te maá lugar nuū ní cahān rī jeē násūu ñayuu rī cácuu i, suu yūcuan cáhán ñayuu jeē cácuu i sēhe Yaā Dios, Yaā técu ní cáni.

Achì yá. 27 Te Isaías sa suhva ní cahān de jnūhun ñayuu Israel: Vēsú ní cayā yucūn Israel nájnūhun ñíí yumar, te jecu-ni i jnama ya. 28 Chì Jitoho yō Yaā Dios, yachí sínu ya jniñu jeē sándaā yā cuēchi ñayuu ñayiví. Achì tutu. 29 Chì nájnūhun ní cahān tucu Isaías:

Máá Yáa cúu Jitoho nuū tācá ndajehé andiví, núu tu ní jnáma ya jecu yucūn yō nuú, te je ní ndoho yó nájnūhun ñayuu ñuu Sodoma jíin ñuu Gomorra, jeē ní naa ndihi.

Achì tutu.

*Jeē tu cájetáhú ñayuu hebreo jnūhun jnama ya i*

30 ¿Nde se cahān yō núu sūcuan? Suu jeē ñayuu tāca gá naciún, vēsú tu ní cánducú i quendōo ndaā i nuū Yaā Dios, te ní ndahva yā cuēchi i. Chì síquī jeē ní candíje i jeē ní jíihí Cristo jehē i cúu jeē ní ndahva yā cuēchi i. 31 Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cūndeyí

i quendōo ndaā i. <sup>32</sup> ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhí Cristo jehē i, chí sa jéni ni i jeē squícu máá i ley te quendōo ndaā i. Te jeē stívi i súcuan cúu nájñūhun cácotúú i siquī maá yúū jeē cácachihí jehē, te suu cúu Cristo. <sup>33</sup> Chí súcuan cáhán nuū tútu íi:

Nde ñuu rī Sion sáha rí jeē cóne maá  
Yaā jeē cúu nájñūhun yuū jeē  
cácachihí i jehē i.

Te cúu ya nájñūhun toto jeē cotúú i  
sáha.

Te sa suhva ñayuu cácdíje Yaā ún,  
chí jnama nahín yá i.

Achí Yaā Dios.

## 10

<sup>1</sup> Hermano jijnáhan ró, cúu ndasí ni rī te jícan tahú rī nuū Yaā Dios jehē ñayuu nación rī Israel, jeē na jnáma ya i jíjnáhan i. <sup>2</sup> Chí cáhán rī jeē vāha cásáha i jeē ndíhví ni i cáchiñúhún i Yaā Dios. Te vesú súcuan te cáchiñúhún cáhá i. <sup>3</sup> Chí tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i. <sup>4</sup> Chí siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi táca ñáyuu jeē candíje i jeē ni sáha Cristo jehē i.

<sup>5</sup> Chí súcuan ni tee Moisés jñūhun ñayuu jeē cánducú quendōo ndaā jíin ley: Núu ññ ñayuu cuu squícu i táca jññu ndácu ley, te cotecu i núú, áchí. <sup>6</sup> Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ni rō jeē jíni ñúhún caa ró andíví nasnúu ró Cristo jeē ndahva yā cuēchi ró. <sup>7</sup> Ni ma cáni ni rō jeē jíni ñúhún cuun ró ndé nuū cúnú ndonehen ró Cristo mēhñu ndívi, nájñūhun jeē tu ní nátecu yā. <sup>8</sup> ¿Te ndese cáhán jñūhun un núu súcuan? Yajni íyó jñūhun ya jíin ró, chí ñúhún ini yuhu ró jíin

ini anuá rō, achí tutu. Te suu cúu jñūhun jeē na cándíje yó jéē jnáma ya yohó. Te jñūhun yáha cúu jeē cácanani rí. <sup>9</sup> Chí núu cahān rō jeē Jítoho rō cúu Jesús, te núu candíje ró jíin ini jíin ánuá rō jeē ní nátecu yā mēhñu ndívi ni sáha Yaā Dios, yūcuán na te jnama ya rohó. <sup>10</sup> Chí jíin ini jíin ánuá yō cándíje yó jéē ni jíhí yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítoho yō cúu Jesucristo, te súcuan te jnama ya yohó.

<sup>11</sup> Chí cáhán tutu íi: Tāca ñáyuu jeē candíje i ya, chí jnama nahín yá i, áchí. <sup>12</sup> Chí inuū-ni cúu ñayuu hebreo jíin táca gá ñayuu, chí máá yá cúu Jítoho nuū ndíhí yó, te cuehē jeē vāha sáha ya jíin ñáyuu cácahān ndahú jíin yá. <sup>13</sup> Chí súcuan cáhán jñūhun ya: Ndíhí ñayuu cácahān ndahú jíin máá Jítoho yō, chí jnama ya i, áchí. <sup>14</sup> ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i? <sup>15</sup> ¿Te ndese nacani ñayuu jñūhun ya te núu jeē tu tájí yá i quíhín i? Chí nájñūhun cáhán tutu íi: Yōhyo luu jññu cásáha ñayuu cájica jíin jñūhun ndeyí sñ ni jeē cácanani i jñūhun vāha ya, achí.

<sup>16</sup> Te nasúu ndíhí i jétáhú nuū jñūhun jnama ya i. Chí ni cahān Isaías nde jenahán: Tātā Yaā Dios, ¿ndé ñáyuu ni candíje jñūhun jeē cácanani ná víi? áchí de. <sup>17</sup> Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

<sup>18</sup> Te cájñūhun rí: ¿A tu ní cájini sōho i jñūhun un núu súcuan? Tuú chí ni cajini sōho i, chí cáhán tutu íi: Níí ñáyívi ní cajini sōho ñayuu jñūhun jeē ní canacani de.

Te nde nuū jíca gá táca lado ni jinū jñūhun ún.

Achí tutu. <sup>19</sup> Te suni cájñūhun rí: ¿A tu ní cájecūhun ni ñayuu Israel

jnūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhān Yaā Dios:

Cucuñí ró jijnáhan ró, chi cuāha ri jnūhun ri nuū inga ñayuu jeē násūú ñn nación cúu.

Te quiti ni rō coto ró jēē cuāha ri jnūhun ri nuū ñn nación jeē tu jécūhun ni.

<sup>20</sup>Te suni Isaías ni chundeyí ni de ni cachi cájí de jeē ni cáhān Yaā Dios:

Ñayuu jeē tu ní cámanducú ruhū, ni cajini i ruhū.

Te nuū ñayuu jeē tu ní cácajnūhún, ni steen rī nuū i ndese Yaā cúu rī.

<sup>21</sup>Te siquī ñayuu Israel sa ni cahān de jeē ni cáhān yā: Ndiquivi ni cana ri i jeē quívicoo i nuū rī, te tu ní cácuni i, chi ñayuu nihni ni, ñayuu jēē ni cácuu i. Achí yá, achí Isaías.

*Jeē iyó jecu na ñayuu Israel jeē jnáma ya*

## 11

<sup>1</sup>Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu rī, te yucūn Abraham cúu rī, te Benjamín cúu jí rī jehán. <sup>2</sup>Tu ní stóo Yaā Dios ñayuu maá yá, chí je ni nacāji ya i nde jehán. ¿A tu cájini rō ndese cáhān tutu ñ jnūhun Elías, tēe ni nacani jnūhun ya jehán? Chi náa jícán tahú de, te ni cahān de siquī ñayuu Israel: <sup>3</sup>Tátā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñuhún na sāña ní quendōo, te vijna suni cácuni i cahni i sāña, áchí de. <sup>4</sup>Te Yaā Dios ni nastió cuñí yā: Iyó nahín úxā mil ñayuu cácañdije ruhū jeē tu ní cájecuñí yití i nuū ídolo naní Baal, achí yá. <sup>5</sup>Te suni súcuan vijna, chí iyó jecu na ñayuu jeē ní nacāji ya siquī jeē váha ni yā jíin i. <sup>6</sup>Te núu ni nacāji ya i siquī jeē váha ni yā jíin i, te nasūu siquī jeē ni sáha i jniñu váha cúu. Chi núu siquī jeē

ni sáha i jniñu váha cúu, yūcuán na te nasūu siquī jeē váha ni yā cúu.

<sup>7</sup>¿Te ndese cúu núu súcuan? Cúu jeē ñayuu Israel tu ní cundeyí i quendōo ndaā i nájnūhun ní canducú i. Te sava i jeē ní nacāji ya, chí maá i ni ndahva yā cuēchi i. Te sava ga i ni ndunihni ni i, <sup>8</sup>nájnūhun cáhān tutu ñ: Ni sáha Yaā Dios jeē tu jécūhun cuiti ni i siquī yā, ni tu jíin i jíin tñuú i, ni tu jíin nahín i jnūhun ya, te súcuan cúu nde vijna. Achí tutu. <sup>9</sup>Te suni ni cahān David:

Vico jeē casáha i, na cóo nájnūhun ñn trampa chí ñn xeyū, návāha nihni i castigo xeēn siquī jeē castívi i cásaáha i cuēchi.

<sup>10</sup>Te ánuá i na ndúnee, nájnūhun jeē tuá cúu coto i,

te na jécostíhí jnūndóho siquī i ní cáni.

Achí tutu.

*Siquī jeē jnáma ya ñayuu tāca gá nación*

<sup>11</sup>Núu súcuan te cájnūhun rí: ¿A tuá cúu cuiti ndívi ñayuu Israel nuū Yaā Dios jeē súcuan ni castívi i? Tú cuiti. Chi sa suhva jeē ní cacunihni ni i, te sa ñayuu tāca gá nación ni canihín tahú maá i jnūhun jeē jnáma ya i. Te yūcuan sáha tucu jeē ñayuu Israel condihvi ni i jeē suni candíje maá i. <sup>12</sup>Chi jee ní castívi i, te sa ñayuu ní cáhnu ñayívi ní canihín maá i jnūhun ya. Te jeē ní cajica yátá i, suu ni sáha jeē ní canihín ñayuu tācá nación jnūhun ya. Núu súcuan te quívi jeē ndívicoo tucu ndihí ñayuu Israel ndaha ya, te ñayuu ñayívi víhyá gā quendōo ndetū i sáha ún.

<sup>13</sup>Te vijna te cáhān rī jíin róhó ñayuu tācá nación jeē tu ní jíin jnūhun ya. Chi ni tají Yaā Dios ruhū jeē scáca ri jnūhun nuū rohó ñayuu tācá nación. Te ndúcú rí jeē na cuájnūhún ró jijnáhan ró jniñu sáha ri jeē nácani ri jnūhun ya. <sup>14</sup>Chi cúní rī jeē jíin yūcuan te nacani ni sava jnáhan ri ñayuu Israel jeē suni candíje maá i, te

jnama ya i. <sup>15</sup> Chi jeē ni stóo ya ñayuu Israel, jeē yúcuan cúu jeē sa ñayuu ñayiví ní sáha ya jeē ndávicoo i nuū jnúhun maní yā jíin i. Núu súcuan te quiví naquihín tucu ya ñayuu Israel, quiví ún suni váha ndasí sáha ya jíin ñáyuu ní cáhnu ñayiví. Chi coo nájnūhun jeē natecu i jeē cúu i nájnūhun ndīyí. <sup>16</sup> Te ñayuu Israel cásocō i nuū Yaā Dios pan jeē quénda xíhna gā nuū ñujen, te súcuan stéén i jeē ndihí un cúu cuenta yā. Te ñin yujnu, núu yíhi jeē cuenta yā cúu, te suu cúu nde yoho jíin ndé ndihí ndaha. Te suni súcuan ñayuu Israel, yíhi cuenta i nuū yā, siquī jeē jíi i xíhna ñúhún, ni quívicoo de ndaha ya.

<sup>17</sup> Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tācá nación jeē tu jíin jnúhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástaa ró ndúxi jíin cajin jeē véji nde yoho yújnu ún. <sup>18</sup> Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ní quendē. Ma cutéyí ró, chí nucūhun ní ró jeē násūú jéé yoho stáa cajin nuū maá ró, chí sa maá ró stáa cajin jeē véji nde yoho.

<sup>19</sup> Te sanaa te cahān rō: Tú chí sava ndaha ni quendē návāha nachuhun ya ruhū nuū ni quendē ún, achi rō. <sup>20</sup> Ndaā, te ni quendē i siquī jeē tu ní cácanđe i Cristo. Te róhó chí máni siquī jeē cácanđe ró, jeē yúcuan cúu jeē ní quívicoo ró lugar i. Te ma sándúxí ró maá ró núu súcuan, chí sa suhva conso ñyo ró núu Yaā Dios. <sup>21</sup> Chi tu ní íne cáhnu ní yā nuū maá ndaha jeē chíjníñu, te suni súcuan ma cóne cáhnu ní yā nuū ró jíjnāhan ró te núu stívi ró. <sup>22</sup> Núu súcuan te sáha váha ro cuenta ndese váha ní Yaā Dios jíin ndese xeēn ni yā. Chí ni nduxeēn ni yā jíin

ñáyuu hebreo jeē ní castívi ún, te sa cúndáhú ní yā rohó. Te cánuú cuiñi níhin ro jíin jnúhun jeē váha ní yā jíin ró. Chí núu tuú, te suni quende yā rohó. <sup>23</sup> Te máá i, núu candíje tucu i, te nucōndee tucu i, chí máá Yaā Dios cuu nachuhun tucu ya i. <sup>24</sup> Núu súcuan te róhó ñáyuu tācá nación jeē tu ní jíin jnúhun ya, ní quendē rō xíní yújnu olivo yucú, te ni nachuhun ya rohó xíní yujnu olivo váha, vésú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ní quendē i, chí cácuu i máá ndayújnu váha ún.

*Ín quiví te jnama ya ndihí ñayuu nación Israel*

<sup>25</sup> Hermano, cúní rī jeē na jécūhun ní ró jíjnāhan ró ndese íyó jnúhun yáha jéé ní yisáhi, návāha ma cutéyí ró cani ní ró jeē ndichí xíní maá ró: Chí sava ñayuu Israel ni ndunihni ní i, te súcuan coo máa-ni nde quiví jínu candíje ñayuu tācá nación jeē tu jíin jnúhun ya. <sup>26</sup> Te sáa te jnama ya ndihí ñayuu nación Israel, chí cáhán tutu í:

Ichi ñuu rī Sión quiji Yaā jnáma ñayuu,

te sáha ya jeē tuá coo cuēchi nuū tāca yúcūn Jacob.

<sup>27</sup> Te yáha cúu contrato jeē sándaā rī jíin i,

quiví jeē quénde ri cuēchi i jíjnāhan i, áchí Yaā Dios.

Achí tutu.

<sup>28</sup> Chí ñayuu hebreo un ní nduu i nájnūhun enemigo Yaā Dios siquī jeē tu ní cácanđe i jnúhun jnáma ya i. Te jeē yúcuan te cuu cuítē núu jnúhun un núu tāca róhó. Te vésú súcuan te siquī jeē ní nacāji ya tāca jíi i jenahán, te cúndáhú gá ní yā i jeē ma stóo ya i ní cáni. <sup>29</sup> Chí tu nácani yátá ní yā jeē cána ya ñayuu jíin jéé jéhe ya tahū i. <sup>30</sup> Te róhó jíjnāhan ró, suni ní cahíyo níhni ní ró nuū Yaā Dios nde saá. Te vijna jeē ní cacunihni ní maá ñáyuu hebreo,

te cundáhú ni yā rohó. <sup>31</sup> Te suni súcuan máá i, chi vésú cácuñihni ni i vijna, te cundáhú tucu ni yā i, nájnūhun cundáhú ni yā maá ró jijnáhan ró. <sup>32</sup> Chi Yaā Dios ni sáha ya jeē ní quendōo ndivii ñayuu chíji jnūhun cūñihni ni i, návāha suni cuu cundáhú ni yā ndivii i.

<sup>33</sup> Núu súcuan te náhan náā ni yō jeē yóhoyo cuehē jnūhun ndíchí iyó jíin Yaā Dios, te ndihi cuiti jini yā. Te ni ma cúu cuiti castūhun yó ndese téē ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá. <sup>34</sup> Chi cáhan tutu i: ¿Ndé ñn ni jecūhun ni ndese jéni ni maá Jítoho yō? ¿Chí ndé ñn ni steén nuū yā? <sup>35</sup> ¿Ndé ñn ni jéhe xihna gā nuū maá yá, návāha nachunaa yā nuū i? <sup>36</sup> Chi nde nuū maá yá vēji tāca jéē iyó, te máá yá ni sáha ndihi, te jeē cúu máá yá cúu. Te na cáhan yō jeē yóhoyo luu cújéhnú Yaā Dios ññ cáni. Amén.

*Jeē na cóo ndoo ánuá yō cuajniñu yó núu Yaā Dios*

## 12

<sup>1</sup> Núu súcuan te cáhan ndahú ri jíin ró jijnáhan ró, hermano, jeē siquí jeē cundáhú ni Yaā Dios yohó. Na sócō ró maá ró núu yā, coo ndoo coo i ró cuajniñu ró núu yā, nájnūhun cúsi ni yā. Chi yāha cúu jeē chíñúhún ró yā nde jíin ini jíin ánuá ró. <sup>2</sup> Te ma cáca ró jíin tāca modo casáha ñayuu ñayiví yáha, chi sa na sáma ró modo caní ni ró, te ndujeé jéē níjnūní ró. Te súcuan te cuu nacáji ró ndé-ni cúu jeē váha jeē nújnahan ni Yaā Dios, jeē cúsi ni yā, jíin jéē íje ni ró jíin jnūhun ya.

<sup>3</sup> Te siquí jeē váha ni yā ni jéhe ya jniñu nácani ri jnūhun ya, jeē yúcuan cáhan rí jíin ndihi ró jéē ma cáni ni ró jeē váha ga ñayuu cúu ró núu cūhva jeē iyó ró. Chi ná ñn ná ñn ró na cáni ndaā ni ró siquí maá ró, te ma scáa ga ró caní ni ró jeē váha ga ñayuu cúu ró vésú nuū cūhva jeē ni

jéhe Yaā Dios fuerza ini ró cándíje ró. <sup>4</sup> Chi cácuu yó nájnūhun ñn yiqui cúñu jeē iyó cuehē parte, te sñn sñn jéjñiñu ñn ñn. <sup>5</sup> Chi vésú iyó cuehē yō, te nájnūhun ñn-ni yiqui cúñu cúu yó jéē yíhi yó ndaha Cristo, chi ñn-ni ni nduu yó jijnáhan yó.

<sup>6</sup> Te sñn sñn tahū ni jéhe Yaā Dios nuū yō jeē cuajniñu yó núu yā, núu ndese ni nujnahan ni yā ni jéhe ya nuū ñn ñn yó. Núu súcuan te na cuajniñu váha yó jíin táhú ún. Núu ni nihñn yō tahū jeē nácani yó jnūhun ya, te cánuú sáha yó ndé maá cūhva ni jéhe ya cándíje yó. <sup>7</sup> Te núu ni nihñn yō tahū jeē chindéé ñáhan yó jnáhan yó, te na sáha yúcún yó. Te núu ni nihñn yō tahū jeē steén yō, te na cóndihvī ni yō steén yō. <sup>8</sup> Te ñayuu jeē stihví ni inga ñayuu, suni na sáha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jniñu, na ndácu váha i jniñu. Te ñayuu jíto ndáhú ñayuu ndahú, na cúsi ni i sáha i.

*Ndese cánuú squícu ñayuu cácandíje*

<sup>9</sup> Te na cundáhú ndije ni ró jnáhan ró, nasuu máá jéē cahán-ni ró. Te coto uhū ró jniñu néé, te condiquñ ró jniñu váha. <sup>10</sup> Te cánuú coo maní ró jíin jnáhan ró nájnūhun jéē maní ró jíin ñani ró. Te nducú ró jeē quendōo yíñúhún gá jnáhan ró vésú maá ró.

<sup>11</sup> Te ma cucúxi ró jíin jniñu casáha ró. Chi jíin ini jíin ánuá ró condihvī ni ró cuajniñu ró núu maá Jítoho yō.

<sup>12</sup> Te na cúsi ni ró jeē cáñuhun ni ró tāca jéē váha jeē cóo. Te na cuándeýí ni ró núu ndóho ró jnúndóho. Te níni na cácan tahú ró.

<sup>13</sup> Te coto ndáhú ró ñayuu cácandíje núu cúmani nuū i. Te cuáha núu ró vehe nuū ñayuu cájica.

<sup>14</sup> Te cacān tahú ró jehē ñayuu cájito xeñ rohó. Ma cahán ndevāha

ro síquī i, chi sa cacān tahú rō jehē i.

<sup>15</sup> Te núu cúsi ni ñayuu, te suni na cúsi ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

<sup>16</sup> Na cóo inuú ni rō jíin táca jnáhan ró. Te ma cundúxí ró, chi sa quiijnáhan ró jíin ñáyuu núu ga. Ma cáni ni rō jeē ndichí xínī rō.

<sup>17</sup> Te ma nasáha ndeváha ró jíin ni ñin ñayuu, núu ni sáha ndeváha i jíin ró. Na cóndihvī ni rō sáha ró jniñu váha, jíto jínúu táca ñáyuu. <sup>18</sup> Te na cóndihvī ni rō coyūcu mánī rō jíin táca ñáyuu, vésú ndese cándāa máá i. <sup>19</sup> Nánī mánī jijnáhan ró, ma nácuáha ró jéē ndútahū ñayuu casáha ndeváha jíin ró, chi sa cuáha ró jnúhun jeē máá Yaā Dios cuáha ya castigo i. Chi cáhán tutu i: Máá rí cuáha castigo i, máá rí nacuáha yáhu i, áchí Jítoho yō. <sup>20</sup> Te suni cáhán tutu: Tēe jíto uhū rohó, núu jíi de sōco, te cuáha ró jéē cáji de. Te núu jíchí de, te cuáha ró jéē cóho de. Chi núu sáha ró súcyan, te cucan de te nacani uhū ni de jeē ni jíto uhū de rohó. <sup>21</sup> Ma cuáha ró jnúhun jeē cúndeyí jniñu néé jíin ró, chi sa jniñu váha na sáha ró návāha ndahvā jniñu néé.

### 13

<sup>1</sup> Táca ñáyuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu síquī de. <sup>2</sup> Te ñayuu jeē tu jétáhú nuū tēe cándiso jniñu, núu súcyan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihīn i castigo. <sup>3</sup> Chi táca tēe ndíso jniñu, nasūu jéē ndíso jniñu de jeē yūhū ñáyuu casáha jniñu váha, chi sa jeē yūhū ñáyuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcyan. Yūcuán na te cuajnúhún de rohó. <sup>4</sup> Chi jéjníñu

Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjníñu Yaā Dios de, návāha cuáha de castigo ñayuu casáha jniñu néé. <sup>5</sup> Jeē yúcuan cánuú jéē cuatáhú ró nuū tēe cándiso jniñu, te nasūu mánī jeē ma nihín rō castigo, chi suni jeē tú na cuēchi coo ánuá rō. <sup>6</sup> Te jeē yúcuan cúu jeē suni cájēhe ró xúhun nuū tēe cándiso jniñu cuu jniñu ñuu. Chi jéjníñu Yaā Dios de, te mánī jniñu yúcuan casáha de.

<sup>7</sup> Te chunaa rō ndihī jeē cátaū rō nuū táca ñáyuu. Cuáha ró xúhun ñuu nuū tēe stútú xúhun ñuu, te cuáha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró. <sup>8</sup> Ma cótaū rō nuū ní ñin. Te íyó ñin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihī jeē ndácu ley yā. <sup>9</sup> Chi súcyan ndácu ley jniñu: Ma cosíquí ndéē rō jnáhan ró, ma cáhni rō ndīyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te táca jnúhun yáha jíin táca gá jniñu ndácu ley, ndihī-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō máá ró, áchí tutu. <sup>10</sup> Te núu cundáhú ni yō jnáhan yó, te tu sáha yó ni ñin jeē tu íyó váha nuū i. Núu súcyan te jeē cundáhú ni yō jnáhan yó, yūcyan cúu jeē squícu yó ní ley yā.

<sup>11</sup> Súcyan sáha ró jíjnáhan ró, chi sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vésú quivī ní candíje yó jnúhun ya. <sup>12</sup> Chi nájnūhun je yajni yáha jecuáa, te cuacundijin quivī jnáma ya yohó. Núu súcyan te na stóo yó jniñu jeē ni sáha yó núu néé,

te na cúcutú yó jíin táca jniñu ndaā jeē caca yó jíin luz yā. <sup>13</sup> Na cáca yíñúhún yó nájñuhun cánuú caca yó jíin luz yā. Ma nájini ró, ma sáha ró táca vico neé, ma cáca jnéni ró, ma sáha ró jniñu neé, ma cuajnáhan ró, ma cucuésún ni rō. <sup>14</sup> Chi sa suhva cuiñi cutú ró jíin fuerza maá Jítoho yō Jesucristo, jeē ma cuáha ga rō jñuhun sáha ró jniñu cúní modo neé maá ró.

*Ma cahán neé yó coto yó jnáhan yó*

## 14

<sup>1</sup> Cuatáhú ró ñayuu jeē ná tu ije jíin jñuhun ya, te ma tejnáhan ró jíin i síquī táca jñuhun jeē sáin jéni ni i jíin maá ró. <sup>2</sup> Chi íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jíin jñuhun ya, te cájeni ni i jeē tú vāha caji i cūñu, chí jeē ní casocō ñayuu nuū ídolo cúu. <sup>3</sup> Te rōhó téé jeē yéji ndinuū-ni, ma cahán rō coto ró téé jeē tu yéji ndinuū. Te rōhó téé jeē tu yéji ndinuū, ma cahán rō coto ró téé jeē yéji ndinuū. Chi Yaā Dios ni jetáhú yá tēe ún. <sup>4</sup> Te rōhó, ¿ndé ñin cúu ró jéé cahán neé ró jíto ró mozo Yaā Dios? Chi núu vāha chí neé sáha de, te maá yá cúu jeē sándaā jíin de, nasūu maá ró. Te tuú chi cuiñi vāha de, chí mozo maá Jítoho yō cúu de, te cuu sáha ya jeē ma stívi de.

<sup>5</sup> Te suni íyó ñayuu jeē jéni ni jeē íi gā ñin quivī vēsú inga quivī. Te inga ñayuu chí jéni ni i jeē ñinuū-ni cúu táca quivī. Te tǎcá i na cúndaā vāha ni maá i síquī jeē jéni ni i. <sup>6</sup> Chi tēe jeē neé ñi quivī, chíñúhún de maá Jítoho yō jeē sáha de súcuan. Te tēe jeē tu neé ñi quivī, suni chíñúhún de Jítoho yō jeē sáha de súcuan. Te tēe jeē yéji ndinuū-ni, chíñúhún de maá Jítoho yō jeē sáha de súcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

<sup>7</sup> Chi ni ñin yó tu técu yō jeē váha maá-ni yó, te ni ñin yó tu jíhí yō jeē cuní maá yó. <sup>8</sup> Chi núu técu yō, te técu yō jeē cuajniñu yó núu maá Jítoho yō. Te núu cuu yō, te suni cuu yō síquī jeē cuní maá Jítoho yō. Núu súcuan te núu jeē cótecu yō chí jéé cuu yō, te yíhi yó ndaha Jítoho yō. <sup>9</sup> Chi ni jihí Cristo te ni natecu yā, návāha cuu ya Jítoho nuū ñayuu ni jíhí jíin ñayuu técu.

<sup>10</sup> Te rōhó, ¿naun jéni neé ni rō jíto ró jnáhan ró núu súcuan? ¿Te naun cújéé ni rō jíto ró de? Chi táca yó cuiñi yó yuhu mesa Cristo jeē sándaā yā jniñu yó. <sup>11</sup> Chi suhva yósó núu tútu ñi:

Jendaá ndije chí nuū maá rí cuiñi  
yítí táca ñayuu,  
te ndihi i cahán jeē maá rí cúu Yaā  
Dios, áchí maá Jítoho yō.

<sup>12</sup> Núu súcuan te ná ñin ná ñin yó nacuāha yo cuenta nuū Yaā Dios ndese jniñu ni casáha yó.

*Ma sáha yó jéé quivī jnáhan yó cuēchi*

<sup>13</sup> Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñin jniñu jeē sáha jeē stívi jnáhan ró te quivī i cuēchi. <sup>14</sup> Te jíni rī jeē ni ñin jeē ni sáha Yaā Dios, tu stívi ánuá yō. Chi súcuan ni cucáñu vāha ni rī síquī jeē candíje ri Jítoho yō Jesús. Te núu ñin ñayuu jéni ni i jeē iyó jéé stívi ánuá i, yūcuán na te súcuan sáha un jíin maá i. <sup>15</sup> Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chí jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snáā rō anuá jnáhan ró síquī jeē yéji rō ñin jeē jéni ni de jeē cuēchi cúu. Chi suni jehē maá de ni jihí Cristo. <sup>16</sup> Ma sáha ró jniñu jeē cahán i síquī, vēsú jíni maá ró jeē iyó váha. <sup>17</sup> Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chí sa suhva síquī jeē na sáha yó jniñu



ndaā, te coyūcu mánī yō jín jnáhan yó, te cusī ni yō sáha Espírītu Santo. <sup>18</sup> Te ñayuu jeē súcuan jéjníñu nuū Cristo, chí cúsī ni Yaā Dios jín i, te suni cájejnúhún ñayuu i.

<sup>19</sup> Núu súcuan te na cóndihvī ni yō coyūcu mánī yō, návāha jín yúcuan chindéé ñájnaáhan yó ije yó jín jnúhun ya. <sup>20</sup> Te ma cuáha ró jnúhun jeē ndeyu yéji rō snáá jniñu ni sáha Yaā Dios jín jnáhan ró. Chí iyó ndoo ndije ndihī jeē yéji yō, te vēsú súcuan te tú vāha jeē yéji rō ndeyu jeē sáha jín jnáhan ró jéē caji de jeē jéni ni de jeē cuēchi cúu. <sup>21</sup> Vāha ga ma caji rō cūñu, ni ma cóho ró vino, te ni ñn ma sáha ró jéē stívi ánuá jnáhan ró, te quívi de cuēchi, te caca yátá de nuū jnúhun cándije de. <sup>22</sup> Te núu cándije ró jéē tú na vé sáha jeē yéji rō, te súcuan na cándije máá-ni ró núu Yaā Dios. Te nacā ndetū tēe jeē tu sáha jín ánuá de jeē cuēchi cúu núu caji de coho de. <sup>23</sup> Te tēe yéji ñn jeē jéni ni de sanaa te stívi ánuá de, núu súcuan te sáha de cuēchi, chí tu cándije de jeē iyó vāha jeē yéji de. Chí tāca jéē sáha yó, núu tu cándije yó jéē iyó vāha, te cuēchi cúu.

*Jeē na sáha yó jéē cúsī ni jnáhan yó*

## 15

<sup>1</sup> Te yóhó jéē ni ije yó jín jnúhun ya, cánuú condito yó ñayuu jeē ná tu ije jín jnúhun ya, návāha candíje vāha i. Te ma sáha yó jéē maá-ni yó cusī ni. <sup>2</sup> Chí ná ñn ná ñn yó na sáha yó jéē cúsī ni jnáhan yó, návāha quendōo vāha i te ije i jín jnúhun cándije i. <sup>3</sup> Chí ni Cristo, tu ní sáha ya jeē cúsī ni maá yá, chí sa suhva jeē cúsī ni Tatá yā. Chí suhva cáhán tutu iī: Tāca jnúhun ndevāha jeē cácahān ndevāha ñayuu siquī ní, ni ndívi siquī maá ná, áchí Cristo jín Tatá yā. <sup>4</sup> Chí tāca jnúhun jeē ni jecosō nuū tútu iī nde jehánán, chí ni jecosō návāha stéén nuū yó, te nihūn yó jnúhun jeē sáha

jeē cuandeyí ni yō te ndusī ni yō. Te súcuan te cocuhun ni yō tāca jéē vāha jeē cóo. <sup>5</sup> Te máá Yaā Dios jeē jéhe jnúhun cuandeyí ni jín jnúhun ndúsī ni, na sáha ya jeē cóo inuú ni rō, nájñuhun cúní Cristo Jesús. <sup>6</sup> Te súcuan te ñn-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tatá Jitoho yō Jesucristo.

*Jeē ni jítē jnúhun vāha ya nuū ñayuu tāca nación*

<sup>7</sup> Núu súcuan te cuatáhú ró tāca jnáhan ró, nájñuhun ni jetáhú Cristo yohó, návāha cuni ñayuu jeē luu cújéhnū Yaā Dios. <sup>8</sup> Chí cáhán rī jeē ní quiji Cristo Jesús, ni sáha ya tāca jniñu jeē quéndōo vāha ñayuu hebreo, návāha cundaā tāca jnúhun jeē ni jéjñuhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñuhun ya. <sup>9</sup> Te suni ni quiji ya návāha ñayuu tāca nación jeē tu jín jnúhun ya, cahān i jeē yóhoyo vāha ni Yaā Dios jeē cundáhú ni yā i. Chí suhva cáhán tutu iī:

Núu súcuan te cahān na jéē yóhoyo vāha ni ní, cuni ñayuu tāca nación,  
te cata ná yaa jeē chiñúhún ná nihín.

<sup>10</sup> Te cáhán tucu tutu iī:  
Róhó ñayuu tāca nación, inuú na cúsī ni rō jín ñayuu maá yá.

<sup>11</sup> Te cáhán tucu:  
Róhó ñayuu tāca nación, na cáhán rō jeē yóhoyo vāha ni Jitoho yō Yaā Dios,

te róhó ñayuu tāca-ni ñuu, suni na cáhán rō jeē yóhoyo cújéhnū ya.

<sup>12</sup> Te suni ni tee Isaías jnúhun yáha:  
Nuū yúcūn Isaí quiji ñn jeē cujéhnū, te ndacu ya jniñu nuū ñayuu tāca nación.

Te ñayuu ún chí cocuhun ni i tāca jéē sáha ya.

Achí tutu.

<sup>13</sup> Te máá Yaā Dios jeē sáha jeē cáñuhun ni yō tāca jéē vāha jeē coo, na sáha ya jeē cóo siī ndasí ni rō jín

jeē cóo ndeyí ni rō siquī jeē cá candíje nīhin ró yá. Te súcuan te cocuhun teyí gá ni rō tāca jeē váha jeē coo, sáha poder maá Espíritu Santo.

<sup>14</sup> Nánī mánī, cúcáhnū ni rī jeē váha ndasí cándihvī ni rō jíin jniñū váha, te váha ndasí cájecūhun ni rō, te cúu stāhvī jnánhan ni rō. <sup>15</sup> Te ni jeni ni rī jeē tee ri carta yáha cáhān cají rī jíin ró jijnánhan ró, návāha víhyá gā na cócuhun ni rō tāca jnūhun yáha. Chi súcuan sáha ri siquī jeē váha ni Yaā Dios te ni jēhe ya jniñū nuū rī <sup>16</sup> jeē jejniñū ri nuū Jesucristo, jeē nácani ri jnūhun nuū ñáyuu tācá nación jeē tu jíin jnūhun ya. Te nácani ri jnūhun váha Yaā Dios nuū i jeē jnāma ya i. Súcuan sáha ri návāha ñayuu tācá nación, cuu squívi ri i ndaha ya jeē cúu i nájñūhun in jeē socó rī nuū yā jeē cúshī ni yā jíin. Chi ni sáha Espíritu Santo jeē iyó ndoo iyó íi i nuū yā.

<sup>17</sup> Núu súcuan te siquī jeē candíje ri Cristo Jesús, te cúshī ni rī jeē jeniñū váha ri nuū Yaā Dios. <sup>18</sup> Chi ma cúu cahān rī siquī jniñū casáha inga tēe, chi máá-ni siquī ndese ni jejniñū Cristo ruhū jeē sáha ri jeē ñáyuu tācá nación tu ní jíin jnūhun Yaā Dios, vijna jétáhú i nuū yā. Chi súcuan ni cuu jíin jnūhun ni cahān rī jíin jniñū ni sáha ri. <sup>19</sup> Chi ni sáha ri jniñū jéhnū ndíso poder jeē steén jeē kujéhnū ya, te ni íyo poder Espíritu Santo jíin rī. Te súcuan ni nacani ndihī ri jnūhun ndese jnāma Cristo ñayuu. Te ni nacani ri nde ñuu Jerusalén, jíin ndihī tācá ñuu, jíin nde ní región Ilírico. <sup>20</sup> Súcuan cúu jeē ní condihvī ni rī ni nacani ri jnūhun jeē jnāma ya ñayuu. Te ni jehēn rī nuū ñáyuu jeē ná tu cuni jnūhun Cristo, chi tu ní cúní rī nacani ri nuū ñáyuu jeē jé ni jini i ni canacani inga tēe. <sup>21</sup> Chi sa suhva ni sáha ri nájñūhun cáhān tutu íi:

Tāca ñáyuu jeē tu ní quíji jnūhun ya nuū i, vijna chí cuni i jnūhun ya,

te tāca ñáyuu jeē tu ní jíin cuiti jnūhun ya, vijna chí jecūhun ni i.

Achí tutu.

*Jeē ñūhun ni Pablo jeē quihín de Roma*

<sup>22</sup> Te jeē yúcuan cúu jeē cuehē jíinu ni kujnéñū ri, te tu ní cúu jecondēhe rí rohó jíjnánhan ró. <sup>23</sup> Te vijna chí ni ndihī jniñū ri ní cáhnū tācá región ndañūū yáha. Te je ni cuu cuehē cuyā jeē cuní rī jeē rī nuū rō. <sup>24</sup> Núu súcuan te ñūhun ni rī jecondēhe rí rohó jíjnánhan ró núu na yáha ri quihín rī España. Te ñūhun ni rī jeē núu je ni cusī ni rī jeē ní jito jnánhan yó, yūcuán na te chindéé ñáhán ró ruhū jeē quihín gā rī. <sup>25</sup> Te xīhna gā na quihín rī ñuu Jerusalén quindēca ri xūhún cuu hermano cáyūcu yúcuan. <sup>26</sup> Chi ñayuu Macedonia jíin Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. <sup>27</sup> Chi súcuan ni cacushī ni i ni casáha i. Te iyó váha jeē súcuan, chí máá i jeē cácuu i ñayuu tāca gá nación, táu i jeē sáha váha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo váha ánuá i sáha. Jeē yúcuan cánuú jéé chindéé ñáhán i ñayuu hebreo cá candíje jíin ndajniñū ñayívi yáha. <sup>28</sup> Núu súcuan te jeē jíinu jniñū yáha jéé quindēca ri xūhun yáha nuū i, yūcuán na te jecondēhe rí rohó jíjnánhan ró jéé yáha ri quihín rī España. <sup>29</sup> Te jíin váha ri jeē quivī jinú rī nuū rō, te váha ndasí quendōo ró jéé nacani ga rī jnūhun váha Cristo nuū rō.

<sup>30</sup> Hermano jijnánhan ró, cáhán ndahú rí jíin ró jeē chindéé ñáhán ró ruhū cacān tahú rō jehē rī nuū Yaā Dios siquī jniñū ndúcú ndeyí rí. Súcuan sáha ró siquī jeē candíje yó Jítoho yō Jesucristo, jíin siquī jeē cundáhú ni yō jnánhan yó sáha máá Espíritu. <sup>31</sup> Te cacān tahú rō jeē na cácu ri nuū tēe región Judea jeē tu

cácandíje, jíin jéē na cúsī ni tǎcá hermano űuu Jerusalén jeē quíndēca rí xūhun yáha cuu de. <sup>32</sup> Te súcuan te núu cúní Yaā Dios te jecondēhe rí rohó jíjnáhan ró, te cusī ni yō, te nanihīn ni rī jeē condee rī jíin ró. <sup>33</sup> Te máá Yaā Dios jeē jéhe jnūhun ndeyí sī ni, na cóo ya jíin ró jíjnáhan ró. Amén.

*Jeē cahán Pablo jeē sándeyí ni i*

## 16

<sup>1</sup> Te vijna te cǎhán rī jíin ró jíjnáhan ró jéē na chíndéē űáhán ró hermana Febe, chí cúu űa űahan jéjníűu jeē síquī jnúhun ya nuū űáyuu cácanđíje űuu Cencrea. <sup>2</sup> Te cuatáhú ró űa nájnūhun cúní maá Jítóho yō, chí súcuan cánuú sáha hermano cácanđíje. Te chíndéē űáhán ró űa na-ni vé cúu jeē jíni űúhún űa, chí súcuan ni chíndéē űáhán maá űa cuehē űáyuu, te suni nde ruhū.

<sup>3</sup> Cahán ró jíin Priscila jíin Aquila jeē sándeyí ni ndíndúú de, áchí rí, chí cáchíndéē űájánhan de jíin rí síquī jníűu Cristo Jesús. <sup>4</sup> Chí ná ni űyo jnūndóho jeē cuu rī nuū, te ni cachundeyí ni de ni canducú de scácu de ruhū, vēsū suni cuu maá de núú. Te nácuatáhú rí nuū ndíndúú de, te nasūu maá-ni ruhū, chí suni táca grupo űáyuu cácanđíje tǎcá nación. <sup>5</sup> Te suni cahán ró jíin űáyuu cácanđíje ndútútú vehe de, sándeyí ni i, áchí rí. Te cahán ró jeē sándeyí ni Epeneto, tēe maní rī jíin. Chí űuu Acaya, maá de cúu jeē ní candíje xīhna gā nuū Cristo. <sup>6</sup> Suni cahán ró jeē sándeyí ni María, űahan jeē ní jejniűu ndasí jeē síquī jnúhun ya mēhűu ró jíjnáhan ró. <sup>7</sup> Te cahán ró jeē sándeyí ni Andrónico jíin Junias, tēe cácuu jnáhan űuu rī jeē ní cahīn jíin rí vecāa. Te tǎcá apóstol chí cájejnúhún de ndíndúú tēe jíñá, te xīhna gā de ni cacandíje Cristo vēsū maá rí.

<sup>8</sup> Cahán ró jeē sándeyí ni Amplias, tēe maní rī jíin, chí cándíje de Jítóho yō. <sup>9</sup> Te cahán ró jeē sándeyí ni

Urbano, tēe chíndéē űájánhan jíin yó síquī jníűu Cristo Jesús, te suni súcuan Estaquis, tēe jeē maní rī jíin. <sup>10</sup> Suni cahán ró jeē sándeyí ni Apelles, tēe jeē ni stēén jeē candíje vāha de Cristo, te suni súcuan cahán ró jíin űáyuu vehe Aristóbulo. <sup>11</sup> Cahán ró jeē sándeyí ni Herodión, tēe cúu jnáhan űuu rī. Te suni súcuan űáyuu vehe Narciso jeē cácanđíje maá Jítóho yō. <sup>12</sup> Te suni cahán ró jeē sándeyí ni Trifena jíin Trifosa, űahan cásájniűu síquī jnúhun maá Jítóho yō. Te suni sándeyí ni Pérsida, hermana jeē maní yō jíin, chí suni ní sájniűu ndasí űa síquī jnúhun Jítóho yō. <sup>13</sup> Te cahán ró jeē sándeyí ni Rufo, tēe cájejnúhún űáyuu jeē vāha cándíje de maá Jítóho yō. Te suni súcuan cahán ró jíin náná de, te máá űa suni ní jito űa ruhū nájnūhun jeē naná rī cúu űa. <sup>14</sup> Te cahán ró jeē sándeyí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de. <sup>15</sup> Te suni súcuan Filólogo jíin Julia jíin Nereo jíin cuáha de, jíin Olimpas jíin ndíhi hermano cácanđíje cáyūcu jíin de jíjnáhan de.

<sup>16</sup> Te jeē cahán táca ró jíin jnáhan ró, te yíűúhún techūhu ró ndaha i. Te táca grupo űáyuu cácanđíje nuū Cristo, cǎhán i jeē na sándeyí ni ró.

<sup>17</sup> Te cǎhán ndahú rí jíin ró, hermano jíjnáhan ró, jéē cóto ró maá ró nuū űáyuu cútucu ni te ndúcú stívi jnáhan jíin jnúhun tu quíjnáhan jíin jéē ní cacutūhva ró. Te cujiyo ró núu i jíjnáhan i. <sup>18</sup> Chí űáyuu súcuan, tu jéjníűu i nuū Jítóho yō Jesucristo, chí máni ndíhvi ni i síquī jeē cáji i. Te yōhyo ndúxi i jíin jnúhun cácahán i, te súcuan stáhú i űáyuu jeē tu jíni vāha. <sup>19</sup> Te máá ró jíjnáhan ró, chí je cájini ndíhi űáyuu ndese vāha cájetáhú ró nuū yā, te jeē yúcuu cúsī ni rī. Te cúní rī jeē cóo listo vāha ró sáha ró jniűu vāha, te ma sáha ró jniűu néé. <sup>20</sup> Te máá Yaā

Dios jeē jēhe jnūhun ndeyí s̄ñ ni, yachī sāha ya jeē cūndeyí ró siquī jexeén jeē cúu Satanás. Te ñúhun ni rī jeē Jítoho yō Jesucristo na sāha ya jeē váha róhó jijnáhan ró.

<sup>21</sup> Sándeyí ni rō jijnáhan ró, áchí Timoteo, tēe chindéé ñáhán jín rí siquī jnūhun ya. Te suni súcuan cácahān jnáhan ñuu rī Lucio jín Jasón jín Sosípater.

<sup>22</sup> Te ruhū jeē naní Tercio, jeē tēe ri carta yáha jēe cahán Pablo, suni cáhán rī jeē sándeyí ni rō jeē cácaandíje ró Jítoho yō.

<sup>23</sup> Te Gayo, tēe ni jēhe núu vehe ndéé ruhū Pablo, cáhán de jeē sándeyí ni rō jijnáhan ró. Te suni jēhe núu de vehe nuū tāca ñáyuu cácaandíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

<sup>24</sup> Te ñúhun ni rī jeē maá Jítoho yō Jesucristo, na sāha ya jeē váha róhó jijnáhan ró. Amén.

*Jnūhun sándēhi jēe cahán jeē yóhoyo cújéhnua*

<sup>25</sup> Te vijna na cáhán yō jeē yóhoyo cújéhnua Yaā Dios. Chi máá yá cuu sāha jeē cuñi ñihin ga rō jijnáhan ró jín jnūhun jnáma ya rohó jeē nácani ri, jín jnūhun Jesucristo jeē steén rī. Chi súcuan ni steén Yaā Dios jnūhun sāhi yá, jeē ní yisāhi ní cáni nde ná tu jecōo ñayiví. <sup>26</sup> Te vijna te je ni nane cájí. Chi jín tútu ñi jeē ní catee tēe ni canacani jnūhun ya, ni jítē núu jnūhun sāhi yáha nuū ñáyuu tācá nación, návāha candíje i te cuatáhú i. Chi Yaā Dios jeē técu ñí cáni, súcuan ni ndacu ya jniñu.

<sup>27</sup> Te ñí cáni na cáhán yō jeē yóhoyo cújéhnua Yaā Dios siquī jniñu ní sāha ya jeē jín Jesucristo. Chi máá ñn-ni ya iyó te yóhoyo ndíchí yá. Súcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñuhun ya. Te ndindúú rí jín hermano yō Sóstenes <sup>2</sup> cátee ri carta yáha cuájeē nuū rohó ñayuu ñuu Corinto jeē cácanđeje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jijnáhan ró jeē coo ndoo coo ñi ró nuū yá. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jitoho táca yó jín i cúu ya. <sup>3</sup> Te cáñuhun ni rī jeē Tatá yō Yaā Dios jín Jítoho yō Jesucristo na sáha ga yā jeē váha róhó, te sáha ya jeē coo ndeyí coo sī ni ró.

*Cristo sáha ya táca jeē váha yóhó*

<sup>4</sup> Te níní nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha róhó. <sup>5</sup> Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jín táca jñuhun ya, chí cájecūhun váha ni ró te cúu nácani ró. <sup>6</sup> Chi súcuan cúu jeē cáhīn ñihin ró jín jñuhun Cristo jeē ní canacani ri nuū ró. <sup>7</sup> Te súcuan te tu cúmanī ni ñn tahū jeē jéhe ya cuu ánuá ró níní jeē cándetu ró quívī jeē quénda ndijin Jitoho yō Jesucristo. <sup>8</sup> Te máá yá chí sáha ya jeē cuiñi ñihin ró nde na jínu quívī, návaha ma cóo cuēchi siquí ró quívī ndíji Jitoho yō Jesucristo. <sup>9</sup> Te squícu Yaā Dios táca jeē ni jéjñuhun ya, te ni cana ya rohó jijnáhan ró návaha cuni jnahan ró jín Séhe ya, Yaā cúu Jitoho yō Jesucristo.

*Siquí jeē ma cóo sñn ni i jín jnáhan i*

<sup>10</sup> Hermano, nde jín síhví Jítoho yō Jesucristo cahán ndahú rí jín ró jeē inuú-ni na ndájñuhun ró jijnáhan ró, te ma cóo sñn ni ró. Chi váha inuú na cóo ni ró jín táca jeē cájeni ni ró. <sup>11</sup> Súcuan cáhán rī, ñánī mánī, chí ni cacastūhun ñayuu vehe Cloé nuū rī jeē cátejñahan ró. <sup>12</sup> Chi táca ñn ñn ró sñn sñn cácahān ró: Ruhū chí jín Pablo índichi rī, cácahān sava ró. Te sava ga ró: Ruhū chí jín Apolos. Ruhū chí jín Pedro. Ruhū chí jín Cristo. Cácahān ró. <sup>13</sup> Te jeē cácahān ró súcuan ¿te á cájeni ni ró jeē sñn sñn Cristo iyó jeē cácanani ri jñuhun? ¿Te á ruhū Pablo ni jihí jicā cruz jehē ró? ¿Chí jín síhví ruhū ni cajendute ró, chí naún? <sup>14</sup> Tú cuiti. Te na cútahū rī nuū Yaā Dios jeē tú cuehē ró ni scuándute ri, chí máá Crispo jín Gayo-ni, <sup>15</sup> návaha ma cahán ni ñn ró jeē jín síhví rí ni jendute ró. <sup>16</sup> Te sá núcūhun ni rī jeē suni ni scuándute ri Estéfanas jín ñayuu vehe de. Te sanaa te súcuan-ni cúu ñayuu ni scuándute ri, jéni ni rī. <sup>17</sup> Chi tu ní téjñīñu Cristo ruhū jeē scuándute ri, chí sa suhva jeē nácani ri jñuhun jeē jnáma ya ñayuu. Te tu ní ndúcú rí jeē steén rī nuū ró ñn modo ndichí jeē ma jécūhun ni ró, chí núu súcuan te ma cúu jecūhun váha ni ró jñuhun jeē ni jihí Cristo jicā cruz.

*Jín Cristo ni steén Yaā Dios poder yá jín jñuhun ndichí yá*

<sup>18</sup> Te jñuhun jeē ni jihí yá jicā cruz jeē jnáma ya ñayuu, chí jñuhun cánée í cúu nuū ñayuu cuango nuū jnahnú ndetū. Te máá yó jeē cuahán yō nuū cácu yó, chí jíní yó jeē jñuhun Yaā Dios jeē ndíso poder cúu. <sup>19</sup> Chi suhva yósó núu tútu ñi jeē ni cáhān Yaā Dios:

Na snáa rī jñuhun ndichí cácahān ñayuu ndichí cuenta ñayiví yáha,

te ma cuatáhú rí jnūhun cácahān ñayuu jeē jéni ni jeē jiní vāha. Achí yá.

<sup>20</sup> Núu súcuan ¿te ndé cuajniñu tēe ndíchí cuenta ñayīví yáha, jíin tēe cástéén tutu, jíin tēe cánanducú yúcún síquī jeē steén ñayuu ñayīví yáha? Chí tāca jnūhun ndíchí cuenta ñayīví yáha, ni cahān Yaā Dios jeē jnūhun cánéé í cūu. <sup>21</sup> Te yōhyo ndíchí sáha Yaā Dios. Chí tāca jnūhun ndíchí cájini ñayuu ñayīví, ni cachi ya jeē tu jéjniñu jeē cūni i ndese Yaā cūu ya. Yūcuán na te ni nujnahan ni yā jeē jíin jnūhun ya jeē cánacani ri te jnama ya ñayuu cácañdije, vēsú cájeni ni ñayuu ñayīví jeē jnūhun cánéé í cūu.

<sup>22</sup> Chí ñayuu hebreo, máni cácuni i jeē sáha Yaā Dios cuehē jniñu jéhu jeē steén poder yā. Te ñayuu griego chí máni síquī jnūhun ndíchí cándihví ni i. <sup>23</sup> Te máá rí chí sa suhva cánacani rí jnūhun jeē ni jíihī Cristo jíicā cruz jeē jnáma ya ñayuu. Te jnūhun yáha sáha jeē jnániní ni ñayuu hebreo, te ñayuu tāca gá nación chí cájeni ni i jeē jnūhun cánéé í cūu. <sup>24</sup> Te ñayuu jeē ní cana ya ni quīvícoo ndaha ya, vēsú ñayuu hebreo chí ñayuu griego, chí jíin i jeē jíin Cristo ni steén Yaā Dios poder yā jíin jnūhun ndíchí yá. <sup>25</sup> Chí jnūhun Yaā Dios jeē cácahān ñayuu jeē jnūhun cánéé í cūu, yōhyo ndíchí gá vēsú jnūhun ndíchí ñayuu. Te cájeni ni ñayuu jeē tú na poder yā ná ni jíihī Jesús jeē jnáma ya yohó, te tuú chí nīhin téyí gá poder yā ún vēsú poder ñayuu. <sup>26</sup> Hermano, máá ró cácuu jeē ní cana ya ni quīvícoo ró ndaha ya. Te condēhe ró jeē tú cuehē rō ndíchí jíin jnūhun ñayīví, ni tú cuehē rō cácuu sēhe ñayuu cujéhu. <sup>27</sup> Chí sa suhva ni nacāji Yaā Dios tāca jéé cácahān ñayuu ñayīví jéé tu ndíchí cuiti, návāha coo jnūhun canu nuū tāca jéé ndíchí. Te ni nacāji ya ñayuu

tu téyí ini ñayīví, návāha coo jnūhun canu nuū ñayuu teyí. <sup>28</sup> Te suni ni nacāji Yaā Dios tāca jéé tu cujéhu ini ñayīví, jíin tāca jéé sajéé ni i nuū, nde jíin tāca jéé tú jniñu cájeni ni i, návāha snúu ya tāca jéé cujéhu ini ñayīví. <sup>29</sup> Súcuan ni sáha ya návāha ni ñin ñayuu ma cūu sátéyí i máá i nuū yā. <sup>30</sup> Te máá ró jíinahan ró chí ni sáha Yaā Dios jeē nduú ró jíin Cristo Jesús. Chí nde nuū maá yá ni canihñ yō jnūhun ndíchí, te ni ndahva yā cuēchi yó, te ni sáha ya jeē iyó ndoo iyó í yō nuū yā, chí ni jnama ya yohó. <sup>31</sup> Te jeē yúcuan na cóo nájñūhun cáhān tutu íi: Núu ñin ñayuu cuní i cutéyí i, te na cutéyí i síquī jeē ni sáha máá Jítoho yō jehé i, áchí.

*Jeē nácani Pablo jnūhun jeē ni jíihī Cristo*

## 2

<sup>1</sup> Te ruhū, hermano, ná ni jeē rí nuū rō jíinahan ró jéé nácani ndaā rí jnūhun Yaā Dios, te tu ní nácani rí jnūhun ndíchí jéé ma jécūhun ni rō. <sup>2</sup> Chí ná ni íyo rí jíin ró te tú na inga jnūhun ní ndúcú rí castūhun rí nuū rō, chí máni máá jnūhun Jesucristo jeē ni jíihī yā jíicā cruz jeē jnáma ya yohó. <sup>3</sup> Te ná ni jíin rí nuū rō jíinahan ró, chí tú na fuerza rí, te yúhú rí, te quísi i ruhū. <sup>4</sup> Te ná ni nacani rí jnūhun nuū rō, chí nasūu jíin jnūhun ndíchí ñayuu ñayīví ní scándije rí rohó, chí sa suhva jíin máá poder Espíritu yā ni steén rí nuū rō jíinahan ró, <sup>5</sup> návāha ma cuíñi ró síquī jnūhun ndíchí cácahān ñayuu, chí cuiñi ró síquī poder Yaā Dios.

*Jíin Espíritu te steén Yaā Dios ndese Yaā cūu ya*

<sup>6</sup> Te ndaā chí ndíchí cácahān rí jíin ñayuu jeē jé ni ije jíin jnūhun cándije i ya. Te nasūu jnūhun ndíchí jéé iyó ini ñayīví yáha, ni nasūu jnūhun ndíchí cácahān tēe cácujeñu ñayīví yáha, chí tēe ún yāha-ni jeē

cácujéhnú de. <sup>7</sup> Chi jnūhun cácahān rī cúu jnūhun ndíchí máá Yaā Dios jeē ní yisāhí. Chi jnūhun ndíchí un jéē ní yisāhí, ní jequín Yaā Dios nde ná tu jecōo ñayīví, návāha cácu yó jéē cótecu yō ní cáni sáha jnūhun ún.

<sup>8</sup> Chi ní ñn tēe cújéhnú nuū ñáyīví yáha, tu ní jécūhun ní de jnūhun ndíchí un. Chi núu ní jecūhun ní de núú, te ma cáhni cuiti de máá Jítóho yō, Yaā cujéhnú luu. <sup>9</sup> Chi cúu nájñūhun cáhán tutu:

Tāca jéē ní sátūhva Yaā Dios jeē cúu ñayuu jeē maní jíin yá,

ni ñn ún tu ní jíto jíinú ñayuu, ni tu ní jíni sōho i,

ni tu ní quíji jeē súcuan caní ní i.

Achí tutu. <sup>10</sup> Te máá yó jíināhan yó chí ní steén Yaā Dios tāca un núu yō jeē jíin Espíritu yā. Chi máá Espíritu jíin váha ya te steén yā ndihí, chí nde ndihí jeē ndíchí gá máá Yaā Dios.

<sup>11</sup> Chi ní ñn ñayuu ma cúu cuni i ndese jéni ní inga ñayuu, chí máá-ni i jíin ánuá i cúu jeē jíiní. Te suni súcuan ní ñn ñayuu tu jíiní i ndese jéni ní Yaā Dios, chí máá-ni Espíritu Yaā Dios cúu jeē jíiní. <sup>12</sup> Te máá yó chí ní nihīn yō Espíritu un jéē véji nuū Yaā Dios, te tu cájeni ní yō nájñūhun cájeni ní ñayuu ñayīví. Te jeē yúcuan cúu jeē cájecūhun ní yō ndese ní sáha Yaā Dios jeē váha yóhó síquī jeē váha ní yā. <sup>13</sup> Te suu síquī tāca jéē yáha cúu jeē cácahān rī, te nasūu jíin jnúhun jeē castéén ñayuu ndíchí, chí jíin jnúhun jeē steén máá Espíritu. Chí castéén rī jnūhun Espíritu nuū ñayuu cánevāha Espíritu.

<sup>14</sup> Te ñayuu ñayīví tu cájetáhú i tāca jnúhun jeē véji nuū Espíritu Yaā Dios, chí cájeni ní i jeē jnúhun cánéé íi cúu. Te ma cúu jecūhun ní i, chí tu cánevāha i máá Espíritu jeē sáha jeē jécūhun ní i. <sup>15</sup> Te ñayuu cánevāha Espíritu, chí cájecūhun ní i ndese íyó ndihí-ni. Te ñayuu ñayīví ma cúu jecūhun ní i ndese ñayuu cácuu

ñayuu ún. <sup>16</sup> Chi suhva cáhán tutu íi: ¿Ndé ñn cuu cuni ndese jéni ní máá Jítóho yō? ¿Te ndé ñn cuu steén nuū yā? Ní ñn ma cúu. Achí tutu. Te vésú súcuan te máá yó chí cájeni ní yō nájñūhun jéni ní Cristo.

*Jeē cáchindéé ñájñáhan de cájéniñu de nuū Yaā Dios*

### 3

<sup>1</sup> Te ruhū, hermano, tu ní cúu cahān rī jíin ró jíināhan ró nájñūhun cáhán rī jíin ñayuu jíca jíin Espíritu. Chí ní cahān rī jíin ró nájñūhun jíin ñayuu cájica jíin modo máá, chí cácuu ró nájñūhun sūchi lúlí jéē ná tu ije ró jíin jnúhun Cristo. <sup>2</sup> Ní steén rī nuū rō jeē tú yí, chí cácuu ró nájñūhun sūchi lúlí jéē jéxin gā. Te tu ní cáhán rī jíin ró jnūhun yí jeē cúu nájñūhun jeē ndáva jeē yéji ñayuu ní ije, chí ná tu canda ró jíin ndé saá. Te ní vijna ná tu canda ró jíin. <sup>3</sup> Chí cájica ga rō jíin modo neé máá ró. Chí cácuuésún ní rō, te cácañáhan ró, te cácusún ní rō. Núu súcuan te cácuu ró nájñūhun ñayuu ñayīví jéē cájica jíin modo neé máá. <sup>4</sup> Chí ñn ró cáhán: Ruhū chí jíin Pablo índichi rī. Te inga rō cahán: Ruhū chí jíin Apolos. Te súcuan cúu jeē cájica ró jíin modo neé máá ró

<sup>5</sup> ¿Te ndé ñn cúu ruhū, te ndé ñn cúu Apolos núu súcuan? Chí máá mozo-ni Yaā Dios cácuu rí, te ní jejniñu ya ruhū návāha candíje ró máá Jítóho yō. Chí ná ñn ná ñn rí ní sáha jniñu ndese ní jēhe máá Jítóho yō nuū rí. <sup>6</sup> Ruhū, nájñūhun ní taji rí jnúhun ya ini anuá rō, te Apolos, nájñūhun ní chuhun de ndute cúu jeē ní steén gā de nuū rō. Te máá Yaā Dios cúu jeē ní scuéhnu jnūhun ini anuá rō. <sup>7</sup> Núu súcuan te tú na vé cúu sáha tēe táji ní tēe chúhun ndute, chí sa suhva máá Yaā Dios cúu jeē scuéhnu. <sup>8</sup> Te tēe táji jíin tēe chúhun ndute, ñn-ni cácuu de. Te tāca de chí cuāha ya yāhu nuū de ndese jniñu ní casáha ñn de. <sup>9</sup> Chí ruhū

jijnáhan ri chi tēe chindéé ñájnáhan cájejniñu nuū Yaā Dios cácuu ri. Te máá ró jijnáhan ró cácuu nájnūhun itu Yaā Dios jeē jícú ya jíin.

Te suni nájnūhun ñin vehe jeē sáha Yaā Dios cácuu ró. <sup>10</sup> Te ruhū chí cúu ri nájnūhun ñin maestro albañil jeē ní jequin rī cimientó vehe ún, cúu jeē ní scándije ri rohó. Te inga de cásama de siquī, cúu jeē castéén gā de nuū rō. Núu súcuan te ná ñin ná ñin de na cóo cuidado de ndese sáma de siquī. <sup>11</sup> Te Jesucristo cúu cimientó vehe ún, te ni ñin ma cúu caquin inga cimientó, chí máá yá cúu jeē ní ndahva cuēchi ró. <sup>12</sup> Te tāca ñáyuu cácan dije, chí sáha i vehe siquī cimientó un, núu jíin ndajniñu vāha nájnūhun oro chí plata chí yúu luu, chí jíin jéē yachí naa, nájnūhun yujnu chí ite chí ndayóhō. <sup>13</sup> Te natūu jniñu un jéē ní sáha ñin ñin i, te suu cúu ndese ni condihvī ní i siquī máá yá. Chí máá quíivī juicio jeē sándaā yā jniñu ñayuu, quíivī ún natūu cáji jniñu i. Chí jíin ñūhūn quiiji quíivī ún, te nájnūhun sáha ñūhūn jeē jéhmú tāca jéē cúu cayū, súcuan coto ndee ya jniñu ñin ñin i. <sup>14</sup> Te núu tú cayū jniñu ní sáha i siquī cimientó un, te nihín i tahū i. <sup>15</sup> Te núu tu ní cóndihvī ní i jíin jniñu ya, te ma nihín i tahū i, chí nájnūhun cayū jniñu i. Te máá i chí cācu ánuá i, vēsú nájnūhun je yajni cayū i nuū yáñūhūn.

<sup>16</sup> ¿A tu cájini rō jeē cácuu ró nájnūhun templo Yaā Dios, chí ndéé Espírítu Yaā Dios ini ánuá rō? <sup>17</sup> Te núu ñin tēe stívi de templo Yaā Dios, te snáhnú ndetū yā tēe ún. Chí ndoo ndasí cúu templo yā, te suu cácuu máá ró.

<sup>18</sup> Ni ñin ró ma stahú ró máá ró jíin jéē jéni ní rō. Núu ñin ñayuu jéni ní i jeē ndichí i jíin jnúhun ñayíiví yáha, vāha ga na siáa i ún, návāha coo ndichí ndije i jíin jnúhun máá yá. <sup>19</sup> Chí jnúhun ndichí jéē iyó ini ñayíiví yáha, jnúhun cánéé íi cúu nuū Yaā Dios. Chí cáhán nuū tútu

ii: Ñayuu ndichí cuenta ñayíiví, chí nájniñi ya i siquī jnúhun ndichí i jeē jési i jnúhun ya, achí. <sup>20</sup> Te cáhán tucu tutu: Máá Jítóho yō jini yā tāca jéē jéni ní ñayuu ndichí, chí máni jeē jéni cāhá ní i, áchí. <sup>21</sup> Núu súcuan te ni ñin ró má cutéyí ró jeē siquī ní ñin tēe ndichí. Chí cuenta máá ró cúu ndihí-ní. <sup>22</sup> Cúu Pablo, cúu Apolos, cúu Pedro jeē castéén nuū rō. Cúu ndihí jeē iyó ini ñayíiví, jeē iyó vijna jíin jéē quíji. Te vēsú núu cotecu rō chí cuu rō, te ndihí-ni chí cuenta máá ró cúu. <sup>23</sup> Te máá ró cácuu cuenta Cristo, te Cristo cúu cuenta Yaā Dios.

*Jeē casájniñu apóstol siquī jnúhun ya*

#### 4

<sup>1</sup> Núu súcuan te na cáni ní rō jijnáhan ró jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisáhi ndé jenahán. <sup>2</sup> Te ndaā chí tēe jeē sájniñu siquī ún, iyó responsable ná ñin ná ñin de jeē squícu vāha de. <sup>3</sup> Te ruhū tu sáha rī cuenta núu cánanducú ró siquī rī ndese sáha rī, chí núu cánanducú ñáyuu cácujuhnu ini ñayíiví. Te ni máá rí tu chíhi rī cuenta siquī máá rí. <sup>4</sup> Chí vēsú jini rī jíin ánuá rī jeē tú na cuēchi rī, te nasūu yúcuan cúu jeē quéndōo ndaā rī, chí máá Jítóho yō cúu jeē jító ndee ruhū. <sup>5</sup> Jeē yúcuan ma nánducú ró siquī jniñu jnáhan ró, chí nde na queé máá quíiví te cuni rō. Chí nde na ndíji máá Jítóho yō te nastūu ndijin yā tāca jniñu jeē yisáhi núu néé, te steén ndijin yā tāca jéē jéni ní ñayuu jíin ánuá i. Yūcuán na te máá Yaā Dios cuajnúhūn yá ná ñin ná ñin i ndese ní casáha i.

<sup>6</sup> Hermano, tāca jnúhun yáha ní cahán rī návāha quéndōo vāha ró jijnáhan ró. Te ni cachi rí jeē máá rí jíin Apolos cácuu rī mozo-ni nuū yā, te súcuan cácuu rī ñin ejemplo nuū rō. Te cáhán rī jeē súcuan



cácuu ri, návāha cutūhva ró cani ni rō maá-ni nájñūhun cáhán tutu ī. Chi ma sandúxí ró jeē cuajñúhún ró ĩn tēe stéén, te inga de tuú. <sup>7</sup> ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núū rō jeē tu ní cácutahū rō nuū yā? Te núu ni cacutahū rō nuū yā, ¿te naun cásatéyí ró maá ró jeē nájñūhun jeē nasūu jéē ní cacutahū rō cúu?

<sup>8</sup> Va je ni cacucúca ró, chi je cánevāha ró ndihi, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cácutéyí ró. Te nacā jeē váha núu jeē cándacu ndije nde ró jniñu núu, návāha suni cuāha ró jñūhun jeē ndacu nde ri jniñu jíin ró jijnáhan ri. <sup>9</sup> Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñūhun tēe núu ga nuū ñáyuu, nájñūhun tēe jeē jé ni cundaā jeē cúu. Te ñí ñáyívi jíin andívi cándēhe váha nuū rī, cúu ndajéhé Yaā Dios jíin ñáyuu. <sup>10</sup> Chi jeē siquí Cristo te cácahān i jeē tēe cánéé cácuu ri. Te tāca róhó va ndíchí ró jíin jñūhun Cristo, cájeni ni rō. Te tāca ruhū chi tu fuerza rī, te róhó va iyó fuerza rō, cájeni ni rō. Te róhó chi cáhiyo yíñúhún ñáyuu nuū rō, te nuū rī chi cásjéē ni i. <sup>11</sup> Ñí véjicoo ri cájī rī sōco te nde vijna. Te cájichī rī ndute, te cúmanī sahma ri, te tu cásaáha vāha ñayuu jíin rí, te ni tu cánevāha ri vehe. <sup>12</sup> Te nīhin cásjjniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. <sup>13</sup> Cácahān neé i siquí rī, te sa cácahān manī rī jíin i. Te cácuu ri nájñūhun yācá ĩni ñayívi, te cásquéhichī i ruhū nde vijna.

<sup>14</sup> Te nasūu jéē tēe ri yāha jéē cúcanu rō, chi sa suhva jeē stihví ni rī rohó, chi cácuu ró nájñūhun sēhe ri chi manī rī jíin rō. <sup>15</sup> Chi vēsú na cóo uxī mil tēe stéén jñūhun Cristo nuū rō, te ĩn-ni tátá rō iyó. Te máá rí cúu nájñūhun tátá rō, chi

ni scandíje ri rohó jéē ní nacani ri jñūhun vāha Cristo Jesús jeē jnáma ya yohó. <sup>16</sup> Núu súcuan te cáhán ndahú rí jíin ró jeē na ndácu ró rúhū jijnáhan rō.

<sup>17</sup> Te jeē yúcuan cúu jeē tají rí Timoteo cuajeē de nuū rō. Chi cúu de nájñūhun sēhe ri jeē maní rī jíin de, te squícu vāha de nuū maá Jítoho yō. Te máá de nacachi tucu de nuū rō ndese jíca ri jeē candíje ri Cristo, jíin ndese stéén rī nuū tāca grupo ñayuu cácañje tāca lado. <sup>18</sup> Te sava ró chi cásatéyí ró maá ró, chi cájeni ni rō jeē ma jéē cuiti gā rī nuū rō. <sup>19</sup> Te tuú chi yachī jeē rī nuū rō te núu súcuan cúní maá Jítoho yō. Yūcuán na te nanducú rí siquí tēe cácutéyí, te ma sáha ri cuenta jñūhun cácahān-ni de, chi sa coto ndee rī de núu cuu squícu nde de. <sup>20</sup> Chi jeē ndácu Yaā Dios jniñu nuū yō, nasūu máá jéē cahán ĩ-ni yó cúu, chi jíni ñúhún condiso poder jñūhun cáhán yō jíin jniñu sáha yō. <sup>21</sup> Núu súcuan ¿te ndese cáculi rō? ¿A jéē cuxeēn rī nuū rō núu na jéē rī, siquí jeē tu cánacani ni rō, chí nacani ni rō te jeē rī jíin jñūhun cúndáhú ni jíin jñūhun vítá ní?

*Jeē sándaā Pablo siquí ĩn cuēchi*

## 5

<sup>1</sup> Te ni nihīn rī jñūhun jeē jíca jnéni ĩn tēe jeē ĩne mēhñu rō, chi ndéca de naná uū de. Te xeēn ndasí sáha tēe ún, chí ni ñayuu jeē tu cájini jñūhun Yaā Dios, tu cásaáha i súcuan. <sup>2</sup> Te vēsú súcuan te cásatéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quēnehen ró tēe sáha cuēchi ún na quēnda de mēhñu rō. <sup>3</sup> Te ruhū, vēsú tu iyó rí jíin ró, te nájñūhun jeē iyó rí jíin ró cúu jeē ñúhún ni rī rohó. Te je ni sándaā rī siquí tēe ni sáha cuēchi ún, chí nájñūhun jeē iyó rí jíin ró cúu. <sup>4</sup> Núu súcuan te na ndútútú ró jijnáhan ró, te máá Jítoho yō Jesucristo coo ya jíin ró. Te

maá rí chi nájnūhun cone ri jín ró, chi ñúhún ni rī rohó. Te poder maá Jitoho yō Jesús suni coo jín ró. <sup>5</sup> Te na chíhi yó tée ún ndaha Satanás, návāha na ndóho yiqui cúñu de, te nacani ni de te cácu ánuá de quivī ndiji Jitoho yō Jesús.

<sup>6</sup> Tuú vāha jeē casátéyí ró maá ró. ¿A tu cájini rō jnūhun cáhán suhva? Vēsú jecu-ni levadura te ndáa ní ñujen sáha, áchí. <sup>7</sup> Núu súcuan te quenehen ró tée un nájnūhun scáne ró levadura jeē ni tíví. Te súcuan te cuu ró nájnūhun pan jeē cúvāha jín ñujen jéé jéé tú na levadura yáhi, jeē cáyeji i vico pascua. Te ndaā jeē súcuan cácuu ró. Chi je ni jihí Cristo jeē ni sócō yā maá yá jehē yō, chi cúu ya nájnūhun londe pascua jeē ni jíhí. <sup>8</sup> Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájnūhun pan jeē tú na levadura yáhi. Te ma sáha yó jniñu néé jín jniñu jnéhén, jeē cúu nájnūhun levadura jeē ni tíví.

<sup>9</sup> Nuū inga carta jeē ní tee ri nuū rō jijnáhan ró ni cahān rī jeē ma quiví nduu rō jín ñáyuu cájica jnéni. <sup>10</sup> Te tu ní cáchi rī jeē ma quínáhan cuiti rō jín ñáyuu tu cácandíje jeē cájica jnéni, jeē ndíyo ni, jeē sácúhna, jeē chíñúhún ídolo. Chi núu súcuan te jini ñúhún jeē quénda ró ini ñayiví núu, chi tuá na inga modo jeē cújiyo ró núu i chí ndéé yó ñayiví jín i. <sup>11</sup> Chi sa suhva ni cachi rī jeē ma quiví nduu rō jín máa ñáyuu jeē cácahān i jeē cúu i hermano, te núu jica jnéni i, chí ndíyo ni i, chí chíñúhún i ídolo, chí chísó jnúhun i siquī jnáhan i, chí nájni i, chí cuíhna i. Te ni ma cáji cuiti rō staā jín ñáyuu casáha súcuan. <sup>12-13</sup> Chi nasúu jniñu ri cúu jeē sándaā rī siquī ñáyuu jeē tu cáhīn jín yó. Yaā Dios cúu jeē sándaā siquī i. Te ñayuu cáhīn jín ró chí cánuú jéé sándaā rō siquī i. Núu súcuan te cánuú jéé quenehen ró tée

ni sáha cuēchi un jéé íne de mēhñu ró, na quénda de.

*Jeē ma cáquin i cuēchi siquī jnáhan i nuū tohó tu cácandíje*

## 6

<sup>1</sup> Te núu jnáhan ró jéé candíje ni sáha cuēchi siquī rō, ¿te naun jéngoo ró jín de nuū tohó jeē tu cácandíje jín yó? ¿Te naun tu casándaā rō nuū jnáhan ró cácandíje Yaā Dios? <sup>2</sup> ¿A tu cájini rō jeē ñáyuu cácandíje Yaā Dios chi ñn quiví te sándaā i jniñu ñayuu ñayiví? Te núu ñn quiví sándaā rō jniñu ñayuu ñayiví, ¿te á má cúu sándaā rō vijna siquī táca cuēchi lúli casáha jnáhan ró? <sup>3</sup> ¿A tu cájini rō jeē ñn quiví te sándaā yō nde jniñu táca ndajéhé andiví? Te nagā ni cuu jniñu ñayiví yáha jeē ma cúu sándaā yō. <sup>4</sup> Núu súcuan te núu jnáhan ró sáha de ñn cuēchi siquī rō, ¿te naun jéngoo ró sa nuū táca tée jeē tu cúu de jnáhan ñayuu cácandíje jeē sándaā de siquī cuēchi ún? <sup>5</sup> Súcuan cáhán rī návāha na cúcanu rō jijnáhan ró. ¿A tu íyó ni ñn tée jécūhun ni mēhñu ró jeē cuu sándaā de siquī rō? <sup>6</sup> Tú vāha jeē ñn hermano caquin cuēchi siquī inga hermano nuū tohó jeē tu cácandíje.

<sup>7</sup> Te jeē cájequin rō cuēchi siquī jnáhan ró, chí jeē castíví í rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? <sup>8</sup> Te tuú chí sa máa ró casáha cuēchi te cáquende ró ndajniñu, te nuū táca hermano rō cúu jeē casáha ró.

<sup>9-10</sup> ¿A tu cájini rō jeē ñáyuu tu íyó ndáa, ma nihín tahú i quiví i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chí ni ñayuu jeē jica jnéni, ni ñayuu chíñúhún ídolo, ni ñayuu casíquí ndéé jnáhan, ni tée sáha ndiyí jín jnáhan yáhi, ni ñayuu cuíhna, ni ñayuu ndíyo ni, ni ñayuu nájni, ni ñayuu chísó jnúhun siquī jnáhan, ni ñayuu stahú jnáhan siquī

xúhun, ma nihín tahu i quivicoo i ñuu nuū ndácu Yaā Dios jniñu. <sup>11</sup> Te súcuan ni candāa sava ró núú, te vijna chi je ni nacate ya rohó, te cáhīyo ndoo cáhīyo iī rō nuū yā. Chi je ni ndahva yā cuēchi ró jēē jīn máá Jítoho yō Jesús jīn Espíritu Yaā Dios.

*Jeē iyó ndoo iyó iyiqui cúñu ñayuu cácadñje*

<sup>12</sup> Te ndaā cúu jeē cácahān jeē ndihī-ni jniñu iyó váha sáha yó núu ndese cúní yō. Te vēsú súcuan te nasūú ndihī sáha jeē quéndō vāha ánuá yō. Ndihi chi cuu sáha yó, te vēsú súcuan te tu iyó váha jeē quiví yó núu jniñu jeē stívī ánuá yō. <sup>13</sup> Te ndaā cúu jeē cácahān jeē ndeyu cúu jeē cúhun chīji, te chīji cúu jeē cúhun ndeyu. Te ñn quiví te tuá coo súcuan, chi naa ndindúú un sáha Yaā Dios. Te nasūu síquī jeē cáca jnéni yó cúu jeē iyó yiqui cúñu yō, chi sa suhva jeē sáha yó jēē cuní máá Jítoho yō. Te Jítoho yō chi ndíto ya yiqui cúñu yō. <sup>14</sup> Te nájnūhun jeē ní nastécu Yaā Dios Jítoho yō, suni súcuan nastécu yā yohó jīn poder yā.

<sup>15</sup> ¿A tu cájini rō jeē yiqui cúñu tācá ñn ñn ró cúu nájnūhun tāca parte yiqui cúñu Cristo? Núu súcuan ¿te á cuu quende yó ñn parte yiqui cúñu Cristo te squijnáhan yó jīn ñn ñahan jíca jnéni? Ma cúu cuiti súcuan. <sup>16</sup> ¿A tu cájini rō jeē tēe quijnáhan jīn ñahan jíca jnéni, ñn na yiqui cúñu ni nduu de jīn ña? Chi cáhán tutu iī: Jeē ndindúú chi ñn na yiqui cúñu cuu, áchí. <sup>17</sup> Te ñayuu jeē quijnáhan jīn máá Jítoho yō, chi suni súcuan ñn na cúu i jīn yá síquī jeē candíje i ya.

<sup>18</sup> Núu súcuan te cunu ró jēē ma quiví ró núu jnúhun jíca jnéni. Chi tāca gá cuēchi jeē sáha ñayuu, chi nasūú yiqui cúñu i stívī i. Te núu jíca jnéni i, te síquī yiqui cúñu i cúu jeē sáha i cuēchi. <sup>19</sup> ¿A tu cájini rō jeē yiqui cúñu rō cúu templo Espíritu

Santo jeē ni jéhe Yaā Dios nuū rō, te ndéé yá ini rō? Te nasūu cuenta maá ró cácuu ró. <sup>20</sup> Chi Yaā Dios yahu ni cuu jeē ni nacuaan ya rohó jijnáhan ró. Te jeē yúcuan cánuú jēē cáca yñúhún ró nuū Yaā Dios jeē sáha ró jniñu váha nde jīn yiqui cúñu rō jīn ini jīn ánuá rō, chi máni cuenta Yaā Dios cúu.

*Jnūhun cástūhun síquī tēe jīn ñasihí*

## 7

<sup>1</sup> Vijna te na cáchi rī síquī tāca jnúhun jeē ní cacajnūhun ró ruhū nuū carta. Jendaá jeē vāha ga quendō ñn tēe núu tú condeca de ñahan. <sup>2</sup> Te síquī jeē iyó jnúhun jnéni, te vāha ga jeē tāca tēe na cóo ñasihí máá de, te suni tācá ñahan coo yīi máá ña. <sup>3</sup> Te yīi na squicu vāha de nuū ñasihí de jeē cúu de yīi ña. Te suni súcuan ñasihí na squicu vāha ña nuū yīi ña. <sup>4</sup> Chi ñasihí chi tu cúu sáha ña jeē cuní ña jīn yiqui cúñu ña, chi suni jeē cuní yīi ña. Te suni súcuan yīi tu cúu sáha de jeē cuní de jīn yiqui cúñu de, chi suni jeē cuní ñasihí de. <sup>5</sup> Te ma sasáhán ró maá ró nuū jnáhan ró. Te núu cácuni rō jeē vihyá gā cacān tahu rō jecu tiempo, te núu cáhīyo conforme ndindúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó síquī jnúhun jnéni.

<sup>6</sup> Te nasūu jēē ndácu ri jniñu jeē cánuú quijnáhan ró, chi jeē jéhe ri jnúhun cúu. <sup>7</sup> Chi nújnahan ni rī jeē tāca tēe na cóo máá ñn-ni de, nájnūhun iyó máá rí. Te sñn sñn ní sáha Yaā Dios jīn ñn ñn de ndese cúu máá de, chi sava de cuu quendō máá ñn-ni de, te inga de chi tuú chi sñn ní sáha ya jīn de.

<sup>8</sup> Núu súcuan te cáhán rī jīn ñayuu cáhīyo máá ñn-ni, jīn ñahan ní caquendō ndáhú, jeē vāha ga te núu quendō máá ñn-ni i, nájnūhun iyó máá rí. <sup>9</sup> Te núu jíní i jeē ma

cánda i quendōo máá ñn-ni i, te na quiñáhan i núu súcuan. Chi vāha ga jeē quiñáhan i vēsú jeē ndúquji i.

<sup>10</sup> Te nuū ñáyuu jeē jé ni quiñáhan chi ndácu ri jniñu jeē ñahan ma ndusñ ña jín yñ ña. Te nasūu rúhū cúu jeē ndácu jniñu, chi máá Jítóho yō. <sup>11</sup> Te núu ñn ñahan ndusñ ña jín yñ ña, te na quéndōo máá ñn-ni ña, chí cuu naquiñáhan ña jín yñ ña. Te yñ suni ma ndusñ de jín ñasihí de.

<sup>12</sup> Te jín sava ga ñayuu chi cahān rī yāha jéē jéni ni maá rí, te nasūu jéē ní cachi máá Jítóho yō cúu. Núu ñn hermano ndéca de ñahan jeē tu cándije, te núu núñahan ni ña condee ña jín de, te ma ndusñ de jín ña. <sup>13</sup> Te núu ñn ñahan ndéca ña tēe jeē tu cándije, te núu núñahan ni de condee de jín ña, te ma ndusñ ña jín de. <sup>14</sup> Chi tēe tu cándije, yñhi cuenta de nuū Yaā Dios siquī jeē ní quiñáhan de jín ñahan cándije. Te ñahan tu cándije, yñhi cuenta ña nuū Yaā Dios siquī jeē ní quiñáhan ña jín tēe cúu hermano cándije. Chi núu tu súcuan te sēhe i ma quñhi cuenta i nuū Yaā Dios, te vijna chi yñhi cuenta i nuū yā. <sup>15</sup> Te yñ chí ñasihí tu cándije, núu fuerza cuní i ndusñ i jín jnáhan i, te na ndusñ i. Chi núu súcuan cuní i, te hermano chí hermana cándije tu cánuú casi i jeē ndusñ jnáhan i jeē tu cándije. Chi ni cana Yaā Dios yohó jéē condee manī yō jín jnáhan yó. <sup>16</sup> Te rōhó jéē cácuu ñasihí, tu cájini rō, sanaa te cándije yñ rō sáha rō, te cácu de. Te suni súcuan rōhó jéē cácuu yñ, tu cájini rō, sanaa te cándije ñasihí rō sáha rō, te cácu ña.

<sup>17</sup> Te ná ñn ná ñn rō na quéndōo rō ndese ni sáha Jítóho yō jeē cúu rō, jín ndese íyó rō ná ni cana ya rohó ní cándije rō. Te súcuan ndácu ri nuū tāca grupo ñayuu cácu cándije. <sup>18</sup> Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu

ní cúu circuncidar, te ma cúu de circuncidar. <sup>19</sup> Chi tú na vé sáha núu cúu yó circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios. <sup>20</sup> Ná ñn ná ñn rō na quéndōo rō ndese íyó rō ná ni cana ya rohó ní cándije rō. <sup>21</sup> Núu mozo jeē ní jeen ñayuu cúu rō ná ni cana ya rohó, te ma cóndihvī ni rō jeē quénda rō. Te núu íyó modo jeē quénda rō nduu libre rō, te íyó vāha jeē sáha rō. <sup>22</sup> Chi tēe cúu mozo jeē ní jeen ñayuu, te núu ni cana Jítóho yō de, te vijna chi ni nduu libre de nuū cuéchi de, jéñiñu de nuū máá Jítóho yō. Te suni súcuan tēe sájniñu cuenta máá, te núu ni cana ya de, te vijna chi ni nduu de mozo jeñiñu nuū Cristo jeē ní nacuaan ya de. <sup>23</sup> Chi yahu ni cuu jeē ní nacuaan Yaā Dios rohó jijnáhan rō, cúu jeē ni jñhī Sēhe ya jehē rō. Núu súcuan te ma cuajniñu rō nuū jniñu cāhá-ni jeē ndácu ñayuu ñayiví. <sup>24</sup> Núu súcuan hermano, ná ñn ná ñn rō na quéndōo rō nuū Yaā Dios ndese íyó rō ná ni cana ya rohó.

<sup>25</sup> Te vijna te siquī ñayuu jeē íyó máá-ni, tú na jñhūn ní ndácu Jítóho yō nuū rī. Te na cáhān rī jeē jéni ni maá rí, chí ni cundáhú ni Jítóho yō ruhū, te ni sáha ya jeē cúu cahān ndaā rī. <sup>26</sup> Jéni ni rī jeē vāha-ni núu quendōo-ni tēe ndese cáhīyo de, jeē siquī jeē íyó jñúndóho tiempo yāha. <sup>27</sup> Núu íyó ñasihí rō, te ma ndusñ rō jín ña. Te núu tu íyó ñasihí rō, te ma nducú rō ña. <sup>28</sup> Te núu quiñáhan rō, te nasūu cuéchi cúu. Te núu quiñáhan sūchi síhí, te suni nasūu cuéchi cúu. Te ñayuu quiñáhan, chí nihñ i jñúndóho ñayiví yāha, te cuní rī jeē ma nihín rō jñúndóho.

<sup>29</sup> Hermano jijnáhan rō, jñhūn jeē cahān rī yāha cúu jeē yachī-ni ndihí tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máá yá vēsú siquī ña. <sup>30</sup> Te

ñayuu jeē ni jīhī jnāhan vehe i, na sāha i nājnūhun jeē tu cúcuíhyá ni i. Te ñayuu cūsī ni, na sāha i nājnūhun jeē tu cūsī ni i. Te ñayuu jéen, na sāha i nājnūhun jeē nasūú ndajníñu i cúu. Ma cuáha i jnūhun jeē cási tācá un jéē ma cúu condíhvī ni i jniñu máá yá. <sup>31</sup> Te ñayuu jeē ní cacondíhvī ni siquī ndajníñu ñayīvī yáha, ma cujnéñu ga i jín. Chi je yajni naa tāca jéē iyó ñayīvī yáha.

<sup>32</sup> Cúni rī jeē ma nácani ndasí ni rō siquī tāca jéē iyó ini ñayīvī. Chi tēe cúu soltero, ndíhvī ni de jniñu máá Jítóho yō, ndese cusī ni Jítóho yō sāha de. <sup>33</sup> Te tēe iyó ñasihí chi ndíhvī ni de jniñu iyó ñayīvī, ndese cusī ni ñasihí de sāha de. <sup>34</sup> Te suni súcuan sīn sīn jéni ni ñahan iyó yī jín ñahan iyó máá. Chi ñahan iyó máá, ndíhvī ni ña jniñu máá Jítóho yō, chi cúni ña jeē coo ndoo coo iī anuá ña jín yiqui cúñu ña cuajníñu ña nuū yā. Te ñahan iyó yī chi ndíhvī ni ña jniñu iyó ñayīvī, ndese cusī ni yī ña sāha ña.

<sup>35</sup> Jeē váha máá ró jijnáhan ró cúu jeē ni cáhān rī súcuan. Chi nasūu jéē nducú rí casi rī jeē quijnáhan ró, chi sa suhva cúni rī jeē caca yīñúhún ró te nune ró cuajníñu cutú ró núu máá Jítóho yō.

<sup>36</sup> Te núu ñn tēe iyó sēhe síhī de, te núu cuayī i, te núu jéni ni de jeē váha ga jeē quijnáhan i, núu súcuan te na sāha de jeē jéni ni de, te cuāha de jnūhun quijnáhan i, chi nasūu cuéchi cúu. <sup>37</sup> Te núu ñn tēe ni cundaā ni de jeē cóndee sēhe síhī de súcuan-ni, jeē ma cuáha de i vēsú fuerza jícán ñayuu i, núu súcuan te cuu quendōo i nājnūhun cúni de, chi jeē váha sāha de. <sup>38</sup> Núu súcuan te tēe jéhe jnūhun quijnáhan i, váha sāha de. Te tēe tu jéhe jnūhun, chi váha ga sāha de.

<sup>39</sup> Te ñahan ní quijnáhan, chi yīhī ña ndaha yī ña níní jeē técu de. Te núu je ni jihī yī ña, yūcuán na te je ni cuu libre ña jeē quijnáhan tucu

ñā jín na-ni tēe cúu ni ña, te núu tēe cándíje nuū Jítóho yō cúu de. <sup>40</sup> Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jín Espíritu Yaā Dios cúu jeē cahán rī.

*Siquī cúñu ni sócō nuū ídolo*

## 8

<sup>1</sup> Te vijna te na cáchi rī siquī cúñu ni sócō nuū ídolo. Ndaā chí tāca yó jéni ni yō jeē máá yó cúu jeē jíní ndese cúu. Te tāca jéē jíní yō ún, chi ndúcú sāha jeē cundúxí yó. Te sa suhva jeē cundáhú ni yō jnāhan yó, sāha un jéē íje i jín jnúhun ya. <sup>2</sup> Núu na-ni ñayuu jéni ni i jeē jíní váha i, te tuú chí ná tu cuni cuiti i nājnūhun cánuú cuni i. <sup>3</sup> Te sa suhva ñayuu jeē maní i jín Yaā Dios, máá i cúu jeē jetáhú yá.

<sup>4</sup> Núu súcuan te na cástūhun rí siquī cúñu jeē ní casocō ñayuu nuū ídolo. Ndaā chí jíní yō jeē tāca ídolo ñayīvī, tú ndaā cuiti. Te tú na inga yaā iyó, chí máá ñn-ni Yaā Dios. <sup>5</sup> Te ñayuu chí cájeni ni i jeē iyó tāca yāá ini andíví jín ñayīvī, chí cácahan i jeē iyó ndije cuehē yaā i jín jítóho i. <sup>6</sup> Te nuū máá yó chí ñn-ni Yaā iyó, jeē cúu Tátá yō Yaā Dios. Te máá yá ni sāha tāca jéē iyó, te cuenta máá yá cúu yó jijnáhan yó. Te suni iyó ñn-ni Jítóho yō Jesucristo, te nde nuū máá yá vēji tāca jéē iyó, te suni máá yá ni sāha yóhó.

<sup>7</sup> Te ñayuu cácañíje, chí tú ndíhi i jín jnūhun yáha. Chí sava i ni cacāan i ni chíñúhún i ídolo nde ná tu candíje i. Te nde vijna núu cáyeji i cúñu ún te sāha i cuenta jeē ni sócō nuū ídolo cúu. Te siquī jeē ná tu ije i jín jnúhun Yaā Dios, te jéni ni i jeē cujnéhén ánuá i sāha cúñu jeē ni sócō nuū ídolo ún. <sup>8</sup> Te ndaā chí nasūu jéē yéji yō cúu jeē sāha jeē cuatáhú Yaā Dios yohó. Chí núu yéji yō, nasūu yúcuán sāha jeē quéndōo váha ga yō nuū Yaā Dios. Te núu tu yéji yō, ni tu sāha jeē quéndōo ndáhú gá yō nuū yā. <sup>9</sup> Te vēsú tú

ni ñn jési jeē ma cúu caji rō cūñu ún, te coto ró jnánan ró jée ná tu ije jíin jnúhun ya, te ma sáha ró jée suni caji i jeē jéni ni i jeē cuēchi cúu. <sup>10</sup>Váha ga ma cáji rō núu súcuan, chi sanaa te hermano rō jeē ná tu ije jíin jnúhun ya, coto de rōhó jée yéji rō ini vehe ídolo, chi jíni váha ró jée tú na vé sáha. Te súcuan te sáha ró jée cájni ni de jeē suni caji maá de cūñu jeē ni sócō nuū ídolo, vēsú jéni ni de jeē cuēchi cúu. <sup>11</sup>Te súcuan stívi ró anuá hermano rō jeē ná tu ije jíin jnúhun ya, vēsú jíni váha máá ró jeē tú na vé sáha jeē cáji rō. Te tú váha sáha ró, chi suni jehē maá de ni jihí Cristo. <sup>12</sup>Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuēchi. <sup>13</sup>Núu súcuan te núu cūñu un sáha jeē quívi hermano rī cuēchi, te ma cáji cuíti ga rī cūñu ún, návāha ma sáha ri jeē quívi de cuēchi.

*Siquī jeē iyó derecho tē cácuu apóstol*

## 9

<sup>1</sup>Te máá rí chi jíca libre rī, te iyó derecho rī siquī jeē cúu rī apóstol, tēe ni tají yá scáca jnúhun ya. Chi ni jito rī nuū maá Jítoho yō Jesús, te máá ró jijnáhan ró cácuu jniñu jeē ni sáha rī jeē ni squívi rī rohó ndaha Jítoho yō. <sup>2</sup>Te núu sava ga ñayuu tu jétáhú i jeē cúu rī apóstol, te nuū maá ró chi suu cúu ndije rī. Chi siquī jeē ní scandíje rī rohó jíjnáhan ró, te jeē yúcuan cácuu ró prueba jeē steén jeē ndíso jniñu rī cúu rī apóstol nuū maá Jítoho yō.

<sup>3</sup>Te jnúhun yáha cáhán rī jehē maá rí nuū ñayuu cácahán siquī rī. <sup>4</sup>Achí rí: Iyó derecho rī caji rī coho rī jeē cájēhe ñayuu núu cúní rī. <sup>5</sup>Te suni iyó derecho rī núu jeē cuní rī condeca rī ñn hermana candíje cuu ñasíhí rí, caca ña jíin rí, nájnúhun iyó ñasíhí Pedro jíin táca gá apóstol jíin tēe cácuu ñani maá Jítoho yō.

<sup>6</sup>¿Chí cájeni ni rō jeē maá rúhū-ni jíin Bernabé tú na derecho rī jeē stóo rī jniñu cása ha rī jeē cótecu rī, návāha nune ga rī nacani rī jnúhun váha ya, chí naún? <sup>7</sup>¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tí? Tú cuíti. ¿Te á suni tu iyó derecho rī cótecu rī siquī jnúhun ya naún? <sup>8</sup>Te ma cáni ni rō jeē táca jée cahán rī yāhá, máni máá jée cácahán ñayuu ñayívi cúu. Chi nde maá ley yā jeē ni jéhe ya nuū Moisés, cáhán súcuan. <sup>9</sup>Chí cáhán nuū tútu ley yā: Ma chúhun ró ñunu yuhu stíquī, quíti jéxín trigo, achí. Te ndaá chi nasūu máni siquī stíquī cúu jeē ní cáhán yā súcuan. <sup>10</sup>Chi suni siquī maá yó ní cahán yā. Chi ley un ní jéhe ya jeē váha máá yó, chí steén jeē tēe jítu jíin tēe jéxín trigo cánuú jeē nihín de sava un quívi ndutútú. <sup>11</sup>Te suni súcuan ruhū jijnáhan rī jeē ní cataji rī jnúhun Espíritu ini anuá rō, ¿te á véyi cúu jíin ró núu nastútú rī jeē cótecu rī nuū rō? <sup>12</sup>Te núu sava ga tēe cásteén nuū rō, iyó derecho de cacān de nuū rō, te nagā ni cuu ruhū jijnáhan rī jeē ma cóo derecho rī cacān rī.

Te tu ní cájicān rī derecho un, chí sa suhva ni jendeyí ni rī coto máá rí jeē cáji rī, návāha ma cási rī jeē cáca jnúhun váha Cristo. <sup>13</sup>Te cájini rō jeē sutū ní cajejníñu ini templo, ní cacotecu de siquī jeē ní casocō ñayuu ini templo. Chi sutū ní cajejníñu nuū altar nuū ní casocō i quíti, suni ni cayeji de sava quíti ún. <sup>14</sup>Te suni súcuan ni ndacu máá Jítoho yō jniñu jeē tēe cánacani jnúhun jeē jnáma ya yohó, siquī jniñu un níhín de jeē cótecu de. <sup>15</sup>Te ruhū tu ní jícan cuíti rī derecho rī yāhá, te suni nasūu jée tēe rī jnúhun yáha návāha cuāha ró nuū rī jijnáhan ró. Chi jéni ni rī jeē váha ga núu na cúu rī nasūu jée quíhin rī jeē

cuáha ró, chi casi jeē cúsġ ni rġ scáca ri jnūhun ya súcuan-ni.

<sup>16</sup> Te tú vāha núu sátéyí rġ maá rġ siquġ jeē nácani ri jnūhun jeē jnáma ya yohó. Chi ĩn jeē ní tejniñu ya ruhū cúu, te cánuú squícu rġ. Chi nacā ndahú cúu rġ te núu tú nacani ri jnūhun ya. <sup>17</sup> Te núu jeē cúu ni maá rġ sáha ri nuú, yūcuán na te cuu cacān rġ yāhu rġ. Te tuú chi cánuú sáha rġ, chi máá Yaā Dios ni tee ya jniñu siquġ rġ. <sup>18</sup> Núu súcuan te yāhu rġ cúu jeē cúsġ ni rġ jeē súcuan-ni nácani ri jnūhun jeē jnáma ya yohó, te tu jícán rġ derecho rġ jeē cotecu rġ siquġ jeē nácani ri jnūhun ya.

<sup>19</sup> Chi vēsú tú ni ĩn ñayuu ndácu jniñu nuū rġ, te ni sáha ri maá rġ mozo nuū tācá i jeē nácani ri jnūhun nuū i, návāha nihġn rġ cuehē i candġje i Cristo. <sup>20</sup> Núu ĩne ri jġn jnáhan ri hebreo te sáha ri nájnūhun cásáha i, návāha cuu scándġje ri i. Chi násáha ri maá rġ nájnūhun tēe cáyġhi chġji ley Moisés, návāha cuu scándġje ri i jeē cáyġhi i chġji ley un, vēsú tuá yġhi ri chġji ley un. <sup>21</sup> Te suni násáha ri maá rġ nájnūhun ñayuu tu cáyġhi chġji ley Moisés, návāha cuu scándġje ri ñayuu ún. Te vēsú súcuan te yġhi ri chġji ley Yaā Dios, chi suu cúu ley Cristo jeē squícu rġ. <sup>22</sup> Te núu ĩne ri jġn ñayuu jeē ná tu ije jġn jnūhun ya, te sáha ri maá rġ nájnūhun jeē ná tu ije ri jġn jnūhun ya, návāha cuu scándġje ga rġ i. Núu súcuan te násáha ri maá rġ núu ndese cándāa tāca ñayuu, návāha tācá-ni modo un te cuu scándġje ri sava i. <sup>23</sup> Tāca yáha sáha ri jeē siquġ jnūhun jeē jnáma ya yohó, návāha suni nihġn rġ tahū jeē ndġso jnūhun ya.

<sup>24</sup> Je cájini rō jeē tēe cájġnu car-rera, jendaá chi ndġhi de cájġnu, te ĩn-ni de cūndeyġ nihġn premio. Te suni súcuan nducú ndéyġ máá ró squícu ró, návāha nihġn rō premio nuū yā. <sup>25</sup> Te tāca tēe cúnġ cundeyġ siquġ ĩn deporte, chi cáscuáha de te

cándito de máá de. Súcuan cásáha de návāha nihġn de ĩn premio jeē cúu corona ndaha yújnu jeē náa yachġ. Te máá yó chi sa suhva cánducú ndéyġ yó návāha nihġn yō ĩn premio jeē ma náa cuiti. <sup>26</sup> Te máá rġ suni nducú ndéyġ rġ nájnūhun tēe cájġnu, te tu nducú ndéyġ cáha rġ. Te sáha ri nájnūhun tēe cácajnáhan juego jeē tu jēhe iyú de, chi quēe jniñu sáha rġ. <sup>27</sup> Chi sa suhva stóho ri yġqui cúñu rġ, te stġhvġ ni rġ maá rġ squícu rġ. Chi vēsú ni stġhvġ ni rġ ĩnga ñayuu jeē nducú ndéyġ i, te núu tu nducú ndéyġ máá rġ te snáa rġ premio rġ.

*Siquġ jeē ma chiñúhún i ídolo*

## 10

<sup>1</sup> Hermano jijnáhan ró, cúnġ rġ jeē na jécūhun ni rō ndese ni cajica jġ yō jenahán. Chi ndġhi de ni cajica chġji vicō jeē ni stēen ichi nuū de, te ndġhi de ni cayāha mēhñú ndute Mar Rojo jeē ní cusġn, ni nune ichi. <sup>2</sup> Súcuan cúu jeē ní canduu ĩnuú ndġhi i jġn Moisés, chi ni candiquġn i de chġji vicō jġn méhñu mar. <sup>3</sup> Te ndġhi i chi ĩnuú-ni ni cayejġ i alimento jeē ni jēhe máá Espġritu. <sup>4</sup> Te suni ndġhi i ni cajġhi ndute jeē ni jēhe Espġritu. Chi ni cajġhi i ndute jeē ní cane jġcá cáva nuū ní cajica cuu i. Te Cristo cúu nájnūhun cava un jēe jēhe ya ndute cotecu yō ñġ cáni. <sup>5</sup> Te vēsú súcuan te cuehē i ni cunġhni ni i, te tu ní cúsġ ni Yaā Dios jġn i, te jeē yúcuan ní cajġhġ i nuū ñūhun tēhé.

<sup>6</sup> Te tāca jēe ní cuu ún, ĩn ejemplo cúu nuū yō, návāha ma ndġyo ní yō tāca jēe neé, nájnūhun ni candġyo ni ñayuu ún. <sup>7</sup> Te ma chiñúhún ró ídolo, nájnūhun ni casáha sava i. Chi súcuan cáhán nuū tútu ĩ: Ni cacucō ñayuu ún, ni cayejġ i ni cajġhi i vico ídolo, te ni ndocuiñġ i ni cajġta jéhé i, áchġ. <sup>8</sup> Te ni ma cáca jnéni ró nájnūhun ni casáha sava i, te ni cajġhġ ocō unġ mil i jeē ĩn quivġ-ni. <sup>9</sup> Te ni ma sáha ró jniñu jeē squitġ ni rō jġtoho yō, nájnūhun

ni casáha sava i, te ni cajihī i jeē ní catuu coō i, ni sáha ya. <sup>10</sup> Te ni ma cahán sōō ró siquī Yaā Dios, nájñūhun ni cacahān sōō sava i, te ni cajihī i jeē ní jehni ndajéhé yā i.

<sup>11</sup> Te tāca jéē ní cuu ún, chi ñin ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quívi cuándihī ñayívi. <sup>12</sup> Núu súcuan te róhó jéē cájeni ni rō jeē cáhīn nīhin ró jéē ma sáha ró cuéchi, coto má quívi ró cuéchi. <sup>13</sup> Chi máni iyó jéē nducú squívi róhó cuéchi, te ñnuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jñūhun jeē vihyá gá coto ndee jexeén róhó vésú jeē cúu cundeyí ró jíin. Chi sa suhva núu vēji jeē nducú squívi róhó cuéchi, te chindéé ñáhán yá rohó quenda ró te cundeyí ró siquī.

<sup>14</sup> Ñānī mánī, ma chiñúhún cuiti rō ídolo núu súcuan. <sup>15</sup> Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jñūhun cáhán rī. <sup>16</sup> Máá copa iī jeē cájicān tahu yō jehē, suu cájihī cáhu yó jéē steén yō jeē ñnuú cúu ndihī yó, chí ni jeti niñī Cristo jeē siquī yō ná ni jihī yā jicā cruz. Te pan jeē sacuéchí yó cáyeji cáhu yó, steén jeē ñnuú cúu ndihī yó siquī jeē ni jéhe Cristo yiqui cúhu yā ni jihī yā jehē yō. <sup>17</sup> Te vésú cuehē yō iyó, te ñin-ni ñayuu cácuu yó, chí ñin-ni pan un cáyeji cáhu yó siquī jeē cácandíje yó.

<sup>18</sup> Condēhe ró ndese casáha ñayuu Israel. Tāca tée jeē yéji quiti jeē ni sócō nuū yā, chí ñnuú-ni cúu ndihī de siquī jeē cáyeji de jeē ni sócō ún. <sup>19</sup> Núu súcuan te cáhán rī jeē tu ndé jéjníñu ídolo, ni tu jéjníñu cúñu jeē ni sócō nuū ídolo, chí ñnuú cúu jíin táca gá cúñu. <sup>20</sup> Te suni cáhán rī jeē ñayuu tu cájini jñūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī. <sup>21</sup> Ma cúu coho ró copa maá Jítóho yō te

núu cájihī ró jéē ni sócō nuū tachī. Te ma cúu caji rō nuū mesa Jítóho yō te núu cáyeji rō jeē ni sócō nuū tachī. <sup>22</sup> Ma quívi nde nuu yó súcuan jíin táchī, návāha ma cucuíñī Jítóho yō jíin yó. ¿Chí téyí gá maá yó vésú maá yá jeē ma cúu stóho ya yohó, cájeni ni rō, chí naún?

*Ndihī chí sáha yó jíin jñūhun cúndáhú ni*

<sup>23</sup> Te ndaā cúu jeē cácahān jeē ndihī-ni jñiñu iyó váha sáha yó núu ndese cúní yō. Te tuú chí nasūu ndihī sáha jeē quéndōo vāha ánuá yō. Ndihī chí cuu sáha yó, te vésú súcuan te nasūu ndihī sáha jeē ije jñáhan yó jíin jñūhun ya. <sup>24</sup> Chi cánuú sáha yó jéē váha jñáhan yó, nasūu máni máá jéē váha máá yó.

<sup>25</sup> Cuu caji rō ndihī-ni cúñu cúyāhu nuū yáhu, te ma cájñūhun ró ni ma cáni ni rō núu jeē ni sócō nuū ídolo cúu. <sup>26</sup> Chi cuenta maá Jítóho yó cúu ñayívi jíin ndivii jeē iyó ini, te cuu cuajníñu yó.

<sup>27</sup> Te núu ñin tēe tu cándíje, cana de róhó caji rō jíin de, te núu cácuu rō quihīn rō, núu súcuan te caji rō tāca jéē cáni de nuū rō. Te ma cájñūhun ró ni ma cáni ni rō núu jeē ni sócō nuū ídolo cúu. <sup>28</sup> Te núu cachī ñin i nuū rō jeē cúñu ni sócō nuū ídolo cúu, yūcuán na te ma cáji rō, chí siquī jeē jéni ni i jeē cuéchi cúu, te tu cúní rō sáha ró jéē quívi i cuéchi. <sup>29</sup> Te súcuan cáhán rī siquī jeē inga i cájeni ni i jeē cuéchi cúu, te nasūu jéē súcuan cájeni ni maá ró.

Te sanaa te cahān ñin ró: ¿A tu iyó libre rī caji rī jeē cuní maá rí, vésú cájeni ni inga i jeē cuéchi cúu?

<sup>30</sup> ¿Te núu nácuatáhú rí nuū Yaā Dios te yéji rī, te najehē cacahān i siquī rī jeē yéji rī? achi rō. <sup>31</sup> Tuú chí ndihī jeē sáha ró, vésú jeē caji rō chí jéē coho ró, chí na-ni jñiñu sáha ró, ndihī na sáha yíñúhún ró jíin Yaā Dios, návāha cuní ñayuu jeē luu cújéhu ya. <sup>32</sup> Te ma sáha ró jñiñu jeē squívi ró ñayuu nuū



cuéchi, cúu ñayuu hebreo, cúu ñayuu táca nación jeē tu jíní jñūhun ya, cúu ñayuu cácanđeje Yaā Dios. <sup>33</sup> Te ruhū chi ndúcú rí jeē na cúsi ni táca ñayuu jíní táca jniñu sáha ri. Tu ndúcú rí jeē váha máa-ni ri, chi sa ndúcú rí sáha ri jeē váha cuehē ñayuu, návāha cácu i.

## 11

<sup>1</sup> Te na ndácu ró rúhū jijnáhan ró, nájñūhun ndácu máa rí Cristo.

*Siqui ndese cánuú sáha ñahan cándutútú*

<sup>2</sup> Vāha cásáha ró, hermano, jeē niní cánucūhun ni rō ruhū, te cándihvī ni rō jíní táca jniñu jeē ni steén rī nuū rō. <sup>3</sup> Te cúní rī jeē na jécūhun ni rō jeē Cristo cúnuú yá nuū táca té. Te tēe cúnuú de nuū ñasihí de. Te Yaā Dios cúnuú yá nuū Cristo. <sup>4</sup> Núu ññ tēe ñūhun de lélu te jícán tahu de chí nácani de jñūhun nuū ndutútú ñayuu cácanđeje, núu súcuan te jéhe de jñūhun canu máa de. <sup>5</sup> Te sa núu ññ ñahan tu ndési xinī ña te jícán tahu ña chí nácani ña jñūhun, núu súcuan te jéhe ña jñūhun canu máa ña, chí ññ-ní cúu un núu ní sáte xinī ña. <sup>6</sup> Chí núu tú casi ña xinī ña, váha ga na sáte ña ixi ña núu súcuan. Te núu cúcanu ña jeē sáte ña ixi ña chí jé sáte li ña, te na cási ña núu súcuan. <sup>7</sup> Te tēe chí ma cási de xinī de, chí máa de cúu muestra jeē steén ndese cúu Yaā Dios jeē cujéhu ya. Te ñahan chí stéén ña jeē cujéhu tēe. <sup>8</sup> Chí ná ni sáha ya tēe, te nasūu jíní yiqui ñahan ni sáha ya, chí sa suhva jíní yiqui té ni sáha ya ñahan. <sup>9</sup> Te ñahan chí ni cuvāha ña jeē siquí té, nasūu té jeē siquí ñahan. <sup>10</sup> Te jeē yúcan cánuú jéé cóndesi xinī ñahan, te suu stéén jeē cujéhu tēe, chí suni cándehé ndajehé yā ndese sáha ña. <sup>11</sup> Te vésú súcuan te yóhó jéé candíje yó, chí jíní yō jeē tu iyó tée núu jeē tu iyó ñahan, te tu iyó ñahan núu jeē tu iyó té. <sup>12</sup> Chí vésú ni sáha ya ñahan jíní yiqui té, te vijna cácu tēe chíji

ñahan, te máa Yaā Dios cúu jeē sáha táca-ni.

<sup>13</sup> Na sáha máa ró cuenta ¿á iyó váha núu tu ndési xinī ñahan te jícán tahu ña nuū Yaā Dios? <sup>14</sup> Chí sáha yó cuenta jeē ini ñayivi yáha, núu cáni ixi tēe te cúcanu de sáha. <sup>15</sup> Te ñahan chí sa váha jito ña te núu cáni ixi ña, chí suu ni jéhe ya jeē cóndesi xinī ña. <sup>16</sup> Te núu ndé ññ ñayuu cuní i cahān i siquí jñūhun yáha, te ruhū jíní táca grupo ñayuu cácanđeje nuū Yaā Dios, tú na inga costumbre jejnūhún rí siquí jñūhun yáha.

*Jeē castívi i siquí Cena Jitoho yō*

<sup>17</sup> Te iyó inga jñūhun cánuú cahān rī jíní ró, chí tu cúu cahān rī jeē váha cásáha ró. Chí nuū cándutútú ró te tu sáha jeē quéndō váha ga rō, chí sa jeē castívi ró. <sup>18</sup> Xihna jñūhun yáha cáhān rī, jeē nihín rī jñūhun jeē nuū cándutútú ró te cácusñ ni rō, Te jéni ni rī jeē ndaā cúu. <sup>19</sup> Chí níní coo sava ró jéé cusñ ni, návāha natūu ndé-ni cúu jeē cácanđeje váha mēhñu ró. <sup>20</sup> Te jeē cácusñ ró súcuan nuū cándutútú ró, te nasūu cena máa Jitoho yō cúu jeē cáyeji rō núu súcuan. <sup>21</sup> Chí núu cáyeji rō, te táca ññ ññ ró cúní caji xihna gā vésú jñāhan ró. Te súcuan te sava ró tu cániñ, te caji sōco, te sava ró cánejini jeē cájihi cuehē. <sup>22</sup> ¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu iyó yíñuhún ró ini vehe nuū cándutútú ñayuu cácanđeje Yaā Dios, chí cásáha ró jéé cáccuanu ñayuu jeē tú na vé névāha. ¿Ndesi cahān rī jíní ró núu súcuan? ¿A cáhān rī jeē váha cásáha ró? Tuú chí nasūu jéé váha cúu jeē casáha ró súcuan.

*Siquí jeē ní jequin Jitoho yō Cena yā*

(Mt. 26.26-29; Mr. 14.22-25; Lc. 22.14-20)

<sup>23</sup> Chí jñūhun yáha jéé ní nastéén rī nuū rō, chí nuū máa Jitoho yō ni nihín rī: Jeē máa jecuāa jeē ní

nastúu de Jitoho yō Jesús, te ni quihin ya pan. <sup>24</sup> Te ni nacuatáhú yá, te ni tahú cuéchi yá, te ni cahān yā jín tée cáscuáha jín yá: Quihin te caji rō jijnáhan rō, chí yāha cúu yiqui cúñu rī jeē ni sócō rī jeē siquī rō. Te níní caji rō súcuan jeē cáñuhun ni rō ruhū jeē ni jīhī rī jehē rō. Achí yá. <sup>25</sup> Te suni súcuan ni quihin ya copa ná ni cuu ni cuxíni ya jín de, te ni cahān yā: Jeē ñúhun copa yáha cúu ñíñī rī jeē sácútu contrato jeē jeē jnáma rī ñayuu. Te táca jínu jeē cájihi rō, te nucūhun ni rō ruhū. Achí yá. <sup>26</sup> Chí táca jínu jeē cáyeji rō pan un te cájihi rō copa un, súcuan cástéén rō jeē ni jīhī Jitoho yō jehē yō. Te súcuan na sáha rō ndé quiwī ndíji ya.

#### *Ndese caji yíñúhún i Cena yā*

<sup>27</sup> Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu iyó yíñúhún i siquī yiqui cúñu maá Jitoho yō jín síquī ñíñī yā. <sup>28</sup> Núu súcuan te coto ndee rō maá rō núu iyó ndoo ánuá rō jeē tú cuéchi rō. Te sáa te cuu caji rō pan un te coho rō copa un. <sup>29</sup> Chí núu ññayuu tu yéji tu jíhi yíñúhún i te tu núcūhun ni i jeē yiqui cúñu yā cúu, ññayuu ún chí ñíhīn i castigo núu na cáji i coho i. <sup>30</sup> Jeē yúcuan cúu jeē iyó cuéhē ñayuu cácuñu jín jéé ní cacuxíí, cáhīyo mēhñu rō. Te sava i je ni cajiñī. <sup>31</sup> Te núu coto ndee yō maá yō nde ná tu caji yō, te Jitoho yō ma cuáha ya castigo yohó. <sup>32</sup> Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jín ñayuu ñayíwí.

<sup>33</sup> Nánī mánī, núu súcuan te jeē cándutútú rō jeē cáji rō Cena yā, te condetu rō te caji inuú rō. <sup>34</sup> Te núu ññayuu jíí i sōco, te xihna gā na cáji i vehe i návāha ma stívi i nuū cándutútú rō. Te súcuan te ma cuáha ya castigo i. Te quiwī jécondēhe rī rohó te cachi rī ndese coo sava ga jniñu.

#### *Siquī táca táhū jeē jéhe Espíritu*

## 12

<sup>1</sup> Hermano, cúní rī jeē na jécūhun ni rō siquī táca táhū jeē jéhe Espíritu nuū yō, suu táca modo jejníñu ñññ yó núu Yaā Dios.

<sup>2</sup> Te cájini rō jeē ná ni cuu rō ñayuu ná tu candíje, te ni cacondihvī ni rō ni cachiñúhún rō ídolo ñíhín. <sup>3</sup> Te vijna te na jécūhun ni rō jeē núu ndé ñayuu cahán ndevāha i siquī Jesús, te nasūu jín poder Espíritu Yaā Dios cúu jeē cahán i súcuan. Te ni ñññ i ma cúu cahán i jeē Jitoho i cúu Jesús, te núu tu ndéé poder Espíritu Santo ini i.

<sup>4</sup> Te sññ sññ tahū jéhe ya jeē cuajniñu ñññ yó núu yā, te ñññ-ni máá Espíritu cúu jeē jéhe. <sup>5</sup> Te sññ sññ jéjníñu yó, te nuū maá ñññ-ni Jitoho yō jejníñu yó. <sup>6</sup> Te sññ sññ modo sáha yō jniñu ya, te ñññ-ni Yaā Dios cúu jeē sáha jniñu un jín yó. <sup>7</sup> Te nuū ná ñññ ná ñññ yó ní jéhe Yaā Dios tahū jeē sáha Espíritu yā jín yó, návāha na sáha yó jéé ije jnánhan yó jín jnúhun ya. <sup>8</sup> Chí sava yó ní canihín tahū jeē ndichí cáhán yō jnúhun ya, sáha máá Espíritu. Te sava ga yō ni canihín yō jeē cúu jécūhun vāha ni yō te castūhun yó, te suni máá Espíritu sáha. <sup>9</sup> Te nuū sava ga yō ni jéhe ya tahū jeē cúu cándíje ñíhín yó jéé sáha ya jeē jicán yō, te sava ga yō cúu sáha yó jéé ndúvāha ñayuu cácuñu, te suni máá Espíritu sáha. <sup>10</sup> Te sava ga yō cúu sáha jniñu jéñu jín fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō táca jnúhun, núu vēji nuū Espíritu yā chí tuú. Te sava ga yō ni ñíhín tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnánhan yó jín inga yuhu ún. <sup>11</sup> Te táca táhū yáha, chí ñññ-ni máá Espíritu sája, te sññ sññ jéhe ya nuū ñññ yó, ndese núnjahan ni maá yá.

*Ndihí yó cúu nájñūhun ñn na yiqui cúñu*

<sup>12</sup> Chi nájñūhun ñn yiqui cúñu iyó cuéhē parte, súcuan cúu yó jíñ Cristo jeē cúu yó nájñūhun yiqui cúñu yā, chi ñn na cúu yó jíñ yā. Te vēsú cuehē parte cácuu yó te ñn-ni cúu yó, nájñūhun ñn yiqui cúñu jeē iyó cuéhē parte. <sup>13</sup> Chi ñn na ni canduu yó jíñ yā ni sáha ñn-ni máá Espiritu ná ni cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñayuu chí tēe sájñiñu cuenta maá. Te ndihí yó chí ñn-ni Espiritu ni canihñ yō.

<sup>14</sup> Te ñn yiqui cúñu chí nasū ñn-ni parte cúu, chí sa cuehē parte cúu. <sup>15</sup> Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín. <sup>16</sup> Te núu sōho cahān: Nasūu cuenta yiqui cúñu cúu ri, chí nasūu tinūu cúu ri, te tuú chí parte yiqui cúñu cúu nahín. <sup>17</sup> Núu ní yiqui cúñu yō cúu tinūú, ¿te ndese cuni sōho yó núu súcuan? Te núu ní yiqui cúñu yō cúu sōho, ¿te ndese cuaan yó xicō núu súcuan? <sup>18</sup> Te Yaā Dios ni chujnáhan ya ñn ñn parte yiqui cúñu, nájñūhun cúni yā jeē coo. <sup>19</sup> Chi núu ñn-ni parte cúu ndihí, te nasūú ñn ní yiqui cúñu cúu núu súcuan. <sup>20</sup> Te tuú chí cuehē parte iyó, te ñn-ni yiqui cúñu cúu.

<sup>21</sup> Te ni ma cúu cahān tinūu jíñ ndaha: Tu jíni ñúhún rí rohó. Te ni xinī ma cúu cahān jíñ jéhē: Tu jíni ñúhún rí rohó. <sup>22</sup> Chi sa suhva táca parte yiqui cúñu jeē jéni ni yō jeē núu ga fuerza, suu cúu jeē cánuú gá. <sup>23</sup> Te táca parte yiqui cúñu jeē jéni ni yō jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yō. <sup>24</sup> Chi parte jeē lúu cáa, tu cánuú jēe condihyū. Chi súcuan ni chujnáhan Yaā Dios yiqui cúñu, jeē yucún gá ndíto yó jēe tu cáa luu. <sup>25</sup> Súcuan ni sáha ya nāvāha ma cusñ táca parte yiqui cúñu, chí sa

chindéé ñájñáhan vāha jíñ jnáhan. <sup>26</sup> Te núu jétú ñn parte yiqui cúñu, te suni ní cáhu-ni jétú. Te núu ñn parte ndíto yúcún yó, te suni ndihí-ni parte yéúndō vāha.

<sup>27</sup> Te róho jíñáhan ró chí nájñūhun yiqui cúñu Cristo cácuu ró, chí ñn na cúu yó jíñ yā. Te ná ñn ná ñn ró cúu ñn ñn parte yā. <sup>28</sup> Núu súcuan te sñn sñn jñiñu ni jēhe Yaā Dios nuū táca ñáyuu cácañdije jeē cácuu i nájñūhun ñn ñn parte yā: Te suu ñn parte yā cúu táca apóstol jeē ní jeni ya xñhna gā jeē scāca de jñūhun ya. Yūcuán na te jeē uú, tēe cáncani jñūhun ya, te jeē uní, tēe cástéén. Yūcuán na te ñayuu casáha jñiñu jéhu jíñ fuerza yā, jíñ ñáyuu casáha jeē ndúvāha ñayuu cácuu, jíñ ñáyuu cachíndéé ñájñáhan, jíñ ñáyuu cándiso jñiñu, jíñ ñáyuu cácahān sñn sñn yuhu jeē tu cájecūhun ni. <sup>29</sup> ¿A ndihí yó cácuu apóstol, chí naún? ¿A ndihí yó cáncani jñūhun? ¿A ndihí yó cástéén? ¿A ndihí yó cuu sáha jñiñu jéhu? <sup>30</sup> ¿A ndihí yó cuu sáha jeē ndúvāha ñayuu cácuu? ¿A ndihí yó cuu cahān sñn sñn yuhu? ¿A ndihí yó cuu nacastūhún yuhu ún, chí naún? Tuú chí sñn sñn tahū ni canihñ yō. <sup>31</sup> Núu súcuan te na cóndihvī ní rō cacān rō jeē cuáha Yaā Dios tahū cánuú gá nuū rō. Te vijna te na stéén rí nuū rō ñn jeē vāha ga nuū táca gá tahū ún, suu jñūhun cúndáhú ni jnáhan.

*Jñūhun jeē cundáhú ni jnáhan*

## 13

<sup>1</sup> Vēsú núu cuu cahān yō tijni yuhu jeē cácahān ñayuu chí jēe cácahān ndajéhé Yaā Dios, te núu tu cúndáhú ni yō jnáhan yó, te jñūhun cahān yō un cúu nájñūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu. <sup>2</sup> Te vēsú cuu nacani vāha yó jñūhun ya, te cuu jecūhun ni yō táca jñūhun sáhi yá jíñ táca jñūhun ndíchí, te

núu tu cúndáhú ni yō jnáhan yó, te tu ndé jéjníñu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuiti. <sup>3</sup> Te vēsú na sája yó ndihi jeē névāha yó cuu ñayuu ndahú, te vēsú núu cuāha yó jnūhun cahmu ñayuu yohó jeē siquí jnūhun ya, te núu tu cúndáhú ni yō jnáhan yó, te tu ndé jéjníñu cuiti.

<sup>4</sup> Ñayuu cundáhú ni chi íyó pa-ciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máá. <sup>5</sup> Tu sájéē ni, te ndúcú jeē cúu máá-ni, tu quítí ni, tu ñūhun ni jnūhun quítí ni. <sup>6</sup> Tu cúsiñi ni jíto jniñu neé cásaha jnáhan, chi sa cúsiñi ni jíin jniñu váha. <sup>7</sup> Ñayuu cundáhú ni chi ndihi jéhn-de ni ndoho jehé jnáhan, te tu jécuiñi jeē candíje jnáhan, jíin jéē ñūhun ni jeē squícu jnáhan, jíin jéē jénde-yí ni jíin jnáhan.

<sup>8</sup> Jnūhun cúndáhú ni chi ma náa cuiti. Te quiji quiví jeē tuá nacani i jnūhun, ni tuá cahān i tijni yuhu, ni tuá jíni ñūhún jnūhun ndíchi. <sup>9</sup> Chi tu jíni vāha vāha yó vijna, te jnūhun cánacani yó suni jecu-ni cúu. <sup>10</sup> Te núu na quíji quiví jeē cúni yō ndihi, yūcuán na te tuá coo jeē jíni yō jecu-ni.

<sup>11</sup> Ná ni cuu yó súchi lúlí te ni cahān yō, ni jeni ni yō, ni jecūhun ni yō nájñūhun sūchi lúlí. Te ná ni jehnu yó te ni stóo yó modo sūchi lúlí. <sup>12</sup> Te suni súcuan, jecu-ni jécūhun ni yō vijna, nájñūhun jeē jíto yó núu ñin espejo jeē tú ndijin vāha. Te cúcuéé gá te jecūhun cájí ni yō ndihi. Te vijna chí jecu-ni jíni yō, te cúcuéé gá te cuni vāha yó ndese Yaā cúu ya, nájñūhun jíni vāha ya yohó ndese ñayuu cúu yó. <sup>13</sup> Núu súcuan te íyó únī jnūhun jeē quéndōo cutú ní cāni: Jeē candíje ñihin yó jéē squícu ya jeē ni jéjñūhun ya, jeē cócuhun ni yō táca jéē váha coo, jíin jéē cundáhú ni yō jnáhan yó. Te

jnūhun cúndáhú ni chi jéhn-ndasí gá cúu nuū táca jéē yáha.

*Siquí jeē cácahān i tijni yuhu*

## 14

<sup>1</sup> Na cóndihvī ni rō cundáhú ni rō jnáhan ró, te suni condihvī ni rō cacān rō táca táhū jeē jéhe Espíritu. Te tahū jeē cánuú gá cúu jeē nácani ró jnūhun ya. <sup>2</sup> Chi tēe névāha tahū jeē cahán de tijni yuhu jeē tu jécūhun ni de, chi máá-ni Yaā Dios jíni jeē cahán de, nasūu ñayuu. Chi ni ñin i ma jécūhun ni jeē cahán de. Chi sáha Espíritu jeē cahán de táca jnūhun yísahí. <sup>3</sup> Te sa suhva tēe nácani jnūhun ya, chi jíin ñayuu cahán de návāha ije i jíin jnūhun ya, te stíhvī ni de i, te cahán ndeyí ni de jíin i. <sup>4</sup> Te tēe jeē cahán tijni yuhu, chi máá-ni de íje jíin jnūhun ya. Te tēe jeē nácani jnūhun ya, chi sa suhva sáha de jeē ñayuu cácaandíje ije i jíin jnūhun ya.

<sup>5</sup> Nújnahan ni rī jeē ndihi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnūhun ya. Chi jéhn- ga jniñu sáha tēe nácani jnūhun ya vēsú tēe cahán tijni yuhu. Chi núu tú tēe castūhun jnūhun cahán de, te ma cuajniñu jeē íje ñayuu cácaandíje. <sup>6</sup> Jeē yúcuan hermano jijnahan ró, núu na jéē rī nuū rō, te núu cahān rī tijni yuhu jeē tu jécūhun ni rō, ¿te ndé cuajniñu ún? Te núu na cahán rī ñin jeē ni stéén yā, chí ñin jeē cútūhva ró jnūhun ndaā, chí ñin jeē nácani rī jnūhun ya, chí ñin jeē steén rī nuū rō, yūcuán cúu jeē cuajniñu.

<sup>7</sup> Sáha yó cuenta jeē nájñūhun instrumento música, vēsú tu técu, te cuu cata, nájñūhun flauta jíin arpa. Te núu tu jíta sñin sñin nota, ¿te ndese cuni yō na yaa jíta? <sup>8</sup> Te núu cor-neta tu jécu cájí, te ni ñin tēe ma sātūhva de quihñ de guerra. <sup>9</sup> Te suni súcuan róhó jíjnahan ró, núu tu cahán cají ró jnūhun jecūhun ni ñayuu, ¿te ndese cuni i na vé cahán

rō? Chi jñūhun cáhán rō ndíso tachī cuahānjín. <sup>10</sup>Te ndaā chi íyó cuéhē yuhu ini ñayiví, te tāca yuhu chi íyó ñáyuu jécūhun ni. <sup>11</sup>Te núu tu jécūhun ni yō yuhu cáhán ñin tēe, te cúu yó nájñūhun tēe ñuu jicá núu tēe cáhán, te suni nájñūhun tēe ñuu jicá cúu de nuū maá yó. <sup>12</sup>Jeē yúcuan róhó jēe cáconi ndasí ró nihīn rō tahū jeē jēhe Espíritu, na cácan rō tahū jeē sáha jeē íje ñayuu cácan díje jíin jñūhun ya.

<sup>13</sup>Núu súcuan te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. <sup>14</sup>Chi núu jicán tahú yō jíin inga yuhu, te máá ánuá-ni yó cúu jeē jicán tahú, te tu ndé jéjñū nuū jeē níjñūní yō. <sup>15</sup>¿Nde se sáha yó núu súcuan? Na cácan tahú yō jíin ánuá yō, te suni jíin jēe níjñūní yō. Na cáta yó yaa íi jíin ánuá yō, te suni jíin jēe níjñūní yō. <sup>16</sup>Chi núu nácuatáhú ró máni jñūhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jñūhun cáhán rō. <sup>17</sup>Ndaā chi vāha nácuatáhú máá ró, te inga de chi tú na vé nihīn de jeē íje de jíin jñūhun ya. <sup>18</sup>Na cútahū rī nuū Yaā Dios jeē cahán gā rī jíin tijni yuhu vēsú maá ró jijnáhan ró. <sup>19</sup>Te vēsú súcuan te núu íne rī nuū cáyūcu tútú ñáyuu cácan díje, te nújnahan gā ni rī cahán rī uhūn-ni jñūhun jeē jécūhun ni i te stéén nuū i, vēsú jeē cahán rī uxī mil jñūhun jíin inga yuhu jeē tu jíni cuiti i.

<sup>20</sup>Hermano jijnáhan ró, ma cáni ni rō nájñūhun sūchi lúlí, chi sa suhva na íje ró jēe jecūhun vāha ni rō. Te coo ró nájñūhun sūchi lúlí jēe tu jíni i jñū nēe. <sup>21</sup>Te yósó núu tūtu ley yā jenahán: Jíin jñūhun cácahān tēe inga yuhu, jíin jñūhun cácahān tēe ñuu jicá, sáha rī jeē cúni sōho ñayuu yáha jñūhun rī. Te ni jíin súcuan ma sáha i

cuenta jñūhun cahān rī, achí máá Jítóho yō. <sup>22</sup>Núu súcuan te tahū jeē cahán yō tijni yuhu, yūcuan cúu ñin jeē steén poder Yaā Dios nuū ñáyuu tu cácan díje, nasūu núu ñáyuu cácan díje. Te jeē nácani yó jñūhun ya, yūcuan cúu jeē steén nuū ñáyuu cácan díje, nasūu núu ñáyuu tu cácan díje. <sup>23</sup>Núu súcuan te núu ndihi ró ñáyuu cácan díje cáhiyo tútú, te tāca ró cácahān sñin sñin yuhu, te quivicoo ñayuu tu jécūhun ni jíin ñáyuu tu cácan díje, ¿te á má cahán i jeē ní candu loco rō? <sup>24</sup>Te núu tāca ró cácani jñūhun ya, te núu quiví ñin tēe tu cácan díje chí ñin tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jñūhun cácani ró. <sup>25</sup>Te nucūhun ni de tāca jēe ní jeni yuhu ni de jíin ánuá de. Yūcuán na te jecuiñi yiti de te chiñúhún de Yaā Dios. Te cahán de jeē íne ndije Yaā Dios jíin ró jijnáhan ró.

*Siqui jeē yucún yíñúhún na cóo nuū ndutútú yó*

<sup>26</sup>Núu súcuan hermano jijnáhan ró: Nuū cándutútú ró te tāca ró coo ñin yaa íi cata ró, chí ñin jñūhun stéén rō, chí ñin jñūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jēe nácastūhun ró jñūhun inga yuhu ún. Te ndihi ún na sáha ró návāha íje ñayuu cácan díje jíin jñūhun ya. <sup>27</sup>Te núu cáhiyo tēe cahán inga yuhu, te na cáhán uū de chí úní-ni de, te ná ñin ná ñin de na cáhán. Te suni jíni ñúhún jēe nacastūhún ñin tēe jñūhun ún. <sup>28</sup>Te núu tu íyó tēe jeē cúu nacastūhun jñūhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. <sup>29</sup>Te suni súcuan tēe cácani jñūhun, na cáhán uū de chí úní de, te sava ga rō nacani ni rō núu íyó ndáa jeē cácahān tēe ún. <sup>30</sup>Te núu inga tēe néne ni nihīn de ñin jñūhun jeē ni stéén yā nuū de, núu súcuan te tēe cáhán na jecuiñi jeē

cahán de, návāha cahān inga tēe ún.  
<sup>31</sup> Te súcuan te ná ñn ná ñn ró cuu nacani ró jnūhun jeē steen yā nuū rō, návāha cutūhva ró te coo ndeyí ni rō. <sup>32</sup> Te tēe cáncani jnūhun, jíni ñūhún cuatáhú de jeē nácani inga tēe jnūhun te jecuiñi jeē cahán maá de. <sup>33</sup> Chi Yaā Dios cuní yā jeē coo nayúú méhñu ró, násūu jeē sacá núu cuvaā rō.

Te nájñūhun cásaħa tāca grupo hermano cácdñje, <sup>34</sup> suni súcuan táca ñahan cándutútú jíni ñayuu cácdñje, na cóo nayúú ña. Chi tú vāha jeē cahán ña, chi sa cuatáhú ña nájñūhun cáhán tutu ley yā. <sup>35</sup> Te núu cuní ña cucáħnu ni ña ñn jnūhun, te nde vehe na cájnūhún ña yā ña. Chi jnūhun canu cúu jeē cahán ñn ñahan méhñu núu cándutútú ró.

<sup>36</sup> Te na sáħa ró cuenta jeē tu ní quénda jnūhun Yaā Dios nuū maá ró jijnáħan ró, te nasūu maá ñn maá ró ní cániħn jnūhun ya. <sup>37</sup> Núu ñn tēe jéni ni de jeē tēe nácani jnūhun ya jíni tēe névāha Espíritu cúu de, núu súcuan te na cuájñūhún de jeē jniñu ní ndacu Jitoho yō cúu jeē tēe ri yāħa. <sup>38</sup> Te núu tu jétáhú de jnūhun yāħa, suni ma cuatáhú yó de.

<sup>39</sup> Núu súcuan, ñánī māni jijnáħan ró, na cóndihvī ni rō nacani ró jnūhun ya, te ma cási rō nuū tēe cácaħan sín sín yuhu. <sup>40</sup> Te yúcún yíñūhún na sáħa ró táca jniñu.

*Jnūhun jeē ní natecu Cristo*

## 15

<sup>1</sup> Hermano jijnáħan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáħiħn nĩħin ró jíni. <sup>2</sup> Te suni jíni jnūhun ún te ni jnama ya rohó, te núu cáħiħn nĩħin ró jíni jnūhun ni nacani ri nuū rō, te núu tu ní cácdñje cáħa ró.

<sup>3</sup> Chi jnūhun cánuú gá jeē ni níħin maá ri ni nastéen rī nuū rō: Jeē ni jíħi Cristo siquī cuéchi yó, nájñūhun

je cáhán tutu ñi nde jenahán. <sup>4</sup> Te ni quindūji ya, te ni natecu yā nuū uní quivī, nájñūhun cáhán tutu ñi. <sup>5</sup> Te ni nane ya nuū Pedro. Te sáa te ni nane ya nuū ndihúxi gā apóstol. <sup>6</sup> Te sáa te ni nane ya nuū vihyá gā uhūn ciento hermano jeē cáyūcu tútú. Te sava i técu gā nde vijna, te sava i je ni jíħi. <sup>7</sup> Te sáa te ni nane ya nuū Jacobo, yūcuán na te nuū ndiħi ga apóstol.

<sup>8</sup> Te jeē sándiħi na te ni nane ya nuū maá rí. Te nájñūhun ñn jeē ní cacu yúte, súcuan cúu jeē ñn sanaa-ni te ni nduu ri apóstol. <sup>9</sup> Chi tēe núu ga nuū táca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácdñje nuū Yaā Dios. <sup>10</sup> Te siquī jeē ni sáħa Yaā Dios jeē vāha ruhū, jeē yúcuan cúu ri apóstol vijna. Te jeē ni sáħa ya jeē vāha ruhū, chi tú cáħa ní cúu, chi sa ni scáca ga rī jnūhun ya vēsú táca gá tēe apóstol. Te nasūu maá rí ni sáħa, chi Yaā Dios ni sáħa ya jeē vāha un jíni rí. <sup>11</sup> Núu súcuan te vēsú ruhū chí táca gá tēe ún, súcuan cáncani rī jnūhun, te súcuan ni cácdñje ró.

*Jnūhun jeē natecu ndiħi*

<sup>12</sup> Te jeē cáncani ri jnūhun Cristo jeē ní natecu yā méhñu ndiħi, ¿te naun cácaħan sava ró jéē ma nátecu ndiħi? <sup>13</sup> Chi núu jeē tú natecu ndiħi, te suni tu ní nátecu Cristo nuú. <sup>14</sup> Te núu jeē tu ní nátecu Cristo, te cáncani cáħa rí jnūhun ya nuú, te suni cácdñje cáħa ró núu. <sup>15</sup> Chi núu jeē súcuan cúu núu, te cácuu ri tēe jeē tu cácaħan ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndiħi, núu súcuan te tú ndaā jeē ní nastécu Yaā Dios Cristo. <sup>16</sup> Chi núu tú natecu ndiħi, te ni Cristo suni tu ní nátecu yā nuú. <sup>17</sup> Te núu tu ní nátecu Cristo, te cácdñje cáħa ró te cándiso ñi gā rō cuéchi ró núu. <sup>18</sup> Te núu jeē súcuan cúu núu, te suni je ni

cajnahñū ndetū ñayuu ni cacandíje Cristo. <sup>19</sup> Chi núu tú natecu ndíyi, te núu máá ñn-ni siquī vida yáha ññuhun ni yō jeē sáha Cristo jeē váha yóhó, núu súcuan te ndahú ndasí gá cácuu yó vēsú tāca gá ñayuu, chi cacandíje cāha yó nuú.

<sup>20</sup> Te tuú chi iyó ndáa jeē ní natecu Cristo mēhñū ndíyi. Te máá yá cúu jeē xíhna gā ni natecu nuú tāca gá ndíyi jeē natecu. <sup>21</sup> Chi siquī jeē ni stívi ñn-ni tēe Adán, te ni quejéé jíhi ñayuu. Te suni súcuan siquī jeē ni sáha ñn-ni tēe Cristo, te natecu ñayuu. <sup>22</sup> Chi nájnūhun cájihí ndíhi yó siquī jeē cácuu yó yúcūn Adán, suni súcuan natecu ndíhi yó siquī jeē yíhi yó ndaha Cristo. <sup>23</sup> Te ná ñn ná ñn ndese ndíquín jnáhan máá: Xihna gā Cristo ni natecu yā, te sáa te quívi ndíji ya te natecu tāca ñayuu yíhi ndaha ya. <sup>24</sup> Yūcuán na te jñu tiempo, te snáa yā poder tāca enemigo jeē cujéhnu jín jéé ndácu jniñu jín jéé iyó poder. Te ndíhi jeē ndácu ya jniñu nuú, nacuāha ya nuú Tatá yā Yaā Dios. <sup>25</sup> Chi cánuú jéé ndacu Cristo jniñu nde quiji quívi jeē quénde Yaā Dios poder tāca jéé jíto uhū nuú Cristo, te stóho ya. <sup>26</sup> Te jeē sándihí na te snáa yā cuehyí jéhni ñayuu. <sup>27</sup> Chi cáhán tutu íi jeē sáha Yaā Dios jeē cujéhnu Cristo siquī ndíhi, te cuatáhu núu yā. Te jeē cahán jeē cujéhnu ya nuú ndíhi-ni, te jíní vāha yó jéé máá Yaā Dios ma quíhi ya ndaha Cristo, chi Yaā Dios cúu jeē ni chíhi tāca un ndaha Cristo. <sup>28</sup> Te ná ni quívi ndíhi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tátá yā, Yaā jeē ní chíhi tāca un ndaha ya. Te súcuan te máá Yaā Dios jñi ya ndíhi-ni.

<sup>29</sup> Te iyó ñayuu cájendute jehē ndíyi. Te núu tú natecu cuítí ndíyi, ¿te najehē cájendute i jehē ndíyi núu súcuan?

<sup>30</sup> Te ruhū jijnáhan rí, ¿najehē cúu jeē ndíquíví cájendeyí ni rí jíto rí

jnūndóho cuu rí, te núu tú natecu ndíyi? <sup>31</sup> Hermano, nájnūhun iyó ndáa jeē cúsi ni rí siquī jeē cacandíje ró jítoho yō Jesucristo, suni súcuan iyó ndáa jeē ndíquíví nducú ñayuu cahni ruhū siquī jniñu ya. <sup>32</sup> Te jeē ní ndoho rí ní casáha tēe xeēn ñuu Efeso, jeē cácuu de nájnūhun quítí xéén, ¿te na vé nihín rí siquī un núu súcuan? Chi núu tú natecu ndíyi, te cuu cahán yō nájnūhun áchí ñn jñuhun: Na cúsi ni yō caji yō coho yó, chi sanaa te sajnē te cuu yō, achi yō nuú.

<sup>33</sup> Ma cuáha ró jñuhun stáhú ñayuu rohó. Chi áchí ñn jñuhun: Núu cájica ró jín ñayuu neé, te stívi i róhó jéé tuá caca ndaa ró. <sup>34</sup> Nachuhun ni ró jijnáhan ró, te sáha ró jniñu ndaa, te ma sáha ga ró cuéchi. Chi sava ró tu cájini cuítí ró ndese Yaā cúu Yaā Dios. Súcuan cáhán rí návāha na cúcanu ró.

#### *Ndese natecu ndíyi*

<sup>35</sup> Te sanaa te cahán ñn ró: ¿Ndese natecu ndíyi? ¿Ndese coo yiquí cúñu í? achi ró. <sup>36</sup> Tu jécūhun cuítí ni ró núu súcuan. Chi cúu nájnūhun jeē cátají ró tāca tata chíji ññuhun návāha nane yucū i. <sup>37</sup> Te tata jeē quívi chíji ññuhun, núu trigo chí inga tata, chí nasūu yúcū cúu, chí máá núní-ni cúu. <sup>38</sup> Te cuéé gá te cane, chí Yaā Dios ni jēhe ya yucū tata ún, ndese ni nujnahan ni maá yá, te ná ñn ná ñn tata chí sñn sñn cáa yucū ni sáha ya. <sup>39</sup> Te suni súcuan tāca yiquí cúñu, chí tú inuu cándaa. Chi sñn cáa ñayuu, te sñn cáa quítí, te sñn cáa saa, te sñn cáa chācá. <sup>40</sup> Te suni súcuan cúu tāca jéé íin andíví jín táca jéé iyó ñáyíví. Te sñn luu cáa jeē íin andíví, te sñn luu cáa jeē iyó ñáyíví. <sup>41</sup> Te sñn ndíndēe níandii, te sñn ndíndēe yóo, te sñn ndíndēe táca quími. Te tāca ñn ñn quími chí suni sñn sñn ndíndēe. <sup>42</sup> Te suni súcuan coo jín ndíyi jeē natecu. Ndíyi jeē chíndūji yó chí téhyū, te jeē nastécu yā chí ma cúu gā. <sup>43</sup> Jeē chíndūji

yó chi ndáhú cáa, te jeē nastécu yā chi luu cujéhu. Jeē chíndūji yó chi tú na fuerza, te jeē nastécu yā chi coo fuerza. <sup>44</sup> Jeē chíndūji yó chi ìn yiqui cúñu cuenta ñayīví cúu, te jeē nastécu yā chi ìn yiqui cúñu cuenta Espiritu yā cúu. Chí íyó yiqui cúñu cuenta ñayīví, te suni íyó yiqui cúñu cuenta Espiritu.

<sup>45</sup> Chi súcuan yósó núū tútu ì: Adán, tēe xīhna ñúhún, ní cuvāha de jíin vida cuenta ñayīví, áchí. Te Cristo cúu nájñūhun inga Adán uū, te máá yá cúu Espiritu jeē jéhe vida. <sup>46</sup> Te nasūū yiqui cúñu cuenta Espiritu cúu jeē ní cuvāha xīhna gā, chí sa suhva yiqui cúñu cuenta ñayīví, te sáá te nduu cuenta Espiritu. <sup>47</sup> Te cuenta ñayīví cúu tēe xīhna ñúhún, chí ní cuvāha de jíin tícachā ñuhun. Te Adán uū jeē cúu máá Jítóho yō, chí nde andiví ní quiji ya. <sup>48</sup> Te ñayuu ñayīví yáha, chí cúu i jnāhan Adán jeē ní cuvāha jíin tícachā ñuhun. Te ñayuu jeē quívicoo andiví, chí ndúu i nájñūhun máá Yaā ní quiji nde andiví. <sup>49</sup> Chi jeē cáa yó nájñūhun tēe ní cuvāha jíin tícachā ñuhun, suni súcuan coo yó nájñūhun cáa máá Yaā ní quiji nde andiví.

<sup>50</sup> Jñūhun yáha cástūhun rí nuū rō jijnáhan rō, hermano, jeē yiqui cúñu yō cuenta ñayīví yáha, ma cúu quīví ñuu nuū ndácu Yaā Dios jniñu. Chí jeē jihí cúu, te ma cúu quīví nuū cótecu ní cáni. <sup>51</sup> Te cúní rí jeē na jécūhun ní rō jñūhun yáha jeē ní yisāhí: Nasūū ndihí yó cuu, te ndihí yó chí nasāma yiqui cúñu yō. <sup>52</sup> Chí quiví jeē cuécu sandihí na trompeta, te ìn yachí-ní, nájñūhun ìn jeē nácuení-ní yó, te nasama ya yohó. Chí cuecu trompeta un, te natecu tāca ndíyí jeē ma cúū gā i. Te tāca yó jeē cátecu yō quiví ún, chí nasama ya yiqui cúñu yō. <sup>53</sup> Chí jeē tehyú yáha, cánuu nucūhun jeē ma téhyú gā. Te jeē jihí cánuu nucūhun jeē ma cúū cuiti gā. <sup>54</sup> Chí jeē jihí jeē

tehyú, chí quiji quiví jeē nucūhun jeē ma cúū gā ma tehyú gā. Yūcuán na te cundaā jñūhun yósó núū tútu ì: Jíin poder yā ní snáā yā cuehyí jéhni ñayuu. <sup>55</sup> Cuehyí jéhni yóhó ¿ndese ga cuu sáha xeēn jíin yó? Chí natecu yō. ¿Te ndese ga cundeyí jíin yó? Chí snáā yā. Achí tutu. <sup>56</sup> Chí cuēchi cúu jeē sáha jeē cundeyí cuehyí jéhni ñayuu. Te ley yā jehnahán sáha jeē nāne cuēchi siquí yō. <sup>57</sup> Te na cútahū yō nuū Yaā Dios, chí jíin máá Jítóho yō Jesucristo sáha ya jeē cundeyí yó siquí cuēchi jíin siquí jñūhun cuu yō.

<sup>58</sup> Jeē yúcuan, ñání mání, cuiñi ñihin rō te ma cáca yátá rō jijnáhan rō. Te níni na sájniñu vāha rō jíin jniñu máá Jítóho yō. Chí je cájini rō jeē tu casájniñu cāha rō jíin máá Jítóho yō.

*Siquí jeē cáquin i xūhún cuu tācá hermano*

## 16

<sup>1</sup> Te vijna te cahán rí siquí xūhun jéē cáquin rō cuu hermano cácandíje cándoho ndáhú. Suni na sáha máá rō jijnáhan rō nájñūhun ní ndacu rí nuū tāca grupo ñayuu cácandíje ichi Galacia. <sup>2</sup> Tācá domingo te ná ìn ná ìn rō chuvāha sín rō jecu xūhún, núu ndese ní nihín maá rō, návāha quiví jeē jinú rí nuū rō te je íyó túhva. <sup>3</sup> Te jeē jeé rí, te cuāha rí carta nuū tāca tēe jeē nácāji rō, te tají rí de quingoo de nuū tācá hermano cáyūcú Jerusalén, quísiáha de xūhun jéē ní casocō rō. <sup>4</sup> Te núu íyó váha jeē quihín rí, te suni quihín rí jíin de jijnáhan de.

*Jeē cahán Pablo siquí jeē quicondéhé de ñayuu cácandíje*

<sup>5</sup> Te jeē jeé rí nuū rō jijnáhan rō, te jini ñúhún jeē xīhna gā jeē rí región Macedonia, yūcuán na te jeē rí ñuu rō Corinto. <sup>6</sup> Te sanaa te quendōo rí jíin rō jijnáhan rō jecu tiempo, chí sanaa te coyūcu yó ní tiempo mijin. Yūcuán na te cuu chindéé



ñáhán ró ruhū, núu ndé chi quíhín tucu ri. <sup>7</sup> Chi tu cúní rī jeē rī nuū rō vijna te yáha yachī rī quihīn rī, chí ñúhun ni rī jeē quendōo rī jín rō jecu tiempo, te núu cuáha Jitoho yō jñūhun. <sup>8</sup> Te cone ri ñuu Efeso yáhá nde na yáha quivī Pentecostés. <sup>9</sup> Chi coo cuehē ñayuu scandíje ri, te vāha quihīn jniñu Jitoho yō. Te suni íyó cuehē ñayuu cácuu contra.

<sup>10</sup> Te núu na jée Timoteo, te sáha rō jée coo sīñ ni de mēhñu rō, te ni ññ ma cáni ni de siquī. Chi suni jniñu máá Jitoho yō sáha de, nájñūhun máá rí. <sup>11</sup> Núu súcuan te ni ññ rō má sajée ni rō nuū de. Chi sa suhva chindée ñájnáhan rō jín de jeē na quíhín gā de, te coo ndeyí coo sīñ ni de, návāha ndiji de coto jnáhan ri jín de. Chi ruhū jín sava ga hermano cándetu ri de.

<sup>12</sup> Te hermano Apolos chi ni cahān ndahú rí jín de jeē na jée de jín sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

### *Saludo jeē sándihí*

<sup>13</sup> Ndito coo ni rō jijnáhan rō, te cuiñi ñihin ro jín jnúhun cá candíje rō. Te téyí na cóo ni rō, te na cóo fuerza iní rō. <sup>14</sup> Te táca jée casáha rō, na sáha rō jín jnúhun cúndáhú ni jnáhan.

<sup>15</sup> Hermano, cájini rō jeē xíhna gā ñayuu vehe Estéfnas ni cacandíje ichi Acaya. Te ni cajēhe i máá i nuū jniñu jeē chindée ñáhán i táca hermano cá candíje. <sup>16</sup> Te cúní rī jeē suni máá rō jijnáhan rō, cuatáhú váha rō ñayuu casáha súcuan, jín táca ñayuu cachindée ñájnáhan te cásájniñu siquī jniñu ya. <sup>17</sup> Cúsñ ni rī jeē ní quijicoo Estéfnas jín Fortunato jín Acaico, chí tēe yáha ni cajejniñu de nuū rī jehē rō jeē tu ní cáhīyo rō jín rí. <sup>18</sup> Chi ni ndundeyí ni rī, te suni súcuan máá rō jijnáhan rō, ni casáha de. Te

cánuú cuajnúhún rō táca tée cándāa súcuan.

<sup>19</sup> Sándeyí ni rō jijnáhan rō, áchí táca grupo ñayuu cá candíje cáyūcu Asia. Aquila jín Priscila jín ñayuu cá candíje jeē cándutútú vehe de, cácahān i jeē sándeyí ndasí ni rō jín jnúhun máá Jitoho yō. <sup>20</sup> Te táca hermano cácahān i jeē sándeyí ni rō. Te jeē cahán rō jín táca jnáhan rō, te yíñúhún techūhu rō ndaha i.

<sup>21</sup> Ruhū Pablo, jín ndaha máá rí tēe ri jñūhun yáha jeē na sándeyí ni rō jijnáhan rō.

<sup>22</sup> Te núu ndé ññ tu íyó manī jín Jitoho yō Jesucristo, te na jnáhnú ndetū i núu súcuan. Te na cáhán yō: Jitoho ná, cúní na jée yachī ndiji ní.

<sup>23</sup> Te ñúhun ni rī jeē maá Jitoho yō Jesucristo na sáha ga yā jeē váha rōhó jijnáhan rō. <sup>24</sup> Te manī rī jín rō jijnáhan rō jée cá candíje rō Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani rí jñūhun ya. Te ndindúú rí jín hermano yō Timoteo cátee rí carta yáha cuájeē nuū rohó hermano ñuu Corinto jeē cácan díje ró Yaā Dios, jín núū ndihí rohó jéē cáyihí ndaha Yaā Dios jeē cáyūcu ní cáhnu Acaya. <sup>2</sup> Te cáñuhun ni rí jeē Tatá yō Yaā Dios jín Jítoho yō Jesucristo na sáha ga yá jeē váha rohó te sáha ya jeē coo ndeyí coo sñ ni rō.

*Siquí jeē ní ndoho Pablo jñúndóho*

<sup>3</sup> Na cáhán yō jeē yóhyo cújéhu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhú ni yohó, te níni sáha ya jeē ndúsñ ni yō. <sup>4</sup> Chi sáha ya jeē ndúsñ ni yō siquí táca jñúndóho ndóho yó, návaha suni cuu sáha máá yó jeē ndúsñ ni jnahan yó jéē cándoho jñúndóho. Chi nájnūhun ni sáha ya jeē ndúsñ ni maá yó, suni súcuan sáha yó jéē ndúsñ ni i. <sup>5</sup> Chi jeē ndóho yó cuehē jñúndóho nájnūhun ni ndoho Cristo, suni súcuan nihñ yō cuehē jñūhun ndusñ ni, sáha Cristo. <sup>6</sup> Jeē yúcuan núu cándoho rí jñúndóho te súcuan te cuu sáha rí jeē ndúsñ ni rō te quendōo vāha ga anuá rō. Te jeē sáha Yaā Dios jeē ndúsñ ni rí, suu sáha tucu jeē ndúsñ ni maá ró, te quéndōo vāha ga anuá rō. Te súcuan te nihñ rō fuerza jeē cuándeýí ni rō jín táca jñúndóho nájnūhun cándoho rí. <sup>7</sup> Te cáñuhun ndasí ni rí jeē cúu rohó, chi cájini rí jeē nájnūhun cándoho ró jñúndóho jín rí, suni súcuan ndusñ ni rō jín rí sáha máá Yaā Dios.

<sup>8</sup> Hermano, cáconi rí jeē na cúni rō jijnáhan ró ndese ni candoho rí ichi Asia. Chi yóhyo xeēn jñúndóho ni cajito rí, nde je yajni tuá canda rí, te ni jeni ni rí jeē cuu rí nuú. <sup>9</sup> Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma ténuū rí maá rí chi tú jniñu rí, chi sa suhva Yaā Dios jeē nastécu ndēyí tenuū rí. <sup>10</sup> Chi máá yá ni scácu ruhū jijnáhan rí nuū jñúndóho xeēn jeē jé yajni cuu rí nuú, te suni súcuan scácu ya ruhū vijna. Te ñūhun ni rí jeē suni scácu tucu ya ruhū ichi núú gā. <sup>11</sup> Te suni na chindéé ñáhán ró ruhū jijnáhan rí jeē cacān tahú ró jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

*Jeē ní cucuéé Pablo quihñ de ñuu Corinto*

<sup>12</sup> Iyó ññ jeē sáha jeē cácusñ ni rí: Chi vāha íyó ni anuá rí jeē váha ndoo te ndaā ni cajica rí nuū ñayuu ñayiví, te víhyá gā nuū maá ró jijnáhan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéē ndichí máá rí cúu jeē ní cajica rí súcuan. <sup>13</sup> Te jñūhun cátee rí nuū táca carta rí, chi máni jeē cúu cahu ró te jecūhun ni rō cúu. Te ñūhun ni rí jeē jecūhun vāha ga ni rō, <sup>14</sup> nájnūhun je cájecūhun ni rō jecu. Te súcuan te cuu cusñ ni rō siquí rí quiví ndíji Jítoho yō Jesús, nájnūhun cácusñ ni rí siquí maá ró.

<sup>15</sup> Te siquí jeē súcuan ni cucáhu ni rí, te jeē yúcuan ní jeni ni rí jeē núu na quihñ rí Macedonia te jeē rí nuū maá ró xihna gā, návaha cusñ ni rō jeē jécondēhe rí rohó úú jínu núú. <sup>16</sup> Chi ni jeni ni rí jeē jécondēhe rí rohó, te yāha rí quihñ rí Macedonia, te jeē nándicó rí Macedonia te ndíji tucu rí nuū rō. Yūcuán na te cuu chindéé ñáhán ró ruhū jeē quihñ rí ichi Judea nuú. <sup>17</sup> Te jeē súcuan ni jeni ni rí, ¿te á téu tu nácani vāha ni cúu rí jeē tu ní jéé

rī nuū rō, chí naún? ¿A cájeni ni rō jeē cúu ri nájñuhun ñayuu ñayiví jeē yachī cahán jeē cuu, yūcuán na te tuú, chí naún? <sup>18</sup> Tuú chí máa Yaā Dios jíni yā jeē tu cáhán rī jíin ró jeē cuu, te yachī nácahān rī jeē ma cúu. <sup>19</sup> Chi ruhū jíin Silvano jíin Timoteo ni canacani ri jñuhun Jesucristo Sēhe Yaā Dios nuū rō jñáhan ró. Te máa yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. <sup>20</sup> Chi ndihi jeē ni jéjnūhun Yaā Dios, squícu máa Cristo. Te jeē yúcuan cácahān yō jeē yóhoyo luu cújéhnu Yaā Dios, te cácahān yō Amén, chi ndihi squícu Cristo Jesús. <sup>21</sup> Te Yaā Dios cúu jeē sáha jeē ruhū jijnáhan ri jíin róhó jijnáhan ró, cáhāin nīhin yó jíin Cristo, te ni sándoo ya yohó jéē cuajníñu yó núu yā. <sup>22</sup> Te suni ni jēhe ya Espíritu yā jeē cóndee ini anuá yō, te cúu ya nájñuhun iin sello jeē steén jeē cúu yó séhe Yaā Dios. Te sáha Espíritu jeē iyó ndāā ni yō jeē cuāha Yaā Dios tahū yō.

<sup>23</sup> Te jeē ná tu jeē rī nuū rō ñuu Corinto, nájñuhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máa Yaā Dios cúu Yaā jíni jeē cahán ndaā rī. Te iyó vāha jeē na cúu rī te núu tu cáhán ndaā rī. <sup>24</sup> Te nasūu jéē cáconi rī ndacu nīhin ri jniñu nuū rō siquī jñuhun cácañdije ró yá, chi je cáhāin nīhin ro jíin jñuhun ún. Chi sa suhva cáconi rī chindéé ñáhán rī rohó jéē na cúsiñ gā ni rō.

## 2

<sup>1</sup> Núu súcuan te ni jeni ni rī jeē ma jéē rī inga jínu nuū rō jíin jñuhun cuxeēn rī te cucuíhyá ni rō sáha rī. <sup>2</sup> Chi núu cucuíhyá ni rō sáha rī, ¿te ndé ñayuu sáha jeē cusī ni maá rí? Tuá na inga ñayuu, chi máni máa róhó, te ndese cuu te núu ni sáha rī jeē cucuíhyá ni rō. <sup>3</sup> Te jeē yúcuan cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rī sáha

cuéchi ró quívī jeē rī nuū rō. Chi sa suhva sáha ró jéē cúsiñ ni rī. Te jíni vāha rī jeē núu cusī ni rī, te suni ndihi ró jijnáhan ró cusī ni rō. <sup>4</sup> Te jeē ní tee ri carta un núu rō, te yóhoyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sáha rī jeē cucuíhyá ni rō, chi sa suhva návāha cuni rō ndese yóhoyo manī rī jíin ró.

*Jeē íne cáhnu ni Pablo nuū tée ni sáha cuéchi*

<sup>5</sup> Te jeē ní cucuíhyá ni rī ni sáha tēe jeē ni sáha cuéchi ún, te nasūu máa-ni rī, chí suni nde máa ró jijnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chí tu cúní rī cuxeēn ndasí rí. <sup>6</sup> Te jíin jéē ní cacuxeēn rō nuū de ná ni candutútú ró, te jíin yúcuan-ni te ni cuu-ni. <sup>7</sup> Te vijna chí jíni ñúhún jeē cóne cáhnu ni rō nuū de, te sáha ró jéē ndúsiñ ni de, chí sanaa te caa ga cucuíhyá ni de, te ma ndúsiñ gā ni de. <sup>8</sup> Núu súcuan te cáhán ndahú rī jíin ró jijnáhan ró jéē steén tucu ró jéē iyó manī rō jíin de. <sup>9</sup> Chi jeē siquī jniñu yáha cúu jeē ní tee ri carta un núu rō, návāha coto ndee rī rohó núu cuatáhú vāha ró jniñu ndácu ri nuū rō. <sup>10</sup> Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuéchi, te sáha rī súcuan siquī jeē manī rī jíin ró jíto jíinúu Cristo. <sup>11</sup> Chi cánúu cone cáhnu ni yō, chí tu cúní yō jeē nihín Satanás cuéchi siquī yō, chí je jíni vāha yó ndese ndúcú un stáhú yóhó sáha yó cuéchi.

*Jeē tu ní íyo nayúú ni Pablo ini ñuu Troas*

<sup>12</sup> Ná ni jehēn rī ñuu Troas jeē nacani ri jñuhun Jitoho yō Cristo, te vāha ni sáha ya jeē ni íyo modo jeē nacani ri jñuhun ya. <sup>13</sup> Te vésú súcuan te tu ní íyo nayúú ni anuá rī, chí tu ní níjnáhan ri jíin hermano yō Tito. Yūcuán na te ni nacuatáhú rī

nuū ñayuu yūcuán, te cuananducú rí de ichi Macedonia.

*Jñuhun jeē kujéhnū ndúú yó jín Cristo*

<sup>14</sup> Te na cútahū yō nuū Yaā Dios, chi níní ndéca vāha ya yohó cuángoo yó jín Cristo Jesús, te ndúú yó jín yá jeē kujéhnū ndasí yá snāa yā poder ndíhi enemigo yā. Te jéjñíñu ya yohó jéē scuité núu yó jñuhun ya tācá-ni lugar, nájñuhun jité núu ñn xicō asín. <sup>15</sup> Te cúu yó nájñuhun ñn sūje jeē jeén asín nuū Yaā Dios sáha Cristo. Te nájñuhun jeē jinú xicō un núu ñayuu cācu ánuá jín núu ñayuu jnahnū ndetū. <sup>16</sup> Nuū ñayuu jnahnū ndetū chi cúu yó nájñuhun ñn xicō jeē cúu i sáha, te nuū ñayuu cācu ánuá chi cúu yó nájñuhun ñn xicō váha jeē cótecu i sáha. Te ni ñn yó ma cānda yó sáha yó jñíñu yáha, te núu ma chindéé ñáhán yá yohó. <sup>17</sup> Te ruhū jijnáhan rí, tu cásáha rí nájñuhun cásáha cuehē tēe jeē cānducú de nihīn de xūhun síquī jñuhun Yaā Dios. Chi sa cánacani ndaā rí jñuhun ya, chi máá Yaā Dios ni tají rúhū, te máá yá jiní jeē cánacani ndaā rí síquī jeē cācandíje rí Cristo.

*Jñuhun síquī contrato jeé*

### 3

<sup>1</sup> Te jeē cácahān rí súcuan, ¿te á cájeni ni rō jeē cānducú tucu rí cahān rí jeē váha ga tēe cácuu rí, chí naún? ¿Te chí jíní ñúhún jéē steén rí carta recomendación nuū rō, chí jéē cacān rí cuāha rō núu rí jijnáhan rí, nájñuhun cásáha sava i? <sup>2</sup> Tuú chi máá-ni ró cácuu nájñuhun ñn carta recomendación rí. Te jeē ñúhún ni rí jeē ní cacandíje váha ró ni sáha rí, suu cúu nájñuhun jeē yosó jñuhun carta un iní anuá rí. Te ndíhi ñayuu chi nájñuhun cáhu i, cúu jeē jiní i ndese ni nasāma ró. <sup>3</sup> Chi máá ró cácuu nájñuhun ñn carta jeē ní tee Cristo te cāscāca rí. Te nasūu jín tinta ni tee ya, chí sa suhva

jín Espíritu Yaā Dios, Yaā técu. Te nasūu núu tabla yuū nájñuhun ni tee ya ley yā, chí sa suhva nuū anuá ñayuu ni tee ya.

<sup>4</sup> Te cácahān rí súcuan, chí cácucahūni ni rí Yaā Dios síquī jeē ni sáha Cristo. <sup>5</sup> Te nasūu jéē cájeni ni rí jeē cúu canda máá rí sáha rí jñíñu ún. Chi sa suhva máá Yaā Dios sáha jeē cuu síquī rí. <sup>6</sup> Te máá yá ni sáha jeē cuu cuajñíñu vāha rí síquī contrato jeé yá. Te contrato yáha tu cáhán jeē síquī yó ley jeē ní tee jín letra, chí sa suhva jeé caca yó jín vida jeé, suu jeé ni jéhe Espíritu yā. Chi contrato ley jeé yosó jín letra, jnahnū ndetū ñayuu sáha. Te jeé sáha máá Espíritu cúu jeé cótecu yō ní cáni.

<sup>7</sup> Te ley jenahán jeé ni jéhe ya nuū Moisés, ni yosó letra nuū tabla yuū. Te yōhyo ni kujéhnū, te ni ndindéé ndasí ni sáha, te nde Moisés ndí nuū de ni sáha. Te tu ní cúu coto váha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núu de. Te núu súcuan ni kujéhnū ndasí ley jeé sáha jeé cuu ñayuu te jnahnū ndetū i, <sup>8</sup> te sa víhyá gā kujéhnū ndasí gā jñuhun cótecu yō jeé jéhe Espíritu nuū yō. <sup>9</sup> Chi núu yōhyo ni kujéhnū ley un jéē jnahnū ndetū ñayuu sáha, te sa víhyá gā kujéhnū jñuhun jeé ndáhva Yaā Dios cuēchi yó. <sup>10</sup> Chi ley un jéē ní kujéhnū nde saá, tuá kujéhnū cuiti, síquī jeē kujéhnū ndasí gā jñuhun Espíritu jeé iyó vijna. <sup>11</sup> Te núu súcuan ni kujéhnū ley jeé ni íyo jecu-ni tiempo, te sa kujéhnū ndasí gā jñuhun jeé coo ní cáni.

<sup>12</sup> Te jeé súcuan cáñuhun ni rí, jeé yúcuan cáñiyo téyí ni rí nácani rí jñuhun yáha. <sup>13</sup> Chi tu cásáha rí nájñuhun ni sáha Moisés jeé ní jesi de ñn sahma nuū de, návāha tú coto ñayuu Israel ndese cuandahvā jeé ní ndindéē núu de. <sup>14</sup> Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i,

chi nájnūhun jési sahma un núū jeē níjnūní i, te tu cújiyo cuiṭi. Chi nde jeē candíje i Cristo, yūcuán na te cújiyo. <sup>15</sup> Te suni súcuan nde vijná núu cácahu i tutu ley Moisés, te nájnūhun jeē jési in sahma nuū jeē níjnūní i.

<sup>16</sup> Te jeē násāma ini in ñayuu quívi i nuū maá Jítóho yō Cristo, yūcuán na te cújiyo-ni jeē jési ún. <sup>17</sup> Chi Jítóho yō cúu maá Espíritu. Te nuū ine Espíritu maá Jítóho yō, yūcuán cúu nuū iyó libre ñayuu jeē tuá yíhi i chíji ley jenahán. <sup>18</sup> Te jeē yúcuán maá yó jijnáhan yó, tuá jési nuū jeē níjnūní yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhu maá Jítóho yō. Te maá yó tāca quívi cuanasāma yó cuandu luu ga anuá yō nájnūhun cáa maá yá. Chi maá Jítóho yō jeē cúu ya Espíritu, súcuan sáha ya jíin yó.

#### 4

<sup>1</sup> Núu súcuan te tu ndínuu ni rī cánacani rī jnūhun ya. Chi siquī jeē ní cundáhú ni yā ruhū jijnáhan rī te ni jéhe ya jniñu yáha nuū rī. <sup>2</sup> Te tu cásáha rī jniñu néé jéé cúcanu yō sáha, ni tu cájica cuu rī jíin jnúhun ndíchí stáhú, ni tu cásama rī jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni tāca ñayuu ini anuá i jeē cácahān ndaā rī jito jíinū Yaā Dios. <sup>3</sup> Te núu iyó ñayuu tu jécūhun ni jnūhun jnama ya yohó jéé cánacani rī, te súcuan cúu nuū máni maá ñayuu jnahnū ndetū. <sup>4</sup> Te jeē tu cácaandíje i, te maá jéxeén jeē ndácu jniñu ini ñayívi yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhyo luu cújéhu Cristo, Yaā jeē ínuú cáa jíin Yaā Dios. <sup>5</sup> Te jeē cánacani rī jnūhun, te nasūu jnúhun maá rí, chi sa suhva jnūhun Jítóho yō Jesucristo cánacani rī. Te maá rí chi cácuu rī mozo-ni nuū rō jijnáhan rō jéé siquī jeē maní rī jíin Jesús. <sup>6</sup> Chi ná ni sáha Yaā Dios ñayívi te ni

cahān yā jeē na cúndijin nuū néē. Te suni súcuan ní sáha ya jeē ní cundijin nuū anuá yō jeē cájécūhun in yō siquī Jesucristo, ndese ndíndēe núu yā, cúu jeē yōhyo luu cújéhu ya nájnūhun cúu Yaā Dios.

*Jeē cándiquīn yō jnūhun cácaandíje yó yá*

<sup>7</sup> Te tāca jnúhun yáha jeē yóhyo luu cújéhu, chi nájnūhun jeē níjūhun ini in quísi ñuhun. Chi cácuu yó nájnūhun quísi ñuhun, chi tú na fuerza yō. Te jeē yúcuán cájini vāha rī jeē maá Yaā Dios cúu jeē jéhe poder siquī jnúhun yáha jeē yóhyo luu cújéhu, te nasūu fuerza maá rí cúu. <sup>8</sup> Te jeē yúcuán, vésú tāca lado cájito rī jnúndóho, te tu sáha jeē ma ndúsī gā ni rī. Te vésú cácuulhyá ni rī siquī jnúndóho, te cáñuhun ni rī jeē quee vāha jniñu rī. <sup>9</sup> Te vésú cájito xeén ñayuu ruhū, te maá yá tu stóo ya ruhū jijnáhan rī. Te vésú cánducú i snáa i ruhū jíin jniñu sáha rī, te ma cúu. <sup>10</sup> Te ndéni cúu nuū cuángoo rī, te nájnūhun ni ndoho Jesús jeē ni jíhī yā, suni súcuan cándoho rī jeē jé yajni cuu rī, návāha suni cuu stéén rī fuerza Jesús jeē técu yā ini yíqui cúñu rī. <sup>11</sup> Chi jeē niní cátecu rī, te tāca quívi je yajni cahni ñayuu ruhū jeē siquī Jesús. Te súcuan te cájito ñayuu jeē técu Jesús ini yíqui cúñu rī jeē cúu. <sup>12</sup> Núu súcuan te ruhū jijnáhan rī, níní cúu jeē jé yajni cuu rī siquī jnúhun ya, te yūcuán sáha jeē cotecu maá ró ní cáni jijnáhan ró.

<sup>13</sup> Te yósó núu tútu iī: Ni candíje rī te jeē yúcuán ní cahān rī, achí. Te suni jeē cácaandíje maá rí cúu jeē cánacani rī jnūhun ya. <sup>14</sup> Chi cájini rī jeē maá Yaā jeē ní nastécu Jítóho yō Jesús, suni súcuan nastécu yā ruhū, te sáha ya jeē in cáhnu ni cuiñi ndíhi yó núu yā. <sup>15</sup> Chi tāca jnúndóho yáha cándoho rī návāha coo vāha rō jijnáhan rō. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhyo

cuehē i nacuatáhu i nuū Yaā Dios, te cujéhnú ga yā sáha.

<sup>16</sup> Jeē yúcuán cúu jeē tu ndínúu ni rī, te vēsú cuandihí fuerza yiqui cúñu rī, te sa suhva cuanduu fuerza gā anuá rī tāca quívi. <sup>17</sup> Chi jnūndóho jeē ndóho yó ñayívi yáha, tú-ni xeēn cúu, te yachī yáha. Te sáha jeē nihín yō ñn tahū jeē cujéhnú yó níí cáni jeē cáa ndasí gá vēsú jnūndóho ún. <sup>18</sup> Te tu táñúhún yó nuū tāca jnūndóho jito yó núu vijna, chi sa suhva táñúhún yó nuū tāca jéē váha jeē tu jito yó núu vijna. Chi tāca jéē jito yó núu vijna, chi yachī ndihí, te tāca jéē tu jito yó núu, chi coo níí cáni.

## 5

<sup>1</sup> Chi yiqui cúñu yō jeē ndeé yó ñayívi yáha, cúu nájñúhun ñn vehe jeē náā. Te cájini yō jeē núu na náā, te cuáha Yaā Dios ñn yiqui cúñu jeē, te suu cúu nájñúhun ñn vehe jeē coo níí cáni ichi ándiví. Te nasūú ñn vehe jeē sáha ñayuu cúu, chi jeē sáha Yaā Dios cúu. <sup>2</sup> Te níí jéē ndeé yó vehe yáha jeē cúu yiqui cúñu yō, te cájitū ni yō sáha, chi yōhoyo cúní yō jeē núcūhun yó yiqui cúñu jeé yó nde ándiví. <sup>3</sup> Chi jeē núcūhun yó un, te ma cóo máá na anuá yō jeē náā yiqui cúñu yō yáha. <sup>4</sup> Chi níí jéē iyó gá yō ini vehe yiqui cúñu yō yáha, te jítú ni yō te cúcuíhyá ni yō. Te nasūu jéē cúní yō jeē stóo yó yiqui cúñu yō te coo máá-ni ánuá yō. Chi sa suhva cúní yō núcūhun yó jéē jeé, návāha ndahvā yiqui cúñu yō jeē náā, te coo máá jéē cótecu níí cáni. <sup>5</sup> Te Yaā Dios cúu jeē ni sáha ya jeē súcuán coo yó. Te ni jēhe ya Espíritu yā jeē cóndee ñn anuá yō, te sáha Espíritu jeē iyó ndāā ni yō jeē cuáha Yaā Dios tahū yō.

<sup>6</sup> Núu súcuán te níí cúu jeē cácuáhnu ni rī. Chi cájini rī jeē niní ndeé gá rī chíji yiqui cúñu yáha, te jicá cúu rī jín nuū ndeé máá Jítoho yō. <sup>7</sup> Chi vijna chi cácuandije rī jeē iyó yá jín rí, vēsú ná tu coto rī nuū

yā. <sup>8</sup> Te cácuáhnu ni rī, chí sáha rī cuenta jeē váha ga núu na quéndā rī chíji yiqui cúñu yáha te quihín rī condee rī jín máá Jítoho yō. <sup>9</sup> Jeē yúcuán cúu jeē cánducú ndéyí rí sáha rī jeē cusí ni yā jín rí, vēsú núu ndeé gá rī yiqui cúñu rī chí vēsú núu condee rī jín yá. <sup>10</sup> Chi cánuú jéē ndihí yó cuiñi yuhu mesa Cristo jeē sándaā yā jniñu yó. Te ná ñn ná ñn yó níhín yō siquí ndese ni casáha yó, á jéē váha chí jéē neé, ná ni condee yō chíji yiqui cúñu yō.

*Siquí jeē ndávicoo yó núu jnúhun maní Yaā Dios jín yó*

<sup>11</sup> Núu súcuán te cándiso ñyo rī nuū máá Jítoho yō, te jeē yúcuán ndúcú ndéyí rí scandíje rī ñayuu. Te jíní Yaā Dios jeē cáhíyo ndaā rī, te ñúhun ni rī jeē suní súcuán cájini máá ró. <sup>12</sup> Te nasūu jéē cánducú tucu rī cahān rī jeē váha ga tēe cácuu rī, chí sa suhva cástūhun rí jeē cuu cusí ni rō jeē siquí rī jijnáhan rī. Te súcuán te cuu stíó cuiñi rō nuū ñayuu jeē cutéyí i siquí ndese cáa ñayuu, te tu sáha i cuenta ndese cáa ñn anuá ñayuu. <sup>13</sup> Te va sanaa te cájeni ni rō jeē tēe loco cácuu rī jeē cácahān rī súcuán. Te siquí jeē cándihví ni rī jehē Yaā Dios cúu. Te tuú chí cáhíyo vāha xiní rī, te jeē yúcuán cájejníñu rī jeē quéndō vāha ró. <sup>14</sup> Chi siquí jeē ní cundáhú ni Cristo ruhū jijnáhan rī cúu jeē cánuú nacaní rī jnúhun ya. Chi cájini vāha rī jeē ní jihí mañúhún-ni ya jeē siquí ndihí yó, te jeē yúcuán nájñúhun ni jihí ndihí yó jín yá. <sup>15</sup> Chi ni jihí yā jeē siquí ndihí yó návāha tāca yó jéē tēcu, ma cótecu ga yō jeē sáha yó jéē cúní máá yó, chí sa suhva jeē cúní máá yá jeē ni jihí yā te ni natecu yā jeē siquí yō. <sup>16</sup> Jeē yúcuán tuá casáha rī cuenta ndese-ni cándāa ñayuu, nájñúhun casáha ñayuu ñayívi. Te vēsú súcuán ni casáha rī cuenta siquí Cristo nde saá, jeē ñn tēe-ni cúu ya, te vijna chí cájini rī jeē cúu ya Sehe Yaā Dios.

17 Chi núu ñn ñayuu yíhi i ndaha Cristo, te je ni ndujeé i. Te tãca modo neé ni nevãha i, je ni yãha cuahãn, te vijna je ni ndujeé ndihi.

18 Te Yaã Dios cúu jeé sãha ndihi jeé yãha, chi jíin Cristo ni sãha ya jeé ní ndívicoo yó núu jnúhun maní yã jíin yó. Te ni tejníñu ya ruhū jeé cáncani ri jnúhun jeé ndívicoo ñayuu nuū jnúhun maní yã jíin i. 19 Chi jíin Cristo te ni sãha Yaã Dios jeé ñáyuu ñayívi ndívicoo i nuū jnúhun maní yã jíin i. Te tu ndácuñehen ya cuēchi ni casãha ñayuu. Te ni tejníñu ya ruhū jeé cáncani ri jnúhun yãha ndese ndívicoo i nuū jnúhun maní yã jíin i. 20 Núu súcuan te cácuu ri tēe cájica jniñu máá Cristo. Te jeé cahán rī, te nájnūhun jeé maá Yaã Dios cahán ndahú yá jíin ró. Núu súcuan te cácahãn ndahú rī jíin ró jeé cahán Cristo, jeé na ndívicoo ró núu jnúhun maní Yaã Dios jíin ró. 21 Te Cristo, vēsú tú ni ñn cuēchi ya, te ni sãha Yaã Dios jeé ní nucondee cuēchi yó síquī yã. Te súcuan te yóhó jēe yíhi ndaha Cristo, ni nucondee síquī yō jeé iyó ndãã yō nájnūhun iyó ndãã Yaã Dios.

## 6

1 Núu súcuan te síquī jeé cácuu ri tēe casájniñu jíin yá, te cácahãn ndahú rī jíin ró jeé ma stóo uun ró jnúhun jeé ni sãha Yaã Dios jeé vãha róhó. 2 Chi áchí yá nuū tútu ñi: Máá tiempo cuní maá rī te cuní sōho rī jnúhun cáhãn ndahú ró jíin rī.

Te máá tiempo jnáma ri ñayuu, te jnama ri rohó.

Achí yá. Te vijna-ni cúu máá tiempo jeé cuní yã, chi vijna-ni cúu tiempo ni quiji Yaã jnáma yóhó.

3 Te cánducú rī jeé ma sãha ri ni ñn jniñu jeé casi jeé candíje ñayuu, návãha ma cahán i síquī jniñu ndíso rī. 4 Chi sa suhva cánducú rī jeé ndihi jeé sãha ri, steén jeé cácuu

ri tēe cájejniñu nuū Yaã Dios. Jeé yúcuan cájendeyí ni rī jíin jēe ndóho ri jnúndóho, jíin jēe cúmaní nuū rī, jíin jēe yí sãha jíin rī. 5 Chi ni iyo tijní jínu jeé ní cacani i ruhū, jeé ní cachune i ruhū vecãa, jeé ní candonda i síquī rī, jeé ní casájniñu ñihin ri, jeé ní cajehni rī mãhna máá rī, jeé ní cahíyo ndite ni rī.

6 Te suni cánducú rī jeé cuajnúhún i ruhū síquī jeé ndoo cájica rī, te cájecūhun vãha ni rī jnúhun ndaã, te cáhíyo paciencia ni rī, te vãha ni rī, te ndéé Espíritu Santo ini rī, te cákundáhú ndije ni rī jnáhan rī. 7 Te cáncani ndaã rī jnúhun, te poder Yaã Dios íne jíin rī. Te jíin jnúhun ndaã cándahva rī táca jniñu néé, chi nájnūhun jeé cájejnãhan ri síquī. Chi nájnūhun jeé ndónda un síquī rī te ndónda ri síquī. 8 Iyó jínu yíñúhún ñáyuu jíin rī, te iyó jínu tuú. Iyó jínu jéjnúhún i ruhū, te iyó jínu cácahãn i síquī rī. Iyó jínu cácahãn i jeé tēe stáhú cácuu rī, te iyó jínu cácahãn i jeé tēe ndaã cácuu rī. 9 Iyó jínu casãha i nájnūhun jeé tu jíin i ruhū jijnãhan ri, te iyó jínu jeé jíin vãha i ruhū. Iyó jínu jeé cuní ñayuu cahni i ruhū, te cátecu nahín rī. Te vēsú cástóho i ruhū, te tu cájihī rī sãha. 10 Te vēsú iyó jēe cácuuñhyá ni rī, te níni cácusī ni rī. Te vēsú tēe ndahú cácuu rī, te sácúcá rī cuehē ñayuu jíin jnúhun ya. Te vēsú tú na vé cánevãha ri, te jíin máá yá te ndihi-ni cúu jeé cánevãha rī.

11 Hermano ñuu Corinto, súcuan cúu jeé cácahãn cají rī jíin ró j-jnáhan ró, chi síquī jeé maní rī jíin ró, jeé yúcuan cáchí ndihi ri ndese cándoho rī. 12 Máá rī jijnãhan ri cácahãn cají rī síquī jeé maní ndasí rī jíin ró, te máá ró jijnãhan ró sanaa te tu súcuan cúu. 13 Nájnūhun cáhãn tatá jíin séhe, súcuan cáhãn ndahú rī jíin ró jeé nájnūhun iyó maní rī jíin ró, súcuan na cóo maní tucu ró jíin rī.

*Síquī jeé cúu yó templo Yaã Dios*

14 Ma quívi nduu rō jíin jniñu néé cásáha ñayuu tu cá candíje, chí ma cúu coo inuú rō jíin i. ¿Chí ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyūcú inuú ñáyuu cájica jíin luz yā jíin ñáyuu cájica nájnūhun nuū néē? 15 ¿Ndesé cuu coo inuú ní Cristo jíin Satanás? ¿Te ndese cuu cuiñi cáhnu ñayuu cá candíje jíin ñáyuu tu cá candíje? 16 ¿Te ndese cuu quijnáhan templo Yaā Dios jíin ídolo? Chí máá rō cácuu templo Yaā Dios, Yaā técu, chí ndéé yá íni anuá rō, nájnūhun ní cahān yā:

Condee rī ini i te caca cuu ri mēhñú

i,  
te cuu ri Yaā Dios maá i,  
te cuu i ñayuu maá rī.

17 Te jeē yúcuán ní cahān gā yā:

Ma quívi nduu rō jíin jniñu néé cásáha i,

te cusūn rō jijnáhan rō, áchí Jítóho yō.

Te ma jnñí rō táca jéé tú ndaā.

Yūcuán na te naquihin ri rohó,

18 te cuu ri Tatá rō jijnáhan rō,  
te cuu rō séhe yí rí jíin séhe síhí rí,  
áchí Jítóho yō, Yaā jnñí ndihí poder.  
Achí tutu.

## 7

1 Núu súcuán, ñānī mánī, cánevāha yó táca jnūhun yáha jéé ní jéjnūhun ya. Jeē yúcuán na sándoo yó máá yó táca jéé sajnéhén yiqui cúñu yō jíin ánuá yō. Te na cónso Iyo yó núu Yaā Dios, te coo ndoo coo íi yō nuū yā jíin ndihí jniñu cúni yā.

*Jeē ní canacani ni ñayuu Corinto siquī cuéchi i*

2 Coó manī rō jíin rí jijnáhan rō víi. Chí tu ní sáha rí falta nuū ní ñn rō, te tu ní stívi rí anuá ní ñn rō, te ní ñn rō tu ní stáhú rí. 3 Te nasūu jéé nducú rí cahān rī nuū rō cúu jeē cahān rī súcuán, chí je ní cahān rī jeē yóhoyo manī rí jíin rō. Te níni ñūhun ní rí rohó, vēsú cuu yō chí cotecu yō. 4 Te cúcáhnu ndasí ní rí

rohó jíjnáhan rō, te cúsiñ teyí ní rí jeē siquí rō. Te vēsú cájito rí táca jnūndóho yáha, te íyo ndeyí ní rí te cúsiñ ndasí ní rí jeē siquí rō.

5 Ná ní jengoo rí Macedonia te tu ní íyo nayúú ní anuá rí, chí sa suhva yí ní íyo jnūndóho jíin rí táca lado. Chí ní íyo jeē ní castáhān jnáhan jíin rí, te ní cayūhu rí sanaa te caca yátá ñáyuu cá candíje. 6 Te Yaā Dios jeē sáha jeē ndúndeyí ní ñayuu cá cucuíhyá ní, ní sáha ya jeē ní candúndeyí ní rí, chí ní quiji Tito ní sáha ya. 7 Te ní candusiñ ní rí, nasūu máá ñn-ni siquí jeē ní quiji de, chí suni jeē ní ndúndeyí ní de ní casáha rō. Chí ní castūhún de jeē cáñuhun ní rō coto tucu rō rúhū, jíin jéé cá cucuíhyá ní rō jeē siquí cuéchi rō, jíin jéé cá nacani ní rō jehē rí. Te jeē yúcuán ní cusíñ gā ní rí.

8 Te carta jeē ní tají rí nuū rō, vēsú ní sáha jeē ní cacucuíhyá ní rō, te tuá nácani cuíhyá ní rí jeē ní sáha súcuán. Chí vēsú ní cucuíhyá ní rí saá, te vijna te tuá, chí jíin rí jeē jecu-ni quívi ní cacucuíhyá ní rō ní sáha. 9 Te vijna te cúsiñ ní rí, te nasūu síquī máá jéé ní cacucuíhyá ní rō. Chí cúsiñ ní rí jeē ní jejníñu jeē ní cacucuíhyá ní rō, chí ní sáha jeē ní canacani ní rō siquí cuéchi rō. Chí ní cacucuíhyá ní rō nájnūhun cúni máá Yaā Dios, te nasūu jéé ní sáhuhū rí rohó. 10 Chí núu cúcuíhyá ní yō nájnūhun cúni Yaā Dios, te suu sáha jeē nácani ní yō siquí cuéchi yó te jnama ya yohó, te ma cóo ga jeē nácani cuíhyá ní yō. Te jeē cá cucuíhyá ní ñayuu tu cá candíje, tu jéjníñu jeē nácani ní i, chí sa jnahnū ndetū i. 11 Te ní cacucuíhyá ní rō nájnūhun cúni Yaā Dios, te vijna te cájito rō náa vāha ní jejníñu. Chí ní canacani ndasí ní rō ní sáha, te ní canducú rō jeē quéndoo ndaā rō, te ní cacuxeēn rō nuū téé ní sáha cuéchi, te ní cayūhu rō jeē ní castívi rō núu yā. Yūcuán na te yóhoyo ní cacuni rō coto tucu rō núu rí, te yóhoyo



ni candihvī ni rō ni cacuxeēn rō nuū tēe ni sāha cuēchi ún. Te súcuan ni castéén rō jeē tú cuēchi ró, chi tu ní cájejnúhún ró cuēchi ni sāha tēe ún. <sup>12</sup> Te jeē ní tee ri carta un, nasūu máá-ni jeē cúxeēn rī nuū tēe ni sāha cuēchi ún, ni nasūu máá-ni jeē cahán rī jehē tēe ni ndoho ni sāha de. Chi sa suhva ni tee ri návaha nucúhun ni rō ndese yōhyo ni canacani ni rō jehē rī jito jínúu Yaā Dios. <sup>13</sup> Jeē yúcuan ní candusī ni rī jeē siquī rō.

Te víhyá gā ni cacusī ni rī jeē ní jini rī jeē cúsī ni Tito, chi ni nduu nayúú ini de ni casáha ró. <sup>14</sup> Chi je ni cahán rī jín de jeē cúsī ni rī jeē váha ñayuu cácuu ró, te vijna te tu ní quéndōo rī jnūhun canu jeē siquī rō. Chi nájnūhun ni cajini rō jeē iyó ndáa táca jnūhun ni cacahán rī jín ró, suni súcuan ni cundaā jnūhun ni cacahán rī jín Tito jeē cúsī ni rī siquī rō jeē váha cásquícu ró. <sup>15</sup> Te víhyá gā manī de jín ró vijna jeē ñūhun ni de jeē váha ni cajetáhú ró jeē cahán de, te ni cahīyo yñūhún ró ni candiso iyo ró núu de. <sup>16</sup> Núu súcuan te cúsī ni rī siquī jeē cucáhnu ndasí ni rī rohó jijnáhan ró.

*Jeē na cúsī ni i socō i cuehē*

## 8

<sup>1</sup> Hermano, vijna te suni cáculi rī castūhun rī nuū rō jijnáhan ró ndese cuehē jeē váha ni sāha Yaā Dios jín ñayuu cáculíje cáyūcú Macedonia. <sup>2</sup> Chi vésú yōhyo ní jito ndee jnūndóho i, te suni yōhyo ni cacusī ni i jín jnūhun ya. Te vésú ñayuu ndahú ndasí cácuu i, te yōhyo váha ni cajequin i cuehē xūhun jéé cúu ñayuu ndahú cáculíje. <sup>3</sup> Chi cúu rī testigo jeē ní cacusī ni máá i ni cajēhe i ndésaa ni canda i, te nde víhyá gā ni cajēhe i. <sup>4</sup> Chi ni cacahán ndahú ndasí i jín rī jeē na cuáha rī jnūhun chindéé ñáhán i jín yó cuáha i xūhun cuu hermano cándoho ndahú. <sup>5</sup> Te víhyá gā ni casáha i vésú jeē ní cajeni ni rī,

chi xīhna gā ni casocō i máá i nuū Jítoho yō, te sáá te ni cajēhe i máá i sāha i táca jéé cáculi rī, ndihi ndese nújnahan ni Yaā Dios. <sup>6</sup> Te jeē súcuan ni casáha ñayuu Macedonia, te ni castihvī ni rī Tito jeē na jéé tucu de nuū máá ró, sāha de jeē jīnu jniñu jeē ni squéjéé de jín ró jeē suni caquin rō cuehē xūhún cuu ñayuu ndahú. <sup>7</sup> Chi máá ró yōhyo váha cásáha ró táca-ni, chi váha cáculíje ró, váha canacani ró jnūhun, váha cájecūhun ni rō, váha cándihvī ni rō, váha manī rō jín rī jijnáhan rī. Núu súcuan te suni cáculíje váha ró jniñu yáha jéé cuáha ró jéé cúu ñayuu ndahú.

<sup>8</sup> Te nasūu jéé cuní rī ndacu rī jniñu nuū rō, chi sa cástūhun rī nuū rō ndese yōhyo cáculi ni sava ga ñayuu jéhe i xūhún, te súcuan te cuní rī jeē suni máá ró cáculíje ndije ni rō ñayuu ndahú. <sup>9</sup> Chi je cajini rō ndese yōhyo váha ni Jítoho yō Jesucristo jín yó. Chi siquī jeē ní culíje ni yā rohó te ni nasáha ndahú yá máá yá, vésú culíje ndasí yá nde andiví núu. Te súcuan ni sāha ya jeē cáculíje ró ndihi jeē ndíso jnūhun ya, siquī jeē ní nasáha ndahú yá máá yá.

<sup>10</sup> Te jeē váha máá ró cúu jeē na cáculi rī ndese jéni ni rī siquī jniñu yáha. Váha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sāha ró. <sup>11</sup> Núu súcuan te vijna te sínu ró. Te nájnūhun ni cacusī ni rō ni caquejéé ró jín, suni súcuan na cúsī ni rō sínu ró, chi cuáha ró núu ndese cáneváha ró. <sup>12</sup> Chi núu cúsī ni yó cuáha yó, te jétáhú yá núu ndese névaha yó, chi tu jícán yá jeē cuáha yó jéé tu névaha yó.

<sup>13</sup> Te nasūu jéé cahán rī jeē cáculi ndahú ró máá ró jeé cáca ga nihīn i vésú jeé ndóo nuū máá ró. <sup>14</sup> Chi sa suhva jeē ñiñ cūhva-ni coneváha ró jín i. Chi cáneváha cuehē rō vijna, te cuu cuáha ró jéé cúmanī

nuū i. Yūcuán na te núu ndé ñn quiṽi conevāha i, te suni cuu cuāha i te núu ni cumanī nuū rō. Te súcuan te ñn cūhva-ni conevāha ró jijnáhan ró, <sup>15</sup> nájñuhun cáhán tutu ñ siquī ñayuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

*Jñuhun Tito jín ũū gā jnáhan de*

<sup>16</sup> Te na cútahū rī nuū Yaā Dios jeē ni sáha ya jeē ndihví ni Tito jehē rō nájñuhun cándihví ni maá rí. <sup>17</sup> Chi ni jetáhú de jeē ní cacahān rī jín de jeē jeē de nuū rō. Te siquī jeē ndihví ni de jehē rō, jeē yúcuán cuájeē de, chi súcuan cúu ni maá de.

<sup>18</sup> Te suni cátají rí ñn hermano cuajeē jín Tito nuū rō. Te táca grupo ñayuu cácandíje cájeñuhún i tēe un jēe váha jéñiñu de siquī jñuhun jeē jnáma ya yohó. <sup>19</sup> Te táca grupo ñayuu cácandíje suni ni catee i jniñu siquī de jeē cáca de jín rí chindéé ñáhán de quindēca de xūhun jín rí jeē ní cajēhe ñayuu. Te jniñu yáha cásáha rī nāvāha cahān ñayuu jeē yóhoyo váha Yaā cúu máá Jítoho yō, chí cuni i ndese yóhoyo cácusī ni rō cásoçō rō xūhún. <sup>20</sup> Te quingoo ndindúú rí nāvāha ni ñn ñayuu ma tēe i cuēchi siquī rī siquī xūhun cásoçō ñayuu. <sup>21</sup> Chi ndúcú rí jeē squícu ndaā rī táca jniñu, nasūu máá ñn-ni nuū Yaā Dios, chí suni nuū ñayuu.

<sup>22</sup> Te suni cátají rí ñn hermano yō cuajeē de jín ndindúú tēe yáha. Te tijni jínu ni steén de jeē yóhoyo cúsi ni de ndihví ni de táca jniñu. Te vijna chí ndihví gā ni de jehē rō, chí cúcáñu ndasí ni de jeē cásquícu ró. <sup>23</sup> Te núu cácajnühún ñayuu siquī Tito, te achi rō jeē cúu de tēe chindéé ñáhán jéñiñu jín rí nuū rō siquī jñuhun ya. Te ũū gā hermano yō yáha, achi rō jeē cácuu de tēe jeē ní catejñiñu ñayuu cácandíje, te cáhíyo yíñuhún de nuū Cristo. <sup>24</sup> Núu súcuan te steén rō nuū de jeē

cáhíyo manī ndije ró jín de, nāvāha na cúni táca grupo ñayuu cácandíje. Te súcuan cuni i jeē tu ní cácusī cáhá ni rī siquī rō.

*Siquī jeē cájequin i xūhún cuu táca hermano*

## 9

<sup>1</sup> Te vijna te tuá jini ñuhún tee ri nuū rō siquī xūhun jeē cájequin rō cuu táca hermano cándoho ndáhú. <sup>2</sup> Chí je jini rī jeē cánujnahán ni rō cuāha ró. Te jeē yúcuán máni cúsi ni rī cahán rī jín ñayuu Macedonia jeē rohó ñayuu Acaya, je ni casátuhva ró xūhun ndé jendujin. Te jeē súcuan ni cacusi ni maá ró, te jeē yúcuán cuehē ñayuu Macedonia ni cacondihví ni i ni cajēhe máá i. <sup>3</sup> Te tájí rí ndinúni hermano yáha cuájeē maá de nuū rō xīhna gā, nāvāha jeē jinú maá rí te ma quéndōo néé rí siquī jñuhun ni cahán rī jeē squícu váha ró jín jniñu ún. Chí coo tūhva ndije ró jín xūhun nájñuhun ni cahán rī jín i. <sup>4</sup> Chí sanaa te jecoo jecu tēe Macedonia jín rí, te núu cuni de jeē tu cáhíyo tūhva ró, te coo jñuhun canu nuū rī, te suni nuū maá ró jijnáhan ró, chí ni cahán teyí rí jeē cáhíyo tūhva ndije ró. <sup>5</sup> Jeē yúcuán ní jeni ni rī jeē cánuú cahán rī jín táca hermano yáha jecoo de xīhna gā, te sáa te jinū rī, nāvāha stihví ni de róhó jéé yáchī na cóo tūhva xūhun jéé ní cacahán rō jeē cuāha ró. Te súcuan te coo tūhva siquī jeē váha ni rō, te nasūu jéé safuerza rī rohó.

<sup>6</sup> Cocuhun ni rō jñuhun yáha, jeē núu jecu-ni cuāha ró te suni jecu-ni nanihín rō: Chí tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. <sup>7</sup> Táca ñn ñn ró cuāha ró ndésaa ni tee ni rō. Ma cúxi ni rō cuāha ró, chí nasūu fuerza cúu. Chí Yaā Dios manī yā jín ñayuu jeē cúsi ni cuāha. <sup>8</sup> Te máá Yaā Dios cuu sáha ya jeē nducuehē ndinuū jeē sáha cuu ró jijnáhan ró, nāvāha

níní conevāha ró ndihi tācá jeē jíni ñúhún ró, te coo sobra gā jeē cuāha ró jée cúu tācá jniñu váha. <sup>9</sup> Chi súcuan cáhán tutu ñi siquī tāca ñayuu jéhe:

Ni scáa i ni jéhe i nuū ñayuu ndahú. Te tācá jniñu váha sáha i, chi quendōo ní cáni.

Achí tutu. <sup>10</sup> Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. <sup>11</sup> Súcuan cucúcá ró jíin tāca-ni, návāha cuu cuāha cuehē rō. Te xūhun jée cuāha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios. <sup>12</sup> Chi xūhun jée cuāha ró núu i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. <sup>13</sup> Te cahān i jeē yóhoyo váha Yaā cúu Yaā Dios, chi xūhun jée ní cajéhe ró stéén jeē váha cácañdije ró jnúhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajéhe cuehē rō nuū i jíin núu sava ga ñayuu. <sup>14</sup> Te suni cacān tahú i jehē rō, chi coo manī ndasí i jíin ró siquī jeē yóhoyo váha ni sáha Yaā Dios jíin ró. <sup>15</sup> Te na cútahū yō nuū Yaā Dios, chi ni jéhe ya Sēhe ya nuū yō, jeē cúu ñn tahū cáhnu ndasí jée ma cánda cuiti yō castúhún ndihi yó.

*Jeē ndíso jniñu Pablo cúu de apóstol*

## 10

<sup>1</sup> Te ruhū Pablo, cáhán ndahú rí jíin ró jijnáhan ró jíin modo máa Cristo jeē vítá ni yā te váha ni yā. Ruhū, chi cácahān rō jeē iyó suchí ni rí núu ndée rí jíin ró, te núu ndée jíca rí te tu yúhú cuiti rí cahān ñihin rí jíin ró, cácahān rō. <sup>2</sup> Núu súcuan te cáhán ndahú rí jíin ró jeē núu na jée rí te ma cahān rō jnúhun jeē sáha jeē cuxeēn rí nuū rō. Chi sava ró cácahān jeē casáha rí jniñu

ya siquī jeē máni jeē na níhīn rí siquī ún. Núu súcuan te iyó tūhva rí cuxeēn rí nuū ñayuu cácahān súcuan. <sup>3</sup> Chi vēsú cácuu rí ñayuu cáyúcú ini ñayiví, te tu cájejnáhan rí modo cájejnáhan ñayuu ñayiví. Chi nájnūhun jeē cájejnáhan rí siquī tācá jniñu neé. <sup>4</sup> Chi nasūu ndajniñu ñayiví jéjníñu rí cájejnáhan rí, chi jíin poder Yaā Dios cájejnáhan rí snāā rí tāca fuerza jeē cúu contra siquī yā. <sup>5</sup> Súcuan cásnāā rí tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihi jeē tú váha jeē cájeni ni ñayuu, návāha cuandetū i nuū Cristo. <sup>6</sup> Te jeē jínu cuandetū váha máá ró, yūcuán na te coo tūhva rí cuāha rí castigo nuū tāca gá ñayuu jeē tu cájendetū.

<sup>7</sup> Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. <sup>8</sup> Te núu ni cahān téyí rí jíin ró jeē ndíso jniñu rí, te tu cúcanu rí sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jée snāā rí. <sup>9</sup> Núu súcuan te tu cúni rí jeē cáni ni rō jeē nducú rí siuhú rí rohó jíin carta rí. <sup>10</sup> Chi cácahān sava ró jée tāca carta rí yóhoyo stíhví ni te ñihin ndácu jniñu, te sa suhva núu ndée rí jíin ró te tu cúndeyí ni rí ndacu ñihin rí jniñu, te suni tu cúu cahān vāvihí rí, achí ró. <sup>11</sup> Te ñayuu cácahān súcuan na sáha i cuenta jeē nájnūhun ñihin cáhán carta rí jeē íne jíca rí, suni súcuan ñihin ndacu rí jniñu nuū rō jeē cóndee rí jíin ró.

<sup>12</sup> Te va ma chúndeyí cuiti ni nde rí jeē sajeñnu rí máá rí, nájnūhun cásáha sava tēe un jée cájejnúhún nde de máá de. Tāca tēe ún chi cáacunée de jeē cájeni ni de jeē cújéhnu ga de vēsú jnáhan de, te tu cásáha de cuenta ndese cúni Yaā Dios jeē caca de. <sup>13</sup> Te ruhū jijnáhan

ri, chi cutéyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máa Yaā Dios ni tee cúhva yá ndésaa cúu jeē sáha ri, te máa yá ni jéhe jnūhun jeē ni jínū rī nuū rohó ñáyuū ñuu Corinto. <sup>14</sup> Jeē yúcuān ná ni jinūcoo ri nuū rō jeē xihna ñúhún te nasūu jeē ni yáha ri nuū cúhva jniñu ní jéhe ya nuū rī. Chi xihna gā maá rí ni jinūcoo nuū rō ni canacani ri jnūhun vāha Cristo. <sup>15</sup> Te tu cácutéyí rí siquī jniñu ní casáha inga tēe, nájñūhun jeē jniñu máa rí cúu. Chi sa suhva cáñuhun ni rī jeē cuehē gā candíje ró, te súcuān te cuu sáha ri cuehē gā jniñu ya mēñu ró, te níni máa cúhva jeē ni jéhe ya nuū rī. <sup>16</sup> Yūcuān na te cácuān rī scuité núu ga rī jnūhun jnáma ya yohó núu táca gā ñuu yúcu ndé yúcuān gá. Te súcuān te ma quívi nduu rī cutéyí rí nuū jeē jé ni canacani inga tēe jnūhun.

<sup>17</sup> Te núu ndé tēe cúní de cutéyí de, na cutéyí de siquī jeē sáha máa Jítoho yō, nasūu siquī jeē sáha máa de. <sup>18</sup> Chi nasūu tēe jeē jejnūhún máa cúu jeē quéndōo yíñuhún, chi sa suhva tēe jeē jejnūhún máa yá.

*Jeē cahán Pablo siquī tēe cánacani jnūhun stáhú*

## 11

<sup>1</sup> Cone cáhnu ni rō jijnáhan ró jeē cahán rī jecu jnūhun modo nájñūhun cácahān ñayuu canéé. Núu súcuān te cáhnu coo ni rō víi. <sup>2</sup> Chi cúcuíñí rí jehē rō jijnáhan ró, nájñūhun cúcuíñí Yaā Dios. Chi cácuu ró nájñūhun ñn sūchi síhí íyó ndoo, te ni sáha ri jeē quijnáhan ró jín Cristo, nájñūhun quijnáhan ñn sūchi síhí jín máñuhún-ni yíi. <sup>3</sup> Te yúhú rí sanaa te cuāha ro jnūhun stáhú táca tēe un rōhó, te siáá rō jnūhun jeē chiñuhún ndāā rō Cristo nde jín ini jín ánuá rō. Chi suni súcuān ni sáha Satanás jín Eva, chi ni quívi ini ñn coō, te ni stahú un ña

jín jnūhun ndíchí stáhú. <sup>4</sup> Chi núu quíjicoo tēe nuū rō jeē tu cánacani ndaā de jnūhun Jesús nájñūhun ni canacani ri nuū rō, te va yōhyo vāha cájetáhú nde ró de. Te suni súcuān vāha cájetáhú nde ró núu inga espíritu jín núu inga jnūhun jeē tu quijnáhan jín Espiritu jín jnūhun jeē ní cacandíje ró jé jnáma ya rohó. <sup>5</sup> Te táca tēe cácuān ró un jéé cácahān jeē apóstol cujéhu ga cácuu, tú cuiti jeē cujéhu ga nde de nuū rī. <sup>6</sup> Chi vēsú tu níhín vāha nde ri modo cahán rī, te jécūhun vāha ni rī. Chi jín ndihí jniñu ni casáha ri mēñu ró ni castéén cají rí nuū rō jeē súcuān cúu.

<sup>7</sup> Tu ní jícán rī xūhun núu rō siquī jeē ní nacani ri jnūhun jnáma ya yohó. Te súcuān ni cotecu ndahú rí návāha quéndōo vāha ga maá ró jín jnūhun ya. ¿Te va cuēchi ni sáha ri jeē ni sáha ri súcuān, chí naún?

<sup>8</sup> Chi sava ga grupo ñayuu cácuān jeē ni quihin ri xūhun jéé ní cajēhe i nuū rī, návāha súcuān-ni nacani ri jnūhun ya nuū rō jijnáhan ró. <sup>9</sup> Te ná ni condee rī jín ró te ni ndihí xūhun rí, te tu ní jícán cuiti rī nuū ní ñn ró. Chi hermano jeē ní quijicoo ichi Macedonia ni cajēhe de nuū rī jeē cúmaní. Te jeē súcuān tu ní stáhān rí rohó, te ni ma sáha cuiti rī. <sup>10</sup> Te nájñūhun cúcáhnu vāha ni rī jeē jini rī jnūhun ndaā Cristo, suni súcuān jini rī jeē ma quihin ri xūhún nuū ni ñn ñayuu ní ndáñúū Acaya, návāha ma cási i jeē cúsiñí ni rī jeē súcuān-ni nacani ri jnūhun ya. <sup>11</sup> ¿Te á siquī jeē tú maní rī jín ró cúu jeē cahán rī súcuān, jéni ni rō, chí naún? Tuú chi máa Yaā Dios jini yā jeē maní rī jín ró jijnáhan ró.

<sup>12</sup> Te sáha ri ná-ni sáha ri, chi ma quihin ri xūhun ró, návāha casi rī nuū jeē casatéyí tēe un máa de jeē cácahān de jeē inuu casáha de jniñu ya jín rí. <sup>13</sup> Te tēe ún chi nasūu apóstol ndaā cácuu de, chi máni máa jnūhun stáhú cácahān de,

te cásaha de máa de jeē cácuu de apóstol Cristo. <sup>14</sup> Te tu náa ni yō jito yó jéē casáha de súcuan, chi je jini yō jeē suni Satanás násama máa te stáhú jéē sáha máa nájnūhun in ndajehé Yaā Dios jeē jica jín luz yā. <sup>15</sup> Te jeē yúcuan suni tu náa ni yō jito yó jéē téē cájejniñu nuū Satanás, cásaha de máa de jeē téē ndaā cácuu de. Te in quiví te nanihín de siquī jniñu néē cásaha de.

*Jnūndóho ni ndoho Pablo siquī jeē cúu de apóstol*

<sup>16</sup> Inga jínu cáhán rī jín ró jeē ni in ró ma cáni ni rō jeē téē cánéé cúu rī. Te núu súcuan cájeni ni rō, te va cuatáhú nde ró jéē cahán rī nájnūhun téē cánéé, návāha suni cuu cutéyí nde rī jecu nájnūhun cásaha téē ún. <sup>17</sup> Jeē cahán rī vijna chi nasūu jéē ní ndacu máa Jítóho yō cúu, chí sa nájnūhun téē cánéé cáhán rī jeē cutéyí nde rī. <sup>18</sup> Chi cuehē de cásatéyí de máa de modo jeē iyó ini ñayiví, te suni súcuan na sátéyí nde rī maá rí núu súcuan. <sup>19</sup> Te va téē cáhīyo cájī xínī cácuu nde ró, te jeē yúcuan cúu vāha ni nde ró cuatáhú ró in téē cánéé núu súcuan. <sup>20</sup> Chi va vāha-ni cájendeyí ni rō nuū téē un jéē casáfuerza de róhó cuajniñu ró núu de, chí cásaha de jeē ndundáhú ró, chí cáquende de ndajniñu ró, chí cásájéhnu de máa de nuū rō, chí ndé cácatu de nuū rō. <sup>21</sup> Te vēsú cúcanu nde rī cahán rī, te na cáhán rī jeē tu ní cúndeyí ni nde rī satéyí rí maá rí nájnūhun casáha téē ún.

Te vijna te núu iyó sava téē chúndeyí ni de sátéyí de máa de, te va suni chundeyí ni nde máa rí núu súcuan. Te va cáhán rī nájnūhun cáhán in téē cánéé. <sup>22</sup> Núu cácutéyí de jeē téē hebreo cácuu de, te suni súcuan ruhū. Núu téē Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup> Núu téē cájejniñu nuū jnúhun Cristo cácuu de, te víhyá gā

ruhū. Te va cáhán rī nájnūhun téē cánéé jéē cutéyí rí súcuan. Chi ni caa ga ni sájniñu rí vēsú maá de jínáhan de, te ni caa ga ni cacani i ruhū, te cuehē gā jínu ni ine rí vecā, te suni cuehē gā jínu ni cacuni ñayuu cahni i ruhū. <sup>24</sup> Te jnáhan rí hebreo, uhūn jínu ni cacani xeēn de ruhū jín cuarta ñi, in cūhva jeē jé yajni cuu rí sáha. <sup>25</sup> Unī jínu ni cacani de ruhū jín yujnu xí, te in jínu ni cajēhe de yuū xinī rī. Unī jínu ni quēe barco jeē ní jica rí siquī jnúhun ya. Te in jecuāā jín in ndiāca ni yosō candá rí nuū cunú ndute mar. <sup>26</sup> Cuehē jínu ni ndoho rí ni jica rí ichi, te ni cácu rí nuū táca yúte, te ni cácu rí nuū táca ñácuñhá. Ni cácu rí nuū ñayuu nación rí jín núu ñayuu ñuu jícá. Ni cácu rí cháha chúcuan ná ni Iyo rí ñuu jín rancho jín mar. Ni cácu rí nuū táca jnáhan rí jeē tu iyó ndaā. <sup>27</sup> Ni sájniñu nihin rí te yí ní ndoho rí. Cuehē jínu ni jehni rí maá rí māhná. Ni jii rí sōco, ni jichī rí ndute. Cuehē jínu ni Iyo ndite ni rí, ni cuijnu rí, ni cumani sahma rí

<sup>28</sup> Te siquī táca jéē yáha chí iyó gá. Chi ndiquiví ndóho rí jeē nácani ndasí ni rí jehē táca grupo ñayuu cácadíje. <sup>29</sup> Núu in ñayuu tu fuerza ini i, te suni ndóho rí jehē i. Te núu in ñayuu quiví i cuēchi sáha jnáhan i, te ndóho rí jnúhun cúcanu jín jnúhun náxeēn ni. <sup>30</sup> Núu súcuan te núu cánuú cutéyí nde rí, te va cutéyí rí siquī táca jéē steen jeē tú na fuerza ini rí. <sup>31</sup> Te Yaā Dios, Yaā cúu Tátá maá Jítóho yō Jesucristo, jini yā jeē cahán ndaā rí. Te ní cáni na cáhán ñayuu jeē vāha ndasí Yaā cúu ya. <sup>32</sup> Ná ni Iyo rí ñuu Damasco, te gobernador jeē ndácu jniñu ndañúu jeē jñi rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chí jñi de ruhū quihín rí vecā ni cuni de núu. <sup>33</sup> Te ni quiví rí chíjī in jica, te ñayuu cácadíje ni cascúun i ruhū ventana in vehe jeē néne jicā jeē

ndihyú ñuu ún. Te súcuan ni cācu ri nuū tēe ún.

*Jeē ní jito ndijin Pablo jeē ni stúu ya nuū de*

## 12

<sup>1</sup> Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito rí jeē ní stúu maá Jítoho yō nuū rí te ní steén ndijin yā nuū rí. <sup>2</sup> Jíní rí ñn tēe cándije Cristo, te je ni cuu uxī cuñ cuíyā jeē ní sáha ya jeē ní caa tēe un ní jehēn de nde andiví unī. Te tu jíní rí núu ni jehēn rí jín yiquí cúñu rí, chí ní jehēn anuá-ni rí. Máá Yaā Dios cúu jeē jíní. <sup>3</sup> Te jíní rí jeē ní ndonehen ya ruhū. Te á ní jehēn rí jín yiquí cúñu rí, chí ní ndōo, tu jíní rí, chí máá-ni Yaā Dios cúu jeē jíní. <sup>4</sup> Chi ní sáha ya jeē ní caa ri ni jehēn rí nde jardín andiví. Te yūcuan ní jini sōho rí táca jnūhun sáhi ndasí jēe ma cúu castūhun yóhō ñáyuu. <sup>5</sup> Te siquī jeē ní sáha ya súcuan jín rí cúu jeē cutéyí rí, te ma cutéyí rí siquī ndese cúu máá rí. Chí cutéyí rí máni jeē tú na fuerza ini rí. <sup>6</sup> Te núu cúní rí cutéyí rí siquī maá rí nuū, te nasūu jēe canéé rí núu sáha ri súcuan núu, chí ndaā cúu jeē iyó jeē cutéyí rí. Te ni ma sáha ri, chí tu cúní rí jeē cani ni ñayuu jeē cujēhnu ga rí vēsú jeē ní jito i chí jēe ní jini i jnūhun rí.

<sup>7</sup> Te tu cúní yā jeē yáha ri cutéyí rí siquī jeē ní steén ndijin yā jniñu jēhnu ndasí un núu rí, te jeē yúcuán ni quiiji ñn jnūndóho jeē ndiquín ruhū te stóho ruhū. Te ñn jeē ní jēhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí. <sup>8</sup> Te unī jínu ni cahān ndahú rí jín máá Jítoho yō jeē na téjiyo ya quihīn. <sup>9</sup> Te ni cahān yā jín rí: Tuú chí tu cúmanī jeē cundáhú ni rí rohó. Chí ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rí jeē tú na fuerza ini rí, chí súcuan te nducuehē gā

fuerza Cristo ini rí. <sup>10</sup> Jeē yúcuán cúu jeē cúsiñ ni rí jeē tú na fuerza rí, jín jēe cácahān ndevāha ñayuu jín rí, jín jēe cúmanī nuū rí, jín jēe cájito xeēn i ruhū, jín jēe ndóho ri jnūndóho siquī Cristo. Chí jeē tú na fuerza maá rí, yūcuán sáha jeē nihín rí fuerza maá yá.

*Jeē nácani ni Pablo siquī ñayuu cácañje ñuu Corinto*

<sup>11</sup> Te va tēe canéé cúu ri jeē ní satéyí nde ri maá rí. Te siquī jeē tu cácañje ró ruhū, jeē yúcuán ní satéyí rí maá rí. Chí canuú jēe máá ró cuajnúhún ró ruhū nuú. Chí vēsú tú jniñu ri jeē maá rí, te va tu núu cuiti nde ri nuū táca tēe un jēe cácahān rō jeē apóstol cujēhnu cácuu de. <sup>12</sup> Chí mēñu ró ní sáha ri táca jniñu jeē steén jeē cúu ndije ri apóstol. Chí jín cuéhē paciencia ní sáha ri táca jniñu jēhnu jeē steén poder Yaā Dios, jín táca jniñu jeē nahán ní canaa ni rō ni cajito ró. <sup>13</sup> Te tu ní sáha ri jeē núu ga cácuu ró núu táca gá grupo ñayuu cácañje, chí máá ñn-ni jeē tu ní stáhān rí rohó jēe cuáha ro jēe jini ñúhún rí. Cone cáhnu ni rō núu súcuan ni sáha nde ri falta nuū rō víi.

<sup>14</sup> Te vijna je iyó túhva ri jecondēhe rí rohó vuelta unī. Te suni tú na vé cacán rí nuū rō, chí nasúu ndajniñu ró cúu jeē cúní rí, chí sa suhva jeē quendōo vāha ró jín jnūhun ya. Chí nájnuhun sēhe ri cácuu ró, te sēhe chí tu canuú caya i jeē cúu tátá i, chí sa tátá canuú cuáha de jeē quendōo vāha sēhe de. <sup>15</sup> Jeē yúcuán cúsiñ ni rí stáhi ri jeē névāha ri, te nde stáhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jín ró, vēsú sanaa te jecu-ni cáhiyo manī rō jín rí.

<sup>16</sup> Te iyó jecu rō cácahān jeē vēsú tú na vé ni jícán rí nuū rō, te tēe stáhú cúu ri, chí ni nducú rí modo ndichí nihín rí xūhun ró, cácahān rō. <sup>17</sup> ¿A táca tēe ní tají rí nuū rō, á ñn máá de ni stahú de rohó jēe nihín de

xūhun ró cuu máá rí, chí naún? Tú cuiti. <sup>18</sup> Ni cahān ndahú rí jín Tito jeē jécondēhé de rōhó, te ni tají rí ñin hermano ni jeē jín de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chí ñnuú-ni casáha ndindúú rí, te ñin-ni ánuá ndindúú rí.

<sup>19</sup> ¿Sanaa te cájeni ni rō jeē cahán rí jnūhun yáha návāha quendō vāha ri jín ró, chí naún? Nasūu súcuan cúu, chí Yaā Dios jiní yā jeē cahán rí maá-ni jnūhun jeē cuni Cristo. Te ndihi jeē cahán rí chi ndúcú rí jeē ije ró jín jnūhun ya, ñānī mánī. <sup>20</sup> Chi yúhú rí jeē núu na jéé rí, te sanaa te cuni rí jeē tu casáha ró jniñu nújnahan ni rí. Te máá ró jijnáhan ró, suni ma nújnahan ni rō ruhū. Chi sanaa te cátejnahán ró, cácuquésún ni rō, cáquití ni rō, casándúxí ró, casájnuhún ró, cácahān rō siquí jnāhan ró, cácutéyí ró, cájica néé ró. <sup>21</sup> Te yúhú rí jeē núu na jéé tucu ri te cuāha Yaā Dios jnūhun canu nuū rí jeē súcuan casáha ró. Te sanaa te cucuíhyá ni rí núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jín jniñu néé ndasí ní casáha ró.

*Saludo jín jnūhun cástūhun Pablo jeē sándihí*

### 13

<sup>1</sup> Yáha cúu vuelta unī jeē jécondēhe rí rohó. Te sándaā yō jniñu nájnuhun cáhán tutu: Jín jnūhun jeē cahán uū chí únī testigo te cundaā tācá jniñu, áchí. <sup>2</sup> Te vijna jeē íne jícá rí te cáhán tucu ri nájnuhun ni cahán rí ná ni ine ri jín ró. Cáhán rí nuū ñáyuu ni casáha cuēchi un jín núu ndihi ró, jeē núu na jéé tucu ri te ma cóo vítá ni rí jín ró. <sup>3</sup> Te yūcuán cuu prueba jeē cánducú ró, suu núu jendaá jeē cahán rí jín fuerza Cristo. Chi Cristo tu cúmanī fuerza yā jeē sándaā yā jín ró, chí stéén

yā poder yā mēhñu ró. <sup>4</sup> Te vésú tu ní stéén yā fuerza yā ná ni jihī yā jicā cruz, te vijna chí técu yā jín poder Yaā Dios. Te nájnuhun ni ndoho máá yá, suni súcuan cándoho ri vijna jeē tu fuerza rí. Te vésú súcuan te jín poder Yaā Dios cátecu rí jín yá jeē cuajniñu ri nuū rō jeē siquí jnūhun ya.

<sup>5</sup> Coto ndee rō maá ró núu cáhīn ñihin ró jín jnūhun cácañdije ró yá. Sáha váha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandije ndije ró? <sup>6</sup> Te ñūhun ni rí jeē suni cácucañnu ni rō jeē maá rí cácañdije ndije ri. <sup>7</sup> Te cájicān tahú rí nuū Yaā Dios jeē ma sáha ró ni ñin jniñu néé. Te vésú núu cuajnúhún ró jeē váha ndácu ri jniñu nuū rō, chí vésú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí. <sup>8</sup> Chi tu jésí ri nuū jniñu ndaā, chí sa suhva scáca ri. <sup>9</sup> Núu súcuan te cácusí ni rí núu tú na fuerza maá rí, te núu íyó fuerza maá ró. Te níni cácan tahú rí jeē na íje ga ni rō jijnáhan ró jín jnūhun ya. <sup>10</sup> Te téé ri carta yáha nuū rō nde ná tu jeē rí, návāha núu na jéé rí te tuá jini ñūhún cuxeēn rí nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jín jnūhun ya, nasūu jéé snáa rí.

<sup>11</sup> Je ni cahān yō núu súcuan hermano, te na cóo jeē váha jín ró jijnáhan ró. Te na cóndihvī ni rō ije ró jín jnūhun ya, te coo ndeyí ni rō. Te na cóo ñnuú ni rō te coyūcu mánī rō jín jnāhan ró. Te Yaā ndíso jnūhun ndeyí sñ ni jín jnūhun cúndáhú ni, coo ya jín ró jijnáhan ró. <sup>12</sup> Te jeē cahán rō jín táca jnāhan ró, te yíñuhún techūhu ró ndaha i. <sup>13</sup> Sándeyí ni rō jijnáhan ró, áchí hermano cácañdije jeē cáyūcu yáha.

<sup>14</sup> Te ñūhun ni rí jeē Jitoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee

cáhnũ ya jíín ró. Súcuan na cóo.  
Amén.



## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñayuu ni jéni ruhū ni nasūu ñayuu ni tájí ruhū jeē nácani ri jnūhun, chi sa suhva máá Jesucristo jiín Tatá yō Yaā Dios, Yaā ní nastécu Jesús mēhñu ndíyi. <sup>2</sup> Te ruhū jiín táca hermano cáyūcu jiín rí yāhá, cátee ri carta yáha cuájeē nuū rohó ñayuu cácan díje ní región Galacia. <sup>3</sup> Te cáñuhun ni rí jeē Tatá yō Yaā Dios jiín Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō. <sup>4</sup> Chi Jesús ni socō yā maá yá jeē ni jíhī yā jeē siquī cuéchi yó, návāha jnama ya yohó nuū tāca jéē neé iyó ñayūvi yáha, chi súcuan ni nujnahan ni maá Tatá yō Yaā Dios. <sup>5</sup> Jeé yúcuan na cáhán yō jeé yóhoyo luu cújehnu ya níí cáni. Súcuan na cóo. Amén.

*Siquī jeē tuá na inga jnūhun cácu ñayuu*

<sup>6</sup> Te nánhán nāā ni rí jító ri jeē yóhoyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquī jeē cundáhú ni Cristo yohó. Chi ni candiquīn rō inga jnūhun jeē sīn cáhán. <sup>7</sup> Te tú cuíti na inga jnūhun jnama yóhó iyó. Te cáhīyo jecu ñayuu castáhān i rōhó, te cácuni i nasama i jnūhun ndese jnáma Cristo yohó. <sup>8</sup> Te núu ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnūhun ni canacani ri nuū rō xīhna gā, na jnáhnú ndetū ñayuu ún. Te vēsú maá rí chí ñn ndajéhé jeē quíji nde andívi nacani inga jnūhun núú, na jnáhnú ndetū. <sup>9</sup> Je ni cahān rí jíin rō, te suni súcuan cáhán tucu ri vijna: Na-ni tēe nacani inga jnūhun nuū rō, te

núu tu quíjnáhan jíin jnūhun jeē ní cajetáhú rō, na jnáhnú ndetū tēe ún.

<sup>10</sup> Te jeē cahán rí súcuan, ¿á ndúcú rí jeē cuajnúhún ñayuu ruhū, chí Yaā Dios? ¿Chí ndúcú rí jeē cúsi ni ñayuu jíin rí, cájeni ni rō? Núu ndúcú gá rí jeē cúsi ni ñayuu jíin rí, te nasūu mozo Cristo cúu ri núu súcuan.

*Ndese ni jinū Pablo cúu de apóstol*

<sup>11</sup> Te cástūhun rí nuū rō, hermano jijnáhan rō, jéē jnūhun jnáma ya yohó jéē nácani ri, nasūu jéē ní jeni ni maá rí jíin ñayuu cúu. <sup>12</sup> Chi nasūu ñayuu ni stéén nuū rí, ni nasūu ñayuu ni sáha jeē ní cutūhva rí, chi sa suhva máá Jesucristo ni steén nuū rí.

<sup>13</sup> Chi je ni cajini jnūhun rō ndese ni sáha ri nde saá, ná ni chiñúhún rí sahān jnáhan ri ñayuu hebreo. Te cájini rō jeē yóhoyo ni jito xeēn rí ñayuu cácan díje nuū Yaā Dios, te ni condihvi ni rí snāā rí i núú. <sup>14</sup> Te váha ga ni cutūhva ri sahān ún vēsú cuehē gā tēe nación rí jeē ní cajehnu jíin rí, chi ni condihvi gā ni rí siquī tāca jéē ní cajequin jíi rí.

<sup>15</sup> Te vēsú súcuan te Yaā Dios je ni nacāji ya ruhū nde ná tu cacu ri, te ñn quívi te ni cusī ni yā ni cana ya ruhū jeē quívi ri ndaha ya, siquī jeē yóhoyo ni cundáhú ni yā ruhū. <sup>16</sup> Te ni steén yā Sēhe ya nuū rí, návāha nacani ri jnūhun ndese jnáma ya ñayuu tācá nación jeē tu jíin jnūhun ya. Yūcuán na te tu ní cájnūhun rí ni ñn ñayuu, <sup>17</sup> ni tu ní jéhén rí ñuu Jerusalén nuū tēe cácu apóstol xīhna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

<sup>18</sup> Yūcuán na te nde ni yāha unī cuiyā, te ni jehēn rí Jerusalén. Te ni jini jnáhan ri jíin Pedro, te ni condee rí jíin de xahūn-ni quívi. <sup>19</sup> Te tu ní jító ri nuū tāca gá apóstol, chí maá ñn-ni nuū Jacobo ñani maá Jítoho yō. <sup>20</sup> Jnūhun yáha jéē tēe ri cuajeē nuū rō, chí jíin Yaā Dios jeē ndaā cúu.

21 Yūcuán na te ni jehēn rī ní región Siria jíin Cilicia. 22 Te ñayuu cácanđije jeē yáhi ndaha Cristo, jeē cáyūcú región Judea, ná tu coto cuiti i nuū rī saá. 23 Chi máni jnūhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jnūhun cándije yó jēe ní nducú de snáa de nde saá, áchí i. 24 Te ni cacahān i jeē yóhyo cújéhnū Yaā Dios jeē súcuan ni sáha ya jíin rí.

*Jeē ní cajetáhú táca gá apóstol un Pablo*

## 2

1 Yūcuán na te nde nuū uxí cuūn cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. 2 Te ni jehēn rī chi máa Yaā Dios ni steén yā jeē jíini ñúhún quíhīn rī. Te ni candutútú sín nene tēe cácujehnū nuū ñayuu cácanđije ún. Te ni castūhun rí nuū de siquī jnúhun jnáma ya yohó jēe nácani ri nuū ñayuu táca nación tu jíini jnūhun ya. Te súcuan ni sáha ri návāha cuajnúhún de jniñu ri, te ma quéndōo cáhá jniñu sáha ri jíin jēe ni sáha ri. 3 Te ni tu ní cása ha fuerza de Tito, tēe ni jica jíin rí, jeē cōndee jnunī circuncidar de, vēsú nasūu tēe hebreo cúu de. 4 Te súcuan ni cundaā, vēsú ni quívicoo jecu tēe stáhú jēe sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar siquī jeē yáhi yó ndaha Cristo Jesús. Chi cácuni de jeē squícu tucu yó ley un, nduu tucu yó mozo nuū ley un. 5 Te tu ní cájetáhú cuiti rī nuū tēe ún, chi cúní rī jeē quéndōo nīhin ró jíjnáhan ró jíin jnúhun jnáma ya yohó.

6 Te máa tēe cácujehnū nuū ñayuu cácanđije ún, tuá na inga jniñu jēe ní cándaçu de nuū rī. Te máa rí chi tu ní chíhi ri cuenta siquī jeē cácujehnū de, chi suni Yaā Dios tu sáha ya cuenta, chi inuū-ni cúu ndivii tēe nuū yā. 7 Chi sa suhva ni cajini de jeē jnúhun jnáma ya yohó, ndíso

jniñu ri nacani ri nuū ñayuu táca nación jeē tu cása ha circuncidar; nájnuhun nácani Pedro jnūhun un nuū ñayuu hebreo jeē casáha circuncidar. 8 Chi Yaā Dios jeē ní tají Pedro jeē nácani de jnūhun nuū ñayuu hebreo, suni máa yá ni tají rúhū jeē nácani ri jnūhun nuū ñayuu táca nación tu jíini jnūhun ya.

9 Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cácanđije jeē maá de cácujehnū ga. Te ni cajni de ndaha ri jíin ndaha Bernabé, jeē ní castéén de jeē cáhiyo manī de jíin rí, jíin jēe ní cacundaā ni de jeē maá rí quingōo nacani jnūhun nuū ñayuu táca gá nación, te máa de jíjnáhan de nuū ñayuu hebreo. 10 Te máa in-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ní condihvī ni rī ni sáha ri.

*Jeē ni cáhān Pablo nuū Pedro*

11 Te ná ni quiji Pedro ñuu Antioquía, te ni cahān cají rí nuū de, chi ni stávi de jniñu. 12 Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñayuu jeē násūú hebreo cácuu. Yūcuán na te nuū ní quecoo tēe ún, te ni cusán de jeē tuá yéji de jíin i, chi yúhú de jeē cúni táca tēe un jēe tuá squícu de ley jnáhan de hebreo. Chi áchí ley jeē ma cúu caji de staā jíin ñayuu jeē tu cása ha circuncidar. 13 Te sava ga tēe hebreo jeē cácanđije, suni ní cacujiyo de nuū i, nájnuhun ni sáha Pedro, chi cáyūhú de jeē cúni tēe ún. Te nde máa Bernabé ni cascáhán de ni cujiyo. 14 Yūcuán na te ni jíini rī jeē ní canayūhú de caji de staā jíin ñayuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jito jíinú táca de: Róhó jēe cúu tēe nación yó hebreo, tuá squícu ró ley jnáhan yó hebreo, chi yéji rō jíin

ñáyuu ún. ¿Te najehē safuerza rō i jeē squícu i ley jnánan yo hebreo núu súcuan? ni achi rī.

*Īn-ni modo jnáma ya ñayuu hebreo jín táca gá nación*

<sup>15</sup> Te yóhó chi cúu yó ñáyuu hebreo, te cácahān yō jeē násūu ñáyuu táca gá nación casáha cuēchi cácuu yó. <sup>16</sup> Te vēsú súcuan te jíní yō jeē ní ĩn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jēe candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jín jēe nducú yó squícu yó ley un. Chi áchí tutu ĩi: Ní ĩn ñayuu ma quéndōo ndaā i nuū Yaā Dios jín jēe nducú i squícu i jniñu jeē ndácu ley, achi.

<sup>17</sup> Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ní jhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun táca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuīti jeē súcuan. <sup>18</sup> Chi sa núu naquihīn tucu yó ley jeē ni stóo yó un, te súcuan tée yó cuēchi síquī maá yó. <sup>19</sup> Chi ruhū, nájnūhun ni jhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha rī jeē cuní Yaā Dios. <sup>20</sup> Chi nájnūhun je ni jhī rī jicā cruz jín Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje rī jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī. <sup>21</sup> Núu súcuan te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhō vāha ni yā jín yó. Chi núu jeē quéndōo ndaā yō nuū yā jeē nducú yó squícu yó

ley jenahán, yūcuán na te tu ndé jéjníñu jeē ni jhī Cristo nuú.

*Jnúhun ley jín jnúhun cándíje*

### 3

<sup>1</sup> Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cáji ndasí ni cajecūhun ni rō jeē ni jhī Jesucristo jicā cruz jehē rō. <sup>2</sup> Īn-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jēe ní cacundeyí ró squícu ró jniñu ndácu ley Moisés? Tú cuīti, chi jeē ní cacandíje ró jnúhun jnáma ya rohó jēe ní cajini sōho ró. <sup>3</sup> ¿Ndese cúu jeē tu cájecūhun cuīti ni rō? Chi xīhna gā ní cacandíje ró jēe ni jhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cácu ró naún? <sup>4</sup> Núu súcuan te tu ndé ní jéjníñu cuīti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē vāha te núu jeē tu ní castóo ró, chi sa cácaandíje ndije ró yá. <sup>5</sup> ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jēe ní cajini sōho ró.

<sup>6</sup> Abraham ni candíje de jeē sáha Yaā Dios jeē ni jéjníñu ya, te jeē yúcuan ní ndahva yā cuēchi de.

<sup>7</sup> Núu súcuan te na jécūhun ni rō jijnáhan ró jēe ñáyuu cácaandíje jeē sáha Yaā Dios jehē i, ndívi i yucūn Abraham síquī jeē súcuan cácaandíje i. <sup>8</sup> Chi nde jenahán je cáhán tutu ĩi jeē ñáyuu táca nación tu jíní jnúhun Yaā Dios, ndahva yā cuēchi i núu candíje i ún. Te nde ná tu cuu táca jēe yáha te je ni jejnūhun ya jnúhun vāha yáha nuū Abraham: Jeē rohó cúu jeē quéndōo ndetu

ñayuu tãcá nación. <sup>9</sup> Núu súcuan te ñayuu cácan díje, quéndōo ndetū i jíin Abraham, tēe ni candíje jeē ni jéjnūhun ya.

<sup>10</sup> Te sa jnahnū ndetū ñayuu jeē cáncucú i quendōo ndaā i jeē jíin ley Moisés. Chi súcuan yósó núū tútu i: Jnahnū ndetū tãca ñáyuu jeē tu squícu ndihi cuiiti jnūhun yósó núū tútu ley, achí. <sup>11</sup> Núu súcuan te cájí cúu jeē ni ñin ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. <sup>12</sup> Te ley Moisés tu cáhán jeē cótecu yō ní cáni siquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

<sup>13</sup> Te Cristo ní jnama ya yohó núū jnūhun cáhán ley jeē jnahnū ndetū yō siquī cuēchi yó, chi máá yá ni ndoho siquī jnūhun jeē jnahnū ndetū yō. Chi yósó núū tutu i: Tãca ñáyuu condita caa jicā yújnu, jnahnū ndetū i, achí. <sup>14</sup> Te Cristo Jesús ní jihī yā jicā yújnu cruz návāha quendōo ndetū ñayuu tãcá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quíji.

*Siquī ley jíin siquī contrato jeē ni jéjnūhun ya*

<sup>15</sup> Hermano, na cáhán rī ñin jnūhun ndese cásáha ñayuu ñayiví: Núu ñin tēe sáha de ñin contrato chí ñin acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. <sup>16</sup> Te suni súcuan ni sáha Yaā Dios ñin contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu i siquī cuehē yúcūn de, chi sa cáhán siquī ñin-ni yúcūn de, te suu cúu Cristo. <sup>17</sup> Núu súcuan te jnūhun jeē cáhán rī yáha cúu jeē xihna gā ni sáha Yaā Dios ñin contrato jíin

Abraham, jeē quíji Cristo jnama ya yohó, te ni sácutu yá. Yūcuán na te ni yáha cuñ ciento ocō uxī cuiyā, te sáa te ni jēhe ya ley nuū Moisés. Te ley un jéē ní quee cueé gá, ma cúu nacanu contrato un, ni ma cúu casi nuū jnūhun jeē ni jéjnūhun ya jeē jnama ya yohó. <sup>18</sup> Chi núu jeē jíin ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chi sa suhva siquī maá jéē ni jéjnūhun Yaā Dios nuū Abraham cúu jeē ní jnama ya de.

<sup>19</sup> Núu súcuan ¿te ndese jéjniñu ley Moisés? Jéjniñu chi ni jēhe ya un cueé gá návāha nastúu cuēchi i. Te ni ndacu jniñu máá-ni nde ná tu quíji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núū ñayuu, te ni tají yá tãcá ndajéhé yā ni cacastūhun núū Moisés, te Moisés ni nacachī nuū i. <sup>20</sup> Te sín cúu jnūhun jeē ni jéjnūhun ya nuū Abraham jeē quíji Cristo, chi máñuhún-ni ya ni jéjnūhun, te tu ní jíni ñuhún ni ñin jeē nacachī nuū Abraham.

*Siquī ndese jéjniñu ley jenahán*

<sup>21</sup> Núu súcuan ¿te á cúní cahān jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuiiti jeē súcuan. Chi núu jeē ni jēhe Yaā Dios ñin ley jeē cótecu ñayuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. <sup>22</sup> Te tuú chi yósó núū tútu i jeē ndihi ñayuu ñayiví, nájnūhun yíndihyū i vecāa chí cáyihī i chíji cuēchi. Te súcuan cúu návāha tãcá i jeē candíje i jeē ni jihī Jesucristo jehē i, nihīn i máá jéē ni jéjnūhun ya nuū i siquī jeē candíje i ún.

<sup>23</sup> Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quívī quíji Cristo, Yaā candíje yó. <sup>24</sup> Núu

súcuan te ley ni cuu ñn jeē ndíto yóhó nájñūhun ñn mozo ndíto sūchi lúlí, te ni jejníñu nde quiví ní quiiji Cristo, návāha candíje yó jéē ni jíhi yā jehē yō, te ndahva Yaā Dios cuēchi yó. <sup>25</sup> Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájñūhun mozo ndíto yóhó.

<sup>26</sup> Chi ndivii rō cácuu sēhe Yaā Dios siquī jeē ní cacandíje rō Cristo Jesús. <sup>27</sup> Chi tāca rō jeē ní jendute rō siquī jeē ni quiví rō ndaha Cristo, ni sāha ya jeē ní nduu rō nájñūhun cúu máa yá. <sup>28</sup> Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájñiñu cuenta maá, ni tēe ni ñahan. Chi ñn na cúu rō núu yā jeē cáyihí rō ndaha Cristo Jesús. <sup>29</sup> Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō maá táhū jeē ni jéjnūhun ya.

#### 4

<sup>1</sup> Jeē cahán rī jíin rō jijnáhan rō cúu jeē yáha: ñn sūchi chíi táhū, vésú maá i naquihin ndihi jeē névāha tátá i, te núu lúlí i chi inuú cúu i jíin mozo. <sup>2</sup> Chi yíhi i ndaha tāca jéē ndíto i jíin jéē ndíto ndajñiñu i, nde quee quiví jeē ní jeni tátá i, te sáa te nihīn i. <sup>3</sup> Te suni súcuan yóhó, chi nde ná tu jecūhun ni yō siquī Cristo te ni cuu yó nájñūhun sūchi lúlí, te ni yíhi yó chíji tāca costumbre jeē ní cajequin ñayuu ñayiví. <sup>4</sup> Te nde ná ni quee quiví jeē ní jeni Yaā Dios, te ni taji yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihí chíji ley Moisés. <sup>5</sup> Súcuan ni cacu ya návāha jnama ya yohó jéē tuá quíhi yó chíji ley un, te návāha naquihin Yaā Dios yohó cuu yó sēhe ya.

<sup>6</sup> Te siquī jeē cácuu rō sēhe ya, te ni taji Yaā Dios Espíritu Sēhe ya ni quiví ini anuá rō, te sāha ya jeē cácahān jee rō: Tátá maá ná. <sup>7</sup> Núu

súcuan te tuá cácuu rō nájñūhun mozo, chi sēhe ya cácuu rō. Te jeē cácuu rō sēhe Yaā Dios, te suni nihīn rō maá táhū jeē ni jéjnūhun ya jee jíin Cristo.

*Jeē nacani ni Pablo siquī ñáyuu cácaandíje*

<sup>8</sup> Chi nde saá, nde ná tu jecūhun ni rō ndese Yaā cúu Yaā Dios, te ni cacuu rō mozo nuū tāca jéē násūu yāā ndaā cúu. <sup>9</sup> Te vijna chi je cájini rō ndese Yaā cúu ya, te vāha ga na cáhán rī jeē maá yá je jíin yā rohó. Núu súcuan ¿te najehē cácuu rō nandió cóo rō nduu tucu rō mozo nuū tāca costumbre ñayuu ñayiví jéē tu níhín jñiñu cuiñi? <sup>10</sup> Chi máni jeē cánēe i rō quiví jíin yóō jíin vico jíin cuíyā. <sup>11</sup> Te yúhú rí sanaa te tu ní jéjníñu cuiñi jeē ní nacani ri jñūhun nuū rō.

<sup>12</sup> Cáhán ndahú rí jíin rō hermano, jeē na cáni ni rō nájñūhun jéni ni maá rí jeē tuá squícu rí costumbre ñayuu hebreo. Chi ruhū ni nasáha rí maá rí nájñūhun máa rō jeē tu ní cáyihí rō núu ley costumbre ñayuu hebreo. Te tú na vé ni casáha rō jéē cucuíhyá ni rí nde saá. <sup>13</sup> Chi cájini rō ndese ni cuu ná ni nacani núu rí jñūhun nuū rō ndese jnáma ya yohó. Chi siquī jeē cuhú rí te ni jecuíñi rí ñuu rō ni nacani ri jñūhun. <sup>14</sup> Te vésú jñūndóho ni cuu jeē ní cocuhú rí, te tu ní casájéē ni rō nuū rí, ni tu ní casquéhichí ni rō ruhū. Chi sa ni cajetáhú rō ruhū nájñūhun jeē cúu ri ñn ndajéhe Yaā Dios, chí nájñūhun jeē cúu ri maá Cristo Jesús. <sup>15</sup> Núu súcuan ¿te najehē cúu jeē tuá cácusí ni rō jíin rí vijna? Chi náhán rí jeē vāha ni casáha rō jéē ní cajnahuhū ni rō núu jeē cúu te tava rō tinūu váha máa rō, cuāha rō nduu tinūu rí nuū. <sup>16</sup> Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí nañuñ?

<sup>17</sup> Te cáhiyo tēe jeē cándihvī ni siquī rō jijnáhan rō, te násūu jéē

quéndōo vāha ánuá rō, chi sa jeē cáculi de nasásin de róhó jín rúhū, návāha condihvī ni rō jeē cúu máa de. <sup>18</sup> Te iyó vāha jeē cándihvī ni de jehē rō, te núu jeē quéndōo vāha ánuá rō cúu núú. Chi níni jíni ñúhún sáha de jeē vāha róhó, vēsú núu íne ri jíin ró chí núu tú ri íne. <sup>19</sup> Séhē mánī jijnáhan ró, jeē síquí rohó cúu jeē inga jínu jnáhuhū ni rī, chí nájñuhun ñin ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo. <sup>20</sup> Nacā jeē vāha núu jeē ndeé ri jíin ró vijna ñúhún, návāha cuu cahān manī rī jíin ró. Te tu cújñuní cuiti ni rī ndese ga cúu jeē cáni ni rī síquī rō.

#### *Jñuhun yátá síquī Agar jíin Sara*

<sup>21</sup> Róhó jijnáhan ró jeē cáculi rō quíhi ró chíji ley Moisés, cachi nuū rī: ¿A tu ní cájini sōho ró ndese cáhán ley un? <sup>22</sup> Chi cáhán tutu ñi jeē Abraham ni iyo uū sēhe yí de. Te ñin i cúu sēhe Agar, ñahan cúu mozo vehe de. Te inga i cúu sēhe ñahan iyó libre, suu ñasihí de Sara jeē ní cuu ña ñahan numá. <sup>23</sup> Te sēhe ñahan cúu mozo, ni cacu i nájñuhun cácu táca gá sūchi lúli. Te sēhe ñahan cúu libre, ni cacu i máa síquī jeē súcuan ni jejnūhun Yaā Dios. <sup>24</sup> Te yāha cúu ñin jñuhun yátá, chí ndíndúú ñahan un cúu ña nájñuhun ndíndúú contrato jeē ni sáha Yaā Dios jíin ñáyuu. Máa ñahan nání Agar, cúu ña nájñuhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. <sup>25</sup> Chi Agar cúu nájñuhun ley jeē ni jéhe Yaā Dios xinī yucu Sinaí jeē íin nde Arabia. Te cúu ña nájñuhun Jerusalén, ñuu ñayuu hebreo, jeē iyó vijna, chí táca sēhe ñuu Jerusalén, cácuu i nájñuhun mozo nuū ley un. <sup>26</sup> Te Jerusalén jeē iyó andiví, chí sa suhva iyó libre nájñuhun Sara. Te yóhó ñáyuu cándíje, nájñuhun sēhe un cácuu yó, chí iyó libre yō nuū

contrato ley. <sup>27</sup> Chi suhva yósó núú tútu ñi:

Róhó jeē ní cuu ró ñahan numá jéé tú sēhe ró, na cúsi ni rō.

Róhó jeē tu ní jéhnde chíji ró jéé scácu ró, na cána jee ró jéé cúsi ni rō.

Chi coo cuehē gā sēhe róhó jéé ní cuu ró ñahan numá vēsú ñahan jeē jé ní scácu sēhe.

Achí tutu.

<sup>28</sup> Hermano, sēhe Yaā Dios cácuu yó, chí súcuan ni jejnūhun ya nuū yō, nájñuhun ni jejnūhun ya nuū Abraham jeē cacu sēhe de Isaac.

<sup>29</sup> Te nde saá te inga sūchi ní cacu nájñuhun cácu táca gá ñayuu, ni jito xeēn i Isaac, sūchi ní cacu ní sáha Espíritu. Te nájñuhun ni iyo saá, suni súcuan cájito xeēn ñayuu táca sēhe Yaā Dios nde vijna. <sup>30</sup> ¿Te ndese cáhán tutu ñi? Achí: Quenehen ró ñahan cúu mozo na quíhín ña jíin sēhe ña. Chí sēhe ñahan cúu mozo, ma nihín i tahū jíin sēhe ñahan libre, achí yá jíin Abraham. <sup>31</sup> Núu súcuan hermano, tu cúu yó nájñuhun sēhe ñahan cúu mozo, chí nájñuhun sēhe ñahan libre cúu yó.

*Na cuíñi ñihin yó jíin jñuhun jeē ni sáha libre yohó*

## 5

<sup>1</sup> Te Cristo ni sáha libre yā yohó jéé tuá yíhi yó chíji ley Moisés. Núu súcuan te cuíñi ñihin ró jíin jñuhun jeē ni sáha libre yā yohó, te ma ndívicoo tucu ró cuu ró mozo nuū ley un.

<sup>2</sup> Sáha ró cuenta jijnáhan ró, chí ruhū Pablo cahán rī jíin ró jeē núu squícu ró ley circuncidar, yūcuán na te tu nihín jñíñu cuiti jeē ní candíje ró jéé ní jíhí Cristo jehē rō. <sup>3</sup> Te inga jínu cáhán ñihin ri jíin táca téé cánducú cuu circuncidar, jeē núu súcuan te suni cánuú jéé squícu de ndívií cuiti gā jñuhun cáhán ley Moisés. <sup>4</sup> Róhó jéé cánducú ró quéndōo ndaā rō jeē squícu ró ley un, je ni casiáa

rō Cristo núu súcuan. Je ni castóo ró jnúhun jeē ndahva yā cuēchi ró siquī jeē cundáhú ni Yaā Dios rohó. <sup>5</sup> Te maá yó chí cájica yó jíin Espíritu, te cácanđije yó jēē ní ndahva yā cuēchi yó, te jeē yúcuan ñúhun ni yō jeē quendōo ndaā yō quivī cuiñi yó núu Yaā Dios. <sup>6</sup> Chi yóhó jēē cáyihí ndaha Cristo Jesús, vēsú núu jeē cúu yó circuncidar chí tu cúu yó, tú na vé nihín jniñu. Jeē nihín jniñu cúu jeē candíje yó jeē sáha ya jehē yō. Te yúcuan sáha jeē cundáhú ni yō jnáhan yó.

<sup>7</sup> Vāha ni cacandíje ró núu. ¿Te ndé ñn ni jesi jeē tuá cájetáhú ró jnúhun ndaā núu súcuan? <sup>8</sup> Jnúhun jeē ní cascáhán de rōhó, chí tú vēji nuū maá Yaā ní cana rōhó ní quivicoo ró ndaha ya. <sup>9</sup> Te ma náā ni rō jeē téē cástáhú rōhó, jnúhun cástéén de cúu nájnūhun levadura, chí vēsú jecu-ni levadura, te ndáa ndihí ñujen sáha. <sup>10</sup> Te cúcáhnu ni rī jeē maá Jítóho yō sáha ya jeē ma cándíje ró jíjnáhan ró inga jnúhun jeē sñn cáhán. Te maá Yaā Dios cuāha ya castigo tēē jeē sáca núu xinī rō, núu na-ni tēē cúu de.

<sup>11</sup> Te ruhū, hermano, núu jeē nácani ga rī jnúhun ley circuncidar nde vijna, te jnáhan rī ñayuu hebreo ma cóto xeēn i ruhū nuū. Chí ma quití ni i jeē nácani rī jnúhun jeē ni jíhī Cristo jíicā cruz, núu jeē súni nácani rī jnúhun circuncidar nuū. <sup>12</sup> Te táca téē jeē sáca núu xinī rō siquī jnúhun ún, vāha ga na cáhnde gā de maá de núu súcuan.

<sup>13</sup> Chi maá ró jíjnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quivicoo ró táca cuēchi jeē cúu modo neé cúní maá ró, chí sa suhva na sáha ró maá ró mozo jeē chindéē ñáhán ró jnáhan ró siquī jeē cundáhú ni rō i. <sup>14</sup> Chi je ni squícu ró ndihí ley núu squícu ró ñn-ni jnúhun ndácu jniñu yáha:

Cundáhú ni rō jnáhan ró nájnūhun cundáhú ni rō maá ró, achí. <sup>15</sup> Te núu máni jeē ndónđa xeēn rō siquī jnáhan ró jēē cuajnáhan ró, te coto ma snāā rō jniñu jeē ni sáha ya mēhñu ró jíjnáhan ró.

*Modo cuní ñayuu tu cándíje jíin modo sáha Espíritu*

<sup>16</sup> Súcuan cáhán rī jíin ró jíjnáhan ró: Caca ró nájnūhun cúní maá Espíritu, te yūcuán na te ma sáha ga ró modo jeē cuní maá ró. <sup>17</sup> Chi táca jēē cuní maá yó, yúcuan jési nuū jeē cuní maá Espíritu. Te jeē cuní Espíritu, jési nuū modo neé jēē cuní maá yó. Te jeē ndindúú yáha chí cájesi nuū jnáhan, te jeē yúcuan tu cúu sáha ró jniñu vāha jeē cuní rō sáha ró. <sup>18</sup> Te núu máá Espíritu steén nuū rō, núu súcuan te tuá cáyihí ró chíji ley jehán.

<sup>19</sup> Te iyó ndíjin táca jniñu casáha ñayuu cájica jíin modo neé maá, te yáha cúu: Cásiquí ndēē jnáhan i, casáha i jniñu jnéhén, casáha neé ndasí i. <sup>20</sup> Cáchiñúhún i ídolo, casáha tási i, cájito uhū jnáhan i, cájejnáhan i, cáccucuñi ni i. Te yachí cáquití ni i, te cándihvī ni i jeē cúu máa-ni i, te cátejnéhan i casásñn i maá i. <sup>21</sup> Te cáccucuéśun ni i, cájehni i ndīyi, cánajñi i, casáha i vico neé, jíin táca gá jeē súcuan. Te cáhán ñihin rī jíin ró, nájnūhun je ni cahān rī jíin ró saá, jeē ñayuu casáha súcuan, ma nihín tahú i quivicoo i ñuu nuū ndácu Yaā Dios jniñu.

<sup>22</sup> Te ñayuu jeē nduú i jíin Espíritu, táca jniñu yáha sáha ya jíin i: Jeē cundáhú ni jnáhan, jeē cúśñ ni, jeē iyó ndeyí śñ ni, jeē iyó paciencia, jeē maní ni, jeē vāha ni, jeē squícu vāha, <sup>23</sup> jeē tu sáha jeē cujéhnu, jíin jēē jési modo jeē cuní maá. Te tú na ley cacān cuēchi siquī rō núu sáha ró táca jniñu yáha. <sup>24</sup> Te ñayuu cáyihí ndaha Cristo, nájnūhun je ni cajehni i modo neé maá i jíicā cruz, nde jíin táca jēē ndíyo neé ni i te cútíndí i. <sup>25</sup> Te jeē súcuan ni jēhe

maá Espíritu ñn vida jeé núu yō, te suni na cáca yó jíin modo steén Espíritu.

<sup>26</sup> Te ma sandúxí yó jée squití ni yō jnáhan yó, te ni ma cucuésún ni yō siquí jnáhan yó.

*Jnúhun jeé chindéé ñáhán yó jnáhan yó*

## 6

<sup>1</sup> Hermano, núu ñn jnáhan ró ni sáha cuéchi, te róhó jée cájica jíin Espíritu, na náchuhun ichí ró i. Te jíin jnúhun vítá cahān rō jíin i, te suni condito ró máá ró jee ma cacán ini rō sáha ró táca cuéchi. <sup>2</sup> Te chindéé ñáhán ró jnáhan ró núu na vé cúu jeé ndóho i, chí súcuan cúu jeé squícu ró ley Cristo.

<sup>3</sup> Chí núu ñn ñayuu jéni ni i jeé ñayuu teyí cúu i, vésú nasūu súcuan cúu, te stáhú i máá i núu súcuan. <sup>4</sup> Te tācá ñn ñn ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusī ni rō jíin jée sáha máá ró, te tu níni jée scáni jnáhan ró máá ró jíin jnáhan ró. <sup>5</sup> Chí tācá ñn ñn yó cánuú squícu yó jíin jniñu ní jéhe ya nuū maá yó.

<sup>6</sup> Te róhó jée cascuáha jnúhun vāha ya, na chindéé ñáhán ró tēe cástéén nuū rō jíin táca jée vāha cánevāha ró.

<sup>7</sup> Ma stívi ró caní ni rō jeé cuu sáha ró cuéchi. Chí ma cúu sácata rō nuū Yaā Dios caní ni rō jeé tu sáha ya cuenta. Chí tāca núu ndese sáha ñayuu, suu yūcuán nanihīn i. <sup>8</sup> Chí ñayuu jeé sáha i jeé cuní modo neé máá i, nihīn i jeé jnahnú ndetū i sáha modo jeé cuní máá i ún. Te ñayuu jeé sáha jeé cuní máá Espíritu, chí nihīn i jeé cótecu i ní cáni andiví sáha Espíritu. <sup>9</sup> Te ma cuíta yó jeé sáha yó jniñu vāha núu súcuan, chí jeé quéé maá quíví te nanihīn yō, te núu ma cuíta yó. <sup>10</sup> Núu súcuan te tāca jínu jeé cúu sáha yó, te na sáha vāha yó jíin táca ñayuu, te hermano yō jeé cáandíje cúu jeé cánuú gá.

*Saludo jíin jnúhun cástūhun Pablo jeé sándihí*

<sup>11</sup> Condéhe ró jeé náhnu letra tée ri cuajeé nuū rō jíināhan ró, chí ndaha máá rí tée ri yāhá. <sup>12</sup> Te tēe jeé casáfuerza de róhó cuu ró circuncidar, cásaaha de siquí jeé cácuni de cuajnúhún ñáyuu de. Te cásaaha de návāha ma cóto xeēn ñayuu de jeé cánacani de jnúhun jeé ni jíhí Cristo jehé yō. <sup>13</sup> Te ni máá de jeé casáha de circuncidar, suni tu squícu vāha de ndihí ga ley jenahán. Te cácuni de jeé cuu ró circuncidar, návāha cuu sátéyí de máá de núu quihin ró jnúni circuncidar sáha de. <sup>14</sup> Te ruhū tu cúní rí sátéyí rí máá rí siquí ní ñn jeé yúcuán. Chí máá ñn-ni siquí jeé ni jíhí Jitoho yō Jesucristo jíca cruz. Chí siquí yúcuán cúu nájnūhun ni jihí rí, chí ni siaá rí táca jée iyó ini ñayíví, te suni nájnūhun ñn ndíyí cúu rí nuū ñayíví. <sup>15</sup> Chí núu yíhi yó ndaha Cristo Jesus, te tu nihín jniñu núu cúu yó circuncidar chí tuú. Chí jeé nihín jniñu cúu jeé ní nasájeé yá anuá yō. <sup>16</sup> Te ñúhun ni rí jeé tāca ró jeé jíca ró jíin modo yáha, na sáha ga yā jeé coo ndeyí coo sī ni rō, te cundáhú ni yā rohó. Te suni ñúhun ni rí jeé súcuan sáha ya jíin táca gá i jeé cúu ndije i ñayuu cáandíje Yaā Dios.

<sup>17</sup> Te vijna jíin ní gá cuahān yō, cúní rí jeé ma stáhān gā ni ñn ñayuu ruhū. Chí yíqui cúnu rí ndíso seña jeé ni tújī rí ni ndoho ri jeé cúu ri mozo máá Jitoho yō Jesús.

<sup>18</sup> Hermano, ñúhun ni rí jeé na sáha ga Jitoho yō Jesucristo jeé vāha róhó jíināhan ró. Súcuan na cóo. Amén.



## CARTA JEE NI TEE APOSTOL ŞAN PABLO NUU ŃAYUU ŃUU EFESO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te tée ri carta yáha cuájeē nuū rohó ñayuu űuu Efeso, jeē cácuu ró ñayuu maá yá jeē cácandíje ró Cristo Jesús. <sup>2</sup> Te űúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

*Jeē sáha Cristo jeē quéndōo vāha ánuá yō*

<sup>3</sup> Na cáhán yō jeē yóhoyo cújéhu Yaā Dios, Yaā cúu Tatá Jítóho yō Jesucristo. Chi ni jēhe ya táca jéē váha íyó andiví jéē quéndōo vāha ánuá yō, chi yáhi yó ndaha Cristo. <sup>4</sup> Chi nde ná tu jecōo ñayiví te ni nacāji ya yohó jéē quiví yó ndaha Cristo, návāha coo ndoo ánuá yō te caca ndaā yō nuū yā. <sup>5</sup> Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. <sup>6</sup> Te jeē yúcuan níni na cáhán yō jeē yóhoyo cújéhu ya, chi yóhoyo vāha ni sáha ya yohó jíin táca jéē váha ni yā, siquī jeē yáhi yó ndaha Cristo, Séhe ya jeē maní yā jíin. <sup>7</sup> Te siquī jeē yóhoyo vāha ni yā jíin yó, te Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó. <sup>8</sup> Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. <sup>9</sup> Te ni sáha ya jeē cuni yō ĩn jnúhun ya jeē ní yisáhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya. <sup>10</sup> Te yāha cúu jnúhun ún: Nde na quée tiempo te sáha ya jeē

ndihi jeē yúcu andiví jíin jéē yúcu ñayiví, ĩnuú-ni nduu, quíhi ndaha Cristo.

<sup>11</sup> Te siquī jeē yáhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē nujnahan ni yā sáha ya. <sup>12</sup> Súcuan ni sáha ya návāha máá rí jeē xihna gā ni cacandíje ri Cristo, caca ndaā rí te súcuan sájéhu ri yā jeē yóhoyo luu cújéhu ya. <sup>13</sup> Te suni máá ró jíinahan ró, ni cajini ró jnúhun ndaā jnúhun vāha jeē jnama ya rohó, te ni cacandíje ró Cristo. Te ni canihīn ró Espiritu Santo jeē ni jéjnūhun ya jeē cuáha ya. Te ndéé Espiritu yā ún ĩni anuá yō, te cúu ya nájnuhun sello jeē steén jeē cúu yó séhe Yaā Dios. <sup>14</sup> Te sáha ya jeē jiní ndije yó jéē cucuéé gá te cuáha Yaā Dios tahū yō, nde na sínu ya jniñu jeē jnama ya ñayuu yā. Te quiví ún cahán yō jeē cújéhu ya, chi yóhoyo luu cújéhu ya.

*Jeē jicán tahú Pablo jehē ñayuu cácandíje*

<sup>15</sup> Te ruhū ni jini jnúhun ri ndese cácandíje ró jéē ni sáha Jítóho yō Jesús jehē rō, jíin ndese cácundáhú ni rō ndihi ñayuu cáyihí ndaha Yaā Dios. <sup>16</sup> Te jeē yúcuan tu jécuiñí rí jeē nácuatáhú rí jehē rō, te jeē jicán tahú rí te tu náā ni rí cacān tahú rí jehē rō. <sup>17</sup> Chi jicán tahú rí jeē na sáha Yaā Dios jeē jécūhun vāha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítóho yō Jesucristo, te cúu ya Tatá yō jeē lúu ndasí cújéhu. <sup>18</sup> Te jicán tahú rí jeē na sándijin gā yā nuū jeē níjnūní rō, návāha jecūhun ni rō ndese cáa ndihi jeē cáñuhun ni rō nihīn rō siquī jeē ní cana ya rohó. Te jecūhun ni rō ndese cúca cácuu ró jíin táca jnúhun jéhu luu ndiso jnúhun ya jeē cúu ñayuu maá yá. <sup>19</sup> Te jicán tahú rí jeē na jécūhun ni

rō ndese yōhyo jéhnū poder yā jeē sájniñu ya ini anuá yohó jéē cúu yó ñáyuu cácanđije. Chi tu ndáhi cuiti poder yā. <sup>20</sup> Te suu poder un cúu jeē ni stéén yā ná ni sáha ya ññniñu jéhnū ga jeē ní nastécu yā Cristo mēhñu ndíyí te ni scúcōo ya lado váha ya nde andiví. <sup>21</sup> Te ni jeni ya Cristo siquī tāca jéē cujéhnū, jíin jéē ndíso jniñu, jíin jéē jnái poder, jíin jéē ndácu jniñu, jíin siquī tāca jeē cácahān ñayuu jeē cujéhnū, cúu tiempo yáha, cúu tiempo quiji. <sup>22</sup> Te ni jēhe ya jeē cujéhnū Cristo siquī ndívi. Te ni sáha ya jeē cúnuú yá cujéhnū ya nuū ñáyuu cácanđije. <sup>23</sup> Te ñayuu cácanđije un cácuu i nájñūhun yiquí cúñu ya, chi ññ na cúu i jíin yá te ññhun chitú yá ini anuá i, chi Yaā jeē ññhun chitú ní cáhñu-ni cúu ya.

*Ni cácu yó siquī jeē ní cundáhú ni yā yohó*

## 2

<sup>1</sup> Te ni sáha ya jeē cotecu rō ññ cáni jíin Cristo. Chi je ni cacuu ró nájñūhun ndíyí nuū yā, ni sáha cuēchi ró jíin jniñu néé ní casáha ró. <sup>2</sup> Chi ni cajica ró jíin jniñu yúcuan nde saá, ná ni cacondiquin rō jniñu ñayuu ñayiví, ná ni cajetáhú ró núū jexeén jeē ndácu jniñu nuū tāca táchi xeén, te jica nuū tachí. Te suu cúu jeē scánda ini ñayuu ññni ni nuū Yaā Dios. <sup>3</sup> Te máá rí jijñáhan ri, suni súcuan ni cajica ri, chi ni casáha ri jniñu néé jéē cuní maá rí, jíin táca jéē jicán yiquí cúñu rí, jíin jéē cájeni néé ni rí nde saá. Jeē yúcuan suni ni cacuu ri ñayuu jeē ñññ castigo xeén jeē cuáha ya nuú, chi ñññ-ni ni casáha ri nájñūhun casáha máá i. <sup>4</sup> Te Yaā Dios chi yōhyo cuehē ni cundáhú ni yā yohó, te váha ndasí ni yā jíin yó. <sup>5</sup> Te náa cúu yó nájñūhun ndíyí nuū yā ni sáha cuēchi yó, te ni nastécu yā yohó jéē cotecu yó ññ cáni jíin Cristo. Chi siquī jeē yōhyo váha ni yā cúu jeē ní

jnama ya yohó. <sup>6</sup> Te ni nastécu yā yohó jéē cotecu ñññ yó jíin Cristo Jesús, te scúcōo ya yohó jíin yá nde andiví. <sup>7</sup> Súcuan ni sáha ya nāvāha ní gá tiempo jeē quíji, te stéén yā ndese yōhyo maní yā jíin yó, jíin ndese váha ni yā jíin yó jeē siquí Cristo Jesús. <sup>8</sup> Chi siquí jeē yōhyo maní yā jíin ró cúu jeē ní jnama ya rohó, chi ni cacandije ró jéē sáha ya jehē rō. Te nasūu siquí jeē ní casáha máá ró cúu, chi tahū jeē ni jēhe ya nuū rō cúu. <sup>9</sup> Chi tú na jniñu váha ní casáha yó jéē jnama ya yohó, te jeē yúcuan ni ññ yó ma cúu sátéyí yó maá yó. <sup>10</sup> Chi cúu yó ññ jniñu luu jeē ní nasáha máá yá, chi ní nasáha ya yohó jéē cundúu yó jíin Cristo Jesús, nāvāha sáha yó táca jniñu váha jeē jé ní sátūhva Yaā Dios jeē sáha yó.

*Jeē sáha Cristo jeē ndívi yó núū jññhun maní Yaā Dios jíin yó*

<sup>11</sup> Núū súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tāca nación jeē tu jíin jññhun ya. Te ñayuu hebreo jeē casáha circuncidar yiquí cúñu, ni cacahān i jeē cácuu ró ñáyuu tu sáha circuncidar. <sup>12</sup> Na núcūhun ni rō jeē ndé saá tu ní cáhñi ró jíin Cristo, te ni cacuu ró ñáyuu ññu jicá núū nación Israel. Te tu ní cájini rō tāca jññhun contrato jeē ní jéjñūhun Yaā Dios. Te tu ní ññ Yaā Dios jíin ró ñayiví yáha, te tú na vé jeē váha ní cáññhun ni rō jeē cóo. <sup>13</sup> Te vijna chi ni ndívicoo ró núū Yaā Dios jeē tu ní cájini rō jññhun ya nde saá, chi ni quívicoo ró ndaha Cristo siquí jeē ní jññ yā jehē rō. <sup>14</sup> Chi Cristo cúu Yaā sáha jeē ndúmaní ñññ yó. Chi ni sáha ya jeē ñáyuu hebreo jíin ñáyuu tāca gá nación, ni nduu yó ññ na nuū yā. Chi ni sáha ya jeē tuá jíto uññ ñññ yó, te suu cúu nájñūhun jeē ní jenu ya ññ jeē ndihyú sava mēhñu yó jeē sásñ yohó. <sup>15</sup> Chi ni socō yā maá

yá ni jihī yā, te súcuan ni ndahva yā ley jenahán jíin jnúhun ndácu jniñu jíin jéē tajnúni ndíso maá. Chi ley un ní sásín ñayuu hebreo jíin táca nación jeē tu ní jíni i ley un. Te ni nasquijnáhan ya ndihi yó jéē ní nduu yó ñin na nación jeē, yíhi yó ndaha ya. Te súcuan ni sáha ya jeē ní ndumanī jnáhan yó. <sup>16</sup> Te jíin jéē ni jihī yā jicā cruz, te ni snáā yā jnúhun cájito uhū jnáhan ñayuu hebreo jíin táca gá nación. Te ni sáha ya jeē ndávicoo yó núu jnúhun manī Yaā Dios jíin yó, te ni nduu yó ñin na ñayuu maá yá.

<sup>17</sup> Chi ni quiji Cristo ni nacani ya jnúhun vāha nuū tāca ñayuu jeē na ndávi i nuū jnúhun manī yā jíin i, cúu róhó ñayuu tu ní cájini jnúhun ya, te suni ñayuu jnáhan ri hebreo jeē cájini jnúhun ya. <sup>18</sup> Te vijna te siquī jeē ní jihī Cristo, te ndihi yó, cúu ñayuu hebreo chí ñayuu táca gá nación, cuu quívicoo yó núu Tatá yō Yaā Dios, te ñin-ni Espíritu yā sáha. <sup>19</sup> Núu súcuan te tuá cúu ró nájñuhun ñayuu ñuu jicá ni ñayuu tatú, chí ñin na ni nduu ró jíin ñayuu ñuu maá yá. Te jnáhan ñayuu vehe Yaā Dios cácuu ró. <sup>20</sup> Te cácuu ró nájñuhun ñin ñin parte ñin vehe cáhnu jeē cúvāha siquī cimientu, te cimientu un cúu jnúhun Cristo jeē ní canacani táca apóstol jíin téē ni nacani jnúhun ya jenahán. Te maá Jesucristo cúu nájñuhun yuū cánuú gá jeē yítuu vehe. <sup>21</sup> Te ní vehe cúvāha vāha siquī maá yá, cúscúcn cuáhán, cúu ñin templo ii jeē ndeé maá Jítoho yō. <sup>22</sup> Te suu cúu maá ró jijnáhan ró, chí ndúú ró jíin Cristo, te ñinu-ni sáma ya rohó jíin táca ñayuu cácanđje, cácuu ró nájñuhun ñin ñin yuū templo. Te suu cúu jeē ndeé Espíritu Yaā Dios ini rō nájñuhun ini ñin templo.

*Jeē ndíso jniñu Pablo nacani de jnúhun nuū ñayuu tu jíni jnúhun Yaā Dios*

### 3

<sup>1</sup> Te jeē yúcuān ruhū Pablo, jícan tahú ri nuū yā. Te íne ri vecāa siquī jeē ní nacani ri jnúhun Cristo Jesús nuū rohó ñayuu táca nación jeē tu ní jíni jnúhun ya nuú. <sup>2</sup> Te jíni rī jeē ní cajini ró jnúhun ndese yōhyo vāha ni sáha Yaā Dios jíin rī, chí ni jēhe ya jniñu nuū rī jeē nacani ri jnúhun vāha ya nuū rō. <sup>3</sup> Te jnúhun ya jeē ní yisāhí, ni nastuu ya nuū rī, nájñuhun je ni tee ri jecu siquī un núu rō. <sup>4</sup> Te núu na cáhu ró te cuu jecūhun ni rō jeē ní jini vāha ri jnúhun Cristo jeē ní yisāhí un. <sup>5</sup> Te tu ní stéén yā jnúhun sāhí un núu ní ñin ñayuu táca cuíyā ní quiji ichi yátá. Te vijna cúu jeē steén ndijin yā jíin Espíritu yā nuū táca apóstol jeē ní jeni ndoo ya, jíin núu téē cácanani jnúhun ya. <sup>6</sup> Te súcuan cáhán jnúhun ní yisāhí un: Ñayuu táca gá nación, ñin cáhnu-ni nihin i tahú i jíin ñayuu hebreo, chí ni cacandje i jnúhun jeē jnáma ya i. Te ñinu-ni ni nduu ndihi i, te ñin cáhnu-ni quéndōo ndetū anuá i sáha Cristo, nájñuhun ni jejnuhun Yaā Dios. <sup>7</sup> Te jeē siquī jnúhun yáha cúu jeē ní jeni ya ruhū jeē nacani ri jnúhun nuū rō. Chi ni cutahū rī jniñu luu yáha jeē ni jēhe ya nuū rī. Te jíin poder yā ni sáha ya un jíin rī. <sup>8</sup> Te ruhū chí cúu ri téē núu ga nuū táca ñayuu núu ga jeē yíhi ndaha ya. Te vēsú súcuan te nuū maá rī ni jēhe ya jniñu luu yáha jéē nacani ri jnúhun vāha ya nuū ñayuu táca nación jeē tu jíni, ndese yōhyo cúca yó ndihi jeē ndíso jnúhun Cristo, jeē ma cánda cuíti yō jecūhun ni yō. <sup>9</sup> Chi ni jeni ya ruhū jeē steén cají rī jeē suni maá i jnama ya i. Te yúcuān cúu jnúhun Yaā Dios jeē ni yisāhi ndé jenahán ndasí, chí maá yá ni sáha ndihi-ni. <sup>10</sup> Te súcuan ni sáha ya jíin ñayuu, návāha vijna te táca jéē cácujeñhu jíin jéē ndíso jniñu nuū sucún, na cúni ndese ndíchí ndasí Yaā Dios. Chí ndíchí ndasí ni

sáha ya jíin ñáyuu cácan díje. <sup>11</sup> Chi súcuan ni tee ní yā nde níí cáni, te ni sáha ya jeē Jítoho yō Cristo Jesús ni squícu ya ún. <sup>12</sup> Te squícu jeē ni sáha Cristo, te vijna te jíin ndije yó jéé cúu quívi yó cáhān yō jíin Yaā Dios squícu jeē candíje yó Cristo. <sup>13</sup> Núu súcuan te cáhān ndahú rí jíin ró jeē ma cucuíhyá ni rō squícu jnūndóho jeē ndóho rí jehē rō. Chi suu sáha jeē quéndōo ndetū anuá rō jijnáhan ró.

*Cristo yōhoyo cúndáhú ni yā yohó*

<sup>14</sup> Te jeē yúcuan cúu jeē jécuiñí yití rí nuū maá Yaā cúu Tátá Jítoho yō Jesucristo. <sup>15</sup> Te maá yá cúu Tátá nuū ndihi ñayuu yā jeē yúcu andiví jíin ñáyiví. <sup>16</sup> Te jicán tahú rí jeē jíin poder yā jeē cújehnu ndasí yá, na sáha ya jeē íje vāha ni rō jíin jnūhun ya, te coo fuerza ini anuá rō, sáha Espíritu yā. <sup>17</sup> Te jicán rí jeē candíje níhin ró Cristo, návāha condee yā ini anuá rō, te jnií vāha ró jnūhun jeē cundáhú ni yā rohó, te cuiñí níhin ró jíin. <sup>18</sup> Te súcuan te cuu jecūhun vāha ni rō jíin táca ñáyuu candíje, ndese cáa jnūhun cúndáhú ni Cristo yohó. Chi yōhoyo jíté, cáni, cúnú, súcún jnūhun ún, chi yōhoyo cuehē sáha. <sup>19</sup> Te jicán rí jeē na cúní vāha ró ndese cúndáhú ni yā yohó, vésú tu cúu cuiti jecūhun ni yō ndihi ndihi. Te súcuan te cundúú ró jíin Yaā Dios jeē cunuú yá ini anuá rō.

<sup>20</sup> Núu súcuan te na cáhān yō jeē yóhoyo luu cújehnu ya, chi maá yá cúu Yaā iyó poder jeē sáha ya jeē vāha ndasí gá vésú ndihi jeē jicán yō chí jéé jéni ni yō. Te sáha ya un jíin poder yā jeē sájniñu ini anuá yō. <sup>21</sup> Te na cáhān yō jeē yóhoyo luu cújehnu ya jeē squícu jeē ni sáha ya jehē ñayuu cácan díje jíin jéé squícu Cristo Jesús. Te súcuan na cóo nde níí cáni cuiti tiempo jeē quíji. Amén.

*Inuú-ni cácuu ñayuu cácan díje sáha Espíritu*

## 4

<sup>1</sup> Te ruhū jeē íne ri vecāa squícu jnūhun maá Jítoho yō, cáhān ndahú rí jíin ró jeē na cáca ndaā rō nájñūhun cánuú caca ró jéé cácuu ró ñáyuu ni cana ya. <sup>2</sup> Te níin na cóo suchí ni rō, te coo vītá ni rō. Te na cóo paciencia rō, te cuandeyí ni rō jíin jnáhan ró jéé cundáhú ni rō i. <sup>3</sup> Te na cóndihví ni rō coyūcu máni inuú ró, sáha maá Espíritu nuū véji jnūhun maní ni. <sup>4</sup> Chi ñn-ni cácuu ñayuu maá yá, te iyó ñn-ni Espíritu, te inuú cáñūhun ni yō jeē cóo jeē váha squícu jeē ní cana ya yohó. <sup>5</sup> Te iyó ñn-ni Jítoho yō, jíin ñn-ni jnūhun cándíje yó, jíin ñn-ni jnūhun jéndute yó. <sup>6</sup> Te iyó ñn-ni Yaā Dios jeē cúu Tátá yō jijnáhan yó. Te maá yá cújehnu squícu ndihi yó, te sájniñu ya jíin ndihi yó, te ndéé yá ini ndihi yó.

<sup>7</sup> Te táca ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō. <sup>8</sup> Jeē yúcuan cáhān tutu íi:

Ná ni ndaa ya cuanuhun yā andiví,  
te ni stutú yá cuehē jeē  
yíndihyū, cuahān yā jíin.

Te ni saja ya tahū nuū táca ñáyuu.

<sup>9</sup> Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yáha. <sup>10</sup> Te Yaā ní cuun, suni maá yá cúu jeē ní ndaa nde nuū sucún gá andiví, návāha cuhun chitú yá níí cáhnu-ni. <sup>11</sup> Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jnūhun ya, te sava ga scándíje ñayuu jnūhun jeē jnáma ya i, te sava ga coo pastor condito ñayuu cácan díje, te sava ga steén. <sup>12</sup> Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnūhun ya. <sup>13</sup> Te súcuan coo nde nduu inuú-ni ndihi yó jíin jnūhun cándíje yó, te cuni vāha yó ndese Yaā cúu Sēhe Yaā Dios. Te súcuan íje vāha yó ndé na cúchitú yó jíin ndihi jnūhun jeē

ñūhun chitú ini Cristo. <sup>14</sup> Te súcuan te ma cóo ga yō nájñūhun sūchi lúli jéē yachí jéni yāha jéni yūcuán ni i, ni ma quívi nduu yō cháha chúcuan jíin sñn sñn jñūhun jeé cástéén tēe stáhú jéē yóhoyo ndito de squívi de yóhó nuū jñūhun stáhú. <sup>15</sup> Chi sa suhva na cóndiquñ yō jñūhun ndaā jíin jñūhun cundáhú ni. Te súcuan cuehnu yó jíin táca jñiñu cúní Cristo, Yaā cujéhnu nuū ñáyuu cácuu nájñūhun yiqui cúñu yā, chi ñn na cúu i jíin yá. <sup>16</sup> Te sáha ya jeē nduu inuú ni táca i jeē cáhije i cuahān i, chí cácuu i nájñūhun ñn na yiqui cúñu jíin yá. Te jéniñu vāha táca ñn ñn i ndese ni nihñ jñiñu i, návāha scuéhnu jñáhan te ije jíináhan jíin jñūhun cundáhú ni.

### *Jeē ndújeé yó sáha Cristo*

<sup>17</sup> Núu súcuan te yāha cúu jñūhun cáhán rí jíin ró, te jeē achí Jítoho yō cúu jeē cahán nihñ ri jíin ró: jeē ma cáca ga rō nájñūhun cájica sava ga ñayuu jeē tu jíin i ndese Yaā cúu Yaā Dios, chí cájica i jíin jñūhun jeē jéni sáa-ni máá i. <sup>18</sup> Te iyó nee nuū jeē níjnūní i, te tu névāha i Espíritu jeē véji nuū Yaā Dios, chí tu jíin i jñūhun ya, siquí jeē níhni ni i. <sup>19</sup> Te tuá cúcanu i, chí ni quívicoo i jíin jñiñu néé ndasí, te ndíhví ni i sáha i táca jñiñu jnéhén. <sup>20</sup> Te róhó jíináhan ró, nasūu súcuan ní cácuáha ró jñūhun Cristo, <sup>21</sup> te núu ndaā jeē ní cajini ró jñūhun ya jíin jéē ní cacutūhva ró jíin jñūhun ndaā Jesús. <sup>22</sup> Núu súcuan te na stóo ró táca jñiñu ní casáha ró ichi yátá, ná ni casáha ró modo cuní máá ró jeē ní cujnéhén ánuá rō ni sáha jñiñu néé stáhú jéē ní ndiyo ni rō. <sup>23</sup> Te na ndújeé ánuá rō jíin jéē níjnūní rō. <sup>24</sup> Te na cuáha ró jñūhun ndujeé ró, chí nasáha Yaā Dios rohó nájñūhun cúní máá yá jeē cáca ndaā rō jíin jñiñu vāha jñiñu ndoo.

<sup>25</sup> Núu súcuan te ma cahán gā rō jñūhun stáhú, te na cáhán ndaā rō

jíin táca jñáhan ró, chí ñn-ni cácuu ndíhi yó.

<sup>26</sup> Núu véji ñn jeē squítí ni rohó, te ma quití neé ni rō. Te ma quití ni rō nde quēe niāndii. <sup>27</sup> Ma cuáha ró jñūhun jeē sáha jexeén jeē quívi ró cuéchi.

<sup>28</sup> Ñayuu ní sacuíhná, ma sacuíhná gá i, chí sa suhva na sájñiñu i, te na cócuu i jíin jñiñu vāha, návāha nihñ i jeē cuáha i nuū ñáyuu cúmaní nuū.

<sup>29</sup> Ni ñn jñūhun néé ma cahán rō, chí sa suhva na cáhán rō jñūhun vāha jeē scuéhnu jñáhan jíin jñūhun ya, te sáha jeē quéndōo vāha ñayuu jíni sōho. <sup>30</sup> Ma sáha ró cuéchi návāha ma cucuíhyá ni Espíritu Santo Yaā Dios. Chi Espíritu yā cúu nájñūhun sello jeē steén jeē cúu yó séhe Yaā Dios, nde quiji quívi jíin jñiñu jeē jñáma ya rohó.

<sup>31</sup> Te na siáá rō táca jñūhun cútucu ni, jíin jñūhun xeén ni, jíin jñūhun quití ni, jíin jñūhun cáhán ndevāha, jíin táca jñūhun néé. <sup>32</sup> Chi sa suhva na cóo vāha ni rō jíin jñáhan ró, te cundáhú ni rō i. Na cóne cáhnu ni rō nuū jñáhan ró, nájñūhun ni ine cáhnu ni Yaā Dios nuū rō siquí Cristo.

*Ndese cánuú caca ndaā séhe Yaā Dios*

## 5

<sup>1</sup> Núu súcuan te na ndácu ró Yaā Dios, chí cácuu ró séhe ya jeē maní yā jíin. <sup>2</sup> Te níni cundáhú ni rō jñáhan ró, nájñūhun ni cundáhú ni Cristo yohó, te ni socō yā maá yá jehē yō, ni cuu ya nájñūhun ñn londe jeē jeén asñ nuū Yaā Dios jeē ni sócō yā maá yá.

<sup>3</sup> Te vijna jeē cácuu ró séhe Yaā Dios, te ni ma sáha ró ni ma ndájñūhun ró síquí jñūhun jíca jnéni, ni táca jñiñu jnéhén, ni jñūhun ndíyo ni ndajñiñu. <sup>4</sup> Te ni ma cahán rō táca jñūhun sáha jeē cúcanu jñáhan, ni jñūhun cánéé íi, ni jñūhun jeē tu ndé jéniñu cuití. Chí táca

un tu níhn jniñu. Chi sa suhva na nácuatáhú ró nuū Yaā Dios. <sup>5</sup> Chi je cájini rō jeē ní ñn ñayuu cájica jnéni, ní jeē sáha jniñu jnéhen, ní jeē ndíyo ní tǎcá ndajniñu, ma níhn tahú i quívi i ndaha Cristo jíin Yaā Dios jeē ndacu ya jniñu nuū i. Chi tǎca jéē ndíyo ní i cúu nájnūhun ídolo i jeē cáchiñúhún i. <sup>6</sup> Te coto ró jéē ma stahú ní ñn i rōhó jíin tǎca jnūhun cáhán saá ní i, chí síquī tǎca jnūhun néé yáha cúu jeē quíji castigo xeēn Yaā Dios nuū tǎca ñáyuu níhni ní. <sup>7</sup> Ma quívi nduu rō jíin i núu súcuan.

<sup>8</sup> Chi tǎca quívi saá ní coyūcu rō nájnūhun nuū néé, te vijna chí cáyūcu rō jíin luz maá Jítoho yō, cúu jeē cájecūhun ní rō síquī yā. Te na cáca ró nájnūhun cájica ñayuu jeē steén luz yā ini anuá i. <sup>9</sup> Chi jniñu sáha luz yā jíin yó cúu tǎcá jniñu manī ní, jniñu ndaā, jíin jniñu váha. <sup>10</sup> Scuáha ró sáha ró tǎca jniñu jeē nújnahan ní maá Jítoho yō. <sup>11</sup> Te ma quívi nduu rō jíin tǎca jeē tu níhn jniñu jeē casáha ñayuu cáyūcu nájnūhun nuū néé. Chí sa suhva steén rō nuū i jeē tú vāha casáha i. <sup>12</sup> Chí cúcanu yō cahān yō síquī jniñu casáha yuhu maá i. <sup>13</sup> Te luz yā sáha jeē nátūu tǎcá jniñu néé casáha i. Te núu cuatáhú i luz yā te caca i jíin luz ún. <sup>14</sup> Jeē yúcuán cáhán tutu:

Róhó jeē cúhuun ní, jeē nájnūhun quíxí, natahū ní,  
te quenda ró méhñu ñáyuu jeē cácuu nájnūhun ndívi.

Te Cristo steén yā luz yā ini anuá rō. Achí tutu.

<sup>15</sup> Núu súcuan te coto vāha ró ndese caca yúcún ró. Te ma cáca ró nájnūhun cájica ñayuu canéé, chí caca ró nájnūhun cájica tēe ndíhí. <sup>16</sup> Ma snáa rō tiempo, chí condíhvī ní rō jíin jniñu ya, chí íyó cuéhē cuēchi quívi yáha. <sup>17</sup> Núu súcuan te ma cóo néé xínī rō, chí sa suhva na jécūhun vāha ní rō na jniñu nújnahan ní maá Jítoho yō. <sup>18</sup> Te ma nájini ró, chí tívi ró sáha. Chí

sa suhva na ndúcú ró jeē cúnuú Espíritu Santo ini anuá rō. <sup>19</sup> Te cahān rō jíin jnāhan ró jíin salmo jíin himno, yaa íi jeē cahān jnūhun ya. Te ini anuá rō cahān rō jíin yá jíin tǎca yaa, chí yūcuán cúu jeē jíta ánuá rō nuū yā chíñúhún ró yā. <sup>20</sup> Te níni nacuatáhú ró síquī tǎcá-ni nuū Tatá yō Yaā Dios te ndacunehen ró síhvī maá Jítoho yō Jesucristo.

*Ndese síquīcu vāha ñayuu cácuandíje nuū jnāhan i*

<sup>21</sup> Te cuatáhú ró nuū jnāhan ró síquī jeē cáhiyo yíñúhún ró nuū Cristo.

<sup>22</sup> Róhó ñahan cácuu ñasíhí, cuatáhú ró nuū yíi ró, nájnūhun jétáhú ró nuū Jítoho yō. <sup>23</sup> Chí yíi cújéhnu nuū ñasíhí, nájnūhun cújéhnu Cristo nuū yohó ñáyuu cácuandíje, jeē cácuu yó nájnūhun yíqui cúñu yā, chí ñn na cúu yó jíin yá. Te maá yá jnáma ya yohó. <sup>24</sup> Chí nájnūhun ñayuu cácuandíje cájetáhú i nuū Cristo, suni súcuan ñasíhí cuatáhú ña ndíhi jeē cahān yíi ña.

<sup>25</sup> Te róhó tēe cácuu yíi, cundáhú ní rō ñasíhí ró, nájnūhun ní cundáhú ní Cristo yohó ñáyuu cácuandíje, te ní socō yā maá yá jehē yō. <sup>26</sup> Súcuan ní sáha ya jeē cóo ndoo coo íi yō nuū yā, te ní nacate ya anuá yō jíin jnūhun ya jíin jéē ní jendute yó. <sup>27</sup> Te yohó ñáyuu cácuandíje chí cuiñi yó núu yā, te luu cújéhnu yó. Te ma cóndee cuēchi ánuá yō, ní jeē tú luu, ní ñn jeē súcuan, chí sa suhva coo ndoo coo íi yō nuū yā, te tú na vé cumani gā. <sup>28</sup> Te nájnūhun Cristo ní cundáhú ní yā ñayuu cácuandíje, suni súcuan cánuú jéē cundáhú ní yíi ñasíhí de, nájnūhun cundáhú ní de maá de. Chí tēe cundáhú ní de ñasíhí de, maá de cundáhú ní de. <sup>29</sup> Chí ní ñn tēe tu jító uhū de maá de, chí sa suhva yéji de te ndíto yúcún de maá de. Te suni súcuan sáha Cristo jíin yohó ñáyuu cácuandíje nuū yā. <sup>30</sup> Chí cácuu yó nájnūhun

yiqui cúñu yā, te ñn ñn yó cácuu nájñūhun ñn ñn parte yiqui cúñu yā. <sup>31</sup> Te suu cúu nájñūhun tēe jeē stóo de tátá de náná de, te quijnáhan de jíin ñasihí de, te ñn na cúu ndindúú de. <sup>32</sup> Yōhyo jéñnu jñūhun sāhi yáha, te cáhán rī jeē ñáyuu cáccandíje suni súcuan quijnáhan i jíin Cristo. <sup>33</sup> Te suni súcuan ná ñn ná ñn ró cundáhú ni rō ñasihí ró, nájñūhun cundáhú ni rō maá ró. Te ñasihí na cúu yíñūhún ña jíin yñ ña.

## 6

<sup>1</sup> Te rōhó séhe jíin náhan ró, cuandije ró núū tátá rō nuū naná rō, chí yūcuan cúu jeē váha sáha ró jéē candíje ró Jítoho yō. <sup>2</sup> Chi yáha cúu ñn jnáhan jeē uxí jñūhun ndácu jniñu jeē ni jéhe ya, te xihna gā jñūhun yáha ndiso tahū: Coó yíñūhún ró nuū tátá rō nuū naná rō, <sup>3</sup> návāha quendōo ndetū rō, te náhán cotecu rō ini ñayīvi yáha. Achí.

<sup>4</sup> Te rōhó tátá jíin náhan ró, ma squití ni rō séhe ró, chí sa suhva scuéhnu ró i jíin jñūhun cuandije i, te stéén rō nuū i jeē candíje i maá Jítoho yō.

<sup>5</sup> Te rōhó mozo jíin náhan ró, cuandije ró núū patrón rō ñayīvi yáha, te coo yíñūhún ró te conso iyo ró núū de. Te na sájniñu ndaā sájniñu ndije ró, caní ni rō jeē nuū Cristo cácejniñu ró. <sup>6</sup> Ma sájniñu ndúxí ró jeē maá jéē coto de te cuajnúhún de rōhó. Chi sa suhva sáha ró cuenta jeē mozo Cristo cácuu ró. Te sáha ró jéē nújnahan ni Yāā Dios nde jíin ini jíin ánuá rō. <sup>7</sup> Te na cúsiñi rō sájniñu ró, te na cáni ni rō jeē nuū maá Jítoho yō cácejniñu ró, nasūu núū ñáyuu. <sup>8</sup> Chi je cájini rō jeē jniñu váha sáha ñn ñn ró, te nihñ rō yáhu jniñu yūcuan núū maá Jítoho yō, vēsú cúu ró mozo chí téé sájniñu maá.

<sup>9</sup> Te rōhó patrón jíin náhan ró, suni súcuan sáha ró jíin mozo rō, te ma cáhán xeēn rō jíin i. Chi na cócuhun

ni rō jeē suni maá ró jíin maá i yñi ró ndaha Jítoho yō, Yāā ndeé andiví. Te tu sáha ya cuenta ndese cúu ñn ñn ñayuu, chí inuú sáha ya jíin i.

*Na cúcutú yó jíin táca fuerza Yāā Dios*

<sup>10</sup> Te íyó inga jñūhun, hermano jíin náhan ró. Nducú ró jeē na cóo fuerza ini rō jíin fuerza maá Jítoho yō jeē nduú yá jíin ró, chí íyó téyí poder yā. <sup>11</sup> Na cúcutú ró jíin táca fuerza Yāā Dios, návāha cuu cuiñi nihñ ró jéē ma stahú jexeén rōhó.

<sup>12</sup> Chi nájñūhun jeē cácejnáhan yó jíin táca jéē neé. Te nasūu ñáyuu cúu jeē cácejnáhan yó jíin, chí sa suhva jíin táca táchī cájica nuū sucún. Te yūcuan cúu jeē cácujeñnu, jíin jéē cándiso jniñu, jíin jéē cándacu jniñu nuū ñáyuu ñayīvi yáha jeē nájñūhun cájica i nuū neé. <sup>13</sup> Núu súcuan te na cúcutú ró jíin ndihí fuerza Yāā Dios, návāha cuu cuiñi nihñ ró quívi jito ndee jexeén rohó. Te súcuan coo túhva ró jíin táca ndihí jeē cuiñi nihñ ró jíin. <sup>14</sup> Núu súcuan te cuiñi nihñ ró jíin jñūhun ndaā jeē cúu nájñūhun jeē yñi nihñ sanchíi chíji ró. Te sácutú ró maá ró jíin jñūhun caca ndaā rō, te suu cúu nájñūhun jeē cúcutú soldado jíin sahna cáa jeē ndihyú de. <sup>15</sup> Te níni cotúhva ró nacani ró jñūhun ndeyí jñūhun siñ ni jeē véji nuū Yāā Dios. Te suu cúu nájñūhun jeē chíhi soldado ndijēn jehē de. <sup>16</sup> Te jeē cánuú gá cúu jeē candíje ró jeē iyó yá jíin ró. Te yūcuan cúu nájñūhun jeē túhva ró maá ró yatā ñn escudo. Chi jíin jñūhun cándíje ró un te cuu ndahva rō ndihí jeē tají maá jéxeén, jeē cúu nájñūhun nduva jeē cayú yáñuhūn punta. <sup>17</sup> Te cuiñi ró jíin jñūhun ni jnama ya rohó, jeē cúu nájñūhun ñn lélú cáa. Te cuajniñu ró jñūhun jeē yosó núū tútu Yāā Dios jeē ni jéhe Espíritu Santo nuū rō. Chi yūcuan cúu nájñūhun jéjiniñu soldado espada de. <sup>18</sup> Te níni cácan

tahú rō nuū Yaā Dios siquī ndihi-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñī rō jeē cacān tahú rō jehē tāca ñáyuu maá yá. <sup>19</sup> Te suni cahān rō jehē rī, návāha nihīn rī jnūhun cahān rī, te coo téyí ni rī nacani cájí rí jnūhun jeē jnáma ya yohó, suu jnūhun jeē ní yisāhí un. <sup>20</sup> Chi ni tají yá ruhū jeē jíca ri nácani ri jnūhun ya ún, te jeē siquí un cúu jeē íne ri vecāa. Te na cacān tahú rō jeē coo téyí ni rī cahān rī jnūhun ya, návjñūhun cánuú cahān rī.

*Saludo jeē sándihí*

<sup>21</sup> Tíquico cúu ññ hermano jeē maní yō jíin, te cúu de tēe squícu vāha chindéé ñájñáhan jíin rí nuū jniñu máá Jítóho yō. Te máá de castūhún ndihi ndese cuahān jniñu ri te ndese íyó rí. <sup>22</sup> Jeē yúcuán ní tají rí de cuajeē de nuū rō, návāha cachi de ndese cáhīyo ri, te coo ndeyí ni rō jijnáhan ró sáha de.

<sup>23</sup> Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siñ ni tāca rōhó jēē cácuu hermano, te coo maní gā rō jíin yá, te candíje vāha ró. <sup>24</sup> Te ñúhun ni rī jeē na sáha ga yā jeē vāha rōhó jijnáhan ró jēē maní ndije ró jíin Jítóho yō Jesucristo. Súcuan na cóo. Amén.



## CARTA JEE NI TEE APOSTOL ŠAN PABLO NUU ŅAYUU ŅUU FILIPOS

<sup>1</sup> Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú űnuu Filipos, jeē cácuu ró űáyuu maá yá jeē cáyihí ró ndaha Cristo Jesús. Te suni cátee ri nuū tēe cándiso jniűnu cándito róhó, jíin núu tēe cájejniűnu mehűnu ró. <sup>2</sup> Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

*Jeē jicán tahu Pablo jehē űáyuu cácandíje*

<sup>3</sup> Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios. <sup>4</sup> Te náa jicán tahu rí, te níni cúsi ni rí jicán tahu rí jehē rō. <sup>5</sup> Chi ni chindéé űájánahan ró jíin rí jeē scáca yó jnúhun váha ya, nde quivī ní cacandíje ró te nde vijna. <sup>6</sup> Te jíni ndije ri jeē maá Yaā ní squéjéé jniűnu váha jíin ró, cocu ya jíin ndé quivī ndíji Jesucristo, te sínu ndihí ya. <sup>7</sup> Te iyó váha jeē súcuan jéni ni rí siquī tāca róhó, chi yōhyo manī rí jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiűi ri nuū tāca tēe cújéhnu, cahān rí jehē jnúhun jeē jnáma ya yohó jéé jnúhun ndaā cúu. <sup>8</sup> Chí Yaā Dios jíni yā ndese yōhyo manī rí jíin ró jíjnáhan ró, nájnūhun yōhyo manī Jesucristo jíin yó. <sup>9</sup> Te jicán tahu rí jeē na cáa ga jeē cundáhú ni rō jnáhan ró, jíin jéé na jécūhun ga ni rō te cundíchí ró jíin táca jnúhun ya. <sup>10</sup> Te súcuan te cuu nacāji ró táca jéé váha condiquīn rō, te caca ndaā rō, te ma cóo ni in cuēchi siquī rō quivī ndíji Cristo. <sup>11</sup> Te súcuan te cayā cuehē

jniűnu váha jeē sáha Jesucristo jíin ró. Te sáha jeē coo yíñúhún űáyuu jíin Yaā Dios te cahān i jeē yóhyo luu cújéhnu ya.

*Jnúhun jeē técu nduú yó jíin Cristo*

<sup>12</sup> Hermano, cúní rí jeē na cúcáhnu ni rō jíjnáhan ró ndese ni sáha jnúndóho ni ndoho ri. Chí ni sáha jeē ni jítē núu ga jnúhun jeē jnáma ya yohó. <sup>13</sup> Chí tāca soldado cáyūcú ini palacio, jíin táca gá űayuu, cájini i jeē íne ri vecāa jeē siquī Cristo. <sup>14</sup> Te siquī jeē íne ri vecāa, jeē yúcuu cúu jeē vihyá gā nihín ndeyí ni cuehē tācá hermano cácandíje nuū Jítóho yō. Te cáhiyo téyí gá ni de nácani de jnúhun ya, te tu ndé ndínuu ni de.

<sup>15</sup> Te ndaā chí sava tēe cánacani de jnúhun Cristo siquī jeē cuesún ni de jíin jéé nduxí de. Te sava ga de chí sa suhva cánacani de jnúhun ya siquī jeē váha ni de. <sup>16</sup> Sava de cánacani jnúhun Cristo siquī jeē nducú de jeē váha máa-ni de, te tú ndije de, chí cácuni de jeē nihín gā rí jnúndóho jeē íne ri vecāa. <sup>17</sup> Te sava ga de chí cánacani de jnúhun siquī jeē cundáhú ni de ruhū, chí cájini de jeē íne ri vecāa siquī jeē cahān rí jehē jnúhun jeē jnáma ya yohó. <sup>18</sup> Tú na vé sáha núu súcuan, chí tācá-ni modo cascuíté núu de jnúhun Cristo, vēsú núu ndije de chí tuú. Te yāha cúu jeē cúsi ni rí sáha.

Te suni cusī gā ni rí, <sup>19</sup> chí jíni rí jeē tāca jéé yáha sáha jeē váha ga coo jíin rí, chí cájicān tahu rō jehē rí, te Espíritu Jesucristo chindéé űáhán yá ruhū. <sup>20</sup> Chí űnúhun ni rí te cúu ndasí ni rí jeē ma sáha ri ni in jeē sáha jeē cucanu ri nuū yā. Chí sa suhva coo téyí ni rí cahān rí jnúhun ya, návāha ndujéhnu ga Cristo sáha máá rí vijna, nájnūhun je ni sáha ri ní véji ri, te vēsú na cótecu rí chí vēsú na cúu rí. <sup>21</sup> Chí jeē técu rí cúu jeē nduú rí jíin Cristo, te jeē cúu rí cúu jeē vihyá gā váha coo jíin rí. <sup>22</sup> Te núu cotecu gā rí, te cuu

scáca ga rī jniñu máá Jítóho yō. Núu súcuan te tu cúcáñu ni rī ndé ññ cúu jeē váha ga, núu jeē cótecu rī chí jeē cúu rī. <sup>23</sup> Chi mēññú ndíndúú jnúhun yáha íne nīhin rī. Chi ññ cúu jeē cuní rī quihñ rī condee rī jín Cristo, chí yūcuan cúu jeē vihyá gā váha coo jín rí. <sup>24</sup> Te suni cánuú gā jeē cótecu gā rī jeē siquí rohó jínáhan ró. <sup>25</sup> Núu súcuan te íyó ndāā ni rī jeē quéndōo rī condee gā rī jín ró, návāha stéén gā rī nuū rō ndese caca váha ga rō jín yá, te cusñ gā ni rō jín jnúhun cácanđje ró. <sup>26</sup> Núu súcuan te condee tucu rī jín ró, te cusñ teyí ni rō jeē siquí ruhū, sáha máá Cristo Jesús.

<sup>27</sup> Te máá ññ-ni jeē condihvī ni rō caca ndāā rō, nájnūhun cánuú caca ró siquí jeē cácanđje ró jnúhun Cristo. Yūcuán na te vēsú na jínú rī coto jnáhan yó, chí condee jicá rí, te nihñ rī jnúhun ro jéé cáhñ nīhin ró jín jnúhun ya, te cáhño ññ ní rō, te ññ-ni cánducú ndéyí ró siquí jnúhun jeē cácanđje yó jéé jnáma ya yohó. <sup>28</sup> Te ma yūhú cuiti rō sáha jeē cájito uhū rohó. Chi jeē jító uhū i róhó, yūcuan stéén jeē jnahnú ndetū i, te suni stéén jeē cācu ánuá máá ró jijnáhan ró sáha Yaā Dios. <sup>29</sup> Chi ni jēhe Cristo uū jeē váha nuū rō: nasūu máá ññ-ni jeē candíje ró yá, chí suni jeē na ndóho ró jéé siquí yā. <sup>30</sup> Chi máá rí jín róhó jijnáhan ró, nájnūhun jeē cájejnáhan yó jín táca jéé neé. Chi ni cajito ró jéé súcuan ni sáha máá rí, te cánihñ rō jnúhun jeē sáha ga rī nde vijna.

*Jeē ni sáha suchí yá maá yá te ni ndujéñnu ya*

## 2

<sup>1</sup> Núu súcuan te sáha Cristo jeē cáhño ndeyí ni rō, jín jéé cusñ ni rō siquí jeē váha ni yā jín ró. Te ndéé Espíritu yā jín ró, te manī rō jín jnáhan ró, te cájito ndáhú ró i. <sup>2</sup> Núu súcuan te na cócu ga rō jín táca jnúhun yáha, návāha cusñ teyí ni rī.

Te ññ-ni na cóo ni rō, te coyūcu manī rō, te ññ na cóo ánuá rō, te ññ caní ni rō. <sup>3</sup> Te ni ññ jniñu ma sáha ró jéé nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró. <sup>4</sup> Te ma cóndihvī ni rō maá-ni jniñu jeē quéndōo váha máá-ni ró, chí suni na cóndihvī ni rō jniñu jeē quéndōo váha jnáhan ró.

<sup>5</sup> Te na cáni ni rō jijnáhan ró nájnūhun ni jeni ni Cristo Jesús. <sup>6</sup> Chi máá yá kujéñnu ññ yá jín Yaā Dios, te vēsú súcuan te tu ní jeni ni yā jeē kujéñnu ññ yá jín Yaā Dios. <sup>7</sup> Chi ni siaá yā jeē kujéñnu ya, te ni nduu ya nájnūhun índāa mozo, te ni cacu ya ni nduu ya tēe. <sup>8</sup> Te ná ni nduu ññ yá jín tēe, te ni sáha suchí yá maá yá. Te ni jendije ya nde jín jnúhun jeē cúu yā, te nde jín jnúhun canu jeē cúu yā jicā cruz. <sup>9</sup> Jeē yūcuan ní sáha Yaā Dios jeē yóhño ni ndujéñnu luu ya, te síhví yá kujéñnu ndasí gā nuū táca gā síhví. <sup>10</sup> Te táca jéé cáhñ andiví jín ñáyiví jín chíji ñáyiví, núu na cuní i síhví Jesús te jecuiñ yití i. <sup>11</sup> Te cahān ndāā ndiví i jeē Jesucristo cúu máá Jítóho. Te súcuan stéén i jeē yóhño kujéñnu máá Tátá yā Yaā Dios.

*Ñayuu cácanđje cúu i nájnūhun quimi jeē ndíndéé*

<sup>12</sup> Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jín ró, suni súcuan víhyá gā cuandije ró vijna jeē ndeé jicá rí jín ró. Te condihvī ni rō jeē caca ndāā rō jín jnúhun ní jnama ya rohó, te caca yíñuhñ ró conso iyo ró nuū yā. <sup>13</sup> Chi Yaā Dios jicu ya jín ró jeē cúu ni rō sáha ró jniñu váha, te chíndéé ñáhán yá rohó jéé squicu ró jniñu nújnahan ni yā.

<sup>14</sup> Ndiñ jeē sáha ró, ma cahān sōo ró, ni ma tejnáhan ró, <sup>15</sup> návāha cuu ró séhe Yaā Dios jeē tú na cuēchi coo siquí rō te coo ndāā

rō. Te caca ndoo ró méhñu ñáyuu nīhni ni jeē casáha néé. Chi méhñu ñáyuu un stéén rō jniñu váha ró, te súcuan cácuu rō nájñuhun quĩmi jeē ndíndēe núu néé ñayiví. <sup>16</sup> Te stéén rō jñuhun ya nuū i jeē cótecu i nñ cáni sáha. Te súcuan te cusñ teyí ni rī quiví ndíji Cristo, chi cuni rī jeē tu ní jíca cāhá rí, ni tu ní sájñiñu cāhá rí. <sup>17</sup> Te vēsú na cúu rī jeē socō rī maá rí nuū yā jeē siquí rohó, te yūcuan cúu jeē nducú rí scandíje ga rī rohó, návāha socō rō maá ró sáha ró jniñu váha jeē cácandíje ró yá. Jeē yúcuan cúu ni rī, te cúní rī jeē suni cusñ ni rō jíin rí jijnáhan ró. <sup>18</sup> Núu súcuan te na cúu ni maá ró jíin rí, te inuú na cúu ni yō jijnáhan yó.

### *Jñuhun Timoteo jíin Epafrodito*

<sup>19</sup> Te ñuhun ni rī jeē cuáha máa Jítoho yō Jesús jñuhun jeē tají yáchí rī Timoteo jeē de nuū rō, návāha ndusñ ni rī núu na nínhi rī jñuhun ndese cáhīyo ró. <sup>20</sup> Chi tuá na inga tēe íyo yáha jēe inuú jéni ni jíin rí, nájñuhun máa de jeē ndihví ndíje ni de jehē rō. <sup>21</sup> Chi táca de cánducú de jeē cúu máa de, te nasūu jēe cuní Cristo Jesús. <sup>22</sup> Te je cájini rō jeē tēe vāha cúu Timoteo. Chi nájñuhun sēhe jíin tátá, súcuan ni jejñiñu de jeē nácani de jñuhun vāha ya jíin rí. <sup>23</sup> Núu súcuan te ñuhun ni rī tají rí de jeē de nuū rō, te núu je ni cucáhnu ni rī ndese coo jíin rí. <sup>24</sup> Te jéni ndíje ni rī jeē cuáha Jítoho yō jñuhun jeē suni máa rí jinū yachí rī nuū rō jijnáhan ró.

<sup>25</sup> Te suni jéni ni rī jeē cánuú tají rí hermano yō Epafrodito jeē de, chi tēe sájñiñu jíin rí siquí jñuhun ya cúu de te chindéé ñájñáhan de jíin rí. Chi máa ró ni catají ró de jeē cuajñiñu de nuū rī táca jēe cúmaní nuū rī. <sup>26</sup> Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihñ rō jñuhun jeē ní cocuhū de. <sup>27</sup> Chi jendaá ni cocuhū de, te je yajni cuu de núu. Te Yaā Dios ni cundáhú

ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núu. <sup>28</sup> Jeē yúcuan cúu jeē ndihví gā ni rī tají rí de nuū rō, návāha ndusñ ni rō jeē ndácoto tucu ró núu de. Te suni ruhū ma cucuíhyá ndasí gā ni rī. <sup>29</sup> Núu súcuan te na cúu ni rō jeē nájñu de nuū rō, chi cúu de hermano yō jeē candíje de maá Jítoho yō. Te coo yíñúhún ró jíin táca tēe índāa nájñuhun cáa de. <sup>30</sup> Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sáha máa ró jijnáhan ró.

### *Jñuhun jeē cáca ndaā vāha yó*

## 3

<sup>1</sup> Te vijna, hermano jijnáhan ró, na cúu ni rō jíin máa Jítoho yō. Ruhū chi tu jnánini ni rī jeē tēe tucu rī jñuhun yáha núu rō, chi cuajñiñu jeē quéndōo vāha ga rō. <sup>2</sup> Condito ró máa ró nuū tēe casáha jniñu néé, jeē cándāa ná cándāa ina. Chi cánducú de stújí de róhó jēe casáha de circuncidar, te tu casáha de jniñu ndaā. <sup>3</sup> Te máa yó cácuu ñáyuu ni cuu circuncidar ndíje, chi cáchiñúhún yó nuū Yaā Dios nde jíin ini jíin ánuá yō, te cácusñ ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máa-ni yó. <sup>4</sup> Núu jeē súcuan cúu te ruhū chi suni cuu tenuū rī jniñu jeē sáha máa-ni rī nuú. Chi núu ndé tēe jéni ni de jeē cuu tenuū de máa de, te ruhū chi víhyá gā cuu tenuū rī maá rí. <sup>5</sup> Chi ni casáha circuncidar ruhū nuū uná quiví ná ni cacu rī. Te yucūn Israel cúu rī, te suni jnáhan yucūn Benjamín, te ññ hebreo sēhe hebreo cúu rī. Te suni ni cuu rī tēe grupo fariseo jeē ni squicu rī táca ley jnáhan ñuu rī hebreo. <sup>6</sup> Te ni jito xeñ rī ñáyuu cácandíje, chi yōhyo ni condihví ni rī jeē ma sáma i modo ley jenahán. Te ni ññ tu ní

cúu cahān jeē tu squícu ri ley un, chi ni squícu vāha rí. <sup>7</sup> Te tāca jēē ní tenuū rí ún, chi sáha ri cuenta jeē tu ndé níhín jniñu cuiti, chi vijna te ni candíje ri Cristo. <sup>8</sup> Te suni chíhi ri cuenta jeē vāha ga na nāā ndihi jeē ní tenuū rí ún, chi vāha ndasí gá cúu jeē ni quívi ri ndaha máá Jítoho rí Cristo Jesús. Te jeē siquí maá yá te ni siaá rí ndihi ún, te sáha ri cuenta jeē nájnūhun yācá-ni cúu. Chi ni quívi ri ndaha Cristo, <sup>9</sup> te ndúú yá jíin rí. Te tuá nducú rí quendōo ndaā rí jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cáandíje. <sup>10</sup> Te vijna te cúní rí jecūhun vāha ni rí ndese Yaā cúu ya. Te cúní rí jeē poder jeē ní natecu yā cone jíin rí. Te cúní rí ndoho ri jíin yá, te nde jinū rí ndoho ri nájnūhun ni ndoho máá yá jeē ni jíhi yā. <sup>11</sup> Chi yōhyo ñūhun ni rí natecu rí nájnūhun ni natecu yā.

*Jeē nducú ndéyi Pablo sínu de carrera de*

<sup>12</sup> Te ná tu nihīn rí ndihi jeē ni cáhān rí ún, ni ná tu ije ri jíin. Te ndúcú ndéyi rí siquí ún, chi ñūhun ni rí jeē níhín rí tācá un, chi jeē yúcuán cúu jeē ni nihīn Cristo Jesús ruhū xīhna gā. <sup>13</sup> Hermano jijnáhan ró, tu sáha ri cuenta jeē jé ni nihīn rí ndihi ún. Te iyó ñn jeē sáha ri, cúu jeē squéndōo ri tāca jēē ní cuu ichi yátá, te ndúcú ndéyi rí nihīn rí tāca jēē iyó ichi núú. <sup>14</sup> Chi cúu un nájnūhun jeē jíinu ri ñn carrera cuahān rí nde jinū rí andiví, te nihīn rí premio jeē cuáha Yaā Dios. Chi ni cana ya yohó jēē quihín yō nuū yā andiví siquí jeē yíhi yó ndaha Cristo Jesús.

<sup>15</sup> Te tāca yó jeē jé ni ije vāha yó jíin jnúhun cándíje yó, súcuan na cáni ni yō. Te núu ndé ñn ró sún jeni ni rō, te Yaā Dios suni steén yā nuū rō jeē násūu súcuan cúu. <sup>16</sup> Te jíni

ñūhún cani ni yō te caca yó modo jeē quijnáhan jíin jēē jé ni nihīn yō.

<sup>17</sup> Hermano, na ndácu ró ruhū jijnáhan ró. Te condēhe vāha ró ndese cájica ñayuu ndaā, chi cájica i nájnūhun ni castéén rí nuū rō. <sup>18</sup> Te je ni cuu tijni jíinu ni cahān rí jíin ró, te nde ndahyú rí cahán tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jnūhun jeē ni jíhi Cristo jicā cruz. <sup>19</sup> Te ñn quívi te jnahnū ndetū ñayuu ún. Chi máni jeē cáji vāha i cúu jeē cáchiñūhún i. Te sátéyi i máá i jíin jniñu néé jeē jéhe jnūhun canu. Te máni máá jēē iyó ini ñayívi cúu jeē ndihví ni i. <sup>20</sup> Te máá yó chi ñayuu coyúcú andiví cúu yó, te cándetu yó jēē nde yúcuán ndiji Jítoho yō Jesu-cristo, Yaā jnáma yohó. <sup>21</sup> Te máá yá nasama ya yiqui cúñu ndahú yó, návāha nduu yó nájnūhun cáa máá yá jeē lúu cújéhnu ya. Te súcuan sáha ya jíin poder yā jeē cújéhnu ya siquí ndihi-ni.

*Níni na cúsi ni yō jíin Jítoho yō*

## 4

<sup>1</sup> Núu súcuan hermano jijnáhan ró, cuiñi níhin ró jíin jnúhun máá Jítoho yō. Chi yōhyo maní rí jíin ró, te cúní rí jeē coto jnáhan yó, te cúsi ni rí jíin ró, te nájnūhun premio rí cácuu ró.

<sup>2</sup> Te cáhān ndahú rí jíin róhó Evodia jíin Síntique jeē inuú na cóo ni rō, chi cácuu ró hermana jeē cáandíje ró máá Jítoho yō. <sup>3</sup> Te suni cáhān ndahú rí jíin róhó, téé jeē ní chindéé ñajnáhan vāha jíin rí, jeē na chindéé ñáhán ró hermana un, chi ni casájniñu níhin ña jíin rí siquí jnúhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō síhví i nuū libro jeē yosó síhví ñayuu cotecu ní cáni.

<sup>4</sup> Te níni na cúsi ni rō jijnáhan ró jíin máá Jítoho yō. Te inga jínu cáhān rí jeē na cúsi ni rō. <sup>5</sup> Sáha vāha ró jíin táca ñayuu, návāha cuni i jeē

súcuan vāha ni rō. Chi máá Jítóho yō, yajni-ni cúu ya jíin rō.

<sup>6</sup> Ma nácani ndasí ni rō siquī ni ñin. Chi sa cahān rō jíin Yaā Dios siquī tāca jéé nácani ni rō. Chi cacān tahú rō, te cahān ndahú rō, te suni nacuatáhú rō nuū yā. <sup>7</sup> Yūcuān na te sáha Yaā Dios jeé cóo ndeyí coo sī ndasí ni rō, te súcuan coo jíin rō nde cūhva jeé ma jécūhun ni rō ndese cúu jeé sáha ya ún. Te condito vāha ya anuá rō jíin jéé níjnūní rō, coo cuehē jnūhun ndeyí jnūhun sī ni jíin rō, siquī jeé yáhi rō ndaha Cristo Jesús.

*Jeé na cáni ni yō siquī tāca jéé vāha*

<sup>8</sup> Te ñin na jnūhun íyó, hermano jijnáhan rō. Na cáni ni rō siquī tāca jéé iyó ndáá, jíin jéé sáha yíñúhún, jíin táca jniñu sáha vāha, jíin jniñu íyó ndoo, jíin táca jéé iyó mání ni, jíin jéé lúu sáha. Te mání na núcūhun ni rō tāca jéé vāha jeé sáha jeé nácuatáhú rō nuū yā.

<sup>9</sup> Tāca jéé ni stéén rī nuū rō, jeé ní cacutūhva rō núu rī, jíin jéé ní cajini rō ní cahān rī, jíin jéé ní cajito rō ní sáha rī, tāca yúcuan suni na sáha máá rō. Yūcuān na te máá Yaā jeé jéhe jnūhun ndeyí sī ni, coo ya jíin rō.

*Jeé ní casocō ñayuu Filipos nuū Pablo*

<sup>10</sup> Te yóhoyo cúsi ni rī sáha máá Jítóho yō, chí vijna te ni canucūhun tucu ni rō jeé chindéé ñáhán rō rúhū. Te nasūu jéé ní naa ni rō sáha rō súcuan, chí siquī jeé tu ní íyo modo. <sup>11</sup> Te nasūu jéé cahán rī siquī jeé ndóho ndáhú rī, chí je ni cutūhva rī cusī ni rī jíin jéé névāha rī. <sup>12</sup> Jíni rī cotecu ndahú rī, te jíni rī cotecu cucá rī. Chí ni cāan rī jíin táca-ni, núu jeé ndutú chíji rī chí jéé ndóho rī sōco, núu jeé cónevāha cuehē rī chí jéé cúmanī nuū rī. <sup>13</sup> Ndihi-ni cúu sáha rī, chí máá Cristo jéhe ya fuerza ini rī. <sup>14</sup> Te vésú súcuan te vāha ni casáha

ró jéé ní chindéé ñáhán rō ruhū jíin jnūdóho jeé ndóho rī.

<sup>15</sup> Te róhó ñáyuu ñuu Filipos, je cájini rō ndese ni cuu. Chí nde quivī ní quejéé rī nácani rī jnūhun jeé jnáma ya yohó, ná ni quenda rī Macedonia vēji rī, te ni casocō rō xūhun núu rī siquī jeé ní canihīn rō jnūhun ya ni nacani rī. Te ni ñin grupo ñayuu cácanđije tu ní sáha súcuan, chí máá-ni róhó jíjnáhan rō. <sup>16</sup> Te ná íne rī ñuu Tesalónica, te ni catají rō jecu jeé jíni ñúhún rī, ni jinū ñin uū jínu. <sup>17</sup> Te nasūu jéé nducú rī jeé cuáha rō núu rī, chí sa ndúcú rī jeé na cáyá gā jniñu vāha rō, návāha cayā tahú rō nuū Yaā Dios. <sup>18</sup> Chí je ni nihīn rī ndihi jeé jíni ñúhún rī, te ndóo ga. Te íyó cuehē nuū rī, chí ni nihīn rī jeé ní catají rō vēji jíin Epafrodito. Te jeé ní catají rō cúu nájñūhun ñin ofrenda jeé asín jeén, ni casocō rō nuū Yaā Dios, te cúsi ni yā jíin. <sup>19</sup> Te Yaā Dios chí cuāha ya nuū rō tāca jéé cúmanī nuū rō, chí cucá ndasí yá jíin táca jéé vāha jeé lúu íyó núu Cristo Jesús. <sup>20</sup> Te na cáhán yō jeé yóhoyo luu cújéhnu Tátá yō Yaā Dios ní cáni. Amén.

*Saludo jeé sándihí*

<sup>21</sup> Cachi rō nuū tāca ñáyuu maá yá jeé sándeyí ni i, áchí rí, chí cácanđije i Jesucristo. Te hermano yō cáyūcu jíin rí yáha, cácahān de jeé sándeyí ni rō jijnáhan rō. <sup>22</sup> Te tāca ñáyuu maá yá jeé cáhíyo yáha, suni cácahān i jeé sándeyí ni rō. Te ñayuu cáyūcú vehe rey cújéhnu ñuu Roma yáha, máá i cácahān gā súcuan.

<sup>23</sup> Te ñūhun ni rī jeé maá Jítóho yō Jesucristo, na sáha ga yā jeé vāha róhó jíjnáhan rō. Súcuan na cóo. Amén.

## CARTA JEE NI TEE APOSTOL ŞAN PABLO NUU ŅAYUU ŅUU COLOSAS

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo <sup>2</sup> cátee ri carta yáha cuájeē nuū rohó űáyuu űuu Colosas, jeē cácuu ró űáyuu maá yá jeē cácadíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha róhó, te sáha ya jeē coo ndeyí coo sī ni rō.

*Jeē jicán tahu Pablo jehē űáyuu cácadíje*

<sup>3</sup> Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatahú rí nuū yā jeē siquí rohó jíjnāhan ró. <sup>4</sup> Chi ní cajini jnūhun ri ndese vāha cácadíje ró Cristo Jesús, jíin ndese cákundáhú ni rō tāca űáyuu maá yá. <sup>5</sup> Chi cáñuhun ni rō nihīn rō jeē űūhun vāha nde andiví cuu ró. Chi ná ni cajini ró jnūhun ndaā jeē jnāma ya rohó, te ni caquejeé ró űūhun ni rō. <sup>6</sup> Te jnūhun un jéē ní canacani nuū rō, chi ndúcuehē cuahān te níhín jniñu ní cáhnu űayiví. Te suni súcuan ni sáha jíin rohó jíjnāhan ró ndé quiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíin ró. <sup>7</sup> Te jnūhun un cúu jeē ni stéén Epafras nuū rō, tēe sājniñu jíin rí jeē maní rī jíin. Chi cúu de tēe jéjníñu squícu vāha nuū Cristo jeē ndíto de róhó. <sup>8</sup> Te máá de ni castūhun núu rī siquí rohó, ndese cákundáhú ni rō jnāhan ró sáha máá yá.

<sup>9</sup> Jeē yúcuan suni tu cájecuiñī rī jeē cájicān tahu rī jehē rō, nde quiví ni níhín rī jnūhun ún te nde vijna. Te cájicān rī nuū yā jeē na jécūhun vāha ni rō te coo

ndíchí ró jíin jnūhun ya, sáha máá Espíritu, návāha cuni rō ndihí ndese nújnahan ni maá yá. <sup>10</sup> Te cájicān rī jeē caca ndaā rō nájñūhun cánuú caca ró jéē cácuu ró űáyuu maá Jítóho yō. Te súcuan te sáha ró ndihí jeē nújnahan ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios. <sup>11</sup> Te cájicān rī jeē cuáha ya fuerza ini rō, nájñūhun iyó fuerza maá yá jeē cujéhnu luu ya. Te súcuan te cuu cuandeyí ni rō jíin táca-ni jnūndóho, te cusī teyí ni rō. <sup>12</sup> Te cuu nacuatáhú ró nuū Tatá yō, chi máá yá ni chihí fuerza yohó jéē iin cáhnu-ni jíin táca űáyuu maá yá nihīn yō tahu yō. Chi cájica yó jíin luz yā jeē yíhi yó ndaha ya. <sup>13</sup> Chi ní jnama ya yohó jéē ni yíhi yó ndaha máá jéē jniñi poder nuū néē, te ni squiví ya yohó ndaha Séhe ya jeē maní yā jíin, ndácu ya jniñu nuū yō. <sup>14</sup> Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

*Jeē ni sáha Cristo jeē ní ndāvi yó núu jnūhun maní Yaā Dios jíin yó*

<sup>15</sup> Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je iyó yá nde ná tu jecōo tāca jéē iyó. <sup>16</sup> Chi jíin Séhe ya ni sáha Yaā Dios ndihí jeē ni jécōo, ndihí jeē iyó andiví jíin jéē iyó űayiví, jeē jiní yō nuū jíin jéē tu jiní yō nuū. Te suni ni sáha ya tācá ndajéhé jeē cándacu jniñu, jíin jéē cándiso jniñu, jíin jéē cácujeñnu, jíin jéē cájniñi poder. Jíin Cristo ni sáha Yaā Dios jeē ni jécōo ndihí, te jeē cúu Cristo cúu. <sup>17</sup> Te je iyó Cristo nde ná tu coo ndihí jeē iyó. Te ndaha máá yá yíhi vāha ndihí-ni. <sup>18</sup> Te máá yá cújéhnu nuū űáyuu cácadíje, nájñūhun cújéhnu xinī nuū yiquí cúñu, chi nájñūhun yiquí cúñu yā cácuu i, cúu jeē iñ na cúu i jíin yá. Te máá yá sáha jeē cotecu i ní cáni, te xīhna gā maá yá ni natecu mēñu ndíyi, návāha

cujéhnua ya nuū tācá-ni. <sup>19</sup> Chi ni cusī ni Yaā Dios jeē ndihī ndese cúu maá yá, suni súcuan cúu Cristo. <sup>20</sup> Te siquī jeē ní jíhī Cristo, te ni cusī ni Yaā Dios sáha ya jeē ndivicoo tācá-ni nuū jnúhun manī yā jíin, tāca jēē yúcu ñayiví jíin jēē yúcu andiví. Chi jíin jēē ní jíhī Cristo jíca cruz, te ni sáha Yaā Dios jeē ndivicoo tācá-ni nuū jnúhun manī yā jíin.

<sup>21</sup> Te maá ró jijnáhan ró, chi sūin siquī ni cahīin ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chí je ní sáha Yaā Dios jeē ní ndivicoo ró nuū jnúhun manī yā jíin ró. <sup>22</sup> Súcuan ní sáha ya siquī jeē ní sócō Cristo maá yá ní jíhī yā, návāha coo ndoo coo íi rō cuiñi ró nuū yā, te ma cóo jnéhén ró, te tú na cuēchi coo siquī rō. <sup>23</sup> Te súcuan sáha ya núu cuiñi níhin ró jēē candíje vāha ró, te núu quendōo níhin ró jíin jnúhun vāha jeē cañuhun ní rō jeē jnáma ya rohó, te ma siaá cuiñi rō. Chi jnúhun un ní cajini ró, te ní jite núu ní cáhnu ñayiví. Te ruhū Pablo suni jéjniñu ri jeē nácani ri jnúhun ún.

*Jeē jejniñu Pablo siquī ñáyuu cácandíje*

<sup>24</sup> Te vijna te cúsi ní rī jeē ndóho ri jehē rō jijnáhan ró. Chi jíin yiqui cúñu rī ndóho ri jeē cúmanī gā ndoho ri jíin Cristo jehē ñáyuu cácandíje, suu ñáyuu cúu nájnúhun yiqui cúñu yā. <sup>25</sup> Te cúu ri tēe jéjniñu siquī ñáyuu cácandíje, chí súcuan ní tejniñu Yaā Dios ruhū, návāha nacani ndihī ri jnúhun ya nuū rō te quendōo vāha ró. <sup>26</sup> Te nácani ri jnúhun ya jeē ní yisáhi, jeē tu ní cájini ñáyuu nde jenahán ndasí te nde ní cáni vēji. Te vijna te je ní steén cají yá jnúhun un núu ñáyuu maá yá. <sup>27</sup> Chi ní cusī ní yā jeē steén yā nuū i ndese cúcúca ndasí i jíin ndihī jeē ndiso jnúhun sáhi yáha jēē lúu cújéhnua, te cuiñe núu

quihīn nuū tācá nación jeē tu jíiní. Te jnúhun sáhi yáha cúu jeē ndeé Cristo ini anuá rō, ndúú yá jíin ró, te jeē yúcuan cañuhun ní rō tāca jēē lúu jéhnua jeē coo.

<sup>28</sup> Te jnúhun Cristo un cúu jeē cánacani ri, te cástíhví ní rī tāca ñáyuu, te cástéén rī jnúhun ya návāha jecūhun vāha ní i. Te súcuan te ije vāha ní ndivii i jeē yíhi i ndaha Cristo Jesús. <sup>29</sup> Te siquī yúcuan cúu jeē sájniñu ri, chí ndíhví ní rī nácani ri jnúhun jíin tāca fuerza Cristo jeē chindéé ñájnáhan ya jíin rí.

## 2

<sup>1</sup> Chi cúni rī jeē na jécūhun ní rō ndese yóhoyo ndúcú ndeyí rí jehē rō, jíin jéhē ñáyuu ñuu Laodicea, jíin ndé tāca ñáyuu jeē tu ní cájini cuiñi nuū rí. <sup>2</sup> Chi cúni rī jeē coo ndeyí ní anuá i, te inuú-ni coyūcu manī i, te jecūhun ndihī ní i ndese yóhoyo cúca i jíin jnúhun jeē candíje níhin i. Chi cuni i ndese Yaā cúu Cristo, chí maá yá cúu jnúhun Yaā Dios jeē ní yisáhi un. <sup>3</sup> Te ini Cristo yisáhi tāca jnúhun jeē cucúca ró jíin, suu jnúhun ndíchí jíin jnúhun jécūhun ní. <sup>4</sup> Te jnúhun yáha cáhán rī jíin ró jijnáhan ró, návāha ma stahú ní ñin i rohó jíin tāca jnúhun stahú jēē lúu cáhán. <sup>5</sup> Chi vēsú ndeé jíca rí jíin ró, te ñúhun ní rī rohó, te cúsi ní rī jeē jíiní rī ndese cájica ndaā rō te cácandíje níhin ró Cristo.

<sup>6</sup> Núu súcuan te nájnúhun ní cajetáhú ró jeē Jítoho rō cúu Jesu-cristo, suni súcuan na cáca ndaā rō jíin yá. <sup>7</sup> Te na jñi vāha jnúhun ya ini rō, te na ije vāha ró jíin jnúhun cácandíje ró yá, nájnúhun je ní cajini rō. Te níni nacuatáhú ró nuū Yaā Dios.

*Jeē ndújeé yó sáha Cristo*

<sup>8</sup> Coto má cuáha ró jnúhun jeē stahú ní ñin ñáyuu rohó jíin jnúhun ndíchí jēē tu jéjniñu, jíin jnúhun ndúxí stahú. Chi tu cácandíje i jnúhun Cristo, chí sa cácandíje i tāca

jeē tajnúni ñayuu, modo jeē castéén ini ñayívi yáha.

<sup>9</sup> Chi ndihi ndese cúu máa Yaā Dios, suni súcuan cúu Cristo. <sup>10</sup> Te ndihi ndese cúu Cristo, suni súcuan cúu ró jíjnáhan ró, chi cáyihí ró ndaha ya. Te máa yá cújéhnú nuū tāca jeē cújéhnú jíin jeē ndíso jníñu andiví. <sup>11</sup> Te siquī jeē cáyihí ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasūú ñn jnuni jeē yíhi yiqui cúñu ró cúu, chi sa suhva jeē ní sándoo ya tāca cuéchi ni casáha ró jíin modo neé máa ró. Chi súcuan cúu jeē sáha Cristo circuncidar rohó. <sup>12</sup> Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu ró jíin yá. Chi ni cacandíje ró jéé jíin poder Yaā Dios ni nastécu yā Cristo mēhñu ndíyí. <sup>13</sup> Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá ró nde saá. Te vijna te ni sáha Yaā Dios jeē cotecu ró ní cáni jíin Cristo, chi ni ine cáhnu ni yā nuū tāca cuéchi ró. <sup>14</sup> Te nájnūhun jeē iyó ñn acta jeē jicán cuéchi siquī yō jeē ni stívi yó ley yā. Te ni ndahva yā acta un, chi ni chunaa Cristo cuéchi yó jéé ni jíhí yā jicā cruz. <sup>15</sup> Chi ná ni jíhí yā jicā cruz, te ni quende yā ndihi poder tāca jéneé jéé cácujehnú jíin jéé cájni poder. Te ni quende yā jeē tuá cújéhnú, chi ni sáha ya jeē cuángoo nuū quíndihyū, te súcuan ni steén yā poder yā.

*Na ndúcu yó jeē quéndoo váha yó ndé andiví*

<sup>16</sup> Núu súcuan te ma cuatáhú ró núu cácahān ñayuu cuéchi siquī ró, siquī ñn jeē yéji ró chí siquī ñn jeē jíhi ró, chí jéé tu nées íi ró quiví víco jíin quiví núcoso yōó jíin quiví ndétátú. <sup>17</sup> Chi tāca ley siquī un ní jejníñu máa ndé ná tu quiji Cristo. Te vijna te ni quiji ya te tuá jíni ñúhún táca ún. <sup>18</sup> Ma cuáha ro

jnūhun jeē cási ni ñn ñayuu jeē nihín ró tahū ró. Chi cáchiñúhún i táca ndajéhé yā, te cácahān i jeē súcuan cásaaha suchí i máa i. Te cácahān i jeē cájini ndije i jeē iyó ndaā jnūhun cánacani i, te tuú. Te súcuan cásaaha téyí sáa-ni i máa i, chí cájeni neé ni i. <sup>19</sup> Te tu cáhiin i jíin Cristo, Yaā cújéhnú nuū ñayuu cácuu nájnūhun yiqui cúñu yā chí ñn na cúu i jíin yá. Chi máa yá scuéhnú ya i jíin jnūhun ya, te nduu inuú ni táca i jeé cáhije i cuahān i, nájnūhun ni jeni ni Yaā Dios.

<sup>20</sup> Núu súcuan te nájnūhun jeé je ni cajihí ró jíin Cristo, cúu jeé ní casiáá ró tāca jéé tajnúni jeé castéén ini ñayívi. Núu súcuan ¿te naun cásaaha ga ró nájnūhun cásaaha ñayuu ñayívi jéé jéndije ró táca jéé tajnúni? <sup>21</sup> Chi cácahān i: Ma quehé ró ma cáji ró jeé yáha chí jéé yúcuán, ni ma jní ró, áhí i. <sup>22</sup> Te máni jeé tajnúni ñayuu jíin costumbre máa i cúu te tu níhín jníñu jeé quéndoo ndaā ñayuu. <sup>23</sup> Te ndaā chí cájeni ni i jeé jnūhun ndíchí cúu ún, chí sáha jíin i jeé chíñúhún níhín i, jíin jéé sáha suchí i máa i, jíin jéé stóho i yiqui cúñu i. Te tu níhín jníñu cuiti jeé casi táca jniñu neé jéé cuní i sáha i.

### 3

<sup>1</sup> Núu súcuan te nájnūhun ni natecu Cristo, suni súcuan ni canatecu ró jeé ní cuu ró nájnūhun ndíyí ni sáha cuéchi ró. Te na cóndihvī ni ró siquī tāca jéé iyó andiví núu ndeé Cristo lado váha Yaā Dios nuū cújéhnú ya. <sup>2</sup> Te na cáni ni ró siquī tāca jéé iyó andiví, nasūu siquī jeé iyó ini ñayívi. <sup>3</sup> Chi nájnūhun je ni cajihí ró jíin Cristo, te vijna chí nájnūhun cátecu ró jíin yá andiví, chí cáyihí ró ini ndaha Yaā Dios. <sup>4</sup> Te quiví ndíji Cristo, Yaā sáha jeé cótecu yō ní cáni, yúcuán na te suni quendacoo ndijin máa ró jíin yá, te cújéhnú luu ró jíin yá.

*Ñayuu jíca jíin modo cuní maá, jíin ñayuu ní ndujeé*



<sup>5</sup> Núu súcuan te casi rō tāca modo cuní maá ró jeē cáhīyo ró ini ñayīvi yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóo ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájnūhun ídolo yō jeē chiñúhún yō. <sup>6</sup> Chi siquī tācá jniñu yáha cúu jeē cuāha Yaā Dios castigo xeēn nuū ñayuu nīhni ni nuū yā. <sup>7</sup> Te suni jíin jniñu yáha ní cajica ró ndé saá, ná ni casáha ró súcuan. <sup>8</sup> Te vijna te na stóo ró táca jéé yáha: jeē quití ni, jeē xeēn ni, jeē sáha jniñu néé, jeē cahán ndeváha nuū jnáhan, jíin jéé cahán tāca jnúhun tú vāha. <sup>9</sup> Ma stahú ró jnáhan ró, chi yūcuan cúu modo maá ró jeē ní cajica ró jíin ndé saá, te je ni castóo ró. <sup>10</sup> Te ni canduu ró ñayuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. <sup>11</sup> Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndīhi i nuū yā. Chi Cristo cúu Jitoho ndīhi i, te ndéé yá ini anuá ndīhi i, ndúú yá jíin i.

<sup>12</sup> Chi ni nacāji Yaā Dios rohó jíjnáhan ró jeē cúu ró ñayuu maá yá jeē maní yā jíin. Núu súcuan te níní cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vītá ni rō, te coo paciencia ni rō. <sup>13</sup> Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró. <sup>14</sup> Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu váha. <sup>15</sup> Te jnúhun coyūcu mání na cúnuú ini anuá ró sáha Yaā Dios. Chi ni cana ya rohó jéé nduu ró in na ñayuu jéé cóyūcu

mání rō. Te níní na nácuatáhú ró nuū yā.

<sup>16</sup> Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa íi jeē cahán jnúhun ya, na cáta luu ró jéé nácuatáhú ró ini anuá rō nuū Yaā Dios. <sup>17</sup> Te tācá jniñu sáha ró, núu jeē cahán rō chí jéé sáha ró cúu, ndīhi na sáha ró jéé ndujéhnu síhví máá Jitoho yō Jesús, te nacuatáhú ró nuū Tatá yō Yaā Dios sáha ya.

*Ndese cánuú squícu ñayuu cácanđje nuū jnáhan i*

<sup>18</sup> Róhó ñahan cácuu ñasihí, cuatáhú ró nuū yíi ró, chi súcuan cánuú sáha ró siquí jeē candíje ró Jitoho yō. <sup>19</sup> Te róhó téé cácuu yíi, cundáhú ni rō ñasihí ró, te ma cútucu ni rō jíin ña. <sup>20</sup> Róhó séhe jíjnáhan ró, tācá-ni jniñu cuandíje ró núu tatá rō nuū naná rō, chi súcuan cúsií ni máá Jitoho yō. <sup>21</sup> Te róhó tátá jíjnáhan ró, ma squití ni rō séhe ró, návāha ma cucuíhyá ni i. <sup>22</sup> Róhó mozo jíjnáhan ró, tācá-ni jniñu cuandíje ró núu patrón rō ñayīvi yáha. Ma sájniñu ndúxí ró jeē maá jéé coto de te cuajnúhún de róhó. Chi na sájniñu ndaā sájniñu ndíje ró, te conso íyo ró núu Yaā Dios. <sup>23</sup> Te tācá jniñu sáha ró, na cúsií ni rō sáha ró, te na cáni ni rō jeē nuū Jitoho yō cájejniñu ró, nasūu núu ñayuu. <sup>24</sup> Chi je cájini rō jeē maá Jitoho yō cuāha ya cuehē tahū cuu ró ní cáni. Chi nuū maá Cristo cájejniñu ró, chi máá yá cúu Jitoho rō. <sup>25</sup> Te ñayuu casáha jniñu néé, chi sa suhva ndutahū i siquí jeē ni sáha i. Chi tu sáha Yaā Dios cuenta ndese cúu in in ñayuu, chi inuú sáha ya jíin i.

#### 4

<sup>1</sup> Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jitoho maá ró, Yaā ndeé andiví.

<sup>2</sup> Te ndivii rō ma jécuiñi rō jeē jicán tahú rō, chí coo ndito ni rō jín, te nacuatáhú rō nuū Yaā Dios. <sup>3</sup> Te suni cacān tahú rō jehē rī jijnáhan ri, jeē na sáha Yaā Dios jeē cóo ga modo nacani ri jnūhun, návāha cuu cahān rī jnūhun Cristo jeē ní yisāhí, jeē tu ní cājini ñayuu jenahán. Te siquī jnūhun un cúu jeē íne ri vecāa. <sup>4</sup> Te cacān tahú rō jeē cuu cahān cají rí ndese cánuú cahān rī.

<sup>5</sup> Sáha yúcun vāha ró jín ñáyuu tu cácanđje. Ma cúhuun ni rō siquī i, chí condihvī ni rō scandíje ró i. <sup>6</sup> Te máni cahān vāha ró jín ñáyuu, te cahān rō jnūhun cuajniñu jeē quéndōo vāha i sáha. Te cani ni rō ndese vāha nastió cuiñí rō jnūhun nuū ñn ñn i.

#### *Saludo jeē sándihí*

<sup>7</sup> Tíquico cúu ñn hermano jeē maní yō jín, te tēe squícu vāha chindéé ñájnáhan jín rí cúu de, te jéjniñu de jín rí nuū maá Jítoho yō. Te máa de castūhún ndihí nuū rō ndese cuahān jniñu ri. <sup>8</sup> Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhīyo ri jín jniñu, te coo ndeyí ni rō sáha de. <sup>9</sup> Te suni cuajeē Onésimo jín de, tēe cúu jnáhan máa ró jijnáhan ró. Te cúu de hermano jeē squícu vāha jeē maní yō jín. Te ndíndúú de castūhun nuū rō ndese cuahān táca jniñu ichi cháha.

<sup>10</sup> Sándeyí ni rō jijnáhan ró, áchí Aristarco, tēe íne jín rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu ni jecondéhé de rōhó te sáha vāha ró jín de. <sup>11</sup> Te suni súcuan cáhán Jesús, tēe jeē suni nání Justo, jeē sándeyí ni rō. Te máa-ni de cácuu tēe hebreo cácanđje jeē chindéé ñáhán cánacani jnūhun jín rí siquī ndese ndácu Yaā Dios jniñu. Te yōhō ndeyí íyó ni rí casáha de. <sup>12</sup> Sándeyí ni rō jijnáhan ró, áchí Epafras, tēe cúu jnáhan máa ró, te mozo Cristo

cúu de. Te níni jicán tahú ndasí de jehē rō, jeē na cuiñi ñihin ró, te ije vāha ni rō jeē squícu vāha ró ndihí jniñu cúni Yaā Dios. <sup>13</sup> Chí cáhán ndaā rī jeē yōhō ndíhvī ni de jehē rō jijnáhan ró, jín jehē ñáyuu ñuu Laodicea jín Hierápolis. <sup>14</sup> Lucas, tēe cúu médico jeē maní yō jín, suni cáhán de jeē sándeyí ni rō, te suni súcuan cáhán Demas.

<sup>15</sup> Cachi rō nuū táca hermano ñuu Laodicea jeē sándeyí ni i, áchí rí. Te suni súcuan cahān rō jín Ninfas, jín táca ñáyuu cácanđje cándutútú vehe ña. <sup>16</sup> Te ná ni jīnu ni cacahu ró carta yáha, te suni tají ró na cáhu ñayuu cácanđje ñuu Laodicea. Te suni cahu máa ró carta jeē cuahán nuū ñáyuu Laodicea te ndiji nuū rō. <sup>17</sup> Te cachi rō nuū Arquipo jeē na ndúcú ndeyí de squícu de jniñu ní tee jítōho yō siquī de, áchí rí.

<sup>18</sup> Ruhū Pablo, yāhá-ni cúu jeē tēe ri jín ndaha máa rí, jeē sándeyí ni rō. Te nucūhun ni rō ruhū jeē íne ri vecāa. Te ñúhun ni rī jeē na sáha ga Yaā Dios jeē vāha rōhó jijnáhan ró. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cácanđje ñuu Tesalónica, jeē cáyihí rí ndaha Tátá yō Yaā Dios jíin Jítóho yō Jesucristo. Te cáñuhun ní rí jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sñ ní rō jijnáhan rō.

*Ñayuu Tesalónica cúu i ñn ejemplo vāha*

<sup>2</sup> Níní cáncuatáhú rí nuū Yaā Dios jeē siquí rohó jijnáhan rō, te tu náa ní rí cacān tahú rí jehē rō jeē cájcān tahú rí. <sup>3</sup> Te níní ndácunehen rí rohó nuū Tátá yō Yaā Dios, jeē váha cásáha rō táca jniñu chi cácanđje rō, jíin jéē váha cájejniñu rō nuū yā chi manī rō jíin yá, jíin jéē cájendeyí ní rō chi cáñuhun ní rō jeē coo jeē váha sáha Jítóho yō Jesucristo. <sup>4</sup> Chi manī Yaā Dios jíin rō jijnáhan rō hermano, te cájini rí jeē ní nacáji ya rohó. <sup>5</sup> Chi ná ní canacani rí jñuhun nuū rō jeē jnáma ya rohó, te nasūu jéē ní cáhān rí súcuan-ni, chi ní nacani rí jíin poder Espíritu Santo, te ní cacucáñu váha ní rí jeē jñuhun ndaā cúu. Te cájini rō ndese ní casáha váha rí ná ní coyūcu rí jíin rō, chi ní nducú rí jeē quéndōo vāha rō.

<sup>6</sup> Te rōhó jijnáhan rō chi ní candacu rō rúhū, te suni ní candacu rō máá Jítóho yō. Chi ní cajetáhú rō jñuhun ya, te ní cacusñ ní rō ní sáha Espiritu Santo, vēsú ní cajito rō cuehē jñundóho siquí ún. <sup>7</sup> Te súcuan cácuu rō ñn ejemplo nuū ndihí ñayuu cácanđje jeē cáyūcú región Macedonia jíin Acaya jiñā. <sup>8</sup> Chi jeē siquí rohó jijnáhan rō cúu

jeē ní jite nuū jñuhun Jítóho yō, te nasūu máni Macedonia jíin Acaya, chi suni ní cáhnu-ni ní jite nuū jñuhun ndese cácanđje rō Yaā Dios. Te jeē yúcuan tuá jíni ññuhún jeē nácani máá rí jñuhun nuū i. <sup>9</sup> Chi sa máá i cáncacani ndese ní cajetáhú váha rō rúhū ná ní jecoo rí nuū rō, jíin ndese ní castóo ro ídolo te ní quívicoo rō ndaha Yaā Dios, Yaā ndaā Yaā técu, jeē cuajniñu rō nuū yā. <sup>10</sup> Te cáncacani i jeē cándetu rō jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó nuū castigo xeēn jeē quíji.

*Jniñu jeē ní sáha Pablo ñuu Tesalónica*

## 2

<sup>1</sup> Chi cájini rō hermano, jeē tu ní jecoo cáhá-ni rí nuū rō. <sup>2</sup> Te cájini rō jeē ní castóho i ruhū te ní cacahān ndevāha i nuū rí iní ñuu Filipos. Te vēsú súcuan te máá Yaā Dios ní chindéé ñáhán yá ruhū, ní sáha ya jeē ní íyo ndeyí ní rí, te ní jecoo rí ñuu rō ní canacani rí jñuhun jeē jnáma ya rohó. Súcuan ní casáha rí vēsú xeēn ní íyo jñundóho. <sup>3</sup> Te jñuhun ní canacani rí, nasūu jñuhun ní castívi rí cúu, ní nasūu jéē nihín rí siquí rō, ní nasūu jéē ní castáhú rí rohó. <sup>4</sup> Chi máá Yaā Dios ní jito ndee yā ruhū, te ní tejniñu ya ruhū jeē nácani rí jñuhun jeē jnáma ya rohó. Te jeē yúcuan cúu jeē cacahān rí. Te tu cacahān rí jñuhun jeē nújnahan ní ñayuu, chi sa jeē nújnahan ní Yaā Dios, chi máá yá jito ndee anuá rí. <sup>5</sup> Te cájini rō jeē tu ní cánducú rí cuajnúhún rí rohó ñn modo stahú, ní tu ní cacahān rí jeē cúsi ní rí jíin rō návāha nihín rí xūhun rō. Te jíni Yaā Dios jeē súcuan cúu. <sup>6</sup> Te ní tu ní cánducú rí jeē cuajnúhún rō ruhū, ní jeē cuajnúhún inga ñayuu ruhū, vēsú súcuan cánuú coo núú, chi apóstol Cristo cácuu rí. <sup>7</sup> Chi sa suhva vīta ní cacahān rí jíin rō, nájnūhun sáha ñahan ndéca yiquín jéē yucún ndíto ña sēhe ña.

<sup>8</sup> Te siquī jeē cācundáhú ndasí ni rī rohó, jeē yúcuan ní cacondihvī ni rī nacani ri jnūhun vāha Yaā Dios nuū rō. Te nasūu máá yúcuan-ni, chi suni nde vida ri cuāha ri jeē siquī rō nuú, chi yōhyo manī rī jín rō. <sup>9</sup> Te cānahan ró hermano, jeē tú ni ĩn ró ní stáhān rī jeē cacān rī nuū rō ná ni canacani ri jnūhun vāha Yaā Dios nuū rō. Chi ni canducú ndeyí rī ni casájniñu ndasí rí siquī jeē cótecu rī. Te nduú ñuú ni casájniñu ri.

<sup>10</sup> Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó ñayuu cācandíje. Te ni ĩn tu cúu cahān cuēchi siquī rī. <sup>11</sup> Te suni cájini rō ndese ni castíhvī ni rī ná ĩn ná ĩn ró, te ni cacahān rī jnūhun ndeyí ni jín rō, nájnūhun sáha ĩn tátá jín séhe de. <sup>12</sup> Te ni cacahān nīhin rī jín rō jeē na cáca ndaā rō nuū Yaā Dios nájnūhun cánuú caca ró. Chi ni cana ya rohó jéé quíngoo ró núú ndácu ya jniñu, nuū luu cujéhu ró jín yá.

<sup>13</sup> Te jeē yúcuan ní ní nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnūhun ĩn tēe cúu, chi jnūhun Yaā Dios cúu. Te máá jéndaá jeē jnūhun un sájniñu ini anuá rohó ñayuu cācandíje nde ndacu ró yá. <sup>14</sup> Hermano, ñayuu ñuu rō ni cajito xeēn i rōhó, te súcuan ni candoho ró nájnūhun ni candoho ñayuu cācandíje cáyūcú región Judea jeē cáyihī ndaha Yaā Dios jín Cristo Jesús. Chi nájnūhun ni candoho i ni sáha jnāhan i ñayuu hebreo, suni súcuan ni candoho ró. <sup>15</sup> Chi suu ñayuu hebreo ni cajehni de máá Jítoho yō Jesús, nájnūhun ni cajehni de tāca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu nújnahan ni Yaā Dios, te cúu de contra siquī tāca ñayuu. <sup>16</sup> Chi jésicoo de jeē ma nácani ri jnūhun nuū ñayuu tāca nación jeē tu jíní,

návāha tú cācu i. Te súcuan sáha de jeē nducuehē gā cuēchi siquī de. Te vijna te yachī quiji quiví jeē cuāha Yaā Dios castigo xeēn nuū de.

*Jeē cuní Pablo quicōndēhé tucu de ñayuu Tesalónica*

<sup>17</sup> Hermano, ni cacujiyo ri ĩn núnúu-ni nuū rō jijnáhan ró. Te vésu tu cájito jnāhan yó, te ní ní cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. <sup>18</sup> Te jeē yúcuan ní caji ni rī jecoo ri nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesi ichi ri jijnáhan ri. <sup>19</sup> Chi tuá na inga cáñuhun ni rī, te tuá na inga cácusī ni rī, chi suu máá ró jijnáhan ró. Te jeē siquī máá ró cúu jeē nihín rī premio rī te cusī teyí ni rī cuiñi yó núu máá Jítoho yō Jesucristo quiví ndíji ya. <sup>20</sup> Suu jeē siquī rohó cúu jeē cácusī teyí ni rī.

### 3

<sup>1</sup> Te jeē yúcuan tuá ni cācanda ri condetu ri nde nihín rī jnūhun ndese cáhīyo ró. Te ni casándaā rī jeē quéndōo máá-ni ri ñuu Atenas. <sup>2</sup> Te ni catajī rí hermano yō Timoteo, tēe jéjníñu jín rí nuū Yaā Dios siquī jnūhun jeē jnáma Cristo yohó. Te ni jecōndēhé de rōhó návāha sáha de jeē cuiñi nīhin ró te coo ndeyí ni rō jín jnūhun cācandíje ró. <sup>3</sup> Te ni jeē de návāha ma náyūhú ni ĩn ró siquī tāca jnúndóho jeē sáha ñayuu. Chi je cájini rō jeē súcuan cánuú ndoho yó. <sup>4</sup> Chi nde ná ni coyūcu rí jín ró, te ni cacastūhun rí nuū rō jeē nihín nahín yó jnúndóho. Te je cájini rō jeē súcuan ni cuu, nájnūhun ni cacahān rī. <sup>5</sup> Te jeē yúcuan, ná tuá ni cānda ri condetu ri jeē nihín rī jnūhun ndese cáhīyo ró, te ni tajī rí de ni jeē de, návāha cuni rī núu cācandíje nahín ró. Chi ni jeni ni rī á sanaa te jexeén jeē jito ndee yohó ní cundeyí jín ró, te naa cāhá-ni jniñu jeē ní casáha ri jín ró.

<sup>6</sup> Te vijna chi je ni ndee Timoteo nuū rī jijnáhan ri jeē ni jée de ñuu rō Tesalónica. Te ni nacani de jeē cácadíje vāha rō, te cákundáhú ni rō jnáhan rō. Te ni cachi de jeē cáñuhun ni rō ruhū, chi cáhīyo manī rō jín rí. Te cácuni rō ndacoto rō núu rī, nájnūhun cácuni rī ndacoto ri nuū rō. <sup>7</sup> Te jeē yúcuan ní candusī ni rī siquī jeē cácadíje vāha rō, hermano, vēsú xeēn iyó jnūndóho siquī rī. <sup>8</sup> Te vijna je ni cananihīn ni rī, chi cáhīn nīhin rō jín máá Jítoho yō. <sup>9</sup> Núu súcuan te tu jínu cuiṭi nacuatáhú rí nuū Yaā Dios jeē siquī rohó jijnáhan rō. Chi jito ya jeē cácusī ndasī ni rī jeē súcuan cáhīyo rō. <sup>10</sup> Te nduú ñuu cájicān tahu ndasī rí jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquī jnúhun cácadíje yó.

<sup>11</sup> Te cácuni rī jeē máá Tátá yō Yaā Dios jín Jítoho yō Jesucristo, na núne ya ichi jeē cuu jecoo tucu ri nuū rō. <sup>12</sup> Te na sáha máá Jítoho yō jeē cuehē ndasī gá cundáhú ni rō jnáhan rō jín táca gá ñayuu, nájnūhun cákundáhú ni rī rohó jijnáhan rō. <sup>13</sup> Te na sáha ya jeē íje ánuá rō jeē cuiñi nīhin rō, návāha coo ndoo rō jée ma cóo cuēchi rō núu máá Tátá yō Yaā Dios, quiṽi ndíji Jítoho yō Jesucristo jín táca ñayuu yīhi ndaha ya.

*Siquī jeē caca ndaā yō modo jeē cúsi ni yā*

#### 4

<sup>1</sup> Te vijna hermano, iyó inga jnūhun jeē cácahān ndahú rí jín rō te cáhān nīhin ri jín rō, chi súcuan cúní máá Jítoho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rí jín rō jeē sa víhyá gā na cáca rō súcuan.

<sup>2</sup> Chi je cájini rō na jniñu ni candacu ri nuū rō jeē ní ndacu máá Jítoho yō Jesús. <sup>3</sup> Te cúní Yaā Dios jeē

na cóo ndoo coo iī rō nuū yā, te ma cáca jnéni rō. <sup>4</sup> Te ná ñn ná ñn rō na cóndeca yñúhún rō ñasihí máá rō, te súcuan caca ndoo rō. <sup>5</sup> Te ma sáha rō jniñu néé jée ndíyo ni rō jesihí, nájnūhun cásaña ñayuu táca nación jeē tu cájini i jnūhun Yaā Dios. <sup>6</sup> Ni ñn rō ma sáha rō cuēchi jeē quénde rō ñasihí jnáhan rō. Chi máá Jítoho yō cuāha ya castigo xeēn nuū ñayuu casáña táca jniñu súcuan, nájnūhun je ni cacahān nīhin ri ni castūhun rí nuū rō. <sup>7</sup> Chi tu ní cána Yaā Dios yohó jée sáha yō jniñu jnéhén, chi sa jeē caca ndoo yó. <sup>8</sup> Núu súcuan te ñayuu jeē squéhichī jnūhun yáha, nasūu jnúhun ñn tēe squéhichī i, chi sa jnūhun Yaā Dios, Yaā ni jéhe Espíritu Santo nuū yō.

<sup>9</sup> Te tu jini ñúhún jée tēe ri nuū carta yáha jée coo manī rō jín táca hermano, chi je ni steén Yaā Dios nuū rō jeē coo manī rō jín jnáhan rō. <sup>10</sup> Te je cáhīyo manī rō súcuan jín táca hermano cáyūcu ní cáhnu Macedonia jñā. Te cáhān ndahú rí jín rō hermano, jeē sa víhyá gā na cóo manī rō jín i. <sup>11</sup> Te na cóndihvī ni rō coyūcú nayúú rō, te ma cóndihvī ni rō siquī ndese cásaña jnáhan rō, chi condihvī ni rō sáha rō jniñu máá rō, nájnūhun ni candacu ri nuū rō. <sup>12</sup> Súcuan na sáha rō návāha ñayuu tu cándíje, cuatáhú i rōhó, te suni ma cúmanī jeē cotecu rō.

*Siquī jeē ndíji Jítoho yō*

<sup>13</sup> Suni cácuni rī, hermano, jeē na jécūhun ni rō jijnáhan rō siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi. <sup>14</sup> Chi nájnūhun cácadíje yó jée ni jíhī Jesús te ni natecu yā, suni súcuan cácadíje yó jée nastécu Yaā Dios táca ñayuu ni cacandíje nuū Jesús te ni cajihī.

<sup>15</sup> Jeē yúcuan cácastūhun rí ñn jnūhun jeē ní castūhun máá Jítoho yō nuū rī: Jeē yóhó jée cátecu gā

quívī ndíji máá Jítoho yō, nasūu máá yó cosnūu jéē ndaa yó quíhīn yō. Chi xīhna gā ñayuu je ni cajihī ndaa i quíhīn i. <sup>16</sup> Chi máá Jítoho yō nuu ya quíji ya ichi ándiví, te cana jee ya jeē máá yá ndácu jniñu, te cana jee ndajéhé cujéhu ga, te cuecu trompeta Yaā Dios. Te xīhna gā natecu tāca ndíyi jeē ní cacandíje Cristo. <sup>17</sup> Yūcuán na te yóhó jeē cátecu gā yō quívī ndíji ya, suni ndonehen ya yohó jíin i, quíhīn yō mēhñu vícō. Te naquijnáhan yó jíin máá Jítoho yō sava andiví. Te súcuán condee yō ní cáni jíin máá Jítoho yō. <sup>18</sup> Núu súcuán te jíin jnúhun yáha cahān ndeyí ni rō jíin táca jnáhan rō.

## 5

<sup>1</sup> Te tu jíni ñúhún jéē tée ri nuū carta yáha síquī cuiyā chí quívī jeē coo tācá un, hermano. <sup>2</sup> Chi je cájini váha rō jéē ñn sanaa ni yō te quee quívī ndíji máá Jítoho yō, nájnūhun ñn sanaa ni yō te quíji ñacuñhá jecuáa. <sup>3</sup> Chi ná-ni cácahān ñayuu jeē nayúú-ni ñn te tú na jnúndóho coo, te ná-ni cácahān i súcuán te ñn sanaa ni i te quíji jnúndóho síquī i jeē náa i, te ma cácu cuíti i. Chi quíji quívī un nájnūhun ñn sanaa-ni te quéjéé jéhdē chíji ñn ñahan scácu sēhe. <sup>4</sup> Te róhó hermano, tu cácuu rō ñayuu cájica nájnūhun nuū néé jeē ñn sanaa-ni te quíji quívī un síquī rō nájnūhun quíji ñacuñhá. <sup>5</sup> Chi ndíhi rō cácuu ñayuu jeē nájnūhun cájica rō nduú, chí stéén luz yā ini anuá rō. Chi tu cácuu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néé. <sup>6</sup> Núu súcuán te ma cúhuun ni yō nájnūhun ñayuu cáquixī, chí sa ndito na cóo ni yō te coo cáji xíní yō. <sup>7</sup> Chi jecuáa cúu jeē cáquixī ñayuu, te suni jecuáa cúu jeē nájini i. <sup>8</sup> Te máá yó chí nájnūhun jeē cájica yó nduú, te na cóo cáji xíní yō. Te na cúcutú yó jíin

jnúhun cándíje ñihin yó jíin jnúhun cúndáhú ni yō jnáhan yó, nájnūhun cúcutú soldado jíin sahma cáa. Te na cúcutú yó jíin jnúhun jeē cáñuhun ni yō jeē cácu yó, nájnūhun cúcutú soldado jeē ñúhun lélú cáa xiní de. <sup>9</sup> Chi Yaā Dios tu ní jéni ya yohó jéē cuáha ya castigo yohó, chí sa suhva jeē jnama ya yohó sáha máá Jítoho yō Jesucristo. <sup>10</sup> Te máá yá ni jihī yā jehē yō, návaha cotecu inuú yó jíin yá, vésú núu cotecu gā yō ñayívi yáha chí cúu yō. <sup>11</sup> Núu súcuán te cahān rō jnúhun ndeyí ni jíin táca jnáhan rō, te scuéhuu jnáhan rō jíin jnúhun ya, nájnūhun je casáha rō.

### *Jeē jéni ichí Pablo tācá hermano*

<sup>12</sup> Te cácahān ndahú rí jíin rō hermano, jeē cuatáhú rō tée cájejniñu cándito róhó, jeē cácujeñu de nuū rō jíin jniñu máá Jítoho yō, te cájeni ichí de róhó. <sup>13</sup> Te coo yíñúhún ndasí rō nuū de, te coo maní rō jíin de síquī jniñu ya jeē casáha de. Te na cóyūcu maní rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeē na stíhvi ni rō ñayuu cájica cúxí. Te cahān rō jnúhun ndeyí ni jíin ñayuu jeē yachí ndínuu ni i. Te chindéé ñáhán rō ñayuu jeē tu fuerza ini. Te cuandeyí ni rō jíin ndíhi ñayuu.

<sup>15</sup> Te coto má nasáha ndeváha rō jíin ni ñn ñayuu te núu sáha ndeváha i jíin rō. Chi máni jeē váha nducú rō sáha rō jíin táca jnáhan rō jíin ndíhi-ni ñayuu.

<sup>16</sup> Níní na cóo sñ ni rō jijnáhan rō. <sup>17</sup> Te níní na cácan tahu rō. <sup>18</sup> Te nacuatáhú rō jeē síquí tācá-ni. Chi súcuán cúní Yaā Dios jeē sáha rō jéē cáandíje rō Cristo Jesús.

<sup>19</sup> Te ma cási rō nuū jniñu jeē sáha Espíritu Santo jíin rō. <sup>20</sup> Te ni ma cujéé ni rō nuū jnúhun cácahān tée cánacani jnúhun Yaā Dios. <sup>21</sup> Chi coto ndee rō táca jnúhun, te núu jeē váha cúu, te cuatáhú rō. <sup>22</sup> Te ma quívi nduu rō jíin ni ñn jniñu néé.

<sup>23</sup> Te maá Yaā Dios jeē jéhe jnūhun ndeyí s̄h̄ ni, ñūhun ni rī jeē sáha ndihí ya jeē cóo ndoo coo ñi rō nuū yā. Te ñūhun ni rī jeē cóndito vāha ya anuá rō jín jéē nijnūní rō, jín yiquí cúñu rō, návāha tú na cuēchi coo siquī rō quivī ndíji maá Jítoho yō Jesucristo. <sup>24</sup> Chi Yaā jeē ní cana róhó, sáha ya ndihí un jín ró, chi squícu ya jeē ni jéjnūhun ya.

*Saludo jín bendición jeē sándihí*

<sup>25</sup> Hermano jijnáhan ró, cacān tahu rō jehē rī jijnáhan ri.

<sup>26</sup> Te núu na cáhán rō jín táca hermano, te techūhu yíñúhún ró ndaha i.

<sup>27</sup> Te cáhán nihin ri jín ró, chi súcuan cúni maá Jítoho yō, jeē na cáhu ró carta yáha núu táca hermano.

<sup>28</sup> Te ñūhun ni rī jeē maá Jítoho yō Jesucristo na sáha ga yā jeē vāha róhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU NUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítoho yō Jesucristo. <sup>2</sup> Te cáñuhun ni rí jeē Tátá yō Yaā Dios jíin Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō jijnáhan ró.

*Jeē sándaā yā cuēchi quivī ndíji Cristo*

<sup>3</sup> Cánúú jēē niní nacuatáhú rí nuū Yaā Dios jeē siquī rohó jijnáhan ró hermano. Chi súcuan íyó váha, chi yōhoyo váha cuahije ró jíin jnūhun jeē cácanđije ró yá, te yōhoyo cuanducuehē jeē cácanđáhú ni rō táca jnáhan ró. <sup>4</sup> Te jeē yúcuán cúu jeē cácusī teyí ni rí canacani rí jnūhun ró núu táca grupo ñayuu cácanđije nuū Yaā Dios. Chi váha cácanđije ró, te váha cájendeyí ni rō jeē cájito xeēn ñayuu rohó jíin jēē cándoho ró táca gá jnūndóho. <sup>5</sup> Te jíin táca jēē yáha chíhi ya cuenta jeē cácuo ró ñayuu váha jeē quívicoo ró ñuu nuū ndácu ya jniñu. Chi siquī ñuu un cúu jeē cándoho ró. Te jeē súcuan chíhi ya cuenta siquī rō, yáha stéén nuū yō jeē váha Yaā cúu ya.

<sup>6</sup> Te suni íyó váha jeē nastóho ya ñayuu castóho róhó. <sup>7</sup> Te quivī ndíji Jítoho yō Jesús, quivī un sáha Yaā Dios jeē ndétātu róhó jēē cándoho, te suni ruhū jijnáhan rí. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder. <sup>8</sup> Te cuáha ya castigo nuū ñáyuu jeē tu ní cájēhe i jnūhun cuni i ndese Yaā cúu Yaā Dios, te tu ní cájetáhú i jnūhun máá Jítoho yō Jesucristo jeē

jnáma ya i. <sup>9</sup> Te ñayuu ún chi ndoho i nñí cáni, chi cujiyo i nuū máá Jítoho yō, te ma cúu quívicoo i nuū lúu ndasí cújéhu ya jíin poder yā. <sup>10</sup> Súcuan sáha ya quivī ndíji ya jeē lúu cújéhu ya sáha ñayuu cácanđije jeē yíhi ndaha ya. Te nahán naa ni i coto i nuū yā. Te suni súcuan róhó jijnáhan ró, chi ni cácanđije ró jnūhun jeē ní canacani rí nuū rō.

<sup>11</sup> Te jeē yúcuán cúu jeē niní cájicān tahu rí jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquī jeē cácanđije ró. <sup>12</sup> Te súcuan te cújéhu máá Jítoho yō Jesucristo sáha ró, te suni cújéhu máá ró jijnáhan ró sáha ya. Chi Yaā Dios yō jíin Jítoho yō Jesucristo, súcuan cúu jeē sáha ya jeē váha yóhó.

*Jnūhun siquī maá téé sáha xeēn cuēchi*

## 2

<sup>1</sup> Vijna te cahān rí siquī jeē ndíji máá Jítoho yō Jesucristo jíin jēē ndutútú yó núu yā. Cácahān ndahú rí jíin ró jijnáhan ró hermano, <sup>2</sup> jeē ma cuáha ró jnūhun sacā nuu cani ni rō, ni ma cunéé ni rō núu cácahān ñayuu jeē jé ni quee quivī ndíji máá Jítoho yō. Ma candíje cuiti rō vésú núu cahān i jeē ni nīhñ i ñin jnūhun siquī un núu Espíritu, chí ñin jnūhun jeē ni cáhān inga, chí núu cachi i jeē ruhú jijnáhan rí ni tají ñin carta jeē cahān súcuan. <sup>3</sup> Ma cuáha cuiti rō jnūhun jeē stahú ni ñin i róhó. Chi nde ná tu quiji quivī ún te xīhna gā ndunīhni ni cuehē ñayuu nuū yā, te quenda ndijin máá téé sáha xeēn cuēchi, te tēē jnāhnū ndetū cúu máá téé ún. <sup>4</sup> Chí tēē jito uhū Yaā Dios cúu de, te ndonda de contra siquī táca jēē casnání i yaā i jíin táca jeē cáchiñúhún i. Te xeēn gā sáha de, chí nde cucōo de ini templo Yaā



Dios jeē iyó Jerusalén, te cahān de jeē maá de cúu Yaā Dios.

<sup>5</sup> ¿A cáhánan ró jnūhun yáha? Chi súcuan ni cahān rī jín ró ná ni Iyo rī jín ró. <sup>6</sup> Te je cájini rō ndé vé cúu jeē jési jeē ná tu quenda ndijin tēe ún, chi nde na quée quivī maá de. <sup>7</sup> Chi je jícú sáhi táca cuēchi xeēn ini ñayiví, te vijna chi iyó jéē jési nuū, návāha ma cáa ndasí gá cuēchi, chi nde na cújiyo máá jéē jési nuū. <sup>8</sup> Te sáá te quenda ndijin maá tēe xeēn ún. Te máá Jítóho yō Jesús cahni ya tēe un jín táchī yuhu-ni ya, te jín jéē ndíndēe yá ndiji ya te snáhnú ndetū yā de. <sup>9</sup> Te jeē quíji tēe xeēn ún chi máá Satanás sáha. Te quíji de jín cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. <sup>10</sup> Te jín táca jniñu néé te stahú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú. <sup>11</sup> Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. <sup>12</sup> Te súcuan te jeconde cuēchi siquī ndihi i jeē tu ní cácandíje i jnūhun ndaā, chi sa jniñu néé ni cacusiñi ni i jín.

*Ñayuu jeē ní nacāji ya jeē cācu i*

<sup>13</sup> Te cánuú jéē niní nacuatáhú rī jijnáhan rī nuū Yaā Dios jeē siquí rohó jéē cácuu ró hermano jeē maní Jítóho yō jín. Chi nde ná ni jecōo ñayiví, te je ni nacāji Yaā Dios rohó jéē jnáma ya rohó. Chi sáha Espiritu yā jeē cáhīyo ndoo cáhīyo ñi rō nuū yā te cácandíje ró jnūhun ndaā. <sup>14</sup> Chi jeē yúcuan ní cana ya rohó jín jnūhun jeē jnáma ya yohó jeē ní canacani rī, návāha quivīcoo ró núú cujéhu luu ró jín máá Jítóho yō Jesucristo.

<sup>15</sup> Núu súcuan te cuñiñi ñihin ró hermano, te conahán váha ró jnūhun jeē ní cacutūhva ró núú rī, núu jeē ní cacahān rī chí jéē ní tee rī nuū carta. <sup>16</sup> Máá Jítóho yō Jesucristo jín Tátá yō Yaā Dios ni

cundáhú ni yā yohó, te ni sáha ya jeē coo siñi ni yō ní cáni, jín jéē ñūhun ni yō táca jéē váha jeē coo siquí jeē váha ni yā jín yó. <sup>17</sup> Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō táca jnūhun váha ya, te sáha ró táca jniñu váha.

*Jeē na cácan tahu i jehē de*

### 3

<sup>1</sup> Te iyó inga jnūhun cánuú, hermano. Na cácan tahu rō jehē rī jijnáhan rī, návāha yachī cuitē núu jnūhun máá Jítóho yō, te cuatáhú váha ñayuu, nájñūhun ni cajetáhú máá ró. <sup>2</sup> Te suni cacān tahu rō jeē na cácu rī nuū táca tēe cásáha néé jéē cátejñáhan jín rí. Chi tú ndihi tēe cácandíje jnūhun ya. <sup>3</sup> Te máá Jítóho yō chí váha squícu ya jeē ni jéjñūhun ya, te sáha ya jeē íje ni táca ró jín jnūhun ya, te coto ya rohó núú jeneé. <sup>4</sup> Te cácu cáhnu ni rī sáha máá Jítóho yō, jeē cócuu ró jín jniñu jeē ní candacu rī nuū rō, te suni cocuu ga rō jín. <sup>5</sup> Te ñūhun ni rī jeē máá Jítóho yō steén gā yā ndese coo maní gā rō jín Yaā Dios nde jín ini jín ánuá rō, jín jéē cuándeýí ni rō nájñūhun ni sáha Cristo.

*Jeē cánuú sájniñu yó*

<sup>6</sup> Te cándacu rī jniñu nuū rō hermano, chí súcuan ni ndacu máá Jítóho yō Jesucristo, jeē na cújiyo ró núú táca hermano cájica cúxí te tu cájica váha de nájñūhun ni castéen rī nuū rō. <sup>7</sup> Chi je cájini rō ndese cánuú ndacu ró rúhu jijnáhan rī, chí tu ní cájica cúxí rí ná ni cáhīyo rī jín ró. <sup>8</sup> Ni tu ní cáyeji rī staā ni ñn ró súcuan-ni, chí ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró. <sup>9</sup> Te vésú iyó derecho rī jeē cacān rī nuū rō nuú, te tu ní cájicān rī, chí súcuan ni casáha rī návāha cuu rī ñn ejemplo nuū rō ndese sáha ró jijnáhan ró. <sup>10</sup> Chi ná ni coyūcu rí jín ró, te ni

candacu ri jniñu yáha nuū rō: Núu ndé ñn ñayuu tu cúni i sájniñu i, te suni ma cáji i núu súcuan. <sup>11</sup> Chi ni canihñi rī jñūhun jeē cájica cúxi sava ró, te tu cásájniñu ró, chi yáha yúcuan-ni sáha ró. <sup>12</sup> Te cándacu ri jniñu nuū rohó jéē casáha súcuan, te cástāhvī ni rī rohó jeē na cóo nayúú ró te sájniñu ró, návāha nihñi rō jeē cáji rō siquī jniñu sáha máá ró. Chi súcuan ndácu máá Jítoho yō Jesucristo jniñu.

<sup>13</sup> Hermano, ma ndínuu ni rō jijnáhan ró sáha ró táca jniñu váha. <sup>14</sup> Te núu ndé ñn i tu jétáhú i jñūhun jeē cahán rī nuū carta yáha, te condēhe váha ro ndé-ni i cúu, te ma quiijnáhan ga rō jín i, návāha na cúcanu i te nacani ni i. <sup>15</sup> Te nasūu jéē cóto uhū rō i, chi sa cahán rō jín i nájnūhun jín ñani rō jeē na sájniñu váha i.

*Bendición jeē sándāhí*

<sup>16</sup> Te ñūhun ni rī jeē maá Jítoho yō, Yaā jeē jéhe jñūhun ndeyí sñ ni, níní na sáha ya jeē coo ndeyí coo sñ ni rō siquī tácá-ni, te coo ya jín ró jijnáhan ró.

<sup>17</sup> Ruhū Pablo, yāhá-ni cúu jeē téé ri jín ndaha máá rí jeē cahán rī jeē sándeýí ni rō jijnáhan ró. Te súcuan jéhe ri firma nuū táca carta rī, návāha cuni rō jeē carta máá rí cúu. Súcuan cáa letra rī. <sup>18</sup> Te ñūhun ni rī jeē maá Jítoho yō Jesucristo, na sáha ga yā jeē váha ró jijnáhan ró. Súcuan na cóo. Amén.

## CARTA HN JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesu-cristo, chi Yaā Dios jeē jnáma yóhó, jíin Jítóho yō Jesucristo jeē níhun ni yō coto yó, ni catají yá ruhū jeē nácani ri jnūhun ya. <sup>2</sup> Te tée ri carta yáha cuájeē nuū rō Timoteo, chi cúu ndije rō nájñuhun sēhe ri siquī jeē ni scándije ri rohó. Te níhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha rohó, te cundáhú ni yā rohó, te sáha ya jeē coo ndeyí coo sī ni rō.

*Jeē ma candije i tāca jnūhun stáhú*

<sup>3</sup> Ná ni quihin ri ichi jeē quihin rī Macedonia, te ni cahān ndahú rí jíin rō jeē quéndō rō ñuu Efeso. Te suni súcuan cahān rī jíin rō vi-jna, návāha cahān níhin rō jíin sava ñayuu yúcuan jeē ma stéén i inga jnūhun jeē tú ndaā. <sup>4</sup> Te ma cuatáhú i tāca jnūhun jeē cúu máa cuento-ni, jíin jnūhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnūhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnūhun cáncandije yó.

<sup>5</sup> Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo iyó ndáa anuá i, te cáncandije ndije i ya. <sup>6</sup> Te sava ñayuu chi ni cajica yátá i, te ni cascuíta i jnūhun ya, ni quíivicoo i nuū tāca jnūhun jeē tu ndé jéjníñu. <sup>7</sup> Chi cáconi i cuu i maestro ley yā, te ni tu cájecūhun ni i na jnūhun cúu jeē cácahān i, jíin na vé cúu jeē castéén níhin i.

<sup>8</sup> Te jíni yō jeē iyó váha ley un, te núu jecūhun ni yō ndese jéjníñu. <sup>9</sup> Chi cánuú sáha yó cuenta jeē tu ní jécōo ni ñn ley jeē siquī ñayuu ndaā, chi sa suhva siquī ñayuu jeē

tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandije ley yā, jeē cájehni tatá jíin náná, jíin jéē cájehni ndíyi. <sup>10</sup> Te suni ni jecōo siquī ñayuu cájica jnéni, jíin tée casáha ndíyi jíin jnáhan yá, jíin ñayuu casacuíhná inga ñayuu, jíin ñayuu castáhú, jíin ñayuu cácahān níhin jnūhun yáa. Te ni jecōo siquī tāca gá ñayuu jeē casáha jniñu tu quíjnáhan jíin jnūhun ya jeē steén ndaā váha. <sup>11</sup> Te jnūhun ya un cúu jnūhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnūhun ya.

*Jeē nácuatáhú Pablo siquī jeē ní cundáhú ni yā de*

<sup>12</sup> Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu rī, te ni tejníñu ya ruhū nácani ri jnūhun ya. <sup>13</sup> Te súcuan ni sáha ya jíin rí vēsú ni cahān ndevāha ri siquī yā nde saá, te ni sáha ndevāha ri jíin ñayuu cáncandije, te xeēn ni sáha rī. Te vēsú súcuan te ni cundáhú ni yā ruhū, chi ná tu candije ri yā nde saá, te tu ní jécūhun ni rī na vé cúu jeē sáha rī. <sup>14</sup> Súcuan ni sáha Jítóho yō jeē váha ndasí jíin rí. Te ni sáha ya jeē candije ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

<sup>15</sup> Te ndaā ndije cúu jnūhun yáha, te jeē cánuú candije ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuēchi. Te ruhū cúu téē jeē vihyá gā ni sáha cuēchi. <sup>16</sup> Te ni cundáhú ni Yaā Dios ruhū, návāha jíin rúhū jeē vihyá gā ni sáha cuēchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñn ejemplo nuū tāca ñayuu candije ní cuáhān yō, návāha níhín tahu i cotecu i ní cáni. <sup>17</sup> Núu súcuan te ní cáni na cáhán yíñúhún yó jeē yōhyo

luu cújéhnú máá Yaā jeē cúu Rey siquī ndihi, jeē técu ní cáni, jeē tu náa cuiti. Te tu cúu coto yó nuū yā vijna, te máá ñn-ni ya iyó, te ndíchi yá. Amén.

<sup>18</sup> Nájñuhun sēhe ri cúu ró Timoteo, te jñiñu yáha téjñiñu ri rohó, jéē na ndúcú ndéyí ró siquī jñiñu váha. Te na cándíje vāha ró, te na cóo ndaā anuá rō. Chi nde saá je ni cacahān tǎcǎ hermano jíin jñuhun Yaā Dios jeē súcuan condiso jñiñu ró. <sup>19</sup> Chi sava ñayuu tuá iyó ndáā anuá i nuū yā, te ni casnáā i jñuhun cácandíje i. <sup>20</sup> Himeneo jíin Alejandro cúu uū tēe ni casáha súcuan. Te je ni siaá rí de nuū Satanás, jeē stóho ún de, návāha jíin jñúndóho ún te cutúhva de jeē ma cáhán ndevāha ga de siquī Yaā Dios.

*Siquī ndese cacān tahú yō*

## 2

<sup>1</sup> Núu súcuan te xihna gā ndácu ri jeē cacān tahú rō jehē tǎca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i. <sup>2</sup> Te cacān tahú rō jehē tǎca tēe cácujeñhu jíin jéē ndácu jñiñu, návāha sáha de jeē cuu coyūcu váha yó te tú na jñúndóho coo siquī yō, te cuu chiñúhún váha yó Yaā Dios te sáha yíñúhún yó jíin táca-ni. <sup>3</sup> Chi yāha cúu jeē váha jeē núnjahan ni Yaā Dios, Yaā jnáma yóhó. <sup>4</sup> Chi máá yá cuní yā jnama ya tǎca ñáyuu te cuni i ndese íyó jñuhun ndaā yā. <sup>5</sup> Chi íyó ñn-ni Yaā Dios, te suni íyó ñn-ni Yaā jeē cahán jíin Yaā Dios jehē ñáyuu. Te Yaā un cúu máá Jesucristo jeē ní nduu tēe. <sup>6</sup> Te ni socō yā maá yá ni jihí yā jeē ní chunaa yā cuēchi ndihi yó. Te ná ni quiji máá quǎvī ún, te ni quejéé ní canacani jñuhun ún. <sup>7</sup> Te jeē siquī yúcuan ní jeni ya ruhū cúu ri apóstol jeē nácani ri jñuhun ya, návāha stéén rí nuū ñáyuu tǎcǎ nación jeē tu jíni jñuhun ya, jeē na cándíje i

jñuhun ún te sáha i jñiñu ndaā. Te siquī jeē candíje ri Cristo te ndaā cúu jeē cahán rí.

<sup>8</sup> Núu súcuan te cúní rí jeē ndihi-ni lugar na cácan tahú tǎca tēe. Te na cóo ndoo ánuá de jeē ma quití ni de ni ma tejnáhan de. <sup>9</sup> Te suni súcuan tǎcǎ ñahan, na cási vāha ña máá ña nájñuhun cánuú, návāha ma cóo jñuhun canu. Te ma cóndihvī ni ña jeē sáha luu ndasí ña xiní ña, chí jéē cuhun ña siquī oro chí perla chí sahma váha ga. <sup>10</sup> Chi sa suhva na quéndōo luu ánuá ña jíin jñiñu váha sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios. <sup>11</sup> Te núu cáhiin ña jíin ñáyuu cascuáha jñuhun ya, te na cúní nahín ña te cuatáhú ña. <sup>12</sup> Chi tu jéhe ri jñuhun jeē steén ñahan nuū ñáyuu ndutútú, ni jeē ndácu ña jñiñu nuū tēe. Chi sa suhva na cúní nahín ña. <sup>13</sup> Chi xihna gā Adán ni sáha ya, te sáá te ni sáha ya Eva. <sup>14</sup> Te tu ní stáhú jexeén Adán, chi sa suhva ni stahú un ñasihí de, te ni sáha ña cuēchi. <sup>15</sup> Te jeē scácu tǎcǎ ña sēhe te coo vāha ña, te núu na quéndōo ña jíin jñuhun cándíje ña ya, jíin jéē cundáhú ni ña jñahan ña, jíin jéē cóo ndoo ánuá ña, jíin jéē sáha yíñúhún ña.

*Ndese cánuú coo tēe cándiso jñiñu nuū ñáyuu cácandíje*

## 3

<sup>1</sup> Ndaā cúu jñuhun yáha: Núu ñn tēe cúní de condiso jñiñu de condito de ñayuu cácandíje, te vāha jñiñu ndúcú de sáha de. <sup>2</sup> Núu súcuan te tēe ndiso jñiñu nuū ñáyuu cácandíje, cánuú jeē ma cóo ni ñn jeē nihín ñayuu cuēchi siquī de. Te na cóo ñn-ni ñasihí de, te cájí coo ni de, te ndito coo xiní de, te sáha yíñúhún de. Te cánuú jeē niní cuanúu de vehe nuū ñáyuu cájica, te níní stéén vāha de jñuhun ya. <sup>3</sup> Te ma cúu de tēe nájini, te ma tejnáhan de, te ma ndíyo ni de xúhún. Chi sa suhva

coo vāha ni de, te coo vītá ni de, te ma cutóo ni de siquī xūhun. <sup>4</sup> Te cánuú jéē na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuū de. <sup>5</sup> Chi núu ñn tēe tu jíní de ndacu vāha de jniñu ini vehe de, ¿te ndese cuu condiso jniñu de nuū ñáyuu cá candíje nuū Yaā Dios? <sup>6</sup> Núu súcuan te tēe ndíso jniñu nuū ñáyuu cá candíje, ma cúu de tēe jeē saá ní candíje, chi núu súcuan te sanaa te sándúxí de máá de, te ñnuú-ni cuēchi jecondee siquī de jín jéxeén. <sup>7</sup> Te cánuú cuu de tēe jeē suni nde ñayuu tu cá candíje, cuajnúhún i de, návāha ma nihín i cuēchi siquī de, te ma cúndeyí jéxeén jín de.

*Ndese cánuú coo tēe cájejniñu mēhñu ñáyuu cá candíje*

<sup>8</sup> Te suni súcuan tēe cájejniñu mēhñu ñáyuu cá candíje, cánuú jéē na cóo yíñúhún de, te na squícu de jín jnúhun cáhán de. Te ma cúu de tēe nájini, te ni ma ndíyo ni de xūhún. <sup>9</sup> Te na cuñi nihin de jín jnúhun cándíje yó jéē ní yisāhi ndé jenahán, te na cóo ndoo anuá de. <sup>10</sup> Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cá candíje. <sup>11</sup> Te suni súcuan ñasihí de jíjnáhan ña, cánuú coo yíñúhún ña, te ma sajnúhún ña, te cájí coo ni ña, te squícu vāha ña tēcá-ni jniñu. <sup>12</sup> Te tēe cájejniñu mēhñu ñáyuu cá candíje, na cóo ñn-ni ñasihí de, te na ndácu vāha de jniñu nuū séhe de jín núu ñáyuu vehe de. <sup>13</sup> Chi tēcá tēe cájejniñu vāha mēhñu ñáyuu cá candíje, chi vāha quéndōo yíñúhún de, te nihín de modo jeē cají gá nácani de jnúhun Cristo Jesús jeē cá candíje yó.

*Jnúhun sáhi yá jeē cá candíje yó*

<sup>14</sup> Te vēsú ñúhun ni rī cuajeē yachī rī coto jnánan yó, te tēe rī jnúhun yáha cuajeē nuū rō, <sup>15</sup> návāha núu cucuéé rī, te je jíní

rō ndese cánuú sáha vāha ñayuu cá cuu sēhe Yaā Dios. Chi máá i cá cuu ñayuu cá candíje nuū Yaā Dios, Yaā tēcú. Te máá i cóo sáha jeē iyó cutú jnúhun ndaā, chi cáhīn nihin i jín. <sup>16</sup> Te jendaá ndíje chi jéhnú ndasí cúu jnúhun yáha jeē cá candíje yó, jeē ní yisāhi ndé jenahán:

Yaā Dios ni steén yá maá yá, chi ni nduu ya tēe,

te Espíritu ni steén jeē iyó ndaā jniñu ni sáha ya,

te tēcá ndajéhé andiví ní cajito jniñu ní sáha ya.

Te ni jítē núu jnúhun ya nuū ñáyuu tēcá nación,

te ni cacandíje ñayuu ní ñáyiví núu yá,

te ni ndaa ya cuanuhun yá andiví.

*Siquī ñáyuu cájica yátá nuū jnúhun cá candíje yó*

#### 4

<sup>1</sup> Te cájí steén Espíritu Yaā Dios jeē quiví cuándihí te coo sava ñayuu caca yátá i nuū jnúhun cá candíje yó.

Te cuatáhú i tēcá jéē cá cahán jnúhun stáhú jín jnúhun ní castéén tachí.

<sup>2</sup> Chi cuni nahín i jnúhun cástéén tēe cástáhú-ni, jeē tu cá cahán ndaā de.

Chi tēe un ní cahíje ndasí ni de jín jnúhun stáhú, te tuá sáha jín ánuá de jeē nácani ni de. <sup>3</sup> Te cahán de jeē cuēchi cúu jeē coo ñasihí tēe, te suni súcuan núu cají ñayuu sava ndeyu.

Te ndeyu ún chi ni sáha Yaā Dios jeē cúu ñayuu cá candíje jeē jíní jnúhun ndaā, návāha cají i te nacuatáhú i nuū yá. <sup>4</sup> Chi ndihí jeē ní sáha Yaā Dios, iyó vāha, te ma squexícó yō ni ñn, chi sa nacuatáhú yó te cají yō.

<sup>5</sup> Chi jín jéē cáhu yó jnúhun Yaā Dios jín jéē nácuatáhú yó nuū yá, te iyó ndoo ndihí-ni.

*Tēe jéjniñu vāha nuū Jesucristo*

<sup>6</sup> Te núu steén rō jnúhun yáha núu tēcá hermano, núu súcuan te cuu ró tēe jéjniñu vāha nuū Jesucristo, te ije ró jín jnúhun vāha ya jeē candíje ró, chi ni cutúhva ró te ndíquín

rō. <sup>7</sup> Te ma quívi nduu rō jíin táca jnúhun jeē cúu cuento-ni jeē cájeni cáhá ni ñayuu. Chi níni na scuáha ró ndese chiñúhún váha ró Yaā Dios. <sup>8</sup> Chi jeē scuáha yó ejercicio jeē cóo ndacuī yiqui cúñu yō, jecu-ni níhín jniñu. Te jeē scuáha yó chiñúhún váha yó yá, suu yūcuan cúu jeē váha níhín jniñu siquī tǎcá-ni, jeē cúu vida yáha jíin vida quiji. <sup>9</sup> Te ndaā ndije cúu jnúhun yáha, te jeē cánuú candíje ndihí ñayuu cúu. <sup>10</sup> Te jeē siquī yáha cúu jeē sájniñu níhin yó siquī jnúhun ya te ndóho yó jéē cácahān ndeváha i nuū yō. Chi ñúhún ni yō jeē coto yó nuū maá Yaā Dios, Yaā técu. Te máá yá cúu Yaā jnáma táca ñáyuu, te ñayuu cácaandíje jnúhun cúndáhú ni yā i, máá i cúu jeē jnáma ya.

<sup>11</sup> Táca jnúhun yáha cánuú jéē ndacu ró núu i te stéén rō. <sup>12</sup> Ma cuáha ro jnúhun jeē kujéē ni ni ñin i nuū rō siquī jeē suchí ró. Chi sa coo ró ñin ejemplo nuū ñáyuu cácaandíje, jeē cúni i ndese váha cáhán rō, ndese váha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō. <sup>13</sup> Te níni ndé ná tu jinū rī nuū rō, te condihví ni rō jeē cáhu ró tutu i nuū hermano cándutútú, jíin jéē stihví ni rō i, jíin jéē steén rō nuū i. <sup>14</sup> Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi táca téé jéhnu cándiso jniñu nuū ñáyuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

<sup>15</sup> Núu súcuan te cocuu ró jíin táca jniñu yáha, te condihví ni rō jíin, náváha cuni táca ñáyuu jeē váha íje ró cuáhān rō jíin. <sup>16</sup> Coo cuidado rō jeē caca ndaā rō jíin jéē steén váha ró jnúhun ya, te cuiñi níhin ró jíin ndihí. Chi núu súcuan sáha ró te quendōo váha ánuá maá ró jíin ñáyuu chuhun ni jnúhun cáhán rō.

*Ndese sáha váha yó jíin ñáyuu*

*cácaandíje*

## 5

<sup>1</sup> Ma cúxeēn rō nuū táca téé jéhnu, chi sa cahān váha ró jíin de jeē ma stívi de, nájnūhun cáhán rō jíin tátá rō. Te táca téé suchí, suni cahān váha ró jíin de nájnūhun jíin ñani rō. <sup>2</sup> Te suni súcuan cahān rō jíin táca ñahan jéhnu, nájnūhun jíin náná rō. Te suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

<sup>3</sup> Te ñayuu cácaandíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña.

<sup>4</sup> Chi ñin ñahan ní quendōo ndáhú, núu íyó séhe ña chí séhe chání ña jeē jéváha, te na cóto máá i ña. Chi cánuú cutúhva i jeē xíhna gā nuū ñáyuu vehe i squícu i coto i. Te na nácosto i náná i tátá i siquī jeē ní cacondito ña i. Chi yáha cúu jniñu váha jeē núnahan ni Yaā Dios. <sup>5</sup> Te ñin ñahan ní quendōo ndáhú ndije jeē máá ñin na ña, ñúhun ni ña jeē maá Yaā Dios condito ya ña, te tu jécuiñí ña jeē jicán tahu ña nduú ñuú. <sup>6</sup> Te sa suhva núu máni ndíhví ní ña siquī táca jéē cúsi ní maá-ni ña, yūcuán na te vésú técu ña, te nájnūhun je ni jihí ña. <sup>7</sup> Jniñu yáha ndacu ró núu ñáyuu, náváha ma cóo cuéchi siquī i. <sup>8</sup> Te núu ñin ñayuu tu ndíto i jnáhan vehe i, te víhyá gā ñayuu ñni vehe i, núu súcuan te sáha i jniñu jeē tu quíjnahan jíin jnúhun cándíje yó, te cúu i ñin jeē neé gá vésú ñáyuu tu cácaandíje.

<sup>9</sup> Te ñahan viuda cuu quívi síhví ña nuū lista ñayuu jeē cáchindéé ñáhán ró jíin xúhun, te núu je ni jñu ña uní xico cuiyā, te núu ni íyo ñin-ni yñí ña. <sup>10</sup> Te suni cánuú jéē cuajnúhún ñáyuu ña jeē váha jniñu ni sáha ña, núu jeē ní scuéhnu váha ña séhe ña, jíin jéē ní jéhe núu ña vehe nuū ñáyuu cájica, jíin jéē ní jejniñu ña nuū hermano cácaandíje, jíin jéē ní chindéé ñáhán ña ñayuu

cándoho jnündóho, jíin jéē ni sáha ña táca gá jniñu váha.

<sup>11</sup> Te tãca ñahan viuda jeē iyó suchí gá, chí ma soó ró sihví ña nuñ lista. Chí sanaa te nducú ña jeē cúsiñ ni maá-ni ña, te ma cóndihvī ni ña siquī Cristo, chí cuu ni ña condeca tucu ña tēe. <sup>12</sup> Te súcuan jecondee cuēchi siquī ña, chí tu ní squícu ña jeē ni jéjnūhun ña ná ni jecosō sihví ña nuñ lista. <sup>13</sup> Te suni caca cuu ña tãcá-ni vehe te quee cúxí ña. Te nasūu máni jeē caca cúxí ña, chí suni siquī jeē sajnúhún ña, te quīvi nduu ña cahān ña jnūhun jeē tu iyó váha jeē cahán ña. <sup>14</sup> Jeē yúcuan cúní rī jeē tãcá ñahan viuda jeē iyó suchí, na nándāha ña, te scuéhnu ña sēhe, te coto váha ña vehe ña, návāha ñayuu cácuu contra ma cúu cahān i siquī ña. <sup>15</sup> Chí sava ñahan viuda je ní cajica yátá ña te sáha ña jniñu jeē cuní Satanás.

<sup>16</sup> Te núu ñin tēe chí ñin ñahan cándije, núu iyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cándije, návāha cuu cuāha váha i nuñ ñahan viuda jeē tu ndé ñin coto ña.

<sup>17</sup> Te táca tēe jéhnu cándito ñayuu cándije, na jécunaā doble yāhu de, te núu cándihvī ni de cástéen de cánacani váha de jnūhun ya. <sup>18</sup> Chí cúu nájñūhun cáhán tutu ñi: Ma cánda stiquī caxīn tī trigo, núu ma cuáha ró jéē cáji tī. Te suni cáhán: Tēe jeē sájniñu tátú, jíni ñūhún quiyāhu de, áchí.

<sup>19</sup> Ma cuajnúhún ró te núu jéquin ñayuu cuēchi siquī ñin tēe jéhnu cándito ñayuu cándije te núu tu iyó úu chí únī testigo. <sup>20</sup> Te núu cásáha ñayuu cuēchi, te cánuú cuxeēn rō nuñ i, jíto jínuū ndihi ñayuu, návāha na cónso Iyo sava ga i. <sup>21</sup> Te cáhán ñihin rī jíin ró, jíto máá Yaa Dios jíin Jítoho yō Jesucristo jíin táca ndajéhé yā jeē ní nacáji ya: Squícu váha ró jniñu yáha, te ma sáha ró cuenta ndese cúu ñin ñin i, chí inuú-ni

sándaā rō siquī ndihi-ni i. <sup>22</sup> Ma cáni yachī rō ñin tēe jeē condiso jniñu de nuñ ñayuu cándije, chí xīhna gā coto ndee rō de. Chí sanaa te stívi de, te cuēchi de suni condee siquī rō jíin de. Te coto ró máá ró jeē ma quívi ró jíin jniñu néé.

<sup>23</sup> Te siquī jeē núu-ni núu-ni cúhú chji ró, te ma cóho ga rō máni ndute, chí suni coho ró jecu vino.

<sup>24</sup> Cuēchi sava ñayuu chí je iyó ndijin nde ná tu quívi i nuñ cúndaā cuēchi i. Te cuēchi sava ga i chí cúcuéé te natūu nahín. <sup>25</sup> Te suni súcuan tãcá jniñu váha, chí iyó ndijin. Te vēsú ná tu natūu jniñu váha ún, te ma cúu quisāhi ní cáni, chí natūu nahín.

## 6

<sup>1</sup> Táca ñayuu cácuu mozo, na cóo yíñúhún váha i nuñ patrón i, návāha ma cahán neé ñayuu siquī Yaa Dios jíin siquī jnūhun ya jeē castéén yō. <sup>2</sup> Te mozo jeē yíhi nuñ patrón cándije, ma cáni ni i jeē cūhva-ni sáha yíñúhún i nuñ de siquī jeē hermano cándije cácuu de. Chí sa cuajniñu váha ga i nuñ de, chí tēe cándije tēe maní i jíin cúu táca tēe un jéē sájniñu i nuñ. Jnūhun yáha stéén rō te stíhvī ni rō i.

*Siquī jeē chiñúhún váha yó yá te cusñ ni yō jíin cúhva jeē névāha-ni yó*

<sup>3</sup> Te núu ndé tēe stéén de jnūhun tú ndaā jeē tu quíjnahan jíin jnūhun váha ndaā máá Jítoho yō Jesucristo, jíin jnūhun ni steén Yaa Dios jeē cándije yó, <sup>4</sup> núu súcuan te máni tēe ndúxí tēe tu jécūhun cuíti ni cúu de. Chí cánéé xínī de, chí máni cúní de tejnáhan de siquī táca jnūhun stéén de. Te tãcá un sáha jeē cácuésún ni, jíin jéē cátejnahan, jíin jéē cácahān ndevāha, jíin jéē cájeni néé ni siquī jnahan, <sup>5</sup> jíin jéē máni cástáhān jnahan. Súcuan cásáha tēe jeē ní ndunéé xínī, jeē tu cájini jnūhun ndaā. Te cájeni ni de jeē nihín de cuehé xūhun siquī jnūhun cándije de stéén de. Na

cújiyo ró nuū ñáyuu cándāa súcuan. <sup>6</sup> Te jendaá jeē yóhyo vāha quéndōo yó te núu chíñúhún vāha yó yá, te núu cúsiñ ni yō jíin cúhva jeē névāha-ni yó. <sup>7</sup> Chi tú na vé ni cácu yó jíin ñayīvi yáha, ni tú na vé condiso yó quíhīn yō jíin núu na cúu yō. <sup>8</sup> Te núu iyó jēē cáji yō jeē cusúcún yó, te na cúsiñ ni yō jíin yúcuan-ni. <sup>9</sup> Chi ñayuu jeē cuní cucúcá, chi yachi quívi i cuēchi jeē jito ndee jexeén i. Te quívi i jíin cuéhē jniñu cánéé jniñu stívi jēē ndíyo ni i. Te tācá un sáha jeē tívi ñáyuu te jnahnū ndetū i. <sup>10</sup> Chi jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cácadnje i, te ni canihīn i cuehē ndasí jnúndóho.

*Jeē na ndúcú ndéyí yó siquī jnúhun cándje yó*

<sup>11</sup> Te rōhó chi tēe jéjníñu nuū Yaā Dios cúu ró, te cunu ró coto ró táca cuēchi yáha. Te condiquin rō jniñu ndaā, te chíñúhún vāha ró Yaā Dios, te candíje vāha ró, te cundáhú ni rō jnáhan ró, te cuandeyí ni rō, te coo vítá ni rō. <sup>12</sup> Te ndúcú ndéyí ró siquī jnúhun cándje yó yá. Te cuiñi nīhin ró jíin jnúhun jeē ni níhīn tahú yō cotecu yō ní cáni. Chi jeē yúcuan cúu jeē ní cana ya rohó, te cáji ní cahān rō jeē vāha cándje ró yá, jito jínúū cuehē ñayuu. <sup>13</sup> Te cahān nīhin ri jíin ró, jito máá Yaā Dios, Yaā jeē sáha jeē técu tācá-ni, jíin Jesucristo, Yaā jeē cají ní cahān yā ni nacani ya jnūhun vāha nuū Poncio Pilato. <sup>14</sup> Squícu vāha ró jniñu ndácu ya nuū rō, te ma stívi ró sáha ró, návāha ma cahān ñayuu cuēchi siquī rō. Te súcuan sáha ró ní ndé quívi ndíji Jitoho yō Jesucristo. <sup>15</sup> Chi quiji ndijin yā maá quívi jeē ní jeni Yaā Dios. Te Yaā Dios chi máá ñn-ni ya cúu Yaā yóhyo ndetū, te jnái ya ndihī poder. Te cúu ya Rey nuū tāca rey, jíin Jitoho nuū tāca jitoho. <sup>16</sup> Te máñúhún-ni ya cúu jeē

iyó ní cáni. Te ndéé yá ñn lugar nuū ndíi ndaxín, nuū ma cúu quívi yó. Te ni ñn ñayuu ñayīvi yáha tu ní jito cuiti i nuū yā, te ni ma cúu coto i nuū yā. Te ní cáni na cóo yíñúhún yó nuū yā, chi jnái máá yá poder ní cáni. Amén.

<sup>17</sup> Te cahān rō jíin ñáyuu cucá ndajníñu ñayīvi yáha, jēē ma cúndúxí i. Te ma ténuū i xūhún i, chi yachi naa ún. Chi sa suhva na ténuū i jeē coo vāha i sáha Yaā Dios, Yaā técu, chi máá yá jéhe cuehē yā tācá-ni jeē cúsiñ ni yō jíin. <sup>18</sup> Te ndacu ró jniñu nuū i jeē na sáha vāha i, chí jeē sacúcá ndije i máá i cúu jeē sáha i tācá jniñu vāha. Te na cúu i ñayuu vāha ni jeē cuáha i jeē cúu jnáhan i. <sup>19</sup> Te súcuan caya i cuehē jniñu vāha jeē coo cúcá i nuū yā ní tiempo jeē quíji. Te nihīn tahú i cotecu i ní cáni.

*Jniñu sándihī ndácu Pablo nuū Timoteo*

<sup>20</sup> Te rōhó Timoteo, condito ró táca jniñu ní chíhi ya ndaha ró. Te ma quívi nduu rō jíin táca jnúhun cāhá-ni, cuenta ñayīvi yáha, jíin táca jnúhun stáhú jēē cácahān i jeē jnúhun ndíchí ndaā cúu. <sup>21</sup> Chi sava ñayuu cándiquin tāca jnúhun yáha, ni cajica yátá i ni castóo i jnūhun cácadnje i ya.

Te ñúhun ni rī jeē Yaā Dios na sáha ga yā jeē vāha rōhó. Súcuan na cóo. Amén.



## CARTA UU JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō nī cání siquī jeē yīhi yó ndaha Cristo Jesús. <sup>2</sup> Te téé ri carta yáha cuájeē nuū rō Timoteo, chi cúu ro nájñūhun sēhe ri jeē maní rī jín. Te ñūhun ni rī jeē Tatá yō Yaā Dios jín Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīi ni rō.

### *Jeē nácani de jnūhun Cristo*

<sup>3</sup> Níní tu nāā ni rī cacān tahú rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejníñu ri, nájñūhun ni casáha táca jí rī, te iyó ndoo ánuá rí nuū yā. <sup>4</sup> Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusī ndasí ni rī. <sup>5</sup> Te núcūhun ni rī jeē váha ndije cándíje rō Cristo, nájñūhun ni cándíje náná jéhu rō Loida, jín náná rō Eunice xīhna gā. Te cúcáhu ni rī jeē suni súcuan cándíje máá rō vijna.

<sup>6</sup> Te jeē yúcuan nástíhvī ni rī rohó jéé na cóndíhvī gā ni rō jín táhū jeē ni jéhe Yaā Dios nuū rō jeē nácani rō jnūhun ya. Te tahū un ní nihīn rō ná ni tee ri ndaha ri xinī rō. <sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jín jéé cundáhú ni yō jnáhan yó, jín jéé ndíto iyó xinī yō. <sup>8</sup> Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquí jnūhun ya. Chi sa cuāha rō jnūhun ndoho rō jín rí

siquí jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō. <sup>9</sup> Chi ni jnama ya yohó, te ní cana ya yohó jéé coo ndoo ánuá yō cuajñíñu yó núu yā. Te tu ní cána ya yohó siquí jeē váha ni sáha yó, chi siquí jeē ní tee ni maá yá jeē cundáhú ni yā yohó jéé yīhi yó ndaha Cristo Jesús. Chi nde ná tu jecōo ñayiví, te je cundáhú ni yā yohó. <sup>10</sup> Te vijna jeē ní quenda ndijin Jesucristo, Yaā jnáma yóhó, te ní steén cají Yaā Dios jeē cundáhú ni yā yohó. Chi máá Cristo ni snāā yā poder cuehyī jéhu yóhó, chi jín jnūhun jnáma ya yohó ní steén cají yá nuū yō jeē cótecu yō nī cání chi ma jnahnú ndetū yō.

<sup>11</sup> Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyuu táca nación jeē tu jíní jnūhun ya. <sup>12</sup> Te siquí un cúu jeē ndóho ri táca jnúndóho yáha íne ri vecāa. Te tu cúcanu rī, chi jíní rī ndese Yaā cúu Yaā candíje ri, te cúcáhu ni rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

<sup>13</sup> Te cuiñí nīhin rō jín táca jnūhun ya jeē steén ndaā, suu jnūhun jeē ni stéén rī nuū rō. Te caca rō jín jnūhun cándíje yó, te cundáhú ni rō jnáhan rō siquí jeē yīhi rō ndaha Cristo Jesús. <sup>14</sup> Te condito rō táca jniñu váha jeē ní chihi ya ndaha rō, sáha poder maá Espíritu Santo jeē ndeé ini yō.

<sup>15</sup> Je jíní rō jeē táca ñáyuu cáyūcu Asia ni castóo i ruhū. Te uū i cúu Figelo jín Hermógenes. <sup>16</sup> Te jícán tahú rī jeē cundáhú ni Jítóho yō ñayuu vehe Onesíforo, chi cuehē jínu ni nanihīn ni rī ni sáha de, te tu ní cúcanu de siquí rī jeē ní ine ri vecāa. <sup>17</sup> Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. <sup>18</sup> Te jícán tahú rī jeē máá Jítóho yō cundáhú ni yā de quivī ndíji ya. Te je jíní váha máá rō ndese yóhyo ni

chindéé ñáhán de ruhū ná ni cahīyo ri ñuu Efeso.

*Jeē cúu yó nájñuhun soldado vāha nuū Jesucristo*

## 2

<sup>1</sup> Núu súcuan te róhó, séhē mánī, na cóo fuerza ni rō siquī jeē yíhi rō ndaha Cristo Jesús te sáha ya jeē váha róhó. <sup>2</sup> Te tāca jñuhun jeē ní jini rō ní cahān rī, jito jínúū ñayuu cuehē, jñuhun ún na nástéén rō nuū tēe cásquicu vāha, návāha suni cuu stéén tucu máá de nuū sáva ga i.

<sup>3</sup> Te róhó na cuándeyí ni rō coto rō jñúndóho, chi cúu rō nájñuhun ññ soldado vāha nuū Jesucristo. <sup>4</sup> Ni ññ soldado jeē ññ nuū guerra, tu sájneñu de máá de jíin jñiñu máá de, chi cánuú jeē sáha de máni máá jeē ndácu tēe ní tejniñu de. <sup>5</sup> Te suni súcuan tēe cásiquí deporte, ma nihín de premio te núu tú condihví ni de cosíquí váha de máá modo chíjñiñu. <sup>6</sup> Te tēe sájñiñu ññhin ññhun, máá de cúu jeē nihín xīhna gā jeē cuáha itu. <sup>7</sup> Nacani ni rō siquī jeē cahán rī, te máá Jítoho yō sáha ya jeē jécūhun ni rō siquī ndihi.

<sup>8</sup> Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyí, nájñuhun cáhán jñuhun jñáma ya yohó jeē nácani rī. <sup>9</sup> Te jeē siquí jñuhun un ndóho ri jñúndóho, te nde ni cajihni i ruhū íne ri vecāa nájñuhun ññ tēe ni sáha cuēchi xeēn. Te jñuhun Yaā Dios chi ma cúu cuhni i jeē ma cuité núu. <sup>10</sup> Núu súcuan te jéndeyí ni rī jito ri tāca jñúndóho yáha siquī jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihīn i nuū cujéhu i níí cáni. <sup>11</sup> Chi ndaā cahán jñuhun yáha:

Núu vésú na cúu yō jeē siquí yā, te suni cotecu yō jíin yá,

<sup>12</sup> te núu cuandeyí ni yō ndoho yó, te suni ndacu yó jñiñu jíin yá.

Te núu ma cuajnúhún yó yā, te suni ma cuajnúhún yá yohó.

<sup>13</sup> Te vésú tu squícu vāha yó, te máá yá chí máni squícu ya, chi tu cúu sáfalta yā, chí squícu ya jeē ni cáhān yā.

*Tēe sájñiñu squícu vāha jíin jñuhun ya*

<sup>14</sup> Jñuhun yáha na nástíhví ni rō ñayuu, te cahān ññhin ro jíin i, jito máá Jítoho yō, jeē ma téjñáhan i siquī tāca jñuhun sáa-ni. Chi tu ndé jéjñiñu cuiti, chí sa stívi ñayuu jíni sōho. <sup>15</sup> Te nducú ndéyí rō jeē cuajnúhún Yaā Dios rohó, jéé cúu rō tēe sájñiñu squícu vāha jíin jñuhun ya, návāha ma cúcanu rō nuū yā siquí ní ññ, chí vāha nacani rō jñuhun ndaā yā. <sup>16</sup> Te ma quívi nduu rō jíin tāca jñuhun sáa-ni ñayívi yáha, chí suu sáha jeē ndúcuehē gā jñiñu néé quívicoo ñayuu cácahān. <sup>17</sup> Te tāca jñuhun cástéén i chí cúu nájñuhun ññ ndihyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan. <sup>18</sup> Chi tēe un ní cajica yátá de nuū jñuhun ndaā, te cácahān de jeē jé ni cuu ni canatecu ndíyí. Te súcuan cásaca nuu de xinī sava ñayuu cácañdije. <sup>19</sup> Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájñuhun yósó núu tútu ññ: Je jíni Jítoho yō Yaā Dios tāca ñayuu jeē yíhi ndaha máá yá. Te suni cáhán: Tāca ñayuu jeē ndácunehen síhví Cristo, na cújiyo i nuū jñiñu néé, áchí.

<sup>20</sup> Te ini ññ vehe cáhnu íyó cuéhe cohō, nasūu máni cohō oro cohō plata, chí suni cohō yujnu cohō ññhun. Te íyó jéé fino te íyó jéé corriente. <sup>21</sup> Te núu ññ ñayuu sándoo i máá i jeē quénda i nuū táca jñiñu néé, te cuu i nájñuhun ññ cohō fino. Te coo ndoo coo ññ i nuū Jítoho yō, te nihín jñiñu i ndese cúni maá yá. Te coo túhva i jeē sáha i táca jñiñu váha.

<sup>22</sup> Núu súcuan te cuñu rō coto rō táca jéé tú vāha jeé cándiyo ni tēe

suchí. Te condiquin rō jniñu ndaā, jín jnūhun cándije ró yá, jín jnūhun cúndáhú ni, jín jnūhun coyūcu manī jín jnāhan. Te súcuan sáha ró ndé jín táca ñáyuu ndoo ánuá jeē ndácunehen sĥvī máá Jítóho yō. <sup>23</sup> Te ma quivī nduu rō jín táca jnūhun cánéé íi jeē tu íyó cájí, chi je jíní rō jeē sáha jeē tejnāhan ñayuu. <sup>24</sup> Te mozo maá Jítóho yō, tú vāha jeē tejnāhan de, chi sa suhva cánuú jéē coo vāha ni de jín táca ñáyuu. Te coo vāha ni de stéén de, te cuandeyí ni de jín i. <sup>25</sup> Te jín jéē víta ni de te cani ichí de ñayuu nĥni ni. Chi sanaa te nacani ni i sáha Yaā Dios, te jecūhun ni i ndese íyó jnūhun ndaā. <sup>26</sup> Te nducájí ni i te cācu i nuū jexeén jeē ní jniñ ún i, chi ni cundeyí jín i jeē sáha i jeē cuní maá.

*Siquī ndese coo ñayuu sáha néé quivī cuándihi*

### 3

<sup>1</sup> Te suni na jécūhun ni rō jeē quivī cuándihi te quee quivī coo jnūndóho. <sup>2</sup> Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquī Yaā Dios, te cunĥni ni i nuū tatá i nuū naná i, te ma nácuatáhú i, te ma chiñúhún i Yaā Dios. <sup>3</sup> Te ma cóo manī i jín jnāhan i ni ma cundáhú ni i. Te sájnúhún i, te ma cúu casi i táca jéē ndíyo néé ni i, te yōho xeēn coo i, te quiti ni i coto i táca jniñu vāha. <sup>4</sup> Te suni nastúu i jnāhan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quivī i nuū Yaā Dios. <sup>5</sup> Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quivī nduu rō jín ñáyuu casáha súcuan. <sup>6</sup> Chi sava tēe ún quivī de vehe te stáhú de tēcá ñahan cánéé jéē íyó ndasí cuēchi. Te yachī quivīcoo ña jín táca jnūhun tú ndaā jeē cúsi ni ña jín. <sup>7</sup> Te vésu nini scuáha ña na-ni jnūhun, te tu cúu

cuiti jecūhun ni ña jnūhun ndaā yā. <sup>8</sup> Te nájnūhun ni casáha tēe tásí Janes jín Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnūhun ndaā. Chi coo nee jeē níjnūní de, chi ma candíje ndije de jnūhun cándije yó. <sup>9</sup> Te ma quee jniñu sáha de, chi cuni táca ñáyuu jeē tēe cánéé xíní cácu de, nájnūhun ni cajini ñayuu jeē ní íyo néé xíní ndindúú tēe jeē ní nducú casi nuū Moisés.

*Jniñu sándihi ndácu Pablo nuū Timoteo*

<sup>10</sup> Te róhó chi je ni cutūhva vāha ró ndese stéén rī, ndese jíca ndaā rī, ndese tēe ni rī sáha rī, ndese cándije rī yā, ndese née rī paciencia, ndese cúndáhú ni rī jnāhan rī, jín ndese jéndeyí ni rī. <sup>11</sup> Chi ni cajito xeēn ñayuu ruhū, te ni ndoho rī jnūndóho. Te jíní rō táca jéē ní ndoho rī ñuu Antioquía, ñuu Iconio, jín ñuu Listra. Te jíní rō ndese ni cajito xeēn i ruhū. Te máá Jítóho yō ni jnama ya ruhū nuū ndihí ún. <sup>12</sup> Chi ndaā cúu jeē táca ñáyuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i. <sup>13</sup> Te ñayuu casáha jniñu néé jín ñáyuu castáhú, chi sa víhyá gā coo i jín jniñu néé, chi stáhú i ñayuu, te suni candíje máá i jnūhun stáhú.

<sup>14</sup> Te róhó chi sa cuiñi nĥin ró jín jéē ní cutūhva ró jín jéē ní cucáhnū vāha ni rō. Chi jíní rō ndese ñayuu cúu jeē ní castéén nuū rō. <sup>15</sup> Chi nde ná lulí ró, te je jíní rō ndese cáhán tutu ĩi jeē steén nuū rō ndese candíje ró jeē ni jĥĥi Cristo Jesús jehē rō návāha cācu ró. <sup>16</sup> Te ní tutu ĩi cúu jnūhun jeē ni cáhān Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jín jéē scuéhnū yóhó jín jniñu ndaā, <sup>17</sup> návāha tēe cájejniñu nuū Yaā Dios, ĩje ni de te coo tūhva vāha de sáha de tēcá jniñu vāha.

## 4

<sup>1</sup> Te cáhán rī jín ró, jito Yaā Dios jín Jítoho yō Jesucristo, Yaā quiiji ndacu jniñu, te sándaā yā jniñu ñayuu cátecu jín ñáyuu ní cajihī.

<sup>2</sup> Cáhán nihin ri jeē na nácani ró jnúhun ya, te stáhvī ni rō i candíje i. Te níní sáha ró súcuan núu núne i chí vésú tu núne i. Te sáha ró jéē na jécūhun ni i, te cahān rō nuū i, te caní ichí váha ró i, te jín cuéhē paciencia steén rō nuū i. <sup>3</sup> Chi quee tiempo jeē ma cuájnúhún cuiti ñayuu jnúhun ya jeē steén ndaā váha, chí sa cuajnúhún i jnúhun cúsi ni maá i, te nducú i cuehē maestro jeē steén nuū i máni jnúhun jeē núnahan ni i cuni nahín i. <sup>4</sup> Te cujiyo i nuū jnúhun ndaā, te condihvī ni i táca jnúhun jeē maá cuento-ni cúu. <sup>5</sup> Te róhó chí níní coo ndito ní rō, te cuandeyí ní rō jín jnúndóho, te condihvī ni rō nacani ró jnúhun jnáma ya yohó, te squícu váha ró jín jniñu ya jeē sáha ró.

<sup>6</sup> Te ruhū chí je ni socō rī maá rī jeē cúu rī, te je cuacuyajni quivī cuu rī. <sup>7</sup> Te je ni cundeyí rī jeē ní nducú ndeyí rī siquī jniñu váha, te je ni jinu ni jica rī ñayivī yáha, te tu ní siáá rī jnúhun cándíje rī yā. <sup>8</sup> Te vijna je íyó túhva premio jeē nihín rī siquī jeē ní jica ndaā rī. Chí Jítoho yō cuāha ya un núu rī maá quivī sándaā yā jniñu, chí maá yá cúu juez ndaā. Te nasūu núu maá ñn ruhū cuāha ya, chí suni cuāha ya nuū táca ñáyuu jeē cúu ni i jeē ndíji ya chí maní i jín yá.

*Jeē cána Pablo quiiji Timoteo nuū de*

<sup>9</sup> Nducú ndeyí ró quiiji yachī rō nuū rī. <sup>10</sup> Chí Demas ni stóo de ruhū, chí ndíyo ni de nda-jniñu ñayivī yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. <sup>11</sup> Te maá ñn na Lucas íne jín rī. Te jeē quíji ró, te condeca ró Marcos quiiji ró jín de, chí váha cuajniñu de jeē chindéé ñahán de ruhū jín jniñu ya. <sup>12</sup> Tíquico ni tají

rí de cuahān de ñuu Efeso. <sup>13</sup> Te jeē quíji ró, te condahá ró cotón jeē ni stóo ri vehe Carpo ñuu Troas. Te suni condahá ró táca libro, te jeē cánuú gá cúu táca tutu ní tee maá rí.

<sup>14</sup> Alejandro, tēe cúu herrero, yōhoyo xeēn ni sáha de jín rí. Te maá Jítoho yō cuāha ya yāhu de jeē súcuan ní sáha de. <sup>15</sup> Te condito ró maá ró nuū de, chí yōhoyo ni cuu de contra siquī jnúhun cástéén yó.

<sup>16</sup> Te ná ni ine ri jeē xihna ñúhún núu táca tóhō, te tú ni ñn tēe ní índichi jín rí, chí ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de. <sup>17</sup> Te vésú súcuan te maá Jítoho yō ni chindéé ñahán yá ruhū, te ni jēhe ya fuerza ini rī, te súcuan ni sínu rí ni nacani ndíhi ri jnúhun jnáma ya yohó, ni cajini nahín ñáyuu táca nación tu jín jnúhun ya. Súcuan ni jnama Jítoho yō ruhū nuū táca tēe xeēn. <sup>18</sup> Te jnama ga yā ruhū nuū táca jniñu néé, te condito ya ruhū nde quivī ri andiví núu ndácu ya jniñu. Te na cáhán yō jeē yóhoyo luu cújéhu ya ní cáni. Amén.

*Saludo jín bendición jeē sándihí*

<sup>19</sup> Te cahān rō jeē sándeýí ni Prisca jín Aquila, jín ñáyuu vehe Onesíforo, achí rí. <sup>20</sup> Erasto ni quendōo de ñuu Corinto. Te ni quendōo Trófimo ñuu Mileto, te chúh de. <sup>21</sup> Te condihvī ni rō quiiji ró nde ná tu quejéé vico míjin. Sándeýí ni rō, achí Eubulo jín Pudente jín Lino jín Claudia jín táca gá hermano.

<sup>22</sup> Te ñúhun ni rī jeē maá Jítoho yō Jesucristo na cóo ya jín ró, te Yaā Dios sáha ga yā jeē váha róhó jínjahan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

<sup>1</sup> Máá rí cúu Pablo, mozo Yaā Dios jíin apóstol Jesucristo, chí ni tají Yaā Dios ruhū jeē scándíje rí ñayuu ní nacāji ya, návāha jecūhun ni i jnūhun ndaā yā jeē candíje yó, <sup>2</sup> te cocuhun ni i jeē cótecu i ní cání. Chí nde ná tu jecōo ñayiví te ni jejnūhun Yaā Dios jeē cótecu yō, te iyó ndāā jnūhun ni cahān yā. <sup>3</sup> Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chí Yaā jnáma yóhó cúu ya. <sup>4</sup> Te tée ri carta yáha cuájeē nuū rō Tito, chí nájñūhun sēhe rí cúu ndíje rō síquī jeē inuú-ni cándíje yó yá. Te ñūhun ni rí jeē Tatá yō Yaā Dios jíin Jítoho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

*Jniñu ya jeē ni sáha Tito nde isla Creta*

<sup>5</sup> Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní rō táca tée jéhnū condito ñayuu cácaandíje táca ñuu, nájñūhun ni ndacu ri jniñu nuū rō. <sup>6</sup> Te tēe jéhnū un cánuú jeē ma cóo ni ñn jeē nihín ñayuu cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cácaandíje jeē ma nihín ñayuu cuēchi síquī i jeē tu sáha vāha i chí jéē níhni ni i nuū de. <sup>7</sup> Chí tēe cácujeñū cándiso jniñu nuū ñayuu cácaandíje, cánuú caca ndaā de chí cándiso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tēe nájñi, ma cua-jnáhan de, te ma ndíyo ni de xūhún.

<sup>8</sup> Chí sa cánuú jéē níni cuāha núu de vehe nuū ñayuu cájica, te níni sáha de jniñu váha, te ndito coo xini de,

te coo de tēe ndaā, te coo ndoo ánuá de, te casi de modo jeē cuní maá de. <sup>9</sup> Te cánuú cuiñi nihin de jíin jnūhun ndaā jeē ni scuáha de, návāha cuu stáhví ni de ñayuu jíin táca jnūhun ndaā vāha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup> Chí iyó cuéhē ñayuu níhni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. <sup>11</sup> Te cánuú jéē casi rō yuhu táca tée ún, chí cástéén de jnūhun jeē tu iyó váha stéén de, chí cuní de nihín de xūhun síquī ún. Te súcuan sáca nuu de xini ndihi ñayuu táca vehe.

<sup>12</sup> Te ñn tēe isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájñūhun quití xéén casáha i, te máni ndáhví ni i cají cuéhē i, te cúxí i, áchí de. <sup>13</sup> Te ndaā cúu jnūhun ni cahān tēe ún. Jeē yúcuan na cúxeén rō nuū i, návāha ndaā vāha na cándíje i. <sup>14</sup> Te ma sáha i cuenta táca jnūhun ni catava jnáhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnūhun ndaā.

<sup>15</sup> Te ñayuu jeē ní ndundoo jeē níjnūní, máni modo iyó ndoo iyó váha jéni ni i jíto i táca-ni. Te ñayuu tu cándíje jeē tu ní ndúndoo jeē níjnūní, máni jéni ni i ñn modo tú ndoo tú váha síquī táca jéē jíto i. Chí nde jeē níjnūní i jíin ánuá i iyó jnéhén. <sup>16</sup> Te vésú cacāhān i jeē jiní i Yaā Dios, te jíin jniñu casáha i te jiní yō jeē tú ndíje i. Chí ñayuu ndevāha ñayuu níhni ni cácuu i, te tu cúu sáha i ni ñn jniñu váha.

*Jnūhun ya jeē steén ndaā vāha*

## 2

<sup>1</sup> Te máá rō chí níni na cáhán rō táca jnūhun jeē quijnáhan jíin jnūhun ya jeē steén ndaā vāha. <sup>2</sup> Te

cahān rō jín tāca téé jéhnū jeē na cóo cájí ni de, te sáha yíñúhún de, te ndito coo xiní de, te candíje nīhin de jnūhun cundáhú ni yā de, te cundáhú ni de jnāhan de, te cuandeyí ni de. <sup>3</sup> Te suni súcuan tācá ñahan jéhnū, na sáha yíñúhún ña, te ma sajnúhún ña, te ma nájini ña. Te na stéén ña tāca jéé váha. <sup>4</sup> Te na stéén ña nuū tācá ñahan sánchezí jéé coo maní ña jín yí ña jín séhe ña. <sup>5</sup> Te ndito coo xiní ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yí ña, návāha ma cahán neé ñayuu siquí jnúhun Yaā Dios.

<sup>6</sup> Te suni súcuan stíhví ni rō tāca téé suchí jeē ndito na cóo xiní de. <sup>7</sup> Te róhó, cuu ró ñn ejemplo nuū de jeē sáha ró tāca jniñu váha. Te jeē steén rō nuū de te ndaā steén rō te coo ndije ni rō. <sup>8</sup> Te ndaā vāha steén rō, návāha ma cóo cahān ñayuu siquí. Te súcuan te cucanu ñayuu cácuu contra, chi ma cóo cahān i ni ñn cuēchi siquí rō.

<sup>9</sup> Te cahān rō jín ñayuu cácuu mozo jeē na cuatáhú i nuū patrón i, te na sáha i tācá jniñu jeē nújnahan ni de, te ma cahán maá i nú ndácu de jniñu nuū i. <sup>10</sup> Te ma sacuíhná i ndajniñu de, chi na cóo i ñayuu ndaā ndije, návāha jín tāca jniñu jeē sáha i, te cuni tāca ñayuu jeé yóhoyó luu cóo jnūhun jeé steén siquí Yaā Dios, Yaā jnáma yóhó.

<sup>11</sup> Chi vijna je ni steén Yaā Dios ndese sáha ya jeé váha ñayuu, chi cúní yā jnama ya ndíhi ñayuu ñayiví. <sup>12</sup> Te jnūhun jeé váha ni yā jín yó, suu stéén nuū yó jeé na siáá yó jniñu neé jín tāca jéé ndíyo neé ni yó. Te ndito na cóo xiní yó ini ñayiví yáha, te caca ndaā yó, te chiñúhún váha yó Yaā Dios. <sup>13</sup> Te suni stéén nuū yó jeé cocuhun ni yó jeé quéndoo ndetú yó jeé quíji maá quiví jéhnū jeé quénda ndijin Yaā Dios, Yaā kujéhnū ndasí, suu Jesucristo, Yaā jnáma yóhó. <sup>14</sup> Chi ni socó yā maá yá jehé yó, návāha

jnama ya yohó nuū tāca jniñu neé, te sándoo ndíhi ya anuá yó jeé cuu yó ñayuu maá yá, te condíhví ni yó sáha yó jniñu váha.

<sup>15</sup> Tāca jnúhun yáha cánuú stéén rō, te stíhví ni rō i, te cahān rō nuū i, chi súcuan ndíso jniñu ró. Te ma cuáha ro jnúhun jeé sajeé ni ni ñn i nuū rō.

*Ndese cánuú sáha ñayuu cácandíje*

### 3

<sup>1</sup> Te na nástíhví ni rō i jeé cuatáhú váha i nuū téé cácujehnū jín téé cándiso jniñu ñuu. Te na siquícu i jniñu cándacu de, te coo ñamā ni i sáha i tācá jniñu váha. <sup>2</sup> Te ma cahán neé i siquí ni ñn ñayuu, te coyūcu mání i jín ñayuu, te coo vāha ni i, te coo víta ni i jín ndíhi ñayuu.

<sup>3</sup> Chi maá yó suni ni cuu yó ñayuu canéé jeé tu jécuhun ni nde saá, te ni cacuníhni ni yó nuū Yaā Dios. Te ni cacandíje yó tāca jnúhun tú ndaā, te ni cajejniñu sáa-ni yó nuū tāca jéé ní ndíyo neé ni yó jín na-ni jniñu ni cusí ni yó. Te ni cajica yó jín jniñu neé jín jnúhun cuésun ni. Chi ni cajito uhú ñayuu yohó, te ni cajito uhú yó i. <sup>4</sup> Yūcuán na te Yaā Dios, Yaā jnáma yóhó, ní steén yā jeé váha ni yā te cundáhú ni yā ndíhi ñayuu ñayiví. <sup>5</sup> Te ni jnama ya yohó, te tú na jniñu váha ní casáha yó jéé jnáma ya yohó, chi sa siquí jeé ní cundáhú ni yā yohó. Chi ni nacate ya anuá yó, te súcuan ni nacacu jeé yó, te ni ndujeé yó ni sáha ya jín maá Espíritu Santo. <sup>6</sup> Te yóhoyó ni cunuú Espíritu Santo ini anuá yó, jeé ni sáha Yaā Dios jeé jín Jesucristo, Yaā jnáma yóhó. <sup>7</sup> Te súcuan te ni ndahva yā cuēchi yó siquí jeé váha ni yā, te nihín tahu yó cotecu yó ní cáni, nájnūhun ñúhun ni yó.

<sup>8</sup> Ndaā cóo jnūhun yáha, te cúní rí jeé niní cáhān ñihin ro tāca jnúhun yáha, návāha ñayuu cácandíje Yaā Dios, na condíhví ni i cocuu i jín jniñu váha. Chi íyó váha tāca jéé

yáha, te níhín jníñu jeē quéndō vāha ánuá ndíhi ñayuu. <sup>9</sup>Te ma quívi nduu rō jíin táca jnúhun cánéé íi, jíin jnúhun siquī ndese vēji tāca jíi yō, jíin táca jnúhun sáha jeē cátejnhān i cácahān i jeē cánuú squícu yó ley Moisés. Chi máni jnúhun cāhá-ni jeē tu níhín jníñu cúu.

<sup>10</sup> Te núu íyó ñáyuu jeē sáha jeē ndusín ini ñayuu cácandíje, te cahān rō nuū i ñin uū jínu, te núu ma chúhun ni i, te quenehen ró i. <sup>11</sup> Chi jíni rō jeē ñin ñayuu sáha súcuan, stívi ndasí i chi jíni i jeē tú vāha sáha i, te jeē yúcuan jécondee cuēchi siquī i.

*Jeē cána Pablo quiji Tito nuū de*

<sup>12</sup> Te jeē taji rí Artemas chí Tíquico cuajeē de, yūcuán na te nducú ndéyí ró quiji ró núu rí ñuu Nicópolis, chi je ni cundaā ni rí jeē yúcuan condee rí tiempo mījin. <sup>13</sup> Te condíhvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéē jíni ñúhún de jeē quíngoo ga de ichi nuū quihín de. Te coto ró jéē ma cúmanī ni ñin nuū de. <sup>14</sup> Te ñayuu cáhīn jíin yó, cánuú cutūhva i sáha i tācá jniñu vāha, te chindéé ñáhán i ñayuu cúmanī nuū, návāha ma cótecu saá-ni i.

*Saludo jíin bendición jeē sándíhí*

<sup>15</sup> Tāca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácandíje yó. Te ñúhun ni rí jeē na sáha ga Yaā Dios jeē vāha róhó jíjnāhan ró. Súcuan na cóo. Amén.

## CARTA JEE NI TEE SAN PABLO APOSTOL NUU FILEMON

<sup>1</sup> Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jíin, chi chíndéé ñájnáhan ró jíin rí siquí jníñu Yaā Dios. <sup>2</sup> Te suni cátee ri carta yáha nuū ñáyyu cácandíje cándutútu ini vehe ró, te suni nuū hermana yō Apia, jíin nuū Arquipo, tēe chíndéé ñájnáhan jíin yó siquí jníñu cánducú ndeyí yó jíin. <sup>3</sup> Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó jíjnáhan ró, te sáha ya jeē coo ndeyí coo sī ni rō.

*Tēe cundáhú ni te cándíje vāha cúu Filemón*

<sup>4</sup> Te jeē jicán tahú rī nuū Yaā Dios te tu náā ni rī cacān tahú rī jehē rō, te níni nácuatáhú rí nuū yā jeē siquí rō. <sup>5</sup> Chi níhín rī jnúhun jeē váha cándíje ró jnúhun cundáhú ni Jítóho yō Jesús rohó, te cundáhú ni rō tāca ñáyyu yáhi ndaha Yaā Dios. <sup>6</sup> Te jicán tahú rī jeē ñáyyu ni cacandíje siquí jeē candíje máá ró, na jécūhun váha ga ni i siquí tāca jēē váha jeē sáha ya yohó jeē jíin Cristo Jesús. <sup>7</sup> Chi cúsi ndasí ni rī te íyó ndeyí ni rī, hermano, siquí jeē cundáhú ni rō ñáyyu cácandíje. Chi máá ró ni sáha jeē ní ndusi ni i.

*Jeē jicán Pablo ñin favor jehē Onésimo*

<sup>8</sup> Núu súcuan te cáhán ndahú rí jíin ró, vēsú cuu ndacu rí nuū rō ndese cánuú sáha ró, chi cúu ri apóstol Cristo. <sup>9</sup> Te tuú chi sa cáhán ndahú rí jíin ró siquí jeē cáhīyo manī yō. Te cundáhú ni rō ruhú sáha ró jēē cuní ruhú Pablo, chi je jéhu rí, te íne rí vecāa jeē

siquí jnúhun Cristo Jesús. <sup>10</sup> Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe rí, chi ní scándíje rí i ini vecāa yāhá.

<sup>11</sup> Te nde saá chi tu ní cúu i mozo squícu nuū rō, chi ní jinu i. Te nde vijna chi váha cuajníñu i nuū rō jíin nuū rī. <sup>12</sup> Te nátají rí i najee i nuū rō. Núu súcuan te cahān váha ró jíin i, te sáha ró cuenta jeē nájnūhun máá rí ni najinū, chi yōhyo manī rī jíin i. <sup>13</sup> Te cusī ni rī núu jeē na cúu quendōo i jíin rí yāhá, návāha cuajníñu i nuū rí lugar máá ró níni jēē íne ri vecāa jeē siquí jnúhun váha ya. <sup>14</sup> Te tu ní cuní rí sáha ri súcuan, chi nde cuāha máá ró jnúhun. Chi nasūu jēē safuerza rī rohó, chi jeē váha ni rō te sáha ró favor jíin rí, nájnūhun cúsi ni maá ró. <sup>15</sup> Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios. <sup>16</sup> Te vijna tuá cúu i ñin mozo jeē ní jeen ró, chi ni nduu i ñin jeē váha ga, suu ñin hermano jeē maní rō jíin. Te ruhū chi yōhyo manī rí jíin i, te nagā ni cuu máá ró jeē ma cóo manī rō jíin i. Te nasūu jēē maní rō jíin ñin tēe súcuan-ni, chi siquí jeē cúu i ñin hermano jeē candíje nuū Jítóho yō.

<sup>17</sup> Te núu sáha ró cuenta jeē ruhū cúu jnáhan ró cándíje, núu súcuan te cahān váha ró jíin i jeē jinú i nuū rō, nájnūhun jeē ruhū cahān rō jíin. <sup>18</sup> Núu na-ni falta ni sáha i nuū rō, chí núu táu i nuū rō, te cacān rō chunaa máá rí. <sup>19</sup> Ruhú Pablo, jíin ndaha máá rí tēe rí yāha jēē máá rí nachunaa. Súcuan cáhán rí vēsú cuu cahān rí jeē sa máá ró taú nuū rí sáha ró jēē cúsi ni rí siquí jeē ní scándíje rí rohó te ni cācu ánuá rō. <sup>20</sup> Núu súcuan, hermano, sáha ró favor yáha jíin rí siquí jeē candíje ró Jítóho yō. Sáha ró jēē ndusi ni rí, siquí jeē cúu ró hermano candíje Cristo.

<sup>21</sup> Te tēe ri yáha núu rō, chi



cúcáhnū vāha ni rī jeē cuatáhú ró, te nde vihyá gā sáha ró vēsú jeē ni jícān rī. <sup>22</sup> Te suni jícān rī jeē sátūhva ró nuū cóndee rī, chi ñúhun ni rī jeē quénda ri yāhá te jeē rī nuū rō sáha Yāā Dios siquī jeē cájicān tahu rō jehē rī.

*Saludo jiín bendición jeē sándihí*

<sup>23</sup> Epafras, tēe íne jiín rí vecāa jeē siquī jnúhun Cristo Jesús, cáhán de jeē sándeyí ni rō. <sup>24</sup> Te suni súcuan cácahān Marcos, jiín Aristarco, jiín Demas, jiín Lucas, tēe cáchindéé ñájnáhan jiín rí siquī jníñu ya.

<sup>25</sup> Te ñúhun ni rī jeē Jítóho yō Jesucristo na sáha ga yā jeē váha róhó jijnáhan ró. Súcuan na cóo. Amén.

## CARTA JEE CUAHAN NUU ÑAYU HEBREO

*Jeē ní tají Yaā Dios Sēhe ya ni nacani ya jñūhun*

<sup>1</sup> Tijni jínu te tijni modo ni cahān Yaā Dios jín táca jí yō nde jenahán, chi ni tají yá tēe ni canacani jñūhun ya. <sup>2</sup> Te vijna te tiempo cuándihí yāha ní tají yá maá Sēhe ya ni nacani ya jñūhun nuū yō. Te jín Sēhe ya ni sáha ya ñayívi jín táca gá, te ndívi jeē iyó ní chihí ya ndaha Sēhe ya. <sup>3</sup> Te Sēhe ya yōhyo luu cújéhnū ya, nájnūhun luu cújéhnū maá yá. Te ndihí ndese cúu maá yá, suni súcuan cúu Sēhe ya. Te jín poder jñūhun ni cahān Sēhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnū nde andívi.

*Jeē cújéhnū ga Sēhe Yaā Dios vēsú táca ndajéhé yá*

<sup>4</sup> Te ni ndujéhnū ndasí gá Sēhe ya vēsú táca ndajéhé andívi, chi ni nihín yā tahū jeē ndiso ya jniñū jéhnū ndasí gá vēsú jniñū cándiso ndajéhé. <sup>5</sup> Chi súcuan ni cahān Yaā Dios jín Sēhe ya, te nasūu jín ndajéhé yá:

Maá ró cúu Sēhe ri,  
te vijna te ni sajhéhnū ri rohó jéē cúu ri Tatá rō.

Te suni ní cahān yā jñūhun Sēhe ya, te nasūu jñūhun ndajéhé yá:

Maá rí cúu Tátá nuū Sēhe ri,  
te maá i cúu Sēhe nuū rí.

<sup>6</sup> Te suni ná ni tají yá Sēhe ya cújéhnū, ni quiji iní ñayívi yáha, te ni cahān yá:

Ndihí ndajéhé rī na chíñúhún i Sēhe ri.

<sup>7</sup> Te ni cahān tucu ya jñūhun ndajéhé yá:

Nájnūhun quée tachī, súcuan cájica ndajéhé rī sáha ri,

te tǎcá un jéē cájejniñū nuū rī,  
nájnūhun yáñuhūn cácuu.

<sup>8</sup> Te jñūhun Sēhe ya chi sa suhva cáhán yá:

Maá ró cúu Yaā Dios, te ndacu ró jniñū ní cáni,

te jniñū ndácu ró, máni jniñū ndaā cúu.

<sup>9</sup> Cúsī ní rō jín jniñū váha, te jító uhū rō jniñū néé.

Jeē yúcuan ruhū, Yaā Dios maá ró, ni sáha rí

jeē yóhyo ga cúsī ni rō vēsú táca gá jeē iyó andívi.

<sup>10</sup> Te suni cáhán yá:

Maá ró cúu Jitoho, te nde xīhna ñúhún ni sáha ró jéē ni jécōo ñayívi.

Te andívi chi suni jeē ni sáha ró cúu.

<sup>11</sup> Te tǎcá un chi naa, te maá ró chi ní cáni iyó ró.

Te tǎcá un chi cutúhú nájnūhun cutúhú ñn sahna,

<sup>12</sup> te nacaquin jnahnú rō te nasama ró jínáhan.

Te maá ró chi ma sáma cuíti rō,  
te quiví cótecu rō ma ndíhi cuíti.

<sup>13</sup> Te súcuan ni cahān tucu yā jín Sēhe ya, te nasūu jín ndajéhé yá:

Cucōo ró lado váha ri nuū cújéhnū ró,

te na sáha ri jeē quende rō poder táca jéē cájito uhū rohó.

Achí yá. <sup>14</sup> Te tǎcá ndajéhé yá chi mozo-ni cácuu, te tají yá cuangoo jeē chindéé ñáhán ñayuu jeē nihín tahū jeē jnama ya.

*Jeē ma cúhuun ni yō jín jñūhun jnáma ya yohó*

## 2

<sup>1</sup> Núu súcuan te cánuú jéē váha ga chuhun ni yō táca jñūhun ya jeē ní cajini yó, chi núu tuú te sanaa te scuíta yó. <sup>2</sup> Chi nde jenahán ní jejniñū ya ndajéhé yá ni cacastūhun jñūhun ya, te ni cajini ñayuu jeē iyó ndáa. Te ñayuu nihni ni jín ñayuu tu ní cájendetú jñūhun ún, vetū-ni ni canihín i castigo. <sup>3</sup> Te núu súcuan ni cuu, te yóhó, ¿ndese cácu yó núu ma

chúhun ni yō jnūhun cánuú gá jeē jnáma ya yohó? Chi xīhna gā maá Jítoho yō ni nacani ya jnūhun yáha, te sáá te tēe jeē ní cajini nahín ni canacani ndaá tucu maá de nuú yō. <sup>4</sup>Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jiín de jeē ní casáha de sín sín jniñu jéhu jeē nahán náā ni yō jito yó poder yā. Te suni ni jéhe ya Espíritu Santo yā nuū ñn ñn yó, ndese ni nujnahan ni maá yá sáha yó.

*Jeē ní nduu Jesús jnáhan ñayuu*

<sup>5</sup>Te Yaā Dios nasūu nuū ndajéhé yā ni jéhe ya jnūhun jeē condiso jniñu siquī ñayiví jéē quíji, chi sa suhva nuū Séhe ya Cristo ni jéhe ya. Te siquī ñayiví un cúu jeē cahán rī yáhá. <sup>6</sup>Chi suhva yósó nuú tútu jeē ni cáhān David jiín yá:

¿Na vé cúu ñayuu jeē ñūhun ni ní i? Te ndíhvi ní ni síquī i, te maá ñayuu cúu i.

<sup>7</sup>Chi jecu-ni tiempo ni sáha ní jeē núu i nuū tǎcá ndajéhé ni.

Yūcuán na te sajéhu ní i te squéndōo yíñúhún ní i, te cani ní i jeē ndacu i jniñu nuū tǎca jéē ni sáha ní.

<sup>8</sup>Te ndihi jeē iyó chi sáha ní jéē cujéhu i siquī.

Achí tutu. Te jeē ní sáha Yaā Dios jeē cujéhu i siquī ndihi, núu súcuan te ma quéndōo ni ñn jeē ma cújéhu i siquī. Te vésú súcuan te vijna te ná tu coto yó jéē cujéhu i siquī ndihi jeē iyó. <sup>9</sup>Te jeē jini yō vijna cúu Jesús, Yaā jeē ní nduu núu jecu-ni tiempo nuū tǎcá ndajéhé yā. Chi ni ndoho ya jeē ni jihí yā jehē yō, te jeē yúcuán ní ndujéhu luu tucu ya, te ndihi cáhiyo yíñúhún núu yā. Chi jeē váha ni Yaā Dios jiín yó, jeē yúcuán ní jihí Jesús jehē yō.

<sup>10</sup>Te ndihi jeē iyó chi cuenta Yaā Dios cúu, chi maá yá ni sáha. Te suni ndéca ya cuehē ndasí séhe ya jeē quihín i andiví núu luu cujéhu i jiín yá. Te váha níhín jniñu jeē ni

jéhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. <sup>11</sup>Chi Jesús jeē ní sándoo ya i te maá i jeē ní candundoo i, chi ñn-ni Tátá i jiín yá. Te jeē yúcuán tu cúcanu Jesús jeē cahán yā hermano yā jiín i, vésú ndasí núu i. <sup>12</sup>Chi yósó nuú tútu jeē ni cáhān yā jiín Tátá yā:

Cachi na jnūhun ní núu tǎcá hermano na,

te mēhñu nuū cándutútú i cata ná ndese cújéhu ní.

<sup>13</sup>Te suni cáhān yā nájñūhun cácahān hermano yā:

Ruhū chi cándije ri yā.

Te cáhān tucu yā:

Yáha íne ri jiín tǎca gá sēhe Yaā Dios jeē ní jéhe ya nuū rī.

Achí Jesús.

<sup>14</sup>Te nájñūhun cácacu ñayuu jeē cúu i yiqui cúñu, suni súcuan ní cacu Jesús, návāha cuu yā jehē yō. Te súcuan ní snáa yā poder jexeén jeē squiví ñayuu nuū cuéchi te jihí i. <sup>15</sup>Te ni cacu ya súcuan návāha cuu quenehen ya tǎca ñayuu chíji jnūhun jeē yuhú i cuu i. Chi ní vida i ndóho i sáha ún. <sup>16</sup>Te jendaá tu ní quíji ya jeē chindéé ñáhán yá tǎcá ndajéhé yā, chi sa suhva jeē chindéé ñáhán yá ñayuu cácañdije jeē ní nduu yucūn Abraham. <sup>17</sup>Jeē yúcuán ní jini ñúhún nduu inuú yá jiín tǎca hermano yā, návāha cuu ya sutú cujéhu jeē squícu váha ya tǎcá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. <sup>18</sup>Chi suni maá yá ni ndoho ya jeē ní jito ndee jnūndóho ya, te jeē yúcuán cuu chindéé ñáhán yá ñayuu jeē jito ndee jnūndóho i.

*Cújéhu ga Jesús vésú Moisés*

### 3

<sup>1</sup>Hermano, ni cana Yaā Dios rohó, te cácuu ró ñayuu ndoo maá yá. Núu súcuan te na nacani váha ni ró siquī Cristo Jesús, Yaā cúu apóstol

jeē ní tejniñu Yaā Dios, te suni cúu ya sutū cujéñu siquī jñuhun cácanđije yó. <sup>2</sup> Chi ni squícu vāha ya nuū Yaā Dios, Yaā ní tee jniñu un siquī yā, nájñuhun ni squícu vāha Moisés nuū ñáyuu jeē ni cáhān Yaā Dios jeē cácuu i ñayuu vehe ya. <sup>3</sup> Chi cujéñu ndasí gá Jesús vēsú Moisés, nájñuhun cujéñu ndasí gá tēe sáha vehe ñasūu máa vehe. <sup>4</sup> Chi tācá vehe iyó tēe ni sáha. Te máa Yaā Dios cúu jeē ni sáha tāca jēe iyó. <sup>5</sup> Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jñuhun jeē steén yā tiempo quiji. <sup>6</sup> Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjñuhun ya nuū i. Te suni máa yó cácuu ñayuu vehe ya, te núu na cuiñi nihin yó jíin jñuhun cándije yó ndé quivī sándihí, te núu cúsiñi ni yō jeē ñuhun ni yō tāca jēe vāha jeē coo.

*Jñuhun jeē ndetātu ñáyuu Yaā Dios*

<sup>7</sup> Núu súcuan te na chúhun ni yō jeē cahán Espíritu Santo nuū tútu i: Vijna te núu cuni sōho ró jēe cahán Yaā Dios,

<sup>8</sup> te ma cúnihni ni rō nájñuhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñuhun téhé.

<sup>9</sup> Chi yūcuan ní casáha jíi rō jniñu jeē ni quitī ni rī, achí yā,

vēsú ni cajito i tācá jniñu ni sáha ri uū xico cuiyā.

<sup>10</sup> Jeē yūcuan ní quitī ni rī jíin ñáyuu tiempo un.

Te ni cahān rī jeē máni jeē castóo i ichi ndaā,

chi tu cácuu i condiquīn i jñuhun ri.

<sup>11</sup> Te jeē yūcuan ní quitī ni rī, te ni cahān teyí rí

jeē ma quívicoo cuiñi i nuū ndetātú i sáha ri.

Achí yā.

<sup>12</sup> Núu súcuan hermano, coto má conéé ánuá ni iin ró jēe cáca yátá ró jeē tuá candije ró Yaā Dios, Yaā técu.

<sup>13</sup> Chi sa suhva tāca quivī na stáhvī jñáhan ni rō, níni gá iyó tiempo, návāha ma cúnihni ni ni iin ró te stáhú rōhó sáha ró cuēchi. <sup>14</sup> Te núu na cuiñi nihin yó ndé quivī sándihí jíin jñuhun jeē ní quejéé yó jíin, yūcuán na te cuu yó jñáhan Cristo.

<sup>15</sup> Chi cáhān tutu:

Vijna te núu cuni sōhó ró jēe cahán Yaā Dios,

te ma cúnihni ni rō nájñuhun ni cunihni ni ñayuu jenahán.

Achí. <sup>16</sup> ¿Te ndé-ni cúu ñayuu jeē ní jini jñuhun ya te ni cunihni ni?

Suu ndihí ñayuu jeē ni scácu Moisés jeē ní quendacoo Egipto. <sup>17</sup> ¿Te

ndé-ni cúu ñayuu jeē ni quitī ni yā nuū uū xico cuiyā? Suu ñayuu jeē

ní casáha cuēchi, te ni cajihí i nuū ñuhun téhé. <sup>18</sup> ¿Te ndé-ni i cúu jeē ni

cahān teyí yá jeē ma quívicoo cuiñi i nuū ndetātú i sáha ya? Suu máa

ñáyuu jeē tu ní cájendetū nuū yā.

<sup>19</sup> Núu súcuan te jíni yō jeē tu ní cúu quívicoo i nuū ndetātú i, siquī jeē tu ní cácanđije i ya.

## 4

<sup>1</sup> Te níni iyó gá jñuhun jeē ni jéjñuhun ya jeē quívicoo ñayuu nuū ndetātú i sáha ya, te na cónso iyo yó

jēe ma stáhvī yó, návāha tú coo jíin sava ró jēe ma nihín rō quivī ró.

<sup>2</sup> Chi suni máa yó ni cajini sōho yó jñuhun jeē jnáma ya yohó, nájñuhun

ñayuu jenahán un. Te nuū maá i tu ní jéjñiñu jñuhun ni cajini i ún, siquī

jeē tu ní cácanđije i. <sup>3</sup> Te yóhó jēe cácanđije, máa yó cúu jeē quívicoo

yó núu ndetātu yó. Te siquī ñáyuu tu cácanđije ni cahān yā suhva:

Jeē yūcuan ní quitī ni rī, te ni cahān teyí rí

jeē ma quívicoo cuiñi i nuū ndetātú i sáha ri.

Te súcuan ni cahān yā vēsú je iyó túhva nuū ndetātú i nde ná ni jecōo

ñayiví. <sup>4</sup> Chi súcuan yósó jnúhun nuū tútu iī siquī quiví uxá:

Ni sínu Yaā Dios tāca jēē ni sāha ya, te ni ndetātu yá quiví uxá.

<sup>5</sup> Te suni nuū tútu un yósó tucu:

Ma quívicoo cuiti i nuū ndetátú i sāha ri.

Achí yá. <sup>6</sup> Núu súcuan te sava ñayuu chi quívicoo nahín i nuū ndetátú i. Te ñayuu jenahán jēē ní cajini jnúhun jeē jnáma ya i, tu ní quívicoo i siquī jeē tu ní cájendetū i nuū yá.

<sup>7</sup> Jeē yúcuan ní jeni tucu ya inga quiví jeē quívicoo ñayuu, te quiví un cúu vijna. Chi ná ni yāha cuehē tiempo jeē ni cáhān yā jíin ñayuu jenahán, te yósó núu tútu jeē ni sāha ya jeē suni ni cahān David suhva:

Vijna te núu cuni sōho ró jēē cahán yā,

te ma cúnihni ni rō núu súcuan.

Achí tutu. <sup>8</sup> Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetātu ánuá i sāha ya. Chi núu súcuan te ma cahán gā Yaā Dios jíin táca ñayuu jeē vijna cúu quiví jeē quívicoo i nuū ndetátú i. <sup>9</sup> Núu súcuan te iyó tühva nahín iin nuū ndetātu ñayuu Yaā Dios, nájnūhun ni ndetātu máá yá. <sup>10</sup> Chi ñayuu jeē quívicoo nuū ndetátú i jíin yá, chi ndetátú i jeē ní casájniñu i, nájnūhun ni ndetátú Yaā Dios nuū jniñu ni sāha máá yá. <sup>11</sup> Núu súcuan te na ndúcú ndéyí yó quiví yó núu ndetātu yó un, te ma sāha ni iin yó cuéchi jeē ma cándíje yó, nájnūhun ni casáha i nde saá.

<sup>12</sup> Chi jnúhun Yaā Dios ndíto técu te iyó poder. Chi cúu nájnūhun iin espada jeē xeén ndindúú lado, chi nástúu cájí ndese iyó jēē níjnūní yó jíin ánuá yó, nájnūhun sāha espada jeē jéhnde te nástúu nuū ñujnáhan yiqui jíin meque. Te jnúhun ya nástúu ndihi ndese jeni ni yó jíin ndese cúní yó sāha yó. <sup>13</sup> Te tu iyó ni iin jeē yísahí jeē tu jíní máá Yaā jeē náquihin cuenta, chi ndihi-ni jíní

vāha ya, te ndihi-ni túu ndijin nuū yā.

*Jesús cúu sutū kujénu ga*

<sup>14</sup> Te cánevāha yó iin sutū kujénu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi nihin yó jíin jnúhun jeē ní candíje yó. <sup>15</sup> Chi névāha yó iin sutū kujénu jeē jíto ndáhú yóhó jeē tu fuerza yó squícu vāha yó. Chi nájnūhun ndóho yó jēē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuiti cuéchi ya. <sup>16</sup> Núu súcuan te ma yūhu yó, chi na quiví yó yuhu mesa yā, cúu jeē cacān tahú yó. Chi maní yā jíin yó, te cúndáhú ni yā yohó, te siquī jeē váha ni yā te chíndéé ñahán yá yohó táca jínu jeē jini ñúhún yó.

## 5

<sup>1</sup> Chi tāca sūtū jeē ní kujénu jenahán, ni nacāji Yaā Dios de mēhñu ñayuu, te ni jeni ya de jeē cuíñi de nuū yā jehē ñayuu, te socó de ndajniñu jíin quití nuū yā jeē siquí cuéchi i. <sup>2</sup> Te cuu cahān vitá de jíin ñayuu tu jécūhun ni jíin ñayuu castíví, chi máá de suni tú na fuerza ini de squícu vāha de. <sup>3</sup> Jeē yúcuan cúu jeē suni cánuú sócō de quití nuū yā jeē siquí cuéchi máá de, nasūu máá-ni jeē siquí cuéchi ñayuu.

<sup>4</sup> Te ni iin tēe tu cúu sájénu de máá de jeē cuu de sutū kujénu, chi sa máá Yaā Dios cúu jeē nacāji ya de, nájnūhun ni nacāji ya Aarón nde jenahán. <sup>5</sup> Te suni súcuan Cristo, tu ní sájénu ya máá yá jeē cuu ya sutū kujénu, chi sa Yaā Dios ni sāha, chi ni cahān yā jnúhun yáha:

Máá ró cúu Sēhe ri,  
te vijna te ni saájénu ri rohó jēē cúu ri Tatá rō.

<sup>6</sup> Te suni cahán tucu ya nuū tútu iī: Níí cáni cúu ró sūtū, nájnūhun sutū Melquisedec jehénahán.

7 Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yā. Te ni cahān ndahú yā jín Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chiñúhún yā Yaā Dios, te ni chindéé ñájnāhan Yaā Dios jín yā nuú jnūndóho ún. 8 Chi vésú Sēhe Yaā Dios cúu ya, te ni jendetū yā ni ndoho ya ini ñayiví, te súcuan ni jini yā ndese cúu jnūhun jéndetū. 9 Te ná ni cuu ni squícu ndíhi ya jeē ní jendetū yā, te ni cucutú jnūhun jeē jnáma ya tāca ñayuu jéndetū nuú yā, te cotecu i ní cáni. 10 Chi ni jeni Yaā Dios yā jeē cúu ya sutú cujéhnú nájñūhun sutú Melquisedec.

#### *Siquī jeē ma cáca yátá i*

11 Te iyó cuéhē jnūhun jeē castūhun rí siquī tāca jéē yáha. Te yí cúu jeē jécūhun ni rō sáha rí, siquī jeē tu cáconi rō chuhun ni rō. 12 Te je ni cunahán cácandíje rō, te jini ñúhún jéē cúu rō téē stéén nuú. Te tuú chi sa cájini ñúhún tucu máá rō téē stéén nuú rō tāca jnūhun Yaā Dios jeē tú yí cuiti. Chi sa ni canduu rō nájñūhun sūchi yíquín jéē jini ñúhún caxin i, chi ná tu ije i caji i jeē ndáva. Súcuan cácuu rō chi ná tu ije rō jín jnūhun yí gá. 13 Chi núu máni máá nájñūhun sūchi yíquín jéxin cácuu rō, núu súcuan te tu cúu jecūhun vāha ni rō jnūhun ndaā. 14 Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jín jéē neé.

## 6

1 Núu súcuan te na yáha yó núu tāca jnūhun Cristo jeē tú-ni yí, te na quíhín yō nuú jnūhun yí gá, návāha na íje vāha ni yō jín jnūhun ya. Te ma ndejéé tucu yó jín jnūhun jeē ni scuáha yó xíhna gā, suu jnūhun jeē nácani ni yō stóo yo cuéchi yó jéé cúu yó sáha, jín jéé candíje yó Yaā Dios, 2 jín siquī jeē jéndute, jín siquī jeē

soó ndaha xinī ñáyuu, jín siquī jeē nátecu ndíyi, jín siquī jeē jnahnú ndetū ñayuu ní cáni. 3 Núu súcuan te na yáha yó núu tāca jéē yáha te quiví yó núu jnūhun yí gá, te núu cuāha Yaā Dios jnūhun.

4 Chi iyó ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quiví i nuú jnūhun stéén Espiritu Santo, 5 te suni je ni jini i jnūhun vāha Yaā Dios jín ndese coo poder yā tiempo quiji. 6 Te ñayuu un núu caca yátá i, te ma cúu ga ndejéé jeē i jeē nácani ni i. Chi jeē cáca yátá i cúu nájñūhun jeē nácagni tucu i Sēhe Yaā Dios jicā cruz, te cájéhe i jnūhun canu yā cájito ñayuu. 7 Te ñayuu chi cácuu i nájñūhun ñūhun jeē cúun vāha saú nuú te ndóyo vāha. Te núu cánecoo jeē vāha caji téē casájniñu, yūcuán na te cúsi ni Yaā Dios jín. 8 Te núu máni iñu yóquin jín yucú sajnéñu cánecoo nuú, núu súcuan te tu jéjñiñu cuiti, te squéndōo i yā, te ñin quiví te cayú. Súcuan jnahnú ndetū ñayuu cájica yátá.

#### *Jeē ñūhun ni yō tāca jéē vāha jeē coo*

9 Te máá rō jijnáhan rō hermano, vésú cácahān rí súcuan jín rō, te cácacáhnú ni rí jeē cácuu rō ñayuu cuiñi ñihin, chi ñayuu ni jnama ya cácuu rō. 10 Te Yaā ndaā cúu Yaā Dios, te tu náa ni yā jniñu casáha rō. Chi siquī jeē cáhíyo maní rō jín yá te ni cacundáhú ni rō hermano rō cácandíje, te ni cachindéé ñáhán rō i, te súcuan casáha rō ndé vijna. 11 Te cáconi rí jeē niní súcuan sáha ga ná ñin ná ñin rō ndé quiví sándihí, chi jeē sáha rō súcuan te ñihin rō ndíhi jeē cáñuhun ni rō. 12 Te cáconi rí jeē ma cúhuun ni rō, chi sa ndacu rō ñáyuu cácandíje jeē jín paciencia cándetu i, te jeē yúcan ñihin tahú i tāca jéē ni jéjñūhun ya.

13 Chi quiví jeē ni jéjñūhun Yaā Dios nuú Abraham, te ni ndacunenhen ya maá yá jeē ni jéjñūhun téyí

yá, chi tuá na inga ndacunehen ya jeē cujéhnua ga vésú maá yá jeē cuu testigo yā. <sup>14</sup> Te ni cahān yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. <sup>15</sup> Te jíin paciencia ni condetu de, te súcuan te ni nihīn de jeē ní jejnūhun ya. <sup>16</sup> Te núu cáhān teyí ñáyu, te ndacunehen i síhví ñin jeē cujéhnua ga vésú maá i. Te núu iyó ñin jnūhun jeē tu cácanđe jnāhan, te núu ñin tēe cáhān teyí de jíin síhví Yaā Dios, yūcuán na te jécuiñí jeē cátejñāhan. <sup>17</sup> Te suni súcuan Yaā Dios, chi ni jejnūhun téyí yá nuū ñáyu jeē cuāha ya tahū i. Chi ni cuni yā jeē cucāhnu vāha ni i jeē ma nácani yátá ni yā síquī jeē ni jéjnūhun ya nuū i. <sup>18</sup> Chi ma nácani yátá cuítí ni yā síquī jnūhun jeē ni cáhān yā uū jínu, ñin jeē ni jéjnūhun ya, te inga jeē ni cáhān teyí tucu ya síquī suni jnūhun ún. Chi tu stáhú cuítí yā. Te jeē yúcuan máá yó jeē ní tūhva yó yá, chí yōhoyó iyó ndeyí ni yō, te cáñuhun teyí ni yō jeē squícu ya jeē ni cáhān yā. <sup>19</sup> Te síquī jeē súcuan ñūhun ni yō, te suu sáha jeē quéndōo ñihin ánuá yō jíin jnūhun ya, te quéndōo ndaā ni yō, nájñūhun quéndōo ñihin barco jeē jñí gancho yuū. Te sáha jeē cúu quívi yó andiví núu íi gā, nájñūhun cuarto íi gā jeē ni íyo ichi yátá sahma ni ndita caa ini vehe íi jenahán. <sup>20</sup> Te ini yūcuán chí xīhna gā Jesús ni quívi, návāha nune ya ichi quívicoo yó. Te jeē yúcuan ñí cáni cúu ya sutū cujéhnua nájñūhun sutū Melquisedec.

*Jeē cúu Jesús sutū nájñūhun Melquisedec*

## 7

<sup>1</sup> Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnua téyí. Te ni jejnāhan de Abraham ná ni nandicó Abraham jeē ní cundeyí de ni cajejnāhan de jíin táca rey.

Te ni jicān tahú de jehē Abraham. <sup>2</sup> Te táca úxí ndajñíñu jeē ní quende Abraham nuū táca rey un, ni jēhe de ñin ñin síquī un nuū Melquisedec. Te síhví Melquisedec cuni cahān: rey jeē sáha jñíñu ndaā. Te suni nání de rey Salem, te jñūhun Salem cuni cahān: jeē iyó ndeyí síñ ni. Te jeē yúcuan suni nání de: rey jeē sáha jeē iyó ndeyí síñ ni ñáyu. <sup>3</sup> Te tu cáhān tutu jñūhun tátá de ni náná de ni táca jíi de. Ni tu cáhān núu ni cacu de, ni núu ni jihí de. Chi cúu de nájñūhun Jesús, Sēhe Yaā Dios, chí ñí cáni cúu de sutū.

<sup>4</sup> Te condēhe jíjnāhan ró náa jéhnua ni cuu Melquisedec, chí jíi jéhnua yó Abraham ni jēhe de ñin ñin síquī táca jéē uxí nuū de síquī táca jéē ní quende de nuū rey un. <sup>5</sup> Te jíiní yō jeē táca úxí ndajñíñu ni canihīn ñáyu, ni cajēhe i ñin ñin síquī un ní caquihin tēe cácuo sutū yucūn Leví, nájñūhun cáhān ley Moisés. Te ni caquihin de nuū ñáyu cácuo jnāhan de, chí ñin-ni yucūn Abraham cácuo de jíin i. <sup>6</sup> Te Melquisedec nasūu yúcūn Leví cúu de, te vésú súcuan te ni quihin de ñin ñin síquī táca jéē uxí nuū Abraham. Te suni ni jicān tahú de jehē Abraham, vésú cúu Abraham tēe jeē ni jéjnūhun ya nuū. <sup>7</sup> Te jíiní vāha yó jéē tēe cujéhnua ga cúu jeē jicān tahú jehē tēe núu ga. <sup>8</sup> Te ñáyívi yāha chí táca sūtū cáquihin de ñin ñin síquī táca jéē uxí nuū ñáyu, vésú cácuo te tēe cájihí. Te Melquisedec suni ni quihin de, te máá de chí cáhān tutu íi jeē técu de. <sup>9</sup> Te suni cuu cahān yō jeē Leví, tēe jeē ní quihin ñin ñin síquī táca jéē uxí nuū ñáyu, suni nájñūhun nuū maá de ni quihin Melquisedec ñin ñin síquī táca jéē uxí. Chí jeē ni jēhe Abraham nuū Melquisedec, suu cúu nájñūhun jeē suni ni jēhe de jeē síquí Leví jíin ndihí ga yucūn de jeē quíji. <sup>10</sup> Chí yucūn Abraham cúu Leví, te vésú ná tu cacu de quívi jeē

ni jénahan Melquisedec Abraham, te nájñuhun jeē ni jéhe máá de cúu jeē ni jéhe Abraham.

11 Te yucūn Leví ni cane sutū Aarón jíin táca gá sutū ní quiijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jíin ley un núu, te tuá cánuú jeē núcuiñi inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájñuhun sutū Melquisedec. 12 Te núu núcuiñi inga clase sutū, te suni cánuú sáma ley siquī yucūn de. 13 Núu súcuan te ni sáma ley un, chi cáhán tutu iī jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiiji ya ún, tú ni iin ní cúu sutū. 14 Chi jíni vāha yó jéē chíji yucūn Judá ni cacu Jítoho yō. Te yucūn ún chi tu ní cáhán cuiñi Moisés jeē cánecoo sutū.

15 Te cáji cúu jeē ní núcuiñi Cristo jeē cúu ya inga clase sutū nájñuhun sutū Melquisedec. 16 Te tu cúu ya sutū jeē ní cacu chíji yucūn Leví nájñuhun cáhán ley jenahán. Chi cúu ya sutū siquī jeē ndíso ya poder cotecu yā ní cáni te ma cúu cuiñi yā. 17 Chi súcuan ni cahān Yaā Dios jñuhun ya:

Ní cáni cúu ró sūtū,  
nájñuhun sutū Melquisedec.

18 Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo ní cáni. 19 Chi ley Moisés tu ní sáha jeē quéndōo ndaā ñayuu. Te ni nihín yō iin jñuhun vāha ga jeē ñuhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

20 Te jíin jéē ni cáhān teyí Yaā Dios te cúu Jesús sutū. 21 Chi táca gá tēe ún, nasūu jíin jñuhun jeē ni cáhān teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítoho yō Yaā Dios, te ma nácani yátá ni yā:  
Ní cáni cúu ró sūtū,

nájñuhun sutū Melquisedec.

Achí yá. 22 Núu súcuan te jíin Jesús ni cucutú iin contrato vāha ga vēsú ley jenahán. 23 Te táca gá sutū ún, chi ni iyo cuehē de, chi siquī jeē cájihí de te tu ní cúu cuiñi de ní cáni. 24 Te Jesús chi cúu ya sutū jeē cuiñi ní cáni, chi técu yā ní cáni. 25 Jeē yúcuan ndíso jniñu ya jnama ya ñayuu quiijicoo nuū Yaā Dios, cotecu i ní cáni. Chi ní cáni técu yā te cáhán yā jehē i jíin Yaā Dios.

26 Núu súcuan te vāha ndasí sutū kujéñnu cúu Jesús, jeē nájñuhun jíni ñuhún yó. Chi sutū iī cúu ya, te tú na cuēchi ya, te iyó ndoo ya, te tu cúu ya jnáhan ñayuu casáha cuēchi, te kujéñnu teyí yá nde nuū sucún gá andiví. 27 Te máá yá tu jíni ñuhún sáha ya nájñuhun ni casáha sutū cácujeñnu jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi iin jínu-ni ni socō yā máá yá jehē yō, te ni cuu-ni. 28 Chi ni jeni ley Moisés táca sutū kujéñnu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jéē ni cáhān teyí yá, te ni jeni ya Sēhe ya jeē cúu ya sutū kujéñnu, te sutū ndaā sutū vāha cúu ya ní cáni.

*Jeē ndíso jniñu Cristo siquī iin contrato jeé*

## 8

1 Núu súcuan te jñuhun cánuú gá jeē jé ni cahān rī cúu yāhá: Névéha yó iin sutū kujéñnu nájñuhun ni cahān rī, te ndéé yá lado váha mesa nuū ndácu jniñu máá Yaā kujéñnu nde andiví. 2 Te vijna te cúu ya sutū nde andiví, jeē cúu ndije lugar iī jeē ni sáha máá Jítoho yō Yaā Dios, nasūu ñayuu. Chi tu cáa nájñuhun vehe iī jenahán jeē ní casáha ñayuu. 3 Te táca sūtū kujéñnu ni jeconaa de jeē socó de ndajniñu jíin quití nuū Yaā Dios. Núu súcuan te Jesucristo suni ni jini ñuhún jeē socó yá jeē



cúu ya sutū. <sup>4</sup> Te núu ní iyo ga yā ini ñayiví, te ni ma quiñáhan jeē cúu ya sutū jíin táca gá sutū, chí níni cásocō gā de quiti nájnūhun cáhán ley Moisés. <sup>5</sup> Te jniñu cásáha de, tu quiñáhan jíin jéé iyó andiví. Chí cúu ñn muestra-ni jeē steén siquī andiví. Te cúu nájnūhun jeē ní cáhān Yaā Dios jíin Moisés quiiví ní quejéé de sáha de vehe ñi jenahán: Coto vāha ró jéé sáha ró táca ndajniñu nájnūhun jíto jeē ní steén rī nuū rō nde xinī yúcu, áchí Yaā Dios jíin de. <sup>6</sup> Te vijna te sáha Cristo jniñu jénu ndasí gá vésú jeē casáha táca sūtú ún, chí ndiso jniñu ya siquī contrato jeé jéé yóhoyo vāha ga, chí ndiso jnūhun jénu ga jeē ní jéjnūhun Yaā Dios.

<sup>7</sup> Chí contrato ley xihna ñúhún, núu jeē ní sáha jeé queé vāha jniñu núu, te tuá cánúú jéé cóo contrato uū. <sup>8</sup> Chí ñayuu jenahán un jéé tu ní cáquendōo ndaā, suhva ní cahān Yaā Dios jíin i, áchí tutu:

Quiji quiiví jeé nasáha ri ñn contrato jeé

jíin ñáyuu Israel jíin ñáyuu Judá, áchí Jítoho yō Yaā Dios.

<sup>9</sup> Te ma cóo nájnūhun contrato jeē ní sáha ri jíin jíi i jenahán, quiiví jeé ní jnñ ri ndaha de jíjnáhan de,

te ni quenehen ri de ini nación Egipto.

Chí tu ní cásquícú vāha de jíin contrato ley rī.

Jeé yúcuán tuá ní táñúhún rí de, áchí Yaā Dios.

<sup>10</sup> Núu súcuán te suhva cóo contrato jeé nasáha ri jíin ñáyuu Israel,

nde na quiji quiiví yúcuán, áchí Jítoho yō Yaā Dios:

Sáha ri jeé jécūhun ley rī nuū jeé níjnūní i,

te suni ini anuá i tee ri jnūhun ley rī.

Te cuu ri Yaā Dios maá i, te maá i cuu ñayuu maá rí.

<sup>11</sup> Te tuá jíni ñúhún steén i nuū jnáhan i nuū ñáni i, návāha cuni i ndese Yaā cúu Jítoho i.

Chí ndihi i cuni ndese Yaā cúu ri, nde ñayuu núu ga jíin ndé ñayuu cujénu ga.

<sup>12</sup> Chí cone cáhnu ni rī nuū i jeé ní casáha i jniñu néé, te ni ma núcūhun ga ní rī cuēchi ní casáha i.

Achí Yaā Dios. <sup>13</sup> Te jeé ní cáhān yā jeé cuáha ya ñn contrato jeé cúu jeé ní cachí yā jeé tuá cuajniñu contrato xihna ñúhún. Te ñn jeé ní cutúhú jéé tuá jejniñu, chí jíni yō jeé je yajni naa.

*Vehe ñi ñayiví yáha ní steén ndese cáca andiví*

## 9

<sup>1</sup> Te ndaā chí contrato xihna ñúhún ní ndacu jniñu ndese chíñúhún i ya, jíin ndese coo ñn vehe ñi ini ñayiví yáha. <sup>2</sup> Te ni cuvāha vehe ñi ún, te ni iyo uū cuarto. Te cuarto xihna ñúhún jéé naní cuarto ñi, ní ñn candelero oro jíin mesa oro jíin pan ñi. <sup>3</sup> Te ní iyo sahma jeé ndíta caa jeé ndihyú inga cuarto jeé naní cuarto ñi ndasí gá.

<sup>4</sup> Te ini un ní iyo ñn altar oro nuū cayú sūje cútú, jíin yéjnū jeé ñúhún contrato ley, te máni oro cúu ní síquī jejnú. Te ini jejnū un íne ñn tijehēn oro jeé ñúhún maná jeé ní cuun andiví. Te suni íne vara Aarón jeé ní nane numa, jíin tabla yuū jeé yosó jnūhun contrato ley. <sup>5</sup> Te siquī jejnú un ní cahīn ndindúú figura ndajéhé querubín jeé steén jeé íne Yaā Dios. Te ní sáha cuandahū siquī tapa jejnū nuū ní cóso yuyú níñi jeé ndáhva cuēchi. Te tu núne yó cáhān gā yō siquī táca yúcuán vijna.

<sup>6</sup> Te ná ní jīnu tēcá un, te núu-ni núu-ni quiivícoo sutū ini cuarto xihna ñúhún jéé casáha de jniñu jeé cúu de sutū. <sup>7</sup> Te ini cuarto uū, chí tu cúu quiivícoo na-ni sutū jíin inga ñayuu, chí máñúhún-ni

sutū cujéhnū ga cúu jeē quívi, te suni ñn-ni vuelta jeē cuiyá. Te suni ma cúu quívi de núu tú ñíñi quití jeē sócō de nuū Yaā Dios jeē siquī cuéchi máá de jín síquī cuéchi ñayuu. <sup>8</sup> Te jín yúcuan stéén Espíritu Santo nuū yō jeē ná ni Iyo ga cuarto ñ xihna ñúhún ini ñayívi, te tu ní núne ichi jeē quívi ñayuu ini lugar ñ ndasí jeē cúu andiví. <sup>9</sup> Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajníñu jín quití nuū Yaā Dios, chi tu ní cúu cuití sáha jeē quéndōo ndoo ánuá ñayuu ní casocō ún. <sup>10</sup> Chi tācá un ní steén máni siquī yiqui cúñu yō, ndese caji yō, ndese cohō yó, ndese ndundoo yó. Te ni jejníñu máá-ni nde ni quiji Cristo jín ñn modo vāha ga.

<sup>11</sup> Chi vijna je ni quiji Cristo, te cúu ya sutū cujéhnū ga jeē ndíso jníñu ya siquī tāca jéé váha jeē ní quiji vijna. Te cúu ya sutū ini lugar ñ nde andiví jéé cujéhnū ga te vāha ga vésú cuarto ñ jenhán. Te nasūu jéé ní casáha ñayuu cúu, chi nasūu cuenta ñayívi yáha cúu. <sup>12</sup> Te jeē ni quívi ya ini lugar ñ ndasí gá nde andiví, te nasūu jín ñíñi ndixúhú ni ñíñi becerro, chi jín ñíñi maá yá ni quívi ya, ni socō yā ñn jínu-ni jeē ní cání. Te súcuan ni jnama ya yohó jéé cótecu yō ní cání. <sup>13</sup> Chi nde jenhán te ñíñi stíquī jín ñíñi ndixúhú jín yáa becerro jeē ni cáyū nuū altar, ni cacosō yuyú de siquī ñayuu jeē tu íyó ndoo ánuá i, te súcuan ni ndundoo i nuū yā. <sup>14</sup> Te núu ni ñíñi jníñu ñíñi tācá quití ún, te nagā ni cuu ñíñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē íyó ní cání. Te ñíñi yā nácate ánuá yō nuū jníñu néé jéé cúu yō sáha. Te súcuan te cuu cuajníñu yó núu Yaā Dios, Yaā técu.

<sup>15</sup> Jeē yúcuan cúu jeē ndíso jníñu ya siquī ñn contrato jeé. Chi ni jihí yā, te súcuan ni quende yā cuéchi

ni casáha ñayuu ná ni Iyo i chíji contrato xihna ñúhún. Te ñayuu jeē cána Yaā Dios i quáivico i ndaha ya, ñíñi i tahū i jeē cóo ní cání, ñájñuhun ni jejnúhun ya. <sup>16</sup> Chi cúu ñájñuhun núu sáha ñn tēe acta jeē cahán siquī tahū, te nde na cúu de te ñíñi jníñu. <sup>17</sup> Chi núu técu gā tēe ni sáha, te tu ñíñi jníñu. Te nde núu ni jihí de, te sáa te jéjníñu. <sup>18</sup> Te suni súcuan contrato xihna ñúhún, suni ni jini ñúhún cucutú jín ñíñi quití ní jihí. Te contrato jeé chi ni cucutú jín ñíñi Cristo jeē ni jihí yā. <sup>19</sup> Chi ná ni cuu ni cachi Moisés tācá jníñu ndácu contrato ley un núu ndivii ñayuu, te ni quihín de ñíñi becerro jín ñíñi ndixúhú jín ndute, te jín íxi cácuéhé jín yúcū hisopo ni cosō yuyú de siquī libro ley jín síquī ndivii ñayuu. <sup>20</sup> Te ni cahán de: Yáha cúu ñíñi jeé cucutú contrato ley jeé ní sáha Yaā Dios jín yó, achí de. <sup>21</sup> Te suni ñíñi un ní cosō yuyú de nde maá vehe ñ jín tāca ndajníñu ni cajejníñu de jeé cáchiñúhún de ya. <sup>22</sup> Te je yajni ndihí ndajníñu, chi cahán ley un jeé jini ñúhún ndundoo jín ñíñi. Te núu ma cáti ñíñi te ma cóne cáhnu ni yā nuū cuéchi núu.

*Jeē ni sócō Cristo maá yá jeē quéndeyā cuéchi*

<sup>23</sup> Núu súcuan te tācá ndajníñu un jéé cácuu muestra tāca jéé íyó andiví, ni jini ñúhún ndundoo jín ñíñi quití. Te tāca máá jéé íyó andiví, chi ni jini ñúhún ndundoo jín ñíñi Cristo jeé yóhyo vāha ga. <sup>24</sup> Te Cristo chi tu ní quívi ya ini lugar ñ jeē ní casáha ñayuu, chi ñn muestra-ni ni cuu un jéé steén ndese íyó lugar ñ ndije nde andiví. Chi máá andiví ní quívi ya, te vijna íne ya nuū Yaā Dios jeé cahán yā jehé yō. <sup>25</sup> Te máá sūtū cujéhnū ga quívi de tāca cuiyā ini cuarto ñ gā jeé sócō de ñíñi quití. Te Cristo tu ní sócō yā maá yá cuéhé jínu, chi ñn jínu-ni. <sup>26</sup> Chi núu jeé súcuan te

cánuú jéē cuehē jínu ndoho ya nde ná ni jecōo ñayiví te nde vijna núú. Te tuú chi sa tiempo cuándihi yáhá ni quenda ndijin yā ñn jínu-ni jeē ní cáni, ni socó yā maá yá jeē ní quende yā cuēchi. <sup>27</sup> Te nájnūhun ni cundaā jeē cúū tāca ñáyuu ñn jínu-ni, yūcuán na te sándaā Yaā Dios jniñu i, <sup>28</sup> suni súcuan Cristo ni jihī yā ñn jínu-ni jeē ní sócō yā maá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jéē socó tucu ya maá yá jeē quēnde yā cuēchi, chi sa suhva jeē jnáma ya ñayuu jeē cándetu i jeē ndiji ya.

## 10

<sup>1</sup> Chi ley Moisés ni cuu ñn mues-tra-ni tāca jéē váha jeē ní quiiji jíin Cristo, ñn jeē steén-ni ndese coo máá jéē váha. Jeē yúcuan tu cúu cuiti sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quiti nuū cuiyá nuū cuiyá. <sup>2</sup> Chi núu ní cúu sáha ley un jéē quéndōo ndaā i, te jecuiñí jeē cásocō i quiti núú. Chi núu ní cúu, te ñn jínu-ni te je ní quéndōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. <sup>3</sup> Te tuú chi jeē cásocō i quiti ún tāca cuiyá, sa sáha jeē núcūhun ni i cuēchi i. <sup>4</sup> Chi niñí stíquī jíin níñí ndixúhú, ma cúu cuiti quende cuēchi.

<sup>5</sup> Jeē yúcuan ná ni quiiji Cristo ini ñayiví, te ni cahān yā jíin Yaā Dios: Jeē jéhni i quiti jíin jéē jéhe i ofrenda nuú ní, chi tu ní núnahan ni ní.

Te ni sátūhva ní yiqui cúñu maá ná jeē socó na.

<sup>6</sup> Te tu ní cúsi ni ni jéē jéhmú i quiti te sócō i ti jeē ndúndoo cuēchi i núú.

<sup>7</sup> Yūcuán na te ni cahān ná: Yāha véji ná jéē squícu ná jniñu jeē núnahan ni ní, Tátā Yaā Dios. Chi súcuan je yósó jnúhun na núu tútu.

Achí Jesús. <sup>8</sup> Xihna gā ni cahān yā jeē tu ní núnahan ni Yaā Dios te tu ní cúsi ni yā jeē jéhni i quiti te jéhe i ofrenda, jíin jéē jéhmú i ti te sócō i ti jeē ndúndoo cuēchi i núú, nájnūhun ndácu ley jenahán jniñu. <sup>9</sup> Te ni cahān gā yā: Yāha véji ná jéē squícu ná jniñu jeē núnahan ni ní, Tátā Yaā Dios. Te jeē ni cahān yā súcuan, te ni sáha ya jeē jecuiñí jeē cásocō i quiti, chi ni socó yā maá yá. <sup>10</sup> Te ni sáha Yaā Dios jeē iyó ndoo íyó íi yō nuū yā siquī jeē ni sáha Jesucristo jeē núnahan ni Yaā Dios, suu jeē ni sócō yā yiqui cúñu yā ñn jínu-ni jeē ní cáni.

<sup>11</sup> Te tāca sūtū ún ndiquiví ni cahíin de ni cajejníñu de nuū yā, te cuehē jínu cájehni de suu quiti jeē socó socó de. Te tācá un chi ma cúu cuiti quende cuēchi. <sup>12</sup> Te Cristo chi ñn jínu-ni jeē ní cáni ni socó yā maá yá jeē siquí cuēchi yó. Te sáá te ni cucōo ya lado váha Yaā Dios nuū cujéhmú ya. <sup>13</sup> Te yūcuán ndétu ya vijna nde quiiji quiví jeē quēnde yā poder tāca jéē jito uhū nuū yā. <sup>14</sup> Chi jeē ni sócō yā maá yá ñn jínu-ni, te ni sáha ya jeē ní cáni quéndōo ndaā ñayuu ni sándoo ya. <sup>15</sup> Te máá Espíritu Santo suni cájí cáhán yā siquī jnúhun yáha, chi xihna gā cahán yā:

<sup>16</sup> Suhva coo contrato jeē nasáha ri jíin i,

nde na quíji quiví yúcuan, áchí Jítho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūní i tee ri jnúhun ley rī.

<sup>17</sup> Yūcuán na te cáhán gā yā:

Ma núcūhun cuiti gā ni rī tāca cuéchi jíin jniñu néé ní casáha i.

Achí yá. <sup>18</sup> Núu súcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

*Jeē ní nune ichi quiví yó núu Yaā Dios*

19 Jeē yúcuan hermano, ma ñin jeē cáni ni yō, chi cuu quiví yó lugar iī ndasí ndé nuū iyó Yaā Dios, siquī jeē ní jeti niñi Jesucristo. 20 Chi ni nune ya ñin ichi jée jée cótecu yō nií cáni sáha ya. Chi ná ni jihī yā te ni tahndē sahma ndíta caa jeē ndihyú lugar iī ndasí gá ini vehe iī. Te súcuan ni steén Yaā Dios jeē núne quiví yó lugar iī ndasí gá nuū iyó yá. 21 Te Jesús cúu sutú cujéhu ndasí jeē ndíto yóhó ñáyuu cácuu sēhe Yaā Dios. 22 Núu súcuan te na quívicoo yó núu Yaā Dios, te na cóo ndije ndaā anuá yō, te na cándije niñin yó jée iyó ndáa ndihi jñūhun ya. Chi jín niñi Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jín ndute. 23 Te na cuiñi niñin yó jín jñūhun jeē cácahān yō jeē ñūhun ni yō jeē sáha ya jeē váha jín yó. Te ma cáca yátá yó, chi váha squícu máa Yaā Dios jeē ni jéjnūhun ya nuū yō. 24 Te na nácani ni yō ndese stíhví jñáhan ni yō jeē cundáhú gá ni yō jñáhan yó, jín jée sáha yó jñiñu váha. 25 Te níni na ndútútu yó chiñúhún yó yā, te ma cúhuun ni yō nájnūhun cásáha sava i, chi sa víhyá gā na stíhví jñáhan ni yō, chi je cájini yō jeē cuácuyajni quiví ndíji ya.

26 Te núu je ni jecūhun ni yō te ni jetáhú yó jñūhun ndaā, te núu máni sáha sáha-ni yó cuéchi, núu súcuan te tuá na inga iyó jée cúu siquī cuéchi yó. 27 Chi sa quéndōo máni ga jñūhun xeēn siquī yō jeē quiji quiví juicio te quiji yáñuhūn xeēn jeē cayū ñayuu jeē cájito uhū i ya. 28 Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jñūhun cundáhú ni iyó. 29 Te nagā ni cuu jeē ma ndóho xeēn gā ñayuu jeē squéhichī i máa Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjñiñu niñi yā jeē ní jeti siquī contrato jeē

ndúndoo i nuū yā nuū. Te súcuan sáha ndevāha i nuū maá Espiritu Yaā Dios jeē sáha jeē váha yóhó. 30 Chi je jíní yō jeē ni cáhān maá yá: Máa rí sáha jeē ndutahū i siquī cuéchi i, máa rí cuāha castigo i, áchí Jítoho yō. Te suni cáhān: Máa Jítoho yō sándaā yā siquī cuéchi ñayuu yā. 31 Núu súcuan te xeēn ndasí cúu jeē quiví ñayuu ini ndaha Yaā Dios, Yaā técu, jeē ndútahū i siquī cuéchi i.

32 Te na núcūhun ni rō ndese ni cuu ichi yátá, nde náa sá ní quejée rō caca rō jín luz yā, te ni cajendeyí ni rō ni candoho rō tjini jñúndóho xeēn. 33 Chi sava rō ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe rō jñūhun cuiñi rō jín ñáyuu ni candoho súcuan. 34 Chi ni cacundáhú ni rō ñayuu ní cahīn vecāa jeē siquī yā, te ni cacusiñi ni rō vésú ni caquende ñayuu ndajniñu rō. Chi ni casáha rō cuenta jeē ndé andiví cánevāha rō ñin tahū jeē váha ndasí gá jeē coo ní cáni. 35 Núu súcuan te ma siaā rō jñūhun jeē ní candije ndije rō jée váha ni yā, chi cuehē ndasí táhú niñin rō siquī ún. 36 Chi cánuú jée cuándeyí ni rō návāha sáha rō jée núnjahan ni Yaā Dios, te niñin rō jeē ni jéjnūhun ya. 37 Chi cáhān tutu iī: ñin núnú-ni te ndee Yaā ndiji, te ma cucuée yá.

38 Te ñayuu jeē ní ndahva rī cuéchi i, cotecu i jeē candíje i jeē sáha rī jehē i.

Te núu na cáca yátá i, te ma cúsiñi ni rī jín i.

Achí Yaā Dios. 39 Te yóhó tu cácuu yó jñáhan ñayuu cájica yátá jeē jñahnú ndetū i. Chi sa cácandíje yó jée niñin tahū yō cotecu anuá yō.

*Siquī jñūhun cándíje*

## 11

1 Te jeē candíje yó, suu cúu jeē cúndaā ndije ni yō jeē niñin yō tāca jée ñūhun ni yō, jín jée jíní váha yó jée iyó ndije tāca jée tu cájito yó núu vijna. 2 Te ñayuu jenahán chi

ni jejnúhún yá i siquī jeē súcuan ni cacandíje nihin i.

<sup>3</sup> Siquī jeē candíje yó cúu jeē jécūhun ni yō jeē ní sáha Yaā Dios ñayiví jíin jnúhun ni cahān-ni ya. Te jíin poder Yaā Dios jeē tu jíto yó núū, ni jecōo tāca jéē jíto yó núū.

<sup>4</sup> Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndáa de, chi ni jetáhú yá jeē ní sócō de quití nuū yā. Te vésú ni jihí de, te cáhán gā ejemplo de jíin yó nde vijna, chi ni candíje ndaā de.

<sup>5</sup> Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihín ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jíin tāca jéē ni sáha de. <sup>6</sup> Te núu tu cándíje yó jéē sáha ya jehē yō, te tú na modo cusī ni Yaā Dios jíin yó. Chi ñayuu jeē cuní quivícoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

<sup>7</sup> Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnúndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cácu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

<sup>8</sup> Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñin lugar nuū cuáha ya cuu tahū de. Te ni quenda de cuahān de, vésú tu jíin de ndé nuū quihín de. <sup>9</sup> Ni candíje de jeē sáha ya jehē de, te jeē yúcuan ní condee tatú de nuū ñúhun jeē ní jéjnūhun ya jeē cuáha ya nuū de.

Te ni condee de vehe ñin, te suni súcuan Isaac jíin Jacob, chí sēhe de ún suni inuú nihin tahū i jíin de jeē ní jéjnūhun ya. <sup>10</sup> Chi ni ñuhun ní de condee de máá ñuu andiví jéē iyó cutú cimientó, te máá Yaā Dios ní jequin yā ni sama ya ñuu ún.

<sup>11</sup> Te suni ni candíje máá Sara jeē sáha ya jehē ña, te jeē yúcuan ní nihín ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu ñin sēhe yí ña, chí ni candíje ña jeē squícu Yaā Dios jeē ní jéjnūhun ya. <sup>12</sup> Te súcuan ni cuu jeē ní táhū cuehē ñayuu ni sáha ñin-ni Abraham, vésú je jéhnu ndasí de. Te yucūn de ni nducuehē ndasí, nájnūhun quimí andiví, jíin ñítí yumar, jeē ma cúu cuití cahu yó.

<sup>13</sup> Te tāca tée cándíje un, ní cajihí de. Te vésú tu ní cájito de jeē ní jéjnūhun ya, te ni cajini váha de jeē cóo, te ni cacusī ni de jeē cóto de inga tiempo. Te súcuan ni cacahān de jeē ñayuu ñuu jicá ñayuu tatú cácuu de ini ñayiví yáha. <sup>14</sup> Te tāca tée jeē cahán súcuan, chí stéén cají de jeē nducú de ñin ñuu jeē cúu andiví núū cúu ñuu maá de. <sup>15</sup> Chi núu jeē cánacani ní de siquī ñúū nuū ní quendacoo de, te iyó modo jeē nándicó cóo de te núu jeē cácuu de núu. <sup>16</sup> Te tuú chí ni cacuu ndasí ní de coyúcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíinánhan de, chí je ní sátūhva ya ñin ñuu nuū cóyúcú de.

<sup>17</sup> Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhún ni i nuū de, vésú ni nihín de jnúhun jeē ní jéjnūhun ya suhva siquī i: <sup>18</sup> Isaac cúu tēe jeē squejéé rí yucūn rō quihín, achí jnúhun ni jejnūhun ya. <sup>19</sup> Te ní sáha de cuenta jeē cúu nastécu Yaā Dios i. Te nájnūhun súcuan ni cuu, chí cuu cahān yō jeē

nájñuhun ni jihí i te ni natecu i nuū de, chi ni jesi-ni ya jeē ma cáhni de i.

<sup>20</sup> Ni candíje Isaac jeē sáha ya jehē de, te jeē yúcuán ní cahān de jeē vāha tahū nihīn sēhe de Jacob jíin Esaú tiempo quiji. <sup>21</sup> Te suni súcuán ni candíje Jacob, te jeē yúcuán, náa je yajni cuu de te ni cahān de jeē vāha tahū nihīn ndindúú séhe yí José. Te yítuu de vara de, ni chiñúhún de Yaā Dios. <sup>22</sup> Te suni súcuán ni candíje José, te jeē yúcuán, náa cuacuyajni cuu de, te ni cahān de jeē táca yúcuán Israel, iin quiví quendacoo i nación Egipto. Te ni ndacu de jniñu jeē chindúji i yiqui de ñuu nuū quívicoo i.

<sup>23</sup> Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuán ní cacondito sáhi de i uní yoō. Chi ni cajito de jeē lúu cáa i, te tu ní cáyühú de siquí acta jeē ni sáha rey jeē na cúu táca súchi yí. <sup>24</sup> Te suni súcuán ni candíje Moisés, te jeē yúcuán ná ni jehnu de te tuá ni jéhe de jñuhun cuu de séhe ñahan cúu séhe sáhi rey Egipto. <sup>25</sup> Chi sa ni cuu ni de ndoho de jíin táca jnáhan de ñayuu Yaā Dios, nasūu jéé cusíi ni de jecu-ni tiempo jíin cuéchi. <sup>26</sup> Chi ni sáha de cuenta jeē núu cahān neé ñayuu siquí de jeē siquí Cristo, te yúcuán sáha jeē cucá ndasí gá de ndihi jeē ndíso jñuhun Yaā Dios, vésú jeē nihín de ndihi ndajniñu cucá iyó nación Egipto. Chi ni ñuhun ni de jeē cuáha ya tahū de. <sup>27</sup> Te jeē súcuán ni candíje de, jeē yúcuán ní quenda de nación Egipto cuahān de. Te tu ní yúhú de jeē quití ni rey nuū de. Chi ni iin nihin de siquí jniñu sáha de, chi ni sáha de cuenta jeē je jito de nuū Yaā jeē tu cúu coto yó nuū vijna.

<sup>28</sup> Te jeē súcuán ni candíje de, te jeē yúcuán ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñí tī yehyí i, návāha núu na quíji ndajéhe jeē cáhni yā táca séhe nuū ñayuu Egipto,

te ma cáhni yā séhe nuū ñayuu Israel. <sup>29</sup> Te siquí jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuán ni cacuni tēe Egipto yāha de núú, te ni nandihyū-ni ndute siquí de ni cajihí de.

<sup>30</sup> Ni cacandíje soldado jeē sáha ya jehē de, te jeē yúcuán ní cotúú jeē ní condúu ndihyú ñuu Jericó, ná ni cajicó ndúu de uxā quiví. <sup>31</sup> Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhan ña tēe Israel jeē ní quijicoo ni condéhe yuhu ndese iyó ñuu ña. Te jeē yúcuán tu ní jihí ña jíin ñayuu nihni ni ñuu ña ún.

<sup>32</sup> ¿Te ndé jñuhun ga cahān rī núu súcuán? Chi tuá na tiempo jeē nácani ga rī jñuhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jñuhun ya nde jenahán. <sup>33</sup> Ni cacandíje de jeē sáha ya jehē de jíinahan de, te jeē yúcuán ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñáhan yá de nájñuhun ni jejnñuhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. <sup>34</sup> Te sava de tu ní cáyú de sáha ñuhūn jeē cayú xeēn. Te sava de ni cácu de jeē tu ní jihí de jíin espada. Te sava de ni nanihīn ni de náa tuá fuerza de núú, te ndacu teyí ní iyo de nuū guerra, te ni cacundeyí de siquí soldado táca ñuu jicá jéé jito uhū ún de. <sup>35</sup> Te sava ñahan ni natecu séhe ña jeē ni jihí i.

Te sava ga ñayuu chi sa suhva ni candoho xeēn i nde ni cajihí i. Te tu ní cájehe i jñuhun jeē siaá i jñuhun ya te cácu i, chi ni catee ni i jeē natecu i coyūcu vāha ga i andiví. <sup>36</sup> Te sava ga i ni casácatā ñayuu nuū i, te ni cacani ñayuu i, te nde ni caconuhni cadena i ni cahīn i vecāa. <sup>37</sup> Te ni cajéhe yuū xiní i, te ni cajehnde i jíin sierra, te ni cajito

ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñii lánchi máá ñii ndíxúhú ní cañuhun i. Ni candoho ndáhú i, ni cajito i jnúndóho, ni castóho ñayuu i. <sup>38</sup> Váha ndasí ñáyuu ni cacuu i jeē tú cuiti ñayuu ñayívi súcuan, te vésú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahiin i yaū cava jíin yaū ñuhun. <sup>39</sup> Te táca ñáyuu yáha, vésú ni jejnúhún yá i jeē ní cacandíje nihin i jeē sáha ya jehē i, te tu ní cájito i nuū jeē ni jejnúhún ya. <sup>40</sup> Chi ni sátúhva Yaā Dios ñin jniñu váha ga, te suu cúu jeē sáha Cristo jíin yó, náváha ñin cáhnu-ni nihin yó tahū yó jíin i, te jeē yúcuan cúu jeē ná tu nihin i ndihi tahū i.

*Jeē na cócunuū yó nuū máá ñin-ni Jesús*

## 12

<sup>1</sup> Te íyó cuéhē ndasí ñáyuu un jéē ní cacandíje nihin i jeē sáha ya jehē i, te nájnūhun ni jicó ndūū i yóhó, cástéén gā i nuū yó nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnéñu jíin cuéchi jeē ni cáan yó jíin. Te na cuándeyí ni yó cunu yó jíin carrera jeē ni jéhe ya jeē cunu yó. <sup>2</sup> Te na cócunuū váha yó Jesús, Yaā jeē ni scándíje yóhó te sáha ya jeē íje váha yó jíin jnúhun ya nde jñu íje yó. Chi máá yá ni jendeyí ni yā ni ndoho ya jicā cruz. Te vésú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusñ ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

<sup>3</sup> Te na nácani ni rō ndese ni jendeyí ni yā ni ndoho ya jeē ni sáha ndeváha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. <sup>4</sup> Chi ni ná tu ndoho ró jéē ndé cuu rō jeē cánducú ndéyí ró snáá rō cuéchi. <sup>5</sup> Te sanaa te je ni canaa ni rō jnúhun cáhán

tutu i, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yó rohó,

te ni ma ndínuu ni rō núu cáhán yā nuū rō.

<sup>6</sup> Chi Jitoho yó snahnú yā ñayuu jeē maní yā jíin,

te jéhe ya castigo táca jéē náquihin ya cuu séhe ya.

Achí tutu. <sup>7</sup> Núu súcuan te na cuándeyí ni rō jeē snahnú Yaā Dios rohó, chi sáha ya jíin ró nájnūhun sáha tátá jíin séhe. Chi tú na séhe íyó jéē tu snahnú tátá i. <sup>8</sup> Te núu ma snahnú yā rohó, nájnūhun ndóho táca séhe, núu súcuan te nájnūhun séhe ndáhú cácuu ró, nastū séhe ndije ya. <sup>9</sup> Te tátá yó ñayívi yáha, suni ni snahnú de yóhó, te ni íyo yíñúhún yó jíin de. Te nagā ni cuu jeē ma cuándetū yó nuū máá Tátá yó andiví jeē snahnú yā yohó, te cotecu yó ní cáni. <sup>10</sup> Te ndaā chi máá de ni casnáhnú de yóhó jecu-ni quiví, ndese ni cuu ni máá de. Te máá yá chi snahnú yā yohó ñin modo jeē quendōo váha ga yó, náváha coo ndoo yó nájnūhun íyo ndoo máá yá. <sup>11</sup> Te ndaā chi tu cácusñ ni yó máá hora jeē ndóho yó castigo, chi sa cúcuíhyá ni yó. Te cúcuéé gá te cuni yó jeē ní quendōo ndaā yó te coo ndeyí sñ ni yó jeē ni snahnú yā yohó.

*Siquí ñáyuu jeē casquéhichí i jnúhun cáhán Yaā Dios*

<sup>12</sup> Núu súcuan te ma cóo ró nájnūhun tēe ni cuíta íi ndaha te quísi i xiní yití, chi sa ndacuí na sáha ró máá ró nuū jnúndóho.

<sup>13</sup> Te sáha ró ichi ndóo caca ndaā rō, náváha nduváha róhó jéē tu fuerza ini, jeē cácuu ró nájnūhun tēe chácuá jeē tu cúu caca váha.

<sup>14</sup> Te na cóndihví ni rō jeē condee maní rō jíin táca ñáyuu, jíin jéē cóo ndoo coo íi rō nuū yā. Chi ma cúu coto ni ñin ñayuu nuū máá Jitoho yó te núu tu íyó ndoo i. <sup>15</sup> Te coto

má cáca yátá ni ñn ró te scuíta ró jnúhun jeē sáha Yaā Dios jeē váha róló, náváha tú cuu ró nájñuhun ñn yucu uvuá jeē stívi te sáha dañó jín cuéhē ñayuu. <sup>16</sup> Te ni ñn ró ma cáca jnéni. Te ni ma cóo jéē ni rō nuū Yaā Dios, nájñuhun ni ñyo Esaú. Chi máá ñn cohō ndeyu ni jicān de nuū ñáni de, ni sama de jín derecho de jeē cúu de sūchi núú, te súcuan ni xícó de derecho de. <sup>17</sup> Te cájini rō jeē cucuéé gá te ni cuni de jeē na cáhán tatá de jeē váha tahū nihñ de, te tu ní cúu, chi tuá ni táñuhún Yaā Dios de. Chi tu ní nihñ jñiñu jeē ní nacani ni de, vésú ni nducú ndeyí de te nde ndahyú de.

<sup>18</sup> Te róló jijnáhan ró tu ní quíjicoo ró núú ñyo cúu, nájñuhun ñyo ni cuu máá yucu nuū ni jéhe ya ley yā nuū ñayuu Israel. Chi ni cane yáñuhún yucu Sinái, te nee lúchi jnúú jító, te quée tachí xeén. <sup>19</sup> Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jín i. <sup>20</sup> Chi tu ní cúndeyí i jín jnúhun jeē ní ndacu ya jñiñu nuū i, chi ni cahān yā: Vésú ñn quiti-ni núu quívi ti yucu yáha, jini ññuhún cuu ti jín yūú chí jín lanza, achí yá. <sup>21</sup> Te síquí jeē ñyo ndasí cúu jeē cájito i ún, te ni cahān Moisés: Quísi i ruhú jeē yuhú rí, achí de.

<sup>22</sup> Te vijna róló jéē cácandíje, tu ní quíjicoo ró núu yúcu yúcuan. Chi sa suhva nuū maá yucu Sion jín núu maá ñnu Yaā Dios, Yaā técu, ni quívicoo ró. Te ñnu un cúu Jerusalén jeē iyó andiví, nuū cáhíyo tútú cuéhē ndasí mil ndajéhé cáchiñuhún Yaā Dios. <sup>23</sup> Te ni quívicoo ró núu cáyūcu tútú ñayuu cácandíje jeē cácuu sēhe Yaā Dios, jeē iyó lista i andiví. Te ni quívicoo ró núu Yaā Dios, Yaā sándaā jñiñu ndihí ñayuu, jín núu cáhíyo ánuá ñayuu váha jeē jé ni squéndōo ndaā yā i. <sup>24</sup> Te suni nuū maá Jesús, Yaā ndíso jñiñu síquí contrato jeé ní

quívicoo ró. Te yahu ndasí gá jñiñu sáha ññi yā jeē ni jéti jeē ndáhva cuéchi yó, nasūu ññi Abel jeē ni jicān cuéchi.

<sup>25</sup> Núu súcuan te coto má squéhichí rō jnúhun jeē cahán yā jín ró jijnáhan ró. Chi ñayuu jeē tu ní cájetáhú ná ni cahān yā jín i ñayiví yáha, tu ní cácau i. Te xeén gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan. <sup>26</sup> Te nde saá ní quísi i ñayiví jéē ni cahān yā. Te vijna chi cáhán yā: ñn na jínu quísi rí ñayiví, te nasūu máá-ni ñayiví, chi suni táca jéē ñn andiví, achí yá. <sup>27</sup> Te jnúhun yáha jéē cahán, ñn na jínu, chi cúní cahān jeē téjiyo ya táca jéē tu iyó cutú, suu jeē ní cuvāha, náváha na quéndōo jeē cóo cutú ní cáni. <sup>28</sup> Núu súcuan te cuāha Yaā Dios ñn ñnu nuū yó jeē cóo cutú ní cáni. Te jeē yúcuan, na nácuatáhú yó nuū yā, te na chíñuhún yó yā, te na cóo yíñuhún yó, náváha cusí ni yā jín yó. <sup>29</sup> Chi Yaā Dios maá yó cúu nájñuhun ñn ññuhún jeē snáā ndihí jeē neé.

*Ndese sáha yó te cusí ni Yaā Dios*

## 13

<sup>1</sup> Ma jécuiñí rō jijnáhan ró jéē cundáhú ni rō hermano rō cácandíje. <sup>2</sup> Conahán ró jeē cánuú cuáha núu ró vehe nuū ñayuu cájica. Chi iyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

<sup>3</sup> Te conahán ró chindéé ñáhán ró ñayuu cáhñin vecāa, chí sáha ró cuenta jeē nájñuhun cáhñin cáhnu ró jín i vecāa. Te suni nacani ni rō jehē jñáhan ró jéē cándoho i sáha ñayuu, chí núu súcuan coo jín máá ró te suni ndoho ró.

<sup>4</sup> Coó yíñuhún ró síquí jnúhun quíjñáhan ñayuu, te ma cosíquí ndéē jñáhan ró. Chi máá Yaā Dios sándaā yā cuéchi ñayuu tjini ni jín ñayuu casíquí ndéē jñáhan.



<sup>5</sup> Te ma ndíyo ni rō xūhún, chi na cóo sī ni rō jíin jēe cánevāha ró. Chi máa yá ni cahān: Ma siaá cuiti rī rohó, ni ma stóo cuiti rī rohó, áchí yá. <sup>6</sup> Núu súcuan te ma ĩn jēe cáni ni yō, chi cuu cahān yō:

Máa Jítoho rī chindéé ñáhán yá ruhū,

te ma yūhu rí núu na vé cuní ñayuu sáha i jíin rí.

Achi yō.

<sup>7</sup> Te na núcūhun ni rō táca pastor rō, jēe ní castéén de jnūhun Yaā Dios nuū rō. Te sáha vāha ro cuenta ndese ni nihīn jniñu jēe ní casáha de, te na ndácu ró de jēe ní candíje de jēe sáha ya jehē de.

<sup>8</sup> Te Jesucristo chi ĩn-ni cáa ya ichi yátá jíin vijna jíin ní cáni. <sup>9</sup> Núu súcuan te ma cuāha ró jnūhun candíje ró táca jnūhun jēe sūn cáhán jēe tu quíjnáhan jíin jnūhun máa yá. Chi íyó váha jēe na íje ánuá yō sáha jnūhun jēe váha ni yā jíin yó. Te tu jíni ñúhún yó jnūhun jēe tajnúni siquī jēe yéji yō, chi tu níhín jniñu cuiti jíin ñayuu cáhīn jíin.

<sup>10</sup> Te máa yó chi cánevāha yó ĩn jēe ni sócō máa jehē yō, cúu Cristo. Te táca sūtū jēe cásocō gā de modo jēe cahán ley jenahán, tú na vé nihín de nuū yā jēe ni sócō yā máa yá. <sup>11</sup> Te sutū kujéhu ga, ná ni socó de ñiñi táca quiti ini cuarto ĩi gā jēe siquí cuéchi, te yiqui cúñu tī ni cajehmu de ichi yátá ñuu. <sup>12</sup> Te suni súcuan ni ndoho máa Jesús ichi yátá ñuu, návāha jíin níñi máa yá te sándoo ya ñayuu. <sup>13</sup> Núu súcuan te ma cóo ĩnuú gá ni yō jíin ñayuu tu cá candíje, chi nájnūhun quihīn yō jíin yá ichi yátá ñuu, te na ndóho yó jíin yá jēe sácatā i. <sup>14</sup> Chi ñayīvi yáha tu íyó ñuu nuū coo yó ní cáni, chi sa cánducú yó máa ñuu nuū cóyūcu yó quivī quíji. <sup>15</sup> Núu súcuan te jēe jíin Jesucristo te níni na cáhán yō jēe yóhyo kujéhu Yaā Dios, chi suu cúu nájnūhun ĩn jēe sócō yō nuū yā, suu jēe nácuatáhú yó nuū yā. <sup>16</sup> Te ma

náa ni rō sáha vāha ró núu jnáhan ró, te cuāha ró jēe cúmanī nuū i. Chi nájnūhun ĩn jēe cásocō ró nuū Yaā Dios cúu táca jēe yáha, te cúsi ni yā jíin.

<sup>17</sup> Te cuandíje ró núu tēe cácuu pastor rō, te cuandetū rō nuū de. Chi cándito de rohó jēe quéndōo vāha ánuá rō, chi cájini de jēe cánuú nacuāha de cuenta nuū yā. Te condíhvī ni rō sáha vāha ró, návāha cúsi ni de siquī rō te ma cucuíhyá ni de siquī rō. Chi núu tu súcuan te ma cóo jēe váha jíin ró.

<sup>18</sup> Te cacān tahú rō jehē rī jijnáhan rí. Chi vāha íyó ni anuá rī jēe tú na cuéchi rí. Chi cácu ni caca yíñúhún rí jíin táca jniñu. <sup>19</sup> Te suni cáhán ndahú rí jíin ró jēe cacān tahú ndasí ró jehē máa rí, návāha cuāha ya jnūhun jēe yachī gā cuajee tucu rí nuū rō.

#### *Bendición jíin saludo jēe sándihí*

<sup>20</sup> Te máa Yaā jēe jéhe jnūhun ndeyí sī ni nuū yō, ni nastécu yā Jítoho yō Jesucristo mēhñu ndíyi. Te Jesús cúu pastor kujéhu jēe ndíto ñayuu cácuu nájnūhun lanchi ya. Chi jíin níñi yā ni sácutú yá contrato jēe yá jēe coo ní cáni. <sup>21</sup> Te ñúhún ni rí jēe Yaā Dios na sáha ya jēe íje ni rō jijnáhan ró, návāha cuu sáha ró táca jniñu váha ndese núnjahan ni yā. Te ñúhún ni rí jēe jíin fuerza Jesucristo jēe ndeé yá ini yō, na sáha Yaā Dios jēe cuu yó ñayuu cúsi ni yā jíin. Te na cáhán yō jēe yóhyo luu kujéhu ya ní cáni. Amén.

<sup>22</sup> Hermano jijnáhan ró, cáhán ndahú rí jíin ró jēe cone cáhnu ni rō jēe stíhvī ni rí rohó jíin jecu-ni jnūhun ni tee rí nuū carta yáha. <sup>23</sup> Te cástūhun rí jēe hermano yō Timoteo, je ni quenda de vecāa. Te núu yachī quíji de yáhá, te cuajecoo ndíndúú rí nuū rō coto jnáhan yó.

<sup>24</sup> Te cahān rō jíin táca tēe cácuu pastor rō jíin táca hermano cá candíje jēe sándeyí ni de, áchí rí.

Te ñayuu Italia suni cácahān i jeē  
sāndeyí ni rō.

<sup>25</sup> Te ñúhun ni rī jeē na sāha ga  
Yaā Dios jeē váha rōhó jíjnāhan ró.  
Súcuan na cóo. Amén.

## CARTA JEE NI TEE SANTIAGO NUU ÑAYUU CACANDIJE

<sup>1</sup> Máá rí cúu Santiago, mozo Yaā Dios jíin Jítóho yō Jesucristo. Te téé ri carta yáha cuájeē nuū rohó ñayuu cacandije jeē cácuu ró ndihúxi uū yucūn Israel, te ni cajitē núu ró ní ñáyívi. Sándeyí ni ró jijnáhan ró.

*Yaā Dios sáha jeē jécūhun ni yō*

<sup>2</sup> Ñánī mánī, na cúsi ndasí ni ró jijnáhan ró núu quiji tijni táca jnūndóho siquī rō. <sup>3</sup> Chi cájini ró jeē núu jító ndee jnūndóho róhó núu cacandije vāha ró, te yūcuan sáha jeē cútūhva ró cuándeyí ni rō. <sup>4</sup> Te na cuándeyí ni ró nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

<sup>5</sup> Te núu ndé ñin ró cúmanī jecūhun ni ró caca ndíchí ró jíin jnúhun Yaā Dios, na cácan ró nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i. <sup>6</sup> Te jeē jicán rō, te cánuú candije ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachī. <sup>7</sup> Ñayuu ún ma cáni ni i jeē sáha Jítóho yō jeē jicán i. <sup>8</sup> Chi ñayuu jeē jéni ñin jéni uū ni, chi máni násāma ni i jíin táca jniñu cásáha i.

<sup>9</sup> Tācá hermano ndahú, na cúsi ni de jeē sáha Yaā Dios jeē cujéhu de. <sup>10</sup> Te hermano cucá, na cúsi ni de núu ni ndundáhú de. Chi táca téé cucá, yachī naa jeē cucá de, nájnūhun nāā ita yucū. <sup>11</sup> Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho táca téé cucá níni sá jicu de jíin jniñu de.

*Siquí jeē jító ndee jnūndóho yóhó*

<sup>12</sup> Yóhoyo ndetū tēe jeē jéndeyí ni de núu jító ndee jnūndóho de. Chi núu je ni cundeyí de jíin, te nihin de premio jeē cujéhu de cotecu de ní cáni. Chi súcuan ni jejnūhun Yaā Dios jeē cuáha ya nuū ñayuu jeē maní jíin yá. <sup>13</sup> Núu ñin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni ñin ma cúu cuiṭi sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuēchi. <sup>14</sup> Chi sa suhva jeē ndíyo néé ni maá i, suu sáha jeē jicán ini i sáha i cuēchi, te scánda ini i chí stáhú un i. <sup>15</sup> Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu. <sup>16</sup> Núu súcuan te ma stívi ró caní ni ró jijnáhan ró, ñánī mánī.

<sup>17</sup> Táca jéē cútahū yō jeē vāha jeē lúu íyó, chí vēji nde andiví núu maá Yaā Dios, Yaā ni sáha táca jéē ndíndēe ín andiví. Te máá yá tu násāma cuiṭi ini yā nájnūhun násāma nduva jíin cuándahū. <sup>18</sup> Te ni sáha ya jeē cótecu yō ní cáni, chí ni candije yó jnúhun ndaā yā. Te ni nduu yó nájnūhun sēhe nuú yá nuū táca gá sēhe ya jeē quívi, chí súcuan ni nujnahan ni yā sáha ya.

*Siquí ndese chiñúhún ndāā yō yā*

<sup>19</sup> Núu súcuan te táca róhó ñánī mánī, ñama na chúsohó ró jnúhun ya, te sa suhva ma cahán yachī rō, ni ma quiṭi yachī ni rō. <sup>20</sup> Chi ñayuu cáquiṭi ni, tu sáha i jniñu ndaā jeē cuní Yaā Dios. <sup>21</sup> Núu súcuan te na siáá rō táca jniñu jnéhén jíin jniñu néé jéē ni cáyā jíin ró. Te na cóo vitá ni ró te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cácu ánuá rō.

<sup>22</sup> Te na squícu ró jéē steén jnúhun ún, te nasūu máá jéē cúni sōho ró súcuan-ni, chí núu súcuan te cástáhú ró maá ró, chí tu níhín jniñu núu tu squícu ró. <sup>23</sup> Chi tēe jeē jíni sōho de jnúhun ya súcuan-ni, te tu squícu de, cúu de nájnūhun ñin tēe jeē jító de

nuū espejo ndese cáa nuū de. <sup>24</sup> Te jito vāha de nuū de, te cuahān-ni de, te nāa ni de ndese cáa nuū de. <sup>25</sup> Te núu ñn tēe tu nāa ni de jnūhun jini sōho de, chi sa suhva chūhun vāha ni de jeē cahán maá ley ndaā Jesús jeē ni sāha libre yohó, te núu cuiñi nihin de jín, te squícu de jeē ndácu, yūcuán na te quéndōo ndetū de jín jniñu vāha jeē sāha de.

<sup>26</sup> Te núu ndé ñn ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjniñu jeē chiñúhún ró yā. <sup>27</sup> Ñayuu jeē chiñúhún ndoo chíñúhún ndaā i maá Tátá yō Yaā Dios, chi jniñu yāha sāha i: Chindéé ñahán i sūchi ní caquendōo ndáhú jín ñahan ní caquendōo ndáhú, núu na-ni jnūndóho íyó. Te tu sájnéhén i ánuá i jín jniñu néé íyó ñáyiví.

*Ma cúhichī ni yō coto yó ñayuu ndahú*

## 2

<sup>1</sup> Ñanī mánī, cá candíje ró Jítoho yō Jesucristo jeē cujénu luu ya. Núu súcuan te ma sāha ró cuenta ndese cúu ñn ñn ñayuu, chi inuú sāha ró jín ndihí i. <sup>2</sup> Chi íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñūhun de sahma vāha. Te suni íyó jínu quívi ñn tēe ndáhú, te ñūhun de sahma tahndé. <sup>3</sup> Te tú vāha núu sāha yíñúhún ró jín tēe ñūhun sahma vāha, te cahān ró jín de: Cucōo ní lugar vāha yāhá. Te cahān ró jín tēe ndáhú: Yūcuán cuiñi ní, chí yāha cucōo ní nuū ñūhun, achi rō. <sup>4</sup> Chi núu cásáha ró súcuan, te tu jéni vāha ni rō siquī jnāhan ró, chí sñn sāha ró jín tēe cúcá jín tēe ndáhú.

<sup>5</sup> Ñanī mánī, chusóhó ró jnūhun cáhán rī: Yaā Dios ni nacāji ya ñayuu ndahú ini ñáyiví yāha jéé cóo cúcá i jín jnūhun cá candíje i ya, te nihín i tahū i ñuu nuū ndácu ya jniñu. Chi ni jejnūhun ya cuāha ya un núu

ñáyuu jeē maní jín yá. <sup>6</sup> Te maá ró chí sa suhva cájēhe ró jnūhun canu ñayuu ndahú. ¿Te á násūu tēe cúcá cúu jeē castáhú róhó siquī jeē nihín de xūhun ró, te yachī jéquin de cuēchi siquī rō nuū tohó? <sup>7</sup> Te suni cácahān neé de siquī Cristo, te suu síhví maá yá cúu jeē cánani ró cristiano.

<sup>8</sup> Vāha cásáha ró te núu cásquícu ndije ró maá jnūhun jéhu ga jeē cahán ley, nájnūhun yósó núu tútu i: Cundáhú ni rō jnāhan ró nájnūhun cundáhú ni rō maá ró, achi. <sup>9</sup> Te núu sñn sāha ró jín ñáyuu cucá jín ñáyuu ndahú, núu súcuan te cuēchi cásáha ró, te jécondee cuēchi siquī rō jeē stívi ró ley Yaā Dios. <sup>10</sup> Chi núu ñn ñayuu stívi i ñn-ni jniñu ndácu ley, te vésú na squícu i ndihí ga, te nájnūhun ni stívi i ndihí ley, te ndihí un jécondee cuēchi siquī i. <sup>11</sup> Chi Yaā jeē ni cáhān jeē ma cósiquí ndéé jnāhan ró, suni ni cahān yā jeē ma cáhni rō ndíyi. Te vésú tu ní cásiquí ndéé jnāhan ró, te núu ni jehni rō ndíyi, núu súcuan te je ni stívi ndihí ró ley. <sup>12</sup> Te tāca jéé cahán ró jín jéé sāha ró, chí sāha ró cuenta jeē sándaā yā ndihí un jín maá ley Jesús jeē ni sāha libre rohó. <sup>13</sup> Chi quívi sándaā yā jniñu, te ñayuu jeē tu ní cundáhú ni jnāhan, suni ma nihín i jnūhun cundáhú ni. Te ñayuu ni cundáhú ni jnāhan, cusī ni i jeē ní ndahva yā cuēchi i maá quívi sándaā yā jniñu.

*Tu jéjniñu jeē candíje yó núu tu squícu yó*

<sup>14</sup> Ñanī mánī, núu cáhán ñn tēe jeē candíje de jeē sāha ya jehē de, te núu tu sāha de jniñu vāha, ¿te ndé jéjniñu jeē candíje de ún? ¿A cuu cácu ánuá de jín jéé cahán-ni de jeē candíje de, te núu tu sāha de jniñu vāha? <sup>15</sup> Te núu ñn hermano yō chí hermana yō, cúmani sahma i jín jéé cáji i tāca quívi, <sup>16</sup> te núu ñn ró cáhán jín i: Cuandeyí ni rō, te cusúcún vāha ró te caji vāha ró, achi rō jín

i, te núu tu ní jéhe ro jéē jíni ñúhún i cotecu i, ¿te ndé jéjníñu jeē cahán ró súcuan? <sup>17</sup> Te suni súcuan cúu jeē núu áchí ró jeē candíje ró jeē sáha ya jehē ró, te núu tu sáha ró jniñu váha, núu súcuan te tu ndé jéjníñu cuiti jeē cahán-ni ró jéē candíje ró.

<sup>18</sup> Te sanaa te cahán ñn ñayuu: Róhó chí cándíje ró jéē sáha ya jehē ró, te ruhū chí sáha ri jniñu váha. ¿Na jíin stéén ró jeē candíje ró jeē sáha ya jehē ró, te núu tú na jniñu váha sáha ró? Te ruhū chí sáha ri jniñu váha te súcuan stéén rí jeē candíje ri jeē sáha ya jehē rí. <sup>19</sup> Ndaā chí cándíje ró jeē iyó ñn-ni Yaā Dios. Te va iyó váha núu súcuan. Te tachí chí suni súcuan cáncandíje, te cácuísi i jeē cáyūhú, chí tu cásáha jniñu váha. <sup>20</sup> ¿Te naun tu jécūhun ni ró? ¿A tu jíni ró jeē núu tu sáha ró jniñu váha, te tu ndé jéjníñu cuiti jeē cahán ró jeē candíje ró? <sup>21</sup> Te jíi yō Abraham, ni ndahva yā cuēchi de siquī jeē ni sáha de jniñu váha. Chí ní jetáhú de jeē ni cáhān yā jeē cahni de sēhe de Isaac socó de i nuū altar. <sup>22</sup> Te jécūhun ni ró jeē siquī jeē ní candíje de jeē sáha ya jeē ní jéjñūhun ya nuū de, jeē yúcuān ní jetáhú de jeē ní cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ní jéjñūhun ya nuū de. <sup>23</sup> Te súcuan ni cundaā jñūhun cáhān tutu i: Abraham ni candíje de jeē ní jéjñūhun ya nuū de, te jeē yúcuān ní ndahva yā cuēchi de, áchí tutu. Te ni conaní de amigo Yaā Dios.

<sup>24</sup> Núu súcuan te je ni cajini ró jeē ndáhva Yaā Dios cuēchi ñayuu jeē casáha i jniñu váha siquī jeē cáncandíje i jeē sáha ya jehē i, te nasūu máá jéē cahán-ni i jeē candíje i. <sup>25</sup> Te suni súcuan Rahab, vésú ñahan tíjni ni ni cuu ña xīhna gā, te ni ndahva yā cuēchi ña siquī jeē ní sáha ña jniñu váha. Chí ní jéhe núu ña vēhe nuū tāca mozo ní taji Josué, te ni chuhichí ña de inga ichi,

návāha cācu de nuū téē cáncudú cahni de. Te jeē yúcuān ní ndahva Yaā Dios cuēchi ña. <sup>26</sup> Te ñn ñayuu núu tuá anuá i nuū yiqui cúñu i, te ndīyi cúu i. Te suni súcuan núu cáncíje yó jeē sáha ya jehē yō, te núu tu sáha yó jniñu váha, te nájnūhun ndīyi cúu yó.

*Jñūhun siquī yaá yó*

### 3

<sup>1</sup> Ñání mání, ma cáni ni cuehē ró cuu ró maestro steén jñūhun ya. Chí cajini ró jeē yóhó jéē steén jñūhun, cuehē gā cuēchi ndenehen ya siquī yō. <sup>2</sup> Chí ndīhi yó stívi cuehē jniñu. Te núu ñn téē cuu condito de yáá de jeē ma stívi de jíin ni ñn jeē cahán de, núu súcuan te yōhyo váha téē cúu de, te suni cuu condito de ní gá de jeē ma stívi de. <sup>3</sup> Chí cúu nájnūhun jeē chíhi yó freno yuhu caballo, te súcuan snáhnú yō ní tí jeē quihín tí jíin yó ndé nuū cuní yō. <sup>4</sup> Te suni súcuan tāca barco, vésú náhnu ndasí, te vésú níhin chūndahá táchí, te jíin ñn timón lulí-ni te cuu scuícó téē scáca, te quihín de jíin ndé nuū cuní de. <sup>5</sup> Te suni súcuan cúu yáá yó, chí vésú lulí-ni, te cuehē teyí sáha yó jíin. Te suni jíni yō jeē ñn ñūhūn lulí cuu jñi jeē cayú ñn yucu cáhnu ndasí. <sup>6</sup> Te suni súcuan yáá yó, chí sáha nájnūhun ñn ñūhūn, chí scuíquín cuehē teyí jniñu néé. Te yáá yó cúu ñn parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jñūhun néé jíin yáá yó, te yáá yó scuíquín cuehē jniñu néé ní tiempo jeē iyó yó ini ñayívi. <sup>7</sup> Te ñayuu chí cuu snáhnú i tācá quiti jíin saa jíin cóo jíin quiti ñūhun nuū mar, te je ni snáhnú i cuehē tí. <sup>8</sup> Te ni ñn ñayuu ma cúu condito i yáá i. Chí ñn jeē neé jéē ma cúu condito i cúu. Te nájnūhun yuhu cóo jeē ñūhun chítú veneno jeē jéhni, súcuan cúu yáá yó. <sup>9</sup> Jíin yáá yó chíñúhún yó Tatá yō Yaā Dios, te

suní jín yáa yó cahán ndevāha yo síquī ñāyuu jeē ni sāha ya ánuá i nájñuhun iyó máa yá. <sup>10</sup> ñin-ni yuhu cáne jñuhun chíñúhún yó yá jín jñuhun cáhán ndevāha yó. Ñānī mánī, tu iyó váha cuiti jeē súcuan. <sup>11</sup> ¿A ñin-ni tesōcō cáne ndute váha jín ndute úvuá, chí naún? <sup>12</sup> Ñānī mánī, ¿a cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suní súcuan ñin tesōcō ma cúu cane ndute úhvuá jín ndute váha.

*Jñuhun ndíchí jéē véji nuū Yaā Dios*

<sup>13</sup> Te núu ndé ñin ró ndíchí te jécūhun vāha ni, núu súcuan te jín jéē jíca ndaā rō steén rō jeē súcuan cúu rō. Te na cóo suchí ni rō modo jeē jéhe jñuhun ndíchí yá. <sup>14</sup> Te núu cáccuésún teyí ni rō te ndúcú ró jéē cujéhnu máa ró, núu súcuan te ma cutéyí ró caní ni rō jeē ndíchí ró. Chí suu cúu jeē stahú ró, te cúu ró contra síquī jñuhun ndaā. <sup>15</sup> Chí ñayuu cándāa súcuan, nasūu núu Yaā Dios véji jeē ndíchí i. Chí cuenta ñayiví, jín cuenta anuá neé ñayuu, jín cuenta máa jéxeén cúu. <sup>16</sup> Chí nuū iyó ñayuu cucuésún ni jín ñayuu nducú jéē cujéhnu máa, suní yūcuan iyó jñuhun sáca núu jín táca jniñu néé. <sup>17</sup> Te jñuhun ndíchí jeē véji nuū Yaā Dios, núu ni sāha jeē ní ndundíchí ñayuu, yūcuán na te iyó ndoo ánuá i. Te suní yūcu maní i jín jñahan i, te vítā ni i, te tú nīhni ni i. Te cúndáhú ni i jñahan i, te sāha i jniñu váha. Te suní iyó ndāa i, te tu stáhú i. <sup>18</sup> Te ñayuu cáyūcu mánī jín jñahan, jín jñuhun maní casáha i tācá jniñu ndaā, te nanihín i jeē quéndōo ndaā i.

*Jeē ma cutóo ni yō jeē iyó ini ñayiví*

#### 4

<sup>1</sup> ¿Te ndese quéjéé jéē cájejnáhan ró jín jéē cátejnáhan ró? Quéjéé síquī jeē cándiyo néé ni rō, te yōhyo

scánda ini anuá rō. <sup>2</sup> Chí cándiyo ni rō, te tu cánevāha ró, te suu sāha jeē cájehni rō ndiyí. Cándiyo ni rō jeē névāha jñahan ró, te tu níhín rō, te suu sāha jeē cátejnáhan ró te cájejnáhan ró. Te tu cánihín rō jeē cuní rō, chí tu cájicān rō nuū Yaā Dios. <sup>3</sup> Te núu cájicān rō, te tu cánihín rō, chí tu cájicān vāha ró, chí mánī jeē cusí ni máa ró cúu jeē cájicān rō nuū yā. <sup>4</sup> Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayiví, yūcuan cúu jeē cájito uhū rō Yaā Dios? Chí ñayuu jeē cutóo ni jeē iyó ñayiví, ndúu i ñayuu jito uhū nuū Yaā Dios. <sup>5</sup> Te tu cáhán saá-ni jñuhun yáha jéē yosó núu tútu i: Máa Espíritu jeē ni jéhe Yaā Dios jeē ndeé ini yō, cúcuíñi ni yā jeē súcuan casáha yó, chí maní yā jín yó, achí. <sup>6</sup> Te jeē váha ni Yaā Dios, te jéhe ya fuerza ini yō jeē ma sāha yó súcuan. Chí cáhán tutu i: Yaā Dios jési yā nuū ñayuu casáha téyí máa, te vāha ni yā chindéé ñáhán yá ñayuu casáha suchí máa, achí. <sup>7</sup> Núu súcuan te cuandetū rō nuū Yaā Dios. Te cuiñi nīhín ró jéē ma cuatáhú ró jéxeén, te cunu coto róhó jijnáhan ró. <sup>8</sup> Maní gā coo ró jín Yaā Dios, te víhyá gā steén yā jeē maní yā jín ró. Róhó jéē casáha cuēchi, na sándoo ró máa ró, stóo ró cuēchi. Te róhó jéē cáconi rō coo maní rō jín Yaā Dios níni jéē cáconi rō cutóo ni rō jeē iyó ini ñayiví, na sándoo ró ánuá rō jeē tuá coo ró súcuan. <sup>9</sup> Na jñahuhū ni rō, te cucuíhyá ni rō, te na ndáhyú rō síquī jeē iyó cuēchi ró. Te vésú ni cajecū rō, te vijna na ndáhyú cohó ró. Te vésú ni cacusí ni rō, te vijna na ndúcuíhyá ni rō. <sup>10</sup> Na sásuchí ró máa ró nuū Yaā Dios, te sájéhnu ya rohó.

*Ma cóndihvī ni yō síquī cuēchi jñahan yó*

<sup>11</sup> Hermano jijnáhan ró, ma cahán neé ró síquī jñahan ró. Chí

tēe jeē cahán neé siquī jnáhan, chí jéē ndihví ni siquī cuéchi jnáhan, nájnūhun jeē siquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu íyó ndáā ley yā. Te núu cáhán rō jeē tu íyó ndáā ley yā, núu súcuan te nasūu jéē squícu ró, chí sa jeē cahán rō siquī. <sup>12</sup> Iyó ñn-ni Yaā jeē ni jéhe ley, te máá-ni ya cúu jeē sándaā siquī cuéchi. Te jnama ya ñayuu cácandíje te snáhnú ndetū yā ñayuu tu cácandíje. Núu súcuan çte na jniñu ndíso ró jéē sándaā rō siquī jnáhan ró?

*Tú vāha jeē satéyí yó maá yó*

<sup>13</sup> Vijna te cáhán rī jín róhó jéē cácahān: Vijna chí sájnē te quihīn yō ñuu yúcuan, te coyūcu yó ñn cuiyā, te cuaan yó xíco yó, te nihīn yō siquī, achí ró. <sup>14</sup> Te tu jíní cuiti rō ndese coo sajnē. ¿Chí na vé va víhí cúu vida rō? Cúu nájnūhun ñn vicō nūhún jéē ñn núnúu-ni núcūhun, te yūcuán na te ndéché-ni cuahān. <sup>15</sup> Chí sa vāha ga na cáhán rō: Núu cúní maá Jítoho yō te cotecu yō te sáha yó jéē yáha chí jéē yúcuan, achí rō. <sup>16</sup> Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. <sup>17</sup> Te núu ñn ñayuu jíní i sáha i jniñu vāha, te núu tu sáha i, te cuéchi cúu núu súcuan.

*Jnūhun cáhán nuū tēe cúca*

## 5

<sup>1</sup> Te cáhán rī jín táca róhó téé cúca, jéē na ndáhyú rō te ndahyū cohó ró siquī jnūndóho jeē quíji nuū rō. <sup>2</sup> Chí ndajniñu cúca cánevāha ró, je téhyú. Te sahma vāha ró, je téé tiquíxin. <sup>3</sup> Te oro jín plata cánevāha ró, chí je cáne xehyu. Te xehyu un stéén jeē ní casáha ró jniñu stáhú jín xūhun ró. Te yūcuan cúu jeē ndúnihin cuéchi siquī rō, nájnūhun ñn ñuhūn jeē snáā yiqui cúñu rō. Chí ni cacaya cuehē rō ndajniñu vāha quiví cuándihí yáha. <sup>4</sup> Te táca téé ni cajehnde trigo ró, tu ní cáchunaa

vāha ró yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeē súcuan ni casáha ró. Te jíní sōho ya jeē cácana jee tēe ni cajehnde ún. <sup>5</sup> Cátecu vāha ndasí ró ini ñayiví yáha, te casáha ró táca jéē cácusñ ni maá ró. Te cájito yúcún ró maá ró, te cúu ró nájnūhun quiti néñu jeē ndétu quiví cúu. <sup>6</sup> Te ni catee ró cuéchi siquī ñayuu ndaā, te nde ni cajehni rō i. Te tu ní cúu casi i jeē casáha ró.

*Jeē na cóo paciencia ni yō te cacān tahú yō*

<sup>7</sup> Hermano, núu súcuan te coo paciencia ni rō condetu ró ndé quiví ndíji máá Jítoho yō. Tēe sájniñu ñuhun, cánuú coo paciencia ni de condetu de nde quíji saū néhen jín saū néñu isa, te sáá te nihīn de nuní vāha jeē jéhe itu. <sup>8</sup> Te suni súcuan coo paciencia ni rō, te ndeyí coo ni rō condetu ró, chí cuacuyajni ndee maá Jítoho yō. <sup>9</sup> Te ma cahán sōo ró siquī jeē sáha jnáhan ró, hermano, návāha ma jécondee cuéchi siquī rō. Chí máá Yaā jeē sándaā cuéchi, je yajni ndíji ya. <sup>10</sup> Nání mání, conahán ró jijnáhan ró ndese ni casáha tēe ni canacani jnūhun máá Jítoho yō nde jenahán, chí ni cacuu de ñn ejemplo nuū yō. Chí vēsú ni candoho de, te ni ñyo paciencia ni de. <sup>11</sup> Te cáhán yō jeē ñayuu cájendeyí ni jín jnūndóho, ndetū cúu i sáha Yaā Dios. Chí ni cajini ró jnūhun ndese ni jendeyí ni Job jín jnūndóho, te suni cájini rō jeē yóhyo vāha ga ni quendōo de ni sáha máá Jítoho yō ná ni yāha jnūndóho. Chí yóhyo cundáhú ni yā yohó, te vāha ndasí ni yā jín yó.

<sup>12</sup> Nání mání, jeē cánuú gá cúu jeē ma cahán cáha ró sihví Yaā Dios jín jnūhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ñn ga jnūhun súcuan ma cahán teyí ró. Chí núu cahán rō jeē cuu, te súcuan-ni cahán

rō. Te núu cahān rō jeē tuú, te súcuan-ni cahān rō, ma scáa gā rō cahān rō, návāha ma ndénehen Yaā Dios cuēchi siquī rō.

<sup>13</sup> Te núu íyó ìn ró jéē ndóho jnūndóho, te na cácan tahu rō. Te núu íyó ìn ró jéē cúsi ni, te na cáta ró yaa jeē chiñúhún ró yá. <sup>14</sup> Te núu íyó ìn ró jéē cuhú, te na cána ró tée jéhnu cándito ñayuu cácandíje. Te na cácan tahu de jehē ñayuu cuhú. Te jíin síhví máá Jítóho yō na chíhi de aceite i. <sup>15</sup> Te núu cácandíje de jeē sáha Jítóho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. <sup>16</sup> Núu súcuan te nacani ndaā rō cuēchi ró núū jnáhan ró, te cacān tahu rō jehē jnáhan ró návāha nduvāha ró jínáhan ró. Chi núu ìn tée ndaā ndíhví ni de jícān tahu de, te yōhyo vāha níhín jníñu, chi sáha ya jeē jicān de. <sup>17</sup> Chi Elías, tée ni nacani jnūhun Yaā Dios jenahán, suni ìn tée jeē nájnūhun íyó máá yó ni cuu de. Te ni jicān tahu ndasí de jeē ma cúun saū, te tu ní cúun saū unī cuiyā iñū yoō. <sup>18</sup> Yūcuán na te ni jicān tahu tucu de, te ni cuun saū, te ni canecoo tucu tāca jéē jéhe ñuhun.

<sup>19</sup> Ñánī mánī, núu ìn ró ni stóo ichi ndaā, te núu inga rō nachuhichí ró jnáhan ró, <sup>20</sup> núu súcuan te cuni rō jeē núu ni nachuhichí ró tée ni quívi cuēchi, te je ni jnama ró de jeē jnahnú ndetū de núú, te súcuan íyó jnūhun cáhnu ni nuū cuehē cuēchi de.



## CARTA HN JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Pedro, apóstol jeē ní taji Jesucristo, te tée rí carta yáha cuájeē nuū rohó ñáyuu ní cajitē núu, te cáyūcu jícá ró ní Ponto, Galacia, Capadocia, Asia, jiín Bitinia. <sup>2</sup> Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayíví. Te jiín Espíritu Santo ni sáha ya jeē iyó ndoo iyó í rō cájetáhú ró núu yā, te ni nacate ya anuá rō jiín níñi Jesucristo. Te ñūhun ni rí jeē na cáyá gā tāca jéē váha jeē sáha ya rohó, jiín jéē coo ndeyí coo sī ni rō jijnáhan ró.

*Jeē ñūhun ni yō tāca jéē váha jeē cóo andíví*

<sup>3</sup> Na cáhán yō jeē yóhō cújéhu Yaā Dios, Yaā cúu Tátá máá Jítoho yō Jesucristo. Chi ni cundáhú ndasí ní yā yohó, te ní sáha ya jeē ní nacacu jeé yó, siquī jeē ní natecu Jesucristo mēhñu ndíyí. Te jeē yúcuan ní ní cáñuhun ni yō tāca jéē váha jeē coo. <sup>4</sup> Chi nihīn rō tahū jeē ñūhun váha ini andíví jeē cúu ró jijnáhan ró. Te tahū un má náā cuiti, ni ma tíví cuiti, ni ma ndíhí cuiti. <sup>5</sup> Chi cá candije ró jéē sáha Yaā Dios jehē rō, te jeē yúcuan ndíto ya rohó jiín poder yā, návāha jnama ya rohó quíví sándíhí, chi ní sándaā yā jeē súcuan coo.

<sup>6</sup> Jeē yúcuan cácusī ndasí ní rō, vésú cájito ró cuéhē ndīnuū jñūdóho jecu-ni quíví. <sup>7</sup> Chi nájnūhun jeē stuhvá ñayuu oro jiín ñūhūn, jito ndee i núu jeē váha cúu, suni súcuan cánuú coto ndee jñūdóho rohó núu cá candije níhin ró chí tuú. Chi jeē cá candije níhin ró, chi yahu ndasí gá cúu vésú oro, ndajniñu jeē náā. Te yúcuan cúu jeē

cuajnúhún yá rohó, te sájéhu ya rohó, te squéndōo yíñūhún yá rohó quíví quenda ndijin Jesucristo.

<sup>8</sup> Te vésú tu ní cájito ró núu yā, te cáhīyo manī ndasí ró jiín yá. Te cá candije níhin ró yá vésú tu cájito ró núu yā vijna. Te yóhō luu cácusī ndasí ní rō, chi nde tuá níhín cuiti yō jñūhun castūhun yó ndese cúsi ní yō. <sup>9</sup> Te nihīn tahú rō jeē cácu ánuá rō, chi jeē yúcuan cúu jeē cá candije ró.

<sup>10</sup> Te tēe ni canacani jñūhun Yaā Dios nde jenahán, ní cananducú yúcun de ni cacajñūhun váha de siquī jñūhun ndese jnama ya yohó. Te ní cacachi de ndese sáha Yaā Dios jeē váha rohó jijnáhan ró. <sup>11</sup> Chi nde ná tu coo, te ní steén Espíritu Cristo nuū de jijnáhan de ndese quiji jñūdóho siquī Cristo jiín ndese luu ndujéhu tucu ya jeē yáha jñūdóho ún. Te ní cananducú yúcun de jeē na jécūhun ni de nde quíví quiji Cristo te ndese coo tāca jéē ní cáhán máá Espíritu jeē ndeé ini de. <sup>12</sup> Te ní steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ní cajini sōho máá ró jñūhun ún, chi tāca tēe nácani jñūhun jnáma ya yohó, ní canacani de nuū rō, ní sáha poder Espíritu Santo jeē ní quiji ichi andíví. Te jñūhun ún chi nde máá ndajéhé Yaā Dios cánanducú návāha na jécūhun ní.

*Cúni yā jeē coo ndoo ánuá yō*

<sup>13</sup> Jeē yúcuan ndito na cóo xini rō jijnáhan ró, te cájí coo ní rō. Te cocuhun ndasí ní rō jeē níhín rō tāca jéē váha jeē sáha Yaā Dios rohó quíví quenda ndijin Jesucristo. <sup>14</sup> Te na cúu ró séhe jeē cájetáhú váha. Te ma sáha ga rō táca jniñu jeē ní cacusi ní rō sáha ró nde ná tu jecūhun ni rō jñūhun Yaā Dios. <sup>15</sup> Chi sa suhva na cóo ndoo ánuá rō jiín táca jniñu cásáha ró, chí Yaā ní cana rohó, Yaā iyó ndoo cúu ya.

16 Chi súcuan cáhán tutu i: Na cóo ndoo ró jijnáhan ró, chi ruhū iyó ndoo ri, achí yá.

17 Te núu cácahān rō Tatá rō jiin Yaā Dios, núu súcuan te na cáca yíñuhún ró nuū yā tāca quivī jéē cájica ró ñayivī yáha. Chi máa yá sándaā siquī ndese ni casáha iin iin yó, te tu sáha ya cuenta ndese cúu iin iin yó, chi inuú sáha ya jiin ndihi yó. 18 Chi ni jnama ya rohó núu tācá costumbre jeē ní cajequin jíi rō, jeē ní cajejniñu cāha ró nuū. Te cájini vāha ró jéē yahu cúu jeē ní jnama ya rohó. Chi tu ní chúnaa yā jiin ndajniñu jeē náa, nájñuhun oro jíin plata, 19 chi sa suhva jíin níñi Cristo jeē yahu ndasí gá cúu. Chi ni socō yā máa yá nájñuhun iin londe, quití iyó vāha iyó ndoo. 20 Chi jeē yúcuan ní jeni Yaā Dios máa Cristo nde ná tu jecōo ñayivī, te ni cane ndijin Cristo máa tiempo cuándihi yáha, návāha quendōo vāha ánuá rō jijnáhan ró. 21 Te jeē jíin Cristo te cácañdije ró Yaā Dios. Chi ni sáha Yaā Dios jeē ní natecu yā mēhñu ndíyí jíin jéē ní ndujéhu ya. Te jeē yúcuan cácañdije ró Yaā Dios, te cáñuhun ni rō coto ró yá.

22 Te vijna chi je ni candundoo ánuá rō, chi ni cajetáhú ró jñuhun ndaā ni sáha Espíritu jíin ró, návāha cundáhú ndije ni rō hermano cácañdije. Núu súcuan te na cúndáhú ndasí ni rō jnáhan ró nde jíin ini jíin ánuá rō. 23 Chi je ni canacacu jeé ró, te nasūu chíji yucūn ñayuu jeē cúu. Chi sa jñuhun Yaā Dios jeē ndíto técu ní cání ni sáha jeē ní nacacu ró. 24 Chi súcuan cáhán tutu i:

Nájñuhun yucū cúu ndihi tāca ñayuu, chi jecu-ni quivī técu i.

Te nájñuhun ita yucū cúu jeē cujéhu i.

Chi íchí-ni yucū, te ndáhvá-ni ita.

25 Te jñuhun Jitoho yō Yaā Dios, sa quéndōo ní cání.

Achí tutu. Te jñuhun un cúu máa jñuhun jnáma ya yohó jéē ní canacani ri nuū rō.

## 2

1 Núu súcuan te na siáá rō tācá jniñu néé, tāca jéē stahú, jéē tú ndije, jeē cucuésún ni, jíin jéē sajnühún síquī jnáhan. 2 Te nájñuhun sūchi yíquin sá ní cacu jeē jéxin te jéhu, súcuan na cóndihvī ni rō scuáha ró jñuhun ndaā yā, návāha cuehnu ró jíin te cācu ánuá rō. 3 Chi je cájini rō jeē yóhoyo vāha ni máa Jítoho yō.

*Cristo cúu nájñuhun yuū yítuu vehe*

4 Núu súcuan te manī gā coo ró jijnáhan ró jíin Jítoho yō Cristo. Chi cácuu ró nájñuhun templo nuū ndeé Yaā Dios, chi ndeé yá ini anuá rō. Te Cristo cúu nájñuhun iin yuū cánuú gá jeē yítuu yiquī templo, te sáha ya jeē cótecu rō ní cání. Te ñayuu vésú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájñuhun nacāji yó iin yuū vāha jeē quítuu yiquī vehe. 5 Te máa ró chi cácuu ró nájñuhun iin iin yuū jeē cúvāha templo Yaā Dios, te cotecu rō ní cání. Te na cuáha ró jñuhun jeē sama ya rohó jijnáhan ró jéē cúvāha templo yā, cúu jeē ndeé Espíritu yā ini anuá rō nájñuhun ini iin templo. Te suni cúni Yaā Dios jeē cuu ró sūtū cáhīyo ndoo cájejniñu nuū yā. Chi siquī jeē ni sáha Jesucristo jehē rō, te na sócō rō máa ró jeē cuajniñu ró nuū yā sáha ró táca jniñu vāha jeē nujnahan ni Yaā Dios. 6 Chi súcuan cáhán tutu i:

Vijna te nde ñuu rī Sion jéquin rī iin yuū jeē cánuú gá jeē quítuu yiquī vehe,

chi ni nacāji ri yā nájñuhun iin yuū vāha jeē cánuú téyí.

Te ñayuu jeē candije i ya, jnama nahín yá i.

Achí Yaā Dios, achí tutu. 7 Te máa ró jeē cácañdije ró, chi yuū vāha jeē

cánuú téyí cúu ya nuū rō. Te nuū ñayuu tu cácanđije chi tuú, chi sa cúndaā jeē cahán tutu i:

Máá yúū jeē ní casquéhichī tēe cásama vehe, suu cúu yuū cánuú gá yítuu yiquí vehe.

<sup>8</sup> Te suni cúndaā jnūhun jeē cahán tutu siquí ñayuu tu cácanđije:

Cúu ya nájñūhun ñn yuū jeē cácachihī i jehē i,

nájñūhun toto jeē cotúú i sáha.

Achí. Chi jeē cácachihī i jehē i cúu jeē casáññhi ni i nuū jnúhun ya. Te je ni cúndaā jeē jñahnú ndetū i siquí jeē cácanññhi ni i.

### *Jñūhun ñayuu maá Yaā Dios*

<sup>9</sup> Te máá ró cácuu ñayuu jeē ní nacáji Yaā Dios. Te suni cácuu ró sūtū cájejnññu nuū maá Yaā cúu Rey, te ñayuu cáññyo ndoo, jíñ ñayuu maá yá cácuu ró. Súcuu ni sáha Yaā Dios rohó návāha ñacani ró jnúhun ndese yōhyo jéñnu jñññu sáha ya, chi máá yá ni cana rohó ná ni coyūcu ró nájñūhun nuū néé. Te ni squívicoo ya rohó núū luz yā jeē yōhyo vāha stéen yā ñni anuá rō.

<sup>10</sup> Chi nde saá te nasūu ñayuu Yaā Dios cácuu ró, te vijna je ni nduu ró ñayuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jíññahan ró.

### *Jeē cuajñññu vāha yó núū Yaā Dios*

<sup>11</sup> Ñánñi mánñi, ñni ñayívi yáha cácuu ró nájñūhun ñayuu ñnu jicá jéé cájica cuu tátú. Núū súcuu te cáhán ndahú rí jíñ ró jéé ma sáha ró táca jñññu jeē ndíyo néé ni rō jíñ modo maá ró. Chi táca ún cájeññahan jíñ ró, ndúcú jéé jñahnū ndetū anuá rō. <sup>12</sup> Te ndaā na cáca ró méhññu ñayuu tu jíñ jñūhun Yaā Dios. Chi vésú cácahān i siquí rō, nájñūhun cácahān i siquí ñayuu casáha jñññu néé, te núu na cóto i jñññu vāha casáha ró, te quívi sándaā Yaā Dios jñññu te cahān i jeē yōhyo cújéñnu ya.

<sup>13</sup> Jeē siquí maá Jítoho yō te cuatáhú ró nuū táca tóhō cándiso jñññu nuū ñayuu. Cuatáhú ró nuū maá rey, chi tēe cújéñnu gá cúu de. <sup>14</sup> Te cuatáhú ró nuū táca gobernador jeē ní jeni rey návāha stóho de ñayuu casáha jñññu néé te cuajñññu de ñayuu casáha jñññu vāha. <sup>15</sup> Chi cúní Yaā Dios jeē sáha ró jñññu vāha, te jeē súcuu sáha ró te táca ñayuu canéé jéé tu cájecūhun ni, casi i yuhu i.

<sup>16</sup> Te na cáca ndaā rō jeē cácuu ró ñayuu ni nduu libre anuá, te nasūu jéé ní nduu libre rō jeē sáha ró jñññu néé. Chi sa cácuu ró mozo Yaā Dios, te cuajñññu vāha ró núū yā.

<sup>17</sup> Coo respeto rō nuū táca ñayuu. Cundáhú ni rō hermano cácanđije. Conso ñyo ró núū Yaā Dios. Coo yíñññu ró nuū maá rey.

### *Jeē na ndóho yó jéhē jñññan yó nájñññu ni ndoho Cristo*

<sup>18</sup> Rohó jéé cácuu mozo, cuatáhú ró nuū patrón rō, te coo respeto rō nuū de. Te nasūu máá-ni nuū tēe vāha ni jíñ tēe vítá ni, chi suni nuū tēe xeēn ni. <sup>19</sup> Chi ñn jeē vāha cúu núū jéñdeyí ni ñn tēe jeē stóho cáha ñayuu de siquí jeē squícu de nuū Yaā Dios. <sup>20</sup> Chi núū cástóho i rohó jéé casáha ró cuéchi, te ni ñn ma cuajñññu rohó núū jéñdeyí ni rō jíñ jeē ndóho ró. Te núū cástóho i rohó jéé casáha ró jñññu vāha, te núū jéñdeyí ni rō jíñ, yāha cúu jeē vāha jeē nójññan ni Yaā Dios. <sup>21</sup> Chi jeē yúcuu cúu jeē ní cana ya rohó jíññahan ró. Chi suni máá Cristo ni ndoho ya jeē siquí rō, te súcuu ni cuu ya ñn ejemplo nuū rō jeē na ndóho ró jéhē jñññan ró, te súcuu condiquín rō ichi ya. <sup>22</sup> Te máá yá tú cuiti na cuéchi ní sáha ya, ni tú cuiti na jñññu stáhú ní cáhán yā. <sup>23</sup> Ná ni cacahān neé i nuū yā, te tu ní nacahān neé yá. Te ná ni castóho i ya, te tu ní téññahan ya jíñ i, chi sa ni chíhi ya maá yá ndaha Yaā Dios, Yaā sándaā vāha siquí ndíhi ún. <sup>24</sup> Te

ni condiso máá Cristo cuēchi yó jíin yiqui cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō. <sup>25</sup> Chi ni casana ró nájñuhun lanchi, te vijna je ni candicó ró ni ndivicoo ró núu Cristo, Yaā cúu pastor rō te ndító vāha ya anuá rō.

*Ndese cánuú coyūcu váha yū jíin ñasihí*

### 3

<sup>1</sup> Suni súcuan róhó ñasihí jíinánhan ró, cuatáhú ró nuū yī ró, návāha núu cúu de tēe tu cándíje jñuhun ya, te cuu scándíje ró de, jeē tuá niní jíin jēe cahán rō, chi máá jíin jēe casáha vāha ró. <sup>2</sup> Chi cuni de jeē cájica ndaā rō te cáhīyo respeto rō. <sup>3</sup> Te jeē casáha luu ró máá ró, chí nasūu máni máá ichi síquī rō sáha ró, jeē sáha luu ndasí ró xinī rō, chí jēe cūhun ró síquī oro chí sahma váha ga. <sup>4</sup> Chi sa nducú ró jeē quéndōo luu ánuá rō, te coo luu ró ñn modo jeē ma náa cuiti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios. <sup>5</sup> Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaa Dios, te ni cajetáhú ña nuū yū ña. <sup>6</sup> Te súcuan ni sáha Sara, chí ni jetáhú ña nuū yū ña Abraham, te ni cahán yñúhún ña jíin de. Te róhó jíinánhan ró, núu sáha vāha ró te núu ma yūhu ró ni ñn, yūcuán na te coo ró nájñuhun ni iyo Sara.

<sup>7</sup> Te suni súcuan róhó yū, na cóo vītá ni rō jíin ñasihí ró. Te yñúhún coo ró jíin ña, síquī jeē núu ga fuerza ña vēsú rohó, te suni síquī jeē inuú ní canihín tahú rō cotecu rō ní cáni síquī jeē váha ni Yaā Dios. Te súcuan sáha ró návāha tú casi nuū jñuhun jíicán tahú rō.

*Jñuhun ñayuu cándoho síquī jeē cájica ndaā*

<sup>8</sup> Núu súcuan te inuú na cáni ni rō jíinánhan ró, te cucuihyá ni rō jeē ndóho jñahan ró, te cundáhú ni rō i nájñuhun ñani rō. Te na cóo manī rō te cani suchí ni rō. <sup>9</sup> Núu casáha néé ñáyuu jíin ró, te ma nasáha néé ró jíin i. Te núu cácahán neé i nuū rō, te ma nácahán neé ró núu i. Chi sa suhva cacān tahú rō jeē na quéndōo vāha i. Chi Yaā Dios ni cana ya rohó jēe suni súcuan quendōo vāha ró.

<sup>10</sup> Chi súcuan cáhán tutu i: Ñayuu cácuni cotecu vāha te cusī ni tāca quívī,

na cóto i yuhu i jeē ma cáhán neé i, te na cóto i jeē ma cáhán i jñuhun stáhú.

<sup>11</sup> Na cújiyo i nuū jniñu néé, te na sáha i jniñu váha.

Na nducú i coyūcu máni i, te na cóndihvī ni i jíin.

<sup>12</sup> Chi máá Jítoho yō ndító ya ñayuu ndaā,

te jíni nahín yá jeē cájicán tahú i.

Te ñayuu casáha jniñu néé, chí tu jétáhú yá i.

Achí tutu.

<sup>13</sup> Te ni ñn ma sáha néé jíin ró te núu máni jniñu váha cándihvī ni rō sáha ró. <sup>14</sup> Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunee ni rō. <sup>15</sup> Chi sa jíin ini jíin ánuá rō chiñúhún ró máá Jítoho yō Cristo. Te níni coo tūhva ró nastió cuiñí vīta ró te cahán yñúhún ró jíin ñáyuu jeē castichí rohó síquī tāca jēe cañuhun ni rō. <sup>16</sup> Te caca ndaā rō jeē tú na cuēchi condee anuá rō, návāha ñayuu cácahán neé síquī rō, cucanu i jeē ni stáu yáhu i róhó jēe cájica ndaā rō chí cácañíje ró Cristo. <sup>17</sup> Chi núu cúní Yaā Dios te váha ga jeē ndóho ró síquī jeē casáha ró jniñu váha vēsú síquī núu sáha ró jniñu néé.

<sup>18</sup> Chi máá Cristo suni ni ndoho ya, te ñn jínu-ni ni jihī yā jeē síquī cuēchi ndihí yó. Yaā vāha cúu ya, te ni ndoho ya jehē yohó ñáyuu ní casáha jniñu néé, návāha quívicoo

yó núu Yaā Dios sáha ya. Chi ni jihī yiqui cúñu yā, te ánuá yā chi técu-ni ní cáni. <sup>19</sup> Te ná ni jihī yā te ni jehēn anuá yā ni nacani ya jñūhun nuū anuá ñayuu cáyindihyū. <sup>20</sup> Chi nde jenahán tu ní cájetáhú i, ná ni iyo paciencia ni Yaā Dios te ni condetu ya níni sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte. <sup>21</sup> Te nájnūhun ni cacācu i nuū ndúte, súcuan cúu jeē jéndute yó vijna te cācu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúú yó jíin Jesucristo nuū jnúhun ni natecu yā. <sup>22</sup> Te ni ndaa ya cuanuhun yā andiví, te ndéé yá ichi ndáváha Yaā Dios nuū cujéhnu ya. Te táca ndajéhé andiví, jíin jéē cándacu jniñu, jíin jéē cájni poder, cájendetū nuū yā.

*Jeē na cuájniñu yó jíin táhū jeē ni jéhe ya nuū yō*

#### 4

<sup>1</sup> Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuéchi. <sup>2</sup> Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jíin modo maá ró. <sup>3</sup> Chi nde ní véji ró, te ni casáha ró cuéhē cuéchi jeē cánujnahan ni rō siquī jeē tu ní cájini rō jñūhun Yaā Dios. Te tiempo un máni maá jéē neé ni casáha ró, te ni candiyo ni rō táca jéē neé, ni canajini ró, ni casáha ró vico neé, ni cajihí ndasí ró nuū víco ró, te ni cachiñuhún ró ídolo jeē ni cáhān Yaā Dios jeē ma chíñuhún yó. <sup>4</sup> Te cáacuné ni i jeē tuá cájica ró jíin i jeē sáha ró táca cuéchi xeēn jíin i. Te jeē yúcuán cúu jeē cácahān neé i

siquī rō. <sup>5</sup> Te maá i chi ñn quiví te nacuaña i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajihí. <sup>6</sup> Chi jeē yúcuán suni ni quiji jñūhun vāha ya nuū táca ndíyí ná ni cotecu i. Te ni cundaā siquī cuéchi ni casáha i ñayiví yáha, nájnūhun cundaā siquī ndihí ñayuu, náváha nacani ni i te cotecu anuá i ní cáni nájnūhun técu Yaā Dios.

<sup>7</sup> Te je cuacuyajni quiví jeē náā táca jéē iyó. Núu súcuan te ndito na cóo xiní rō jijnáhan ró, te condihví ni rō cacān tahú rō. <sup>8</sup> Te jeē cánuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuehē cuéchi. <sup>9</sup> Sáha vāha ró jíin ñáyuu jeē jinú i vehe ró, te ma cúxí ni rō. <sup>10</sup> Táca ró cuajniñu ró núu jnáhan ró, núu ndese iyó maá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sín sín ni jéhe ya nuū ñn ñn ró. <sup>11</sup> Núu tahú jeē nácani ró jnúhun cúu, te na cáhān rō nájnūhun jeē maá Yaā Dios cáhān. Te núu tahú jeē chindéé ñáhān ró jnáhan ró cúu, te na sáha ró jíin fuerza jeē ni jéhe ya nuū rō, náváha jíin ndihí jeē casáha ró te cáhān ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhān yō jeē luu cújéhnu Cristo te jni ya poder ní cáni. Amén.

*Jeē ndóho yó siquī jeē candíje yó Cristo*

<sup>12</sup> Nání mání, núu véji jñūndóho xeēn jeē coto ndee rohó, te ma cunéé ni rō caní ni rō jeē maá ró ni nihín jñūndóho xeēn gā. <sup>13</sup> Chi sa cusí ni rō jeē cándoho ró jecu jñūndóho jeē ní ndoho Cristo, náváha suni cusí ndasí ni rō quiví quénda ndijin yā jeē cujéhnu luu ya. <sup>14</sup> Te yóhoyo ndetū rō te núu cácahān neé i nuū rō siquī jeē cándíje ró Cristo. Chi máá Espíritu Yaā Dios jeē cujéhnu ndasí, ndéé yá ini rō.

Máa i chi cácahān neé i siquī yā, te máa ró chi cáchiñúhún ró yā. <sup>15</sup> Te núu ndoho ró, te na ndóho ró siquī jeē cácañdije ró Cristo. Te ma ndóho ró siquī táca cuéchi nájñuhun cándoho ñayuu jéhni ndīyi, ñayuu sacuíhná, ñayuu sáha jniñu neé, jíin ñayuu quívi nduu nuū jniñu jnāhan jeē tu cánuú quívi nduu. <sup>16</sup> Te sa núu ñin ró ndóho siquī jeē candije ró Cristo, te ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

<sup>17</sup> Chi je ni jinū quívi jeē quejéé sándaā Yaā Dios cuéchi, te xihna gā ñayuu cácuu sēhe ya sándaā yā cuéchi. Te núu xihna gā cuéchi máa yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñayuu jeē tu ní jétáhú jñuhun vāha ya. <sup>18</sup> Te núu yōhoyo yí cácu ñayuu vāha, núu súcuan ¿te ndese cácu ñayuu casáha jniñu neé jíin táca cuéchi? <sup>19</sup> Núu súcuan te róhó jéé cándoho siquī jeē súcuan cúní Yaā Dios, ma jécuiñi rō sáha ró jniñu vāha, te na chíhi ró máa ró ndaha máa Yaā jeē ni sáha róhó, chi squícu ya jeē ni jéjnūhun ya.

*Jeē jéhe de consejo ñayuu cácañdije*

## 5

<sup>1</sup> Vijna te na cáhán rī jíin táca róhó téé jéhnú cándito ñayuu cácañdije, chi suni téé jéhnú ndító ñayuu cácañdije cúu máa rí. Te cúu rī testigo jeē ní jito rī ndese ni ndoho Cristo. Te suni ndujéhnú rī jíin ró sáha Cristo quívi quéndā ndijin yā. <sup>2</sup> Na cóto yúcun ró ñayuu jeē ndeé jniñu ró condito ró, jeē cácuu i nájñuhun lanchi Yaā Dios. Te na cúsiñi ní rō condito ró i, chi súcuan cúní Yaā Dios. Te nasūu siquī jeē sáfuerza yā rohó, ni nasūu siquī jeē nihín rō xūhún, chi sa siquī jeē cuní rō cuajniñu ró. <sup>3</sup> Te nasūu jéé ndacu nihín ró jniñu nuū ñayuu cándito ró, chi sa nducú ró cuu ró ñin ejemplo nuū i jeē cácuu i lanchi ya. <sup>4</sup> Yūcuán

na te quívi quéndā ndijin maá Yaā cúu Pastor cujéhnú nuū rohó téé cácuu pastor lanchi ya, te cuāha ya premio nuū rō jijnāhan ró jéé yóhoyo luu te ma náā cuíti.

<sup>5</sup> Te suni róhó táca téé suchí, na cuándetū rō nuū táca téé jéhnú jíinā. Te ndihí róhó ñayuu cácañdije, cuándetū rō nuū jnāhan ró, te caní suchí ní rō. Chi suhva cáhán tutu:

Yaā Dios jési yā nuū ñayuu casáha téyí máa,

te vāha ni yā chíndéé ñáhán yá ñayuu casáha suchí máa.

Achí, <sup>6</sup> Núu súcuan te na cáni suchí ní rō, chi cáyihí ró ndaha Yaā Dios jeē jñi poder. Te sájéhnú ya rohó, na jíinú maá quívi. <sup>7</sup> Táca jéé cácanani ndasí ní rō siquī, chíhi ró ndaha máa yá te máa yá coto, chí ndító ya rohó.

<sup>8</sup> Te cáji na cóo xinī rō te ndito coo ní rō. Chi jexeén jeē jíto uhū rohó, jíca cuu ndúcú squívi róhó jíjnāhan ró núu cuéchi. Te xeēn gā sáha vésú ndicaha jeē iyo ndáhyú. <sup>9</sup> Te cuiñi nihín ró jéé ma cúndeyí jexeén jíin ró, te nihín candije ró jñuhun cúndáhú ní yā rohó. Chí cájini rō jeē suni súcuan cándoho hermano rō jeē cáyūcu ní cáhnu ñayiví. <sup>10</sup> Te núu ní jinū jeē ndoho ró jecu-ni tiempo, te Yaā Dios chí sáha ya jeē ije vāha ní rō jíin jñuhun ya, jíin jéé cuíñi nihín ró, te cuāha ya fuerza ini rō, te quendōo cutú ró ní cáni. Chí máa yá cúu jeē sáha táca jéé vāha yóhó, te ní cana ya yohó jéé cujéhnú luu yó jíin yá ní cáni, siquī jeē nduú yó jíin Jesucristo. <sup>11</sup> Te na cáhán yō jeē yóhoyo luu cújéhnú ya te jñi ya poder ní cáni. Amén.

*Saludo jeē sándihí*

<sup>12</sup> Jíiní rī jeē Silvano cúu ñin hermano jeē squícu vāha. Te máa de cuajeé nuū rō jíin carta yáha jéé ní tee rī jecu jñuhun. Te jíin yáha stáhví ní rī rohó, te cáhán rī jíin ró jeē ndaá cúu jeé táca jéé vāha ní sáha Yaā Dios rohó, suu stéén nuū rō jeé

cundáhú ndije ni yā rohó. Te na  
cuíñi nīhin ró jíin jnúhun yáha.

<sup>13</sup> Ñayuu cácanđije jeē cáyūcú  
ñuu Babilonia, jeē ní nacāji ya i  
nájñūhun ni nacāji ya rohó, cácahān  
i jeē sándeýí ni rō. Te Marcos, tēe  
cúu nájñūhun sēhe ri, suni súcuan  
cáhán de. <sup>14</sup> Te núu na cáhán rō  
jíin jnáhan ró, te techūhu mánī rō  
ndaha i.

Te na cóo ndeyí coo sīi ni ndihi  
ró jēē cáyihī ró ndaha Jesucristo.  
Súcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jín rí jijnáhan rí ni canihin rō jnūhun luu váha jeē cacandije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. <sup>2</sup> Te ñūhun ni rī jeē na sáha ga yā jeē váha ndasí róhó jín jéé yóhoyo coo ndeyí coo siñ ni rō siquī jeē cájecūhun váha ni rō ndese Yaā cúu Yaā Dios jín Jítoho yō Jesús.

*Siquī ndese cánuú coo ñayuu cacandije*

<sup>3</sup> Te Yaā Dios, jín poder yā ni jēhe ya nuū yō tāca jéé sáha jeē cúu caca ndaā yō nuū yā jín jéé chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhoyo cújéhnu ya jín táca jniñu jéhnu sáha ya. <sup>4</sup> Jeē yúcuan ní jejnūhun ya tāca jéé yóhoyo jéhnu yóhoyo váha sáha ya yohó, návaha jín táca ún te nduu rō nájñūhun íyó máá yá, te cácu rō núu jniñu jeē cándiyo néé ni ñayuu casáha i ini ñayivi yáha. <sup>5</sup> Núu súcuan te na ndúcú ndeyí rō jín jnūhun yáha. Te jeē cacandije rō, te siquī ún na chísóó rō jeē caca ndaā rō. Te jeē cájica ndaā rō, te siquī ún chísóó rō jeē cóndihvī ni rō jecūhun váha ni rō. <sup>6</sup> Te siquī ún chísóó rō jeē casi rō modo jeē cuní maá rō. Te siquī ún chísóó rō jnūhun cuandeyí ni rō, te siquī ún chísóó rō jeē chiñúhún váha rō Yaā Dios. <sup>7</sup> Te siquī ún chísóó rō jeē cóo manī rō jín jnáhan rō, te siquī ún chísóó rō jeē cundáhú ni rō jnáhan rō.

<sup>8</sup> Chi núu cayā tācá jniñu yáha jín rō, te suu sáha jeē ma cótecu saá-ni rō, chi sa quee váha jniñu sáha rō, siquī jeē cájecūhun ni rō ndese Yaā cúu Jítoho yō Jesucristo. <sup>9</sup> Te ñayuu jeē tu casáha jniñu yáha, nájñūhun jeē cáhoyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. <sup>10</sup> Jeē yúcuan na ndúcú ndeyí rō hermano, návaha coo seguro jeē ní cana ya rohó jín jéé ní nacáji ya rohó. Chi núu sáha rō táca jniñu yáha, te ma cáca yátá cuiti rō. <sup>11</sup> Yúcuan na te nune váha ichi quivi rō ini ñuu maá Jítoho yō Jesucristo, Yaā jnáma yóhó, nuū ndácu ya jniñu ní cáni.

<sup>12</sup> Jeē yúcuan ma jécuiñi rī sáha ri jeē núcūhun ni rō tāca jnūhun yáha, vēsú je cájini rō te cáhlin nihin rō jín jnūhun ndaā jeē cacandije rō. <sup>13</sup> Chi jéni ni rī jeē iyó váha stihví ni rī rohó vijna técu gā rī, návaha nucūhun ni rō. <sup>14</sup> Chi máá Jítoho yō Jesucristo ni castūhun yá nuū rī jeē tuá cotecu nahán rí ñayivi yáha. <sup>15</sup> Jeē yúcuan na ndúcú ndeyí gá rī stihví ni rī rohó, návaha núu je ni jihī rī, te níni nucūhun ni rō táca jnūhun yáha.

*Jeē ní cajito de jeē cújéhnu Cristo*

<sup>16</sup> Ná ni castéén rī jnūhun máá Jítoho yō Jesucristo nuū rō, ndese ndiji ya jín poder yā, te tu ní cácahān rī in cuento-ni jeē ní catava ndichí ñayuu. Chi ná ni cahoyo ri jín yá xinī yúcu, te ni cajito jín núu rī jeē tucu ni nduu ya jeē ní nduluu jéhnu ya. <sup>17</sup> Chi ni cajini rī jeē Tatá yō Yaā Dios ni cahān yiñúhún yá jín Jesús, te ni sajhénu ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jín, te cúsñ ni rī jín, áchí yá. <sup>18</sup> Te ni cajini sóho ri jnūhun un jéé ni cáhān ichi ándiví, chi ni cahān ri jín máá Jítoho yō xinī yúcu i ún.



<sup>19</sup> Te súcuan cájini yō jeē iyó ndáā ndije tāca jnūhun ni catee tēe ni canacani jnūhun ya nde jenahán. Te vāha jeē na chūhun ni rō jnūhun un jínáhan rō, chi suu cúu nájnūhun in luz jeē cayú nuū néē, nde na cúndijin quivī ndíji ya, te stéén yā ini anuá rō nájnūhun jeē ndíndēé lucero. <sup>20</sup> Te xīhna gā na jécūhun ni rō jeē ni in jnūhun cáhán tutu ī, nasūu jēe súcuan-ni ni cajeni ni tēe cúu. <sup>21</sup> Chi tāca tēe ndoo jeē ní canacani jnūhun ya nde jenahán, tu ní cácahān cuiti de jnūhun jeē cúu ni maá de. Chi sa shuya ni canacani de jnūhun Yāā Dios jeē ni stéén Espíritu Santo nuū de.

*Siquī tēe cástéén jnūhun stáhú*  
(Judás 4-13)

## 2

<sup>1</sup> Te mēhñu ñayuu Israel ún suni ni cahīyo tēe ni canacani jnūhun stáhú. Te suni súcuan çoo tēe stéén jnūhun stáhú méhñu rō. Te squivī de jnūhun stáhú jēe tívi ñayuu sáha. Te ni ma cuajnúhún de Jítoho yō jeē jnáma ya de, te súcuan sáha de jeē jnahnú ndetū yachī de. <sup>2</sup> Te cuehē ñayuu condiquin i modo neé jēe castéén de. Te sáha de jeē cahán neé ñayuu siquī jnūhun vāha ya jeē cúu ichi ndaā. <sup>3</sup> Te siquī jeē cándiyo ni de xūhún, te quende de xūhun rō siquī jnūhun stáhú stéén de nuū rō. Te tu quixín jnūndóho jnahnū ndetū de, chi nde jenahán je ndétu jnūhun ndonda ya siquī cuēchi de.

<sup>4</sup> Chi tu ní ine cáhnu ni Yāā Dios nuū tācá ndajéhé yā jeē ní casáha cuēchi, chi sa ni jnaa yā infierno cáyindihyū nuū néē, cánuhni jín cadena. Te ni chindihyū yā nde quivī sándaā yā siquī. <sup>5</sup> Te suni tu ní ine cáhnu ni yā nuū ñayuu jenahán, chi sa ni scúun ya saū xeén siquī ñayuu ni casáha neé un. Te maá-ni Noé, tēe ni nacani jnūhun ndaā, ni scácu ya de jín úxā gā ñayuu. <sup>6</sup> Te suni ni ndonda ya siquī cuēchi ñayuu ñuu Sodoma jín ñuu Gomorra, te

ni cayū ñuu i ni nduu maá yā na. Te súcuan cúu i in ejemplo nuū tāca gá ñayuu sáha neé jēe quíji ga. <sup>7</sup> Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu neé ní casáha ñayuu neé un. <sup>8</sup> Chi tēe vāha un ní condee de mēhñu ñayuu ún, te ndiquivī ni nacani cuíhyá ni de jeē ní jini sōho de ni jito de tācá jniñu neé ní casáha i. <sup>9</sup> Núu súcuan te maá Jítoho yō chi jnáma ya ñayuu cáchiñúhún núu yā, te núu vēji jnūndóho siquī i. Te chindihyū yā ñayuu casáha neé, návāha ndoho i castigo quivī sándaā yā cuēchi i.

<sup>10</sup> Te víhyá gā stóho ya tēe casáha jniñu jnéhén jēe ndiyo neé ni de, te cácuu jēe ni de siquī jniñu ndácu maá Jítoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahán ndevāha de siquī tāca jēe cácujuhnu nuū sucún. <sup>11</sup> Te ni maá ndajéhé jeē cáhín nuū Jítoho yō, vēsú cácujuhnu ga yā jín fuerza jín jniñu ndíso ya, te tu cácahān ndevāha ya siquī tāca jēe cácujuhnu ún.

<sup>12</sup> Te tēe ún chi cácuu de nájnūhun quiti yúcu jēe ní jéconāā tí jín modo sáha tí, te cátahtū tí návāha nihín ñayuu tí cahni i tí. Chi cácahān neé de siquī tāca jēe tu cájecūhun ni de. Te cuu de nájnūhun jhí tācá quiti ún. <sup>13</sup> Te jeē ní castóho de ñayuu, suni súcuan nanihín de ndoho de. Te cácusí ni de jín táca jēe cácajni ni de, te casáha de tācá jniñu jeē cándiyo neé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jín rō vico rō, te níni cácusí ni de jín jniñu neé jniñu stáhú.

<sup>14</sup> Te cándiyo ni de cájito de ñahan, te tu cájecuñi de sáha de cuēchi. Te cástáhú de ñayuu tahya ni. Chi ni cacāan de jín jnūhun ndiyo ni de tācá ndajniñu. Te tēe jnahnū ndetū cácuu de. <sup>15</sup> Te ni casana de, chi ni castóo de jnūhun jeē cúu ichi ndaā. Te ni candiquin de modo Balaam,

tēe ni nacani jnūhun nde jenahán, séhe Beor. Chi tēe un ní cusī ni de nihin de xūhun siquī jnūhun néé jēē cahán de. <sup>16</sup> Te in burro ni cahán tī nájñūhun in ñayuu, vēsú quiñi ñihín cúu ti. Te ni cahán tī nuū téé ún, te súcuan ni jesi tī jeē ma quihín de cahán de tāca jnūhun néé stívi.

<sup>17</sup> Te tāca téé súcuan chi cácuu de nájñūhun tesóco íchi, nájñūhun vicó jeē stehí táchi. Te jnahnū ndetū de quivícoo de nuū néé nuū lúchi jnúú coyūcú de ní cáni. <sup>18</sup> Chi yōhyo cásándúxi de máá de jíin jnūhun cácahán saá-ni de. Te cánducú de squiví tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeē sa ní quenda i ni cácu i nuū ñayuu casáha jniñu néé. <sup>19</sup> Te cácahán de jeē cáhīyo libre i sáha i ndese-ni cúní maá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi táca jniñu jeē cúndeyí jíin in tēe jeē sáha de, suu yūcuan ndúu de mozo nuū. <sup>20</sup> Chi núu je ni cajini de ndese Yaā cúu máá Jítoho yō Jesucristo, Yaā jnáma yóhó, te núu súcuan ni quenda de ni cácu de nuū jniñu jnéhén iyó ini ñayiví, te yūcuán na te núu ndívicoo tucu de nuū jniñu un jéē cúndeyí tucu jíin de, núu súcuan te néé gá quendóo de jeē sándihí vēsú jeē xihna ñuhún. <sup>21</sup> Chi vāha ga núu jeē tu ní cájini de jnūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuū de. <sup>22</sup> Chi cúndaā jíin de nájñūhun cáhán in jnūhun jenahán: Ina ni nacaji tī jeē ní ndujen ti. Te quini ní ndundoo, ni nacuchi tucu ti ndehyū, achí.

*Siqui jeē ndíji Jítoho yō*

### 3

<sup>1</sup> Ñání mání, yāha cúu carta uū jeē téé ri nuū rō. Te jíin ndíndúú carta yāha cúní rī jeē nacani ní rō siquí ndihí jeē vāha ndaā jeē jéni íchí rí rohó. <sup>2</sup> Te na núcūhun ni rō tāca

jnūhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

<sup>3</sup> Te xihna gā jnūhun yāha na jécūhun ni rō: Jeē nuū cuándihí quiví te quijicoo tēe sácatā siquí jnūhun ndaā yā, chi sáha de táca jniñu néé jéē ndíyo ni maá de. <sup>4</sup> Te cahán de jíináhan de: ¿Najehé cúu jeē tu ndíji Cristo nájñūhun ni jnūhun ya? Chi nde quiví ní cajihí jíi yō te nde vijna, tu ndé sáma cuiti ndihí jeē iyó ndé ná ni jecóo ñayiví, achi de. <sup>5</sup> Chi tu cácuu de jecūhun ni de jeē ndé jenahán ní cuvāha andiví jíin jnūhun ni cahán Yaā Dios. Te ni ndacu ya jniñu jeē na cuvāha ñayiví jíin ndute, te mēhñú ndute ni nane ñuhun íchi. <sup>6</sup> Te suni jíin ndute ni naa ñayiví jenahán, chi ni ndaa ndute jeē ní cuun saū xeén. <sup>7</sup> Te suni súcuan jíin jnūhun ni cahán Yaā Dios ní sátūhva ya jeē cayú andiví jíin ñayiví iyó vijna. Chi máá quiví juicio te cayū ndihí, te jnahnū ndetū ñayuu ni casáha néé.

<sup>8</sup> Te suni ma náa ni rō jnūhun yāha, ñání mání: Jeē nuū maá Jítoho yō chi in quiví cúu nájñūhun mil cuiyā, te mil cuiyā cúu nájñūhun in quiví-ni. <sup>9</sup> Chi nasūu jéē cucuéé máá Jítoho yō siquí jnūhun ni jnūhun ya, nájñūhun cájeni ni sava ñayuu. Chi sa suhva iyó paciencia ni yā nuū yō, chi tu cúní yā jeē jnahnú ndetū ni in yó, chi sa cúní yā jeē ndihí yó nacani ni yō stóo yó cuéchi yó.

<sup>10</sup> Te quiví ndíji máá Jítoho yō, in sanaa-ni te quee, nájñūhun in sanaa-ni te quee ñacuñhá jecuáa. Te quiví ún chi ñihin ndasí andiví, te naa-ni. Te ndihí jeē iyó andiví chi naa sáha ñuhún. Te ñayiví jíin táca jéé iyó ini, ndihí cayū.

<sup>11</sup> Te núu súcuan naa táca un, te cánuu ndasí jéē coo ndoo ánuá rō te chiñúhún vāha ro yá jíináhan ró.

<sup>12</sup> Te condetu ró te condihvī ni rō jeē na quée yachī quivī ndíji Yaā Dios. Te quivī ún cayū andiví te naa-ni, te tāca jēē iyó chi ndute sáha yáñuhūn. <sup>13</sup> Te máá yó chi cándetu yó andiví jéē jíin ñáyiví jéē, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

<sup>14</sup> Núu súcuan, ñánī mánī, níni jéē cándetu ró jéē squícu tācá jniñu yáha, te na ndúcú ndéyí ró návāha quivī ndíji ya te nihīn yā rohó jéē cáyūcu mánī rō, te coo ndoo ró jéē tú na cuēchi ró. <sup>15</sup> Te na jécūhun ni rō jeē siquī jeē iyó paciencia ni maá Jítoho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. <sup>16</sup> Te cáhán de siquī jnúhun yáha núu tāca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cánasama i modo steén jnūhun yí un, nájnūhun násama i jeē cahán sava ga tutu ñ. Te súcuan sáha i jeē jnahnú ndetū maá i.

<sup>17</sup> Te róchó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jnūhun stáhú cástéén ñayuu casáha néé. Chi núu tuú te snáā rō jnūhun cáhīn nīhin ró jíin. <sup>18</sup> Chi sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhyo luu cújéhu ya nde vijna jíin ní cáni. Súcuan na cóo. Amén.

# CARTA HN JEE NI TEE SAN JUAN APOSTOL NUU ÑAYUU CACANDIJE

*Jñuhun cotecu yō ñí cáni*

<sup>1</sup> Jñuhun cátee ri cuajeē nuū rō jijnáhan ró cúu jñuhun máá Yaā jeē je iyó ndé ná tu jecōo táca jée iyó. Te ni cajini sōho ri jeē ni cáhān yā, te ni cajito jínúu rī yā, chi ni cajito vāha rī nuū yā, te ni cajñi rī yā. Te máá yá cúu Jñuhun cotecu yō ñí cáni. <sup>2</sup> Chi Yaā yáha jée sáha ya jeē cótecu yō, ni quenda ndijin yā. Te cácahān rī jñuhun ya, chi ni cajito ri yā. Te cácastūhun rī nuū rō jijnáhan ró síquī Yaā cúu Jñuhun cotecu yō ñí cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan rī. <sup>3</sup> Jeē ní cajito ri jín jée ní cajini sōho ri, yūcuan cúu jeē cácastūhun rī nuū rō, návāha coo inuū ni rō jín yó jijnáhan yó. Te jendaá chi cáhiyo inuū ni yō jín máá Tátá yō Yaā Dios jín Séhe ya Jesucristo. <sup>4</sup> Te jñuhun yáha cátee ri cuajeē nuū rō, návāha cusñi teyí ni rō jijnáhan ró.

*Yaā Dios cúu luz*

<sup>5</sup> Te yāha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaā yā, te tú cuiti na jñiñu nées iyó jín yá. <sup>6</sup> Núu cácahān yō jeē cáhiyo inuū ni yō jín yá, te núu cájica yó nájñuhun nuū nées jeē sáha yó jñiñu nées, núu súcuan te cástáhú yó, te nasúu jñiñu ndaā casáha yó. <sup>7</sup> Te núu cájica yó jín luz yā jeē casáha yó jñiñu ndaā, nájñuhun iyó máá yá jín luz yā jeē sáha ya jñiñu ndaā, yūcuán na te cáhiyo inuū ni yō jín táca jnáhan yó. Te ñiñi máá Séhe ya Jesucristo sándoo yóhó nuū ndihi cuēchi yó.

<sup>8</sup> Núu cácahān yō jeē tú na cuēchi yó, te cástáhú yó máá yó jeē jeni ni yō súcuan, te tu ñiñuhun jñuhun ndaā ini yō. <sup>9</sup> Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yóhó ndihi jeē neé casáha yó. Chi jín yō jeē Yaā vāha Yaā ndaā cúu ya. <sup>10</sup> Te núu cácahān yō jeē tú na cuēchi yó, te nájñuhun sáha yó jée Yaā stahú cúu ya, te tu cándiye ndije yó jñuhun ya.

*Cristo cúu Yaā cahán jehē yō*

## 2

<sup>1</sup> Táca jñuhun yáha tée ri cuajeē nuū rohó jée cácuu ró nájñuhun sēhe ri, návāha ma sáha ró cuēchi jijnáhan ró. Te núu ndé ñn ró ní sáha cuēchi, te iyó máá Yaā cahán jehē yō nuū máá Tátá yō Yaā Dios. Jesucristo Yaā ndaā cúu ya. <sup>2</sup> Te ni socō yā máá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu ñí ñáyiví.

<sup>3</sup> Núu squícu yó jñiñu ndácu Yaā Dios nuū yō, jín yūcuan cúcáhnu ni yō jeē jín ndije yó ndese Yaā cúu ya. <sup>4</sup> Te núu cáhán ñn ñayuu: Ruhú chi jín rī ndese Yaā cúu ya, te núu tu squícu i jñiñu ndácu ya, núu súcuan te stáhú i, te tu cáhán i jñuhun ndaā. <sup>5</sup> Te sa ñayuu squícu jñuhun ya, je ni ije vāha ni i jeē maní i jín yá. Súcuan te cuni yō núu ndúu yó jín yá chí tuú. <sup>6</sup> Núu cáhán ñn ñayuu jeē nduú i jín yá, cánuú jée caca ndaā i nájñuhun ni jica Jesucristo.

*Jñiñu jée ndácu ya nuū yō*

<sup>7</sup> Hermano, nasúu ñn jñiñu jée ndácu ri nuū rō jeē cahán rī jeē na cúndáhú ni rō jnáhan ró. Chi jñiñu jeē je cájini rō nde ná ni quejée ró candiye ró cúu. Te jñiñu yáha jeē ndácu ya, vēji nde jenahán, te suu cúu jñuhun ni cajini sōho ró ndé quiví ní quejée ró candiye ró. <sup>8</sup> Te vēsú súcuan, te níni jñiñu jée cúu, te jñiñu ndaā cúu nuū Cristo jín núu

maá ró jijnáhan ró. Chi je cuayáha jniñu néé jéé iyó nuū néé, te je stéén maá luz ndaā ini anuá yō vijna.

<sup>9</sup> Núu ñn ñayuu cahán i jeé jíca i jíin luz yā, te núu jíto uhū i jnánhan i, ñayuu ún chi jíca ga i nájñuhun nuū néé jíin cuéchi. <sup>10</sup> Te ñayuu jeé cundáhú ni jnánhan, chi jíca i jíin luz yā, cúu jeé sáha i jniñu váha. Te ni ñn ma cúu sáha jeé quívi i cuéchi. <sup>11</sup> Te ñayuu jíto uhū jnánhan, chi iyó i nuū néé, te jíca i nuū néé. Te tu jíni i ndé chi quihín i, chi nuū néé un ní jesi jeé tu jécūhun ni i.

<sup>12</sup> Róhó jéé cácuu sēhe, téé ri jñuhun yáha cuájeé nuū rō, chi jeé siquí Jesucristo te ni ine cáhnu ni Yaā Dios nuū cuéchi ró. <sup>13</sup> Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeé tu ní cúu squívi jexeén rohó cuéchi.

Róhó jéé cácuu sēhe, téé ri jñuhun yáha cuájeé nuū rō, chi cájini rō ndese Yaā cúu máá Tátá yō Yaā Dios. <sup>14</sup> Róhó tátá jijnáhan ró, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi cáhñin nñhin ró, te cácandíje ró jnúhun Yaā Dios, te ni cacundeyí ró siquí jexeén.

<sup>15</sup> Ma cutóó ni rō siquí ñayívi, ni táca jéé iyó ini ñayívi. Chi núu ndé ñayuu cutóó ni i siquí ñayívi, ñayuu ún tu iyó mání i jíin Tátá yō Yaā Dios. <sup>16</sup> Chi táca jéé cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu táca jéé cájni ni yō jeé cuní modo neé máá yó, jíin jéé ndíyo ni yō jeé jíto yó núu, jíin jéé sandúxi yó máá yó siquí ndajniñu névāha yó. <sup>17</sup> Te cuandíhi ñayívi jíin táca jéé ndíyo néé ni yō. Te ñayuu casáha jeé cuní máá Yaā Dios, chi cotecu i ní cáni.

*Jñuhun ndaā jíin jnúhun stáhú*

<sup>18</sup> Róhó jéé cácuu nájñuhun sēhe ri, cáhán rí jíin ró jeé cuandíhi quívi. Te je ni cájini jñuhun ró jéé quíji máá téé cuu contra siquí Cristo. Te nde vijna je ni canecoo cuehē téé jeé cácuu contra siquí Cristo. Te jeé yúcuu jíni yō jeé cuandíhi quívi. <sup>19</sup> Mēhñu máá yó ni quendacoo de, te nasūu jnánhan yó cácandíje cácuu de. Chi núu jeé jnánhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jéé násūu jnánhan yó cácuu ndíhi de.

<sup>20</sup> Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeé yúcuu cájini rō jñuhun ndaā. <sup>21</sup> Núu súcuu te téé ri yáha cuájeé nuū rō, siquí jeé cájini rō jñuhun ndaā, nasūu siquí jeé tu cájini rō. Te cájini rō jeé tú na jñuhun stáhú iyó nuū jnúhun ndaā.

<sup>22</sup> ¿Ndé ñn cúu jeé cahán mání jñuhun stáhú? Suu téé jeé cahán jeé Jesús, tu cúu ndíje ya Cristo, Yaā ní tají Yaā Dios. Yūcuan cúu téé jeé cúu contra siquí Cristo, chi tu jéjñuhún de máá Tátá yō Yaā Dios jíin Séhe ya. <sup>23</sup> Táca ñayuu jeé tu jéjñuhún i Séhe ya, suni tu iyó máá Tátá jíin i. Te ñayuu jeé jejñuhún i Séhe ya, suni iyó máá Tátá jíin i.

<sup>24</sup> Núu súcuu te chuhun vāha ni rō máá jnúhun ni cájini sōho ró ndé jeé xihna ñúhún. Te núu ñúhun vāha ni rō jñuhun ní cájini sōho ró ndé jeé xihna ñúhún, yūcuán na te suni ndúú ró jíin máá Tátá yō jíin Séhe ya. <sup>25</sup> Te yáha cúu jñuhun jeé ni jéjñuhun Jesucristo nuū yō: jeé cótecu yō ní cáni sáha ya.

<sup>26</sup> Jñuhun yáha ní tee ri nuū rō jeé cástūhun rí siquí ñayuu cánducú stáhú róhó. <sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeé yúcuu tu jíni ñúhún jéé steén ni ñn ñayuu nuū rō ndé véé cúu jendaá, chi máá Espíritu cúu jeé steén ndíhi nuū rō, te stéén yā jñuhun ndaā, chi

tu stáhú cuiti yā. Nú súcuan te caca ndúú ró jíin Cristo, nájñūhun stéén Espíritu nuū rō.

<sup>28</sup> Séhē jijnáhan ró, vijna te na cáca ndúú ró jíin Cristo, návāha núu na quénda ndijin yā, te ma yūhu yó, ni ma cúcanu yō nuū yā quivī ndíji ya. <sup>29</sup> Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñu ndaā, séhe Yaā Dios cácuu i.

*Jñūhun ñayuu cácuu séhe Yaā Dios*

### 3

<sup>1</sup> Nacā jeē yóhyo ni cundáhú ni Tatá yō Yaā Dios yohó, chi ni nihīn yō jñūhun cuu yó séhe ya, te suu cúu ndije yó. Jeē yúcuau, ñáyuu ñayiví tu cájini i jeē cúu yó séhe ya, chi tu jíni i ndese Yaā cúu máá yá. <sup>2</sup> Ñāni mánī, vijna te cúu yó séhe Yaā Dios, te ná tu cuni yō ndese coo yó ní cáni. Te je jíni yō jeē quivī quénda ndijin Jesucristo, te nduu yó nájñūhun iyó máá yá, chi coto yó núū yā ndese iyó yá. <sup>3</sup> Te tāca ñáyuu jeē súcuan ñūhūn ni i, chi sándoo i ánuá i, nájñūhun iyó ndoo Jesucristo.

<sup>4</sup> Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. <sup>5</sup> Te je cájini rō jeē ní quiiji Jesucristo ini ñayiví návāha quende yā cuēchi yó. Te máá yá tú na cuēchi ya. <sup>6</sup> Te tāca ñáyuu jeē nduú i jíin yá, tu cájica i jíin cuēchi. Te tāca ñáyuu cájica jíin cuēchi, tu jíni i ya, ni tu jécūhun ni i ndese Yaā cúu ya. <sup>7</sup> Séhē jijnáhan ró, coto ró jéē ma stáhú ni ññ i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun iyó ndaā máá yá. <sup>8</sup> Te ñayuu casáha cuēchi, máá i cácuu séhe jexeén. Chi jexeén cúu jeē sáha cuēchi vēji nde jeē xihna ñūhūn. Jeē yúcuau ní quiiji Séhe Yaā Dios, jeē snáā yā táca jniñu néé sáha jexeén.

<sup>9</sup> Ni ññ ñayuu jeē cúu séhe Yaā Dios, tu jíca i jíin cuēchi, chi ni sáha Yaā Dios jeē ní nduu i nájñūhun iyó máá yá. Te ma cúu ga caca i jíin cuēchi, chi séhe Yaā Dios cácuu i. <sup>10</sup> Súcuan cuni yō ndé ññ cúu séhe Yaā Dios jíin séhe jexeén: Tāca ñáyuu jeē tu sáha jniñu ndaā, jíin jéē tu cundáhú ni jnáhan, nasūu séhe Yaā Dios cúu i.

*Jeē na cundáhú ni yō jnáhan yó*

<sup>11</sup> Yāha cúu jñūhun jeē ní cajini sōho ró ndé jeē xihna ñūhūn: jeē na cundáhú ni yō jnáhan yó. <sup>12</sup> Te ma sáha yó nájñūhun ni sáha Caín, jeē ní cuu de séhe jexeén, te ni jehni de ñani de. ¿Te najehē ni jehni de ñani de? Siqur jeē ñani de ni sáha jniñu ndaā te máni jniñu néé ní sáha máá de.

<sup>13</sup> Hermano jijnáhan ró, ma cunéé ni rō te núu ñayuu ñayiví cácuu ni i nuū rō. <sup>14</sup> Te máá yó chi siqur jeē cundáhú ni yō jnáhan yó, súcuan jíni yō jeē jé ni cácu yó jéē cótecu yō ní cáni. Te ñayuu jeē tu cundáhú ni jnáhan, iyó i jíin jñūhun jnahnū ndetū i. <sup>15</sup> Chi tāca ñáyuu quití ni nuū jnáhan, nájñūhun ñayuu jéñi ndíyi cúu i. Te cájini rō jeē ñáyuu jéñi ndíyi, ma nihín tahú i cotecu i ní cáni. <sup>16</sup> Jeē ni jíhī Cristo jehē yō, yúcuau cúu jeē steén cají ndese cúu jñūhun cundáhú ni. Te máá yó, chi suni súcuan jíni ñūhūn cundáhú ni yō jnáhan yó vésú na cúu yō jehē i. <sup>17</sup> Te núu névāha yó jéē cótecu yō ñayiví, te núu jíni yō jeē cúmanī nuū jnáhan yó, te núu tú cundáhú ni yō i cuāha yó jéē jíni ñūhūn i, núu súcuan ¿te á iyó mánī yō jíin Yaā Dios, chi naún? <sup>18</sup> Séhē jijnáhan ró, ma cundáhú ni yō jíin máá jñūhun cáhán-ni yó, chi sa suhva na cundáhú ndije ni yō nde jíin jniñu sáha yó.

*Ndese cucáhnū ni yō jeē váha sáha yó núū Yaā Dios*

<sup>19</sup> Te súcuan cundaā ni yō jeē squícu yó jñūhun ndaā, te cucáhnū

ni yō jeē váha sáha yó núu yā. <sup>20</sup> Chi núu ánuá yō tú váha sáha siquī jeē iyó cuēchi yó, te Yaā Dios chi cújéhu ga yā vēsú anuá yō, te jíní ndíhi ya táca un. <sup>21</sup> Núu súcuan ñání mání, núu váha sáha ánuá yō siquī jeē tú na cuēchi yó, yūcuán na te cúcáhu ni yō jeē váha sáha yó núu Yaā Dios. <sup>22</sup> Te táca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. <sup>23</sup> Te yāha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájnūhun ni ndacu ya jniñu nuū yō. <sup>24</sup> Te táca ñáyuu squícu jniñu ndácu Yaā Dios, ndúú i jíin yá, te ndeé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuán te jíní yō jeē ndeé Yaā Dios ini yō.

*Jnūhun jeē véji nuū Espíritu jíin jnūhun cáhán contra Cristo*

#### 4

<sup>1</sup> Ñání mání, ma candíje ró táca tée jéē cácahán de jeē jíin Espíritu Yaā Dios cánacani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahán de, chí tuú. Chi ini ñayiví je ni canecoo cuehē tēe cánacani jnūhun stáhú, te cácahán de jeē ndé nuū Yaā Dios vēji. <sup>2</sup> Te súcuan nacuni rō ndé-ni i cúu jeē jíin Espíritu Yaā Dios cahán: táca ñáyuu jeē cácahán ndaā jeē ní quiji Jesucristo, ni nduu ya tēe, máá i cúu jeē jíin Espíritu Yaā Dios cácahán. <sup>3</sup> Te táca ñáyuu jeē tu cájejnūhún jeē súcuan ni nduu ya tēe, máá i chi nasūu jíin Espíritu Yaā Dios cácahán i. Chi sa suhva cácuu i contra siquī Cristo. Te je ni cajini jnūhun ró jéē quíjicoo ñayuu súcuan, te vijna je cáhíyo i ini ñayiví.

<sup>4</sup> Séhē jijnáhan ró, máá ró cácuu séhe Yaā Dios, te je ni cacundayí ró siquī tēe cástáhú un. Chi jéhu ga cúu poder máá Yaā jeē ndeé ini ró,

vēsú poder máá jéē ndeé jíin ñáyuu ñayiví jéē castáhú. <sup>5</sup> Máá i cácuu cuenta ñayiví, te jeē yúcuán cácahán i jnūhun cuenta ñayiví. Te ñayuu cácuu cuenta ñayiví, cájini nahín i jnūhun ún. <sup>6</sup> Te máá yó chi séhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahán yō. Te ñayuu jeē násūu séhe Yaā Dios cácuu, máá i tu cájini nahín i jnūhun cácahán yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

*Máni jnūhun cúndáhú ni iyó jíin Yaā Dios*

<sup>7</sup> Ñání mání, na cúndáhú ni yō jnáhan yó, chi jnūhun cúndáhú ni, nde nuū Yaā Dios vēji. Te táca ñáyuu cundáhú ni jnáhan, chi séhe Yaā Dios cúu i, te jíní i ndese Yaā cúu Yaā Dios. <sup>8</sup> Te ñayuu jeē tu cúndáhú ni jnáhan, tu jíní i ndese Yaā cúu Yaā Dios, chi máni jnūhun cúndáhú ni iyó jíin Yaā Dios. <sup>9</sup> Súcuan ni steén Yaā Dios ndese cúndáhú ni yā yohó, chi ni tají yá Séhe ya ni quiji ini ñayiví yáha, vēsú mañuhún-ni ya iyó, návāha cotecu yō ní cáni sáha ya. <sup>10</sup> Te yāha cúu jnūhun cúndáhú ni: nasūu jéē xíhna máá yó ni iyo maní yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Séhe ya ni quiji, návāha socó yā máá yá jeē quende yā cuēchi yó.

<sup>11</sup> Ñání mání, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. <sup>12</sup> Ni ñayuu tu ní jíto cuiti nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije váha ni yō jíin jnūhun cúndáhú ni. <sup>13</sup> Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. <sup>14</sup> Te ni cajito ri te cácastūhun rí jeē máá Tátá yō ni tají yá Séhe ya ni quiji návāha jnama ya ñayuu ñayiví.

<sup>15</sup> Te núu ndé ñáyuu jejnúhún i jeē Séhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnāhan, ndúú i jíin Yaā Dios, te ndeé yá ini anuá i. <sup>17</sup> Te súcuan cúu jeē íje vāha ni yō jíin jnūhun cundáhú ni, návāha ma yūhu yó quivī sándaā yā jniñu yó. Chi nájñūhun cundáhú ni Cristo, suni súcuan cándaā máá yó ini ñayiví yáha. <sup>18</sup> Te núu manī yō jíin yá, te tu yúhú yó nuū yā. Chi núu ni íje yó jíin jnūhun manī yō jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu íje vāha i jíin jnūhun manī i jíin yá.

<sup>19</sup> Te yohó chi manī ndasí yó jíin Yaā Dios, chi xīhna gā máá yá ni cundáhú ni yā yohó. <sup>20</sup> Te núu ñin ñayuu cahán i jeē manī i jíin Yaā Dios, te núu quítí ni i nuū jnāhan í, núu súcuan te ñayuu stahú-ni cúu í. Chi núu ñin ñayuu tu íyó mání i jíin jnāhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. <sup>21</sup> Chi je ni ndacu ya jniñu yáha nuū yō: Ñayuu jeē manī i jíin Yaā Dios, suni na cóo manī i jíin jnāhan i.

*Jeē cundeyí yó siquī jeneé íyó ini ñayiví*

## 5

<sup>1</sup> Tāca ñáyuu jeē cá candíje i jeē Jesús cúu Cristo, Yaā ní tají Yaā Dios, máá i cácuu séhe Yaā Dios. Te ñayuu manī jíin Yaā cúu Tátá, suni cá cundáhú ni i ñayuu cácuu séhe ya. <sup>2</sup> Súcuan jíiní yō jeē cundáhú ni yō ñayuu cácuu séhe ya, núu manī yō jíin yá te squícu yó jniñu ndácu ya. <sup>3</sup> Chi jeē squícu yó jniñu ndácu Yaā Dios cúu jeē manī yō jíin yá. Te

jniñu ndácu ya chi tú vēyi. <sup>4</sup> Chi tāca ñáyuu cúu séhe Yaā Dios, cundeyí i siquī jeneé íyó ini ñayiví. Te jeē candíje yó jéē cundáhú ni yā yohó, yúcuan cúu fuerza jeē sáha jeē cundeyí yó. <sup>5</sup> Máá-ni ñayuu jeē candíje jeē Jesús cúu Séhe Yaā Dios, máá i cúu jeē cundeyí siquī jeneé íyó ini ñayiví.

*Jnūhun cáhán ndaā siquī Séhe Yaā Dios*

<sup>6</sup> Te jeē ní quiiji Jesucristo ini ñayiví, chi ni jendute ya jíin ndute, te ni jeti niñī yā jeē ni jíhī yā jehē yō. Te nasūu máá ñin-ni jeē ní jendute ya jíin ndute, chi suni ni jeti niñī yā. Te máá Espíritu Yaā Dios cáhán ndaā siquī yā, chi nuū máá Espíritu vēji jnūhun ndaā. <sup>7</sup> Chi ini andiví íyó únī jeē cácahān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúní yá, chi ñin-ni cúu ya. <sup>8</sup> Te ini ñayiví suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúní yáha, chi inuú-ni steén siquī yā. <sup>9</sup> Te cájetáhú yó jnūhun cácahān ndaā tē, te jéhu ga cúu jnūhun cáhán máá Yaā Dios. Te jnūhun ni cahán yā cúu jnūhun siquī Séhe ya. <sup>10</sup> Ñayuu cá candíje jeē Séhe Yaā Dios cúu Jesús, je ni cacundaā ni i jnūhun yáha jeē ni cáhán Yaā Dios. Te ñayuu jeē tu cá candíje jeē ni cáhán Yaā Dios, nájñūhun cása i jeē Yaā stahú cúu ya, chi tu cá candíje i jnūhun ni cahán ndaā yā siquī Séhe ya. <sup>11</sup> Te jnūhun ndaā un cúu jeē ni sáha ya jeē cótecu yō ní cáni, te Séhe ya ndíso jnūhun cotecu yō. <sup>12</sup> Ñayuu jeē íyó Séhe ya jíin i, je ni nihín tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

*Jnūhun consejo jeē sándihí*

<sup>13</sup> Jnūhun yáha tēe ri nuū rohó ñáyuu cá candíje Séhe Yaā Dios,



návāha cucáhnu ni rō jeē ni nīhīn  
tahú rō cotecu rō ní cáni.

<sup>14</sup> Te cucáhnu ni yō Yaā Dios, chi  
jíní yō jeē núu na vé jicán yō nuū yā  
jeē suni cúni maá yá, te jíní nahín yá  
jeē jicán yō. <sup>15</sup> Te núu jíní yō jeē jíní  
nahín yá jeē jicán yō, núu súcuan te  
suni jíní yō jeē sáha ya jeē jicán yō.

<sup>16</sup> Núu ñn ñayuu jíní i jeē sáha  
jnáhan i cuēchi jeē násūu cuéchi jeē  
jnahnú ndetū i cúu, te na cacán  
tahú i nuū Yaā Dios, te cuāha  
ya jnūhun cotecu jnáhan i, te núu  
nasūu cuéchi jeē sáha jeē jnahnú  
ndetū i cúu. Iyó cuéchi jeē jnahnú  
ndetū i sáha, te tu cáhán rī jeē cacán  
tahú rō jehē ñayuu sáha cuēchi  
súcuan. <sup>17</sup> Tācá jniñu néé cúu cuéchi,  
te íyó cuéchi jeē násūu jéē jnahnú  
ndetū i cúu.

<sup>18</sup> Te jíní yō jeē tāca ñáyuu cácuu  
sēhe Yaā Dios, tu jíca i jíin cuéchi.  
Chí Yaā cúu Sēhe Yaā Dios, ndíto  
vāha ya i. Te tú na vé cúu sáha  
jexeén jíin i.

<sup>19</sup> Te jíní yō jeē séhe Yaā Dios  
cácuu yó. Te ñayuu ní ñáyivi yíhi i  
ndaha jexeén.

<sup>20</sup> Te suni jíní yō jeē ní quiji Sēhe  
Yaā Dios, te ni sáha ya jeē jécūhun  
ni yō, návāha cuni yō ndese Yaā  
cúu máá Yaā ndaā. Te ndúú yó  
jíin Yaā ndaā, suu jíin máá Séhe ya  
Jesucristo. Máá yá cúu ndije Yaā  
ndaā, te máá yá sáha jeē cótecu yō  
ní cáni. <sup>21</sup> Séhē jijnáhan ró, na cújiyo  
ró núu tāca jéē násūu Yaā ndaā cúu.  
Súcuan na cóo. Amén.

## CARTA UU JEE NI TEE SAN JUAN APOSTOL

*Jnūhun ndaā jín jnūhun cúndáhú ni*

<sup>1</sup> Máá ná cúu tēe jéhu ndíso jniñu, te tēe ná carta yáha cuájeē nuū ni jēe cúu ní hermana ni nacāji Yaā Dios, jín nuū séhe ní jijnáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jini jnūhun ndaā. <sup>2</sup> Te manī na jín ní jijnáhan ní siquī jeē cácanđije yó jnūhun ndaā yā jeē iyó ini anuá yō, te coo jín yó ní cáni. <sup>3</sup> Te ñūhun ni na jēe Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā níhín, te sáha ya jeē coo ndeyí coo sī ni ní, jín jnūhun ndaā jín jnūhun cúndáhú ni.

<sup>4</sup> Yōhyo ni cusī ni ná, chi ni jini na jēe sava séhe ní cájica i jín jnūhun ndaā, nájñūhun ni ndacu máá Tatá yō Yaā Dios jniñu nuū yō. <sup>5</sup> Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūu ñin jniñu jēe sá ndácu ya cúu, chi jniñu ní ndacu ya nuū yō nde ná ni quejéé yó candíje yó cúu. <sup>6</sup> Te jeē cundáhú ni yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jín jnūhun cúndáhú ni, nájñūhun ni cajini sōho ní ndé ná ni quejéé ní candíje ní.

*Siquī tēe cástáhú*

<sup>7</sup> Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra siquī Cristo. <sup>8</sup> Coto ní jēe ma snáa ni táhū siquī jniñu váha ni casáha ní, chi sa suhva jeē na níhín ni ndíhi tahū ní.

<sup>9</sup> Núu ndé ñáyuu jniñu inga jnūhun, te tu quéndōo i jín jnūhun ni steén Cristo, núu súcuan te tu iyó Yaā Dios jín i. Te ñáyuu quéndōo jín jnūhun ni steén Cristo, chi iyó Tatá yō jín i, te suni iyó Séhe ya jín i. <sup>10</sup> Te núu jinū ñin ñáyuu vehe ní, te núu tu quijnáhan jnūhun stéén i jín jnūhun yáha, te ma cuáha ní jnūhun condee i vehe ní, ni ma cahán ni jnūhun ndeyí ni jín i. <sup>11</sup> Chi ñáyuu cahán jnūhun ndeyí ni jín i, chíndéé ñájñáhan jín i siquī jniñu nées casáha i.

*Jnūhun sandíhi*

<sup>12</sup> Iyó cuehē gā jnūhun cahán na jín ní jijnáhan ní, te tu cúní na tee ná nuū tútu jín tinta. Chi ñūhun ni na cuájeē ná coto jnáhan yó, te ndajnūhun yó, náváha cusī ndasí ni yō.

<sup>13</sup> Tāca séhe cuhū ní, ñahan jeē suni ni nacāji ya, cácahán i jeē sándeyí ni ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnúhún de tēe nání Gayo*

<sup>1</sup> Máá rí cúu tēe jéhnú ndíso jníñu, te tēe rí carta yáha cuájeē nuū rō, amigo Gayo, chí manī rí jíín ró sáha jnūhun ndaā.

<sup>2</sup> Nánī mánī, jícán tahú rí jeē vāha na quihín tēcá jniñu sáha ró, jíín jéē na cóo vāha ró, nájnūhun iyó vāha ánuá rō jíín jnūhun ya. <sup>3</sup> Yōhyo ní cusī ní rí ná ní quecoo sava hermano te ní cacastūhún de nuū rí ndese vāha squícu ró tēcá jniñu ndaā, chí jíca ndaā rō. <sup>4</sup> Tuá na inga sáha jeē cúsi gā ní rí, chí mání jeē nihín rí jnūhun jeē cájica ndaā ñayuu cácuu nájnūhun sēhe rí siquī jeē ní scándíje rí i.

<sup>5</sup> Nánī mánī, yōhyo vāha sáha ró jéē chindéé ñáhán ró tēcá hermano, te víhyá gā núu tēe ñuu jíca cácuu de. <sup>6</sup> Chí tēe un ní canacani de jnūhun nuū ñáyuu cácandíje yáhá, ndese cundáhú ní rō de. Te jícán rí jeē chindéé ñáhán gá rō de, núu na vé jíni ñúhún de jeē caca ga de ichí nuū quihín de, nájnūhun nújnahan ní Yaā Dios. <sup>7</sup> Chí tēe un ní quendacoo de cájica de siquī jniñu Jesucristo. Te tú na vé cáquihín de nuū ñáyuu jeē tu jíni jnūhun Yaā Dios. <sup>8</sup> Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

### *Siquī jeē tú vāha sáha Diótrefes*

<sup>9</sup> Je ní tee rí ñn carta nuū ñáyuu cácandíje jíñā. Te Diótrefes, tu jétáhú de jnūhun cáhán rí, siquī jeē cuní de cujéhnú máá de nuū i. <sup>10</sup> Jeē yúcuan, núu na jéé rí te cahán rí nuū de siquī jniñu sáha de, chí yōhyo sájnúhún de te cáhán de jnūhun stáhú síquī rí jíjnahan rí. Te nasūu máá yúcuan-ní sáha de, chí suni

tu jétáhú de tēcá hermano jéngoo nuū de, te jési de jeē ma cuátáhú ñáyuu nuū tēcá hermano un. Te ñayuu cájetáhú nuū hermano un, quénehen de i nuū cándutútú ñayuu cácandíje.

<sup>11</sup> Nánī mánī, ma ndácu ró ñáyuu casáha jniñu néé, chí sa suhva ñayuu casáha jniñu váha. Chí sēhe Yaā Dios cácuu ñayuu casáha jniñu váha. Te ñayuu casáha jniñu néé, tu cájini i ndese Yaā cúu Yaā Dios.

### *Jeē cácahān i jeē vāha sáha Demetrio*

<sup>12</sup> Tēcá ñáyuu chí cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān maá rí, te cájini rō jeē iyó ndaā jnūhun cáhán rí.

### *Jnūhun sandíhí*

<sup>13</sup> Iyó cuéhē gā jnūhun cahán rí jíín ró, te tu cúní rí tee rí jíín tinta jíín pluma. <sup>14</sup> Chí ñúhún ní rí cua-jeē yachī rí coto jnahan yó, te nda-jnūhun yó.

<sup>15</sup> Te ñúhún ní rí jeē na cóo ndeyí coo sī ní rō. Tēcá amigo yō yāha cácahān i jeē sándeýí ní rō. Te suni cahán rō jíín ñn ñn amigo jíñā jeē sándeýí ní i, áchí rí, te cocahán yō.

## CARTA JEE NI TEE SAN JUDAS APOSTOL NUU ÑAYUU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo iyó íi rō nuū yā jeē cácuu ró ñáyuu manī yā jíin. Te Jesucristo ndíto vāha ya rohó jéē cáyihí ró ndaha ya. <sup>2</sup> Te ñūhun ni rī jeē na cúndáhú gá ni yā rohó, te sáha ya jeē coo ndeyí coo siñ ni rō, te coo manī ndasí yá jíin ró, te na ndúcuehē gā tāca jéē yáha núu rō.

*Siquī tēe cástéén jnūhun stáhú  
(2 Pedro 2.1-17)*

<sup>3</sup> Ñánī manī, yōhyo ní cuu ni rī tee rí nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee rí carta jeē stihví ni rī rohó návāha nducú ndéyí ró jeē ma cási ñayuu nuū jnūhun cácañdije yó. Te jnūhun ún chi je ni jēhe ya ñin jínu-ni nuū tāca ñáyuu maá yá. <sup>4</sup> Chi sava tēe ni castáhú de rōhó ní quivicoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jniñu cásáha de. Cácuu de tēe ndevāha, chí cácahān de jeē vāha ni Yaā Dios, te jeē yúcuu vetū-ni sáha de jniñu néé, cácahān de. Te tu cájejnúhún ndije de Jitoho yō Jesucristo jíin Yaā Dios, jeē mañúhún-ni ya cujéhnu nuū yō.

<sup>5</sup> Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájnáhan ya i jeē ní jinu i ini ñuu tatú Egipto cuahān i. Te vēsú súcuu te cuéé gá te ni snāa yā sava i jeē tu ní cácañdije i. <sup>6</sup> Te suni nucūhun ni rō siquī ndajéhé

yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihiyū yā jijnáhan, te cándetu nde quiji quiví cáhnu jeē sándaā yā jniñu. Te cánuhñí jíin cadena, cáyūcu ní cáni nuū cunú núu néé. <sup>7</sup> Te suni ni stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chí suni ni casáha néé i nájnūhun ni casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihñi i castigo ñuhñu jeē cayú ní cáni, te súcuu cúu i ñin ejemplo nuū ndihí ñayuu.

<sup>8</sup> Te tēe cástáhú jeē ní quivicoo mēhñu ró, vēsú cájini de jeē súcuu ni sáha ya, te cájeni cáhá ni de, te cásáha jnéhén de yiquí cúñu de, te cásqéhichí ni de tēe cándacu jniñu Jitoho yō, te cácahān ndevāha de siquī tāca jéē cácujeñnu nuū sucún. <sup>9</sup> Te nasūu súcuu ní sáha ndajéhé Miguel, vēsú ndajéhé cujeñnu ga cúu ya. Chí tu ní cáhān ndevāha ya ni tu ní ndácunehen ya cuéchi siquī jexeén ná ni casásáhán jnáhan ya jíin jéxeén un jeē siquí yiquí cúñu Moisés ná ni jihí de. Chí suhva-ni ni cáhān yā: Máá Yaā Dios, Yaā cúu Jitoho, cuxeén yā nuū rō, ni achi Miguel. <sup>10</sup> Te tēe cástáhú yáha chí cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcu jéē sá cáa ti, suu yúcuu sáha jeē jnahnú ndetū de.

<sup>11</sup> Nacā xeēn ndoho de núu súcuu, chí tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuni de nihñi de xūhún te cástéén de jnūhun stáhú, nájnūhun ni sáha Balaam. Te jnahnú ndetū de nájnūhun Coré, tēe ni jihí siquī jeē ní cunihni ni de. <sup>12</sup> Tēe yáha núu cándutútú de jíin ró jeē cáyeji manī rō, te cásáha de jniñu cúcanu rō. Chí cáyeji cájihí siñ ni de, te tu cásáha de cuenta ndese caji inga ñayuu, chí máni máá de ndáhvi ni de caji vāha

de. Te cácuu de nájnūhun vicō ichi jēē stehí táchī. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiti gā na modo nane numa. <sup>13</sup> Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jēē cúu jnūhun canu. Te cácuu de nájnūhun quími jeē ní sana ichi. Te je íyó túhva nuū néé nuū lúchi jnúú coyūcú de níí cáni.

<sup>14</sup> Te jeē ní yāha iñū yucūn Adán, te ni cacu Enoc, te ni nacani de jnūhun jeē ni steén Yaā Dios nuū de siquī tāca téē yāha, áchí de: Máá Jítóho yō ni steén yā nuū rī jeē iin quivī te quiji ya jíin cuéhē mil ñayuu maá yá. <sup>15</sup> Te sándaā yā jniñu tāca ñáyuu, te snáhnú ndetū yā tāca ñáyuu casáha néé. Chi máni jniñu néé casáha i siquī jeē canéé máá i, te cácahān i cuéhē jnūhun ndevāha siquī yā. Ni achí Enoc. <sup>16</sup> Tāca téē yāha máni cácahān sōó de, te cácahān de siquī ñayuu. Te máni jeē cúsiñ ni maá de cánducú de. Te cácahān de jeē téē téyí cácuu de, te cácahān yíñúhún de jíin ñáyuu návāha nihīn de jecu nuū i.

*Jeē stihví ni Judas ñayuu cácañdije*

<sup>17</sup> Te máá ró jijnáhan ró ñánī mánī, na núcūhun ni rō jnūhun jeē jé ni canacani téē cácuu apóstol maá Jítóho yō Jesucristo. <sup>18</sup> Chi ni cacahān de: Nde nuū cuándihí quivī te quijicoo téē sácatā siquī jnūhun ndaā yā, te sáha de tācá jniñu néé jēē ndíyo ni maá de. Súcuan ni castūhún apóstol. <sup>19</sup> Tēe un cúu jeē casásūn ñayuu. Te máni cándihví ni de tāca jēē cutíndí ni maá de, chi tu ndéé Espíritu yā jíin de.

<sup>20</sup> Te máá ró ñánī mánī, na íje vāha ni rō jíin jnūhun ndoo ndasí jēē cácañdije ró. Te cacān tahu rō jíin fuerza Espíritu Santo. <sup>21</sup> Te quendōo nihīn ró jíin jnūhun jeē cundáhú ni Yaā Dios rohó. Te condetu ró quivī jeē cótecu rō níí cáni

sáha máá Jítóho yō Jesucristo siquī jeē cundáhú ni yā rohó.

<sup>22</sup> Te sava ñayuu jeē cájeni siquī ni, nducú ró modo scandíje ró i. <sup>23</sup> Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahna i jeē ní cujnéhén jíin jniñu néé casáha i.

*Jnūhun cújéhnú Yaā Dios níí cáni*

<sup>24</sup> Te Yaā Dios chi máñúhún-ni máá yá cúu Yaā ndichí, Yaā jnáma yóhó. Te íyó poder yā jeē coto ya rohó jēē ma quiví ró cuéchi, jíin jēē sáha ya jeē cuíñi ró núū ndíndēe yá, te quiví ún coo ndoo ró núū yā, te cusíñ ndasí ni rō sáha ya. <sup>25</sup> Te na cáhán yō jeē yóhoyo luu cújéhnú ya siquī jeē ni sáha ya jíin Jítóho yō Jesucristo. Te na cáhán yō jeē cújéhnú téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé níí cáni. Súcuan na cóo. Amén.

## JNIÑU QUIJI JEE NI JITO NDIJIN SAN JUAN

*Jeē ni stéén Jesucristo tācá jniñu quiji*

<sup>1</sup> Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñayuu cávandje jeē cácuu i mozo yā. Te stéén yā nuū i tācá jniñu jeē yachí coo. Te ni tají yá ndajéhé yā ni quiji ya ni steén ndi-jin yā jniñu un nuū ruhū Juan jeē cúu ri mozo yā. <sup>2</sup> Te máá rí cástūhun ndáá rí siquī tāca jéé ní jito ri ún, te nácani ndaā rí jnūhun Yaā Dios jíin jnūhun jeē ní cahān ndaā Jesu-cristo.

<sup>3</sup> Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnūhun yáha jeē ní cachi Yaā Dios, te chuhun ni i. Chi je cuacuyajni quiví coo tācá jniñu yósó nuū tútu yáha.

*Jeē téé Juan carta nuū ndihúxá grupo ñayuu cávandje*

<sup>4</sup> Máá rí cúu Juan, te téé ri jnūhun yáha cuájee nuū rohó, ndihúxá grupo ñayuu cávandje jeē cáyūcu Asia. Te ñūhun ni rí jeē máá Yaā Dios na sáha ga yā jeē váha rohó jíināhan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñūhun ni rí jeē suni súcuan sáha ndihúxá Espíritu jeē cáhīin ya yuhu mesa nuū ndácu Yaā Dios jniñu. <sup>5</sup> Te ñūhun ni rí jeē suni súcuan sáha Jesucristo, Yaā cahán ndaā tāca jnūhun. Te xīhna gā máá yá ni natecu mēhñu ndíyi. Te cújéhu ya nuū tāca rey jeē iyó ñayiví. Te máá yá cúndáhú ni yā yohó, te ni nacate ya yohó nuū cuéchi yó jíin níñi yā. <sup>6</sup> Te ni sáha ya jeē ní nduu yó rey jíin sūtú cájejniñu

nuū Tatá yā Yaā Dios. Te na cáhán yō jeē yōhyo luu cújéhu ya te jnū ya poder ní cáni. Amén.

<sup>7</sup> Cuni sōho jíināhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayiví ndahyū i jeē tu ní cávandje i ya. Súcuan nahín coo.

<sup>8</sup> Suhva cáhán máá Jítoho yō, Yaā jnū ndihi poder: Máá rí cúu nájñūhun letra A xīhna ñūhún jíin letra Z jeē sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

*Jeē ní jito Juan jeē cújéhu luu Cristo*

<sup>9</sup> Máá rí cúu hermano rō Juan jíināhan ró. Te inuú-ni ndóho ri jnūndóho jíin ró siquī jeē cávandje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéé ní cachi ndaā rí jnūhun Jesucristo, jeē yúcuan ní cajni i ruhū cuenta preso, te ni cachune i ruhū isla jeē naní Patmos. <sup>10</sup> Te ñin domingo ni jito ndijin rí jeē ni stéén máá Espíritu Santo nuū rí. Te ni jini sōho ri ñin jeē cána jee ñihin ichi yátá rí nájñūhun jeē tívi trompeta. <sup>11</sup> Te ni cahān jíin rí:

Máá rí cúu nájñūhun letra A xīhna ñūhún jíin letra Z jeē sándihí na, chi máá rí cúu Yaā iyó ndé xīhna ñūhún te coo ri ní cáni. Te na téé ró nuū ñin tutu tāca jéé coto ró, te tají ró quihīn nuū ndihúxá grupo ñayuu cávandje jeē cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup> Yūcuán na te ni ndicó coto ri jeē coto ri ndé ñin cúu jeē cahán jíin rí. Te ná ni ndicó coto ri te ni jito ri uxā candelero oro. <sup>13</sup> Te mēhñú ndihúxá candelero un índichi máá Yaā ní nduu tēe. Te ñūhun ya ñin sahna cáni jeē jinú nde nuū

jehé yā. Te núhni ñn cinturón oro jicā yā. <sup>14</sup> Te ixi xíní yā chí yaa nájnūhun ixi lánchi, nájnūhun yuhvá volcán. Te tinūu ya ndíndēe nájnūhun yáñuhūn. <sup>15</sup> Te jehé yā xínú jito nájnūhun cāa cuaán jéē ni ndúhvā nuū horno. Te ññin ndasí cáhān yā, nájnūhun ññin cuehē yūte náhnu. <sup>16</sup> Te ndaváha ya jñí ya uxā quími. Te yuhu ya quēnda jeē cāa nájnūhun espada jeē xeén ndíndúú lado, te suu cúu jñūhun ya jeē niní sándaā yā síquī cuéchi. Te nuū yā cāa nájnūhun niāndii jeē nándii ndaxín.

<sup>17</sup> Te ná ni jito ri yā te ni cotúú rí nuū jéhē yā nájnūhun jeē ni jñí rí. Te ni soó yā ndaváha ya síquī rí, te ni cahān yā:

Ma yūhu ró. Máá rí cúu Yaā iyó ndé xīhna ññuhún te coo ri ní cáni. <sup>18</sup> Te Yaā técu cúu ri. Chí ni jñí rí te ni natecu rí, te vijna chí técu rí ní cáni. Te máá rí jñí poder síquī cuéhyī jéñni ñayuu jín síquī lugar nuū cáyūcu ánuá ndíyi. <sup>19</sup> Núu súcuan te tee ró núu tútu táca jéē ní jito ró, jeē cúu vijna jín jéē cóo ichi núu. <sup>20</sup> Te yāha cúu jñūhun sāhi síquī ndihúxá quími ni jito ró jñí ndaváha rí, jín síquī ndihúxá candelero oro. Ndiuhúxá quími ún cúu nájnūhun ndihúxá jeē cácujeñnu nuū ndihúxá grupo ñayuu cácadíje. Te ndihúxá candelero cúu nájnūhun ndihúxá grupo ñayuu cácadíje.

*Jñūhun cuahān nuū ndihúxá grupo ñayuu cacandíje:*

*Jñūhun cuahān ñuu Efeso*

## 2

<sup>1</sup> Tee ró jñūhun yāha na quíhín nuū jeē cujéñnu nuū ñayuu cácadíje ñuu Efeso: Súcuan cáhān ruhū, Yaā jeē jñí ndihúxá quími jín ndaváha rí, te jíca cuu ri mēhñú ndihúxá candelero oro. <sup>2</sup> Je jíní rí táca jñíñu váha cása ró, jeē cándihvī ni rō síquī jñūhun rí, jín jéē cájendeyí ni rō. Te jíní rí jeē

tu cájēhe ró jñūhun quívicoo ñayuu casáha neé mēhñu ró. Te jíní rí jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de. <sup>3</sup> Te ni cajendeyí ni rō ni candoho ró jñúndóho, te tu ní ndínuu ni rō jeē cácuu ndasí ró jín jñíñu ri. <sup>4</sup> Te vēsú súcuan te iyó jecu jeē cahán rí nuū rō, chí tuá cáhiyo maní váha ró jín rí nájnūhun ni iyo maní rō jín rí quívicó jehé. <sup>5</sup> Núu súcuan te nućūhun ni rō ndese ni castóo ró jñūhun jeē ni iyo maní rō jín rí, te nacani ni rō, te na sáha ró nájnūhun ni casáha ró ndé quívicó ún. Te núu ma nacani ni rō, te yachí jeē rí te stáa ri candelero rō nuū ín, cúu jeē ma cuíñi ga rō jín ñayuu cácadíje. <sup>6</sup> Te vēsú súcuan te iyó ññ jeē váha casáha ró, chí tu cánujñahan cuíti ni rō cájito ró jñíñu neé casáha ñayuu cándiquín jñūhun jeē steén Nicolás. Te suni máá rí tu nújñahan cuíti ni rí jito ri. <sup>7</sup> Ñayuu iyó sóho na chúsóho i jeē cahán maá Espíritu Santo jín táca grupo ñayuu cácadíje. Táca ñayuu jeē cúndeyí síquī jeneé, cuāha rí jñūhun caji i ndehē jeē cúun xíní yúñnu jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

*Jñūhun cuahān ñuu Esmirna*

<sup>8</sup> Tee ró jñūhun yāha na quíhín nuū jeē cujéñnu nuū ñayuu cácadíje ñuu Esmirna: Súcuan cáhān ruhū, Yaā jeē iyó ndé xīhna ññuhún te coo ri ní cáni, te ni jñí rí te ni natecu rí. <sup>9</sup> Je jíní rí táca jñíñu váha cása ró, jín jéē cándoho ndáhú ró. Te vēsú súcuan te cúca ró ndíhi jeē ndíso jñūhun rí. Te jíní rí jeē cácahān neé ñayuu síquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chí cástáhú-ni i, chí sa ñayuu yñi ndaha Satanás cácuu i. <sup>10</sup> Te ma yūhú cuíti rō táca jéē ndoho ró. Chí jexeén je yajni sáha jeē quívicoo

sava ró vecāa jeē coto ndee roho jijnáhan ró, te ndoho ró jnūndóho uxī quivī. Te na cuiñi nihin ró ndé cuu rō, te cuāha ri premio jeē cótecu rō ní cáni. <sup>11</sup> Ñayuu iyó sóho na chúsóhó i jeē cahán maá Espíritu Santo jín táca grupo ñayuu cácandíje. Tāca ñáyuu jeē cūndeyí síquī jéneé, ma nihín i jnūndóho jeē jnahnú ndetū i cuu i vuelta uū, achí yá.

*Jnūhun cuahān ñuu Pérgamo*

<sup>12</sup> Te tee ró jnūhun yáha na quíhín nuū jeē kujéhu nuū ñáyuu cácandíje ñuu Pérgamo: Súcuan cáhán ruhū, Yaā jeē névāha espada jeē xeén ndindúú lado, te suu cúu jnūhun ri jeē sándaā rī síquī cuéchi. <sup>13</sup> Je jíní rī tācá jniñu váha cásáha ró, te jíní rī jeē cáyūcu ró mēhñu ñáyuu jeē ndácu Satanás jniñu nuū. Te vēsú súcuan te cáhīn nihin ró jín jnūhun ri, te tu ní cánayūhu ró jeē cácandíje ró rúhū, ni quivī ni jíhī Antipas, tēe ni squícu váha ni nacani ndaā jnūhun ri. Chi ñuu rō cáyūcu ñáyuu cájejniñu nuū Satanás, te ni cajehni i Antipas. <sup>14</sup> Te vēsú súcuan te iyó jecu jeē cahán rī nuū rō jijnáhan ró. Chi mēhñu róhó ñáyuu ñuu Pérgamo iyó sava ñayuu cándiquīn jnūhun ni steén Balaam. Chi tēe un ní steén de nuū Balac ndese squiví de ñayuu Israel cuéchi jeē cáji i jeē ní sócō nuū ídolo jín jéē cosiquí ndéē jnáhan i. <sup>15</sup> Te suni iyó sava ñayuu mēhñu ró jeē cácandíje ga i jnūhun ni steén Nicolás, te jnūhun ún chi tu nújnahan cuiñi ni rī. <sup>16</sup> Núu súcuan te nacani ni rō síquī cuéchi ró. Chi núu tuú te yachí jeē rī jín espada jeē quénda yuhu ri, te suu cúu jnūhun ri jeē sándaā rī síquī cuéchi. Te jín yúcuan te stóho rī ñayuu jeē candíje ga jnūhun néé un. <sup>17</sup> Ñayuu iyó sóho na chúsóhó i jnūhun jeē cahán maá Espíritu Santo jín táca grupo ñayuu cácandíje. Tāca ñáyuu jeē cūndeyí síquī jéneé, scáji rī i maná jeē yísahí

ichi ándiví. Te suni cuāha ri ñn yuū cuijín núu i, te nuū ún condee ñn síhví jéé, te ni ñn ñayuu ma cūni síhví un, chi máá-ni i jeē nihín. Achí yá.

*Jnūhun cuahān ñuu Tiatira*

<sup>18</sup> Te tee ró jnūhun yáha na quíhín nuū jeē kujéhu nuū ñáyuu cácandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tínūu rī nájnūhun yáñuhūn. Te jehē rī xíñú jito nájnūhun cāa cuaán jéé ni ndúhvā. <sup>19</sup> Je jíní rī tācá jniñu váha cásáha ró, chi cákundáhú ní rō jnáhan ró, te cácandíje nihin ró rúhū, te cájejniñu ró núu rī, te cájendeyí ni rō. Te jíní rī jeē vihyá gā cásáha ró vijna vēsú nde quiví jehé. <sup>20</sup> Te vēsú súcuan te iyó jecu jeē cahán rī nuū rō. Chi iyó ñn ñahan mēhñu ró jéé naní Jezabel, te cájēhe ró jnūhun steén ña nuū rō. Te áchí ña jeē nácani ña jnūhun Yaā Dios. Te tuú chi jín jnūhun steén ña te stáhú ña ñayuu cácandíje jeē cácuu i mozo rī. Te sáha ña jeē casiquí ndéē jnáhan i, jín jéé cáyeji i jeē ní sócō nuū ídolo. <sup>21</sup> Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casiquí ndéē ña. <sup>22</sup> Núu súcuan te na sáha ri jeē jécāva ña jín cuéhyī. Te tāca ñáyuu casiquí ndéē jín ña, suni cuāha ri jnūndóho xeén nuū i, te núu ma nácani ni i stóo i jniñu néé nájnūhun sáha ña. <sup>23</sup> Te sáha ri jeē cúu ñayuu jeē ni scándíje ña. Te súcuan cuni táca grupo ñayuu cácandíje jeē maá rí cúu Yaā jíní ndihí ndese cáa jeē níjnūni jín ánuá ñayuu. Te cuāha ri yáhu ñn ñn ró núu ndese ni casáha ró. <sup>24</sup> Te sava ga rō jeē cáyūcú ñuu Tiatira, jeē tu ní cájetáhú jnūhun steén ñahan ún, ni tu ní cájni ró jnūhun jeē cácahān i jeē jnūhun sāhi gá Satanás cúu, jín máá ró cahán rī jeē ma tēe ga rī inga jniñu síquī rō. <sup>25</sup> Chi máá-ni jeē na quéndōo nihin ró jín jnūhun ndaā cácandíje rō, te quéndōo nihin ró jín ndé quiví ndíji



ri. <sup>26</sup> Tāca ñáyuu jeē cúndeyí síquī jeneé, jíin jée squícu vāha jniñu cúní rī nde vijna te nde quiví sándihí, sáha rí jeē cujéhnū i ndacu i jniñu nuū tācá nación, <sup>27</sup> nájnūhun ni sáha Tátá rī jeē cujéhnū rí ndácu rí jniñu. Te ndacu nihin i jniñu nuū tācá nación. Te nájnūhun cúun yúú i quísi tahu, súcuan squéhichí i ñayuu tu cájendetū nuū rī. <sup>28</sup> Te sáha rí jeē coto i ruhū jeē luu cujéhnū rí quenda ndijin rī, nájnūhun jíto i lucero jeē cáne cúndijin. <sup>29</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Achí yá.

*Jnūhun cuahān ñuu Sardis*

**3**

<sup>1</sup> 'Te tee ró jnúhun yáha na quíhín nuū jeē cujéhnū nuū ñayuu cácandíje ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quími. Je jíin rī tācá jniñu cásáha ró, te cácahān ñayuu jeē cátecu rō, te nuū rí chí nájnūhun ndíyí cácuu ró. <sup>2</sup> Na nátahū ni rō, te ndejée níhin ró jíin jniñu jeē jecu na iyó te ndúcú naa. Chí je jíin rī jeē tu squícu vāha vāha ró núu Yaā Dios. <sup>3</sup> Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chí núu tú natahū ni rō, te cuajeē rí nuū rō ñn sanaa-ni nájnūhun jeē ñn sanaa-ni te quíji ñacuíhná, te ma cúní rō na hora jíin rī nuū rō. <sup>4</sup> Te vésú súcuan te iyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnehén ró sahma ró. Jeē yúcuan cujíin yaa coo sahma ró caca ró jíin rí, chí ñayuu vāha cácuu ró. <sup>5</sup> Chí tāca ñáyuu jeē cúndeyí síquī jeneé, cuāha rí sahma cujíin yaa cuhun í. Te ma ndáhva rí síhví i nuū libro jeē yosó síhví ñáyuu cotecu ní cání. Te cuajnúhún rí i nuū Tátá rí jíin núu tācá ndajéhé yā. <sup>6</sup> Ñayuu iyó

sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Achí yá.

*Jnūhun cuahān ñuu Filadelfia*

<sup>7</sup> 'Te tee ró jnúhun yáha na quíhín nuū jeē cujéhnū nuū ñáyuu cácandíje ñuu Filadelfia: Súcuan cáhán ruhū, Yaā ndoo Yaā ndaa, te névāha rí ndacáa rey David. Te máá rí núne jeē quíví ñayuu nuū ndácu rí jniñu, te ni ñn ma cúu casi, te máá rí jésí, te ni ñn ma cúu nune. <sup>8</sup> Je jíin rī tācá jniñu vāha cásáha ró. Te ni nune rí nájnūhun ñn yéhyí quívícoo ró, te ni ñn ma cúu casi. Chí vésú jecu-ni fuerza rō iyó, te ni cacandíje ró jnúhun rí, te tu cájesi rō yuhu ró jée cácandíje ró rúhū. <sup>9</sup> Te iyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chí cástáhú-ni i. Núu súcuan te sáha rí jeē jecoo i nuū rō te jecuíñí yítí i nuū rō, te cuni i jeē maní rí jíin ró. <sup>10</sup> Te vāha ni casquícu ró jnúhun ní cahān rí jeē cuándeyí ni rō. Te jeē yúcuan jnama rí rohó quíví jeē quíji ñn jnúndóho xeēn síquī ñáyuu ní cáhnu ñayíví, jée cóto ndee ún i jíinahan i. <sup>11</sup> Te yachí ndiji rí. Núu súcuan te quendōo nihin ró jíin jnúhun cácandíje ró, návāha ni ñn ma quénde premio rō. <sup>12</sup> Tāca ñáyuu jeē cúndeyí síquī jeneé, sáha rí jeē cuu i nájnūhun síhín yuū luu ini templo Yaā Dios maá rí. Te ma cújiyo i nuū ndeé yá un. Te tee rí síhví Yaā Dios maá rí jneé i, jíin síhví jée máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quíji ichi ándiví ndé nuū Yaā Dios maá rí. <sup>13</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Achí yá.

*Jnūhun cuahān ñuu Laodicea*

<sup>14</sup> 'Te tee ró jnúhun yáha na quíhín nuū jeē cujéhnū nuū ñáyuu

cácandíje ñuu Laodicea: Súcuan cáhán ruhū, maá Yaā cúu jnūhun ndaā, Yaā cúu testigo vāha jeē cahán ndaā. Te maá rí ni sáha ndihí jeē ni cáhán Yaā Dios jeē na jécōo. <sup>15</sup> Je jíní rí tǎcá jniñu cásáha ró. Te cácuu ró nájñūhun jeē tú mǐjin ni tú jihní, cúu jeē jecu-ni cácandíje ró jnūhun rí, te ni tu cájito uhū rō ni tu cándihvī ni rō siquī. Te nacā jeē vāha núu jeē mǐjin ró chí jéē jihní ró nuú. <sup>16</sup> Te tuú chí máá yávixi-ni ró, chí ni tu cájito uhū rō ni tu cándihvī ni rō siquī. Te jeē yúcuan squéhichī rí rohó nájñūhun ñin jeē tésāhi rí jeē séyūhu rí jeē tu nújnahan ni rí. <sup>17</sup> Te cácahān rō jeē cucá ró, te quéndōo vāha ró, te tu cúmaní ni ñin nuū rō. Te tu cásáha ró cuenta jeē cuécá lí cándoho ró, te ndáhú ndasí ró, te cácuáá ró, te maá ñii lí rō. Te tǎca jéē yáha cúní cahān jeē tu cácandíje vāha ró. <sup>18</sup> Núu súcuan te cáhán rí jíní ró jeē nuū rí cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha rí jeē coo cúcá ndije ró ndihí jeē ndíso jnūhun rí. Te nuū rí cuaan ró sahma cuijín cuhun ró, návāha tú cuanu rō jeē maá ñii lí rō, cúu jeē quéndōo ndaā rō sáha rí. Te cuaan ró tájnā nuū rí, quīvi tinūu ró, návāha ndundijin tinūu ró, cúu jeē jecūhun ni rō jnūhun rí. <sup>19</sup> Tǎca ñáyuu jeē cundáhú ni rí, chí cáhán rí nuū i te stóho rí i, návāha na chúhun ni i. Núu súcuan te na cóndihvī ni rō jijnáhan ró, te nacani ni rō jeē stóo ró cuéchi ró. <sup>20</sup> Cuni sōho, chí ñin rí yehyí ánuá rō te cáhán rí. Te núu ndé-ni róhó cuni sōho te nune ró yehyí ánuá rō, te quīvi rí caji rí staa jíní ró, te suni caji maá ró jíní rí. Te suu cúu jeē cóndee rí anuá rō. <sup>21</sup> Tǎca ñáyuu jeē cúndeyí síquī jeneé, cuāha rí jnūhun conene i jíní rí nuū mesa nuū ndácu rí jniñu. Chí máá rí suni ni snāá rí poder jeneé, te ni cucōo rí jíní Tátá rí nuū mesa nuū ndácu ya jniñu. <sup>22</sup> Ñayuu iyó sóho

na chúsóhó i jnūhun jeē cahán maá Espiritu Santo jíní tǎca grupo ñayuu cácandíje. Achí yá.

*Tǎca jéē cáyūcú andiví cáchiñúhún núu yā*

## 4

<sup>1</sup> Yūcuán na te ni ndacoto rí, te ni jito rí jeē núne ñin yéhyí andiví, te maá Yaā jeē ni cáhán jíní rí jeē xíhna ñúhún, ni cahān tucu jíní rí nájñūhun jeē tíví trompeta. Te ni cahān:

Caa quiji ró yáha, te na stéén rí nuū rō tǎcá jniñu jeē cóo ichi núú gā, achí yá.

<sup>2</sup> Te maá Espiritu Santo ni scóto-ni ya ruhū. Te ni jito rí jeē andiví ñin ñin mesa nuū ndácu jniñu, te néne maá yá nuū mesa un. <sup>3</sup> Te maá yá jeē néne yúcuan cáa ya nájñūhun ndíndéé ñin yuū quiyí ndíí chí ñin yuū cuehé ndíí. Te ñin ticó vēhnde ní jicó ndúu yuhu mesa yā, te ndíndéé nájñūhun ñin yuū cuíí ndíí. <sup>4</sup> Te xiin mesa yā ni jito rí jeē ní jicó ndúu ocó cuñ gā mesa nuū ndácu jniñu. Te nuū mesa un néne ocó cuñ tē jéhu cándiso jniñu. Te cáñuhun de sahma cuijín yaa, te xiní de cáñuhun corona oro. <sup>5</sup> Te nde nuū mesa nuū ndácu ya jniñu ndíndéé taja te ñin te cáhán taja. Te ichi núú mesa yā ñin ndihúxá Espiritu Yaā Dios, jeē cáa nájñūhun uxā yiti náhnu jeē cayú ñuhún. <sup>6</sup> Te ichi núú mesa yā ún suni iyó nájñūhun ñin mar jeē jito quiyí nájñūhun vidrio.

Te xiin mesa yā un ní jicó ndúu cuñ jeē técu. Te iyó cuéhē tinūu níí cáhnu ichi núú jíní ichi yátá un. <sup>7</sup> Te ñin jeē técu un cáa nájñūhun ndicaha. Te inga cáa nájñūhun stiquī. Te jeē uní chí nēe nuū tēe. Te jeē cuñ chí cáa nájñūhun yaha chócó jéé jicó núú tachí. <sup>8</sup> Te ndicúñun jeē técu un iyó ñin ndijēn jeē ñin ñin. Te máni máá tinūu cúu

ní cáhnu nde jíin ní chíji ndijën. Te nduú ñuú tu jécuiñi cuiñi jeë cahán: Yaā ñi Yaā ndoo ndasí cúu máa Jítoho yō Yaā Dios, Yaā jnñi ndihí poder, Yaā iyó vijna, te ni ñyo yá ní cáni, te coo ya ní cáni.

Achí.

<sup>9</sup> Chi máni jeë cácahān ndicúún un jéë cujéhnun ndasí máa Yaā jeë néne nuū mesa, Yaā jeë técu ní cáni cuiñi. Te yíñúhún cácahān un jíin yá, te nácuatáhu núu yā. <sup>10</sup> Te táca jínu jeë casáha súcuan, te ndihóco cuñi tēe jéhnun cándiso jniñu, cájecuiñi yiti de nuū Yaā jeë técu ní cáni cuiñi, cáchiñúhún de ya. Te cástaa de corona de, cájequin de ichi núu jehé mesa yā. Te cácahān de:

<sup>11</sup> Jitoho ná te Yaā Dios na cúu ní.

Te vāha ndasí Yaā cúu ní jéë cácahān i jeë luu cujéhnun ní, te cáhiyo yíñúhún i nuū ní, te jnñi ní ndihí poder.

Chi máa ní ni sáha ndihí jeë iyó, te siquí jeë súcuan ni cuu ni maá ní te ni jecōo ndihí.

Achí de jíjnāhan de.

*Jeë ní nune Londe Yaā Dios tutu*

## 5

<sup>1</sup> Yūcuán na te ni jito ri jeë Yaā néne mesa jeë ndácu jniñu, ndaváha ya jnñi ya ñin tutu cáni jeë ní tuu. Te yósó jnúhun ndindúú lado nítu ún, te ndihyú jíin úxā sello. <sup>2</sup> Te ni jito ri ñin ndajéhé yā jeë ndíso poder, te ni cahān jee:

¿Ndé ñin cúu tēe vāha ndasí jeë cóndiso jniñu cahnde sello te nune tutu yáha? achí ndajéhé yā.

<sup>3</sup> Te ni andiví ni ñayiví ni jeë iyó chíji ñayiví, tu ní ñyo ní ñin jeë cóndiso jniñu nune tutu ún, ni jeë cóto nuū.

<sup>4</sup> Te ni ndahyū ndasí rí, chí tu ní ñyo ní ñin jeë cóndiso jniñu nune te cahu tutu ún, ni jeë cóto nuū. <sup>5</sup> Yūcuán na te ni cahān ñin tēe jéhnun un jíin rí:

Ma ndahyú rō, chí iyó ñin Yaā ndíso jniñu jeë cahnde yā ndihúxá

sello ndihyú tutu, te nune ya. Te máa yá chí iyó cuéhē poder yā, nájnūhun jeë iyó cuéhē fuerza ñin ndicaha. Te ni cacu ya chíji yucūn Judá, jeë cúu yucūn rey David. Te ni snāā yā poder táca jéneé.

<sup>6</sup> Yūcuán na te ni jito ri Yaā jeë cúu Londe Yaā Dios jeë ní cajehni i te ni natecu. Te Londe un ñin ya nuū ñin mesa Yaā Dios, mēhñú ndicúún jeë técu, jíin tēe jéhnun cándiso jniñu. Te iyó úxā ndiqui jíin úxā tinūú Londe ún. Te tinūú un cúu ndihúxá Espiritu Yaā Dios jeë ní taji yá ní jengoo ní cáhnu ñayiví. <sup>7</sup> Te Londe un ní jequihin ya tutu jeë jnñi ndaváha Yaā jeë néne nuū mesa. <sup>8</sup> Te ná ni quihin ya tutu ún, te ndicúún jeë técu jíin ndihóco cuñi tēe jéhnun cándiso jniñu, ni cajecuiñi yiti núu yā. Te ná ñin ná ñin tēe jéhnun un cándaha yaa jeë naní arpa, jíin cóhō cúu oro jeë ññuhun chitú súje cutú. Te sūje cutú un cúu máa táca jnúhun jeë cájicān tahu ñayuu yñi ndaha Yaā Dios. <sup>9</sup> Te ni cajita de ñin yaa jeë, te suhva cáhān:

Vāha ndasí Yaā cúu ní jéë quihin ní tutu te cahnde ni sello jeë ndihyú.

Chi ni cajehni i níhín, te jíin níñi ní ni nacuaan ní ñayuu mēhñu táca raza, táca yuhu, táca ñuu, táca nación, návaha cuu i ñayuu Yaā Dios.

<sup>10</sup> Te ni sáha ní jéë cuu i rey jíin sūtū nuū Yaā Dios,

te ndacu i jniñu ñin ñayiví.

Achí de cájita de.

<sup>11</sup> Te ni jito ga rí, te ni jini sōho ri jeë cácahān cuéhē ndajéhé yā jeë ní cajicó ndūú xiin mesa yā, jíin xiin ndicúún jeë técu, jíin xiin tēe jéhnun cándiso jniñu. Te iyó cuéhē ndasí millón ndajéhé un. <sup>12</sup> Te suhva ni cacahān jee ya:

Vāha ndasí Yaā cúu Londe jeë ní cajehni i.

Te jeë yúcuán jnñi ya poder, te yōhyo cúcá yá,

te yōhoyo ndíchí yá, te ndíso ya cuehē fuerza,  
 te cáhiyo yíñúhún ndihi nuū yā, te luu cújéhu ya,  
 te cácahān i jeē váha ndasí Yaā cúu ya.

Achí.

<sup>13</sup> Te suni ni jini sōho ri jeē cácahān ndihi jeē ni sáha Yaā Dios jeē iyó ini andiví jíin ini ñayiví jíin chíji ñayiví jíin ini mar. Te ndivii un ní cacahān:

Cúsī ni yō cahán yō jeē yóhoyo váha  
 Yaā cúu máa Yaā néne mesa  
 nuū ndácu ya jniñu,

jíin Yaā cúu Londe Yaā Dios.

Te na cóo yíñúhún yó núu yā, chí cújéhu luu ya,

te jnái ya poder níí cáni cuiti.

Achí.

<sup>14</sup> Te ni cacahān ndicúun jeē técu:

Súcuan na cóo, áchí.

Te ndihóco cuūn tēe jéhu cándiso jniñu ni cajecuiñi yití de, te ni cachiñúhún de nuū Yaā jeē técu níí cáni cuiti.

*Siquí ndihúxá sello*

## 6

<sup>1</sup> Yūcuán na te Londe un ní cúu Londe Yaā Dios, ni jehnde yā ñin jeē uxá sello un. Te ni jini sōho ri jeē cahán ñin jnáhan ndicúun jeē técu ún, nájnūhun cáhán taja:

Nehen te cuni rō.

<sup>2</sup> Te ni ndacoto ri, te ni jito ri ñin caballo cuijín. Te jeē yosó síquī tī un ndáhá ñin arco jeē stáva nduva. Te ni jecūhun ñin corona xinī. Te ni quenda ni jejnáhan, te ni cundeyí síquī ndihi.

<sup>3</sup> Yūcuán na te Londe un ní jehnde yā sello uū. Te ni jini sōho ri jeē cahán inga jnáhan ndicúun jeē técu:

Nehen te cuni rō.

<sup>4</sup> Te ni quenda ñin caballo cuehé, te jeē yosó síquī tī ndíso jniñu jeē snáa jnūhun cáyūcu mání ñayuu ñayiví, te quejéé i cahni jnáhan i. Te ni nihñ ún ñin espada cáhnu.

<sup>5</sup> Yūcuán na te Londe un ní jehnde yā sello unī. Te ni jini sōho ri jeē cahán inga jnáhan ndicúun jeē técu:

Nehen te cuni rō.

Te ni ndacoto ri, te ni jito ri ñin caballo jnuú. Te jeē yosó síquī tī ndáhá ñin balanza jeē chícuāha, chí coo jnamā xeēn. <sup>6</sup> Te mēhñú ndicúun jeē técu un ní jini sōho ri ñin jeē cahán:

Máa ñin kilo-ni trigo nihñ i jíin yáhu i jeē sájniñu i ñin quiví. Te núu cebada, te unī-ni kilo nihñ i jíin yáhu i jeē sájniñu i ñin quiví. Te aceite jíin vino chí ma sáha ró jeē cúmanī. Achí.

<sup>7</sup> Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúun jeē técu:

Nehen te cuni rō.

<sup>8</sup> Te ni ndacoto ri, te ni jito ri ñin caballo cuaán yaa, te jeē yosó síquī tī cúu máa cuéhyi jéhni ñayuu. Te ichi yátá un ndíquín máa jnúhun jeē quiví ñayuu lugar nuū cáyūcu ánuá ndiyi. Te ndindúú un cándiso jniñu jeē ndóna síquī ñin jeē ndicúun parte ñayiví, te cuu sáha jeē cúu ñayuu jíin guerra, jíin jnamā, jíin cuéhyi xeén, jíin táca quiti xeén jeē iyó ñayiví.

<sup>9</sup> Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnūhun Yaā Dios te ni canacani ndaā i jnūhun ya, te síquī yūcuan ní cajehni ñayuu i. <sup>10</sup> Te ni cacana jee ánuá un:

Jitoho ná Yaā Dios, máa ní cúu Yaā ndoo te váha squícu ní jéé ni jéjnūhun ní. ¿Te nasaa ga tiempo coo te sándaā ni jéhe ná, te nacuaña ní jéé ndútahū ñayuu ñayiví jéé ní cajehni sañá? áchí.

<sup>11</sup> Yūcuán na te ni jéhe ya sahna cuijín cuhun i jíjnáhan i, te ni cahán yā jíin i jeē na ndétátú i jecu gā tiempo. Chí iyó gá hermano i jeé

cájejniñu nuū yā, jeē suni jini ñúhún cuu i návāha jinu número i, achí yá.

<sup>12</sup> Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni kujnúú níandii nájnūhun ñn sahma jnúú. Te ní yóo ni nduu nájnūhun niñi. <sup>13</sup> Te quimi andiví ní ñingoyo nuū ñūhun nájnūhun ñingoyo ndehē yíhi yujnu higo sáha tachí níhin. <sup>14</sup> Te andiví ní cujiyo cuahān nájnūhun jeē nátuu ñn tutu cáhnu. Te táca yucu jíin táca isla ni cujiyo cuangoo inga lado. <sup>15</sup> Te táca rey ñayiví, jíin jéē cácujeñnu, jíin jéē cucá, jíin táca capitán, jíin jéē cádiso poder, jíin mozo jeē ní cajeen ñayuu, jíin téé cásájniñu cuenta maá, ní cachisāhi máá ini yaū cava jíin méhñu cava chíji yucu. <sup>16</sup> Te ni cacahān i jíin yucu jíin cava:

Ndicó cáva siquī rī, na quísāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. <sup>17</sup> Chi ni quee maá quívī cáhnu jeē cuáha ya castigo, ¿te ndé ñn canda condichi nuū yā? achí i jíináhan i.

*Ñayuu táca yúcūn Israel jeē ni jécondeo sello jneē*

## 7

<sup>1</sup> Te ná ni cuu jniñu yáha, te ni jito ri cuūn ndajéhé yā jeē cáhlin ndicúun lado ñayiví. Te cájesi yā nuū ndicúun tachí, návāha ma quee nuū ñūhun ni nuū mar ni nuū ní ñn yujnu. <sup>2</sup> Te suni ni jito ri inga ndajéhé yā, vēji ichi núu cáne níandii. Te ndáhá yá sello Yaā Dios, Yaā técu. Te ni cahān jee ya jíin ndicúun ndajéhé un jéē ndíso jniñu jeē sáha daño nuū ñūhun íchi jíin núu mar:

<sup>3</sup> Ma sáha ró daño nuū ñūhun ni nuū táca yujnu ni nuū mar, chí nde na téé yó sello jneē táca ñayuu cájejniñu nuū Yaā Dios yō.

<sup>4</sup> Te ni jini sōho ri jeē achí jéē iyó ciento uū xico cuūn mil ñayuu jeē ni jécondeo sello jneē. Te ñayuu un

cácuu táca yúcūn ñayuu Israel. <sup>5</sup> Te iyó úxī uū mil ñayuu cácuu yúcūn Judá jeē ni jécondeo sello, jíin úxī uū mil yúcūn Rubén, jíin úxī uū mil yúcūn Gad, <sup>6</sup> jíin úxī uū mil yúcūn Aser, jíin úxī uū mil yúcūn Neftalí, jíin úxī uū mil yúcūn Manasés, <sup>7</sup> jíin úxī uū mil yúcūn Simeón, jíin úxī uū mil yúcūn Leví, jíin úxī uū mil yúcūn Isacar, <sup>8</sup> jíin úxī uū mil yúcūn Zabulón, jíin úxī uū mil yúcūn José, jíin úxī uū mil yúcūn Benjamín. Ndiñi yúcūn yáha cúu jeē ni jécondeo sello.

*Ñayuu cuehē jeē cáñuhun sahma cuijín*

<sup>9</sup> Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu táca nación jíin táca raza jíin táca yuhu jíin táca ñuu. Te cáhlin i nuū mesa nuū ndácu Yaā Dios jniñu jíin núu maá Yaā cúu Londe. Te siquī jeē cuehé ndasí i, te ni ñn ma cúu cahu nasaa i cúu. Te cáñuhun i sahma cuijín, te cándáhá i ñuū. <sup>10</sup> Te ni cacana jee i: Yaā Dios maá yó cúu jeē ní jnama yóhó,

Yaā jeē néne nuū mesa jeē ndácu jniñu,

jíin Yaā cúu Londe Yaā Dios.

Achí i jíináhan i. <sup>11</sup> Te ndiñi ndajéhé ni cajicó ndúu yā cáhlin ya xiin mesa Yaā Dios, jíin xiin téé jéñu cándiso jniñu, jíin xiin ndicúun jeē técu. Te ni cajecuiñi yití yá ni cachiñúhún yá Yaā Dios ichi núu mesa yā. <sup>12</sup> Te ni cacahān yā:

Amén. Cúsī ni yō cahán yō jeē yóhoyo vāha Yaā cúu Yaā Dios maá yó.

Te luu cújéñnu ya te ndichí yá.

Te na nácuatáhú yó nuū yā, te na cóo yíñúhún yó núu yā.

Chi jnñi ya poder, te ndíso ya cuehē fuerza jeē ní cáni cuiti.

Amén.

Achí táca ndajéhé yā.

<sup>13</sup> Yūcuán na te ni cahān ñn téé jéñnu un jíin rí:

¿Ndé ñayuu cúu yāha jéé cáñuhun sahma cuijín, te ndé chi véjicoo i?

<sup>14</sup> Te ni cahān rī jín de:

Maá ní cúu jeē jiní, Tátā.

Te ni cahān de jín rí:

Yāha cácuu ñayuu jeē ní cayāha i jeē ní cajito i jñúndóho xeēn. Te ni canacate i sahma i jín níñi maá Londe, te ni nduyaa vāha, cúu jeē ní ndundoo ánuá i ni sáha ya. <sup>15</sup> Jeē yúcuan cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā. <sup>16</sup> Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. <sup>17</sup> Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jín i nuū cáne ndute jeē cótecu i sáha. Te Yaā Dios nacuaa yā ndute núu i jijnāhan i, te ma ndahyú gā i. Achí tée jéhnu ún.

*Siquī sello uxā jín cohō cūu oro*

## 8

<sup>1</sup> Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájnūhun sava hora. <sup>2</sup> Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un. <sup>3</sup> Yūcuán na te ni quee inga ndajéhé, ndáhá yá ñn cohō cūu oro, te ni jecuiñi yā nuū altar. Te ni jēhe cuehē sije cutú núu yā, návāha socō yā jín jnúhun cájicān tahu ndihi ñayuu cácandíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. <sup>4</sup> Te nuū cohō cūu jñi ndajéhé un ní cane ñuhmā súje cutú, ni caa nuū Yaā Dios nde jín jnúhun cájicān tahu ñayuu cácandíje Yaā Dios. <sup>5</sup> Yūcuán na te ni quihīn ndajéhé un cohō cūu un. Te ni scutú yá ticua ñuhūn jeē cayú nuū altar. Te ni jete yā nde ini ñayiví. Te

ni sáha jeē ni cáhān taja, te ni ñihīn, te ni ndindéé taja, te ni jñāa.

*Jnúhun siquī trompeta*

<sup>6</sup> Yūcuán na te ndihúxá ndajéhé jeē cándāhá ndihúxá trompeta, ni casatūhva ya jeē tiví yā.

<sup>7</sup> Te ndajéhé ñn ni tiví yā trompeta. Te ni cuun ñiñi ini ñayiví jín ñúhūn jeē ni sácā núu jín níñi. Te ni cayú ñn jeē uní parte ñayiví, jín ñn jeē uní parte yujnu, jín ñn jeē uní parte ite cuí.

<sup>8</sup> Te ndajéhé uū ni tiví yā trompeta. Te ñn nájnūhun ñn yucu cáhnu jeē cayú ñuhūn ni ñingava cuahān nuū mar. Te ñn jeē uní parte mar ni nduu niñi. <sup>9</sup> Te ni jihí ñn jeē uní parte quiti ñúhūn nuū mar. Te ni naa cuehē barco, chi ñn ñn jeē tāca úní ni naa.

<sup>10</sup> Te ndajéhé uní ni tiví yā trompeta. Te ni ñingava ñn quimi cáhnu ichi ándiví, te cáyú nájnūhun cáyú ñn yiti cáhnu. Te ni ñingava siquī ñn ñn jeē tāca úní yūte jín núu cáne ndute. <sup>11</sup> Te quimi un nání quimi uvuā. Te ñn jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

<sup>12</sup> Te ndajéhé cuūn ni tiví yā trompeta. Te ñn jeē uní parte niāndii jín yóo jín quimi ni tiví. Te ni ndunee ñn jeē uní parte i, te tuá ni cundijin ñn jeē uní parte nduú jín ñuú.

<sup>13</sup> Te ni ndacoto ri, te ni jini sōho ri jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyucú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

## 9

<sup>1</sup> Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñn quimi nde ini ñayiví. Te nuū quimi un ní jēhe ndacáa jeē núne túhñchi cúnú ndasí. <sup>2</sup> Yūcuán na te ni nune un túhñchi, te ni cane

ñuhmā ni caa nájñuhun ñuhmā ñin ijnū cáhnu. Te ñuhmā un ní sáha jeē ní cunee niāndii jín ní nū táchí. <sup>3</sup> Te nuū ñuhmā un ní canecoo tica ndicuéhyí, ni jitē núu ti ní cáhnu ñayiví. Te ni jēhe ya jñuhun jeē sáha ti nájñuhun cásaħa tisuhma xeēn jeē iyó ini ñayiví. <sup>4</sup> Te ni ndacu ya jñiñu nuū tī jeē ma sáha ti daño ite jín yúcū cuí jín yujnu, chi máni ñayuu jeē tu ndéé sello Yaā Dios jneē i cúu jeē tuu ti. <sup>5</sup> Te tu ní jēhe ya jñuhun jeē cáhni tī ñayuu, chi máni jeē stóho ti i uhūn yoō. Te sáha ti jeē jetú i nájñuhun jeē jetú ñayuu jeē túu tisuhma i. <sup>6</sup> Te quiñvī ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

<sup>7</sup> Te tica ndicuéhyí un cáa ti nájñuhun caballo jeē cáhīyo tūhva quingoo nuū cuáñáhan. Te xinī tī ñuhun nájñuhun corona oro. Te née ti nuū té. <sup>8</sup> Te iyó ixi ti jeē cáa nájñuhun ixi xíní ñahan. Te jñuhun ti cáa nájñuhun jñuhun ndicaha. <sup>9</sup> Te ní tī ndihyú nájñuhun sahma cáa. Te ñhín ndijēn tī nájñuhun ñhín jeē cuángoo cuehē caballo nuū guerra cáñuhun ti carreta. <sup>10</sup> Te suhmā tī ndíso iñu nájñuhun tisuhma. Te jín súhmā tī cuu stóho ti ñayuu uhūn yoō. <sup>11</sup> Te iyó ñin jeē kujéñu nuū tī, te suu cúu ndajéhé jexeēn jeē ndíto tūhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jēē snáa.

<sup>12</sup> Je ni yāha ñin jñūdóho, te iyó úu gā jñūdóho jeē quiñi.

<sup>13</sup> Te ndajéhé iñū ni tiví yā trompeta. Te ni jini sōho ri ñin jñuhun jeē ni cahān nde mēhñú ndicúún yiquí altar oro jeē ín nuū Yaā Dios. <sup>14</sup> Te ni cahān un jín ndajéhé iñū jeē ndahá trompeta:

Nandají ró ndicúún ndajéhé jeē fruhní yuhu yúte cáhnu jeē naní Eufrates, achí.

<sup>15</sup> Te ni nandají ndicúún ndajéhé un, návāha cahni ñin jeē uní parte

ñayuu ñayiví. Chi je cáhīyo tūhva ndajéhé un jeē siquí maá hora jín quiñvī jín yoō jín cuiyā jeē cóo súcuan. <sup>16</sup> Te ni jini sōho ri jeē achí jēē iyó úu ciento millón soldado jeē cáyoso caballo.

<sup>17</sup> Te ni steén gā yā nuū rī, te ni jito ndijin rī táca caballo. Te tēe cáyoso siquí tī cáñuhun de camisa cáa jeē cuehé, jeē ndeé, jín jēe cuaán. Te xinī caballo un cándāa nájñuhun xinī ndicaha. Te yuhu ti quenda ñuhūn jín ñuhmā jín azufre. <sup>18</sup> Te jín únī jeē quenda yuhu caballo un, te ni jihí ñin jeē uní parte ñayuu, suu jín ñuhūn jín ñuhmā jín azufre. <sup>19</sup> Chi yuhu ti jín súhmā tī iyó fuerza jeē cáhni tī ñayuu. Chi suhmā tī cándāa nájñuhun coō, te iyó xinī, te jín yúcuan stóho ti ñayuu.

<sup>20</sup> Te sava ga ñayuu jeē tu ní jihí jín táca jñūdóho yāha, tu ní nácani ni i stóo i ídolo jeē ní casáha i. Te tu ní stóo i jeē cáchiñuhún i táca táchí jín ídolo jeē ní cuvāha jín oro jín plata jín cáa cuaán jín yúu jín yujnu. Te táca un chi tu cúu coto, ni tu cúu cuni sōho, ni tu cúu caca. <sup>21</sup> Te ni tu ní cáncani ni i stóo i jeē jéñi i ndiyi, jín jēē satásí i, jín jēē jíca jnéni i, jín jēē sacuíñná i.

*Ndajéhé jeē ndahá libro lulí*

## 10

<sup>1</sup> Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xinī yā ñuhun ticō vēhndé. Te nuū yā ndíndēe nájñuhun niāndii, te sihin ya cáa nájñuhun uñ sihin jeē cáa ná cáa ñuhūn. <sup>2</sup> Te ndahá yá ñin libro lulí jēē núne. Te ni jeni ya jehē váha ya nuū mar, te jehē jecó yá nuū ñuhun íchi. <sup>3</sup> Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja. <sup>4</sup> Te ná ni cacahān uxā taja, te je iyó tūhva ri jeē téē ri jñuhun un

núu. Te ni jini sōho ri ñin jñūhun ichi ándiví jeē ni cáhān jín rí:

Chuvāha ró táca jñūhun jeē ní cacahān uxā taja ún, te ma steén rō, ni ma téé rō, áchí.

<sup>5</sup> Yūcuán na te ndajéhé jeē ní jito ri jeē ñin nuū mar jín núū ñūhun, ni ndonehen ya ndaha váha ya ichi ándiví. <sup>6</sup> Te ni ndacunehen ya sihví máá Yaā jeē técu ní cáni, Yaā ni sáha andiví jín ñáyiví jín mar jín táca ndihí jeē iyó ñin. Te jín síhví yá un ní cahān teyí ndajéhé:

Ma cucuéé gá jeē jínu ñayiví. <sup>7</sup> Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jñūhun sáhi yá, nájñūhun ni castūhun yá nuū táca mozo yā, tēe ni canacani jñūhun ya nde jehahán, áchí ndajéhé.

<sup>8</sup> Yūcuán na te máá jéé ní jini sōho ri jeē ni cáhān ichi ándiví, ni cahān tucu jín rí:

Cuáhān te quihin ró libro lulí jéé núne jeē ndahá ndajéhé jeē ñin nuū mar jín núū ñūhun, áchí.

<sup>9</sup> Te ni jehēn rī nuū ndajéhé un, te ni jicān rī jeē na cuáha ya libro lulí un núū rī. Te ni cahān yā:

Quihin te caji rō. Chi vixí sáha ñin yuhu ró nájñūhun ndūxi, te chíji ró chi cuhiyá sáha, áchí yá.

<sup>10</sup> Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ñin yuhu ri nájñūhun ndūxi. Te ná ni cuu ni yeji rī, te ni jité iyá ni rī. <sup>11</sup> Te ni cacahān jín rí:

Cánúu jéé nacani tucu ró jñūhun Yaā Dios, ndese coo siquí ñayuu cuehē ñuu jín cuéhē nación jeē sñin sñin yuhu, jín síquí cuehē rey cándacu jniñu, áchí jín rí.

*Siquí uū testigo yā*

## 11

<sup>1</sup> Yūcuán na te ni cajéhe ñin yujnu nuū rī, jeē cúu ñin cūhva jeē chícuāha. Te ni cacahān jín rí:

Ndocuñí te chicuāha ró templo cáhnu Yaā Dios jín altar, te cahu ró nasaa ñayuu cúu jeē cáchiñūhún núu yā yūcuán. <sup>2</sup> Te ma chícuāha ró patio yatá templo. Chi je ni jéhe ya nuū ñayuu táca ñuu jicá. Te coyūcú i ñin ñuu ñi yāhá, te uū xico uū yoō cueñú i síquí ñuu. <sup>3</sup> Te tají rí uū testigo rī jeē nácani jñūhun ri mil uū ciento uní xico quiví. Te cuhun de sahna ndáyí jéé cácuñihyá ni de síquí cuéchi ñayuu, áchí yá.

<sup>4</sup> Te ndíndúu testigo un cúu nájñūhun ndíndúu yujnu olivo jín ndíndúu candelero jeē ñin nuū Yaā Dios, Yaā chí ñayiví. <sup>5</sup> Te na-ni ñayuu núu nducú sáha ndevāha jín ndíndúu testigo un, te quenda ñūhūn yuhu ndíndúu de, te cayū ndihí ñayuu cájito uhū i de. Te súcuan cuu táca ñayuu jeē nducú sáha ndevāha jín de. <sup>6</sup> Te iyó poder ndíndúu testigo un jéé cási de jeē ma cúun saū ñi tiempo jeē nácani de jñūhun ya. Te suní iyó poder de sáha de jeē nduu ñiñí táca ndute. Te cuu stívi de ñayiví jín ndíndúu jñūndóho, núu nasaa jínu cácuñi de. <sup>7</sup> Te ná ni jínu ni canacani de jñūhun ya, yūcuán na te quenda quiti xéén jeē néne tūhñchi ún. Te cuajnáhan jín ndíndúu de, te cundeyí jín de, te cahni de. <sup>8</sup> Te ndíyí ún cava nuū yáhu ñuu cáhnu nuū ní cajehni i máá Jítoho yō jicá cruz. Te ñuu un cácahān yatá i jeē ñuu Sodoma jín Egipto cúu, síquí jeē xeēn cuéchi iyó ñuu ún. <sup>9</sup> Te ñayuu táca ñuu, táca yúcūn, táca yuhu, táca nación, chí coto i jeē cáva ndíndúu ndáyí un úní quiví yosáva, te ma cuáha i jñūhun jeē quíndūji. <sup>10</sup> Te ñayuu ñi cáhnu ñayiví cusí ndasí ní i jeē ní cajihí de, te sáha i vico, te cuáha i regalo nuū jnáhan i. Chi ndíndúu téé ni canacani jñūhun ya ún, ní casáha de jeē ní candoho ndasí ñayuu ñayiví. <sup>11</sup> Te jeē yáha uní quiví yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí



ñáyuu coto i jeē ní canatecu de.  
 12 Yūcuán na te cuni sōho de jeē cána  
 jee ichi ándiví:

Caa ró quijicoo ró ndé yāhá, áchí.

Te ndaa de mēhñu vicō quingoo  
 de andiví, cuni ñayuu cájito uhū i  
 de. 13 Te máá hora un jnáa ndasí,  
 te ndicó cáva naa ñn jeē uxí parte  
 ñuu ún. Te jíin ñujnáa ún cuu uxā  
 mil ñayuu. Te tāca gá ñayuu jeē ndóo,  
 yūhú ndasí i, te cahān i jeē cujéhnu  
 Yaā Dios jeē ndeé andiví.

14 Súcuan yāha jnūndóho uū, te  
 yachí coo jnūndóho uní.

### *Siquī trompeta uxā*

15 Te ndajéhé uxā ni tiví yā  
 trompeta. Te ni jini sōho ri ni  
 cacahān jee ichi ándiví. Te súcuan  
 ni cacahān:

Tācá nación ñayiví je ni nuquihí  
 ndaha máá Jítoho yō Yaā  
 Dios

jíin Cristo jeē ní tají yá.

Te ndacu ya jniñu ñí cáni cuiti.

Achí.

16 Yūcuán na te ndihóco cuñ tēe  
 jéhnu cándiso jniñu jeē cánene de  
 mesa de ichi núu Yaā Dios, ni ca-  
 jecuiñi yití de, ni cachiñúhún de ya.

17 Te ni cacahān de:

Na cútahū na núu ní, Tátā Yaā Dios,  
 chí máá ní jniñi ndihí poder,

te cúu ní Yaā iyó vijna, te ni iyo ní ñí  
 cáni, te coo ní ñí cáni.

Te ni najniñi ní ndivii jeē iyó,

te jíin poder ni ní quejéé ní ndácu ní  
 jniñu nuū.

18 Ñayuu tācá nación ni caquití ni i  
 siquī ní.

Te vijna chí ni quee quiví jeē cuáha  
 ní castigo i,

jíin jéē sándaá ní jniñu tāca ndíyi.

Te cuáha ni táhū nuū tāca mozo ni  
 jéē ní canacani jnūhun ní,

jíin núu tāca ñáyuu cájejniñu nuū ní,  
 jíin ñáyuu cáchiñúhún núu ní,

cúu ñayuu cácujeñu jíin jéē tuú.

Te vijna te snáhnú ndetū ni ñáyuu  
 castiví ñayiví.

Achí de jíjnáhan de.

19 Yūcuán na te ni nune templo  
 Yaā Dios jeē iyó andiví. Te ni ca-  
 jito ñayuu jeē yúcuan ñe yejnū jeē  
 ñúhun contrato yā. Te ni ndindéé  
 taja, te ññin, te cáhán taja, te ni  
 jnáa, te ni cuun xeēn ñiñí.

*Jnūhun ñahan jíin cóo cáhnu*

## 12

1 Yūcuán na te ini andiví ní cane  
 ñn jeē nahán náa ni yō jito yó: ñn  
 ñahan jeē ñúhun ña niāndii nájnūhun  
 sahma, te ñin jehē ña siquī yoó, te  
 ñúhun ñn corona xiní ña jeē ndeé  
 uxí uū quími. 2 Te ñúhun sēhe ña.

Te ni ndahyū cohó ña jeē ndóho  
 ña jéhnde chíji ña jeē scácu ña i.

3 Yūcuán na te ini andiví ní cane  
 tucu inga jeē náa ni yō jito yó: ñn  
 cóo cuehé cáhnu ndasí. Te iyó úxā

xiní tí jíin úxí ndiquí tí. Te ndihúxá  
 xiní tí ñúhun corona. 4 Te jíin súhmā

tí ni stáa tí ñn jeē uní parte quími  
 jeē iyó andiví, te ni síngoo tí ini

ñayiví. Te ni ine tí nuū ñahan jeē  
 scácu sēhe ún, ndétu tí cocó tí sēhe

ñá jeē jé yajni cacu i. 5 Te ni scácu  
 ña ñn sēhe yí, te sūchi un ní jeconaa

jeē ndácu ññin i jniñu nuū ndívi  
 nación. Yūcuán na te ni ndoñúhún

sēhe yí ña ún, ni ndaa i cuahān i nde  
 nuū ñn mesa Yaā Dios nuū ndácu

ya jniñu. 6 Te ñahan un ní jinu ña  
 cuahān ña nde nuū ñúhun téhé núu

iyó ñn lugar jeē ní sātúhva Yaā Dios.  
 Te yūcuán condee ña ññin ña jeē

cáji ña mil uū ciento uní xico quiví.

7 Yūcuán na te ni cajejnáhan ini  
 andiví. Chí ndajéhé jéhnu ga jeē

naní Miguel jíin táca ndajéhé jeē  
 cácu mozo nuū yā, ni cajejnáhan

jíin cóo cáhnu. Te cóo un jíin táca  
 ndajéhé maá, ni cajejnáhan jíin yá.

8 Te tu ní cácuñdeyí tí, te tuá ní cúu  
 coyūcu tí andiví. 9 Súcuan ni cuu

jeē ní quenehen ya cóo cáhnu un  
 jéē iyó ndé jenahán ndasí. Te nání

tí jexeén jíin Satanás, te máá tí cúu  
 jeē stahú ndihí ñayuu ñayiví. Te ni

scáne ya tí nde ini ñayiví jíin táca  
 ndajéhé tí.

10 Yūcuán na te ni jini sōho ri ñn jñūhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steén ndijin yá jeē jñí ya poder, jíin jéē ndácu ya jñíu, jíin jéē ndíso jñíu máá Cristo jeē ní tají yá. Chi je ni quenehen ya maá jéē cahán cuēchi siquí tācá hermano yō. Chi nduú ñuú ni cahán cuēchi siquí i nuū Yaā Dios maá yó. 11 Te ni cacundeyí i siquí Satanás un, ní sáha jñūhun jeē ni jíhí Yaā cúu Londe, jíin jéē ní cacahán ndaā i jñūhun Yaā Dios, jíin jéē tu ní cundáhú ni i máá i, chí ni jēhe i jñūhun candíje i vēsú núu cuu i jeē siquí yá. 12 Núu súcuan te na cúsi ndasí ni tāca róhó jéē cáyucú andiví. Te nacā xeēn ndoño tāca róhó jéē cáyucú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quití xeēn ni, chí jíiní jeē tuá coo cuehē gā tiempo jeē stahú ñayuu. Achí.

13 Te ni jini coō cáhnu ún jéē ni scáne ya maá cuáhán ini ñayiví, te ni jinu ti jíin ñahan ní scácu sēhe yí, jeē xeēn sáha ti jíin ña núu. 14 Te ni cajēhe uū ndijēn yaha chócó cáhnu nuū ñahan ún, návāha ndava ña quihín ña lugar ña nuū ñūhun téhé, te cācu ña nuū coō ún. Te yūcuán condee ña uní cuiyā yosáva, te nihín ña jeē caji ña. 15 Te yuhu cóo un ní cane ndute nájnūhun ñn yūte cáhnu, cuahán yatā ña návāha jneni ña. 16 Te máá ñuhun chí ni chindéé ñáhán ñahan ún, chí ni nune-ni, te ni nungoo yūte jeē ní cane yuhu cóo ún. 17 Yūcuán na te xeēn ni quití ni coō cáhnu ni jito ti ña. Te cuahán tí cuajnáhan tí jíin táca gá sēhe ña, suu ñayuu casquícu jñíu ndácu Yaā Dios te cácandíje vāha i jñūhun Jesucristo.

*Jñūhun siquí uū quití xéén*

### 13

1 Te ni indichi rí yumár. Te ni jito ri jeē ní cane ñn quití xéén ini mar. Te iyó úxā xiní tí jíin

úxí ndiquí tí. Te ndihúxí ndiquí tí ñūhun corona. Te ndihúxá xiní tí ndeé ñn síhví néé jéē quití ní Yaā Dios sáha. 2 Te quití xéén jeē ní jito ri ún, cáa tí nájnūhun cuiñí, te ndaha tí cáa nájnūhun ndaha oso, te yuhu tí cáa nájnūhun yuhu ndícaha. Te nuū quití un ní jēhe coō cáhnu poder maá jíin mesa nuū ndácu máá jñíu. Te ni sáha jeē cujéhnu ndasí quití ún. 3 Te ni jito ri jeē ni tújī ñn xiní tí, jeē jé yajni cuu tí nuú. Te ni nduvāha tí jeē ni tújī tí. Te nahán ní naa ni ñayuu ní cáhnu ñayiví ní jito i, te ni cajetáhú i nuū tí. 4 Te ni cachiñúhún i coō cáhnu siquí jeē ni sáha tí jeē cujéhnu ndasí quití xéén un, te suni ni cachiñúhún i quití xéén un. Te ni cacahán i:

Tú ni ñn jeē cujéhnu nájnūhun quití yáha, te tú ni ñn cundeyí cuajnáhan jíin tí, áchí i jíináhan i.

5 Te tu ní jési ya jeē cahán tí jeē quití téyí cúu tí, jíin jéē cahán ndevāha tí siquí yá. Te ni nihín jñíu tí jeē ndácu tí jñíu uū xico uū yoō. 6 Te ni quejéé tí ni cahán ndevāha tí siquí Yaā Dios, jíin siquí síhví yá, jíin siquí nuū ndeé yá, jíin siquí tāca jéē iyó andiví. 7 Te tu ní jési ya jeē cuajnáhan tí jíin ñayuu maá Yaā Dios, te cundeyí tí jíin i. Te suni ni nihín jñíu tí jeē ndácu tí jñíu nuū ñayuu tāca yúcuñ, tācá ñuu, tācá yuhu, tācá nación. 8 Te ñayuu ní cáhnu ñayiví jéē tu yósó síhví i nuū tútu, ni cachiñúhún i quití xéén un. Te Yaā cúu Londe jeē ní cajehni i, máá yá névāha tutu un jéē yosó síhví ñayuu cotecu ní cáni, te je yósó síhví i nde quiví ni jécōo ñayiví.

9 Ñayuu iyó sóho na chúsóhó vāha i jñūhun cahán rí yáhá. 10 Tāca ñayuu jeē sáha jeē quiví jnáhan vecāa, suni vecāa cone máá i. Te tāca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chí jíiní ñúhún cuandeyí ni i jíin

jnúndóho te ma jécuiñi i candije i jnūhun cúndáhu ni yā i.

<sup>11</sup> Yūcuán na te ni jito ri inga quití xéen jeē ní cane chíji ñuhun. Te iyó úú ndiqui ti jeē cáa nájnūhun ndiqui lánchi. Te nájnūhun tachī coō cáhnu, súcuan tachī cahán tī. <sup>12</sup> Te nájnūhun ndácu quití xéen xihna ñúhún jniñu, suni súcuan ndácu quití uū ún jniñu, ín ti nuū quití xihna ñúhún. Te quití uū sáha ti jeē chiñúhún táca ñáyuu ní cáhnu ñayiví nuū quití xihna ñúhún, quití ní túji jeē jé yajni cuu tī te ni nduváha ti. <sup>13</sup> Te quití uū suni sáha táca jniñu jéhu jeē nahán náa ni yó jito yó. Chi ni scúun ti ñuhún ichi ándiví ní quiji ini ñayiví, ní cajito ñayuu. <sup>14</sup> Te ni stahú tī ñayuu ñayiví jín táca jniñu jéhu jeē ni níhñ tī poder jeē sáha ti, jito jínúū quití xihna ñúhún. Te ni ndacu ti jniñu jeē na sáha ñayuu imagen quití xihna ñúhún, quití ní túji jín espada, jeē jé yajni cuu tī te ni nduváha ti. <sup>15</sup> Te quití uū ni nihñ tī poder jeē chutáchí tī xijní imagen quití xihna ñúhún, návaha cuu cahán, te cahni táca ñáyuu jeē tu cájetáhú i chiñúhún i máa. <sup>16</sup> Te táca ñáyuu cújéhu jín ñáyuu tu cújéhu, táca ñáyuu cucá jín ñáyuu ndahú, táca ñáyuu sájniñu cuenta maá jín mozo jeē ní cajeen ñayuu, ni sáha ti jeē ni jécondee ñn jnunī ndaváha i chí jnéé i. <sup>17</sup> Te ni ñn ñayuu ma cúu cuaan i xícó i te núu tu ndíso i jnunī jeē cúu síhví tī chí jnúni número jeē cúu síhví tī. <sup>18</sup> Jnūhun ndíchí cúu jeē cahán rī yāhá: Táca ñáyuu jécūhun vāha ni cuu tava i cuenta número quití xéen un, chí número un cúu síhví ñn tēe. Te número un cúu iñū ciento unī xico iñū.

*Yaa jeē cájita 144,000 ñayuu*

## 14

<sup>1</sup> Yūcuán na te ni ndacoto ri, te ni jito ri jeē ín maá Yaa cúu Londe xiní yucu Sión. Te cáhñin ciento uū xico cuūn mil ñayuu jín yá. Te jnee

i ndéé síhví máa yá jín síhví Tátá yā Yaa Dios. <sup>2</sup> Te ni jini sóho ri jeē níhñ ndasí ichi ándiví, nájnūhun jeē jica cuehē yūte chí jeē cahán nihñ taja. Te jeē níhñ un sáha nájnūhun jeē cátee cuehē ñayuu yaa jeē naní arpa. <sup>3</sup> Te cáhñin i ichi núu mesa nuū ndácu Yaa Dios jniñu, jín núu ndicúun jeē técu, jín núu ndihóco cuūn tēe jéhu cándiso jniñu. Te ni cajita i ñn yaa jeé. Te ni ñn ñayuu tu cúu cutūhva i yaa ún, chí máni máa ciento uū xico cuūn mil ñayuu jeē ní jnama ya i ini ñayiví. <sup>4</sup> Te táca tēe yáha cácuu jeē tu ní casáha cuēchi jín ñahan casáha néé, chí tēe ndoo ánuá cácuu de. Te cándiquñ de Londe ndé-ni cúu-ni nuū cuahán yā. Chi ni jnama ya de ini ñayiví, te máa de cácuu tēe jeē xihna gā ni cacandije nuū Yaa Dios jín núu Yaa cúu Londe. <sup>5</sup> Te tú cuiti na jnūhun stáhú cácahñ de, chí tēe ndoo ánuá cácuu de, cáhñin de nuū mesa Yaa Dios.

*Jnūhun jeē ní cacahñ ndinúni ndajéhé yā*

<sup>6</sup> Yūcuán na te ni jito ri inga ndajéhé yā jeē ndáva cuahñ sava andiví. Te ndíso ya jnūhun jeē jnama Yaa Dios ñayuu cotecu i ní cáni. Te ni nacani ya jnūhun un núu táca ñáyuu ní cáhnu ñayiví, nuū ñáyuu táca nación, táca yúcūn, táca yuhu, táca ñuu. <sup>7</sup> Te ni cahñ jee ya:

Conso iyo ró núu Yaa Dios, te na cahán rō jeē yóhoyo cújéhu ya, chí je ni queue quiví jeē sándaā yā siquī rō ndese ni casáha ró. Te na chíñúhún ró yā, chí máa yá ni sáha andiví jín ñayiví jín mar jín táca núu cáne ndute, áchí ndajéhé yā.

<sup>8</sup> Yūcuán na te ndíquin inga ndajéhé yā vēji, te ni cahñ yā:

Je ni naa iñ ñuu teyí Babilonia. Chi ni sáha jeē ñáyuu táca nación casíquí ndéé i Yaa Dios jeē ní castóo i ya te cándiquñ i idolo jín táca jniñu néé, áchí ndajéhé uū.

9 Yūcuán na te ndíquin inga ndajéhé unī vēji, te ni cahān jee ya:

Xeēn coo siquī ñayuu cáchiñuhún quitī xéén jín imagen tī, te jéhe i jñuhun condee jnuni tī jneē i chí ndaha i. <sup>10</sup> Chi nihīn i castigo xeēn siquī cuéchi ni casáha i, chi quitī ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jín azufre, coto tācá ndajéhé Yaā Dios jín Yaā cúu Londe. <sup>11</sup> Te ñuhmā nuū cándoho i cánda ní cáni cuiti. Te nduú ñuú tu ndetátú ñayuu cándoho ún jeē ní cachíñuhún quitī xéén jín imagen tī, jín jéē ni jécondee jnuni sihví tī. <sup>12</sup> Jeē yúcuán ñayuu maá Yaā Dios jeē casquícu i jniñu ndácu ya te cácanđje vāha i Jesús, cánuú jéē cuánde yí ni i. Achí ndajéhé unī.

<sup>13</sup> Yūcuán na te ni jini sōho ri ñin jñuhun ichi ándiví jéē ni cáhān jín rí:

Tee ró jñuhun jeē cahán rī jín ró yāhá: Nacā jeē ndetū tāca ñayuu cácanđje Jitoho yō jeē cájihí vijna jín ndé ní cuáhān yō. Jendaá chi ndetátú i jeē ní casáha i jniñu váha, te jniñu i un má nāā chí sáha jeē quendōo vāha i ní cáni, áchí Espíritu.

*Jeē ní nastútú yá ñayuu ñayiví*

<sup>14</sup> Yūcuán na te ni ndacoto rí, te ni jito ri ñin vicō cuijín. Te nuū vicó un néne Yaā ní nduú tēe. Te xiní yā ñuhun corona oro, te ndáhá yá ñin hoz xeēn. <sup>15</sup> Te ni quenda inga ndajéhé yā ini templo, te ni cana jee, te cahán jín Yaā néne nuū vicó un:

Cahnde ni jín hoz ní, te nastútú ní ñayuu ñayiví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

<sup>16</sup> Yūcuán na te Yaā néne nuū vicó ni nastútú yá ñayuu váha ini ñayiví, nájñuhun táhndé trigo jín hoz.

<sup>17</sup> Yūcuán na te ni quenda inga ndajéhé yā ini templo jeē iyó ándiví, te suni ndáhá yá ñin hoz xeēn. <sup>18</sup> Te nde nuū altar ni quenda tucu inga ndajéhé, te ndíso jniñu ya

siquī ñuhūn altar. Te ni cana jee ya, te cahán yā jín ndajéhé jeē ndahá hoz xeēn:

Cahnde ró jín hoz xeēn ró, te nastútú ró ñayuu casáha néé ini ñayiví, nájñuhun jeē cájehnde i chutū ndehē uva jeē jé ni jīchi, áchí.

<sup>19</sup> Te ndajéhé un ní jehnde yā jín hoz yā, te ni nastútú yá ñayuu casáha néé ini ñayiví, nájñuhun ndútútú ndehē uva. Te ni jnaa ya i nuū nihín i castigo xeēn Yaā Dios, nájñuhun jnaa i ndehē uva nuū taxín. <sup>20</sup> Te ni jéhe ya castigo i yatā ñuū, te ni jica níñi i nájñuhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

*Ndihúxá ndajéhé jín ndihúxá jñundóho jeē sándihí*

## 15

<sup>1</sup> Te ni jito ri inga jniñu jéhnu ichi ándiví jéē nāā ni yō jito yó. Chi cáhīn uxā ndajéhé yā jeē cuāha ndihúxá jñundóho sandhí na. Te jeē jínu ndihúxá jñundóho yáha, te jínu jeē cuáha Yaā Dios castigo xeēn siquī cuéchi.

<sup>2</sup> Te suni ni jito ri ñin jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhīn ñayuu ni cacunde yí siquī quitī xéén jín imagen tī, jín jéē tu ní cáquihin i jnuni número jeē cúu síhví tī. Te cándāhá i yaa jeē naní arpa jeē ni jéhe Yaā Dios nuū i. <sup>3</sup> Te cájita i yaa jeē ní tava Moisés, tēe cúu mozo Yaā Dios, jín yaa maá Yaā cúu Londe. Te súcuán cáhān yaa ún:

Yōhoyo nāā ni na cájito ná ndihí jniñu jéhnu te yí jéē sáha ní,  
Tátā Yaā Dios, chí jnā ní ndihí poder.

Te máni jniñu ndaā jniñu váha sáha ní,  
jeē cúu ní Rey nuū tācá nación.

<sup>4</sup> Tú ni ñin i iyó jéē ma cónso iyo i nuū ní, Tátā Yaā Dios.

Te ndihí i cahān nahín i jeē yóhyo cújéhu ní.

Chi máñúhún ñi máá ní cúu Yaā ndoo Yaā ñi.

Te quijicoo ñayuu tācá nación, chiñúhún i níhín,

chi je ni cajini i jeē ndaā vāha sáha ní tāca jniñu.

Achí i cájita i.

<sup>5</sup> Yūcuán na te ni ndacoto ri, te ni jito ri jeē ini andiví nūne cuarto ñi ini templo nuū ñne tabla yuū jeē yosó ley yā. <sup>6</sup> Te ini templo un ní quendacoo ndihúxá ndajéhé jeē cándiso jniñu siquī ndihúxá jñūndóho. Te cáñuhun ya sahma fino iyó ndoo te xíñú. Te núhni cinturón oro jicā yā. <sup>7</sup> Te ñn jnāhan ndicúun jeē técu ni jéhe ñn ñn cohō oro nuū ndihúxá ndajéhé un. Te ini cohō un ññhun chitú castigo xeēn jeē ni jéhe Yaā Dios, Yaā técu ní cáni. <sup>8</sup> Te ni chitú ndñ ñuhmā ini templo, te suu ni steēn jeē yóhyo cújéhu Yaā Dios jñn poder jññ ya. Te ni ñn tu ní cúu quiví ini templo, chi nde na ndñi ndihúxá jñūndóho jeē cuáha ndihúxá ndajéhé yā.

*Siquī ndihúxá cohō jeē ññhun castigo*

## 16

<sup>1</sup> Yūcuán na te ini templo ni jini sōho ri ñn jññhun cáhān jee jññ ndihúxá ndajéhé yā:

Cuangoo te cati ró siquī ñayiví ndihúxá cohō jeē ññhun castigo xeēn jeē ni jéhe Yaā Dios, achí.

<sup>2</sup> Te cuahān ndajéhé ñn, te ni jeti ya cohō yā siquī ñayiví. Te tāca ñayuu jeē ndeé jñññ quiti xéén un jññ jéé cáchiñúhún imagen tí, ni canecoo ndñhyi xeēn jeē jetú ndasí.

<sup>3</sup> Te ndajéhé uū ni jeti ya cohō yā nuū mar, te ndute mar ni nduu nájnñhun ñññ ndíyí. Te ni cajihí tācá quiti jeē ññhun ini mar.

<sup>4</sup> Te ndajéhé unī ni jeti ya cohō yā ini tāca yúte jññ tāca nuū cáne ndute, te ni nduu ñññ. <sup>5</sup> Te ni jini

ri jeē cahān ndajéhé jeē ndíso jniñu siquī ndúte:

Tátā Yaā Dios, máá ní cúu Yaā ndoo Yaā ñi, Yaā iyó vijna, te ni iyo ní ññ cáni. Te ndaā sáha ní jeē súcuan ni ndonda ní siquī cuéchi i. <sup>6</sup> Chi ni casáha i jeē ní jeti ñññ ñayuu ndoo ní jññ ñayuu ní canacani jññhun ní. Te vijna chi ni sáha ní jéé cájhi i ñññ, chi ñayuu casáha jniñu néé cácuu i, jeē cánuú ndoho i súcuan.

<sup>7</sup> Te ni jini sōho ri jeē cahān inga nde nuū altar:

Tátā Yaā Dios, máá ní cúu jeē jññ ndihí poder. Te jniñu vāha jniñu ndaā ni sáha ní jéé ní ndonda ní siquī cuéchi i. Achí.

<sup>8</sup> Te ndajéhé cuñn ni jeti ya cohō yā siquī níandii, te ni jéhe Yaā Dios jññhun jeē ndujíhni ndasí níandii návāha cayū ñayuu. <sup>9</sup> Te xeēn ndasí ní cayū tāca ñayuu. Te vésú súcuan te tu ní cánacani ni i stóo i cuéchi i, ni tu ní cácahān i jeē cujéhu Yaā Dios. Chi sa suhva ñi cacahān ndevāha i siquī yā jeē ni jéhe ya tācá castigo yāha nuū i.

<sup>10</sup> Te ndajéhé uhūn ni jeti ya cohō yā nuū mesa nuū ndácu quiti xéén jniñu. Te ni cunee ní cáhnu nuū ndácu ti jniñu. Te cánacayihí ñayuu yuhu i jeē cájetū ndasí i. <sup>11</sup> Te vésú súcuan te tu ní cánacani ni i stóo i jniñu néé casáha i. Chi sa ni cacahān ndevāha i siquī Yaā Dios andiví siquī jeē cájetū ndasí i jññ ndñhyi xeēn cándoho i.

<sup>12</sup> Te ndajéhé iñū ni jeti ya cohō yā siquī yúte cáhnu jeē naní Eufrates. Te ni ichi ndihí ndute yúte ún, návāha nune ñn ichi jeē quijicoo tāca rey ichi núú cáne niandii.

<sup>13</sup> Te ni jito ri jeē ini yuhu coō cáhnu jññ ini yuhu quiti xéén jññ ini yuhu máá téé nácani jññhun stáhú ní canecoo unī tachí jeē cáa nájnñhun sáhvá. <sup>14</sup> Te tachí ún chi ndajéhé jexeēn cácuu, te casáha jniñu jéhu jeē nāa ni ñayuu cájito i. Te ni quendacoo tachí un jéé nastútú tāca rey ní cáhnu ñayiví,

jeē cuajnáhan de siquī Yaā Dios quiṽi jeē ndíji ya. Te máá yá cúu jeē jnā ndíhi poder. <sup>15</sup> Cuni sóho jínáhan ró, chí sanaa ni rō te ndíji rí, nájñūhun jeē in sanaa-ni te quiji ñacūhñá. Te nacā jeē ndetū ñayuu jeē ndito ni i, te ndító yúcúni sahma i, návāha ma cáca vichí lí i, cúu jeē tú na cuēchi coo siquī i jeē cucanu i nuū tāca ñáyuu, achí yá. <sup>16</sup> Te ni canastútú táchí un tāca rey, ni candutútú in lugar jeē yuhu hebreo naní Armagedón.

<sup>17</sup> Te ndajéhé uxā ni jeti ya cohō yā nuū tachí. Te ini templo andiví jín nuū mesa nuū ndácu ya jniñu, ni cane in jñūhun jeē ni cáhān jee:

Je ni jīnu, áchí.

<sup>18</sup> Yūcuán na te ni ndindéé taja, te nñin, te cáhān taja, te ni jnāa ndasí. Chi nde ní cáni jeē iyó ñáyuu ñayiví, tu ní jnáa nñin ndasí nájñūhun jeē ni jnáa ni jito rí. <sup>19</sup> Te máá ñuu cujéhnū Jerusalén, ni cusin ni nduu uní parte, te ní cáhnu ñayiví ni naa tācá ñuu. Te ñuu teyí Babilonia, chí ni sáha nahín yá jeē ní ndutahū i castigo xeēn, chí ni quiṽi ndasí ni yá siquī cuéchi i. <sup>20</sup> Te ni naa tāca isla, te suni yucu tuá gā. <sup>21</sup> Te ichi ándiví ní cuun ñíñí náhnū siquī ñayuu, jeē véyi nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí ñíñí, chí in jñūndóho xeēn ni cuu.

*Jeē ndonda ya siquī ñuu neé Babilonia*

## 17

<sup>1</sup> Yūcuán na te ni quiji in jnáhan ndihúxá ndajéhé jeē ní candahá ndihúxá cohō ún, te ni cahān yā jín rí:

Nehen, te na stéén rí nuū rō ndese coo castigo siquī maá ñahan jnéni jeē cúu ñuu cujéhnū íne nuū iyó cuéhē ndute. <sup>2</sup> Chí tāca rey ñayiví nájñūhun ni casiquí ndéé de jín ñahan ún, cúu jeē ní castóo de Yaā Dios te cándiquin de jñūhun néé ní stéén ña. Te ní sáha ña jeē ñáyuu

ní cáhnu ñayiví, nájñūhun nájñi i te casiquí ndéé i Yaā Dios cúu jeē ní castóo i ya te casáha ndasí i cuéchi. Achí ndajéhé yā.

<sup>3</sup> Te ní sáha ga Espíritu Santo jeē ní jito ndijin rí, te ndajéhé yā un cuáhān yā jín rí nde nuū ñūhun téhé. Te ni jito rí in ñahan, yósó ña in quiṽi xeén cacuéhé. Te ní cáhnu ti ndeé jñūhun néé jéé quiṽi ni Yaā Dios sáha. Te iyó úxā xiní tī jín úxí ndiqui ti. <sup>4</sup> Te ñahan un ñūhun ña sahma ndihí jín sahma cuehé, te suni ñūhun ña siquī oro jín yúu luu jín perla jeē ndeé yahu. Te ndahá ña in cohō oro jeē ñūhun chítú jín jniñu néé ndasé jín jniñu jnehén jéé jíca jnéni ña. <sup>5</sup> Te jneé ña ndéé in síhví jéé cúu in jñūhun sáhi, te suhva cáhān: Yāha cúu ñuu teyí Babilonia, jeē cúu nájñūhun náná tāca jéé cájica jnéni jín jéé casáha néé ndasí ini ñayiví, áchí. <sup>6</sup> Yūcuán na te ni jini rí jeē ñahan un nájñi ña jeē nájñūhun ni jihí ña niñí ñayuu maá Yaā Dios jín níñí ñayuu ni cajihí siquī jeē ní canacani ndaā i jñūhun Jesús. Te nahán ní naa ni rí ni jito rí ña. <sup>7</sup> Yūcuán na te ni cahān ndajéhé un jín rí:

¿Naun nāā ni rō jito ró? Na cástūhun rí nuū rō ndese cúní cahān jñūhun sáhi siquī ñahan un jín quiṽi xeén yosó ña, jeē iyó úxā xiní tī jín úxí ndiqui ti. <sup>8</sup> Quiṽi xeén jeē ní jito ró, chí ni cotecu tī, te vijna chí tuá tī. Te ndenda tucu ti ini túhnchi cúnú, te yūcuán na te quihín tī nuū jnahnú ndetū tī. Te ñayuu cáyūcu ní cáhnu ñayiví, naa ni i coto i nuū quiṽi un jéé ní cotecu tī te ni jihí tī, te natecu tucu ti. Te cácuu i ñayuu jeē tu yósó síhví i nuū tútu jeē yosó síhví ñáyuu cotecu ní cáni jeē ní jécósó síhví i nde quiṽi ni jécóo ñayiví.

<sup>9</sup> Tāca ñáyuu jécūhun vāha ni, cuu tava i cuenta ndese cúu: Ndhúxá xiní tī cácuu nájñūhun uxā yucu nuū néne ñahan ún. <sup>10</sup> Te ndihúxá xiní tī suni cácuu nájñūhun uxā rey. Te

uhūn rey un je ni naa jeē ndácu de jniñu, te ñn de ndácu jniñu vijna, te inga de chi ná tu quiji de. Te núu na quíji de te jecu-ni tiempo coo de. <sup>11</sup> Te quiti xéén jeē ní cotecu te tuá iyó tí vijna, máá tí cuu rey unā. Te ñn jnáhan ndihúxá rey un cúu tí. Te suni quihñn tí nuū jnahnú ndetū tí.

<sup>12</sup> Te ndihúxí ndiqui jeē ní jito ró cúu nájnūhun uxí rey, te ná tu ndacu de jniñu jijnáhan de. Te máá de jíin quiti xéén un, chi nihñn jniñu de cuu de rey jecu-ni tiempo. <sup>13</sup> Te ndihúxí rey un chi squijnáhan de jnūhun, te nacuāha de poder de jíin jniñu ndíso de nuū quiti xéén un návāha ndacu tí jniñu. <sup>14</sup> Te cua-jnáhan de jíin Yaā cúu Londe. Te Yaā cúu Londe quende yā poder de jijnáhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chi ni nacāji Yaā Dios i te ni cana ya i, te cásquicu vāha i. Achí ndajéhé un.

<sup>15</sup> Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tāca ñuu, tāca yuhu, tāca nación. <sup>16</sup> Te ndihúxí ndiqui jeē ní jito ró jéé névāha quiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. <sup>17</sup> Chi Yaā Dios scānda ya ini de jeē na sáha de jniñu cúní yā. Te squijnáhan de jnūhun jeē nacuāha de jniñu ndíso de nuū quiti xéén un, ndacu tí jniñu nde na squícu tāca jnūhun ní cahān Yaā Dios. <sup>18</sup> Te ñahan jeē ní jito ró cúu máá ñuu teyí jéé cujéñnu nuū tāca rey ñayiví. Achí ndajéhé un.

*Siqui jeē naa ñuu Babilonia*

## 18

<sup>1</sup> Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéñnu ndasí yá. Te jeē ndíndēe

yá te ni ndíndēe núu ñayiví. <sup>2</sup> Te ni cana jee ya:

Je ni naa iñ ñuu teyí Babilonia. Te ni nduu vehe tāca táchí, nuū ñúhun ndinuū tachí neé, jíin tāca téji, quiti quíni jeē tu nújnahan ni yō.

<sup>3</sup> Chi ñuu un cúu nájnūhun ñn ñahan ndevāha, te ni sáha ña jeē ñayuu tāca nación, nájnūhun nájini i te cásiquí ndéé i Yaā Dios, cúu jeē ní castóo i ya te cásáha ndasí i cuēchi. Te tāca rey ñayiví, nájnūhun ni casíquí ndéé de jíin ñahan ún jeē ní cajetáhú de jnūhun neé ní steén ña. Te ñayuu ní ñayiví jéé cájeen caxícó, ní cacucucá i jíin cuéhé jeneé jeé ní nevāha ña.

<sup>4</sup> Yūcuán na te ni jini sōho ri inga jnūhun jeē ní cahān ichi ándiví:

Máá ró jeē cácuu ró ñayuu máá rí, quendacoo ró ini ñuu jíñā, návāha ma quívi nduu rō jíin tāca cuēchi jeē sáha ña, te návāha ma ndóho ró jnúndóho xeēn jeē ndoho ña.

<sup>5</sup> Chi ni cayā cuehē ndasí cuēchi ña, nájnūhun ñn montón cáhnu ndasí jéé ní cusúcun ndé ándiví. Te vijna te nduxeēn Yaā Dios siquí cuēchi ña.

<sup>6</sup> Stóho ró ña nájnūhun ni sáha ña jeē ní ndoho sava ga ñayuu. Te nachu-naa rō nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu.

<sup>7</sup> Te yōhyo ni satéyí ña máá ña, te cúcá ndasí ní cotecu ña. Te suni jíin cúhva yúcuan nacuāha ró jéé ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuiti jnúndóho ndoho ri, achí ña. <sup>8</sup> Jeé yúcuan cúu jeē ñn quiví-ni te quiji cuehē jnúndóho siquí ña. Chi cuu ndíyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo iyó poder máá Jitoho yō Yaā Dios, Yaā ní ndonda siquí cuēchi ña, áchí.

<sup>9</sup> Te tāca rey ñayiví jéé ní casíquí ndéé de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cānda

ñuhmā cayú ña. <sup>10</sup> Te cuiñi jícá de chi yūhú de coto de jeē súcuan ndoho ña castigo. Te cahān de jijnáhan de:

Nacā jeē xeēn ndóho ró, ñuu kujéhu Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē náā rō, achi de jijnáhan de.

<sup>11</sup> Te tāca téē ñayīvi jéē cájeen cáxícó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu cáxícó de. <sup>12</sup> Te ndajniñu cáxícó de un cúu oro, plata, yuū luu jín perla jeē ndeé yahu, jín sahma fino jín sahma seda jeē ndihí jín jéē cuehé. Te suni tācá yujnu jeē asñ jéen xicō, jín tāca ndajniñu luu jeē ní sāha jín marfil jín yujnu lúu jeē ndeé yahu jín cáa cuaán jín cáa hierro jín yūu cuijín luu. <sup>13</sup> Te suni cáxícó de canela jín tāca jíhyo asñ jín súde cutú jín súde uvuā jín tāca perfume jín vino jín aceite jín harina fina jín trigo. Te suni cáxícó de quiti ndíso jín lanchi jín caballo jín carreta, te nde ñayuu cáxícó de jeē sájniñu sáa-ni i. <sup>14</sup> Te cahān de jín ñuu ún:

Ni cujiyo ndihí ndajniñu cúcá jeē ní nujnahan ndasí ni rō. Te tāca jéē lúu jeē váha jeē ní cotecu cucá ró, chi ni naa ndihí, te ma nánihñ cuiti gā rō, achi de jijnáhan de.

<sup>15</sup> Te tāca téē ni cajeen ni caxíco ní cacucúcá jéē siquí ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de. <sup>16</sup> Te cahān de jijnáhan de:

Nacā jeē xeēn ndóho ñuu teyí yáha. Chi ni cuu nájnūhun ñn ñahan jeē ní ñūhun sahma fino, sahma ndihí jín jéē cuehé. Te ni ñuhun ña siquí oro jín yūu luu jín perla jeē ndeé yahu. <sup>17</sup> Te vijna te ñn núnúu-ni te ni naa ndihí tācá ndajniñu váha ún, achi de jijnáhan de.

Te cuiñi jícá tāca téē cáscáca barco, jín ñáyuu cuángoo nuū

barco, jín téē cásájniñu ini barco, jín tāca gá téē cásájniñu nuū mar. <sup>18</sup> Chi coto de ñuhmā jeē cayú ñuu ún, te cana jee de jijnáhan de:

¿Ndé íne ga ñuu teyí jéē kujéhu nájnūhun ni íyo ñuu yáha? achi de.

<sup>19</sup> Te cosō de ticachā ñuhun xiní de jeē cácuuihyá ni de. Te ndahyū de te ndahyū cohó de. Te cana jee de jijnáhan de:

Nacā jeē xeēn ndóho ñuu teyí yáha. Chi jín ndajniñu cúcá jeē ni íyo ñuu un ní cacucúcá tāca ñáyuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

<sup>20</sup> Te na cúsiñ ni tāca rōhó jéē cáyucú andiví, siquí jeē ní naa ñuu ún. Te na cúsiñ ni rohó, tāca téē apóstol, jín téē canacani jnūhun Yaā Dios, jín ñáyuu maá Yaā Dios. Chi ni sāha neé ñuu un síquí rō jijnáhan ró, te jeé yúcuau ní ndonda Yaā Dios siquí, achi de.

<sup>21</sup> Yūcuán na te ñn ndajéhé ndíso poder, ni quihin ya ñn yūu cáhnu nájnūhun ñn yōso cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu kujéhu téyí. Te ma núcoo cuiti gā jeē cóto yó núú. <sup>22</sup> Te ni cahān yā jín ñuu ún: Ini calle rō ma cúni sōho cuiti gā ñayuu jeē scáta i yaa arpa jín flauta jín trompeta. Te suni ma cóo cuiti gā ñayuu casáha tācá ndajniñu. Te suni ma cúni sōho ga i jeē ñhñ tācá molino rō. <sup>23</sup> Te ni ñn lámpara ma sāha ga jeē cúndijin nuū rō. Te ni ma cúni sōho ga i vico jeē cácusñ ni ñahan téē nándāha mēñu ró. Te ñayuu ní cajeen ni caxíco nuū rō, ni cacujéhu ndasí i ini ñayīvi. Te ni stahú ró ñayuu tācá nación jín jniñu tasí jín jniñu mágica. Achí ndajéhé un.

<sup>24</sup> Te ñuu un ní nihñ castigo xeēn, chi siquí ñuu un ndeé cuēchi jeē ní jeti niñi tāca téē ní canacani jnūhun Yaā Dios, jín tāca ñáyuu maá yá, jín



tāca gá ñayuu ní cajehni i ní cáhnu ñayíví.

## 19

<sup>1</sup> Te ná ni cuu tāca jéē yáha, te ni jini sōho ri jeē cahán jee cuehē ndasí ñayuu iní andíví:

Yōhoyo cújéhnū Yaā Dios. Chi Yaā Dios maá yó cúu jeē ní jnama yóhó.

Te maá yá cújéhnū ndasí, te maá yá jn# ndíhi poder.

<sup>2</sup> Te ndaā te vāha sándaā yā tācá jniñu,

chi ni ndonda ya síquī cuéchi ñuu neé cújéhnū ún.

Chi ni stívi un ñáyuu ní cáhnu ñayíví jíin jnúhun cásíquí ndéē Yaā Dios.

Te ni sáha ya jeē ní ndutahū ñuu un síquī jeē ní jehni tāca mozo yā.

Achí i jíjnáhan i.

<sup>3</sup> Te ni cacahān tucu i:

Yōhoyo cújéhnū ya. Chi ní cáni canda ñuhmā ñuu un jéē cayú, achí.

<sup>4</sup> Te ndihóco cuūn tēe jéhnū cándiso jniñu, jíin ndicúún jeē técu, ni cajecuiñí yití de, te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuán na cóo. Yōhoyo cújéhnū ya.

<sup>5</sup> Te nde nuū mesa nuū ndácu ya jniñu ni cahān in jnúhun:

Róhó jéē cájejniñu nuū Yaā Dios, jíin róhó jéē cándiso Iyo nuū yā, jeē cácujehnū jíin jéē tu cácujehnū, na cahán rō jeē yóhoyo vāha Yaā cúu ya.

Achí.

*Vico jeē nándāha Yaā cúu Londe*

<sup>6</sup> Te ni jini sōho ri jeē cacahān ñayuu cuehē ndasí, te níhin nájnūhun níhin cuehē yūte, te nájnūhun jeē cahán níhin taja. Te ni cacahān:

Yōhoyo cújéhnū ya. Chi Jitoho yō Yaā Dios, Yaā jniñí ndíhi poder, vijna te ndácu níhin ya jniñu.

<sup>7</sup> Te na cúsiñ ni yō, te siñ ndasí na cóo ni yō,

te na cáhán yō jeē yóhoyo cújéhnū ya. Chi ni quee quiví jeē nándāha maá Yaā cúu Londe.

Te je íyó túhva ñahan nándāha jíin yá, te suu cúu ñayuu maá Yaā Dios.

<sup>8</sup> Te ni níhin ña jnúhun cuhun ña sahma fino jeē ndóo ndasí te xíñú.

Achí i jíjnáhan i. Te sahma fino un cúu táca jniñu ndaā jeē casáha ñayuu maá Yaā Dios.

<sup>9</sup> Te ni cahān ndajéhe yā jíin rí:

Tee ró jnúhun yáha: Nacā jeē ndetū tāca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhe un jíin rí: Tāca jnúhun yáha cúu jnúhun ndaā ni cahān Yaā Dios, achí yá.

<sup>10</sup> Te ni jecuiñí yití rí nuū jehé ndajéhe un jéē chiñúhún rí yā nuū. Te ni cahān yā jíin rí:

Ma sáha ró súcuán. Chi ruhū suni mozo Yaā Dios cúu ri, nájnūhun maá ró jíin tāca hermano rō jeē cácandíje vāha jnúhun Jesús. Sa suhva nuū maá Yaā Dios chiñúhún ró. Achí yá.

Chi jnúhun síquī Jesús cúu jeē cacahān ndaā ñayuu cánacani jnúhun Yaā Dios.

*Yaā yosó síquī caballo cuijín*

<sup>11</sup> Yūcuán na te ni jito ri jeē núne andíví. Te ni cane in caballo cuijín, te Yaā yosó síquī tí naní yá Yaā ndaā, Yaā squícu, chí squícu ya jeē ni jéjnūhun ya. Te ndaā sándaā yā jniñu te ndaā ndóna ya síquī tāca jéneé. <sup>12</sup> Te tinūu yá ndíndēe nájnūhun yáñuhūn. Te xiní yā ñúhun cuehē corona. Te yósó in síhví yá jeē maá-ni ya cúu jeē jíiní. <sup>13</sup> Te ñúhun ya in sahma jeē ni ñúndaji nuū niñí, te nání yá Jnúhun Yaā Dios. <sup>14</sup> Te tācá ndajéhe yā jeē íyó andíví, cáyosō caballo cuijín, cándiquín yatá yā. Te cáñuhun sahma fino cuijín íyó ndoo. <sup>15</sup> Te

ini yuhu máa Yaā jeē yosó síquī caballo, quénda jeē cáa nájñūhun ñn espada xeēn. Te espada un cúu jñūhun ya jeē stóho ya ñayuu tācá nación. Te ñihin ndacu ya jñiñu nuū i. Te sándaā yā síquī cuéchi i nájñūhun jeē jeñū síquī ndehē uva cájexīn. Te cuāha ya castigo xeēn ndoho i jeē quití ni yā síquī cuéchi i. Chi máa yā jñiñi poder. <sup>16</sup> Te sahna ya jíin sñin ya yosó jñūhun yáha: Rey nuū tāca rey jíin Jítoho nuū tāca jítoho, áchí.

<sup>17</sup> Yūcuán na te ni jito ri ñn ndajéhé yā jeē ín nuū níandii. Te ni cana jee ya xiní tācá quiti ndáva nuū tachí:

Ndutútú ró quijicoo ró cuxíni ró ñn vico cáhnu sáha Yaā Dios. <sup>18</sup> Te caji ró cūñu tāca rey jíin capitán jíin téé téyí, jíin cūñu tācá caballo jíin téé ni cayosó síquī tī. Te suni caji ró cūñu tāca gá ñayuu, cúu ñayuu casájñiñu cuenta máa jíin mozo jeē ní cajeen ñayuu, cúu ñayuu cácujeñnu jíin ñayuu tu cácujeñnu. Achí ndajéhé yā.

<sup>19</sup> Yūcuán na te ni jito ri máa quiti xéén jíin tāca rey ñayívi jíin cuéhé soldado de. Te ni candutútú de jeē cuajnáhan de jíin máa Yaā yosó caballo jíin tāca ndajéhé yā. <sup>20</sup> Te ni jñiñi ya quiti xéén cuahán tī preso jíin téé ni nacani jñūhun stáhú jeē ni sáha tācá jñiñu jéñnu jeē ní jito jíinú quiti xéén. Chi jíin jñiñu jéñnu un cúu jeē ni stáhú de tāca ñayuu jeē ní cajēhe jñūhun condiso jñuní quiti xéén, jíin jéé ní cachíñūhún imagen tī. Te quiti xéén un jíin téé ni nacani jñūhun stáhú un, cátecu ndíndúú te ni scáne ya nuū laguna ñuhūn jeē cayú jíin azufre. <sup>21</sup> Te jíin espada jeē cáne yuhu Yaā yosó caballo ni cajihí tācá soldado quiti xéén un. Te tācá quiti ndáva nuū tachí ni candutú chíji tī ni cayeji tī cūñu de jíinájhan de.

*Siquī mil cuiyā*

## 20

<sup>1</sup> Te ni jito ri jeē ní cuun ñn ndajéhé yā ichi ándiví. Te ndáhá yā ndacáa jeē núne tūhñchi cúnú ndasí. Te suni ndáhá yā ñn cadena cáhnu. <sup>2</sup> Te ni jñiñi ya maá cóo cáhnu jeē iyó ndé jenahán ndasí, te nání tī jexeén jíin Satanás. Te ni jihni yā jeē conuhñi mil cuiyā. <sup>3</sup> Te ni scáne ya ini tūhñchi cúnú ndasí. Te ni jesi vāha ya, te ni sácutu yá yuyáú, návāha ma stahú gá un ñayuu tācá nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéé ndají caca cuu jecu na tiempo.

<sup>4</sup> Te ni jito ri tāca mesa nuū ndacu jñiñu, te yūcuán cáyūcu tāca ñayuu jeē ní canihñi jñiñu i sándaā i jñiñu. Te suni ni jito ri anuá tāca ñayuu jeē ní cajehnde xiní i síquī jeē ní canacani i jñūhun Jesús jíin jñūhun Yaā Dios. Te tu ní cáchíñūhún i quiti xéén jíin imagen tī, ni tu ní cájēhe i jñūhun jeē cóndee jñuní tī jñeé i chí ndaha i. Te ni jito ri jeē ní natecu i te ni candacu i jñiñu jíin Cristo mil cuiyā. <sup>5</sup> Yāha cúu ndiyi jeē nátecu xihna gā. Te tāca gá ndiyi, tu ní cánatecu i, chi nde jeē jínu mil cuiyā. <sup>6</sup> Te nacā jeē ndetū tāca ñayuu ndoo ánuá jeē nátecu xihna gā. Chi ma cúu cuiti i vuelta uū. Te cuu i sutū nuū Yaā Dios jíin nuū Cristo, te ndacu i jñiñu jíin yá mil cuiyā.

<sup>7</sup> Te jeē jínu mil cuiyā ún, te ndají Satanás te quenda nuū yíndihyū. <sup>8</sup> Te stáhú tucu ñayuu tācá nación ní cáhnu ñayívi. Te stáhú ñayuu ñuu Gog jíin Magog. Te sáha jeē ndutútú tāca soldado ñuu un jéé cuajnáhan de. Te coo cuehē ndasí de nájñūhun ññí yumar. <sup>9</sup> Te cuité núu de quingoo de ní cáhnu ñayívi. Te cuicó ndúú de ñuu nuū cáyūcu ñayuu máa Yaā Dios, ñuu jeē maní yā jíin. Te Yaā Dios chi scúun ya ñuhūn ichi ándiví, te cayū ndihi de. <sup>10</sup> Te jexeén jeē ni stáhú tāca ñayuu ún, chi scáne ya quihñi nuū

laguna ñuhūn jeē cayú jíin azufre. Te yūcuán chi xīhna gā ni scáne ya quiṭi xéén jíin téé ni nacani jnūhun stáhú. Te yūcuán ndoho nduú ñuú ní cáni cuiṭi.

*Jeē sándaā yā jniñu nuū mesa cuijín*

<sup>11</sup> Yūcuán na te ni jito ri ñin mesa cuijín cáhnu, te néne máá Yaā ndácu jniñu. Te ñayivi jíin andivi ni ndoñuhún cuáhān jeē ní jito ya nuū, chi tuá ni cúu quendōo nuū yā. <sup>12</sup> Te ni jito ri tāca ndíyi, jeē ní cujéhnu jíin jéé tu ní cujéhnu, cáhīn nuū Yaā Dios. Te ni sáha ya jeē núne tāca libro, te suni ni nune inga libro jeé yosó síhvi ñayuu cotecu ní cáni. Te ni sándaā yā siquī tāca ndíyi ún, núu ndese jniñu ni casáha i jíin ndese yosó núu tāca libro un. <sup>13</sup> Te tāca ndíyi jeé ní cajihī nuū mar, ni nanecoo. Te suni ni nanecoo tāca ndíyi jeé ní cajihī i, jeé íne i máá lugar nuū cáyūcu ánuá ndíyi. Te ni sándaā yā siquī, núu ndese ni casáha ñin ñin i. <sup>14</sup> Yūcuán na te cuehyī jéhni ñayuu jíin lugar nuū cáyūcu ánuá ndíyi, ni snáa yā ni scáne ya cuangoo nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeé cúu i vuelta uū. <sup>15</sup> Te yūcuan ní scáne ya tāca ñayuu ni casáha jniñu néé jéé tu yosó síhvi i nuū libro jeé yosó síhvi ñayuu cotecu ní cáni.

*Andivi jéé jíin ñayivi jéé*

**21**

<sup>1</sup> Yūcuán na te ni jito ri andivi jéé jíin ñayivi jéé. Chi andivi jíin ñayivi xīhna ñuhún ni naa. Te suni tuá mar. <sup>2</sup> Te ruhū Juan, ni jito ri ñuu ñi jeé cúu Jerusalén jeé. Te ñuu un ní cuun vēji ichi ándivi núu néne Yaā Dios. Te ñuu ún luu cáa nájnūhun ñin ñahan jeé ni sātūhva ña ni cucutú ña jeé nándāha ña jíin yī ña. <sup>3</sup> Te ni jini sōho ri ñin jnūhun jeé ni cáhān jee ichi ándivi:

Condéhé, chi vijna te ndéé Yaā Dios mēhñu ñayuu. Te condee yā

jíin i jíināhan i, te cuu i ñayuu maá yá. Te máá yá condee yā jíin i jeé cúu ya Yaā Dios i. <sup>4</sup> Te nacuaa yā ndute tñúú i jíināhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnúndóho jeé ni íyo, áchí.

<sup>5</sup> Yūcuán na te ni cahān maá Yaā néne nuū mesa:

Condéhé, chi nasáha jeé rí tāca jéé iyó, áchí yá.

Te suni ni cahān yā:

Tee ró jnúhun yáha. Chi tāca jnúhun yáha cúu jnūhun jeé jiní ndije ró jéé ndaā cúu.

<sup>6</sup> Te ni cahān gā yā:

Je ni jīnu. Máá rí cúu nájnūhun letra A xīhna ñuhún jíin letra Z jeé sándihí na, chi máá rí ni squejéé ndihí te máá rí sínu. Te tāca ñayuu cájichī, súcuan-ni cuāha ri coho i ndute cáne jeé cótecu i ní cáni. <sup>7</sup> Tāca ñayuu jeé cúndeyí siquī jéneé, nihīn i ndihí jeé yáha cuu tahū i. Te cuu ri Yaā Dios i, te cuu i sēhe ri. <sup>8</sup> Te tāca ñayuu jeé cáyūhú ndoho siquī jnúhun ri, jíin ñayuu tu cácandije, jíin ñayuu casáha jniñu néé, jíin ñayuu cájehni ndíyi, jíin ñayuu cájica jnéni, jíin ñayuu casáha tási, jíin ñayuu cáchiñuhún ídolo, jíin tāca ñayuu castáhú, ñayuu ún chi quivicoo i laguna ñuhūn jeé cayú jíin azufre. Te yūcuan cúu jeé cúu i vuelta uū.

*Jerusalén jeé*

<sup>9</sup> Yūcuán na te ni quiji ñin jnāhan ndihúxá ndajéhé jeé ní candāhá ndihúxá cohō jeé ni ñuhun chitú ndihúxá jnúndóho sandihí. Te ni cahān yā jíin rí:

Nehen, te na stéén rī nuū rō ñahan jeé nándāha ña cuu ña ñasihí Yaā cúu Londe, áchí yá.

<sup>10</sup> Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jíin rí xinī ñin yucu cáhnu súcun. Te ni steén yā nuū rī maá ñuu ñi cujéhnu jeé cúu Jerusalén, te ni cuun vēji nde

andiví núū néne Yaā Dios. <sup>11</sup> Te ndíndēé ndasí ñuu un nájñūhun ndíndēé Yaā Dios. Te xíñū nájñūhun xíñū ñn yuū luu jeē ndeé yahu ndasí, nájñūhun yuū cuijín jeē quiyí nájñūhun vidrio. <sup>12</sup> Te yuhu ñūū un ní jicó ndūū ñn jeē cáhnu súcún ndíhyú ñuu ún. Te íyó úxí uū yehyí. Te tāca yéhyí un ín ñn ndajéhé yā. Te tāca yéhyí un yósó síhví ndihúxí uū yucún Israel. <sup>13</sup> Te lado nuū cáne niāndii iyó úní yehyí. Te lado norte suni iyó úní yehyí. Te lado sur suni iyó úní yehyí. Te lado nuū queé niāndii suni iyó úní yehyí. <sup>14</sup> Te íyó úxí uū yuū náhnu jeē cúu cimientó maá jéé ndihyú ñuu ún. Te tāca yūū un yósó síhví ndihúxí uū apóstol maá Yaā cúu Londe.

<sup>15</sup> Te ndajéhé jeē ní cáhān jíin rí, ndáhá yá ñn yujnu oro jeē chícuāha yá ñuu un jíin tāca yéhyí jíin maá jéé ndihyú ñuu ún. <sup>16</sup> Te ñuu ún chí ñn cūhva-ni cúu ndicúun lado. Chí jeé cáni jíin jéé jité, inuú-ni cúu. Te ndajéhé un ní chicuāha yá ñuu un jíin yujnu ún. Te née uū mil uū ciento kilómetro jeē ñn ñn lado. Te inuú-ni cūhva jeé cáni, jeé súcún, jíin jéé jité. <sup>17</sup> Te suni ní chicuāha yá maá jéé ndihyú ñuu ún, te née uní xico cuūn metro jeé súcún. Te yūcuan cúu cūhva jejníñu ñayuu, jeé suni jéjníñu ndajéhé un.

<sup>18</sup> Te maá jéé ndihyú ñuu un ní cuvāha jíin yūū cuijín quiyí. Te ñuu ún chí maá nene oro cúu, te cá nájñūhun vidrio quiyí. <sup>19</sup> Te tāca yūū jeē cúu cimientó maá jéé ndihyú ñuu ún, ní cucutú jíin ndinuū yuū luu jeē ndeé yahu. Yuū ñn cúu yuū cuijín quiyí. Te jeé uú cúu yuū ndeé ndíí. Te jeé uní cúu yuū pinto. Te jeé cuún cúu yuū cuí ndíí. <sup>20</sup> Te jeé uhún cúu yuū pinto jeé ñūhun raya. Te jeé íñú cúu yuū cuehé pinto. Te jeé uxá cúu yuū cuaán quiyí. Te jeé uná cúu yuū cuí ndeé. Te jeé ín cúu yuū cuaán ndíí. Te jeé uxí cúu yuū cuí cuijín. Te jeé uxí ñn cúu yuū cuehé cuaán.

Te jeé uxí uū cúu yuū ndihí ndíí. <sup>21</sup> Te ndihúxí uū yehyí un cácuu uxí uū perla jeé ndeé yahu. Te ñn ñn yéhyí cúu ñn ñn perla. Te maá nene oro cúu calle cáhnu ñuu ún, te quiyí nájñūhun vidrio.

<sup>22</sup> Te tú na templo ní jíto ri ini ñuu ún, chí ní cáhnu ñuu un ndeé maá Jítóho yō, Yaā jñí ndihí poder, jíin Yaā cúu Londe. <sup>23</sup> Te ñuu ún tu jíni ñūhún cundijin jíin luz niāndii jíin yōō. Chí jeé ndíndēé maá Yaā Dios cúu jeé cundijin ñuu ún. Te luz ñuu un cúu maá Yaā cúu Londe. <sup>24</sup> Te ñayuu tācá nación ñayíví jéé ní jnama ya, caca í jeé cundijin luz ñuu un núu í. Te tāca rey ñayíví quijicoo de ñuu ún, quindeca de tācá ndajníñu jeé ndeé yahu jíin jéé kujéhnu de sáha. <sup>25</sup> Te tāca yéhyí ñuu ún ma cóndihyú cuíti nduú, chí tú na jecuāa coo. <sup>26</sup> Te ini ñuu ún quijicoo ñayuu tācá nación, quindeca í tācá ndajníñu jeé ndeé yahu jíin jéé kujéhnu í sáha. <sup>27</sup> Te ma quívícoo cuíti ní ñn jeé jnehén. Ní ma quívícoo ñayuu casáha jniñu néé jíin jéé castáhu. Chí quívícoo máni maá ñayuu jeé yosó síhví í nuū libro jeé yosó síhví ñayuu cotecu níí cáni, jeé névāha Yaā cúu Londe.

## 22

<sup>1</sup> Yūcuán na te ndajéhé yā ní steén yā nuū rí ñn yūte íyó ndoo. Te ndute un sáha jeé cótecu yō níí cáni. Te xíñū nájñūhun vidrio, te cáne nuū mesa nuū ndácu Yaā Dios jniñu jíin Yaā cúu Londe. <sup>2</sup> Te jíca yūte ún sava mēhñu calle cáhnu ñuu ún. Te ndíndúú lado yuyúte un yíhi yujnu jeé cótecu yō níí cáni sáha. Te yujnu un jéhe ndehē uxí uū jínu jeé ñn cuiyā, chí tāca yōō cúun ndehē. Te ndaha yúcu í cúu tajná jeé ndúvāha ñayuu tācá nación. <sup>3</sup> Te tācá-ni jeé ní cáhān yā jeé násūu jéé váha cúu, ma cóo ini ñuu ún. Te ini ñuu ún cuíñí maá mesa nuū ndácu Yaā Dios jniñu jíin Yaā cúu Londe. Te ñayuu cácadíje jeé cácuu í mozo yā,

chiñúhún i ya. <sup>4</sup> Te coto i nuū yā, te condee sihví yá jneē i. <sup>5</sup> Te ma cóo ga jecuaā ñuu ún. Te ñayuu cáyūcu yúcuana tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

*Jeē cuácuyajni ndiji Cristo*

<sup>6</sup> Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíni ndije ró jéē ndaā cúu. Te Jítoho yō Yaā Dios, máá yá sáha jíin téé cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návāha stéén nuū ñayuu cácuu mozo yā táca jniñu jeē yachí coo.

<sup>7</sup> Ndiji yachí rí, achí yá.

Te nacā jeē ndetū ñayuu chusóho jnúhun Yaā Dios jeē yosó núu tútu yáha.

<sup>8</sup> Te ruhū Juan, ni jini sōho ri tāca jnúhun yáha, te ni jito ri táca jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé maá ndajéhé jeē ni stéén táca jniñu yáha núu rí, jeē chiñúhún rí yā nuú. <sup>9</sup> Te ni cahān ndajéhé un jíin rí:

Ma sáha ró súcuau. Chi ruhū suni mozo Yaā Dios cúu ri, nájnūhun máá ró jíin táca hermano rō jeē cánacani jnúhun ya, jíin ndihi ñayuu cájetáhú jnúhun yósó nuū tútu yáha. Sa suhva nuū máá Yaā Dios chiñúhún ró. Achí yá.

<sup>10</sup> Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndihi. <sup>11</sup> Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndō máá i súcuau. Te sa ñayuu casáha jniñu ndaā, na sáha ga i jniñu ndaā. Te ñayuu cáhiyo ndoo ánuá, na cáca ndoo ga i súcuau. Achí ndajéhé un.

<sup>12</sup> Jendaá jeē ndiji yachí rí, achí Jesús. Te quiji ri jíin táhū cuāha ri nuū ñn ñayuu, núu ndese jniñu ni casáha i. <sup>13</sup> Máá rí cúu nájnūhun letra A xihna ñúhún jíin letra Z jeē sándihí na, chi íyó rí nde xihna ñúhún te coo ri ní cáni.

<sup>14</sup> Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chi cuu caji i ndehē yujnu jeē sáha jeē cótecu i ní cáni, te cuu quívicoo i yéhyí ñuu i ún. <sup>15</sup> Te ichi fuera ñuu ún cuiñi ñayuu tu cácañdije, jíin ñayuu casáha tásí, jíin ñayuu cájica jnéni, jíin ñayuu cájehni ndīyi, jíin ñayuu cáchiñúhún ídolo, jíin ñayuu cácusí ni stahú jnáhan.

<sup>16</sup> Máá ruhū Jesús, ni tají rí ndajéhé rí návāha castūhun yá táca jnúhun yáha nuū táca grupo ñayuu cácañdije. Te máá rí ni sáha jeē ní íyo rey David, te ni quiji ri nuū yucún David. Te cúu ri nájnūhun lucero ndíndēe cáne cúndijin. Achí yá.

<sup>17</sup> Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te táca ñayuu jeē jíni sōho, suni na cáhān i:

Nehen, quívicoo ró ndaha ya.

Te táca ñayuu cájichí jeē cáconi i coho i, na quívicoo i ndaha ya, te súcuau-ni na cóho i ndute jeē cótecu i ní cáni sáha.

<sup>18</sup> Te táca ñayuu jíni sōho jnúhun Yaā Dios jeē yosó núu tútu yáha, cáhān níhin ri jíin i: Núu ndé ñayuu chisóo i nuū jnúhun cáhān tutu yáha, te Yaā Dios chisóo yá jnúndóho cáhān tutu yáha, ndoho i. <sup>19</sup> Te núu ndé ñayuu quende i jecu jnúhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu ní cáni, te ma níhín i tahū i ini ñuu i ún. Te tutu yáha cúu jeē cahān siquí táca un.

<sup>20</sup> Te Yaā jeē ni cahān táca jnúhun yáha, suhva cáhān yá:

Jendaá jeē ndiji yachī rī, achí yá. ní.  
Amén. Súcuan na cóo. Jitoho ná Jesús, jícán tahu na jée ndíji yachī

<sup>21</sup> Te ñúhun ni rī jeē Jítoho yō Jesucristo na sáha ga yā jeē váha róhó jíjnáhan ró. Amén.